


GINITAĠŌ VARIĠUNA



The New Testament in the Sinaugoro Language of Papua New
Guinea

GINITAĜO VARIĜUNA
The New Testament in the Sinaugoro Language of Papua New Guinea
Nupela Testamen long tokples Sinaugoro long Niugini

Copyright © 1995 The Bible Society of Papua New Guinea

Language: Sinaugoro

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 18 Apr 2025 from source files dated 31 Aug 2023
a998e4ce-f2f7-5577-968e-5d2feef358f1

Contents

MATAIO	1
MAREKO	66
LUKA	105
IOANE	171
APOSTOLO	223
ROMA	286
1 KORINTO	317
2 KORINTO	347
GALATIA	369
EFESO	381
FILIFI	392
KOLOSE	399
1 TESALONIKA	407
2 TESALONIKA	413
1 TIMOTEO	417
2 TIMOTEO	425
TITO	431
FILEMONA	435
HEBERU	437
IAKOBO	459
1 PETERO	467
2 PETERO	475
1 IOANE	480
2 IOANE	487
3 IOANE	489
IUDAS	491
APOKALUPO	494

VARI NAMONA MATAIO NA ETOREATO

Mataio vaġa-foforina guruġari

Mataio arana ta tu Levi. Ġia tovotovonai tu takesi gogo tarimana, senaġi Iesu na ekeaiato, benamo ġena mero ai eiaġoto.

Ġia tu Iuda tarimana, ma mai Vari Namona tu Iuda tarimari ġeri etoreato.

Ġia na Iuda tarimari ekirarito, Iesu tu moġoni Barau na ekiraġi-toreato Kerisona o vevaġa-maġuri verena. Ginitaġo Guinena o Old Testament ai Keriso beiaġomani guruġana ġetoreato tu varau bema moġoni. Barau ġena guruġa tauri mabarari tu beġe vetoreni veġata (Mataio 5:17). Mataio na ġena Vari Namona nuġanai Keriso varina Old Testament ai ġekiraġi-toreato guruġari ġutuma ma ema torerito anina tu moġea.

Mataio na mai buka tu laġani 58 ema 70 fakari ai etoreato, mo tu Iesu emaseto murinai.

Mataio ġena toretore tu maiġesina eboioġaiato:

1. Iesu aiġesina eiaġomato besena ema ġena maġuri varina - karoa 1-2
2. Ġena vetuġunaġi ġauveina bene sinaia ġana tauġena everovinato varina - karoa 3-4:11
3. Ġena ġauvei esinaiato, evevaġa-ribato, eġobatato, e keve evaġa-namorito variri - karoa 4:12-25:46
4. Ġena midigumidigu varina - karoa 26-27
5. Mase na evariġisi-ġenoġoito ema ġena mero etuġurito variri - karoa 28

Iesu eiaġomato besena

¹ Iesu Keriso emaġurito, tubuna ġatana ġerina eiaġomato varina tu maiġa: Iesu tu Davida garakana, Davida tu Aberahamo garakana.

² Aberahamo tu Isako tamana; Isako tu Iakobo tamana; Iakobo tu Iuda ma kakana ema tarina merori ġesi tamari;

³ Iuda tu Perese e Sera tamari, sinari tu Tamar; Perese tu Hesron tamana; Hesron tu Ram tamana;

⁴ Ram tu Aminadab tamana; Aminadab tu Nasona tamana; Nasona tu Salmon tamana;

⁵ Salmon tu Boas tamana, Boas sinana tu Rahaba; Boas tu Obed tamana, Obed sinana tu Ruta; Obed tu Iese tamana;

⁶ Iese tu Kini Davida tamana.

Davida tu Solomona tamana. Solomona tu Uria ġaraġona ġenana emaġurito, (Uria ġaraġona etava-verariato murinai);

⁷ Solomona tu Rehoboam tamana; Rehoboam tu Abia tamana; Abia tu Asa tamana;

⁸ Asa tu Iehosafat tamana; Iehosafat tu Ioram tamana; Ioram tu Usia tamana;

⁹ Usia tu Iotam tamana; Iotam tu Ahasa tamana; Ahasa tu Hesekia tamana;

¹⁰ Hesekia tu Manase tamana; Manase tu Amon tamana; Amon tu Iosia tamana;

¹¹ Iosia tu Iekonia ma tarina merori ġesi tamari. Mo ġaro ai Babulona tarimari na Isaraela tarimari ġeġabi-iaġorito Babulona ġana.

¹² Babulona ġana ġeġabi-iaġorito murinai, Iesu eiaġomato besena ema ġemaġurito varina tu maiġa: Iekonia tu Sealtiele tamana; Sealtiele tu Serubabele tamana;

¹³ Serubabele tu Abiud tamana; Abiud tu Eliakim tamana; Eliakim tu Asoro tamana;

¹⁴ Asoro tu Sadok tamana; Sadok tu Akim tamana; Akim tu Eliud tamana;

¹⁵ Eliud tu Eleasara tamana; Eleasara tu Matan tamana; Matan tu Iakobo tamana;

¹⁶ Iakobo tu Iosefa tamana, Iosefa ġaraġona tu Maria. Maria ġenana Iesu emaġurito; Iesu arana ġekiraġiani Keriso ġetoni. (Keriso anina tu Barau na ekiraġi-toreato vevaġa-maġuri tauna).

¹⁷ Guru mabarari Aberahamo ġenana eiaġomato mo Kini Davida tu ġuru gabanana vasivasi (14), e Davida ġenana eiaġomato mo Babulona ġana ġeġabi-iaġorito tu ġuru gabanana vasivasi (14), ema Babulona ġana ġeġabi-iaġorito negana na eiaġomato mo Keriso tu ġuru gabanana vasivasi (14).

Iesu eġorato

Luka 2:1-7

¹⁸ Iesu Keriso tu maiġesi eġorato: Ġia sinana Maria tu Iosefa kirakauna, senaġi ġia tauri ruarua tu roġosi roġo beġene veġaraġo nuġanai, Iauka Veaġa na mero evaġa-ġoraiato Maria diana nuġanai.

¹⁹ Iosefa, Maria ġaraġona, tu vei iobukaiobuka tarimana, ema asi eurato, tarimarima ġoirari ai Maria bene vaġa-maiakaia. Moġesina naima ġena ura tu, vekure-toġai vau Maria bene dobi-kwaneana etato.

²⁰ Ġia moġesi etuġamaġito-ġoi nuġanai, Vereġauka ġena aneru ta nuvi ai efoforito, benamo ekiraiato, ekirato, “Iosefa, Davida natuna, kirakaumu Maria ġabiraġena garina asi bono vei, korana ġia tu Iauka Veaġa na mero bevaġa-ġoraia ġia diana nuġanai.

²¹ Ġia na mero ta beġabiani, arana bono vatoa Iesu, (Iesu anina tu vevaġa-maġuri tauna); korana ġia na ġena tarimarima ġeri rakava ġerina bevaġa-maġuririni.”

²² Maiġeri dagara mabarari ġeġorato tu, Vereġauka na peroveta tarimana muruna na ekiraġirito guruġari bene vaġa-moġoniri ġana, ekirato,

²³ “Ġoġitaia, ġuiato ta bekuġani, mero ta beġabiani, mo mero keina arana beġe vatoani Emanuela.”

Emanuela anina tu ‘Barau tu ġita sevisevirai.’

²⁴ Iosefa ġena na etataġato nai tu, Vereġauka ġena aneru na ekiraiato veiġari eveirito. Maria eġabi-raġeato, benamo eġaraġoato.

²⁵ Senaġi ġia ġesi asi ġegenasebonato mo, natuna eġabiato. Benamo mero arana evatoato, Iesu.

2

Iaunega tarimari ġaro-raġeraġena rekena na ġeiaġomato

¹ Iesu tu Iudea tanonai vanuġa ta arana Betelehemai ai emaġurito. Mo tu Kini Heroda na Iudea tanona eġitaġauato-ġoi neganai. Iesu emaġurito murinai, iaunega tarimari tu ġaro eraġeni rekena na ġeiaġomato, Ierusalem-mai ġema-raġasito.

² Benamo ġevedanaġito, ġekirato, “Iuda tarimari ġeri kini ta bemaġuri ġetoni tu ainai? Ġia ġena visiġu baġa ġitaia ġaro eraġeni rekenai. Ġai tu ġia toma-rakarigo vinina baġa iaġoma.”

³ Kini Heroda na mo guruġa eseġaġiato nai, nuġana eketo-bokoto, ema Ierusalem tarimari mabarari maki.

⁴ Benamo ġia na Rubu Veaġa vereri baregori e taravatu vaġa-riba-iaġina tarimari mabarari evaġa-vegogorito, benamo edanaġirito, ekirato, “Peroveta tarimari tu kara ġetato, Keriso, (Barau na ekiraġi-toreato vevaġa-maġuri tauna), tu ainai bemaġurini?”

⁵ Ĝia na ĝevaĝa-veŝeato, ĝekirato, “Betelehema vanuĝana, mo tu Iudea tanonai, korana peroveta tarimana Mika na maĝesi etoreato,

⁶ ‘Betelehema o, Iudea tanonai otanuni vanuĝana, Iuda vanuĝari vekaravari ai ĝoi tu dia vanuĝa misina, asi arana vanuĝana ta, korana tu veĝorikau tauna ta ĝoi ĝemuna beiaĝomani, ĝia na au ĝegu Isaraela tarimari beguine-iaĝirini.’ ”

⁷ Benamo Heroda na iaunega tarimari vekuretoĝai ekearito, benamo edanaĝi-ginikau ginikaurito, ekirato, kamara ĝaro korikori ai visiĝu eforito.

⁸ Benamo etuĝurito Betelehema ĝana, ekirato, “Ĝoiĝo, mero misina boĝonoa vetau-ginikaua, boĝo doĝariani neganai, boĝonoma vaĝa-ribagu, be au maki bana iaĝo, bana toma-rakariĝo vinia.”

⁹ Heroda ĝena guruĝa ĝeseĝaĝiato murinai, ma ĝerakato dabara na. Dabara na ĝeiaĝoto-ĝoi nuĝanai, mo visiĝu, ĝaro eraĝeni rekenai ĝeĝitaiato visiĝuna, na eguine-iaĝirito mo, mero misina ĝena gena gabuna iatanai eruĝa-tarito.

¹⁰ Ĝia na mo visiĝu ĝeĝitaiato nai, ĝeĝiaku-rakavato.

¹¹ Mo numai ĝeraka-toĝato nai, mero misina ma sinana Maria ĝesi ĝeĝitarito, benamo ĝevetui-tarito, ĝetoma-rakariĝoato. Moĝa murinai ĝeri farefare ĝeĝurarito dagarari ĝekeorito, bena ĝevarevare-viniato. Ĝevarevare-viniato dagarari tu golo, e muramura arana frenkinsens, mai tu goĝuna ma bonana namona muramurana, ema vedau muramurana arana muro.

¹² Benamo Barau na nuvi ai evaĝa-ribarito, ekirato, “Heroda ĝenai asi boĝono ĝenoĝoi.” Moĝa lorinai dabara boruna na ĝeri tanobara e vanuĝa ĝana ĝeĝenoĝoito.

Iesu Aigupito ĝana ĝeĝwa-iaĝoato

¹³ Ĝia ĝerakato murinai, Vereĝauka ĝena aneru nuvi ai Iosefa ĝenai eforito, ekirato, “Novaisiraĝe, mero misina ma sinana ĝesi Aigupito ĝana noraga-ĝori iaĝori. Monai boĝono tanu mo, au na ma bavaĝa-guruĝamuni, korana Heroda na mero misina evetauani, bene vaĝi-masea etoni.”

¹⁴ Benamo Iosefa evariĝisito, mero misina ma sinana ĝesi eĝabirito, boĝi nuĝanai Aigupito ĝana ĝeiaĝoto.

¹⁵ Monai ĝetanuto mo, Heroda emaseto. Moĝesina Vereĝauka na peroveta tarimana muruna na ekiraĝiato guruĝana ema moĝonito, ekirato, “Aigupito na natugu akea-roŝiato.”

Heroda ĝena guruĝa lorinai mero misiri ĝutuma ĝevaĝi-maserito

¹⁶ Heroda eriba-maoroto, mo iaunega tarimari na ĝia tu ĝeĝofaiato nai, ebaru-rakava rakavato. Benamo vetari tarimari o soldia etuĝurito, Betelehema e rikina tanori ai mero misiri ĝeri maĝuri laĝaniri ruarua e gabivau ma ĝemaĝurito mabarari ĝevaĝi-maserito. Mo mero misiri ĝeri maĝuri laĝanina ruarua ma murinai ĝevaĝi-maserito anina tu, iaunega tarimari na visiĝu ĝeĝitaiato ĝarona na, eiaĝoto mo, Heroda eribato ĝarona tu laĝani ruarua kavana.

¹⁷ Mo ĝaro ai Barau na peroveta tarimana Ieremia muruna na kara ekiraĝiato guruĝana tu ema moĝonito, ekirato,

¹⁸ “Ĝaro ta Rama vanuĝanai ĝeseĝaĝiato, taĝi-koĝokoĝo e taĝi-vanorovanoro tu barego, Rahela natuna taĝiri eveini, e asi eurani beĝene vaĝa-magoa, korana natuna tu beĝe mase.”

Nasareta ĝana ĝeĝenoĝoito

¹⁹ Heroda emaseto murinai, Veregāuka gēna aneru Iosefa gēnai nuvi ai ma efoforito Aigupito ai.

²⁰ Benamo mo aneru Iosefa ekiraiato, ekirato, “Novaisiraḡe, mero misina ma sinana gēsi noḡabiri, Isaraela tanona gāna gōiaḡo. Korana tu mero misina beḡene vaḡi-masea ḡetato-ḡoi tarimari tu varau beḡe mase.”

²¹ Iosefa evariḡisito, benamo mero misina ma sinana gēsi eḡoririto, Isaraela tanona gāna ḡeiaḡoto.

²² Senaḡi Iosefa eseḡaḡito, Akelao na Iudea eḡitaḡauato-ḡoi tamana Heroda gabunai, benamo mo gāna iaḡo tu egarito. A Barau na nuvi ai evaḡa-ribaiato ilailanai eraka-vanaḡito, eiaḡoto Galilea tanona rekena gāna.

²³ Galilea tanonai vanuḡa ta arana Nasaretai etanuto. Monana Barau na peroveta tarimari ḡerina Iesu ekiraḡiato guruḡana emoḡonito, ekirato, “Ġia tu Nasareta tarimanai beḡe kiraḡiani.”

3

Ioane Babatiso eḡobatato

Ioane 1:19-28

¹ Moḡeri ḡarori ai Ioane Babatiso eiaḡomato, tano fakanai Iudea nuḡanai eḡobatato-ḡoi, ekirato,

² “Ġemi rakava ḡerina ḡovetuḡamaḡi-kure, ema ḡoraka-kure Barau gēnai, korana Guba Basileiana tu bevotu, (Barau gēna veḡitaḡau seḡukana evaḡa-ruḡaiiani maiḡa).”

³ Mai Ioane maiḡa tu Isaia peroveta tarimana na ekiraḡiato-ḡoi, maiḡesi ekirato,

“Tarima ta tano fakanai ekeani, ekirani, ‘Vereḡauka gēna dabara ḡoiarevaia, gēna iaḡoma dabarana ḡovaḡa-maoromaoroa.’”

⁴ Ioane gēna dabuḡa tu kamela ḡuiri na ḡeveiato, gēna gabaḡau tu nanigosi kefina. Gāna ḡaniḡani dagarari tu madudu e gode nanuri moḡo.

⁵ Tarimarima Ierusalemāna na e Iudea mabarana na ema Ioridana douka vanuḡari mabarari na maki ḡeiaḡoto-ḡoi Ioane gēnai.

⁶ Ġeri rakava ḡekiraḡi-foforirito-ḡoi vau, ebatisorito-ḡoi Ioridana ḡarukanai.

⁷ Farisea e Sadukea tarimari ḡutuma maki ḡia gēnai ḡeiaḡoto bene babatisori gāna. Ioane na eḡitarito nai, ekirarito, ekirato, “Ġomi mota naturi, dei na bekirami, Barau gēna Kota baregona ḡarona ḡenana boḡo raga-maḡurini?”

⁸ Ġemi rakava ḡerina boḡono vetuḡamaḡi-kure, benamo ḡemi maḡuri ai ḡwaḡwa namori boḡono vaḡa-ḡwari.

⁹ Ema nuḡami ai asi boḡono kira, ‘Aberahamo tu ḡai tamama, (be Barau na beḡabi-raḡemani).’ Korana akiramini, Barau tu ma seḡukana, Aberahamo natuna tu mai fore ḡerina bevaḡa-ḡorarini!”

¹⁰ Toma koko tu ḡau korari ai varau beḡe toreri; moḡa lorinai ḡwaḡwa namori asi ḡevaḡa-ḡorarini ḡauri mabarari tu beḡe basirini, karavai beḡe fiu-raḡerini.

¹¹ Deikara gēna rakava ḡerina evetuḡamaḡi-kureni tarimana, au na tu nanu na ababatisoani. Senaḡi au murigu na beiaḡomani tarimana gēna seḡuka tu lelevaḡi, au ḡegu seḡuka maki evanaḡiani, ema ḡia gēna tamaka maki au na asi baḡwa-rakaorakaoani riba. Ġia na tu Iauka Veaḡa e karava na bebabatisomini.

¹² Ġia ḡimanai tu iareva-iareva dagarana, widi momona tu widi tauri ḡenana bene iareva-ḡitakauri gāna. Benamo widi tu gēna vaḡa-vegogo

numanai bevaḡa-vegogorini, senaḡi widi momona begabuani asi ebuseni karavanai.”

Ioane na Iesu ebatisoato
Mareko 1:9-11; Luka 3:21-22

¹³ Moḡa neganai Iesu tu Galilea vanuḡana na Ioridana ḡarukana ḡana eiaḡoto, Ioane na bene babatisoa ḡana.

¹⁴ Senaḡi Ioane na ekiraḡoiato, ekirato, “Bere namo ḡoi na au boro babatisogu. Karase nai au ḡegu ai boiaḡoma?”

¹⁵ A Iesu na evaḡa-veseato, ekirato, “Veḡana noveia, korana veḡa iobukaiobuka o Barau ḡena ura veḡari mabarari bitana korana-iaḡiri tu namo.” Benamo Ioane na Iesu ḡena ura veḡana eveiato.

¹⁶ Iesu ebatisoato, nanu na eraka-raḡasito nuḡanai, guba evekeo-fakato, benamo ḡia na Barau Iaukana eḡitaiato, pune kavana emariḡoto ḡia iatanai.

¹⁷ Ema garo ta guba na ekea-riḡoto, ekirato, “Mai tu au Natugu, aura-viniani; ema ḡia ḡenai aiaku-rakavani maki.”

4

Diabolo o Satani na Iesu eriba-ḡaniato

¹ Moḡa murinai Iauka Veḡa na Iesu tano fakana ḡana eḡori-iaḡoato, Diabolo na bene riba-ḡania ḡana.

² Ḡaro e boḡi gabana vasivasi (40) nuḡari ai asi eḡaniḡanito, eḡani-veaḡato; moḡa lorinai vito na eḡabi-rakavaiato.

³ Benamo Veribaḡani Tarimana Diabolo ḡia ḡenai eiaḡoto, ekiraiato, ekirato, “Bema ḡoi Barau Natuna nai, mai fore nokirari, be ḡaniḡani ai ḡeiaḡo.”

⁴ A Iesu na evaḡa-veseato, ekirato, “Buka Veḡa nuḡanai maiḡesi ekirani, ‘Tarimarima tu dia ḡaniḡani na moḡo bemaḡurini. Senaḡi Barau ḡena guruḡa beḡabi-raḡerini e bekorana-iaḡirini tarimana tu maḡuri beḡabiani.’ ”

⁵ Benamo Diabolo na Ierusalem, siti veaḡana, ḡana eḡori-iaḡoato, Rubu Veḡa tuḡuna vanigerenai evaḡa-ruḡakauato.

⁶ Benamo ekirato, “Bema ḡoi Barau Natuna, mainana noburi-firiḡo, korana Buka Veḡa nuḡanai maiḡesi ekirani, ‘Barau na ḡena aneru bevaḡa-naḡirini, benamo ḡimari na beḡe ḡobemuni, beḡe ḡabi-vaisimuni, kwakumu fore ai asi boraraiani.’ ”

⁷ Iesu na ma evaḡa-veseato, ekirato, “Buka Veḡa nuḡanai maki ekirani, ‘Vereḡauka ḡoi ḡemu Barau asi bono riba-ḡania.’ ”

⁸ Benamo Diabolo na Iesu eḡori-raḡeato ḡoro baregona e maukana ta tuḡunai, tanobara basileiari mabarari ma marevari namori e ma seḡukari ḡesi evaḡa-ḡitaiato,

⁹ ekirato, “Bema ḡoiragu ai bovetui-tarini e au botoma-rakarioḡo viniguni nai tu, maiḡeri mabarari au na bavanimuni.”

¹⁰ Benamo Iesu na ekiraiato, ekirato, “Satani, au ḡeguna noraka-veḡita. Korana Buka Veḡa nuḡanai ekirani, ‘Vereḡauka ḡoi ḡemu Barau bono toma-rakarioḡo vinia, ḡia moḡo ḡereḡana vetuḡunaḡina bono iaḡo-vini!’ ”

¹¹ Benamo Diabolo na eraga-kwaneato. Aneru kotari Iesu ḡenai ḡeiaḡoto, ḡenariato.

Iesu ḡena ḡauvei esinaiato Galileai
Mareko 1:14-15; Luka 4:14-15

¹² Iesu eseḡaḡito, Ioane ḡe-diburaiato, benamo Galilea tanona ḡana ma eḡenoḡoi-iaḡoto.

¹³ Senaḡi Nasareta vanuḡana ma eragakwaneato, asi etanuto, eiaḡoto, Kaperanaumai ea tanuto. Kaperanaumai tu Genesareta kouna sevina vanuḡana ta, Sebulun e Naftali tanori nuḡanai.

¹⁴ Moḡa ḡenana Isaia, peroveta tarimana, ḡena guruḡa emoḡonito, ekirato,
¹⁵ “Sebulun e Naftali tanori ai ḡotanuni tarimami o, Galilea kouna rikinai ema Ioridana ḡarukana mo rekenai, irau bese tarimami, Barau asi ribami tarimami, ḡemi Galilea tu moḡa, ḡoseḡaḡi.

¹⁶ Mukunai ḡetanuto-ḡoi tarimari tu mama barana varau ḡeḡitaiani. E mo dei mukuna furufuru tanonai ḡetanuto-ḡoi tarimari iatari ai mama varau bema fofori.”

¹⁷ Mo negai vau Iesu na ḡena vari eḡobata-iaḡi-foforiato, ekirato, “Ḣemi rakava ḡerina ḡovetuḡamaḡi-kure, ema ḡoraka-kure Barau ḡenai, korana Guba Basileiana tu bevotu, (Barau ḡena veḡitaḡau seḡukana evaḡa-ruḡaiani maiḡa).”

Iesu na tarima vasivasi (4) ekearito, ḡia murinai beḡene raka

Mareko 1:16-20; Luka 5:1-11

¹⁸ Iesu Galilea kouna kone rikina na eraka-iaḡoto-ḡoi nuḡanai, tarikaka ruarua, Simona, arana ta tu Petero, ma tarina Anduru ḡesi eḡitarito, ḡeri reke kou ai ḡefiuato, korana ḡia tauri ruarua tu maina tarimari.

¹⁹ Benamo Iesu na evaḡa-guruḡarito, ekirato, “Ḣoiḡoma, murigu ai ḡoma raka, be au na tu tarimarima maina viniri bana vaḡa-ribami.”

²⁰ Benamo maoromaoro ḡeri reke ḡeraga-kwanerito, Iesu murinai ḡerakato.

²¹ Monana ḡeraka-iaḡoto-ḡoi nai, Iesu na tarikaka ruarua ma eḡitarito, Iakobo (o Iames) Sebedaio ma tarina Ioane ḡesi; ḡeri ḡasi ai tamari Sebedaio ḡesi ḡeri reke ḡwadareri ḡeturirito. Iesu na ekearito,

²² benamo maoromaoro ḡeri ḡasi e tamari ḡeraga-kwanerito, Iesu murinai ḡerakato.

Iesu evevaḡa-ribato ema keve tarimari evaḡa-namorito

Luka 6:17-19

²³ Iesu Galilea tanona mabarana erakaoto-ḡoi, Iuda tarimari ḡeri rubu nuḡari ai evevaḡa-ribato-ḡoi, e Barau ḡena Basileia, (ḡena veḡitaḡau seḡukana evaḡa-ruḡaiani), varina namona eḡobata-iaḡiato-ḡoi. Ema tarimarima ḡeri keve e midigu irauirau mabarari evaḡa-namorito.

²⁴ Ḣia varina ḡefiuato, Siria tanona mabarana eḡabiato, benamo tarimarima na ḡeri keve tarimari mabarari ḡia ḡenai ḡeḡwa-iaḡorito e ḡeḡori-iaḡorito: Midigu irauirau, iauka rakavari na ḡeboroḡirito tarimari, ḡue na evaḡiani kevena, tauḡani ḡeḡoḡoḡoḡoni, e tauḡaniri tavi tari ḡemaseto tarimari, Iesu na mabarari evaḡa-namorito.

²⁵ Tarimarima ḡutuma-bara ḡia murinai ḡerakato, Galilea na, Vanuḡa Gabanana (10) na, Ierusalem na, Iudea na, ema Ioridana ḡarukana mo rekena na maki ḡia ḡekavaiato.

5

Iesu ḡoro tuḡunai eḡobatato

¹ Iesu na tarima ḡutuma-bara eḡitarito, benamo ḡoro tai eraḡeto, iatanai etanu-tarito. Ḣena mero ḡia ḡenai ḡeiaḡoto.

² Benamo ḡia na evaḡa-riba matamarito, maiḡesina ekirato:

Iaku e verere korikorina

Luka 6:20-23

- 3 “Manau tarimari, Barau ġenai moġo ġevetabekauni tarimari, tu beġene iaku, korana Barau ġena Basileia tu ġia ġeri.
- 4 Deidei toma ġenuġa-midigu midiguni tarimari tu beġene iaku, korana Barau na ġeri nuġa-midigumidigu bevaġa-magorini.
- 5 Manau tarimari tu beġene iaku, korana Barau na tanobara mabarana ġia bevinirini.
- 6 Veiġa iobukaiobuka vitona ġevito-iaġiani e nanumasena ġen anumase-iaġiani tarimari tu beġene iaku, korana vau beġe ġani-maseni.
- 7 Vevetuġaġwa tarimari tu beġene iaku, korana Barau na ġia maki bevetuġa-ġwarini.
- 8 Deidei nuġari namo vedaurea tarimari tu beġene iaku, korana ġia na Barau beġe ġitaiani.
- 9 Deidei na toma vevaġa-maino veiġari ġeveirini tarimari tu beġene iaku, korana Barau na ġia natunai bekiraġirini.
- 10 Deidei na toma veiġa iobukaiobukari ġeveirini ġaramanai ġevaġa-midigu midigurini e ġevaġa-rakavarini tarimari tu beġene iaku, korana Guba Basileia tu ġia ġeri.
- 11 Bema au murigu ai ġorakani ġaramanai ġomi beġe mugumugu-iaġimini, beġe vaġa-midigu midigumini, e veiġa rakavari iraurau ġemi ai beġe kiraġirini beġe ġofaġofa-iaġimini nai, boġono iaku.
- 12 Boġono iaku, boġono verere, korana Barau na voimi baregona bevinimini gubai. Maiġesina veiġa ilailana, ġomi murimi tarimari, peroveta tarimari guineri, na maki moġesi ġevaġa-rakavarito.”

Damena e mama

Mareko 9:50; Luka 14:34-35

13 “Ġomi tu tanobara damenana. Bema damena mamina korikorina bekorini nai, kamara dabarai mamina ma beġenoġoini? Mai tu varau berakava, asi ġena namo ta. Moġa lorinai beġe fitoġaiani, benamo tarimarima kwakuri na ma beġe fanafana-tariani.

14 Ġomi tu tanobara mamana. Ġoro tuġunai ġevaġa-ruġaiato vanuġana tu asi bevekuretoġani riba.

15 Lamefa beġe gabuani maki, ġuro gaburenai asi beġe toreani, senaġina lamefa toretorena fatana korikorinai beġe tore-kauani. Benamo ġia mamana na numa tarimari mabarari bevinirini.

16 Ilailana, ġomi ġemi mama tarimarima ġoirari ai moġesi boġono vaġa-foforiri, be ġemi veiġa namori beġene ġitari, benamo Tamami gubai etanuni tu beġene vaġa-raġea.”

Iesu ema taravatu

17 “Maiġesina asi boġono tuġa-maġi, au aiaġomato tu, Mose ġena taravatu e peroveta tarimari ġeri guruġa asi aniri ai bana vaġa-iaġori ġana. Asiġina. Au tu asi aiaġomato moġeri guruġa asi tauri ai bana vaġa-iaġori ġana, senaġi bana vaġa-moġoniri e bana vaġa-kori ginikauri uranai aiaġomato.

18 Moġoni akira-mini, guba e tanobara roġo ġetanuni nuġanai, taravatu ġena leta misina korokorona ta o ġena koma ta asiġina ġinavaġi berekwarekwani, beiaġoni mo, taravatu mabarari tauri korikori beġea ġorani.

19 Moġa lorinai, tarima ta na taravatu misina korokorona ta bekirasirivaġi viniani, ema ġena ura veiġanai tarima kotari mai veiġa ilailana ma bea vaġa-ribarini, ġia tu Guba Basileiai gabi tarimanai beġe kiraġiani. Senaġina tarima ta na taravatu bekorana-iaġirini ema tarima kotari ma bea vaġa-riba iaġirini, ġia tu guine tarimanai beġe kiraġiani Guba Basileia nuġanai.

²⁰ Akira-korikorimini, bema ġomi ġemi vei-iobukaiobuka na Farisea e taravatu ġevevaġa-riba iaġiani tarimari ġeri vei-iobukaiobuka asi bevanaġiani nai, ġomi tu Guba Basileia nuġanai asi boġo raka-toġani, asiġina ġinavaġi.”

Vaġivaġi

Luka 12:57-59

²¹ “Ġomi ma ribami, tarima guineri na taravatu guruġari ġeġabirito, ġekirato, ‘Asi bono vaġivaġi! A deikara na tarima ta bevaġiani nai, ġia tu Kota gabuna ġana beiaġoni.’

²² Senaġi toma au na akiramini: Tarima ta tarikakana bebaru-viniani nai, ġia tu Kota gabunai beġe danaġiani. E dei na tarikakana beguruġa-rakava viniani nai, ġia tu Kota baranai beġe vaġa-ruġaiiani. Ema dei na tarikakana bekiraiani, ‘Ġoi tu babo korikori’ betoni nai, ġia tu asi ebuseni karavana ġana beiaġoni.

²³ Moġa lorinai, bema ġemu varevare dagarana fata veaġana iatanai bono torekaua, Barau bono vinya otoni nuġanai, ġoi tarikamu otuġamaġiani, ġia ma ġena meto ġoi ġemu ai,

²⁴ benamo ġemu varevare dagarana fata veaġana ġoiranai noragawanea, noiaġo, tarikakamu ġesi maino boġono ġabia roġo, gabivau bono ġenoġoi-iaġo, ġemu varevare dagarana fata veaġanai bono torea Barau ġena.

²⁵ Ġoi ebaru-vinimuni tarimana ġesi maino boġono raga-ġabia, Kota gabuna ġana roġo mani ġoraka-vegogoni nuġanai. Korana ebaru-vinimuni tarimana na Kota eseġaġini tarimana ġimanai bea tore-kaumuni ġesi, ema Kota eseġaġini tarimana na dibura numana ġitaġauna tarimana ġimanai betoremuni, benamo ġia na dibura numana nuġanai bebiri-ġaumuni garina.

²⁶ Au na akira-korikorimuni: Monana asi roġo boraka-rosini, beiaġoni mo, ġemu meto voina bodava-ġosiani.”

Veġura-vanaġi

²⁷ “Ġomi ma ribami, tarima guineri na taravatu guruġari ġeġabirito, ġekirato, ‘Asi bono veġura-vanaġi!’

²⁸ Senaġi au na akiramini: Deikara na tarima ta ġaraġona beġitakarakaiani ma eurani bene ġabia ġia ġena, ġia tu nuġana tuġamaġina ġenana varau beveġura-vanaġi mo vavine ġenai.

²⁹ Bema ġoi matamu aroribana na evaġa-rakavamuni nai, bono ġibo-vaġia, bono fitoġaia! Korana tauġanimu rakavana rekena berekwa-rekwanu tu namo, a asi namo tauġanimu mabarana karava asi ebuseni gabunai beġe fiu-kauani.

³⁰ Ma bema ġoi ġimamu aroribana na evaġa-rakavamuni nai, bono basi-ġutua, bono fitoġaia. Veġa namona tu, tauġanimu rakavana rekena bono fitoġa-guinea, be tauġanimu mabarana karava eġara-vanaġi vanaġini gabuna ġana asi bene iaġo.”

Vavine tuġuraka

Mataio 19:9; Mareko 10:11-12; Luka 16:18

³¹ “Tarima guineri na taravatu guruġari ġeġabirito, ġekirato, ‘Tau ta ġaraġona betuġu-rakaiani nai, ġia na veġaraġo ruġaruġana fefana bene torevinia.’

³² Senaġina au na akiramini: Bema tarima ta ġaraġona betuġu-dobiani, senaġi vavine tu veġura-vanaġi veiġari asi eveini, mo tau na ġaraġona tu veġuravanaġi vavinenai evaġa-iaġoani. Ema deikara na etuġu-rakaiato vavinenata beġaraġoani tarimana tu, beveġura-vanaġini.”

Guruġatore

³³ “Ĝita senera ĝevaĝa-ribarito guruĝari ĝomi tu ma ribami: ‘Ĝemi guruĝatore asi boĝono vaĝa-rakavaia, senaĝi Vereĝauka ĝoiranai ĝokiraĝi-toreto dagarari boĝono veiri.’

³⁴ Senaĝi au na akiramini: Asi boĝono guruĝatore veĝata! Ĝemi guruĝa vaĝa-gwaĝiĝiri ĝana guba asi boĝono kiraĝia, guba aranai asi boĝono guruĝatore, korana ĝia tu Barau ĝena terona;

³⁵ o tanobara aranai maki asiĝina, korana ĝia tu Barau kwakuna ĝena fanakau dagarana; o Ieruselema aranai, korana ĝia tu Kini baregona ĝena siti.

³⁶ Ĝoi debamu, ĝemu maĝuri, maki asi bono kiraĝia ĝemu guruĝatore vaĝa-gwaĝiĝina ĝana, korana ĝoi na ĝuimu sebona ta asi bovaĝa-kurokuroani e asi bovaĝa-dubadubaiani riba.

³⁷ Namona tu maiĝa: Ĝemu guruĝa bono kiraĝia, ‘Oi’ bene oi e ‘Asiĝina’ bene asiĝina. Moĝa moĝo, a guruĝa tari ma okiraĝirini tu Tarima Rakavana, Satani, ĝenana eiaĝomani.”

Evaĝa-rakavamuni tarimana voina asi bono veia

Luka 6:29-30

³⁸ “Tarima guineri ĝevaĝa-ribarito guruĝari ĝomi tu ma ribami, maiĝesi ĝekirato: ‘Mata voina mata e doĝa voina doĝa.’

³⁹ Senaĝina au na akiramini, veiĝa rakavana evei-vinimuni tarimana asi bono veiĝa rakava-vinia. Bema tarima ta na taĝomu aroribana beforoani nai, taĝomu kaurina ma bono vinia maki.

⁴⁰ E bema tarima ta na Kotai betoremuni ĝemu sedi bene ĝabia ĝana nai, ĝemu koudi maki bono vinia.

⁴¹ Ema tarima ta na belau-naĝimuni, kilomita sebonai bono kavaia betoni nai, kilomita ruarua ai ma bono raka ĝia ĝesi.

⁴² Ema enoĝinoĝini tarimana bono vinia, e ĝemu ai bene ĝabitore etoni tarimana maki asi bono kira-sirivaĝi vinia.”

Ĝevaĝa-rakavamuni tarimari bono ura-viniri

Luka 6:27-28; 6:32-36

⁴³ “Tarima guineri ĝevaĝa-ribarito taravaturi ma ribami, ĝekirato: ‘Ĝoi sevimu tarimana bono ura-vinia, a evaĝa-rakavamuni tarimana bono vaĝa-rakavaia.’

⁴⁴ Senaĝina au na akiramini: Ĝebaru-vinimini tarimari boĝono ura-viniri, e dei na ĝevaĝa-rakavamini tarimari maki iatari ai boĝono ĝauĝau.

⁴⁵ Maiĝa ĝenana boĝo vaĝa-foforiani, ĝomi tu Tamami gubai etanuni na natunai evaĝa-iaĝomito. Korana ĝia na ĝaro tu veiĝa rakava tarimari e veiĝa namo tarimari iatari ai evaĝa-raĝekauani, ema ĝura maki veiĝa iobukaiobuka e veiĝa ĝeĝeva-ĝeĝeva tarimari ĝeri etuĝu-riĝoani.

⁴⁶ Bema ĝoura-vinirini tarimari tu ĝomi ĝeura-vinimini tarimari moĝo nai, kamara varevare namona boĝo ĝabiani? Takesi ĝegogoni tarimari o ĝofaĝofa tarimari na maiĝesina maki ĝeveiani.

⁴⁷ Ema tarikakami moĝo boĝo vaĝa-namorini, ĝemi namo tu kara? Barau asi ribari tarimari na maki mai veiĝa ĝeveiani.

⁴⁸ Moĝa lorinai ĝomi tu asi vetoukaumi boĝono tanu, ĝomi Tamami gubai etanuni asi vetou-kauna kavana.”

6

Vini korikorina rabu tarimari ĝeri ai

1 “Rorimi boĝono vetore, ĝemi veigā namori tarimarima ĝoirari ai asi boĝono vaĝa-foforiri, ĝia na beĝene vaĝa-raĝemi ĝana. Maiĝeri boĝo veirini nai, Tamami gubai etanuni ĝenana voimi asi boĝo ĝabini.

2 Moĝesi nai, ĝemu varevare rabu tarimari bovinirini nai, asi bono ĝobata-iaĝia ma kibimu ĝesi, ĝofaĝofa tarimari rubu ai e vanuĝa ĝatamanai ĝeveini kavana, tarimarima na beĝene vevato-iaĝiri ĝana. Akira-korikorimini, ĝia tu tarimarima na ĝevaĝa-raĝerini, be voiri tu varau ĝeĝabirito.

3 Sena-ĝina ĝoi ĝemu varevare asi ĝena-ĝana tarimana novinia botoni nai, ĝimamu kaurina asi bene riba, ĝoi ĝimamu aroribana na kara eveiani.

4 Be ĝemu varevare vekuretoĝai bono vini. Ema Tamamu na, kara eĝorani vekure-toĝai eĝitarini, ĝia na vau voimu bevinimuni.”

Vereĝauka ĝena ĝauĝau

Luka 11:2-4

5 “Bema boĝo ĝauĝauni nai, ĝofaĝofa tarimari kavana asi boĝono iaĝo! Ĝia ruĝaruĝari ai ma iakuri ĝesi ĝeĝuriĝurini, rubu nuĝari ai e vanuĝa ĝatamanai ema dabarai maki, tarimarima na beĝene ĝitari ĝana. Au na akira-korikorimini, ĝia voiri varau ĝeĝabito.

6 A ĝoi ourani bono ĝauĝau otoni nai, ĝemu numa daiĝutuna nuĝanai bono rakatoĝa, ĝatama-boka bono biri-ĝaua, monai vau Tamamu bono noĝi-vinia, ĝia tu vekuretoĝai etanuni. Ema Tamamu na, kara eĝorani vekuretoĝai eĝitarini, ĝia na vau voimu bevinimuni.

7 Ĝomi boĝo ĝauĝauni nai, asi boĝono kiraĝi ĝenoĝoi-ĝenoĝoi guruĝa asi aniri ĝeri ai, Barau asi ribari tarimari ĝeveini kavana. Ĝia ĝetuĝamaĝini, ĝeri guruĝa vovoka ĝekiraĝirini naima, Barau na beseĝaĝirini.

8 Ĝia kavari asi boĝono iaĝo. Korana ĝomi na kara ĝoura-vinirini, Tamami na eriba-guineani, gabivau ĝomi na ĝonoĝi-viniani.

9 Maiĝesina boĝono ĝuriĝuri:

‘Ĝai Tamama o, gubai otanuni; ĝoi aramu baĝana vaĝa-veaĝaia;

10 ĝemu Basileia bene iaĝoma; ĝemu ura tanobarai baĝana veia, gubai ĝeveiani kavana.

11 Ĝema-ĝama toma bono vinima.

12 Ĝema rakava notuĝamaĝi-fitoĝari, ĝai ĝevaĝa-rakavamani tarimari ĝeri rakava ĝatuĝamaĝi-fitoĝarini vaĝa-ilailana.

13 Veribaĝani ai asi bono ĝori-kauma, a Rakava Tarimana, Satani, ĝimana na bono vaĝa-maĝurima. [Korana Basileia tu ĝoi ĝemu, seĝuka ĝoi ĝemu, mareva baregona ĝoi ĝemu, toma bene iaĝo mo vanaĝivanaĝi, Amen.]’

14 Bema ĝomi na ĝevaĝa-rakavamini tarimari ĝeri rakava boĝo tuĝamaĝi-fitoĝarini nai, Tamami gubai etanuni na ĝemi rakava maki betuĝamaĝi-fitoĝarini.

15 Senaĝina, bema ĝomi na ĝevaĝa-rakavamini tarimari ĝeri rakava asi boĝo tuĝamaĝi-fitoĝarini nai, Tamami na ĝemi rakava maki asi betuĝamaĝi-fitoĝarini.”

Ĝaniveaĝa

16 “Boĝo ĝani-veaĝani nai, asi boĝono boĝe-vetuĝa, ĝofaĝofa tarimari ĝeveini kavari. Ĝoirari ai ĝevevaĝa-fofori ĝofakauni, tarimarima na matoru beĝene kira, ‘Ĝeĝani-veaĝani kika’ beĝene si. Akira-korikorimini, ĝia voiri tu varau ĝeĝabirito.

17 A ĝoi, bema bono ĝani-veaĝa botoni nai, debamu ai deoro bono tore e ĝoiramu bono ĝurigia,

¹⁸ be tarimarima na asi beġene ribamu, ġoi tu oġani-veaġani, senaġina Tamamu veġuni ai moġo bene riba. Ema Tamamu na, kara eġorani vekuretoġai eġitarini, ġia na vau voimu bevinimuni.”

Ġemi farefare gubai boġono vaġa-vegogo

Luka 12:33-34

¹⁹ “Ġemi farefare tu mai tanobarai asi boġono vaġa-vegogo! Korana faro ema lalalala o rasta na beġe vaġa-rakavarini ġesi, ema lema tarimari na numa beġe dareani ema beġe lemarini.

²⁰ Ġemi farefare gubai boġono vaġa-vegogo, faro e lalalala na asi beġe vaġa-rakavarini, ema lema tarimari na maki numa asi beġe dareani ema asi beġe lemarini riba.

²¹ Ġoi ġemu farefare ainai etanuni, ġoi nuġamu maki monai etanuni.”

Mata tu tauġani ġena mama

Luka 11:34-36

²² “Mata tu tauġani ġena lamefa kavana. Bema ġoi matamu namo nai, tauġanimu mabarana maki bemamani.

²³ Senaġina bema ġoi matamu tu rakava nai, tauġanimu mabarana maki bemukunani. A bema mama ġoi nuġamu ai tu mukuna nai, mai mukuna tu bebarego-vedaureani!”

Tarima ta vere ruarua vetuġuri asi beiaġo-vinini riba

Luka 16:13

²⁴ “Tarima ta na vere ruarua vetuġunaġiri asi beiaġo-vinirini riba. Korana ġia na ta tu asi beura-viniani, a ta tu beura-viniani; ta bevaġa-moġoniani, a ta tu beġofaġofa-iaġiani. Barau ema moni nega sebonai vetuġunaġiri asi boġo iaġo-vinirini riba.”

Asi boġono nuġa-vekwaraġi

Luka 12:22-31

²⁵ “Moġesi naima akiramini, ġemi maġuri asi boġono tuġamaġiri, kara boġo ġanini o boġo niuni; o tauġanimi kara na boġo dabuġarini. Aiġa tu dagara barana, maġuri ba ġaniġani? E aiġa tu dagara barana, tauġani ba dabuġa?

²⁶ Gubai ġerovoni manuri ġoġitari! Ġia tu asi ġevarovaroni e asi ġekwakwani, ema vamoka numari ai maki ġaniġani asi ġevaġa-vegogoni. Senaġi Tamami gubai etanuni na eġuburini. Ġomi tu dagara baregomi, a manu tu kei!

²⁷ Ġomi deikara onuġa-vekwaraġini nai, ġemu maġuri kota ma bovaġa-maukaiani riba ba?

²⁸ Karase dabuġa urari ai ġove-tuġamaġi-vekwaraġini? Boġa veraverari ġoġitari, aiġesi ġegarani. Asi ġeġauveini e dabuġa asi ġeturini.

²⁹ Senaġina akiramini, Kini Solomona ġena vedabuġa marevana maki ġevanaġiani.

³⁰ Mai tu Barau na tano ġauġari evaġa-dabuġarini, ġia tu toma ġegarani, a boinani tu karavai beġe fiu-raġerini, Barau tu moġesina evaġa-dabuġarini. Ġia na ġomi asi veġatana bevaġa-dabuġamini, ei? Ġomi veġabidadama misimisi tarimami!

³¹ Moġesi nai, asi boġono nuġa-vekwaraġi, asi boġono kira, ‘Kara toma taġanini?’ O ‘Kara toma taniuni?’ O ‘Kara toma tariġoni?’

³² Barau asi ribari tarimari na maiġeri dagara mabarari ġeraga-vetaurini, a Tamami gubai etanuni tu ribana, ġomi na maiġeri ġoura-vinirini.

³³ Senaġina giniguine ġia ġena Basileia ema ġena vei-iobukaiobuka boġono vetau-guineri, benamo manġeri dagara mabarari ġomi bevinimini.

³⁴ Moġesina naima boinani ġaro tuġamaġi-vekwaraġina asi boġono vei; boinani ġaro ġena vekwaraġi tu Barau ġimanai. Toma ġaro ġena vekwaraġi iatanai meto ma boġo torekauani nai, kamasi boġo ġwaiani?”

7

Tarimarima asi boġono vetau-viniri

¹ “Tarimarima asi boġono vetau-viniri, be Barau na maki asi bene vetau vinimi.

² Korana tu ġomi ġemi vetauvini ilailanai, ġomi maki moġesina moġo Barau na bevetau-vinimini; ema aiġesi ġovevaġa-vetovo vinirini, Barau na maki moġesi bevevaġa-vetovo vinimini.

³ Karase nai tarikakamu matanai libika oġitaiani, senaġi ġau tubina ġoi matamu nuġanai maniġa tu asi otuġamaġiani?

⁴ Kamara dabarai ġoi tarikakamu okiraiani, ‘Ġata, au na roġo matamu ai libika nakokia,’ senaġina ġoi tauġemu matamu ai ġau tubina ta etanuni?

⁵ Ġoi ġofaġofa taumu, guine tu ġoi matamu ai ġau tubina nokoki-vaġia roġo, benamo boboġeboġe-ginikauni vau, tarikakamu matanai libika bono ġabi-vaġia.

⁶ Dagara veaġari kwaiva (o kira-sirivaġi tarimari) asi boġono viniri, ema ġemi aġeva maki asi boġono fiu-rosiri bai ġoirari ai! Kwakuri na beġe fanataririni, benamo beġe doġe-kureni, ma beġe dare-misi misimini garina.”

Noġinoġi, vetauvetau, sekeseke o fidifidi

Luka 11:9-13

⁷ “Noġinoġi ai Barau na bevini-mini, vetauvetau ai boġo doġarini, sekeseke ai ġemi ġatama boka bekeoani.

⁸ Korana benoġi-noġini tarimana tu beġabini, bevetauni tarimana bedoġarini, ema beseke-sekeni tarimana Barau na ġena ġatama-boka bekeoani.

⁹ Ġomi dei bema natumu merona ġaniġani benoġini nai, ġoi na fore boviniani?

¹⁰ O maġani-kone benoġini nai, mota boviniani?

¹¹ Boġono tuġamaġi, ġomi tu rakava tarimami, senaġi dagara namori natumi viniviniri ma ribami, moġa lorinai ġomi Tamami gubai etanuni, ġia na dagara namori ġenoġi-viniani tarimari bevinirini veġatana!

¹² Ġomi kara ġourani tarimarima na ġemi ai beġene veiri veiġari, ġia ġeri ai maki moġeri veiġa boġono veiri. Mose ġena taravatu e peroveta ġeri vevaġa-riba guruġari tauna korikorina tu moġa.”

Barau ġena Basileia rakatoġana

Luka 13:24

¹³ “Ġatama-boka kibobonai boġono rakatoġa. A mase gabuna ġana eiaġoni dabarana tu baġaka, e ġena ġatama-boka tu barego rakava, ema ġutuma maki monai ġeraka-toġani.

¹⁴ Senaġi maġuri vanaġivanaġi ġana eiaġoni ġatama bokana tu kibobo e dabara maki kei rakava, ema tarimarima viravira na moġo ġedoġariani.”

Peroveta tarimari ġofaġofari

Luka 6:43-44

¹⁵ “Rorimi boġono vetore peroveta tarimari ġofaġofari ġerina. Ġia ġomi ġemi ai ġeiaġomani tu ma mamoe dabuġari ġesi, senaġina nuġari ai ġeri tuġamaġi tu boġa kwaivari rakavari kavari.

16 Ĝia ĝwaĝwari ai vau boĝo ribarini. Vine ĝwari (o grapes) tu ĝau ma giniri ĝerina asi ĝebokoni, ema figi ĝwari maki ĝauĝa ĝiniĝiniri ĝeri ai asi ĝeĝabini.

17 Ĝau namona ĝenana ĝwaĝwana namona bevaĝa-ĝoraiani, a ĝau rakavana ĝenana maki ĝwaĝwana rakavana bevaĝa-ĝoraiani.

18 Ĝau namona na ĝwaĝwa rakavana asi beĝwani riba, ilailana ĝau rakavana na ĝwaĝwa namona asi beĝwani riba.

19 Ĝwaĝwa namori asi ĝeĝwani ĝauri tu beĝe basirini, ma karavai beĝe fiuraĝerini.

20 Moĝesina ilailanai peroveta tarimari ĝofaĝofari tu ĝwaĝwari ai boĝo ribarini.

21 Dia 'Vereĝauka, Vereĝauka,' ĝetoguni tarimari mabarari tu Guba Basileiai beĝe raka-toĝani. Asiĝina. Deikara Tamagu gubai etanuni ekoraniaĝiani e ĝena ura veiĝari eveirini tarimana ĝereĝana moĝo.

22 Kota baregona ĝarona beraĝasini nai, tarima ĝutuma na beĝe kiraguni, beĝe kirani, 'Vereĝauka, Vereĝauka, ĝoi aramu ai ĝaperovetato, e ĝoi aramu ai iauka rakavari ĝalai-vaĝirito, ma ĝoi aramu ai nuĝa-farevaĝi veiĝa boruri ĝutuma maki ĝaveirito.'

23 Benamo au na bakirarini, bakirani, 'Au asi ribagu ĝomi. Ĝeguna ĝoraka-veĝita, ĝomi veiĝa rakava tarimami!' "

Numa ruarua ragaragari tauri

Luka 6:47-49

24 "Moĝa lorinai, tarima ta na ĝegu guruĝa maiĝeri eseĝaĝirini, ma veiĝari eveirini tu, tarima iaunegana na ĝena numa fore iatari ai evaĝa-ruĝaiato kavana.

25 Gura baregona eraguto, ĝaruka mabarari ĝeĝabatarito, iavara asikeikeina eragato nai, mo numa edoriato; senaĝina asi eĝwa-lauato, korana ĝia tu fore iatanai evaĝa-ruaĝaiato nai.

26 A deikara na ĝegu guruĝa maiĝeri eseĝaĝirini, senaĝi veiĝari tu asi eveirini, ĝia tu tarima babona noĝa, numa eragato nai, miri iatanai moĝo evaĝa-ruĝaiato.

27 Ĝura baregona eraguto, ĝaruka mabarari ĝeĝabatarito, iavara asikei eraĝasito, mo numa edoriato nai, eĝwa-lauato, benamo eĝwa-rovorovoto."

28 Iesu na ĝena ĝobata guruĝari maiĝeri ekiraĝi-ĝosirito nai, mai vegogo tarimari ĝutuma-bara na ĝena vevaĝa-riba guruĝari ĝeĝaba-iaĝirito.

29 Korana ĝena guruĝa ma seĝukana, dia ĝeri taravatu ĝevevaĝa-riba iaĝiato-ĝoi tarimari ĝeri guruĝa kavana.

8

Iesu na lepera tarimana evaĝa-namoato

Mareko 1:40-44; Luka 5:12-14

1 Iesu ĝoro tuĝuna na ma emariĝoto nai, tarima ĝutuma-bara ĝia murina na ĝerakato.

2 Benamo tarima ta ma leperana Iesu ĝenai eiaĝoto, ĝoiranai evetui-tarito, ekirato, "Vereĝauka, bema ĝoi ourani nai, moĝoni boiarevaguni, bovaĝa-namoguni riba!"

3 Iesu na ĝimana eduĝi-roroĝotoato, keve tarimana eĝabi-karaiato, ekirato, "Aurani, be nonamo!" Benamo vaĝa-sebo lepera na enamoto.

4 Iesu na evaĝa-guruĝaiato, ekirato, "Tarima ta asi bono kira-varaia. Noiaĝo, Rubu Veaĝa verena na bene ĝitamumu, ema veiareva varevare dagarari Mose na ekiraĝiato ilailanai bono vinia; be tarimarima beĝene riba, ĝoi tu bonamo."

Roma vetari verena ġena vetuġunaġi merona

Luka 7:1-10

⁵ Iesu Kaperanauma ai eraġasito nai, Roma vetari verena ta ġia ġenai eiaġoto, Iesu enoġiato,

⁶ ekirato, “Vereġauka, ġegu vetuġunaġi merona tauġanina asi eġarevani, be numai egena-taġoni, ema midigu maki barego eġanini.”

⁷ Iesu na ekiraiato, ekirato, “Au aiaġosini, be asi-vaġa-namoani.”

⁸ Vetari verena na evaġa-veſeato, ekirato, “Vereġauka, au tu asi ilaila ġoi ġegu numai boraġe-kauni; senaġi ġoi noguruġa moġo, benamo au ġegu vetuġunaġi merona benamoni.

⁹ Au maki tarima kota ġeri veġitaġau gabureri ai, ema vetari tarimari o soldia tu au gaburegu ai. Au na ta bakiraiani, ‘Noraka!’, benamo berakani, ma ta bakiraiani, ‘Noiaġoma!’, benamo beiaġomani. Ema au ġegu vetuġunaġi merona bakiraiani, ‘Maiġa noveia!’, benamo beveiani.”

¹⁰ Iesu na ġena guruġa eseġaġiato nai, eġaba-rakavato. Benamo ġia murinai ġerakato tarimari evaġa-guruġarito, ekirato, “Au na akira-korikorimini, Israela nuġanai mai-ġesina veġabidadama ta roġosi bana doġaria.

¹¹ Au na akiramini maki, tarimarima ġutuma ġaro-raġe e ġaro-riġo rekeri na beġe iaġomani, Aberahamo, Isako, e Iakobo ġesi vereko baregonai beġe ġani-vegogoni Guba Basileiana nuġanai.

¹² Senaġina tovtovonai Barau na eġabi-viriġirito tarimari, Basileia nuġanai beġene tanu etato tarimari tu, Barau na befiu-rosirini murikai, mukuna furufuru nuġanai. Monai beġe taġini, e gadikari maki beġe veġaratarini.”

¹³ Benamo Iesu na vetari verena ekiraiato, ekirato, “Noiaġo, ġemu numa ġana! Boveġabidadama lorinai, veġana beġorani.” Ġena vetuġunaġi merona mo horai varau enamoto.

Iesu na Simona ġena taġama evaġa-namoato

Mareko 1:29-31; Luka 4:38-39

¹⁴ Iesu Petero ġena numai eraka-toġato. Monai Petero ġena taġama vavivena ekeveto, tauġanina eseġukato, be egena-taġoto-ġoi, Iesu na eġitaiato;

¹⁵ ġimanai eġabito, benamo ġena keve ekorito, evaisi-raġeto, benamo ġia eġubuato.

Iesu na tarimarima ġutuma evaġa-namorito

Mareko 1:32-34; Luka 4:40-41

¹⁶ Lavilavi ai iauka rakavari na ġeboroġirito tarimari ġutuma Iesu ġenai ġeġori-iaġorito. Iesu na moġeri iauka rakavari ġena guruġa seġukana ġenana moġo elai-vaġirito, e keve tarimari mabarari maki evaġa-namorito.

¹⁷ Maiġeri veġa vaġa-moġoniri tu Isaia, peroveta tarimana, na ekiraġiato kavana, ekirato, “Ġia na ġera midigumidigu eġabi-veġitarito, ema ġera keve irairau eġwarito, evaġa-namorito.”

Iesu murinai beġene raka ġetato tarimari

Luka 9:57-60

¹⁸ Iesu na tarimarima ġutuma na ġevegogo-ġeġeraġiato eġitarito, benamo ġena mero ekirarito, ekirato, “Siveġasi-vanaġi, kou mo rekena ġana.”

¹⁹ Nuġanai taravatu evevaġa-riba iaġiato-ġoi tarimana ta Iesu ġenai eiaġoto, ekirato, “Vevaġa-riba tarimamu, ġoi aiġana boiaġoni nai, au ġoi murimu ai moġo bana raka atoni.”

²⁰ Iesu na ekiraiato, ekirato, “Boġa kwaivari ma ġeri kouġa, ema manu ma ġeri nuġi, senaġi Tarimarima Natuna tu asi ġena gena gabuna.”

²¹ Iesu ġena mero ta na maki evaġa-guruġaiato, ekirato, “Vereġauka, mani ġemu veiġa, naġenoġoi, be tamagu roġo naguria.”

²² Iesu na evaġa-veŋeato, ekirato, “Murigu ai noma raka, mani tu noiaġuri; mase tarimari (o Barau asi ġekorana-iaġiani tarimari) na ġeri mase tauġeri na beġene guriri.”

Iesu na iavara e geta o ureure ekira-ġoirito
Mareko 4:36-41; Luka 8:22-25

²³ Iesu ġasi ai eraġeto nai, ġena mero maki ġia ġesi ġeraġe-sebonato.

²⁴ Ġeiaġoto-ġoi nai, asikauna iavara asikei kou ai eraġasito, benamo ureure tu ġasi nuġanai ġevebubu-ġurato. A Iesu tu egenato-ġoi.

²⁵ Benamo ġena mero ġeiaġoto ma ġevaġoato, ġekirato, “Vereġauka, novaġa-maġurima, ġita tu mai taburuni, dori tamaseni.

²⁶ Iesu na evaġa-veserito, ekirato, “Karase nai ġogarini? Veġabidadama kei rakava tarimami!” Benamo Iesu evariġisito, iavara ma ureurena ġesi ekira-ġoirito, benamo ġedokoto, ġemeġomeġo-tarito.

²⁷ Tarimarima mabarari ġeġaba-rakavato, ġekirato, “Mai tu kamara tarima se? Iavara e ureure na maki garona ġeseġaġiani!”

Iesu na tarima ruarua iauka rakavari na ġeboroġirito evaġa-namorito
Mareko 5:1-17; Luka 8:26-37

²⁸ Galilea kouna tavina rekenai, Gadara (o Gerasa) tarimari ġeri tano ai, Iesu eraġasito, benamo iauka rakavari na ġeboroġirito tarimari ruarua gara kouġari na ġeiaġomato-ġoi Iesu ġenai. Mai tarima ruarua tu ma gariri, moġa lorinai tarima ta mo dabara na asi eraka-vanaġito-ġoi.

²⁹ Benamo tauri ruarua Iesu ġeġaba-viniato, ġekirato, “Barau Natuna o, kara ġai ġemai noveia otoni? Ġoi boiaġoma maġa tu, noma vaġa-midiguma ġana, ġaro korikorina roġosi roġo bene raġasi nuġanai, ei?”

³⁰ Monai, asi manaġa lelevaġi, bai serina ġedokadokato-ġoi.

³¹ Moġesina nai iauka rakavari na Iesu ġenoġiato, ġekirato, “Bema ġoi na ġai bolai-vaġimani nai, notuġuma bai ġeri ai, ġia nuġari ai ġaraka-toġa.”

³² Iesu na ekirarito, ekirato, “Be ġoiaġo!” Benamo iauka rakavari mo tarima ruarua ġerina ġeraka-vaġito, ġeiaġoto, bai ġeri ai ġeraka-toġato. Benamo bai serina mabarana eġwa-bubu-lausiato, lalaġa na ġekokosi-firiġoto, kou ai ġeveġuġutu-maseto.

³³ Bai ġitaġauri tarimari ġeraga-kwareġato, vanuġa ġana ġeiaġoto, vari mabarana ġekiraġiato, ema iauka rakavari na ġeboroġirito tarimari ġeri ai kara ġeġorato mabarari maki ġevaġa-foforirito.

³⁴ Benamo vanuġa tarimari mabarari ġeġoto-iaġoto, Iesu beġene ġitaia ġana. Iesu ġenai ġeraġasito nai, ġenoġiato, ġeri tano na bene raka-veġita.

9

Iesu na rakava etuġamaġi-fitoġarito

¹ Iesu ġasi tai eraġekauto, ma eġenoġoito, kou na evanaġito, ġena vanuġa korikori ġana eiaġoto.

² Monai tarima kotari na tauġanina tavi ta emaseto tarimana ta gedai genagenanai Iesu ġenai ġeġwa-iaġoato. Iesu na ġeri veġabidadama vetoġana aiġa barana eġitaiato, benamo keve rakava tarimana ekiraiato, ekirato, “Natugu, bono kokore, ġemu rakava batuġamaġi-fitoġari.”

³ Benamo taravatu ġevevaġa-riba iaġiato-ġoi tarimari tauġeri maiġesina ġekirato, “Mai tarima na Barau ekira-fitoġaiani.”

⁴ Iesu ma ribana ġia kara ġetuġa-maġirito-ġoi nai evaġa-guruġarito, ekirato, “Karase nai maniġesina tuġamaġi rakavari ġoġabini?”

⁵ Aiġesina baguruġani tu meraġa, ‘Ġemu rakava batuġamaġi-fitoġari’ banasi, ba bara kira, ‘Noruġa-vaisi, noraka’ barasi?”

⁶ Au na navaġa-ġitami, Tarimarima Natuna tu ma ġena maoro, rakava betuġamaġi-fitoġarini tanobarai.” Benamo Iesu na keve rakava tarimana evaġa-guruġaiato, ekirato, “Novariġisi, ġemu geda noġabia, be numa ġana noiāġo!”

⁷ Benamo mo tarima evaisiraġeto, ġena numa ġana eiaġoto.

⁸ Tarimarima na mo veiġa ġeġitaiato nai, ġegarito e Barau ġevaġa-raġeato, korana seġuka moġesina tarimarima evinirito nai.

Iesu na Mataio ekeaiato
Mareko 2:13-17; Luka 5:27-32

⁹ Iesu monana eraka-vanaġito nai, ġia na tarima ta arana Mataio eġitaiato, takesi moniri ġeġabito-ġoi numanai etanu-taġoto-ġoi nai eġitaiato. Benamo Iesu na ekiraiato, ekirato, “Murigu ai noma raka.” Benamo Mataio evaisiraġeto, Iesu murina na eiaġoto.

¹⁰ Iesu Mataio ġena numai eġaniġanito-ġoi nai, takesi gogo tarimari vovoka e vei-rakava tarimari ġutuma maki ġeiaġomato, Iesu ma ġena mero ġesi ġeġaniġani-vegogoto.

¹¹ Farisea tarimari kotari na ġeġitaiato nai, Iesu ġena mero ġedanaġirito, ġekirato, “Karase nai ġomi ġemi vevaġa-riba tarimana tu takesi gogo e vei-rakava tarimari ġesi ġeġaniġani-vegogoni?”

¹² Iesu na mo guruġa eseġaġiato, benamo evaġa-veserito, ekirato, “Namo tarimari na doketa asi beġe vetaurini, senaġina keve tarimari na moġo.

¹³ Ġoiāġo, tauġemi na Buka Veāġa na ekiraġiani guruġana ġoa vetaua, maiġesina ekirani, ‘Au na dia ġomi ġemi ginitaġo o boubou varevareri aura-vinirini. Au aurani ġomi na vevetuġaġwa e veiau-namo boġono vaġa-foforiri.’ Au tu vei-iobukaiobuka tarimari keakeari asi aiaġomato, senaġi vei-rakava tarimari moġo.”

Ġaniveaġa
Mareko 2:18-22; Luka 5:33-39

¹⁴ Moġa murinai Ioane Babatiso ġena mero Iesu ġenai ġeiaġoto, benamo ġedanaġiato, ġekirato, “Karase nai ġai e Farisea tarimari tu ġaġani-veaġani, a ġoi ġemu mero tu asi ġeġani-veaġani?”

¹⁵ Iesu na evaġa-veserito, ekirato, “Ġomi ġotuġamaġini, veġaraġo varigu tarimana ġatana seviri ai etanuni nuġanai beġe taġini ba? Asiġina! Ġarona eiaġomani, veġaraġo variġu tarimana ġatana ġerina beġe ġabi-veġitaiani, monai vau beġe ġani-veaġani.

¹⁶ Tarima ta na dabuġa variġuna veseana dabuġa guinena ġesi asi bebani-vegogoani. Bema moġesina beveini nai, dabuġa variġuna na guinena bedareani, ema vedarena maki bebaregoni.

¹⁷ Tarima ta na maki vine nanuna variġuna nanigosi kefina guinenai asi besisiani. Bema moġesina beveini nai, nanigosi kefina guinena bevedareni, vine nanuna bebebubuni, ema kefi maki berakavani. Senaġina vine nanuna variġuna nanigosi kefina variġunai bebubu-ġuriaiani tu namo. Benamo ruarua, vine nanuna e kefi, beġe tanuni, asi beġe rakavani.”

Iesu na kekeni ta ema vavine ta evaġa-namorito
Mareko 5:22-43; Luka 8:41-56

¹⁸ Iesu na roġo ġena mero evaġa-ribarito-ġoi nuġanai, vere ta eraġasito, Iesu kwakuna koranai evetui-tarito, ekirato, “Au natugu kekenina inivau moġo bemase. Si-iaġo, ġimamu iatanai bono tore-kausa, benamo natugu bemaġurini.”

¹⁹ Iesu evaisi-raġeto, ġia ġesi ġeiaġoto. Ġena mero maki ġia ġesi ġeiaġo-sebonato.

²⁰ Ġeiaġoto-ġoi nuġanai, vavine ta, ġena keve tu rara kevena, laġani gabanana ruarua (12) ekeve-iaġiato, eiaġomato Iesu murina rekena na, ma ġena dabuġa dudunai eveġabikauto.

²¹ Korana tu ġia evetuġamaġito, “Ġena dabuġai moġo haveġabikauni nai, banamoni.”

²² Iesu eruġa-kureto, eġitaiato, ekirato, “Natugu, bono kokore! Ġemu veġabidadama na bevaġa-namomu.” Benamo vaġa-sebo ġena keve enamo-ġosito.

²³ Iesu tu mo vere ġena numai eraka-toġato. Ivirikou furufuru tarimari e taġitaġi tarimari ma gururi baregori ġesi eġitarito,

²⁴ benamo Iesu na evaġa-guruġarito, ekirato, “Ġoraka-rosi. Kekeni tu asi bemase, ġia tu egenani moġo.” Senaġi tarimarima na ġerikiriki-iaġiato.

²⁵ Iesu na mo tarimarima ġutuma etuġu-rosirito murinai, ġia eraka-toġato numa nuġanai, kekeni ġimanai eġabito; benamo mo kekeni evaisi-raġeto.

²⁶ Mai veġa varina tu mo tano mabarana ġevarifiu-iaġiato.

Iesu na mata-bubu tarimari ruarua evaġa-namorito

²⁷ Iesu na mo gabu ma eraga-kwaneato. Erakato-ġoi nai, mata-bubu tarimari ruarua murina na ġeiaġoto, ġekea-viniato, ġekirato, “Davida Natuna o, ġai novetuġama!”

²⁸ Iesu numai eraka-toġato nai, mo mata-bubu tauri ruarua maki ġeraġe-kauto. Benamo Iesu na edanaġirito, ekirato, “Ġomi na ġovaġa-moġoniguni, au na bavaġa-namomini riba?” Ġia ġevaġa-veseto, ġekirato, “Vereġauka, oi, ġavaġa-moġonimuni.”

²⁹ Benamo Iesu na matari eġabi-kararito, ekirato, “Ġemi veġabidadama lorinai, veġana tu bana veia ġemi.”

³⁰ Benamo matari ġefafato. Iesu na ma nuġana mabarana ġesi evaġa-guruġa gwaġiġi-rito, ekirato, “Mai veġa beġora maiġa varina tarima ta asi boġono kira-varaia!”

³¹ Senaġina tauri ruarua ġeraka-rosito, ġeiaġoto, Iesu varina mo tano mabarana ġea varifiu-rovorovoato.

Iesu na muru-bubu tarimana ta evaġa-namoato

³² Tauri ruarua numa na ġeraka-rosito-ġoi nuġanai, tarima ta, iauka rakavana na eboroġiato nai asi eguruġato-ġoi, Iesu ġenai ġeġabi-iaġoato.

³³ Iesu na iauka rakavana elai-vaġiato murinai, mo muru-bubu tarimana varau eguruġato. Tarimarima mabarari na mai eġorato veġana ġeġaba-iaġiato, ġekirato, “Maiġesina veġana ta Isaraela nuġanai roġosi bene ġora!”

³⁴ A Farisea tarimari ġekirato, “Mai tu iauka rakavari ġeri vere ġena seġukana na iauka rakavari ġia na elai-vaġirini.”

Iesu na ġena mero Isaraela tarimari ġeri ai etuġurito

³⁵ Iesu na vanuġa baregori ema keiri mabarari eiaġo-vinirito: Ġeri rubu ai evevaġa-ribato-ġoi, Barau ġena Basileia varina namona eġobata-iaġiato-ġoi, ema keve e midigu-midigu tarimari mabarari evaġa-namorito.

³⁶ Iesu na mo tarimarima ġutuma-bara eġitarito nai evetuġarito, korana ġenuġa-vekwaraġito e asi ġeri veduru ġabi tarimari, vaġa-ilailana mamoe asi ġitaġauri tarimana ta kavana.

³⁷ Benamo Iesu na ġena mero ekirarito, ekirato, “Makora ġitaġitana tu barego, senaġina ġauvei-iaġina tarimari tu asi ġutuma.

³⁸ Vamoka ġaniġanina vinivinina Vereġaukana boġono noġia, be ġauvei tarimari bene tuġuri, ġena ġaniġani gogo vamokari ġana.”

10

Iesu na ġena apostolo merori gabanana ruarua (12) ekearito

¹ Iesu na ġena mero gabanana ruarua (12) ekearito, benamo seġuka evinirito, iauka rakavari beġene lai-vaġiri, e keve ema midigu-midigu mabarari beġene vaġa-namori ġana.

² Mai apostolo tarimari gabanana ruarua (12) arari tu maiġeri: Ginigu-inena tu Simona, arana ta tu Petero, e ġia tarina Anduru; Iakobo (o Iames), Sebedaio natuna, ma tarina Ioane ġesi;

³ Filipo e Batolomeo; Tomasi e takesi gogo tarimana Mataio; Iakobo (o Iames), Alfeo natuna, e Tadeo;

⁴ Simona, Selote tarimana, ema Iudas Isakariota, Iesu berevaiani tarimana.

Iesu na apostolo tarimari ġeri ġauvei evinirito

Mareko 6:7-13; Luka 9:1-5

⁵ Mai tarima gabanana ruarua (12) Iesu na etuġu-rosirito ema velaunaġi sisibari maiġesina evinirito, ekirato, “Irau bese tarimari ġeri ai asi boġono iaġo, e Samaria vanuġari tai maki asi boġono raka-toġa;

⁶ senaġina Israela besena ġeri ai boġono iaġo, ġia tu ġerekwa-rekwato mamoeeri kavana.

⁷ Ġoiġo, ma maiġesi boġono ġobata, boġono kira, ‘Guba Basileiana tu bevotu, (Barau ġena veġitaġau seġukana evaġa-ruġaiiani maiġa)!’

⁸ Keve tarimari boġono vaġa-namori, mase tarimari boġono vaġa-maġuriri, lepera tarimari boġono iarevari boġono vaġa-namori, e iauka rakavari boġono lai-vaġiri! Ġomi na ġoġabiato asi voina, boġono vini maki asi voina.

⁹ Ġemi iaġoiaġo ai moni asi boġono ġabikau, golo o silva moniri o kopa moniri maki asi boġono ġwakau.

¹⁰ Dura asi boġono ġabikau, sedi ruarua, tamaka, ema togoi maki asi boġono ġabi. Korana ġauvei tarimana ġena-ġana tu beġene vinia veġata.

¹¹ Vanuġa baregona tai o vanuġa keina tai boġo raka-toġani nai, deikara eurani ġena numai bene ġabi-raġemi etoni tarimana boġono vetaua. Mo numai moġo boġono tanu, bene iaġo mo, vanuġa ma boġono raga-kwaneana.

¹² Numai ġoraka-toġani nai, numa tarimari boġono vaġa-namori, boġono kira, ‘Maino ġomi ġemi ai bene tanu!’

¹³ Bema mo numa tarimari na beġe ġabi-raġemini nai, Barau ġena maino ġeri ai betanuni. Senaġina bema ġia na asi beġe ġabi-raġemini nai, Barau ġena maino ġeri ai asi betanuni, ġemi ai ma beġenoġoini.

¹⁴ Kamara numai o vanuġai tarimarima na asi beġe ġabi-raġemini e ġemi guruġa asi beġe seġaġirini nai, mo numa o vanuġa boġono iaġuia, kwakumi kauri boġono kwari-ketoketori, (ġia ġeri kira-sirivaġi vaġa-moġoniri ġana).

¹⁵ Au na akira-korikorimini, Barau ġena Kota ġaronai mo numa o vanuġa ġeri rakava voina metona tu barego lelevaġi beġabiani, Sodoma e Gomora ġeri rakava voina maki bevanaġiani.”

Vanevane e midigumidigu ġoirai
Mareko 13:9-13; Luka 21:12-17

¹⁶ “Ġoseġaġi, au na mai atuġumini mamoe kavana boġa kwaivari rakavari vefakari ai. Moġa lorinai, mota kavana boġono iaunega ema boġono manau pune kavana.

¹⁷ Lorimi boġono vetore tarimarima ġeri ai! Korana ġia na beġe ġabimini ma beġe tuġu-iaġomini Iuda ġeri kanisoro tarimari ġeri ai, ema ġeri rubu nuġari ai beġe kwarimini.

¹⁸ Au ġoġabi-raġeguni dainai, gavana e vere barari o kini ġeri ai roġo beġe ġabi-iaġomini, ġia ġoirari ai au vaġa-moġonigu ai boġono iaġo, korana irau bese tarimari maki Vari Namona beġene ribaia.

¹⁹ Bema Kota tarimari ġoirari ġana beġe ġabi-iaġomini nai, kara toma boġoa kiraġirini o kaması boġo kiraġirini guruġari asi boġono nuġa-vekwaraġi-iaġiri. Korana mo ġaro ai kara boġo kiraġirini guruġari tu, Barau na vau bevinimini.

²⁰ Dia ġomi boġo guruġani, senaġina Barau Iaukana ġomi ġemina beguruġani.

²¹ Kakana na tarina berevaiani bene mase ġana, tamana na natuna maki moġesina beveiani. Naturi na tamari sinari beġe seġafore-vinirini ema mase ai maki beġe torerini.

²² Tarimarima mabarari na beġe iau-rakavamini, korana au ġoġabi-raġeguni nai. Senaġina deikara bevevaġa-gwaġiġini mo dokona tu be-maġurini.

²³ Vanuġa tai beġe vaġa-rakavamini e beġe laimini nai, vanuġa ta ġana ma boġono raga-iaġo. Boġono riba-maoro, ġegu ġauvei asi roġo boġo vaġa-koriani Isaraela vanuġari mabarari nuġari ai, beiaġoni mo, Tarimarima Natuna bema-raġasini.

²⁴ Riba evetauani merona na ġena vevaġa-riba tarimana asi bevanaġiani; vetuġunaġi tarimana na guine-iaġina tarimana maki asi bevanaġiani riba.

²⁵ Riba evetauani merona bevevaġa-iaġoni ġena vevaġa-riba tarimana ġesi beġe ilailani, ema vetuġunaġi tarimana guine-iaġina tarimana ġesi maki beġe ilailani tu namo. Boġono tuġamaġia, tarimarima kotari na au tu doġoro debana, Belsebul o Satani ġetoni, be ġomi, ġegu doġoro tarimami, maki moġesi beġe kiramini, ema beġe vaġa-metomini maki.”

Barau boġono gari-vinia
Luka 12:2-7

²⁶ “Moġa lorinai, tarimarima gariri asi boġono vei. Vekouġau dagarari mabarari beġea foforini, vekuretoġa guruġari mabarari beġea ribani.

²⁷ Au na kara dagara akira-varamini mukunai tu, ma boġono kiraġi-ġenoġoiri laġani matabarai, kara dagara ġereġami na boġo seġaġia tu, numa tuġuri na ma boġono kiraġi-foforia, (tarimarima mabarari na beġene seġaġia ġana).

²⁸ Tauġanina beġe vaġiani tarimari asi boġono gari-viniri, korana ġia na iauka asi beġe vaġiani. A Barau garina neġi boġono gari, korana ġia na ruarua bevaġirini riba, tauġanina e iauka, karava asi ebuseni gabunai.

²⁹ Bisini ruarua maki fene sebana na moġo ġevoirini, ene? Senaġina moġeri ta maki asi beketo-riġo kavani tano ai, bema Tamami asi beurani nai.

³⁰ A ġomi tu debami ġuiri maki mabarari Barau na eiavi-ginikaurito.

³¹ Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito.”

Iesu asi boḡono kira-ḡuniḡaua

Luka 12:8-9

³² “Deikara na au tarimarima ḡoirari ai bekiraḡi-foforiguni, ḡia maki au na bakiraḡi-foforiani Tamagu gubai etanuni ḡoiranai.

³³ Senaḡina au deikara na tarimarima ḡoirari ai beruḡaguni e bekira-ḡuniḡauguni, ḡia maki au na baruḡaiiani e bakira-ḡuniḡauani Tamagu gubai etanuni ḡoiranai.”

Dia maino, senaḡi vetari

Luka 12:51-53; 14:26-27

³⁴ “Asi boḡono tuḡamaḡi, au tu maino tanobara ḡana aḡwa-iaḡomaiato. Asiḡina, au tu dia maino aḡwa-iaḡomaiato, senaḡi vetari urana na aiaḡomato.

³⁵ Au aiaḡomato tu, maḡeri nama vaḡa-ruḡari ḡana: Natu tauri na tamari beḡe vevaḡi-vinirini, natu vavineri na sinari beḡe vevaḡi-vinirini, taḡama vavine keiri na ḡeri taḡama vavine barari beḡe vevaḡi-vinirini.

³⁶ Numa biaguna tu tauḡena ḡena numa tarimari na moḡo beḡe iau-rakava viniani.

³⁷ Deikara tamana o sinana beuravini-baregoani, a au tu betuḡamaḡi-keiguni nai, ḡia tu asi ilaila au ḡegu tarimai beḡe kiraḡiani. Ema deikara na natuna merona o kekenina beuravini-baregoani, a au beuravini-keiguni nai, ḡia tu asi ilaila au ḡegu tarimai beḡe kiraḡiani.

³⁸ E deikara tauḡena ḡena satauro asi beḡwaiiani, ema murigu na asi berakani, ḡia tu asi ilaila au ḡegu tarimai beḡe kiraḡiani.

³⁹ Deikara ḡena maḡuri moḡo lorina etoreani tarimana, ḡena maḡuri befitoḡaiiani. A deikara au daigu ai ḡena maḡuri befitoḡaiiani tarimana, ḡena maḡuri asi bevei-rekwarekwaiani.”

Iesu ḡena mero beḡe ḡabi-raḡerini tarimari na voiri namori beḡe ḡabirini

Mareko 9:41; Luka 10:16

⁴⁰ “Dei na ḡomi eḡabi-raḡemini, au maki eḡabi-raḡeguni, ema au eḡabi-raḡeguni tarimana na au etuḡuguto Barauna maki eḡabi-raḡeani.

⁴¹ Dei na peroveta tarimana ta eḡabi-raḡeani, korana ḡia tu Barau ḡena guruḡa vaḡa-foforina tauna ta, ḡia na peroveta tauna davana tu beḡabiani. Ema dei na veiḡa iobukaiobuka tarimana eḡabi-raḡeani, korana ḡia tu Barau ḡena ura ekorana-iaḡiani tauna, ḡia na vei-iobukaiobuka tarimana davana beḡabiani.

⁴² E tarima ta na mai ḡegu mero ta nanu faraka kapusi sebona ta beviniani, korana ḡia tu au ḡegu vetuḡunaḡi tarimana, akira-korikori-mini, ḡia voina tu beḡabiani veḡata.”

11

Ioane na ḡena mero Iesu ḡenai etuḡu-iaḡorito

¹ Iesu na moḡeri sisiba guruḡari ḡena mero gabanana ruarua (12) ḡeri ekiraḡi-ḡosirito murinai, ḡia monana Galilea vanuḡari ḡana eiaḡoto, monai Barau ḡena guruḡa bene vevaḡa-riba iaḡia e bene ḡobata-iaḡia ḡana.

² Ioane Babatiso dibura numanai etanuto-ḡoi nai, Keriso ḡena ḡauvei veiḡari varina eseḡaḡiato, benamo ḡia na ḡena mero Iesu ḡenai etuḡu-iaḡorito.

³ Iesu ḡedanaḡiato, ḡekirato, “Barau na ekiraḡi-toreato beiaḡomani tarimana tu ḡoi, ba tarima boruna ta baḡana vaḡa-nogaia?”

⁴ Benamo Iesu na evaḡa-veserito, ekirato, “Ĝoḡenoḡoi, ḡomi na boḡo seḡaḡiri e boḡo ḡitari veiḡari Ioane boḡono kira-varaia:

⁵ Mata-bubu tarimari ḡeboḡeboḡeni, kwaku rakava tarimari ḡerakani, lepera tarimari ḡenamoni, seḡa-bubu tarimari ḡeseḡaḡini, mase tarimari ḡevariḡisi-ḡenoḡoini, ema Vari Namona gara veḡubu e asi ḡeri-ḡari tarimari ḡeri eḡobata-iaḡiani.

⁶ Au ḡegu ai asi ḡena daradara tarimana tu eiakuni.”

⁷ Ioane ḡena mero ḡerakato vau, Iesu na ḡevegogoto tarimari evaḡa-guruḡarito, Ioane varina ḡeri ekiraḡi-ato, ekirato, “Ioane ḡenai ḡoiaḡoto nai, mo tano fakanai tu kara boḡono ḡitaia ḡana? Gobu iavara na ekwari-ḡareva ḡarevaiani ḡitaḡitana ḡoiaḡoto?

⁸ Bema asiḡina nai, kara boḡono ḡitaia ḡana ḡoiaḡoto? Dabuḡa namona eveiani tarimana ḡitaḡitana ḡoiaḡoto? Asiḡina. Dabuḡa namori ḡeveirini tarimari tu kini ḡeri numai ḡetanuni.

⁹ Be, kara boḡono ḡitaia ḡana ḡoiaḡoto? Peroveta tarimana dainai? Aba! Akiramini, ḡoḡitaiato tarimana tu peroveta tarimari mabarari evanaḡirini.

¹⁰ Ioane varina Buka Veḡai maiḡesi etoreato, Barau ekirato, ‘Au na ḡegu vetuḡunaḡi tarimana tu batuḡu-guineani, ḡemu dabara ḡoiramu ai vaḡa-maḡatana.’

¹¹ Moḡoni akiramini, mai tanobarai beḡe maḡuri tarimari mabarari fakari ai Ioane Babatisto tu barego vedaurea, ta na asi bevanaḡiani. Senaḡina Guba Basileiana nuḡanai gabi tarimana na Ioane tu evanaḡiani.

¹² Ioane Babatisto ḡena ḡobata evari-fiurito-ḡoi ḡenana beiaḡoma mo initoma, Barau na ḡena Basileia o veḡitaḡau seḡukana evaḡa-ruḡaiani, senaḡina tarima tari na ḡevevaḡi-viniani, ḡeri ura tu tauḡeri beḡene veḡitaḡau, a deikara Barau ḡena Basileiai neraka-toḡa etoni tarimana, ḡia na ḡekouani. (Mataio23:13).

¹³ Peroveta tarimari mabarari e Mose ḡena taravatu maki na Barau ḡena Basileia o veḡitaḡau ḡeḡobata-iaḡiato-ḡoi, eiaḡomato mo, Ioane ḡena negai.

¹⁴ Ema ḡomi na ḡeri guruḡa boḡo ḡabi-raḡeani ba asiḡina, senaḡina Ioane tu moḡoni peroveta tarimana Elia, ḡena iaḡoma tu ḡekiraḡiato-ḡoi.

¹⁵ Ma seḡana tarimana bene seḡaḡi.

¹⁶ Toma ḡuru tarimari tu deikara ḡesi bavaḡa-ilailarini? Ḗia tu noḡa mero keiri kavana, vanuḡa ḡatamanai ḡetanu-taḡoni, ḡeḡereni, tavi ta merori na tavi tai ḡekea-vinirini, ḡekirani,

¹⁷ ‘Gai tu veḡaraḡo vererenai gita ḡalauto-ḡoi ḡomi ḡemi, senaḡi ḡomi tu asi ḡobarato-ḡoi! Ĝai tu mase mariri ḡaḡabito-ḡoi, senaḡi ḡomi tu asi ḡotaḡito-ḡoi!’

¹⁸ Ioane eiaḡomato, eḡani-veaḡato ema vine nanuna asi eniuato. Benamo ḡekirani, ‘Ḗia tu iauka rakavana na eboroḡiato,’ ḡetoni.

¹⁹ A Tarimarima Natuna eiaḡomato, ḡia tu ḡaniḡani ta asi eruḡaiani. Benamo ḡekirani, ‘Ḗia tu boḡeka tarimana ema vine nanuna eniu-ḡutumani tarimana, takesi gogo tarimari e vei-rakava tarimari ḡatari!’ ḡetoni. Senaḡi Barau ḡena iaunega vaḡa-foforina e vaḡa-moḡonina tu ḡena vetoḡa namori ḡerina.”

Asi veḡabidadama vanuḡari

Luka 10:13-15

²⁰ Iesu na ḡena seḡuka ḡauveiri vanuḡa baregori tari nuḡari ai eveirito, senaḡi ḡeri rakava ḡerina asi ḡevetuḡamaḡi-kureto-ḡoi, naima Iesu na moḡeri vanuḡa tarimari evanerito.

²¹ Ekirato, “Korasini o, ġoi ema Betesaida, vetuġami kika! Korana nuġa-farevaġi veiġa boruri ġemi ai ġefoforito-ġoi tu, Taia e Sidono nuġari ai beġere fofori, benamo ġia tu irau laġani ai ġere vetuġamaġi-kure, fuse rakavari ai e tauġaniri ma gurumari ai ġeri vetuġamaġi-kure ġere vaġa-foforia.

²² Senaġina akiramini, Barau na tarimarima bekota-vinirini ġaronai, ġomi na boġo doġariani metona tu Taia e Sidono ġeri meto bevanaġiani.

²³ Ġoi maki, Kapera-nauma o, ġoi ourani guba ġana bono varaġe otoni? Asigina, ġoi tu mase gabuna ġana boiaġoni! Bema nuġa-farevaġi veiġa boruri ġemi ai ġefoforito-ġoi tu Sodoma nuġanai beġere fofori nai, ġia tu roġo bere tanu mo initoma.

²⁴ Senaġina akira-mini, Barau na tarimarima bekota-vinirini ġaronai, ġomi na boġo doġariani metona tu Sodoma ġeri meto bevanaġiani.”

Au ġegu ai ġoiaġoma, be ġoiaġaraġi

Luka 10:21-22

²⁵ Mo negai Iesu ekirato, “Tamagu o, guba ema tanobara Verena, avaġa-namomuni, korana ġoi na ma iaunegari e riba tarimari ġeri ai okure-toġarini dagarari tu, asi ġeri riba tarimari ġeri ai ovaġa-foforirini.

²⁶ Aba, Tamagu, ġemu ura tu maġesina bene vetore veġata.

²⁷ Dagara mabarari Tamagu na eviniguto. Natuna tarima ta asi ribana, senaġina Tamana ġereġana moġo ribana, ema Tamana tarima ta asi ribana, senaġi Natuna ġereġana moġo ribana, ema Natuna na bene vaġa-fofori vinia etoni tarimana.

²⁸ Au ġegu ai ġoiaġoma, ġomi deikara maruna metori ġoġwani e boġo gau tarimami mabarami, au na iaġaraġi banama vinimi.

²⁹ Au ġegu maruna, mai tu ġegu veġitaġau namona, ġoma ġabi-raġea, ma au ġegu ai riba maki ġoma ġabia! Korana au na asi badori-naġinaġimini e asi baġita-fitoġamini. Au ġegu ai iaġaraġi korikorina boġo doġariani.

³⁰ Auna maruna tu meraġa e ġegu ġwaġwa iatami ai batore-kauani maki asi metona.”

12

Iesu tu Sabadi Verena

¹ Mo negai Iesu tu Sabadi ai widi vamokari na eraka-vanaġito. Ġena mero ġevitorito nai, widi ġwaġwari ġebukito-ġoi e ġeġanirito-ġoi.

² Farisea tarimari na ġeġitarito, benamo Iesu ġekiraiato, ġekirato, “Noġitaia, ġemu mero na ġita ġera taravatu asi ġekorana-iaġiani, Sabadi ai widi ġebukini.”

³ Iesu na evaġa-veserito, ekirato, “Davida na veiġa ta eveiato, ġia ma karna ġesi ġevitorito nai, ġomi na mai veiġa eġorato tu roġosi roġo boġono iavia?

⁴ Barau ġena numai eraka-toġato, Barau ġoiranai ġetorerito-ġoi beredi ġia ma karna ġesi ġeġanito. Mo beredi tu veaġa, Rubu Veaġa vereri moġo ġari, taravatu.

⁵ Ema ġomi na Mose ġena taravatu nuġanai mai guruġa maki roġosi roġo boġono iavia, ekirani, Sabadi ai Rubu Veaġa vereri tu Rubu Veaġai ġeġauveini. Moġesina nai Sabadi taravatuna ġevaġa-rakavaiani, senaġi ġia tu asi ġeri kerere?

⁶ Au na akiramini, mainai tarima ta, ġia na Rubu Veaġa evanaġiani.

⁷ Buka Veaġa ekirani, ‘Vevetuġaġwa neġi aurani, a varevare dagarana tu asiġi.’ Bema mai guruġa anina ġoro riba nai, asi ġeri kerere tarimari ġomi na asi ġoro vaġa-bade-iaġiri.

⁸ Korana Tarimarima Natuna tu Sabadi Verena.”

Iesu na ġima boso tarimana evaġa-namoato
Mareko 3:1-6; Luka 6:6-11

⁹ Iesu na mo gabu eiaġuiato, ma eiaġoto, Iuda tarimari ġeri rubu ai eraka-toġato,

¹⁰ ġimana ebosoto tarimana ta maki monai. Benamo Farisea tarimari na Iesu beġene ġofaġofa-iaġia ġana ġedanaġiato, ġekirato, “Sabadi ai keve bita vaġa-namorini tu ma taravatuna ba?”

¹¹ Benamo Iesu na evaġa-veserito, ekirato, “Ġomi ta ġena mamoe sebona kwariġutu moġo, Sabadi ai guri tai beketo-riġoni nai, vaġa-maġurina ġana ġomi na asi boġo inu-raġeani?”

¹² Boġono tuġamaġi: Tarimarima tuġamaġi-iaġina tu barego vedaurea, a mamoe ġenai tu kei! Moġa lorinai Sabadi ai veġa namona veiveina tu maoro vedaurea.”

¹³ Benamo Iesu na mo ġima boso tarimana ekiraiato, ekirato, “Ġimamu noduġi-roroġotoa.” Ġia ġimana eduġi-roroġotoato, benamo mabarana enamo-ġosito, ġimana reke ta kavana.

¹⁴ Senaġi Farisea tarimari ġeraka-rosito, benamo ġea boioġa-vegogoto, kamasi Iesu beġene vaġi-masea dabarana ġea vetauato.

Iesu tu Barau na eviriġiato tarimana

¹⁵ Farisea ġeri boioġa Iesu na varau eriba-guineato nai, ġia mo gabu na eraka-veġitato. Tarimarima ġutuma ġia murina na ma ġeiaġoto, ema keve tarimari mabarari evaġa-namorito.

¹⁶ Senaġi eguruġa gwaġiġi-vinirito, ġia varina tarima ta maki asi beġene vaġa-ribaia.

¹⁷ Maiġesi eguruġato, korana Isaia peroveta tarimana muruna na eraka-rosito guruġana bene moġoni ġana, ekirato,

¹⁸ “Mai tu au ġegu vetuġunaġi tarimana, aviriġiato. Au na ġia aura-viniani, e ġia ġenai maki aiakuni; Au Iaukagu ġia ġenai batoreani, e ġia na au ġegu guruġa e veġa iobuka-iobukari beġobata-iaġirini bese mabarari ġeri ai.

¹⁹ Ġia asi bevanevaneni, ma asi befararani; ema ġatamai garona maki ta na asi beseġaġiani.

²⁰ Ġia na gobulefa moirana asi betau-koruani, ema irau mo emoreni lamefana maki asi bevei-buseani, beiaġoni mo, ġia na guruġa e veġa iobukaiobukari bea vaġa-ruġarini, benamo beġe kokoreni.

²¹ Ġia ġenai tarimarima mabarari ġeri vetuġamaġikau beġe toireani.”

Iesu e Belsebul
Mareko 3:20-30; Luka 11:14-23; 12:10

²² Benamo kotari na iauka rakavana na eboroġiato tarimana Iesu ġenai ġeġabi-iaġoato. Mo tarima tu matana bubu e muruna bubu. Iesu na evaġa-namoato, benamo ma eguruġato e eboġeboġeto.

²³ Tarimarima mabarari na mai veġa eġorato ġeġaba-iaġiato, ġekirato, “Mai tu betaġu Davida Natuna banaġu, (Barau na ekiraġi-toreato vevaġa-maġuri tauna)?”

²⁴ Senaġi Farisea tarimari na maiġa ġeseġaġiato nai, ġekirato, “Mai tu Belsebul, iauka rakavari ġeri vere, na seġuka eviniani nai, mai tarima na iauka rakavari elai-vaġirini.”

²⁵ Iesu na ġeri tuġamaġi varau eribarito nai, ekirarito, ekirato, “Gavamani bevetavini, tauġena bevevaġi-vinini nai, ġia tu berakavani; e vanuġa ta o doġoro ta bevetavini, tauġena bevevaġi-vinini nai, asi beruġani riba.

²⁶ E diabolo ta na diabolo ta belai-vaġiani nai, Satani tu tauġena bevevaġini, moġa anina tu, doġoro tatai varau bevetavi nai, asi beruġani riba?

²⁷ Ġomi ġokirani, au tu Belsebul ġena seġuka na iauka rakavari alai-vaġirini, a ġomi murimi ai ġerakani tarimari na iauka rakavari aiġesi ġelai-vaġirini? Ġia na ġevaġa-moġoniani, ġomi ġemi guruġa tu kerere.

²⁸ Asiġina, dia Belsebul, senaġina Barau Iaukana ġena seġukai alai-vaġirini, naima boġono riba, Barau ġena Basileia tu ġomi ġemi ai varau beraġasi.

²⁹ Tarima ta gwada tarimana ġena numa asi bedareani riba, ma ġena farefare beġwa-rakarini, senaġi ġia na gwada tarimana varo na bebarubaruani, monai vau ġia na ġena numa farefareri beġabi-rakarini.

³⁰ Deikara na au asi evaġa-kavaguni, ġia na tu au eruġaguni, e deikara au ġesi asi etore-vegogoni, tarimana tu eveiari-lausilausini.

³¹ Moġa lorinai akiramini, tarimarima rakava beġe veini ema Barau beġe kira-rakava viniani tarimari, ġeri rakava mabarari Barau na betuġamaġi-fitoġarini riba, senaġi tarima ta na Iauka Veaġa bekira-rakava viniani tarimana, ġena rakava asi betuġamaġi-fitoġaiani.

³² Tarima ta na Tarimarima Natuna bekira-rakava viniani nai, ġena rakava tu betuġamaġi-fitoġaiani, senaġi tarima ta na Iauka Veaġa bekira-rakava viniani tarimana, ġena rakava asi betuġamaġi-fitoġaiani, toma mai maġuri ai ema maġuri gabinai maki asi betuġamaġi-fitoġaiani.”

Ġau e ġia ġwaġwana

Luka 6:43-45

³³ “Bema ġau namo nai tu, ġwaġwana maki namo, a bema ġau rakava nai, ġwaġwana maki rakava. Ġau tu ġwaġwana ġenana boribaiani.

³⁴ Ġomi mota naturi, ma rakavami ġesi ġotanuni, be guruġa namona ta tu kamasi boġo kiraġiani? Korana tarima tu nuġana na kara eiaġomani, murunai ekiraġirini.

³⁵ Tarima namona na dagara namori nuġanai evaġa-vegogorini dagarari bevaġa-raka-rosirini. Tarima rakavana na dagara asi namori nuġanai evaġa-vegogorini dagarari bevaġa-raka-rosirini.

³⁶ Senaġi au na akiramini, guruġa taġuitaġui mabarari, tarimarima na beġe kiraġirini tu, Barau ġena Kota baregona ġaronai voiri beġe ġabirini.

³⁷ Ġemu guruġa ġenana Barau na vei-iobukaiobuka tarimamu bekiraġimuni, o vei-rakava tarimamu bekiraġimuni.”

Farisea tarimari na vetoġa ġevetauani Iesu ġenai

Mareko 8:11-12; Luka 11:29-32

³⁸ Taravatu vaġa-riba-iaġina tarimari e Farisea tarimari kotari na Iesu ġevaġa-guruġaiato, ġekirato, “Vevaġa-riba tarimamu, ġai ġaurani vetoġa boruna ta ġoi ġemuna baġana ġitaia.”

³⁹ Iesu na evaġa-veserito, ekirato, “Toma ġuru rakavana ma veġuravanaġina ġesi, (Barau ġenana ġeveġitato ġuruna), seġuka vetoġana ta ġeġita-vetauani, senaġi vetoġa ta asi beġe doġariani, Iona, peroveta tarimana, vetoġana moġo.

⁴⁰ Iona tu ġaro toitoi ema boġi toitoi maġani-kone barana, rakana donodono diana nuġanai etanuto, moġesina kavana Tarimarima Natuna maki ġaro toitoi ema boġi toitoi tano nuġanai betanuni.

⁴¹ Kota baregona ġaronai Nineva tarimari beġe ruġa-vaisini, toma ġuru tarimari beġe samanirini, korana Iona ġena ġobata ġeseġaġiato neganai, ġia ġeri rakava ġerina ġevetuġamaġi-kureto, ema ġeraka-kureto Barau ġenai. Senaġi ġoġitaia, tarima ta na Iona evanaġiani tu maġa.

⁴² Kota baregona ġaronai maki, Seba vavine baregona o Kwin beruġa-vaisini, mai ġuru tarimari besamanirini, korana ġia tu ġena tanobara manaġana na eiaġomato, Solomona ġena iaunega guruġari bene seġaġiri ġana. Senaġi ġoġitaia, tarima ta na Solomona evanaġiani tu maġa.”

Iauka rakavana ma eġenoġoito

Luka 11:24-26

⁴³ “Iauka rakavana ta tarima ta ġenana eraka-vaġito, benamo gabu kaukauri na eraka-vanaġito, iaġana bene ġania etato, senaġi iaġaraġi gabuna ta asi edoġariato.

⁴⁴ Benamo ġia tauġena ekirato, ‘Naġenoġoi, araga-kwaneato numana ġana.’ Eġenoġoi-iaġoto, numa edoġariato. Numana tu korina, veiareva ema ġitaġitana namo vedaurea.

⁴⁵ Benamo ġia na iauka rakava kwaikwairi imaima ruarua (7) ma eġori-iaġorito, mabarari ġeraka-toġato, monai ġetanuto. Moġa lorinai mo tarima tu guinenai ġena rakava tu kota misina, senaġi dokonai ġena rakava tu barego vedaurea. Maġesina toma ġuru rakavana ġenai beġorani.”

Iesu sinana e tarina doġoro

Mareko 3:31-35; Luka 8:19-21

⁴⁶ Iesu tu tarimarima roġo evaġa-guruġarito-ġoi nai, ġia sinana e tarina doġoro ġeraġasito. Numa murikanai ġeruġa-tarito, ġeri ura tu Iesu beġene vaġa-guruġaia.

⁴⁷ Benamo tarima ta na ekiraiato, ekirato, “Ġoi sinamu e tarimu merori tu numa murikanai ġeruġa-taġoni, ġevaġa-guruġamu ġetoni.”

⁴⁸ Iesu na evaġa-veserito, ekirato, “Au sinagu tu dei, e au tarigu merori tu deikarari?”

⁴⁹ Benamo ġia ġimana na ġena mero eduġi-vinirito, ekirato, “Au sinagu e au tarigu merori tu maġeri!”

⁵⁰ Deikara na au Tamagu gubai etanuni ġena ura veiġari eveirini tarimana tu, au tarigu tauna, e au tarigu vavinena, ema au sinagu.”

13

Barabore - Iaraġa tarimana na widi ġueri efiurito

¹ Mo ġaro sebonai moġo Iesu na numa eraga-kwaneato, eiaġoto, Galilea kouna rikinai etanu-tarito.

² Tarimarima ġutuma-bara na ġevegogo-ġeġeraġiato nai, ġia tu ġasi tai eraġekauto, benamo etanu-tarito, a tarima mabarari tu fenu ai ġeruġato.

³ Iesu na dagara ġutuma barabore ai evaġa-ribarito.

Ekirato, “Iaraġa tauna ta ġena widi ġueri varovarori eiaġoto.

⁴ Ġia na widi ġueri efiu-lausilausirito-ġoi nai, gabu irauirau ai ġeketoto. Kotari dabarai ġeketoto, benamo manu ġeiaġomato, ġeġani-ġosirito.

⁵ Kotari forefore gaburi ai ġeketokauto tano maġigiri ai. Asikauna ġegarato, korana tano iatanai moġo.

⁶ Senaġi ġaro eraġekauto nai, etunurito, ema lamuri asi ġevariġo-ginikauto nai, asikauna ġemaraito.

⁷ Kotari tu ġauġa ġiniġiniri vefakari ai ġeketoto. Mai ġauġa ġiniġiniri ġetubu-baregato nai, varovaro dagarari ġetubu-ġaurito.

⁸ A kotari tu tano namonai ġeketoto, ġwaġwari ġetaunato nai, kotari sinau ta (100), ma kotari gabana imaima ma gabanana (60), ema kotari tu gabana toitoi (30).”

⁹ Iesu ġena guruġa dokonai ekirato, “Ma seġana tarimana bene seġaġi!”

Kara dainai Iesu na barabore ekiraġirito

Mareko 4:10-12; Luka 8:9-10

¹⁰ Iesu ġena mero ġia ġenai ġe-iaġoto, benamo ġedanaġiato, ġekirato, “Kara dainai barabore ai tarimarima ovaġa-guruġarini?”

¹¹ Iesu na evaġa-veserito, ekirato, “Guba Basileia ġena riba vekuretoġari ġomi ġemi ai tu fofori, senaġi ġia ġeri ai tu asiġina.

¹² Ma ġena seġaġi tarimana Barau na tuġamaġi-faka beviniani, barego vedaurea bene doġari ġana. Asi ġena seġaġi tarimana, ġena tuġamaġi-faka misina maki beġabi-vaġiani.

¹³ Moġesi naima au na barabore ai avaġa-guruġarini. Korana matari na ġeboġe-boġeni, senaġi asi ġeġita-maġatani, seġari na ġeseġaġini, senaġi asi ġetuġamaġi-maoroni.

¹⁴ Ġia ġeri ai Isaia ġena peroveta guruġana bema moġoni, maiġesi ekirato, ‘Ġomi tu boġo seġaġini, ma boġo seġaġini, senaġi asi boġo riba-maoroni. Ġomi tu boġo ġitani, ma boġo ġitani, senaġi debami asi beġe vekeoni.

¹⁵ Korana mai bese tarimari nuġari tu gwaġiġi foroforo, seġari maki bubu, matari maki ġevекouto. Matari na beġe ġitani garina, seġari na beġe seġaġini, e nuġari na beġe riba-maoroni garina, ma au ġegu ai beġe vetuġamaġi-kureni ġeri Barau, benamo bavaġa-maġuririni garina.’

¹⁶ A ġomi tu boġono iaku, korana matami tu ġeġitani e seġami tu ġeseġaġini.

¹⁷ Au na akira-korikorimini: Peroveta tarimari vovoka ma Barau ġena vei-iobukaiobuka tarimari ġutuma kaiveġata na ġeri ura baregona tu, ġomi na initoma kara ġoġitaiani beġene ġitaia, senaġi asi ġeġitaia, e ġomi na kara ini ġoseġaġiani beġene seġaġia, senaġi asi ġeseġaġiato.”

Widi ġueri baraborena anina

Mareko 4:13-20; Luka 8:11-15

¹⁸ “Ġoseġaġi, widi fiu-rovorovona tarimana baraborena anina tu maiġa:

¹⁹ Tarima kotari na Barau ġena Basileia varina ġeseġaġiani, senaġi asi ġetuġamaġi-fakaiani. Benamo Satani eiaġomani, ma mo kara ġia nuġari ai beġe varo dagarari tu, ġia na eġabi-vaġirini. Moġeri tarima tu widi ġuturi dabarai ġeketoni kavana.

²⁰ Widi ġueri kotari forefore ai ġeketoto, mai tu tarima kotari na Barau ġena Vari Namona ma iakuri ġesi ġeseġaġiani e ġeġabi-raġeani.

²¹ Senaġina ġia nuġari ai asi erakatoġa-ginikauni nai, asi etanu-maukani. Barau ġena guruġa dainai nega rakavari ġeġoitaġoni e ġevaġa-midigu midigurini ġarori ai, ġia ġenana ġeraka-veġitani.

²² Widi ġueri kotari tu ġauġa ġiniġiniri vekaravari ai ġeketoto, mainana ekiraġiani tu, tarima kotari na Barau ġena guruġa ġeseġaġiani, senaġi tauġeri

ġeri maġuri e farefare ġutumari ġetuġamaġi-baregorini ġerina, Barau ġena guruġa ġevекouni, e ġwaġwana maki asi evetoreni.

²³ A widi ġueri kotari tu tano namonai ġeketoto, mainana ekirarani tu, tarima kotari na Barau ġena guruġa ġeseġaġiani, ma ġeġabi-raġeani nuġari mabarari ġesi, ġia ġwaġwari ġevetoreni maki, kotari sinau ta (100), ma tari gabana imaima ma gabanana (60), ma kotari gabana toitoi (30).”

Barabore - Widi e ġauġa

²⁴ Iesu na barabore ta ġeri ma ekiraġiato, ekirato: Guba Basileia tu tarima ta kavana, ġue ġuturi namori ġena vamokai evarorito.

²⁵ Benamo boġi tai, tarimarima mabarari roġo ġegenato-ġoi nai, ebaru-viniato-ġoi tarimana eiaġomato, ġauġa ġuturi widi vekaravari ai efiurito, benamo erakato.

²⁶ Widi ġetubu-foforito, ġegara-baregoto e ġwaġwari ġeburito nai, ġauġa rakavari maki ġia vefakari na ġefoforito.

²⁷ Benamo vamoka biaguna ġena vetuġunaġi merori ġia ġenai ġeiaġomato, ġekirato, ‘Vereġauka, ġoi ġemu vamokai ġue ġuturi namori ovarorito, nene? Senaġi mai ġauġa rakavari tu ainana beġe iaġoma?’

²⁸ Ġia na evaġa-veserito, ekirato, ‘Ebaru-vinirani tarimana na mai veiġa bema veia.’ Vetuġunaġi merori na ġedanagiato, ġekirato, ‘Bema ourani nai, ġaiāġo, be baġana lauri ba?’

²⁹ Ġia evaġa-veseto, ekirato, ‘Asiġina, korana ġomi na ġauġa boġo laurini nai, widi maki lamuri ġesi boġo lau-sebonarini garina.

³⁰ Ġia ruarua beġene gara-sebona, ma beġene tanu mo, widi ġwaġwana basibasina ġarona bene raġasi. Mo ġaro ai au na basi-basina tarimari maiġesina bakirarini, bakirani: Giniguine tu, ġauġa mabarari ġovaġa-vegogori, ġobaru-sebonari, be karava na bene ġarari, a widi ma boġono vaġa-vegogoa, be ġegu ġaniġani vaġa-vegogo gabunai boġono toreri.’ ”

Barabore - Mastadi ġauna ġutuna

Mareko 4:30-32; Luka 13:18-19

³¹ Iesu na barabore ta ma ekira-vararito, ekirato, “Guba Basileia tu mastadi ġauna ġutuna kavana, tarima ta na eġabiato, ġena vamokai evaroato.

³² Tanobarai varovaro dagarari ġueri mabarari fakari ai ġia ġereġana misina korokoro, senaġi etubuni nai, varovaro dagarari mabarari fakari ai ġia moġo barego vedaurea. Ġia tu ġau ai eiaġoni naima, rovo manuri ġeiaġomani, ma ġeri nuġi ġeveini ġia leganai.”

Barabore - Farao vaġa-tubuna muramurana

Luka 13:20-21

³³ Iesu na barabore ta ġeri ma ekiraġiato, ekirato, “Guba Basileia tu farao vaġa-tubuna muramurana kavana, vavine ta na kotuna ta moġo eġabiato, benamo farao fuseri toitoi ġesi egiroato, eiaġoto mo, muramura na mabarana evaġa-tubu baregoato.”

Barabore aniri

Mareko 4:33-34

³⁴ Iesu na mai dagara mabarari barabore ai tarimarima evaġa-riba iaġirito-ġoi. Ġena ġobatai barabore asi eraga-kwanerito-ġoi.

³⁵ Mai veiġa eveiato ġenana, peroveta tarimana ġena guruġa ema vaġa-moġoniato, ekirato,

“Au na barabore ġerina
ġia bavaġa-guruġarini;
tanobara evesinato ġarona na

beiaḡoma mo initoma
veḡuni ḡetanuni dagarari,
au na ḡia ḡeri bakiraḡi-foforirini.”

Iesu na widi e ḡauḡa baraborena anina ekiraḡi-foforiato

³⁶ Iesu na mo tarimarima ḡutuma eraga-kwanerito, benamo numai eraka-toḡato. Ḡena mero ḡia ḡenai ḡeiaḡomato, bena ḡekiraiato, ḡekirato, “Ḡauḡa rakavari vamoka nuḡanai baraborena ḡai ḡemai nokiraḡi-maḡataia.”

³⁷ Iesu na evaḡa-veserito, ekirato, “Widi ḡueri namori evarorini tarimana tu Tarimarima Natuna.

³⁸ Vamoka tu tanobara, ḡue ḡuturi namori tu Barau ḡena Basileia o veḡitaḡau seḡukana gaburenai ḡetanuni tarimari; ḡauḡa rakavari tu Satani ḡena tarimarima doḡoro.

³⁹ E ḡauḡa varovarona tarimana tu Diabolo, ḡita ebaru-vinirani tarimana; kwakwa tu tanobara magona beraḡasini kavana. Ḡwaḡwana kwakwana e basibasina tu aneru na beḡe korana-iaḡiani.

⁴⁰ Vaḡa-ilailana ḡauḡa ḡevaḡa-vegogorini, ma karavai ḡegaburini, ḡeḡara-ḡosirini, tanobara bea korini nai, moḡesina kavana bevetoreni:

⁴¹ Tarimarima Natuna na ḡena aneru tu betuḡurini, benamo tarimarima ḡeḡori-kerererini tarimari, ema veḡa rakavari ḡeveirini tarimari mabarari, Barau ḡena Basileia ḡenana beḡe ḡabi-veḡitarini,

⁴² e karava seḡukana ma moremorena nuḡanai beḡe fiu-toḡarini, ema monai roḡo beḡe taḡini, gadikari maki beḡe veḡara-tarini.

⁴³ Moḡa ḡaronai maki Barau ḡena vei-iobukaiobuka tarimari tu, ḡaro kavana ma mamari ḡesi Tamari ḡena Basileia nuḡanai beḡe tanuni. Deikara ma seḡana tarimana, bene seḡaḡi.”

Barabore - Tarima ta na farefare namona ta ekure-toḡaiato

⁴⁴ “Guba Basileia tu farefare vekuretoḡana tanobarai kavana. Tarima ta na edoḡariato, benamo ma eguriguri-ḡauato. E ma iakuna ḡesi eiaḡoto, ḡena dagara mabarari ea voivoi-iaḡirito, benamo mo tano evoiato.”

Barabore - Galasi forena davana barego forena

⁴⁵ “Guba Basileia tu bisinesi tarimana kavana, galasi foreri davari barego dagarari evetaurini.

⁴⁶ Ḡia na voina barego lelevaḡina forena ta edoḡariato, benamo ḡena farefare mabarari evoivoi-iaḡi fitoḡarito roḡo, monai vau mo davana forena evoiato.”

Barabore - Reke

⁴⁷ “Guba Basileia tu reke kavana, davarai ḡefiu-riḡoani nai, maḡani-kone iraurau nuḡanai ḡetoḡani.

⁴⁸ Reke evonuni nai, ḡeinu-raḡeani tanobara ḡana, benamo reke tarimari ḡetanu-tarini vau, maḡani-kone reke nuḡanai moḡeri mabarari ḡevirigirini, namori mabarari tu baketi ai ḡeḡurarini, a rakavari tu ḡefitoḡarini.

⁴⁹ Moḡesi vetoḡa bevetoreni, tanobara magona beraḡasini nai. Aneru beḡe iaḡomani nai, veḡa rakava tarimari tu beḡe tore-veḡitarini veḡa iobukaiobuka tarimari ḡerina;

⁵⁰ e karava more-morena nuḡanai beḡe fiu-toḡarini. Monai beḡe taḡini, gadikari maki beḡe veḡara-tarini.”

Guruḡa moḡoniri variḡuri e guineri

⁵¹ Iesu na ḡena mero edanaḡirito, ekirato, “Mai guruḡa mabarari nuḡami ai boḡo riba-ḡitakauri ba?” Ḡia na ḡekiraiato, “Oi, Vereḡauka.”

⁵² Iesu na ma ekirarito, ekirato, “Moġesina nai, bema taravatu vaġa-ribana tarimana ta Guba Basileia ġena vevaġa-riba tarimanai beiaġoni neganai, ġia tu numa biaguna ta kavana, ġena farefare variġuri ema guineri eġabiririni ġena farefare vaġa-vegogo numana na.”

Nasareta tarimari na Iesu asi ġeġabi-raġeato

Mareko 6:1-6; Luka 4:16-30

⁵³ Iesu na maiġeri barabore ekiraġi-ġosirito vau, mo gabu eraga-kwaneato.

⁵⁴ Monana vau ebaregoto vanuġanai eraġasito. Iuda tarimari ġeri rubu ai evevaġa-ribato-ġoi nai, ġia ġeseġaġiato-ġoi tarimari na ġena ġobata guruġari ġeġaba-iaġirito, ema maiġesi ġevedanaġito, ġekirato, “Mai tarima ġena riba tu ainana eġabito, e mai nuġa-farevaġi veiġari maki kamasi eveirini?”

⁵⁵ Ġia tu kamuda tarimana natuna, ene? Ġia sinana arana Maria ġetoni, ene? E ġia tarina merori arari tu Iakobo (o Iames) e Iosefa, Simona e Iudas, ene?

⁵⁶ Ema ġia tarina vavineri mabarari maki ġita ġesi maiġeri. Senaġi mai riba ema seġuka mabarari ne ainana eġabito?”

⁵⁷ Moġesi ġetuġamaġi-ġutuma viniato nai, ġia na asi ġeġabi-raġeato. Iesu na maiġesi ekirarito, ekirato, “Peroveta tarimana tu gabu mabarari ai beġe gubakauani, senaġi ġena vanuġa korikori ema ġena numa tarimari na moġo asi beġe gubakauani.”

⁵⁸ Monai nuġa-farevaġi veiġa boruri viravira moġo eveirito, korana asi ġeri veġabidadama nai.

14

Ioane Babatiso ġena mase

¹ Mo negai Heroda, Galilea verena, Iesu varina eseġaġiato.

² Benamo ġia na ġena vetuġunaġi tarimari evaġa-guruġarito, ekirato, “Mai tu Ioane Babatiso mase na bevaisiraġe-ġenoġoi nai, seġuka veiġari boruri eveirini.”

³ Heroda na Ioane eġabi-tariato ma ebarubaruato, dibura numai ekou-ġauato. Ġia na maiġesina evei-viniato, korana ġia kakana Filipo ġaraġona, Herodia, ġaramanai.

⁴ Ioane Babatiso na Heroda evaġa-guruġaiato-ġoi, ekirato, “Ġoi na Herodia boġaraġo-veraria tu asi maoro.”

⁵ Heroda eura-rakavato, Ioane bene vaġia, senaġi tarimarima gariri eveito, korana ġia na Ioane ġetuġamaġiato-ġoi tu peroveta tarimana ta.

⁶ Senaġi Heroda ġena ġora ġaronai o betdei, Herodia natuna ġuiatona tu varivari tarimari ġoirari ai ebarato. Heroda maki mai bara na evaġa-iakuato.

⁷ Moġesina nai ġia ma nuġana mabarana ġesi guruġa gwaġiġinai maiġesina bara-ġuiatona ekiraġitore-viniato, ekirato, “Ġoi kara oura-viniani dagarana nokiraġia, benamo bavinimuni.”

⁸ Ġuiato tu sinana na varau evaġa-guruġa guineato ema elaunaġiato nai, ġia maiġesina ekirato, “Ioane Babatiso debana diġu ai mainai noma vinigu.”

⁹ Heroda nuġana emetoto, senaġi ġena guruġatore ġuiato ġenai varau eveiato e ġena varivari tarimari dairi ai ekirato, beġene vinia.

¹⁰ Benamo tarima debari ebasi-ġuturito-ġoi tarimana ta etuġuato dibura numai, Ioane debana ebasi-ġutuato.

¹¹ Ioane debana tu diġu ai ġeġuraiato vau, ġuiato ġeviniato, benamo sinana ġenai eġwa-iaġoato.

12 Benamo Ioane ġena mero ġeiaġomato, tauġanina ġeġabiato, ġeguriato. Moġa murinai ġeiaġoto Iesu ġekira-varaiato.

*Iesu na tarimarima daġara imaima (5,000) eġuburito
Mareko 6:31-44; Luka 9:10-17; Ioane 6:1-13*

13 Iesu na Ioane ġena mase varina eseġaġiato nai, ġia monana eraka-ġerevaġito ġasi na, asi tarimarima gabuna ġana eiaġoto. Senaġi tarimarima na ġeseġaġiato nai, ġeri vanuġa ġeiaġuirito, tano na kwakuri na ġerakato, Iesu murina na ġeiaġoto.

14 Iesu fenu ai edarokauto nai, ġia na tarimarima ġutuma-bara eġitarito, benamo evetuġa-rakavarito, ema ġeri keve tarimari evaġa-namorito.

15 Lavilavi rekenai Iesu ġena mero ġia ġenai ġeiaġoto, bena ġekirato, “Mai tu gabu fakana, asi tarima-rimana, ġaro varau bevariġo naima, mai tarimarima ġutuma-bara notuġuri, be vanuġai ġari ġaniġani beġenea voi.”

16 A Iesu ekirato, “Ġia asi beġene raka-veġita, ġomi na ġari boġono viniri, be beġene ġaniri.”

17 Ġia na ġekiraiato, ġekirato, “Ġai ġemai tu beredi imaima (5) e maġani-kone ruarua (2) moġo maiġeri.”

18 Iesu na ekirarito, ekirato, “Maiġana ġoġabi-iaġomari au ġegu ai.”

19 Benamo ġia na mai ġutuma-bara elaunaġirito, ġauġa iatari ai beġene tanutanu-tari etato, monai vau ġia na beredi imaima e maġani-kone ruarua eġabirito, gubai eboġe-raġeto, Barau evaġa-namoato vau, etavi-kirakirarito, ġena mero evinirito, benamo ġia na vau mai tarimarima ġutuma-bara ġevinirito.

20 Mabarari ġeġani-maseto; ġaniġani kwari ġevaġa-vegogorito, boseġa gabanana ruarua (12) ġevaġa-vonurito.

21 Ġeġaniġanito, tau moġo, mabarari tu 5,000 kavana, senaġi vavine ma naturi keikeiri ġesi tu asi ġeiavirito.

*Iesu nanu iatanai erakato
Mareko 6:45-52; Ioane 6:16-21*

22 Moġa murinai Iesu na ġena mero evaġa-guruġarito, ġasi ai beġene raġekau, beġene guine, kou reke ta ġana beġene iaġo etato. A ġia tu mo tarimarima ġutuma-bara roġo etuġu-rovorovorito.

23 Mai tarimarima vovoka etuġu-rakarito vau, ġia ġereġana ġoro ġana evaraġeto, bene ġauġau ġana.

Varau eboġito nai, ġia tu roġo moġa, ġereġana.

24 Ġasi tu kotuna ma fakana tanobara ġenana kou nuġanai, e ureure na edori-ġareva ġarevaiato, korana iavara na ġasi ġena raga ġoirana rekena na etoġato-ġoi nai.

25 Horaġauna 3 ema 6 koloko vekaravari ai boġiboġi rekenai, Iesu ġia ġeri ai eiaġoto.

26 Senaġi ġena mero na nanu iatana na erakato-ġoi ġeġitaiato, benamo nuġari maki ġefare-vaġito, ema ġegari-rakavato, ġekirato, “Mo tu murava ta!” Ġegarito nai ġeġabato maki.

27 Iesu na asikauna evaġa-guruġarito, ekirato, “Ġonuġa-gwaġiġi, mai tu au; asi ġogari.”

28 Petero na evaġa-veſeato, ekirato, “Vereġauka, bema moġoni ġoi ne-ganai, bono launaġigu, be nanu iatanai bana raka, ġemu ai bana iaġosi.”

29 Iesu ekirato, “Noiaġoma!” Benamo Petero ġasi na eraka-riġoto, nanu iatanai erakato, Iesu ġenai eiaġoto.

³⁰ Senaġi Petero na iavara (e ureure) eġitaiato, benamo egarito, erei-riġoto nai eġaba-fouto, ekirato, “Vereġauka o, noma vaġa-maġurigu.”

³¹ Iesu asikauna ġimana etuġu-iaġoato, ġenai eveġabikauto, ekirato, “Veġabidadama kei tarimana, karase nai odaradarani?”

³² Tauri ruarua ġasi ai ġeraġekauto vau iavara edokoto.

³³ Ġasi tarimari tu ġia ġoiranai vau ġetoma-rakariġoto, ġekirato, “Moġoni veġata, ġoi tu Barau Natuna.”

Iesu na keve tarimari Genesareta ai evaġa-namorito

Mareko 6:53-56

³⁴ Ġia ġasi na ġevanaġito, Genesareta tanonai ġeraġasito.

³⁵ Mo gabu tarimari na Iesu ġea ġita-doġariato, benamo ġia varina mo gabu vanuġari mabarari ġevaġa-ribarito. Benamo keve tarimari ġia ġenai ġeġwa-iaġorito,

³⁶ e ġenoġiatio, ġena dabuġa dudunai moġo maki beġene veġabikau. Gabivau, ġeveġabi-kauto tarimari mabarari varau ġenamoto.

15

Namo e rakava

¹ Farisea tarimari e taravatu ġevevaġa-riba iaġiatio-ġoi tarimari kotari Ierusalemna na Iesu ġenai ġeiaġoto, ġekirato,

² “Karase nai ġoi ġemu mero na ġita senera vereri ġeri vevaġa-riba asi ġeseġaġirini? Ġia ġimari maki dabara korikoriri ai asi ġeġuriġirini vau ġeġaniġanini!”

³ Iesu na evaġa-veserito, ekirato, “Be karase senemi vereri ġeri vevaġa-naġi boġono korana-iaġiri urari ai, Barau ġena taravatu guruġari ġoruġarini?”

⁴ Barau ekirato, “Tamamu e sinamu bono gubakauri,’ ema ‘Deikara ta na tamana o sinana beguruġa-rakava viniani tarimana tu boġono vaġi-mase!’

⁵ Senaġi ġomi ġokirani, tarima ta na tamana o sinana bevaġa-guruġaiani, bekirani, ‘Au na ġomi asi bavaġa-kavamini, korana bara vinimi dagarana tu Barau ġena dagara, naima ġia aviniani.’

⁶ Moġesi veġai ġomi na tarima ġokouani, tamana e sinana asi bene vaġa-kavari e asi bene gubakauri ġana. Ġemi sene maġuriri maiġesiri ġerina Barau ġena taravatu guruġari asi aniri ai ġovaġa-iaġorini.

⁷ Ġofaġofa tarimami, Isaia na eperoveta-iaġimito tu moġoni, ekirato,

⁸ ‘Mai besena tu mururi koriri ai moġo au ġegubakauguni ġeri Barau, senaġina ġia nuġari tu manaġa rakava au ġegu ai.

⁹ Ġetoma-rakariġo vini-kavaguni, ġeri vevaġa-riba tu tarimarima ġeri vevaġa-naġi taravaturi, a dia au ġegu!’ ”

Dagara kotari na tarima ġevaġa-rakavarini

Mareko 7:14-23

¹⁰ Iesu na tarimarima ġutuma ġia ġenai ekea-iaġomarito, benamo ekirar-ito, ekirato, “Ġoseġaġi, ema boġono riba-maoro:

¹¹ Murika na eraka-toġani tarima murunai dagarana na ġia asi evaġa-rakavaiani, senaġina kara ġia nuġana o loruna ġutuna na ma muruna na eraka-rosini dagarana na ġia evaġa-rakavaiani.”

12 Āna mero ġia ġenai ġeiaġomato, benamo ġekiraiato, ġekirato, “Āoi ribamu, Farisea tarimari tu ġoi ġemu guruġa beġe seġaġia nai, nuġari beġe midigu?”

13 Iesu evaġa-veseto, ekirato, “Tamagu gubai etanuni na ġau asi evarorito mabarari tu beġe raġa-vaġirini.

14 Ġotuġamaġi-fitoġari! Ġia matari bubu, senaġi ġeurani mata-bubu tarimari beġene ġori-kauri. Bema mata-bubu tarimana na mata-bubu tarimana ta beġori-kauani nai, tauri ruarua koufai beġe keto-riġoni.”

15 Petero na ekiraiato, ekirato, “Mai guruġa veabanaġina tauna korikori novaġa-ribama.”

16 Iesu na ekirarito, ekirato, “Ġomi maki asi ġotuġamaġi-fakani tarima kotari kavana?”

17 Asi ġoribani maki? Dagara ta tarima muruna na eraka-toġani, eiaġoni sinaġenai, monana eiaġoni tauġanina ġenana ea raka-rosini.

18 Senaġina muruna na ġeraka-rosini dagarari tu nuġana o loruna na ġeiaġomani naima, maġeri dagara na tarima ġevaġa-rakavaiani.

19 Tarima nuġana o loruna ġenana tuġamaġi rakavari ġeraġeni nai, evaġivaġini, eveġura-vanaġini, emata-boraġani, elemani, Kota gabunai ġofaġofa guruġari ekiraġirini, ema tarima namori arari ġofaġofa veġari ai evari-fiurini.

20 Maġeri dagara na tarima evaġa-rakavaiani; senaġina ġimamu asi oġuriġiani vau oġaniġanini, monana tarima asi evaġa-rakavaiani.”

Irau bese vavinena ta ġena veġabidadama Mareko 7:24-30

21 Iesu na mo gabu eraga-kwaneato, eraka-iaġoto Taia e Sidono rekeri tanori ai eraġasito.

22 Benamo monai etanuto-ġoi vau, Kanana vavinena ta Iesu ġenai eiaġomato, eġaba-fouto, ekirato, “Vereġauka, Davida Natuna o, au nove-tuġagu! Au natugu ġuiatona tu iauka rakavana na beboroġia nai, ġena midigu initoma tu barego rakava moġo.”

23 Senaġina Iesu na ġia asi evaġa-veseato. Benamo ġena mero ġia ġenai ġeiaġomato, ġenoġiato, ġekirato, “Notuġu-rakaia! Ġita murira na eiaġomani ema guru baregona eveiani.”

24 Iesu evaġa-veseto, ekirato, “Barau na au etuġuguto tu, rekwarekwa mamoori, Isaraela tarimari, ġeri moġo.”

25 Benamo mo vavine Iesu kwakuna koranai evetuitarito, ekirato, “Vereġauka, novaġa-kavagu!”

26 Iesu evaġa-veseto, ekirato, “Mero misiri ġari ġaniġani bita ġabirini, ma kwaiva bita fiu-vinirini tu asi maoro.”

27 Vavine na evaġa-veseato, ekirato, “Vereġauka, mani tu moġoni, senaġina kwaiva na ġaniġani kwari ġeketo-firiġoni, biaguri ġeri ġaniġani fatari na, maki ġeġanirini.”

28 Benamo Iesu na evaġa-veseato, ekirato, “Veġabidadama barego vavinemu! Kara oura-viniani veġana beġorani.” Mo horai moġo ġia natuna ġuiatona enamoto.

Iesu na keve tarimari vovoka evaġa-namorito

29 Iesu na mo gabu eiaġuiato, Galilea kouna sevina na eraka-vanaġito. Benamo ġoro tai eraġeto, tuġunai etanu-tarito.

³⁰ Tarimarima ġutuma-bara ġia ġenai ġeiaġomato, keve iraurau tarimari ġeġabi-iaġomarito, kotari kwaku rakava, mata-bubu, kobari na ġedarato-ġoi tarimari, muru-bubu, ema keve iraurau ġutuma maki. Iesu kwakuna koranai ġema tore-taririto, benamo ġia na evaġa-namorito.

³¹ Tarimarima mabarari na mai vetoġa ġeġitaiato nai, ġeġaba-rakavato, korana mururi bubu tarimari ġeguruġato, ġedarato-ġoi tarimari tauġaniri vinuba gaburi ai ġevetoreto, kwaku rakava tarimari ġerakato, mata-bubu tarimari ġeboġe-boġeto. Benamo ġia na Isaraela ġeri Barau ġevaġa-raġeato.

Iesu na tarimarima daġara vasivasi (4,000) eġuburito

Mareko 8:1-10

³² Iesu ġena mero ġia ġenai ekea-iaġomarito, ekirato, “Au na mai tarimarima avetuġarini, korana ġaro toitoi veġatana au ġesi mainai beġe tanu, ma kara ta maki roġosi roġo beġene ġania. Ġaniġani ta roġosi roġo beġene ġani nuġanai, au na asi batuġu-rakarini, korana dabarai beġea borimarini garina.”

³³ Ġena mero na ġedanaġiato, ġekirato, “Mai tano fakanai ġaniġani vovoka tu kamasi bita doġarini vau, mai ġutuma-bara bita ġuburini?”

³⁴ Iesu na evaġa-veserito, ekirato, “Ġomi ġemi ai beredi tu vira maniġa?” Ġia ġekirato, “Beredi imaima ruarua (7) ġai ġemai maiġa, ema maġani-kone misiri kotari maki.”

³⁵ Benamo Iesu na mai tarimarima asisebo ekirarito, tano ai ġetanutanutari.

³⁶ Benamo beredi imaima ruarua (7) e maġani-kone eġabirito, Barau evaġa-namoato, ebuki-ġuturito, ġena mero evinirito, ġia na vegogo tarimari ma ġevinirito.

³⁷ Mabarari ġeġani-maseto murinai, Iesu ġena mero na ġaniġani kwari ġegogorito, boseġa imaima ruarua (7) ġevaġa-vonurito.

³⁸ Mo ġaniġani ġeġaniato ġenana tau moġo mabarana tu 4,000, senaġina vavine ma naturi ġesi tu asi ġeiavirito.

³⁹ Benamo Iesu na mai ġutuma-bara etuġu-rovo rovorito, a ġia ġasi ai eraġeto, Magadan tanona ġana eiaġoto.

16

Farisea e Sadukea tarimari ġeri ura vetoġa ta guba na bene mariġo

¹ Farisea e Sadukea tarimari kotari Iesu ġenai ġeiaġoto, benamo ġedanaġi-ribaġaniato. Ġeri ura vetoġa ta guba na bene mariġo, beġene ġitaia, ġia tu moġoni Barau na etuġuato tarimana.

² Senaġi Iesu na evaġa-veserito, ekirato, “Lavilavi ai ġaro evariġoni nai, ġokirani, ‘Guba bekakakaka, be ġura asi beraguni, ġitaġitana tu nega namo.’

³ A boġi-boġi rekenai ġokirani, ‘Toma tu ġura ma iavarana ġesi eiaġomani, korana guba bekakakaka, ema ġitaġitana maki ma garina.’ Guba ġoġitaiani nai, kara boġo kiraġiani, nega namo o nega rakava ġeri ai tu lorinai, senaġina maitoma ġaro vetoġari tu asi ribami!

⁴ Maitoma ġuru rakavana ma veġura-vanaġina ġesi, (Barau ġenana ġeveġitato ġuruna), vetoġa ma evetauani, senaġina vetoġa ta asi baviniġini, a Iona, peroveta tauna, ġenai eġorato vetoġana moġo.” Benamo Iesu na eraga-kwanerito, ġerina eraka-veġitato.

Iesu ġena mero ġedaradarato

Mareko 8:14-21

⁵ Kou na ġeġasi-vanaġito reke ta kefo ai vau, Iesu ġena mero ġeribato, ġaniġani asi ġeġabikauto.

⁶ Benamo Iesu na ekirarito, ekirato, “Lorimi boġono vetore, boġono boġeboġe, korana Farisea tarimari e Sadukea tarimari ġeri farao vaġa-tubuna mura-murana lorina boġono torea.”

⁷ Ġia tauġeri ġeguruġa-guruġa iaġi-vegogo-ato, ġekirato, “Ġia maiġesi eguruġani, korana beredi asi bita ġabikau nai.”

⁸ Iesu ribana ġia na kara ġekiraġiato naima, edanaġirito, ekirato, “Karase nai ġereġami na beredi asi boġo ġabikau ġoguruġa-guruġa iaġiani? Veġabidadama kei tarimami!

⁹ Ġomi roġosi roġo boġono riba-maoro? E asi ġotuġamaġiani beredi imaima (5) ġenana tarimarima 5,000 ġeġaniġanito, e beredi kwari ġogogorito tu boseġa vira ġovaġa-vonurito?

¹⁰ Ema ta maki, farao imaima ruarua (7) ġenana tarimarima 4,000 ġeġaniġanito, e beredi kwari ġogogorito tu boseġa vira ġovaġa-vonurito?

¹¹ Kamasi se nuġami asi ġevekeoni, ma asi ġoribani, au na tu dia beredi aguruġa-iaġiani? Ma nakira: Farisea tarimari e Sadukea tarimari ġeri farao vaġa-tubuna dagarana lorina boġono torea!”

¹² Benamo ġia nuġari ġevekeoto, ema ġeribato maki, Iesu na dia farao vaġa-tubuna muramurana eguruġa-iaġiato, senaġina Farisea e Sadukea tarimari ġeri vevaġa-riba guruġari ġofaġofari rekeri ai eguruġato.

Petero na Iesu ekiraġi-foforiato, Keriso

Mareko 8:27-30; Luka 9:18-21

¹³ Iesu eiaġoto, Kaisarea Filipi vanuġana tanona rekenai eraġasito. Monai vau ġia na ġena mero edanaġirito, ekirato, “Tarimarima tu kara ġetoni, Tarimarima Natuna tu deikara?”

¹⁴ Ġia ġekirato, “Kotari ġekirani, ġoi tu Ioane Babatiso, kotari ġekirani, Elia, ma tari ġekirani tu, Ieremia o peroveta tarimana ta.”

¹⁵ Iesu na ġia edanaġirito, ekirato, “A ġomi tu kara ġotoni au tu deikara?”

¹⁶ Simona Petero na evaġa-veŋato, ekirato, “Ġoi tu Keriso, maġuri Barauna Natuna.”

¹⁷ Iesu na evaġa-veŋe viniato, ekirato, “Simona, Ioane natuna, bono iaku ema vevaġa-namo iatamu ai bene tanu, korana mai vevaġa-veŋe moġonina bovinia, maiġa tu dia tarima ta ġenana beiaġoma, senaġina mai tu au Tamagu gubai etanuni na ġoi bevinimu.

¹⁸ Moġa lorinai akiramuni: Ġoi tu Petero, (anina tu fore), ema mai fore iatanai au ġegu ekalesia bavaġa-ruġaiani. Mase ġena seġuka na maki asi bevaġa-darereani.

¹⁹ Au na Guba Basileia kiri maki ġoi bavanimuni; tanobarai bobarurini dagarari mabarari gubai maki Barau na bebarurini; e tanobarai boruġarini dagarari mabarari gubai maki Barau na beruġarini.”

²⁰ Benamo Iesu na ġena mero ekirarito, tarima ta asi beġene vaġa-ribaia ġia tu Keriso, (Barau na ekiraġi-toreato vevaġa-maġuri tauna).

Iesu na ġena mase e variġisi-ġenoġoi eguruġa-iaġirito

Mareko 8:31-9:1; Luka 9:22-27

²¹ Mo nega na veġata Iesu na ġena mero evaġa-riba guinerito, ekirato, “Au tu Ierusema ġana aiaġoni, be Iuda vereri, e Rubu Veġa vereri baregori, ema taravatu vaġa-riba-iaġina tarimari ġerina roġo amidigu-lelevaġini; ema beġe vaġi-maseguni maki, senaġina ġaro vaġa-toitoinai vau, mase na ma bavaisiraġe-ġenoġoini.”

²² Petero na eġori-veġitaiato, benamo esisiba-viniato, ekirato, “Vereġauka, dia maniġesina; maniġesina asi beġe vei-vinimuni, ma asi beġorani maki.”

²³ Benamo Iesu eboġe-kureto, Petero ekiraiato, ekirato, “Ġoi Satani, ġeguna noraka-ġerevaġi! Au ġegu iaġoiago ġoi na odiu-ġauani, korana mai ġemu tuġamaġi guruġana tu dia Barau ġenana eiaġomani, senaġina tarimarima ġerina.”

²⁴ Iesu na ġena mero evaġa-guruġarito, ekirato, “Bema tarima ta au murigu ai bene raka etoni nai, tauġena bene veruġa, ġena satauro bene ġwaia, ma murigu ai bene raka.”

²⁵ Moġa lorinai deikara tauġena moġo ġena maġuri lorina etoreani tarimana, ġena maġuri befitoġaiani. A deikara au daigu ai ġena maġuri befitoġaiani tarimana, ġena maġuri asi bevei-rekwarekwaiani, senaġi bedoġariani.

²⁶ Tarima ta na tanobara mabarana uranai ġena maġuri befitoġaiani, ġena namo tu kara ġia ġenai? Korana tarima ta ġena maġuri efitoġaiato nai, kara na vau ma bevoi-ġenoġoiani?

²⁷ Korana Tarimarima Natuna tu Tamana mamana marevana e seġuka baregona e ma ġena aneru mabarari ġesi beġe iaġomani, benamo tarimarima tata ġeri veiġa ilailanai voiri tu bevinirini.

²⁸ Moġoni akiramini, mai kotari ini ġeruġa-taġoni maiġeri tu asi roġo beġe maseni, beiaġoni mo, Tarimarima Natuna ġena Basileia nuġanai beiaġomani beġe ġitaiani.

17

Iesu vetoġana eirauto

¹ Ġaro imaima sebona (6) ġekorito murinai, Iesu na Petero, e Iakobo (o Iames), ema tarina Ioane eġabirito, ġoro baregona ta tuġuna ġana ġevaraġeto, monai ġia ġereġari moġo.

² Ġia ġeboġe-taġoto-ġoi nuġanai, Iesu ġitaġitana varau eirauto: Ġia ġoirana ekimore-kimoreato ġaro noġa, ma ġena dabuġa ekuro-ġaroġaroto.

³ Benamo mai mero toitoi na Mose e Elia ġeġitarito, Iesu ġesi ġeguruġa guruġato-ġoi.

⁴ Monai Petero eguruġa-fouto, Iesu ekiraiato, ekirato, “Vereġauka, namo vedaurea ġita mainai maiġera! Be, ourani nai, fouta toitoi naragari, ta ġoi ġemu, ta Mose ġena, ema ta Elia ġena.”

⁵ Ġia roġo eguruġato-ġoi, magube kuro-ġaroġarona na ema ġabi-ġaurito vau, garo ta mai magube nuġana na ekea-rosito, ekirato, “Mai tu au Natugu, auravini-baregoani; ġia ġenai aiaku-rakavani. Ġia boġono seġaġi-vinia!”

⁶ Iesu ġena mero toitoi na mai garo ġeseġaġiato nai, tano ai ġeketo-tarito ġoirari maki tano ai, korana ġegari-rakavato nai.

⁷ Benamo Iesu tu ġia ġeri ai eiaġoto, tauġaniri eġabi-kararito, ekirato, “Ġovaisivaisi-raġe, asi ġogari.”

⁸ Ġia ġeboġe-vaisito nai, ġia na tarima ta asi ġeġitaiato ġia ġesi, Iesu moġo ġereġana.

⁹ Mabarari ġoro na ġemariġoto-ġoi nai, Iesu na evaġa-guruġarito, ekirato, “Boġo ġita dagarari tarima ta asi boġono vaġa-ribaia, bene iaġo mo, Tarimarima Natuna mase na bene variġisi-ġenoġoi.”

¹⁰ Benamo Iesu ġena mero na ġedanaġiato, ġekirato, “Kara dainai taravatu vaġa-riba-iaġina tarimari ġekirani, Elia tu beiaġoma-guineni?”

¹¹ Iesu evaġa-veseto, ekirato, “Moġoni veġata, Elia tu beiaġoma-guineni, dagara mabarari bevaġa-variġu ġenoġoirini.

¹² A au na akiramini, Elia tu varau eiaġomato, senaġi tarimarima tu asi ribari ġia tu deikara. Ġeri ura veġari ai moġo ġevei-viniato-ġoi. Moġa ilailanaġi Tarimarima Natuna maki beġe vaġa-midigu midiguani.”

¹³ Mai guruġa ġerina Iesu ġena mero ġeribato, ġia na tu Ioane Babatiso ekiraġi-kara-viniato.

*Iesu na iauka rakavana na eboroġiato merona evaġa-namoato
Mareko 9:14-29; Luka 9:37-42*

¹⁴ Ġia ma ġeġenoġoito tarimarima ġutuma ġeri ai nai, tarima ta Iesu ġenai eiaġomato, ġoiranaġi ema vetui-tarito,

¹⁵ ekirato, “Vereġauka, au natugu merona novetuġaia! Ġia tu ġue na evaġiani, ema tauġanina evaġa-ġoġo-ġogo rakavaiani. Nega ġutuma karavai eburi-raġeni e nanu ai eburi-reini.

¹⁶ Ġemu mero ġeri ai aġabi-iaġoato, senaġina vaġa-namona ġia tu asi ilaila.”

¹⁷ Iesu evaġa-veseto, ekirato, “Asi veġabidadamami e kira-sirivaġi ġuruna! Ġaro vira au tu sevimi ai bana tanu? Ġaro vira bana vevaġa-gwaġiġi vinimi? Mero ġegu ai ġoġori-iaġomaia!”

¹⁸ Iesu na mero tauġanina ġenai etanuto iauka rakavana ekira-ġoiato, benamo iauka rakavana eraka-vaġito, ma asikauna mero enamoto.

¹⁹ Gabivau Iesu ġena mero ġenai ġeiaġoto, vekuretoġai ġedanaġiato, ġekirato, “Karase nai ġai na iauka rakavana asi ilaila baġa lai-vaġia?”

²⁰ Iesu na evaġa-veserito, ekirato, “Korana ġemi veġabidadama asi ilaila naima. Akira-korikorimini, bema ġemi veġabidadama mastadi ġutuna misina korokorona kavana nai, mai ġoro boġo kiraiani, boġo kirani, ‘Mainana noveġabi-vaisi, ma iomonai noa vetore!’, benamo beveġabi-vaisini ma beiaġoni. Veġa mabarari maki boġo veirini riba. [²¹ Iauka rakavari maġesina lailairi tu dabara irauna tai asiġina, senaġina ġauġau e ġaniveaġai ġereġana moġo.]”

*Iesu ġena mase ma ekiraġi-ġenoġoiato
Mareko 9:30-32; Luka 9:43-45*

²² Ġaro ta, Iesu ma ġena mero ġesi Galileai ġetanuto-ġoi nai, Iesu na ekirarito, ekirato, “Tarimarima Natuna tu beġe revaiani vau tarimarima ġimari ai beġe toreani.

²³ Benamo beġe vaġi-maseani, senaġi ġaro vaġa-toitoinai ma bevaisiraġe-ġenoġoini.” Ġena mero ġeseġaġiato nai, nuġari ġemeto-rakavato.

Rubu Veaġa takesi moniri vinina

²⁴ Iesu ma ġena mero ġesi Kaperanauma vanuġanai ġeraġasito, benamo Rubu Veaġa monina ġegogoato-ġoi tarimari ġeiaġomato, Petero ġedanaġiato, ġekirato, “Ġomi ġemi vevaġa-riba tauna Rubu Veaġa ġena takesi moniri tu evinini ba asiġina?”

²⁵ Petero na evaġa-veseato, ekirato, “Oi, evinini.” Petero numa ġana eġenoġoito nai, Iesu na edanaġiato, ekirato, “Simona, ġoi ġemu tuġamaġi tu kamasi? Tanobara vereri o kini ġeri takesi moniri tu deikara na beġene viniri? Ġia naturi na ba tarima boruri na beġene viniri?”

²⁶ Petero evaġa-veseto, ekirato, “Tarima boruri na.” Iesu na ekiraiato, ekirato, “Moġa anina, ġia naturi tu asi beġe vinini.

²⁷ Senaġina asi bitana vaġa-baruri ġana, naima noiaġo kou ġana. Kimai bono fiu-riġoa, maġani-kone giniguinena boinu-raġeani nai, bokana bono keo-baġakaia, silva monina ta bodoġariani nuġanai. Bono ġabia, benamo bono viniri ġita taura ruarua ġera Rubu Veaġa takesi monina.”

18

Deikara tu barego vedaurea Guba Basileia nuḡanai?

¹ Mo negai Iesu ḡena mero ḡenai ḡeiaḡoto, ḡekirato, “Deikara tu barego vedaurea Guba Basileia nuḡanai?”

² A Iesu na mero misina ta ekea-iaḡomaiato, benamo vekaravari ai evaḡa-ruḡa-tariato,

³ ekirato, “Moḡoni veḡata, akiramini, ḡomi asi boḡo vetuḡamaḡi-kureni e mai mero misina kavana asi boḡo iaḡoni nai, ḡomi tu Guba Basileia nuḡanai asi boḡo raka-toḡani.

⁴ Tarima ta tauḡena evevaḡa-manauni mai mero misina kavana, ḡia tu barego lelevaḡi Guba Basileia nuḡanai.

⁵ Ema deikara mero misina maiḡesina kavana au aragu ai beḡabi-raḡeani tarimana na au maki eḡabi-raḡeguni.”

Tarima ta na mero misina ḡena veḡabidadama asi bene vaḡa-rakavaia Mareko 9:42-48; Luka 17:1-2

⁶ Senaḡina bema tarima ta na au eḡabidadama-viniguni mero misina ta ḡena veḡabidadama evaḡa-rakavaiani, ḡia tu bere namo fore barana ḡaiḡonai ḡere baru-kaua, ma davara dodokunai bere vebora-mase.

⁷ Tanobara vetuḡana kekei, korana veribaḡani ḡenana tarima ḡeri veḡabidadama evaḡa-rakavaiani. Dagara moḡesina vanaḡivanaḡi beḡe ḡorani veḡata, senaḡina veribaḡani evaḡa-ḡoraiani tarimana neḡi, vetuḡana kekei.

⁸ Bema ḡoi ḡimamu o kwakumu na rakavai etoremuni nai, bono basiḡutua, bena bono fitoḡaia! ḡimamu sebonai o kwakumu sebonai maḡuri vanaḡivanaḡi bono doḡaria tu namo, a asi namo ḡimamu ruarua ma kwakumu ruarua karava eḡara-vanaḡi vanaḡini gabunai beḡe fiu-kaumuni.

⁹ Bema ḡoi matamu na rakavai etoremuni nai, bono ḡibo-vaḡia, bena bono fitoḡa-kwareḡaia. Matamu sebonai maḡuri vanaḡivanaḡi bono doḡaria tu namo, a asi namo matamu ruarua karava eḡara-vanaḡi vanaḡini gabunai beḡe fiu-kaumuni.”

Barabore - Rekwerekwa mamoea Luka 15:3-7

¹⁰ “Lorimi boḡono vetore, mai mero misiri ta boḡo ruḡaiani ḡesi. Korana akiramini: Ḗia aneruri na au Tamagu gubai etanuni ḡoirana nega vanaḡivanaḡi ḡeḡitaiani. [¹¹ Tarimarima Natuna tu rekwerekwa tarimari vaḡa-maḡuriri ḡana eiḡomato.]

¹² Kamasi ḡotuḡamaḡiani? Bema tarima ta ma ḡena mamoe sinau ta (100), senaḡina sebona berekwa-rekwani nai, ḡia kara beveini? Ḗia na tu 99 ḡoro gabakanai beraga-kwane-rini, benamo beiaḡoni, rekwa-rekwa mamoea bea vetauani.

¹³ Bedoḡariani nai, moḡoni akiramini, beiaḡu-rakavani moḡo. A ḡena mamoe 99, asi ḡedobito dagarari, maki bevanaḡirini.

¹⁴ Moḡa ilailanai Tamami gubai etanuni asi ḡena ura, mai mero misiri ta bene rekwerekwa.”

Tarikakamu ta na bevei-rakava vinimuni

¹⁵ “Bema ḡoi tarikakamu ta na bevei-rakava vinimuni nai, bono iaḡo, ḡena veḡa rakavana bono vaḡa-fofori vinia. Senaḡina, vekuretoḡai mai veḡa bono veia, ḡia ma ḡoi ḡesi moḡo. Bema ḡia na ḡoi beseḡaḡimuni ema beḡabi-raḡemuni nai, tarikakamu ḡoi ḡemu ai beḡenoḡoi.

¹⁶ Senaġina bema asi beġabi-raġemuni nai, tarima sebona o ruarua bono ġabiri, ġoi ġesi boġono iaġo ġenai, benamo 'guruġa mabarari beġene vaġa-moġoniri, seġaġiseġaġi tarimari ruarua o toitoi ġerina,' Buka Veaġa ekirani kavana.

¹⁷ Bema ġia asi beseġaġirini nai, beġe ġora dagarari mabarari tu rubu o ekalesia vegogona bono kira-varaia. Bema ekalesia vegogona garona asi beseġaġiani, ġoi na ġia tu Barau asi ribana tarimanai ema takesi gogo o vei-rakava tarimanai bono vaġa-iaġoa.

¹⁸ Moġoni akiramini: Tanobarai boġo barurini dagarari mabarari gubai maki Barau na bebarurini; e tanobarai boġo ruġarini dagarari mabarari gubai maki Barau na beruġarini.

¹⁹ Au na akira-ġenoġoimini: Tano-barai ġomi tarima ruarua dagara tai nuġami boġo tore-sebonaiani ema boġo ġauġau-iaġiani tu, Tamagu gubai etanuni na bevinimini.

²⁰ Korana au aragu ai tarima ruarua o toitoi beġe tanu-vegogoni gaburi ai, au maki ġia ġesi monai."

Barabore - Rakava asi etuġamaġi-fitoġaiani tarimana

²¹ Benamo Petero tu Iesu ġenai eiaġoto, ekirato, "Vereġauka, au tari-kakagu bevaġa-rakava iaġoguni nai, ġena rakava tu nega vira kavana bana tuġamaġi-fitoġaia? Imaima ruarua (7) ba?"

²² Iesu evaġa-veseto, ekirato, "Asiġina, dia 7 moġo, senaġina 70 ma vaġa-baregona 7, o 70 taims 7, (moġa anina tu vanaġivanaġi).

²³ Ġoseġaġi, Guba Basileia tu vere ta kavana, ġia eurato, ġena vetuġu-naġi tarimari ġeri ġabitore bene vetauri ema bene vaġa-maorori.

²⁴ Ġia na ġabitore dori evetaurito-ġoi nuġanai, vetuġunaġi tarimana ta ġema-ġabi-toġaiato, ġia ġena ġabitore ġenai vira milion kina, moni barego vedaurea, eveiato.

²⁵ Mai vetuġunaġi tauna ġena moni asi ilaila ġena ġabitore voina vinivin-ina ġenai. Moġesina naima vere na ġena vetuġu-naġi merori ekirarito, mai tarima beġene voivoi-iaġia, vere ta ġena vetuġunaġi meronai bene iaġo, ma ġaraġona e ma natuna ema ġena farefare mabarari ġesi maki, mo ġena ġabitore bene davaia ġana.

²⁶ Vetuġu-naġi tauna vere kwakuna koranai evetui-tarito, enoġiato, eki-rato, 'Au ġegu ai bono vevaġa-gwaġiġi. A au na ġemu dagara mabarari voiri bavanimuni.'

²⁷ Vere na evetuġaiato nai, vetuġunaġi tauna ġena ġabitore etuġamaġi-fitoġaiato, benamo etuġu-rakaiato.

²⁸ Mai vetuġunaġi tauna eraka-rosito, ġia ġatana vetuġunaġi tarimana ta edoġariato. Mai ġatana moni kotuna eġabi-toreato ġia ġenai. Eġabi-tariato, ma ġaiġona egigiatto, ekirato, 'Au ġegu ai oġabi-toreato monina voina novinigu!'

²⁹ Ġatana vetuġunaġi tarimana ġia kwakuna koranai evetui-tarito, enoġiato, ekirato, 'Nega kota novinigu roġo, be voina mabarana bana vinimu!'

³⁰ Senaġina ġia asi eurato, benamo dibura numai edori-toġaiato. Monai bene tanu, bene iaġo mo, ġena ġabitore voina bene dava-iaġia etato.

³¹ Benamo ġia ġesi vetuġunaġi ġeiaġo-vini vegogoato-ġoi tarimari na mo veġa ġeġitaiato nai, ġia nuġari ġemetoto, benamo ġeiaġoto vere ġenai, mo kara ġeġorato dagarari mabarari ġevaġa-ribaiato.

³² Moġesi nai ġia na vetuġunaġi tauna numai ekea-toġaiato, ekiraiato, ekirato, 'Ġoi vetuġunaġi tauna rakavana! Au na ġoi moni vira milion au

ġegu ai oġabi-toreato dagarari mabarari atuġamaġi-fitoġarito, voina asi oviniguto, korana onoġiguto nai.

³³ Ilailana ġoi na maki karomu vetuġunaġi tauna boro vetuġa-ġwaia, au na ġoi avetuġa-ġwamuto kavana.'

³⁴ Mai vere ebaru-rakavato, benamo vetuġunaġi tauna dibura numai etoreato, monai metona bene ġwaia mo, ġena ġabitore voina mabarana ma bene vini-ġenoġoia.

³⁵ Iesu ġena guruġa magona rekenai maiġesina ekirato: Tamagu gubai etanuni na ġomi mabarami mai veġa sebonai moġo bevei-vinimini, bema ġoi tarikakamu ġena rakava nuġamu mabarana ġesi asi botuġamaġi-fitoġaiani nai."

19

Veġaraġo ruġaruġana

¹ Iesu na maiġeri dagara mabarari eguruġa-iaġi ġosirito murinai, Galilea eiaġuiato, Iudea tanona ġana eiaġoto, Ioridana ġarukana reke ta kefonai.

² Tarimarima ġutuma-bara ġia murinai ġeiaġomato, e monai ġeri keve evaġa-namorito.

³ Farisea tarimari kotari ġia ġenai ġeiaġoto, ġevedanaġi-veribaġaniato, ġekirato, "Tau ta ġena ura ġaraġona bene fitoġaia etoni nai, taravatu na beġabiani?"

⁴ Iesu na evaġa-veserito, ekirato, "Ġomi na Buka Veaġa asi ġoiaviani? Maiġesi ekirani, 'Tovotovona na veġata, Barau na dagara mabarari eveirito nai, ġia na tarimarima maki eveirito tau e vavine.'

⁵ Benamo Barau ekirato, 'Moġesina nai tau ta na tamana e sinana beraga-kwanerini, ġaraġona ġesi beġe tanuni, benamo ġia tauri ruarua beġe sebonani.'

⁶ Moġa lorinai ġia tu dia ruarua, senaġi sebona moġo. Moġesi nai Barau na etore-sebonarito tarimari tu, tarima ta na asi ma bene tore-kirari."

⁷ Farisea tarimari na ġekiraiato, ġekirato, "Karase nai Mose na taravatu eveiato nai, ekirani, tau na veġaraġo ruġaruġana fefana betoreani vau, ġaraġona betuġu-rakaiani?"

⁸ Iesu evaġa-veseto, ekirato, "Mose na maoro evinimito, ġaraġomi boġono tuġu-rakari ġana, korana ġomi vaġa-ribami tu gwaġiġi rakava nai. Senaġina Barau na dagara mabarari eveirito nai, maiġesina tu asiġina.

⁹ Akiramini: Deikara na ġaraġona, enabe asi eveġura-vanaġini, senaġi efitoġaiani moġo, vavine ta ma beġaraġoani, ġia tu beveġura-vanaġini."

¹⁰ Iesu ġena mero na ġekiraiato, ġekirato, "Veġaraġo dabarana mo-ġesina nai, tarimarima asi beġene veġaraġo tu namo banaġu."

¹¹ Iesu evaġa-veseto, ekirato, "Mai vevaġa-riba maiġa tarimarima mabarari na asi beġe tuġamaġi-fakaiani, senaġi Barau na deikara tuġamaġi-faka evinirito tarimari moġo.

¹² Tarimarima kotari asi ġeveġaraġoni, korana moġesi veġatana ġemaġurito sinari ġerina, be asi ilaila beġe veġaraġoni; ma kotari tu eunuko tauri kavari, (tarimarima na seuri ġefararini); ema kotari tu Guba Basileia o Barau vetuġunaġina beġene iaġo-vinia uranai asi ġeveġaraġoni."

Iesu na mero misiri evaġa-namorito

Mareko 10:13-16; Luka 18:15-17

¹³ Tarima kotari na naturi Iesu ġenai ġeġwa-iaġorito, ġimana ġia iatari ai bene tore-kauri, ema bene ġauġau ġana. Senaġina ġena mero na ġekira-ġoirito.

¹⁴ Iesu na ekirarito, ekirato, “Mani mero misiri ġeiaġoma au ġegu ai, asi ġokira-ġoiri, korana Guba Basileia tu maniġesina kavana tarimari ġeri.”

¹⁵ Benamo Iesu ġimana iatari ai etore-kaurito, evaġa-namorito vau eiaġuirito.

*Tarima variġuna ma ġena farefare vovoka
Mareko 10:17-31; Luka 18:18-30*

¹⁶ Ġaro tai tau ta Iesu ġenai eiaġoto, ekirato, “Vevaġa-riba tauna, kara dagara namona haveiani vau, maġuri vanaġivanaġi baġabiani?”

¹⁷ Iesu na evaġa-veaseato, ekirato, “Karase nai au odanaġiguni, aiġa tu dagara namona? Sebona moġo namo, Barau. Bema ourani maġuri vanaġivanaġi bono ġabia nai, Barau ġena taravatu bono korana-iaġiri.”

¹⁸ Ġia na Iesu edanaġiato, ekirato, “Kamara taravatu okiraġirini?” Iesu ekirato, “Asi bono vaġivaġi, asi bono veġura-vanaġi, asi bono lema, asi bono vevaġa-bade ġofaġofa,

¹⁹ tamamu e sinamu bono gubakauri, e sevimu tarimana maki bono uravinia, ġoi tauġemu oveura-vinini kavana.”

²⁰ Mai maraġa variġuna ekirato, “Au na mani taravatu mabarari akorana-iaġirini. Kamara dagara tu au na ma bana veia?”

²¹ Iesu na ġia evaġa-veaseato, ekirato, “Bema ġoi ourani bono iobukaiobuka nai, ġiniguine tu noiaġo, ġemu farefare mabarari bono voivoi-iaġiri, be moniri tu asi ġeri-ġari tarimari bono viniri, benamo gubai tu ma ġemu farefare. Gabivau murigu ai bonoma raka.”

²² Maraġa variġuna na maiġa eseġaġiato nai, nuġana ma metona ġesi eiaġuiato, korana ġia tu ma ġena farefare ġutuma tarimana.

²³ Iesu na ġena mero ekirarito, ekirato, “Au na akira-korikorimini: Farefare vovoka tarimari ġeri rakatoġa Guba Basileia nuġanai tu gwaġiġi rakava.

²⁴ Ma akiramini: Kamela tu nila kadarena na bevanaġini kotuna gwaġiġi, senaġi ġena farefare vovoka tarimana Barau ġena Basileiai ġena rakatoġa tu gwaġiġi rakava.”

²⁵ Ġena mero mai guruġa ġeseġaġiato nai, ġeġaba-rakavato moġo. Benamo ġevedanaġito, ġekirato, “Be deikara na maġuri vanaġivanaġi bedoġariani?”

²⁶ A Iesu na eġita-karakararito, benamo evaġa-veserito, ekirato, “Tari-marima ġeri ai tu asi ilaila, senaġi Barau ġenai dagara mabarari tu ilaila.”

²⁷ Benamo Petero eguruġa-fouto, ekirato, “Ġoi ribamu, ġai ġema dagara mabarari tu ġaraga-kwanerito, benamo ġoi murimu ai ġarakani! Be ġai kara baġa ġabini?”

²⁸ Iesu na ekirarito, ekirato, “Moġoni akiramini, tanobara variġuna befoforini nai, Tarimarima Natuna ġena terona o vere seana kimorekimorenai betanu-kauni, ma ġomi gabanana ruarua (12) au murigu ai ġorakani tarimami maki vere seari gabanana ruarua (12) ai boġo tanukauni, Isaraela ġena doġoro gabanana ruarua (12) boġo ġita-ġaurini, ema boġo ġori-kaurini.

²⁹ Tarima ta na ġena numa, kakana, tarina, tobana, tamana ma sinana e natuna, ema ġena tano, au uragu ai beiaġuirini nai, ġia tu sinau-sinau ai dagara bedoġarini, ema maġuri vanaġivanaġi maki beġabiani.

³⁰ Senaġina tarimarima ġutuma toma ġequineni tu beġe gabini, ema ġutuma maki initoma ġegabini tu beġe guineni.”

20

Barabore - Ġauvei tarimari vine tavoġana

¹ “Guba Basileia tu maiġesi kavana: Vine tavoġana tarimana ta boġiboġi iamoiamo ai numa na eraka-rosito, ġena vine tavoġana beġene ġauvei tarimari evetaurito.

² Benamo ġauvei tarimari ġesi ġeguruġa-vegogoto ma ġevaġa-moġoniato, mo ġauvei tarimari ġaro sebna ta beġe ġauveini voiri silva monina sebna bevinirini ġetato. Benamo ġena vine tavoġana nuġana etuġu-iaġorito.

³ Boġiboġi 9 koloko kavana ġia ma eraka-rosito, maketi gabuna ġana eiaġoto, monai tarima kotari ġeruġa-reko rekoto-ġoi eġita-rito.

⁴ Benamo ekirarito, ekirato, ‘Ġomi maki ġegu vine tavoġana ġana ġoiaġo, ġoa ġauvei, be voimi maorona bana vinimi.’

⁵ Ġia maki ġeiaġoto. Ġaroġota 12 koloko ma 3 koloko kavana ġia numa na ma eraka-rosito, kotari ma edoġaririto, etuġurito.

⁶ Lavilavi rekenai 5 koloko kavana ma erakarosi-ġenoġoito, kotari roġo mo ġeruġa-taġoto-ġoi nai edoġaririto. Benamo edanaġirito, ekirato, ‘Karase nai mainai ġoruġa-kava ruġa-kavani mo, ġaro mo evariġoni?’

⁷ Ġia na ġevaġa-veŋeato, ġekirato, ‘Korana tarima ta na ġauvei asi evinimani nai.’ Benamo ekirarito, ‘Ġomi maki ġegu vine tavoġana ġana ġoiaġo, ġoa ġauvei.’

⁸ Ġaro eboraiato-ġoi nai, tavoġa biaguna na ġauvei tarimari eġita-ġaurito-ġoi tauna ekiraiato, ekirato, ‘Ġauvei tarimari nokeari, be voiri noviniri, vau beġe ġauvei tarimari bono vini-guine, bene iaġo mo, bakea-guineri tarimari bono vini-raġasi.

⁹ Benamo mo lavilavi 5 koloko etuġurito tarimari ġeiaġoma-guineto, benamo silva moniri sebori-sebori ġeġabito.

¹⁰ Ġeiaġo-guineto tarimari ġeiaġomato nai, ġia matoru ġekirato tu, voiri kotari ma betore-kaurini, senaġi ġia maki silva moniri sebori-sebori moġo ġeġabito.

¹¹ Ġeri moni ġeġabito nai, ġemuġu-muġuto tavoġa biaguna ġenai,

¹² ġekirato, ‘Mai tarimarima gabivau ġeiaġomato maiġeri tu, hora sebna moġo beġe ġauvei ma voiri, a ġai tu ġaro vinubana ġavekwarāġini, ma ġaro ġena seġuka na etunu-rakavamani, nuġana voima ġia ġeri ġesi bovini-sebonama.’

¹³ Tavoġa biaguna na ġia ta ekiraiato, ekirato, ‘Ġatagu, noseġaġi, au na ġoi asi baġofamu. Taguruġa-vegogoto nai, ġaro sebna voina tu silva monina sebna tatato, nene?’

¹⁴ Mai moġo voimu noġabia, be noraka! Au aurani mai gabi tarimana bana vinia, ġoi baviniu ilailanai.

¹⁵ Be, au ma ġegu maoro, mai ġegu moni tu ġegu ura ilailani bana vini. Ba ġoi obaruni, korana au tu nuġagu ma iakuna ġesi avinini nai?’

¹⁶ Iesu ġena guruġa evaġa-magoato nai ekirato, “Guine tarimari tu beġe gabini, ma gabi tarimari tu beġe guineni.”

Iesu ġena mase ma ekiraġi-foforiato

Mareko 10:32-34; Luka 18:31-33

¹⁷ Iesu Ierusema dabarana na evaraġeto-ġoi nai, ġia na ġena mero gabana ruarua (12) eġabi-ġere-vaġirito, veġuni ai evaġa-guruġarito, ekirato,

¹⁸ “Ġoseġaġi, ġita tu Ierusema ġana tavarāġeni. Monai Tarimarima Natuna tu Rubu Veāġa vereri baregori ema taravatu vaġa-riba-iaġina

tarimari ġimari ai beġe toreani. Ġia na ġena mase guruġana beġe vaġa-moġoniani,

¹⁹ benamo irau bese (o Roma) tarimari beġe vinirini, ġia na beġe vaseva-vaseva iaġiani, beġe kwariani e beġe vaġa-satauroani; senaġi ġaro vaġa-toitoinai vau ma bevaisiraġe-ġenoġoini.”

Sina ta ġena noġinoġi
Mareko 10:35-45

²⁰ Benamo Sebedaio ġaraġona ma natuna ruarua Iakobo (o Iames) ema Ioane ġesi Iesu ġenai ġeiaġoto, ġoiranai ea vetui-tarito, dagara ta nenoġia ġana.

²¹ Benamo Iesu na vavine edanaġiato, ekirato, “Ġoi kara ourani?” Ġia evaġa-veseto, ekirato, “Nokira-varagu, au natugu tauri ruarua iniġeri, ġoi ġesi beġeneasi tanu, ta aroribamu ai, ma ta kaurimu ai ġemu Basilea nuġanai.”

²² A Iesu na evaġa-veserito, ekirato, “Ġomi tu asi ribami kara ġonoġiani. Au na midigu bedina banuani ġomi maki boġo niuni riba?” Ġia ġevaġa-veseto, ġekirato, “Oi, baġa niuani.”

²³ Iesu na ma ekirarito, ekirato, “Moġoni, au ġegu bedi na ġomi maki boġo niuni, senaġi au aroribagu rekenai o kaurigu ai boġono tanu ġotoni tu, dia au na bavaġa-moġoniani; a mai tu au Tamagu na eġabi-torerito tarimari ġeri.”

²⁴ Mero gabanana (10) na maiġa ġeseġaġiato nai, tarikaka ruarua Iakobo (o Iames) ema Ioane ġebaru-vinirito.

²⁵ Benamo Iesu na mabarari ekea-vegogorito, benamo evaġa-guruġarito, ekirato, “Ġomi ribami, irau bese tarimari ġeri vere na tarimarima ġedori-naġinaġirini, ema ġeri veguine-iaġi tarimari baregori na tu ġeri maoro seġukari na ġelaunaġi-naġirini.

²⁶ Senaġi ġomi fakami ai moġesina tu asi boġono vei. Bema ta ġomi fakami ai bene barego etoni nai, ġia tu ġomi mabarami vetuġunaġimi bene iaġovini,

²⁷ ema dei bene guine etoni tarimana, ġia tu ġemi vetuġunaġi tarimanai bene iaġo.

²⁸ Tarimarima Natuna kavana, ġia eiaġomato tu, dia tarimarima na ġia vetuġunaġina beġene iaġovini ġana, senaġina ġia eiaġomato tu, tarimarima vetuġunaġiri bene iaġovini, ema ġena maġuri bene tore-taria, tarimarima ġutuma bene voi-ġenoġoiri e bene vaġa-maġuriri ġana.”

Iesu na mata-bubu tarimari ruarua evaġa-namorito
Mareko 10:46-52; Luka 18:35-43

²⁹ Iesu ma ġena mero ġesi Ieriko ġeraga-kwaneato, tarimarima ġutuma-bara ġia murina na ġeiaġoto.

³⁰ Mata-bubu tarimari ruarua dabara rikinai ġetanu-taġoto-ġoi, ġeseġaġito Iesu eraka-vanaġito, benamo ġekea-fouto, ġekirato, “Vereġauka o, Davida natuna, ġai novetuġama!”

³¹ Tarimarima na ġekira-ġoirito, asi beġene guruġa ġetato, senaġi ġia ġekea-ġiġiraġe ġiġiraġeto-ġoi, “Vereġauka, Davida Natuna o, ġai nove-tuġama!”

³² Iesu eruġa-tarito, benamo ekea-iaġomarito, ekirato, “Kara ġemi naveia ġotoni?”

³³ Ġia na ġekiraiato, ġekirato, “Vereġauka, ġai ġaurani tu, matama noma keo-fakari!”

³⁴ Benamo Iesu na evetuġa-ġwarito, matari eġabi-kararito, ma asikauna matari ġenamoto e ġeboġeboġe-ġinikauto, benamo Iesu murina na ġeiaġoto.

21

Iesu ġena rakatoġa Ierusalemaj ġevonevone-raġe viniato Ioane 12:12-19

¹ Iesu ma ġena mero ġesi ġeraka-iaġoto-ġoi, Ieruselema ġekavinaġiato-ġoi, ma Betefage ai ġeraġasito Olive Ġorona rekenai, benamo Iesu na ġena mero ruarua etuġu-guinerito,

² ekirarito, ekirato, “Ġoiāġo, ġoira vanuġana ġana. Monai doniki ta barutari ma natuna ġesi boġo doġaririni, boġono ruġari, benamo au ġegu ai boġono ġori-iaġomari.

³ Bema tarima ta na bedanaġimini nai, boġono kiraia, ‘Vereġauka na eura-vinirini, vau ma betuġu-iaġomarini, asi bekwaiboni.’ ”

⁴ Maiġa eġorato ġenana, peroveta tauna ġena guruġatore guruġana evaġa-moġoniani, ekirani,

⁵ “Siona natuna, (Ieruselema tarimari), nokirari, ‘Nogitaia, ġemu Vere mani eiaġomani, manau tarimana, doniki tuġunai eraġeni, mai tu doniki natuna doġenai betanukau.’ ”

⁶ Mai mero ruarua ġeiaġoto, Iesu na ekirarito veiġana ilailanai ġeveiato.

⁷ Ġia na doniki ma natuna ġesi Iesu ġenai ġeġori-iaġorito, ġeri dabuġa barari doniki doġeri ai ġeiaiva-kaurito, benamo Iesu etanu-kauto.

⁸ Tarimarima ġutuma-bara ġeri dabuġa barari dabarai ġeiavarito, kotari tu ġau legari ma lauri ġesi ġebasito, benamo dabarai ġeiaivato.

⁹ Tarimarima ġutuma-bara ġia ġoiranai ġerakato e murinai ġerakato, maiġesina ġevone-raġeto-ġoi, ġekirato, “Hosana, Davida natuna ġena!

Vereġauka aranai eiaġomani tarimana sivaġa-namoa!
Hosana guba tuġuna vanigerenai!”

¹⁰ Iesu Ierusalemaj eraka-toġato nai, vanuġa tarimarimari mabarari ġeveraga veragato-ġoi ema ġevedanaġi-vedanaġito-ġoi, ġekirato, “Mai tu deikara?”

¹¹ Iesu ġesi ġeraka-sebonato tarimari ġevaġa-veseto, ġekirato, “Mai tu Iesu, peroveta tauna, Galilea vanuġana Nasareta na eiaġomani.”

Iesu na Rubu Veaġa eiarevaiato

Mareko 11:15-19; Luka 19:45-48; Ioane 2:13-22

¹² Iesu Rubu Veaġa nuġanai eraka-toġato, benamo voivoi tarimari mabarari elai-rosirito. Moni ġesenisito-ġoi tarimari ġeri fata e pune ġeivoivoi iaġirito-ġoi tarimari ġeri diġoka eġuke-vebuburito,

¹³ ema ekirarito, ekirato, “Buka Veaġa nuġanai tu maiġesi etoreato, Barau ekirato, ‘Au ġegu numa tu bese iraurau ġeri ġurigiuri numanai beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

¹⁴ Mata-bubu e kwaku rakava tarimari Iesu ġenai ġeiaġomato Rubu Veaġa nuġanai, benamo ġia na evaġa-namorito.

¹⁵ Rubu Veaġa vereri baregori e taravatu ġevevaġa-riba iaġiato-ġoi tarimari na ġena nuġa-farevaġi veiġari ġeġitarito, ema mero misiri garori ġeseġaġirito, Rubu Veaġa nuġanai ġevone-raġeto-ġoi, ġekirato, “Hosana, Davida natuna ġena,” benamo ġia tu ġebaru-rakavato,

¹⁶ benamo Iesu ġedanaġiato, ġekirato, “Ġia na ini kara ġekiraġirini ne oseġaġirini ba?” Iesu na evaġa-veserito, ekirato, “Oi aseġaġini, senaġi ġomi

na Buka Veāga nuḡanai asi ḡoiaviani, ‘Mero misiri ema sinari ratari roḡo ḡeniurini merori na maki ḡoi ḡevaḡa-raḡemuni!’?”

¹⁷ Benamo Iesu na eraga-kwanerito, vanuḡa barana na eraka-rosito, Betania ḡana eiaḡoto, monai ea genato.

Iesu na figi ḡauna etovoḡaiato

Mareko 11:12-14; 11:20-24

¹⁸ Boḡiboḡi, Iesu vanuḡa barana ḡana ma eḡenoḡoito, eraka-iaḡoto-ḡoi nuḡanai, ḡia evitoato.

¹⁹ Ḗia na figi ḡauna ta dabara rikinai eḡitaiato, benamo eiaḡo-viniato, senaḡi asi ḡwaḡwana, a launa korina moḡo. Benamo Iesu na figi ḡauna ekiraiato, ekirato, “Ḗoi ḡemuna ḡwaḡwamu asi ma befofori-ḡenoḡoini!” Asikauna moḡo figi ḡauna emarai-ḡosito.

²⁰ Ḗena mero na figi ḡauna emarai-ḡosito ḡeḡitaiato nai, ḡeḡaba-rakavato, ḡekirato, “Figi ḡauna tu kamasi se beraga-mase moḡo?”

²¹ Iesu evaḡa-veseto, ekirato, “Moḡoni akiramini, bema ḡomi boḡo veḡabidadamani, ma asi boḡo daradarani nai, ḡomi na maki mai figi ḡauna ḡenai baveia kavana boḡo veiani riba; a dia moḡa moḡo, senaḡi mai ḡoro boḡo kiraiani, ‘Noveḡabivaisi, be davarai noa vefiu-rei,’ benamo mo veḡa tu beḡorani.

²² Dagara mabarari ḡauḡau ai boḡo kiraḡirini ma veḡabidadamami ḡesi nai tu, boḡo doḡaririni.”

Iesu ḡena seḡuka korana ḡevedanaḡi-iaḡiato

Mareko 11:27-33; Luka 20:1-8

²³ Iesu Rubu Veāga nuḡanai eraka-toḡato, evevaḡa-ribato-ḡoi nai, Rubu Veāga vereri baregori ema Iuda vereri ḡia ḡenai ḡeiaḡomato, benamo ḡedanaḡiato, ḡekirato, “Kamara seḡukai ḡoi na mai veḡa oveirini? Dei na maoro evinimuto?”

²⁴ Iesu na evaḡa-veserito, ekirato, “Au na maki vedanaḡi sebona avinimini; bema boḡo vaḡa-veseani nai, au na kamara maoro ai mai veḡa aveirini bakira-varamini.

²⁵ Ioane ḡena babatiso veḡana tu ainana eiaḡomato? Guba na eiaḡomato, ba tarimarima ḡerina?” Ḗia fakari ai ḡeverorito, ḡekirato, “Bema ḡita bita kirani, ‘Barau ḡenana’ bita toni nai, ḡia bekirani ‘Karase nai Ioane asi ḡovaḡa-moḡoniato?’ betoni.

²⁶ Senaḡi bema ḡita bita kirani, ‘Tarimarima ḡerina’ bita toni nai, tarimarima gariri bitana vei, korana ḡia ribari, Ioane tu peroveta tarimana korikori.”

²⁷ Moḡa lorinai ḡia na Iesu ḡevaḡa-veseato, ḡekirato, “Ḗai asi ribama.” Benamo Iesu na ḡia ekirarito, “Au na maki kamara maoro ai mai veḡa aveirini tu, asi bakira-varamini.”

Barabore - Mero ruarua

²⁸ “Mai barabore tu kamasi ḡotuḡa-maḡiani? Tarima ta ma natuna ruarua. Tau-guinena ḡenai eiaḡoto, ekiraiato, ekirato, ‘Natugu, toma noiaḡo, vine tavoḡanai noa ḡauvei!’

²⁹ Natuna na evaḡa-veseato, ekirato, ‘Asi aurani,’ senaḡina gabivau evetuḡa-maḡi-kureto, benamo eiaḡoto.

³⁰ Ḗia ma eiaḡoto natuna vaḡa-ruaruana ḡenai, tau-guinena evaḡa-guruḡaiato ilailanai ekiraiato. Mero evaḡa-veseto, ekirato, ‘Aiaḡoni,’ senaḡi asi eiaḡoto.

31 Ĝia tauri ruarua vekaravari ai dei na tu tamari ĝena ura eveiato?” Ĝia ĝevaĝa-veseto, ĝekirato, “Tau-guinena.” Iesu na ekirarito, “Moĝoni veĝata akiramini, takesi gogo tarimari e mata-boraĝa vavineri na ĝeguine-iaĝimini Barau ĝena Basileia rakatoĝanai.

32 Ioane Babatiso ĝomi ĝemi ai eiaĝomato tu, vei-iobukaiobuka dabarana ĝemi ai evaĝa-foforiato, senaĝi asi ĝoseĝaĝi-viniato. A takesi gogo tarimari e mata-boraĝa vavineri na ĝevaĝa-moĝoniato. Ĝomi na maki ĝoĝitarito, senaĝi asi ĝovetuĝamaĝi-kureto, asi ĝovaĝa-moĝoniato.”

*Barabore - Tavoĝa narinarina tarimari rakavari
Mareko 12:1-12; Luka 20:9-19*

33 Iesu ekirato, “Barabore ta ma ĝoseĝaĝia: Tano biaguna ta na vine tavoĝana evaroato, maĝuna eĝabiato, tano ai vine gigi-gigina gurina ekwaiato, tavoĝa narinarina numana maki evaĝa-ruĝaiato. Moĝa murinai tavoĝa ĝitaĝauna tarimari ĝeri ai ĝena tavoĝa eraga-kwaneato, benamo erakato gabu ta ĝana.

34 Vine ĝwari (o grapes) ĝemaĝeto, benamo ĝia na ĝena vetuĝunaĝi tauri etuĝurito tavoĝa narinarina tarimari ĝeri ai, ĝena vine ĝwaĝwari kota beĝenea ĝabi ĝana.

35 Senaĝi tavoĝa ĝitaĝauna tarimari na vetuĝunaĝi tauri ĝeĝabi-taririto, benamo ta ĝekwariato, ma ta ĝevaĝiato, ema ta fore na ĝetakiato.

36 Tavoĝa biaguna na ĝena vetuĝunaĝi tauri vovoka kotari ma etuĝurito, senaĝi moĝesina ma ĝevei-vinirito.

37 Dokonai ĝia na natuna korikori ĝeri ai etuĝu-iaĝoato, ekirato, ‘Natugu na-tuĝua, ĝia na beĝene gubakaua.’

38 Senaĝi tavoĝa ĝitaĝauna tarimari natuna ĝeĝitaiato nai, tauĝeri ĝeveguruga-vevinito, ĝekirato, ‘Mani tu tavoĝa beĝaunaiani merona, be siĝabia, sivaĝi-masea, be ĝena tavoĝa bitana ĝaunaia!’

39 Benamo ĝeĝabi-tariato, vine tavoĝana murikanai ĝeinu-iaĝoato, ĝevaĝi-maseato.”

40 Iesu evedanaĝito, ekirato, “Tavoĝa biaguna beiaĝomani nai, mo tavoĝa ĝitaĝauna tarimari kamasi beveirini?”

41 Ĝia ĝevaĝa-veseto, ĝekirato, “Mo veiĝa rakava tarimari ĝia na bevaĝirini veĝata, ma vine tavoĝana tu narinarina tarima boruri tari ma bevinirini, benamo ĝeri ĝwaĝwa negari ai, ĝwaĝwari ĝia ĝenai beĝene ĝwa-iaĝori.”

42 Iesu na ma ekirarito, ekirato, “Ĝomi na mai toretore Buka Veaĝai asi ĝoiaviani, iniĝesi ekirani,
‘Fore numari ĝeragarini
tarimari na asi ĝeura-viniato
ma ĝefitoĝaiato forena tu
duĝu forenai eiaĝoto.
Mai veiĝa maiĝa tu
Vereĝauka na eveiato,
matara na taĝitaiani,
ĝitaĝitana irau veĝata.’

43 Moĝesi naima akiramini, Barau ĝena Basileia tu ĝemina beĝabi-vaĝiani, ema ĝwaĝwa evaĝa-ĝorani besena beviniani. [44 Deikara mo fore iatanai beketokauni tarimana tu, beĝwa-kirakiraiiani; ema mai fore tarima ta iatanai beketokauni nai, bevare-fatafataiani.]”

45 Rubu Veaĝa vereri baregori e Farisea tarimari na Iesu ĝena barabore ĝeseĝaĝirito nai, ĝeribato, Iesu na tu ĝia ekiraĝirini,

⁴⁶ naima ġia ġeri ura tu beġene ġabi-taria. Senaġi tarimarima ġutuma ġevegogo taġoto-ġoi gariri ġeveito, korana ġia na ġetuġamaġiato-ġoi, Iesu tu peroveta tauna ta.

22

Barabore - Veġaraġo verekona

¹ Iesu na Iuda vereri ġeri barabore ta ma ekiraġiato:

² “Guba Basileia tu noġa moġo vere ta, natuna ġena veġaraġo verekona evei-toreato kavana.

³ Benamo ġena vetuġunaġi tarimari etuġurito, ekea-kaurito tarimari keakeari, senaġi asi ġeurato nai, asi ġeiaġomato.

⁴ Moġa lorinai ġia na vetuġunaġi tarimari tari ma etuġurito, ekirarito, ‘Akea-kaurito tarimari ġoa kirari, “Au ġegu vereko tu badabara-ġosia, ġegu boromakau tauri ema boromakau naturi mona mase tu bavaġiri, dagara mabarari havei-toreri, be ġoiġoma vereko ġana.” ’

⁵ Senaġi ġia tu ġeġoiġito, ġeri ura ġauveiri moġo ġeveito. Ta vamoka ġana eiaġoto, ma ta tu ġena sitoa ġana eiaġoto.

⁶ O tari tu vetuġunaġi tarimari ġeġabi-taririto, ġekwaririto, ema ġevaġi-maserito.

⁷ Vere tu ebaru-rakavato, ġena vetari doġorori etuġurito, mo vaġivaġi tarimari ġevaġi-maserito, ma ġeri vanuġa barana ġegabu-kauato.

⁸ Benamo ġia na ġena vetuġunaġi tarimari evaġa-guruġarito, ekirato, ‘Au ġegu veġaraġo verekona tu havei-torea, senaġi au na akea-kaurito tarimari tu asi ilaila beġe iaġomani.

⁹ Moġa lorinai mai moġo ġoiġo, ġatama baregori rakaġutu dabarari ai boġo doġaririni tarimari mabarari boġono kirari, beġene iaġoma vereko ġana.’

¹⁰ Benamo vetuġunaġi tarimari ġeiaġoto, ġatamai ema dabarai ġedoġaririto tarimari mabarari, namori, rakavari, ġegogo-iaġorito, veġaraġo numana maki ġevaġa-vonuato.

¹¹ Benamo vere eraka-toġato, ġeiaġomato tarimari ġitaġitari nuġanai, ġia na tarima ta monai eġitaġato, asi ġena veġaraġo dabuġana.

¹² Benamo edanaġiato, ekirato, ‘Ġata, ġoi tu ainana boraka-toġa, asi ġemu veġaraġo dabuġana?’ Senaġi mo tarima asi eguruġato.

¹³ Benamo vere na ġena vetuġunaġi tarimari evaġa-guruġarito, ekirato, ‘Ġimana ema kwakuna ġobarubaruri, benamo ġofiu-rosia murika mukunanai. Monai bene taġi, gadikana maki bene vaġa-ġaratariri.’

¹⁴ Korana tarima ġutuma Barau na ekearito, senaġi viravira moġo eġabitorerito maġuri beġe ġabiani.”

Kaisara, Roma ġeri vere, ġena takesi moniri

Mareko 12:13-17; Luka 20:20-26

¹⁵ Farisea tarimari ġeraka-veġitato, ġeboioġa-vegogoto, Iesu beġene vaġa-vedaġa-raġea vedanaġiri ġea veito.

¹⁶ Benamo ġia na ġeri mero tari ema Heroda murinai ġerakato-ġoi tarimari tari ġetuġu-iaġorito, ġekirato, “Vevaġa-riba tarimamu, ġai ribama ġoi tu moġoni vei-iobukaiobuka tarimamu. Ġoi na moġoni ai Barau ġena dabara ovevaġa-riba iaġi-ġitakauani. Tarimarima gariri asi oveini, tarima ġeri dagi maki asi otuġamaġirini.

¹⁷ Moġa lorinai nokira-varama, kamasi otuġa-maġini: Kaisara, Roma ġeri vere, ġenai takesi baġana vini ba asiġi?”

18 Senaġi Iesu ma ribana ġeri boioġa rakavari nai, ekirarito, “Ġomi ġofaġofa tarimami! Karase nai au ġoribaġaniguni?”

19 Takesi monina ta ġovinigu, nama ġitaia!” Benamo silva monina ta ġeviniato.

20 Benamo ġia na edanaġirito, ekirato, “Mai tu dei laulauna ema dei arana?”

21 Ġia ġevaġa-veseto, “Kaisara ġena.” Iesu na evaġa-guruġarito, ekirato, “Be, Kaisara ġena dagara Kaisara boġono vinia, Barau ġena dagara Barau boġono vinia.”

22 Mo guruġa ġeseġaġiato nai, ġeġaba-rakavato, benamo ġeraga-kwaneato, ġerakato.

Variġisi-ġenoġoi guruġari

Mareko 12:18-27; Luka 20:27-40

23 Mo ġaro sebonai Sadukea tarimari kota Iesu ġenai ġeiaġoto. Ġia ġeri tuġamaġi tu mase tarimari asi ma beġe variġisi-ġenoġoini. Benamo Iesu ġedanāġiato, ġekirato,

24 “Vevaġa-riba tarimamu, Mose maiġesi ekirato, ‘Bema tau ta asi natuna bemaseni nai, ivana vabuna kakana o tarina ta na bene ġaraġoa, naturi beġene maġuri mase tauna ġena.’

25 Mero mabarari tu imaima ruarua (7) mainai ġetanuto-ġoi. Mero guinena na eġaraġoato, ma emaseto asi natuna, benamo tarina na ma eġaraġoato.

26 Mo veġa sebona tarina vaġa-ruaruana ġenai eġorato, mero vaġa-toitoina maki moġesina moġo mo vaġa-imaima ruaruana (7).

27 Dokonai mo vavine maki emaseto.

28 Variġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato.”

29 Iesu na evaġa-veserito, ekirato, “Ġomi tu ġokerereni, korana Buka Veaġa anina ema Barau ġena seġuka asi ribami.

30 Mase na ma beġe variġisi-ġenoġoini tarimari tu asi ma beġe veġaraġoni. Ġia tu aneru kavana gubai.

31 A mase na ma beġe variġisi-ġenoġoini guruġari Barau ġena bukai asi ġoiaviani? Ġia ekirato,

32 ‘Au tu Aberahamo ġena Barau, Isako ġena Barau, ema Iakobo ġena Barau.’ Ġia tu maġuri tarimari ġeri Barau, dia mase tarimari ġeri Barau!”

33 Tarimarima ġutuma na mo guruġa ġeseġaġiato nai, nuġari ġefarevaġito ġena vevaġa-riba guruġari na.

Veuravini tu taravatu mabarari evanaġirito

Mareko 12:28-31; Luka 10:25-28

34 Farisea tarimari ġeseġaġito, Iesu na Sadukea tarimari ġeri guruġa ekou-ġaurito, benamo ġeraka-vegogoto.

35 Ġia fakari ai ta tu taravatu vaġa-riba-iaġina tarimana. Ġia na Iesu edanaġi-veribaġaniato, ekirato,

36 “Vevaġa-riba tarimamu, taravatu nuġanai kamara taravatu tu barego vedaurea?”

37 Iesu na evaġa-veseato, ekirato, “‘Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma ġemu tuġamaġi mabarana ġesi.’

38 Maiġa tu taravatu giniginena ema barego vedaureana.

³⁹ Taravatu barego vedaureari vaġa-ruaruana ġia ilailana tu maiġa: ‘Sevimu tarimana bono ura-vinia, ġoi tauġemu oveura-vinini kavana!’

⁴⁰ Maiġeri taravatu ruarua na taravatu mabarari ema peroveta tarimari ġeri guruġa mabarari eġabi-vegogorini.”

Keriso tu Davida natuna ba Barau Natuna?

Mareko 12:35-37; Luka 20:41-44

⁴¹ Farisea tarimari ġevegogoto-ġoi nai, Iesu na edanaġirito, ekirato,

⁴² “Ġomi na Keriso tu aiġesi ġotuġa-maġiani? Ġia tu deikara natuna ġotoni?” Ġia ġevaġa-veseto, ġekirato, “Ġia tu Davida natuna.”

⁴³ Iesu na ma edanaġirito, ekirato, “Davida tu kamasi nai Keriso tu ‘Vereġauka’ etoni? Korana Davida Iauka Veaġa na tuġamaġi-faka e riba eviniato, benamo ekirato,

⁴⁴ ‘Barau na au ġegu Vereġauka ekiraiato:

Au ġimagu aroribana rekenai

noma tanu,

bene iaġo mo, ġoi ġebaru-vinimuni tarimari ġoi kwakumu gaburenai batorerini.’

⁴⁵ Bema Davida na Keriso tu ‘Vereġaukana’ ekiraġito, kamasi nai Keriso tu Davida natuna?”

⁴⁶ Ġia mabarari ta na maki asi evaġa-veseato, ema mo nega na eiaġoto mo, tarima ta na maki asi ma edanaġiato, korana ġegarito nai.

23

Iesu na taravatu vaġa-riba-iaġina tarimari ema Farisea tarimari evanerito
Mareko 12:38-39; Luka 11:43; 11:46; 20:45-46

¹ Iesu na tarimarima ġutuma-bara e ġena mero evaġa-guruġarito, ekirato,

² “Taravatu vaġa-riba-iaġina tarimari e Farisea tarimari na Mose ġena taravatu ġevevaġa-riba iaġirini.

³ Moġa lorinaġi ġomi ġevaġa-ribamini guruġari mabarari boġono korana-iaġiri e boġono veiri. A ġeri veiġa asi boġono tovtovori, korana kara ġeġobata-iaġirini, tarimarima na beġene veiri veiġari tu, tauġeri na asi ġekorana-iaġirini.

⁴ Ġia na maruna metori tarimarima ġevaġa-faġarini, senaġina ġimari didiri na ta maki ġeri marunai asi ġeveġabikauni, asi ġevaġa-kavarini, maruna beġene ġwari ġana.

⁵ Ġeri veiġa mabarari ġeveirini tu, tarimarima na beġene ġitari ġana. Ġia bakuri e ġimari ai tu dagara veaġari ġebarubarurini, nuġari ai Buka Veaġa siriri ġeġurarini, moġeri dagara ġevaġa-baregorini, ema ġeri dabuġa geveri maki ġevaġa-maukarini.

⁶ Ġanivegogo gaburi ai e rubu nuġari ai ġeri ura tanutanu namori ai beġene tanu.

⁷ Ġia ġeurani maketi gaburi ai beġene rakaorakao, tarimarima na beġene vaġa-namori urari ai, ema tarimarima na ‘Vevaġa-riba Tarimari’ beġene kiraġiri.

⁸ A ġomi tu ‘Vevaġa-riba Tarimami’ ai asi beġene kiraġimi, korana Barau ġereġana moġo ġemi Vevaġa-riba Tauna, ema ġomi mabarami tu tarikaka.

⁹ Ema tanobarai tarima ta ‘Tama’ asi boġono kiraġia, korana ġomi Tamami tu sebona moġo, ġia tu gubai etanuni.

¹⁰ Ġomi maki ‘Veġori-kau Tarimami’ asi beġene kiraġimi, korana ġemi Veġorikau Tauna tu sebona moġo, Keriso, (Barau na ekiraġi-toreato vevaġa-maġuri tauna).

11 Deikara barego vedaurea ġomi fakami ai, ġia tu ġomi vetuġunaġimi beiaġo-vinini.

12 Tauġena eveġabi-vaisini tarimana tu Barau na bevaġa-manauani, a tauġena evevaġa-manauni tarimana tu beġabi-vaisiani.”

Iesu na Farisea tarimari e taravatu vaġa-riba-iaġina tarimari ġeri ġofaġofa ekiraġirito

Mareko 12:40; Luka 11:39-52; 20:47

13 “Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Korana Guba Basileia ġatama bokana tu tarimarima ġoirari ai ġokou-ġauani. Ġomi tauġemi asi boġo raka-toġani, ema ġeraka-toġa ġetoni tarimari ġeri dabara maki ġomi na ġokourini. [14 Taravatu ġovevaġa-riba iaġiani tarimami e Farisea tarimami, ġofaġofa tarimami, vetuġami kika! Ġomi na vabu ġeri numa e ġeri farefare ġovaġa-koririni. Ġemi ġauġau tu mauka kenene, ġoġofaġofani. Moġesi nai ġomi tu meto barego vedaurea boġo ġabiani.]

15 Taravatu vaġa-riba-iaġina tarimami e Farisea tarimami, ġofa-ġofa tarimami! Ġomi gabu mabarari ġana ġoiaġoni, davarai e tanobarai, tarima sebna kwariġutu ġemi doġoro ai bene raka-toġa uranai. Ġoġabiani, benamo karava eġara-vanaġi vanaġini gabuna natunai ġovaġa-iaġoani, ġemi kira-sirivaġi e seġafore maki bevanaġi-lelevaġirini.

16 Veġorikau taumi, matami bubuġau, vetuġami kika! Ġemi vevaġa-ribai ġokirani, Rubu Veaġa aranai bekiraġi-toreni tarimana ġena kiraġitore tu asi anina ġotoni, a Rubu Veaġa golona (o gold-na) aranai bekiraġi-toreni tauna tu, ġena kiraġitore roġo bekorana-iaġiani.

17 Babo e mata-bubu tarimami! Aiġa tu barego, golo ba golo evaġa-veaġaiani Rubu Veaġana?

18 Ma ġokirani, fata veaġana aranai bekiraġi-toreni tarimana ġena kiraġitore tu asi anina, a varevare dagarana fata veaġana iatanai ġetoreato dagarana aranai bekiraġi-toreni tarimana tu ġena kiraġitore roġo bekorana-iaġiani.

19 Mata-bubu taumi. Aiġa tu barego, varevare dagarana ba varevare dagarana evaġa-veaġaiani fata veaġana?

20 Moġa lorinai fata veaġa aranai ekiraġi-toreni tarimana na fata veaġa e fata veaġa iatanai ġetorerito dagarari mabarari arari ai ekiraġi-toreni.

21 Ema Rubu Veaġa aranai ekiraġi-toreni tarimana na Rubu Veaġa ema nuġanai etanuni Barauna arari ai ekiraġi-toreni.

22 Ema guba aranai ekiraġi-toreni tarimana na Barau ġena terona e iatanai etanuni Barauna arari ai ekiraġi-toreni.

23 Taravatu vaġa-riba-iaġina tarimami e Farisea tarimami, ġofaġofa tarimami, vetuġami kika! Korana ġomi na Barau ġovarevare-viniani dagarari, ġemi ġaniġani ġailauri misimisiri maki, karava gabanana (10) ġoveirini, karava sebna houbou dagarana ġovaġa-iaġoani, senaġina taravatu ġena dagara baregori, vei-iobukaiobuka, vevetuġaġwa ema vetuġamaġikau tu ġolearini. Gomi na tu maiġeri veiġa baregori ġoro veiri ema mo veiġa keiri maki asi boġoro iaġuiri.

24 Veġorikau tarimami, matami bubu! Ġami nanu na nagama ġoveivaġiani, senaġina kamela tu ġolauboġerini.

25 Taravatu vaġa-riba-iaġina tarimami e Farisea tarimami, ġofaġofa tarimami, vetuġamai kika! Ġomi ġemi kapusi e mereki muriri moġo ġoġuririni,

senāgi nuḡari tu lema e mata-ḡaniḡani ḡoveini dagarari na beḡe vonuvonu-raḡe.

²⁶ Farisea tarimami, matami bubu! Kapusi e mereki nuḡari ai ḡotorerini dagarari boḡono iareva-guineri, benamo murina rekena maki bene veiareva.

²⁷ Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Ḡomi tu gara gaburi ḡefeni-kuro-kurorito kavana, murikari ḡitaḡitari tu namo vedaurea, senāḡina nuḡari tu mase tarimari turiḡari ema miro mabarari na ḡevonuto.

²⁸ Ḡomi maki moḡesina, tarimarima na ḡeḡitamini veiḡa iobukaiobuka tarimari noḡa, senāḡina nuḡami tu ḡofaḡofa e vei-rakava na ḡevonuvonu-raḡeto.”

Iesu na taravatu vaḡa-riba-iaḡina tarimari e Farisea tarimari ḡeri kerere voiri ekiraḡirito

²⁹ “Taravatu vaḡa-riba-iaḡina tarimami e Farisea tarimami, ḡofaḡofa tarimami, vetuḡami kika! Ḡomi na peroveta tarimari ḡeri gara gaburi ḡoveiginikaurini, tuḡamaḡi-iaḡina foreri ḡovaḡa-ruḡarini, ema vei-iobukaiobuka tarimari ḡeri gara gaburi ḡovaḡa-vera verarini.

³⁰ Ḡokirani, ‘Tubuma ḡatama ḡeri negai ḡara maḡuri nai, peroveta tarimari vaḡivaḡiri ai asi ḡara vaḡa-kavari.’

³¹ Moḡesi ḡokirani nai, tauḡemi ḡovekiraḡini, ḡomi tu peroveta ḡevaḡirito tarimari naturi.

³² Oba, ḡomi maki tubumi ḡatami ḡeveito-ḡoi kavana ma ḡovei-iaḡoni, ḡeri rakava ḡomi na ḡovaḡa-ḡuḡururini.

³³ Ḡomi mota! Mota naturi! Barau ḡena Kota baregona ḡarona beraḡasini nai, karava eḡara-vanaḡi vanaḡini gabuna na kamasi boḡo raga-maḡurini?

³⁴ Moḡa lorinai akiramini, au na peroveta tarimari e iaunega tarimari ema vevaḡa-riba tarimari batuḡu-iaḡorini. Benamo kota tu boḡo vaḡi-maserini, aba, boḡo vaḡa-sataurorini; ma kotari tu rubu nuḡari ai boḡo kwaririni, rarari maki beḡe riḡoni, ema vanuḡa ta na boḡo lairini ma vanuḡa ta.

³⁵ Moḡesina nai vei-iobukaiobuka tarimari ḡevaḡirito metori tu ḡomi iatami ai, Abela ḡevaḡi-maseato, monana eiaḡomato mo Sakaria, Barakia natuna, ḡia tu fata veaḡana ema numa veaḡana fakari ai ḡovaḡi-maseato.

³⁶ Akira-korikorimini, mabarari metori tu toma ḡuru tarimami iatami ai beḡe ketokauni.”

Iesu Ierusalemata ḡina eveito

Luka 13:34-35; 19:41-44

³⁷ “Ierusalemata, Ierusalemata o, ḡoi na peroveta tarimari ovaḡirini ema Barau na etuḡu-iaḡosirini tarimari fore na otaki-maserini. Nega ḡutuma aurato, natumi bana gana-ḡeḡeraḡiri, kokoroku vavinena na natuna egoru-taririni kavana, senāḡi ḡomi tu asi ḡourato!

³⁸ Moḡa lorinai ḡemi vanuḡa ema Rubu Veaḡa tu korina betanuni.

³⁹ Korana au na akiramini, ḡomi roḡo au asi boḡo ḡitaguni, beiaḡoni mo, ḡaro ta beraḡasini, monai vau boḡo kirani, ‘Barau aranai eiaḡomani tauna sivaḡa-namoa.’ ”

24

Iesu na vau beḡea ḡorani dagarari ekiraḡirito

¹ Iesu Rubu Veaḡa na eraka-rosito, eraka-veḡitato nuḡanai, ḡena mero ḡia ḡenai ḡeiaḡoto, ḡeri ura Rubu Veaḡa numari baregori beḡene vaḡa-ḡitaia.

² Senaġi Iesu na evaġa-guruġarito, ekirato, “Mai dagara mabarari ġoġitarini? Au na moġoni akiramini: Mai fore ta fore ta iatanai asi beġe tanuni, mabarari beġe vare-bubu riġorini.”

³ Iesu Olive Ġoronai etanu-taġoto-ġoi, benamo ġena mero ġia ġenai ġeiaġoto, ġedanāġi-ġairiato, ġekirato, “Nokira-varama, mai dagara tu ait-oma beġe ġorani? E ġoi boġenoġoi-iaġomani ema tanobara dokona beġabiani maki kamara vetoġa na bevaġa-foforiani?”

⁴ Iesu evaġa-veseto, ekirato, “Ġomi lorimi boġono vetore, tarima ta na asi bene ġofami.

⁵ Korana tarima ġutuma au aragu ai beġe iaġomani, beġe kirani, ‘Keriso tu au maiġegu!’ Tarima vovoka beġe ġofarini.

⁶ Ġomi na vetari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo.

⁷ Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai doġe beġe ġorani, tano maki beġe iagani.

⁸ Mai tu midigu moġo besinaiani, noġa moġo mero keina emaġurini midiguna kavana.

⁹ Mo negai beġe ġabi-tarimini, beġe vaġa-midigu midigumini, beġe vaġi-masemini. Bese mabarari na beġe baru-vinimini, korana au ġovaġa-moġoniguni dainai.

¹⁰ Benamo tarima ġutuma ġeri veġabidadama beġe raga-kwanerini, tata beġe verevani e beġe vebaru-vevinini.

¹¹ Peroveta ġofaġofa tarimari beġe variġisini, tarima ġutuma beġe ġofarini.

¹² Vei-rakava maki beġora-rovorovoni, benamo ġutuma ġeri veuravini maki beġe farakani.

¹³ Senaġina deikara bevevaġa-gwaġiġini mo magona tu bemaġurini.

¹⁴ Barau ġena Basileia Varina Namona tu tanobara mabaranai beġe ġobata-iaġiani, bese mabarari na beġene seġaġia ġana, moġa murinai vau magona beraġasini.”

Vevaġa-gari dagarana befoforini
Mareko 13:14-23; Luka 21:20-24

¹⁵ “Ġomi na dagara rakava vedaureana, vevaġa-gari dagarana, peroveta tarimana Daniela na ekiraġiato dagarana, boġo ġitaiani gabu veaġanai beruġani.” Mai guruġa beiaviani tarimana bene riba maoro anina tu kara.

¹⁶ “Benamo deidei Iudeai ġetanuni tarimari ġoro ġana beġene raga-iaġo.

¹⁷ Deikara numa tuġunai etanu-taġoni tu, asi ma bene raka-toġa numa nuġana ġana ġena farefare ġabiġabiri.

¹⁸ Deikara vamoka nuġanai maki asi ma bene ġenoġoi ġena koudi ġabiġabina.

¹⁹ Mo negai vavine ma baniri e ġabi-variġu vavineri kika ma vetuġari!

²⁰ Boġono ġauġau Barau ġenai, be ġura e nagure negari ai o Sabadi ai asi boġono raga-kwareġa!

²¹ Korana mo negai midigumidigu tu asi keikeiri beġe ġorani, Barau na tanobara eveiato beiaġoma maitoma, midigu moġesina asi ġeġorani. Ma maiġa murinai moġesina kavana ta asi ma beġora-ġenoġoini.

²² Bema Barau na mo ġaro rakavari asi bere vaġa-kubiri, tarimarima ta asi bere maġuri riba, senaġi eġabi-hidirito tarimari dairi ai, ġia na ġarori bevaġa-kubirini.

²³ Mo negai, bema tarima ta na bekiramini, ‘Ġoġitaia, Keriso tu maiġa!’ o ‘Ġia tu iomoġa!’ betoni nai, asi boġono vaġa-moġonia.

²⁴ Korana tu Keriso ġofaġofari e peroveta tarimari ġofaġofari beġe foforini, vetoġa boruri e nuġa-farevaġi veiġari baregori beġe veirini, Barau na eġabi-viriġirito tarimari beġene ġofa-veġonuri ġana.

²⁵ Boġono tuġamaġi-taġoa, maiġeri dagara tu akiravara-guinemini, hora roġosi bene raġasi nai.

²⁶ Bema tarima ta na bekiramini, ‘Ġoġitaia, ġia tu tano fakanai moġa,’ moġana asi boġono iaġo; o bekirani, ‘Ġoġitaia, ġia tu mo numa nuġanai etanuni,’ asi boġono vaġa-moġonia.

²⁷ Korana Tarimarima Natuna beiaġomani tu fofori-taġo, noġa moġo kiriku ekimoreani gubai ġaro raġeraġena na mo ġaro riġoriġona kavana;

²⁸ ma mase tauġanina etanuni gabunai gaio maki monai beġe vegogoni, (be ġia na beġe vaġa-foforiani).”

Tarimarima Natuna ġena iaġoma

Mareko 13:24-27; Luka 21:25-28

²⁹ “Mo rakava beġe ġorani murinai, ġaro bemukunani e ġue maki asi bemamani, visiġu guba na beġe ketoni e guba seġukari beġe iaġaiagani.

³⁰ Benamo Tarimarima Natuna vetoġana gubai befoforini. Mo ġaro ai tanobara beseri mabarari beġe taġi-vanoro vanoroni, korana Tarimarima Natuna beġe ġitaiani, magube iatana na beiaġomani ma seġuka barana e ma marevana ġesi.

³¹ Benamo ġia na ġena aneru betuġurini ma kibi gururi baregori ġesi, eġabi-viriġirito tarimari beġe vaġa-vegogorini tanobara mabarari na.”

Barabore - Vevaġa-riba figi ġauna ġenana

Mareko 13:28-31; Luka 21:29-33

³² “Figi ġauna ġenana mai barabore boġono ribaia: Kabona ġefori-raġeni e launa ġefafani nai, ġoribani, ġaro ġena tora taimina tu bekavinaġi ġotoni.

³³ Moġa ilailanai, ġomi maki bema mai dagara mabarari beġe ġorani boġo ġitarini nai, boġono riba, Tarimarima Natuna tu bekavinaġi ġatama bokai.

³⁴ Moġoni akiramini, mai ġuru asi bekorini, beiaġoni mo, mai dagara mabarari beġe ġorani.

³⁵ Guba e tanobara beġe rekwa-rekwani, senaġi au ġegu guruġa tu asi beġe rekwa-rekwani, beġe tanu-vanaġi vanaġini.”

Ġaro e hora tarima ta asi ribana

Mareko 13:32-37; Luka 17:26-30; 17:34-36

³⁶ “Senaġi mo ġaro e hora tu tarima ta asi ribana, aneru gubai asi ribari e Natuna maki asi ribana, senaġi Tamana ġereġana moġo ma ribana.

³⁷ Tarimarima Natuna ġena iaġoma tu noġa moġo Noa ġena negai kara ġeġorato kavana.

³⁸ Ġutuġutu roġosi bere raga nai, tarimarima tu ġeveini kavana ġeġaniġanito-ġoi, ġeniuniuto-ġoi, ema tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato ġaronai.

³⁹ Senaġi matari asi ġekanito, asi ġeribato kara beġorani mo, ġutuġutu eraġasito, benamo mabarari eġutu-masemaserito. Tarimarima Natuna beiaġomani maki moġesina beġorani.

⁴⁰ Mo ġaro ai tau ruarua vamokai beġe ġauveini, ta tu Barau na beġabi-vaġiani, a ta tu betanuni.

⁴¹ Vavine ruarua widi giro dagarana beġe giro-vegogoani, ta tu beġabi-vaġiani, a ta tu betanuni.

⁴² Moġesi nai tataġa-taġo boġono tanu, korana ġomi asi ribami ġemi Vereġauka tu aitoma beiaġomani.

⁴³ Boġono riba-maoro: Bema numa tarimana ma ribana kamara aonai lema tarimana beiaġomani nai, ġia tu tataġa-taġo betanuni, benamo lema tauna na numa asi bedareani.

⁴⁴ Moġa lorinai ġomi maki boġono verovina-tore, korana Tarimarima Natuna aitoma beraġasini aonai ġomi asi boġo ribani.”

Vetuġunaġi tarimana namona

Luka 12:42-46

⁴⁵ “Deikara tu mo farefare nari tarimari na guruġa eseġaġini ema veiġa roroġotori eveini, ġena vere na eġabi-hidiato numa ema vetuġunaġi tarimari bene ġita-ġauri, ema ġani-ġani maki nega korikori ai bene viniri?

⁴⁶ Mo vetuġunaġi tarimana, ġena vere na ekiraiato ilailanai eġauveini, bema-ġoitaġoani tu namo.

⁴⁷ Moġoni akiramini, ġia tu ġena vere ġena farefare mabarari ġitaġauri tarimanai betoreani.

⁴⁸ Senaġina bema ġia vetuġunaġi tarimana rakavana, tauġena nuġana bekirani, ‘Au ġegu vere ġena ġenoġoi tu bekwaibo-rakava,’

⁴⁹ benamo ġia na karona bekwiririni, ma ġia tu niuniu tarimari ġesi beġe ġaniġani-vegogoni e beġe niuniu-vegogoni.

⁵⁰ Vetuġu-naġi tarimana ġena vere ġena ġenoġoi ġarona tu asi etuġamaġiani ġaronai, ma asi eribaiani aonai beraġasini.

⁵¹ Benamo ġena vere na bea basi-ġutuġutuani, ma ġofaġofa tarimari ġesi bea toreani. Monai beġe taġini, gadikari maki beġe veġara-tarini.”

25

Barabore - Ġuiato gabanana (10)

¹ “Mo ġaro ai Guba Basileia tu noġa moġo ġuiato gabanana (10) kavana, ġeri lamefa ġeġabirito, ġeraka-rosito, veġaraġo variġu tauna ġesi beġene vedoġari ġetato.

² Ġuiato imaima (5) tu ma iaunegari, a imaima (5) tu babori.

³ Korana ġuiato babori ġeri lamefa moġo ġeġabito, senaġi keresini kota ma asi ġeġabikauto.

⁴ A iaunega ġuiatori ġeri lamefa ġeġabito nai, keresini maki kavabu ai ġeġabikauto.

⁵ Veġaraġo variġu tauna ekwaiboto dainai, gena na matari eġararito, benamo mabarari ġegenato.

⁶ Boġi nuġanai ta ekoġoto, ekirato, ‘Veġaraġo variġu tauna mani eiaġomani, be ġoiaġo, ġia ġesi boġono vedoġari!’

⁷ Benamo ġuiato 10 ġetataġato, ġeri lamefa ġeiarevarito.

⁸ Ġuiato babori na iaunega ġuiatori ġevaġa-guruġarito, ġekirato, ‘Ġemi keresini kota ġovinima, korana ġai ġema lamefa mai ġebuseni.’

⁹ Senaġi iaunega ġuiatori ġevaġa-veseto, ġekirato, ‘Asiġina, ġomi ema ġai tu asi beilailani. Namona tu sitoa ġana ġoiaġo, tauġemi ġemi ġoa voi.’

¹⁰ Keresini voi ġeiaġoto-ġoi nai, veġaraġo variġu tauna eraġasito. Benamo ġerovina-toreto ġuiatori tu ġia ġesi veġaraġo verekonai ġeraka-toġato. Benamo ġatama-boka ġekou-ġauato.

¹¹ Gabivau ġuiato tari maki ma ġevotuto, ġekirato, ‘Vereġauka, Vereġauka o, ġema ġatama-boka noma keoa!’

¹² Senaġi veġaraġo variġu tauna evaġa-veseto, ekirato, ‘Moġoni akiramini, au tu asi ribagu ġomi.’

13 Moġa lorinai, boġono venari-taġo, korana ġemi Vereġauka beiaġomani ġarona e horana asi ribami.”

Barabore - Vetuġunaġi tarimari moni ġenarito

Luka 19:11-27

14 “Guba Basileia tu noġa moġo tarimana ta, gabu manaġana ġana bene iaġo etato. Roġosi bere raka nai, ġena vetuġunaġi tarimari ekea-iaġomarito, ġena farefare evinirito, beġene ġauvei-iaġiri ġana.

15 Ġia na golo moniri ġia tata sebori sebori ġeri riba e kokore ilailari ai evinirito. (Golo monina ta tu tarima ta davana laġani toitoi nuġanai beġabini kavana). Ta tu golo moniri imaima (5) eviniato, ma ta tu golo moniri ruarua (2), ma ta tu golo monina sebona eviniato. Benamo eraga-kwanerito, ġena iaġoiaġo eiaġoto.

16 Golo moniri imaima eġabirito tarimana maoromaoro eiaġoto, ġena moni eġauvei-iaġirito, golo moniri boruri imaima ma edoġaririto.

17 Moġesina kavana golo moniri ruarua eġabirito tarimana na maki moni boruri ruarua ma edoġaririto.

18 Senaġi golo monina sebona eġabiato tarimana eiaġoto, tano ai guri ekwaiato, biaguna ġena moni ekure-toġaiato.

19 Nega varau emanaġato nuġanai, mo vetuġunaġi tarimari ġeri vere ma eġenoġoi-iaġomato, ġena moni kamasi ġeġauvei-iaġirito beġene vevarifiu-iaġiri etato.

20 Benamo golo moniri imaima eġabirito tarimana ema raka-toġato, moni boruri imaima eġabi-kaurito, ekirato, ‘Verebara, ġoi na golo moniri imaima oviniguto nuġanai, au na tu moni boruri imaima ma badoġariri maiġeri.’

21 Ġia na evaġa-namoato, ekirato, ‘Namo baregona! Ġoi tu vetuġunaġi taumu namona, ma vetuġamaġikaumu! Dagara misiri oġau-vei-iaġi ginikaurini nai, au na dagara ġutuma avinimuni, ġoi na boġita-ġaurini. Noma raka-toġa, au ġesi sima iaku-vegogo!’

22 Benamo golo moniri ruarua eviniato tarimana ma ema raka-toġato, ekirato, ‘Verebara, ġoi na golo moniri ruarua oviniguto nuġanai, au na tu moni boruri ruarua ma badoġariri, maiġeri.’

23 Ġena vere na evaġa-namoato, ekirato, ‘Namo vedaurea! Ġoi tu vetuġunaġi taumu namomu, ma vetuġamaġikaumu! Dagara misiri oġauvei-iaġi ginikaurini nai, au na dagara ġutuma avinimuni, ġoi na boġita-ġaurini. Noma raka-toġa, au ġesi sima iaku-vegogo!’

24 Benamo golo monina sebona eġabiato tarimana ema raka-toġato, ekirato, ‘Verebara, au ribagu ġoi tu asi vegubakau taumu, dia ġoi na ovarorito dagarari okwarini, ema dia ġoi na ġue-ġuturi ofiu-rovorovorito dagarari ovaġa-vegogorini.

25 Moġesi naima agarito, aiaġoto, ġemu moni tano nuġanai akure-toġaiato. Noġitaia, dagarana iniġa, ġemu noġabia.’

26 Ġena vere na ekiraiato, ekirato, ‘Ġoi vetuġunaġi taumu rakavamu ma ġubulefimu. Ġoi ribamu, dia au na avarorito dagarari akwarini, ema dia au na afiu-rovorovorito dagarari avaġa-vegogorini.

27 Kamuto, bere namo ġegu moni tu banikai boro torea, benamo au bara ġenoġoi-iaġoma nai tu, ma torekauna ġesi bara doġaria.

28 Bevaitovo, ġia na vetuġunaġi tarimari tari ekirarito, ekirato, ‘Mani moni sebona ġenai maniġa ġoġabia, moni gabanana (10) tarimana ġovinia.

29 Korana ma ġena-ġana tarimana tu ġutumari ma baviniiani, be barego lelevaġi beġabini, a asi ġena-ġana tarimana tu ġenai misina maki baġabi-vaġiani.

³⁰ Ma mai vetuḡunaḡi tarimana rakavana ḡofiu-rosia murika mukunana ḡana. Monai bene taḡi, gadikana maki bene vaḡa-ḡaratariri.’ ”

Kota baregona ḡarona

³¹ “Tarimarima Natuna tu ma mamana marevana e seḡuka baregona, ema ma ḡena aneru mabarari ḡesi beḡe iaḡomani, ḡena teronai betanu-kauni.

³² Bese mabarari ḡia ḡoiranai beḡe vaḡa-vegogorini, benamo ḡia na bevaḡa-farararini, noḡa moḡo mamoe narinariri tarimana na mamoe nanigosi ḡerina etore-ḡerevaḡirini kavana.

³³ Mamoe tu aroribana rekenai, ma nanigosi tu kaurina rekenai betorerini.

³⁴ Benamo Vere na aroribana tarimari bevaḡa-guruḡarini, bekirani, ‘Ḡoiḡoma! Tamagu na evaḡa-namomini tarimami, ḡoiḡoma! Barau ḡena Basileia ḡoma ḡabia, guba tanobara eveirito neganai varau erovina-toreato ḡomi ḡemi.

³⁵ Korana au evitoguto nai, ḡoḡubuguto; bokagu ekoketo nai, nanu ḡoviniguto; au vanuḡa boru tarimagu ḡomi fakami ai atanuto, senaḡi ḡoḡabiraḡeguto;

³⁶ au asi ḡegu dabuḡa, ḡovaḡa-dabuḡaguto; akeveto nai, ḡonariguto; dibura numai atanuto nai, ḡoraka-ḡitaguto.’

³⁷ Benamo vei-iobukaiobuka tarimari na beḡe vaḡa-veseani, beḡe kirani, ‘Vereḡauka, aitoma ḡaḡitamuto ovitoto, ḡaḡubumuto? O onanu-maseto, nanu ḡavinimuto?’

³⁸ Aitoma ḡoi vanuḡa boru tarimamu ai ḡaḡitamuto, ḡaḡabi-raḡemuto ḡai ḡema numai, o asi ḡemu dabuḡa, ḡavaḡa-dabuḡamuto?

³⁹ Kamara ḡaro ai ḡaḡitamuto ḡoi okeveto, o diburai otanuto, ḡaraka-ḡitamuto?’

⁴⁰ Benamo Vere na bevaḡa-veserini, bekirani, ‘Moḡoni akiramini, tarikakagu asi ḡeiavirini tarimari maiḡeri ta ḡovei-viniato ilailanai, au maki moḡesi ḡovei-viniguto.’

⁴¹ Benamo kaurina rekena tarimari bevaḡa-guruḡarini, bekirani, ‘Au ḡegu na ḡoraka-veḡita, meto barego lele-vaḡina iatami ai etanuni tarimami, ḡoiḡo, eḡara-vanaḡi vanaḡini karavana ḡana, Satani ma ḡena aneru ḡeri Barau na varau evei-toreato.

⁴² Korana evitoguto, senaḡi asi ḡoḡubuguto; nanu na emaseguto, senaḡi nanu asi ḡoviniguto;

⁴³ au tu vanuḡa boru tarimagu ḡomi fakami ai atanuto, senaḡi asi ḡoḡabiraḡeguto ḡemi numai; asi ḡegu dabuḡa, senaḡi asi ḡovaḡa-dabuḡaguto; akeveto ema dibura numai atanuto, senaḡi asi ḡoraka-ḡitaguto.’

⁴⁴ Benamo ḡia maki beḡe vaḡa-veseani, beḡe kirani, ‘Vereḡauka, kamara ḡaro ai ḡaḡitamuto, ovitoto o onanu-maseto, o vanuḡa boru tarimamu, o asi ḡemu dabuḡa, o okeveto, o diburai otanuto, ḡai na asi ḡavaḡa-kavamuto?’

⁴⁵ Benamo Vere na bevaḡa-veserini, bekirani, ‘Moḡoni akiramini, ḡomi na mai tarikaka asi ḡeiavirini tarimari maiḡeri, ta asi ḡovaḡa-kavaiato nai, au maki moḡesi ḡovei-viniguto, asi ḡovaḡa-kavaguto.’

⁴⁶ Tauna moḡa, ḡia tu midigu vanaḡivanaḡi gabuna ḡana beḡe iaḡoni, a vei-iobukaiobuka tarimari tu maḡuri vanaḡivanaḡi gabuna ḡana beḡe iaḡoni.”

26

*Iesu beḡene vaḡi-masea dabarana ḡevetauato
Ioane 11:45-53*

¹ Iesu na maġeri dagara mabarari evevaġa-riba iaġi-ġosirito nai, ġena mero evaġa-guruġarito, ekirato,

² “Ġomi ma ribami, ġaro ruarua moġo, benamo Pasova beġe veiani. (Moġa tu Iuda tarimari mase aneruna na evanaġirito moġo, asi evaġirito verekona). Mo ġaro ai Tarimarima Natuna tarima tari ġimari ai beġe toreani, beġene vaġa-satauroa ġana.”

³ Benamo Rubu Veaġa vereri baregori ema Iuda ġeri vere baregori ġesi ġevegogoto, Kaiafas, Rubu Veaġa verena barana, ġena numai.

⁴ Ġeboioġato, Iesu beġene ġabi-lemmaia, benamo beġene vaġi-masea.

⁵ Senaġi ġekirato, “Dia vereko nuġanai bene ġora, korana vereko beġe iaġomani tarimari ġia iatana na beġe burini garina.”

Vavine ta na Iesu ediġaiato Betania ai

Mareko 14:3-9; Ioane 12:1-8

⁶ Iesu tu Betania ai, Simona, lepera tarimana, ġena numai.

⁷ Ġeġaniġanito-ġoi nuġanai, vavine ta ġia ġenai eiaġoto; kavabu namona ta, alabasta forena na ġeveiato kavabuna, eġabi-kauato, nuġanai tu muramura ma bonana namona, voina barego vedaurea; Iesu ġaniġani gabunai etanu-taġoto-ġoi nai, mo vavine na Iesu debanai ebubuato.

⁸ Ġena mero na ġeġitaiato, benamo ġebaruto, ġekirato, “Karase nai mai muramura efitoġa-kavaiani?”

⁹ Mai muramura bere voivoi-iaġia, be moni baregona bere ġabia, benamo asi ġeri-ġari tarimari bere viniri!

¹⁰ Iesu ribana ġia tu kara ġekiraġiato, moġesina nai evaġa-guruġa-rito, ekirato, “Karase nai mai vavine ġomuġumuġu-iaġiani? Mai vavine na veġa namona au ġegu ai beveia.

¹¹ Asi ġeri-ġari tarimari tu ġomi ġesi boġo tanu-vanaġi vanaġini. Senaġi au tu dia ġaro mabarari ġomi ġesi batanuni.

¹² Mai vavine na muramura au tauġanigu ai bebubu-guinea, gurigurigu ġana.

¹³ Moġoni akiramini, Vari Namona beġe ġobata-iaġiani tanobara mabarari nuġari ai, mai vavine na veġa beveia veġana maki beġea kiraġiani, ġia tuġamaġi-iaġina.”

Iudas na Iesu erevaiato

Mareko 14:10-11; Luka 22:3-6

¹⁴ Benamo gabanana ruarua (12) tarimari ta, arana Iudas Isakariota, Rubu Veaġa vereri baregori ġeri ai eiaġoto,

¹⁵ edanaġirito, ekirato, “Kara boġo viniguni, bema Iesu ġimami ai batorekauani nai? Ġia na silva moniri gabana toitoi (30) ġeiavirito, benamo ġeviniato.

¹⁶ Mo nega monana Iudas na ġimari ai betore-kauani dabarana evetauato-ġoi.

Iesu ma ġena mero ġesi ginitaġo mamoea ġeġaniato

Mareko 14:12-21; Luka 22:7-14; 22:21-23; Ioane 13:21-30

¹⁷ Asi etubuni faraona verekona ġarona giniguenai ġena mero Iesu ġenai ġeiaġoto, ġedanaġiato, ġekirato, “Ġai tu ainai Rubu Veaġa verekona baġana vei-torea, bono ġania?”

¹⁸ Benamo Iesu na evaġa-veserito, ekirato, “Ġoiġo vanuġa barana nuġanai, mo bakiraġia tarimana ġenai, boġono vaġa-guruġaia, boġono kira, ‘Vevaġa-riba tauna ekirani: Ġegu hora varau beraġasi. Ġegu mero ġesi ġoi ġemu numai ginitaġo mamoea baġa ġaniani.’ ”

19 Benamo mero Iesu na ekirarito ilailanai vereko ġevei-toreato.

20 Lavilavi ai Iesu ma ġena mero gabanana ruarua (12) ġesi ġetanu-tarito, vereko ġeġania ġana.

21 Benamo ġeġaniġanito-ġoi nai, ekirarito, ekirato, “Moġoni akiramini, ġomi ta na au borevaguni.”

22 Ġia mabarari nuġari ma metori ġesi irau sebori irau sebori na ġedanagiato, ġekirato, “Vereġauka, moġoni dia au, ene?”

23 Iesu evaġa-veseto, ekirato, “Au ġesi diġu sebonai ġanaba-riġoni tari-mana na au berevaguni.

24 Tarimarima Natuna bemaseni Buka Veaġai ġetoreato ilailanai. Senaġi Tarimarima Natuna berevaiani tarimana ġenai tu vetuġana kekei; asi bere maġuri tu namo.”

25 Benamo Iudas, reva tarimana, ekirato, “Vevaġa-riba taumu, moġoni dia au, ene?” Iesu evaġa-veseto, ekirato, “Dagarana maniġa, mani okiraġiani.”

Vereġauka ġena ġanivegogo veaġana

Mareko 14:22-26; Luka 22:15-20; 1Korinto 11:23-25

26 Ġeġaniġanito-ġoi nuġanai, Iesu na beredi eġabiato, Barau evaġa-namoato, etaviato, evinirito, benamo ekirato, “Ġoġabia, ġoġania, mai tu au tauġanigu.”

27 Ġia na kapusi ma eġabiato, evaġa-namoato murinai, evinirito, ekirato, “Ġoniua, ġomi mabarami.

28 Korana mai tu au raragu, Ginitaġo Variġuna evaġa-moġoniani, bevebubuni, tarimarima ġutuma ġeri rakava tuġamaġi-fitoġari ġana.

29 Akiramini, mai vine nanuna asi ma banu-ġenoġoiani, beiaġoni mo, ġaro beraġasini vau, au ġomi ġesi ma bita niu-vegogoani au Tamagu ġena Basileia nuġanai.”

30 Benamo mari ta ġemariato murinai, ġeraka-rosito, Olive Ġorona ġana ġeiaġoto.

Iesu na Petero ġena vekira-ġuniġau ekiraġi-toreato

Mareko 14:27-31; Luka 22:31-34; Ioane 13:36-38

31 Benamo Iesu na evaġa-guruġarito, ekirato, “Toma boġi ġomi mabarami ġemi veġabidadama au ġegu ai boġo raga-kwaneani, korana Buka Veaġai maiġesi ekirani,

‘Au na mamoe ġitaġauri

tarimana bavaġiani,

benamo mamoe mabarari

beġe raga-lausini.’

32 Senaġi au mase na ma bavariġisi-ġenoġoini murinai, baraka-guineni Galilea ġana. Monai vau bitana vedoġari.”

33 Petero eguruġa-fouto, Iesu ekiraiato, ekirato, “Bema mabarari na ġeri veġabidadama ġoi ġemu ai beġe raga-kwaneani, senaġi au na tu asigina.”

34 Iesu na Petero evaġa-guruġaiato, ekirato, “Moġoni akiramuni, toma boġi kokoroku roġosi bene goġi nuġanai, ġoi na au vaġa-toitoi bokira-ġuniġauguni.”

35 Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Ġena mero mabarari maki moġesi ġekirato.

Iesu eġauġauto Getesemane ai

Mareko 14:32-42; Luka 22:39-46

³⁶ Iesu ma ġena mero ġesi ġeiaġoto gabu ta arana Getesemane, benamo ġia na evaġa-guruġarito, ekirato, “Mainai ġotanutaġo, au tu iomo ġana aiaġoni, naġauġau.”

³⁷ Benamo Petero ema Sebedaio natuna ruarua moġo eġoririto, ġia ġesi ġeiaġoto. Moġa nuġanai Iesu tau-ġanina efarakaiato, egarito, nuġana maki evekwaraġito-ġoi.

³⁸ Benamo ekirarito, ekirato, “Au nuġagu na meto asikei eġwaiiani, dori evaġiguni. Mainai ġotanu, boġono vevaġa-gwaġiġi au ġesi.”

³⁹ Iesu kota ma eraka-naġito, ġoirana tano ai ekokofa-tarito, benamo eġuriġurito, ekirato, “Tamagu o, bema ma dabara ta, mai midigu bedina ġeguna noma ġabi-vaġia. Senaġi dia au ġegu ura, ġoi ġemu ura moġo.”

⁴⁰ Ġena mero toitoi ġeri ai eġenoġoito nuġanai, ġia tu gena-maseri ai eġoitaġorito, benamo Petero ekiraiato, ekirato, “Kamasi nai ġomi taumi toitoi au ġesi aoa sebona ta kavana maki asi boġo vevaġa-gwaġiġini?”

⁴¹ Boġono vevaġa-gwaġiġi, boġono ġauġau, be veribaġani beiaġomani nai tu, asi boġono moira. Iauka tu moġoni eurani, senaġi tau-ġani tu emoirani.”

⁴² Iesu nega vaġa-ruarua eraka-veġitato, ea ġuriġurito, ekirato, “Tamagu o, bema asi dabara ta mai midigu bedina ġeguna boġabi-vaġiani nai, ġoi ġemu ura bono veia moġo.”

⁴³ Ma eġenoġoi-iaġomato nuġanai tu, ġia asi ġeri vevaġa-gwaġiġi nai, genamaseri ai ma edoġaririto, korana matari tu gena na eġabi-rakavarito.

⁴⁴ Iesu na ma eiaġuirito, ma eiaġoto, vaġa-toitoi ma eġauġauto, ġena ġuriġuri guruġari guineri ma ekiraġi-ġenoġoirito.

⁴⁵ Benamo ġena mero ġeri ai ma eġenoġoi-iaġomato, ekirarito, “Ġomi tu roġo ġogenani e ġoiaġaraġini? Ġoġitaia! Aoana varau beraġasi! Tarimarima Natuna tu beġe revaia, rakava tarimari ġimari ai beġe torea.

⁴⁶ Ġovariġisi, be si-iaġosi! Ġoġitaia, au revarevagu tarimana mai beraġasi!”

Iesu tuari tarimari na ġeġabiato

Mareko 14:43-50; Luka 22:47-53; Ioane 18:3-12

⁴⁷ Iesu roġo eguruġato-ġoi nuġanai, Iudas, mero gabanana ruarua (12) tauna ta, eraġasito. Tarimarima ġutuma maki ġia ġesi ma ġeri vetari baġari e vevaġi kwariri. Ġia tu Rubu Veaġa vereri baregori ema Iuda vereri na ġetuġurito.

⁴⁸ Reva tarimana na vetoġa ta ekiravara-torerito, ekirato, “Baverauani tarimana tu moġa, boġono ġabi-taria.”

⁴⁹ Iudas eraġasito nai, maoromaoro eiaġoto Iesu ġenai, benamo ekirato, “Vevaġa-riba tarimamu, boġi namona!” benamo everauato.

⁵⁰ Iesu na evaġa-veveato, ekirato, “Ġata, veiveina uranai boiaġoma veiġana noraga-veia!” Benamo ġeiaġomato, ġimari na Iesu ġeġabi-tariato, ġedegodegoato.

⁵¹ A Iesu ġena mero ta ġena vetari baġana einu-vaġiato, edaveato, benamo Rubu Veaġa verena baregona ġena vetuġunaġi tarimana seġana ebasi-vaġiato.

⁵² Benamo Iesu na ekiraiato, ekirato, “Ġemu baġa tu ġuraġurana gabunai noġura-ġenoġoia. Korana vetari baġari ġeġabini tarimari mabarari tu vetari baġari na beġe maseni.

⁵³ Ġoi asi ribamu, Tamagu ġena vevaġa-kava banoġiani, benamo ġia na aneru vaġa-sebo au ġegu ai betuġurini, aneru doġorori gabanana ruarua (12) o 70,000 ema tari maki betuġurini au vaġa-kavagu?

⁵⁴ Moġesi bere vei, senaġi Buka Veaġai varau ġetoreato guruġana tu kamasi bemoġonini? Be, maiġesi moġo beġene vetore!”

⁵⁵ Iesu na monai mo tarima ġutuma evaġa-guruġarito, ekirato, “Au tu seġafore doġorona ta aġori-kauani, be ġomi boġo iaġoma au ġabiġabigu tu ma ġemi vetari baġari e vevaġi kwariri ġesi? Ġaro mabarari ai au tu ġomi sevimi ai, Rubu Veaġa nuġanai avevaġa-ribato-ġoi, senaġi asi ġoġabi-tariguto.

⁵⁶ A mai dagara mabarari ġeġorani tu, peroveta tarimari na Buka Veaġai ġetore-quinerito guruġari vaġa-moġoniri ġana.” Benamo Iesu ġena mero mabarari na ġeraga-kwaneato, ġeraga-rovorovoto.

Iesu kanisoro tarimari ġoirari ai

Mareko 14:53-65; Luka 22:54-55; 22:63-71; Ioane 18:13-14; 18:19-24

⁵⁷ Mo ġeġabi-tariato tarimari na Iesu ġeġori-iaġoato, Kaiafas, Rubu Veaġa verena baregona, ġena numa ġana. Monai taravatu ġevevaġa-riba iaġiato-ġoi tarimari ema Iuda vereri varau ġeraka-vegogoto.

⁵⁸ Petero na Iesu eraka-tuġuato-ġoi, ma fakana eiaġoto mo, Rubu Veaġa verena baregona ġena numa ġana. Eraka-toġato maġu nuġanai, benamo veġitaġau tarimari fakari ai ea tanu-tarito, bene ġita, mo veġa magonai kara befoforini.

⁵⁹ Rubu Veaġa vereri baregori e Iuda ġeri kanisoro tarimari mabarari na vevaġa-bade ġofaġofa tarimari ġevetaurito, Iesu beġene ġofaġofa-iaġia, be beġene vaġia ġana.

⁶⁰ Vevaġa-bade ġofaġofa tarimari ġutuma ġevariġisito, ġeġofaġofa-iaġiato, senaġi ġeri guruġa tu asi ġesebonato-ġoi. Magonai vau ġofaġofa tarimari ruarua ġevaisi-raġeto,

⁶¹ ġekirato, “Mai tarima ekirato, ‘Au tu ma seġukagu mai Barau ġena Rubu Veaġa barovoani, ema ġaro toitoi nuġanai ma bavaġa-ruġa ġenoġoiani.’ ”

⁶² Benamo Rubu Veaġa verena baregona eruġa-vaisito, Iesu edanaġiato, ekirato, “Ġoi tu asi bovaġa-veseni? Maiġeri na ġoi ġevarifiu-iaġimuni guruġari tu kamasi?”

⁶³ Senaġi Iesu asi eguruġato. Rubu Veaġa verena baregona na ma edanaġi-ġenoġoiato, ekirato, “Maġuri Barauna aranai au na ġoi akiramuni, nokira-varama: Ġoi tu Keriso, Barau Natuna?”

⁶⁴ Iesu na evaġa-veŋeato, ekirato, “Dagarana okiraġiani maniġa! Ma au na ġomi mabarami akiramini: Mai ġaro maiġa, mo beiaġoni ġoirai, ġomi na Tarimarima Natuna roġo boġo ġitaiani, seġuka Barauna ġimana aroribanai betanuni, e guba maguberi iatari na beiaġomani!”

⁶⁵ Benamo Rubu Veaġa verena baregona tauġena ġena dabuġa edareato, ekirato, “Barau vaġa-rakavana guruġana tu ekiraġi-ġosiatu! Karase vevaġa-ġita tarimari roġo tavetaurini? Barau vaġa-rakavana guruġana bekiraġia, varau boġo seġaġia.

⁶⁶ Kara mani ġotoni?” Ġia mabarari ġekirato, “Bene mase moġo.”

⁶⁷ Benamo ġoirana ġekanunuato, ġefaisiato. Kotari na ġeforoato,

⁶⁸ ġekirato, “Keriso, ġoi tu peroveta tarimana, be nokira-varama, deikara na bebotamu?”

Petero na Iesu ekira-ġuniġauto

⁶⁹ Petero roġo numa maġuna nuġanai etanu-taġoto-ġoi, benamo ve-tuġunaġi ġuiatona ta ġia ġenai eiaġomato, ekirato, “Ġoi maki Iesu, Galilea tauna, ġesi orakaoto-ġoi, okavaiato-ġoi.”

⁷⁰ Senaġi Petero evekira-ġuniġauto mabarari ġoirari ai, ekirato, “Au asi ribagu ġoi kara okiraġiani.”

⁷¹ Benamo eraka-rosito, maġu ġatama bokana sevina ġana eiaġoto. Ma vetuġunaġi ġuiatona ta na eġitaiato, benamo sevina tarimari evaġa-guruġarito, ekirato, “Ġia maki Iesu, Nasareta tarimana, ekavaiato tarimana.”

⁷² Petero ma evekira-ġuniġauto, eguruġa-gwaġiġito, ekirato, “Au asi ribagu mani tarima.”

⁷³ Nega kotuna evanaġito nuġanai, monai ġeruġa-taġoto-ġoi tarimari Petero ġenai ġeiaġomato, ġevaġa-guruġaiato, ġekirato, “Moġoni, ġoi maki ġia ġesi tarimamu ta, korana garomu na evaġa-foforimuni.”

⁷⁴ Benamo Petero na ekirarito, “Asiġina ġinavaġi, akira-korikorimini, mani tarima au asi ribagu!”

Asikauna kokoroku egoġito.

⁷⁵ Benamo Petero na Iesu ġena guruġa etuġamaġi-doġariato, ekiraiato, “Kokoroku roġosi bene goġi nai, ġoi na au vaġa-toitoi bokira-ġuniġauguni.” Benamo eraka-rosito murikai, etaġi-rakava rakavato.

27

Iesu ġeġori-iaġoato Pilato ġenai

¹ Boġiboġi ekini-mama mamaiato-ġoi, Rubu Veaġa vereri baregori mabarari ema Iuda vereri ġeboioġa-vegogoto, Iesu beġene vaġia ġana.

² Seini na ġebarubaruato, ġeġori-iaġoato, Pilato, Roma gavana, ġimanai ġetore-kauato.

Iudas Isakariota emaseto

Apostolo 1:18-19

³ Iudas, reva tauna, na Iesu eġitaiato, vaġa-masena guruġana varau ġeveiato, benamo evetuġamaġi-kureto. Benamo silva moniri gabana toitoi (30) eġwa-ġenoġoirito Rubu Veaġa vereri barari e Iuda vereri ġeri ai.

⁴ Ekirato, “Au tu havei-rakava, korana asi ġena rakava tarimana barevaia, bemaseni.” Ġevaġa-veseto, ġekirato, “Mani tu dia ġai ġema nuġa-vekwarāġi, mani tu ġoi tauġemu ġemu ġauvei moġo.”

⁵ Iudas na silva moniri Rubu Veaġa nuġanai eflu-toġarito, eraka-veġitato. Benamo eiaġoto, tauġena ea veborato.

⁶ Benamo Rubu Veaġa vereri baregori na mo silva moniri ġeġabirito, ġekirato, “Mai tu rara voina monina, be boubou mauġanai asi veġata bita ġuraiani, taravatu.”

⁷ Ġeguruġa-iaġiato, ġevaġa-moġoniato murinai, mo moni ġeġabiato, ġuro eveini tarimana ġena tano ġevoiato, tanobara boru tarimari ġeri gara gabunai ġevaġa-iaġoato.

⁸ Moġesina nai mo tano arana ġevatoani “Rara Tanona” beiaġoma mo maitoma.

⁹ Monana Ieremia peroveta tarimana ġena guruġa ema moġonito, ekirato, “Mo silva moniri gabanana toitoi (30) ġeġabirito, mo tu Isaraela tarimari na ġevaġa-moġoniato voina misina, mo tau beġene voia ġana.

¹⁰ Ma mo moni na ġuro eveini tarimana ġena tano ġevoiato, Vereġauka ekirato ilailanai.”

Iesu Pilato ġoiranai

Mareko 15:2-5; Luka 23:3-5; Ioane 18:33-38

¹¹ Iesu Roma gavanana ġoiranai eruġato, ġia na edanaġiato, ekirato, “Ġoi tu Iuda tarimari ġeri kini ba?” Iesu evaġa-veseto, ekirato, “Oi, okiraġiani maniġa.”

12 Benamo Rubu Veāga vereri baregori ema Iuda vereri na Iesu gēgofaḡofa-iaḡiato, senaḡi guruḡa ta asi ekiraḡiato.

13 Moḡa lorinai Pilato na evaḡa-guruḡaiato, ekirato, “Ḡoi asi oseḡaḡini, iatamu ai tu meto ḡutuma ḡekiraḡirini?”

14 Senaḡi Iesu asi eḡoiaḡito, guruḡa sebona tai maki asi evaḡa-veserito. Monana gavana nuḡana efarevaḡi-rakavato.

Pilato na Iesu ḡena mase ekiraḡiato

Mareko 15:6-15; Luka 23:13-25; Ioane 18:38-19:16

15 Vanaḡivanaḡi Pasova verekona ḡaronai tu gavana na ḡia ḡeri dibura numai etanuni beḡe kiraḡiani tarimana ta etuḡu-rosiato-ḡoi.

16 Mo laḡani ai tarima rakava kwaikwaina ta dibura numai etanuto, arana tu Barabas.

17 Moḡa lorinai tarima ḡutuma ḡevegogoto nuḡanai, Pilato na edanaḡirito, ekirato, “Deikara ḡoura-viniani natuḡu-rošia: Barabas ba Iesu, ḡekiraḡiani Keriso?”

18 Korana Pilato ribana ginikau, Iuda tarimari baregori ḡeri mama dainai, Iesu ḡia ḡimanai ḡetoreato.

19 Pilato na Kota eḡorikauato-ḡoi nuḡanai, Pilato ḡaraḡona na ḡena keakau ta etuḡu-raḡasiato, ekirato, “Mani vei-iobukaiobuka tarimana ḡenai dagara ta asi bono veia, korana au tu boḡi ai banuvi, ḡegu nuvi ai midigumidigu baregona na beḡabigu ḡia dainai.”

20 Senaḡi Rubu Veāga vereri baregori ema Iuda vereri na vegogo tarimari nuḡari ḡeḡanirito, Pilato beḡene kiraia, Barabas bene tuḡu-rošia, a Iesu bene mase.

21 Senaḡi gavana na vegogo tarimari ma edanaḡirito, ekirato, “Ḡia tauri ruarua dei tu ḡomi ḡemi natuḡu-rošia?” Vegogo tarimari ḡefararato, ḡekirato, “Barabas!”

22 Benamo Pilato na edanaḡirito, ekirato, “O mai Iesu, ḡekiraḡiani Keriso, tu kamasi bana veia?” Ḡia mabarari ḡevaḡa-vese vegogoto, ḡekirato, “Novaḡa-satauroa!”

23 Senaḡi Pilato na ma edanaḡirito, ekirato, “Kara dainai? Kamara veiḡa rakavana eveiato nai?” Senaḡi mabarari ḡefarara-gigitarito, ḡekirato, “Novaḡa-satauroa!”

24 Pilato etuḡamaḡi-fakato, ḡia ḡena riba guruḡari tu asi beḡe ḡabi-raḡerini, ma tarimarima ḡia iatana na beḡe burini garina, benamo ḡia tu nanu eḡabito, ḡimana eḡuriḡiato mo tarimarima ḡutuma ḡoirari ai, ema maiḡesi ekirato: “Au tu asi ḡegu kerere mai vei-iobukaiobuka tarimana rarana ḡenai; mai tu ḡomi ḡemi ḡauvei moḡo!”

25 Vegogo tarimari mabarari ḡevaḡa-veseto, ḡekirato, “Mai tarima rarana o ḡena mase metona tu ḡai iatamai bene tanu ema ḡai natuma iatari ai.”

26 Benamo Pilato na Barabas etuḡu-rosiato ḡia ḡeri, a Iesu tu ḡekwaria etato vau soldia evinirito, beḡene vaḡa-satauroa ḡana.

Iesu ḡevaseva-vaseva iaḡiato

Mareko 15:16-20; Ioane 19:2-3

27 Benamo Pilato ḡena vetari tarimari na Iesu ḡeḡori-iaḡoato gavana ḡena numa nuḡanai, benamo karori mabarari ḡekea-vegogorito, bena ḡeruḡa-ḡeḡeraḡiato.

28 Ḡena dabuḡa ḡeruḡa-vaḡirito, dabuḡa kakakakana ḡevaḡa-veiato,

29 debana dagarana ġau ma giniginina na ġevatoato, korona noġa ġeveiato, benamo Iesu debanai ġetore-kauato. Oro ta maki ġimana aroribanai ġevaġa-ġabiato, benamo ġoiranai ġevetui-tarito, ġevaseva-vaseva iaġiato, ġekirato, “Iuda ġeri Kini o, ġaro namona!”

30 Benamo ġekanunu-kanunuato, mo oro ġeġabi-rariato, debana ġekwari-ġenoġoi ġenoġoiato-ġoi.

31 Ġevaseva-vaseva iaġi-ġosiato murinai, dabuġa kakakakana ġeġabi-vaġiato, ġena dabuġa korikorina ma ġevaġa-veiato. Benamo ġeġori-rociato, beġenea vaġa-satauroa ġana.

Iesu ġevaġa-satauroato

Mareko 15:21-32; Luka 23:26-43; Ioane 19:17-27

32 Ġeraka-rosito-ġoi nai, Kurene tarimana ta ġeġoitaġoato arana Simona. Vetari tarimari o soldia na ġelaunaġi-naġiato, Iesu ġena satauro neġwaia.

33 Benamo vanuġa na ġeraka-rosito, gabu tai ġeraġasito arana tu Golgota, anina tu ‘Deba Ġavana Gabuna’.

34 Monai vine nanuna midigu vaġa-keina muramurana arana gal ġesi ġebubu-vegogoato dagarana, Iesu ġeviniato; eiamuse-tovoato, senaġi asi eniuato.

35 Ġevaġa-satauroato murinai, ġena dabuġa ġia fakarai ai ġevarerito kasi ai.

36 Moġa murinai ġetanutanu-tarito, benamo ġenariato.

37 Ġia debana iatanai kara koranai ġevaġa-satauroato guruġana ġekafa-kauato, maiġesi ġetoreato, “MAI TU IESU, IUDA ĠERI VERE.”

38 Seġafore tarimari ruarua maki Iesu ġesi ġevaġa-sataurorito, ta aroribana rekenai, ma ta kaurina rekenai.

39 Ġeraka-vanaġito-ġoi tarimari debari ġekorakorarito-ġoi, guruġa rakavari Iesu ġeviniato-ġoi,

40 ġekirato-ġoi, “O ġoi okirato, Rubu Veaġa borovoani, ġaro toitoi nuġanai ma bovaġa-ruġa ġenoġoiani otato, tauġemu novevaġa-maġuri! Bema ġoi Barau Natuna, satauro tuġuna na noraka-riġo.”

41 Rubu Veaġa vereri baregori e taravatu ġevevaġa-riba iaġiato-ġoi, tarimari ema Iuda vereri na maki maiġesi ġevaseva-vaseva iaġiato-ġoi, ġekirato,

42 “Ġia na tarima boruri evaġa-maġuririto-ġoi, kamuto ġia tauġena tu asi evevaġa-maġurini! Bema ġia moġoni Isaraela tarimari ġeri vere nai, satauro na inimoġo neraka-riġo, be baġana vaġa-moġonia.

43 Ġia na Barau eġabidadama viniato-ġoi, be siġitaia, Barau na maki betuġamaġi-kauani, bevaġa-maġuriani ba? Evekiraġito-ġoi, ‘Au tu Barau Natuna, nene?’

44 Iesu ġesi ġevaġa-satauro vegogorito seġafore tarimari ruarua na maki moġesi ġeguruġa-rakava viniato.

Iesu ġena mase

Mareko 15:33-41; Luka 23:44-49; Ioane 19:28-30

45 Horaġauna 12 koloko ea ġabiato nai, tanobara mabarana mukuna na eġabi-ġauato, mukuna etanuto eiaġoto mo horaġauna 3 koloko.

46 Horaġauna 3 koloko rekenai Iesu eġabato, ekirato, “Eloi, eloi, lama sabaktani?” anina tu, “Au ġegu Barau, au ġegu Barau, kara dainai au boraga-kwanegu?”

47 Tarimarima tari monai ġeruġa-taġoto-ġoi nai, ġeseġaġiato, benamo ġekirato, “Ġia tu Elia ekeaiani.”

⁴⁸ Benamo ġeri tarima ta eraga-iaġoto, nanu erimaiani dagarana ta eġabiato, vine nanuna mamakina nuġanai eduġi-fereiato, gobu lefai egwanu-kauato, benamo eduġi-raġeato, Iesu na neniua ġana.

⁴⁹ Senaġi kotari ġekirato, “Sivaġa-noga roġo, siġitaia, Elia beiaġomani, bevaġa-maġuriani ba asiġina.”

⁵⁰ Iesu ma eġaba-fouto murinai emaseto.

⁵¹ Benamo mo negai moġo Rubu Veaġa nuġanai veaġa lelevaġi daiġutunai, kouġau dabuġana o ketin evedare-kikimato, eruaruato, tuġuna na mo gabigabina. Tano eiagaiagato, fore barari ġeġwa-kirarito.

⁵² Mase guriri ġevekeo-fakato, ma tarima ġutuma, Barau ġena ura ġeveirito-ġoi tarimari, mase na ma ġevaisiraġe-ġenoġoito,

⁵³ ġeri guri gaburi ġeiaġuirito. Iesu ġena variġisi-ġenoġoi murinai, Siti Veaġana ġana ġeiaġoto, monai tarimarima ġutuma ġoirari ai ġefoforito.

⁵⁴ Vetari verena ma ġena vetari tarimari ġesi, Iesu ġenariġauato-ġoi tarimari, na tano-iaga ema ġeġorato dagarari mabarari ġeġitarito nai, ġegari-rakavato, ġekirato, “Mai tarima tu moġoni Barau Natuna!”

⁵⁵ Vavine ġutuma maki monai, kotuna manaġai ġeruġato, ġemarere-to-ġoi. Moġeri vavine Iesu murinai ġerakato Galilea na eiaġoto mo Ierusalemna ġana, ema ġia vetuġu-naġina ġeiaġo-vinito-ġoi.

⁵⁶ Ġia fakari ai tu Maria, Magadala vavinena; Maria, Iakobo (o Iames) e Ioane sinari; ema Iakobo e Ioane Sebedaio sinari.

Iesu ġeguriato

Mareko 15:42-47; Luka 23:50-55; Ioane 19:38-42

⁵⁷ Mo lavilavi ai farefare ġutuma tarimana Arimatea vanuġa na eraġasito, arana tu Iosefa; ġia maki Iesu ġena mero ta.

⁵⁸ Ġia tu Pilato ġenai eiaġoto, benamo enoġiato, Iesu tauġanina bene ġabia etato. Benamo Pilato na ġena vetari tarimari ekirarito, Iesu tauġanina Iosefa beġene vinia.

⁵⁹ Moġa lorinai Iesu tauġanina eġabiato, dabuġa kurokurona namona na ekumuato,

⁶⁰ gara gabuna fore kouġanai ea tore-toġaiato. Mo gara tu fore gwaġiġinai kouġa ta ġekoroato, ġia tauġena ġena guri gabuna variġuna ta. Fore baregona na ġatama-boka ekure-ġauato, benamo eraga-kwaneato.

⁶¹ Maria, Magadala vavinena, ema Maria ta tu monai ġetanu-taġoto-ġoi, guri ġetanu-ġoiraiato.

Vetari tarimari na gara gabuna ġenari-ġauato

⁶² Vereko ġevei-toreani ġarona ekorito vau, Sabadi varau beġabia, Rubu Veaġa vereri baregori e Farisea tarimari Pilato ġenai ġeiaġoto,

⁶³ ġekirato, “Verebara, ġai ġatuġa-maġini, mo ġofaġofa tarimana roġo maġuri nai, ekirato, ‘Ġaro toitoi murinai au tu mase na ma bavariġisi-ġenoġoini.’”

⁶⁴ Moġa lorinai gadi tauri bono kirari, be guri gabuna beġene nariġinikaua, bene iaġo mo, ġaro toitoi murinai. Irau ġena mero beġe iaġoni, ma tauġanina beġe lemaiani, benamo tarimarima beġe ġofarini, beġe kirani, ‘Ġia tu mase na bevariġisi-ġenoġoi,’ beġe toni garina. Mai ġofaġofa maġa na ġofaġofa guinena bevanaġiani.”

⁶⁵ Pilato na ekirarito, ekirato, “Gadi tarimari ġoġabiri, ġeiaġo, be guri gabuna beġene ruġaġau-ġinikaua.”

⁶⁶ Benamo gara ġana ġeiaġoto, guri kouġana ekou-ġauato forena ġekada-ġauato, tabu vetoġana ta ġeveiato, benamo gadi tarimari ġetorerito, beġene riviġaua.

28

Iesu evariġisi-ġenoġoito Ioane 20:1-18

¹ Sabadi ekorito murinai, fura ġarona giniguenenai, boġiboġi iamoiamo, Maria, Magadala vavinena, Maria ta ġesi ġeiaġoto, gara gabuna ġea ġitaiato.

² Asikauna tu tano-iaga baregona eġorato, korana Vereġauka ġena aneru ta guba na emariġoto, fore ekure-veġitaiato, benamo iatanai etanukauto.

³ Ġia vetoġana tu noġa moġo kiriku ekimoreani kavana, ema ġena dabuġa tu kuro-ġaroġaro kaufa o snou noġa.

⁴ Guri gabuna ġeġitaġauto tarimari tu ġegari-rakavato nai ġeġoġo-ġoġorito, benamo tano ai ġeketo-tarito mase tarimari kavana.

⁵ Aneru na mo vavine evaġa-guruġarito, ekirato, “Asi ġogari, au ribagu ġomi tu Iesu, ġevaġa-satauroato tauna, ġovetauani.

⁶ Ġia mainai tu asiġina; ġia tu bevariġisi-ġenoġoi, evaġa-guruġamito ilailanai. Ġetoreato gabuna ġoma ġitaia.

⁷ Be ġoiāġo-ġariġari, ġena mero boġonoa kira-varari, boġono kira, ‘Iesu tu mase na bevariġisi-ġenoġoi, ema beġuineni Galilea ġana. Monai vau boġoa ġitaiani.’ Mai guruġa nakira-varami ġana baiāġoma.”

⁸ Benamo mo vavine na guri gabuna ġeragakwane-ġariġariato, ma gariri e ma verereri ġesi ġeragato ġena mero ġeri ai, mo aneru ġena guruġa ġea vaġa-ribari ġana.

⁹ Ġeragato-ġoi nai, asikauna Iesu tu ġia ġoirari ai eruġato, ekirato, “Maino ġomi ġesi bene tanu!” Benamo ġoiranai ġevetui-tarito, kwakuna ġeregorito, ġetoma-rakariġo viniato.

¹⁰ Iesu na evaġa-guruġarito, ekirato, “Asi ġogari, ġoiāġo, au tarikakagu ġoa kirari, Galilea ġana beġene iaġo; monai vau au beġene ġitagu.”

Guri gabuna ġenari-ġauato vetari tarimari ġeri ġofaġofa guruġana

¹¹ Vavine ruarua dabara na ġeiaġoto-ġoi nuġanai, tuari tarimari tari, guri gabuna ġenari-ġauato tarimari, ġeġenoġoito vanuġa barana ġana, karakara ġeġorato dagarari mabarari Rubu Veāġa vereri baregori ġekira-vararito.

¹² Benamo mo Rubu Veāġa vereri barari tu Iuda vereri ġesi ġeboioġa-vegogoto, gadi tarimari moni baregona ġevinirito.

¹³ Maiġesi ġekirarito, ġekirato, “Ġomi tu boġono kira, ‘Ġena mero boġi nuġanai beġe iaġoma, ġai tu genamai beġe lemaia.’

¹⁴ Bema mai vari gavana na beseġaġiani nai tu, ġai na ġia nuġana baġa vei-magomagoani, be ġomi veiġa rakavana ta asi bevei-vinimini.”

¹⁵ Gadi tarimari na moni ġeġabiato, ġevaġa-guruġarito ilailanai ġeguruġato. Mai vari tu Iuda tarimari fakari ai ġekiraġi-rakaorakaoato, ma maitoma maki roġo ġekiraġiani.

Iesu ġena mero ġeri ai efoforito

Mareko 16:14-18; Luka 24:36-49; Ioane 20:19-23

¹⁶ Ġena mero gabanana sebona (11) tu Galilea ġana ġeiaġoto, Iesu na ekiraġi-guineato ġorona ġana.

¹⁷ Monai ġeġitaiato nai, ġetoma-rakariġo viniato; senaġi tari tu ġedaradarato: ‘Mai tu moġoni Iesu ba?’

¹⁸ Benamo Iesu eraka-kavito, evaġa-guruġarito, ekirato, “Barau na seġuka mabarana gubai ema tanobarai au varau bevinigu.

¹⁹ Moḡa lorinai ḡoiāḡo tanobara mabarari ḡana, bese mabarari ḡegu mero ai boḡono vaḡa-iaḡori. Ema Tamana, Natuna, Iauka Veāḡa aranai boḡono babatisori.

²⁰ Boḡono vaḡa-ribari maki, avinimito vevaḡa-naḡiri mabarari beḡene korana-iaḡiri. Boḡono riba, au tu ḡaro mabarari ai ḡomi ḡesi bita tanuni, beiaḡoni mo, tanobara magona!”

VARI NAMONA MAREKO NA ETOREATO

Mareko vaġa-foforina guruġari

Mareko arana ta tu Ioane. Ġia tu dia mo Iesu ġena mero gabanana (12) vekaravari ai tarimana ta. Mai Vari Namona tu laġani 64 beiaġo 68 fakari ai ta etoreato, mo tu Iesu emaseto murinai. Mai fefa tu Roma siti ai Petero ġesi ġeġauvei-vegogoto nuġanai etoreato. Iesu ġekorana-iaġiato-ġoi tarimari Roma nuġanai ġetanuto-ġoi tarimari Iesu Varina Namona ekiravara-ginikaurito.

Mareko na ġia guruġana baregona ekira-vararito tu ekirarito, Iesu tu Barau ġena vetuġunaġi-iaġovinina tarimana namo vedaureana e ma ġena vetuġamaġikau (Mareko 10:45). Korana Iesu tu Barau ġena maoro baregona gaburenai eġauveito-ġoi ema ġena guruġa mabarari ekorana-iaġirito-ġoi. Moġeri tu Iesu na ġauvei e nuġa-farevaġi veġari eveirito-ġoi moġerina ġeri ai evaġa-foforirito ġeri.

Mareko ġena toretore tu maiġesina eboioġaiato:

1. Vetuġunaġi tarimana Iesu ġena iaġoma ema everovinato veġana - karoa 1:1-13
2. Vetuġunaġi tarimana ġena ġauvei - karoa 1:14-13:37
3. Vetuġunaġi tarimana ġena mase - karoa 14-15
4. Vetuġunaġi tarimana ġena variġisi-ġenoġoi ema guba vanuġana ġana ma evaraġeto - karoa 16

Ioane Babatise ġena ġobata

¹ Iesu Keriso Barau Natuna Varina Namona maiġesina evesinato.

² Peroveta tarimana arana Isaia na etoreato,

“Barau ekirato,

‘Au na ġegu vetuġunaġi tarimana tu batuġu-guineani, ġemu dabara vaġa-maġatana.’

³ Tarima ta tano fakanai ekeani, ekirani,

‘Vereġauka ġena dabara ġoiarevaia,

ġena iaġoma dabarana ġovaġa-maoromaoroa!’ ”

⁴ Moġa lorinai Ioane eiaġomato, tano fakanai tarimarima ebabatisorito-ġoi e eġobatato-ġoi, tarimarima ġeri rakava ġerina beġene vetuġamaġi-kure e beġene raka-kure, ema babatise beġene ġabia, Barau na ġeri rakava bene tuġamaġi-fitoġari ġana.

⁵ Tarimarima mabarari Iudea vanuġari na e Ierusalem na ġeiaġoto-ġoi Ioane ġenai. Ġeri rakava ġekiraġi-foforirito-ġoi vau, ebabatisorito-ġoi Ioridana ġarukanai.

⁶ Ioane ġena dabuġa tu kamela ġwiri na ġeveiato, ġena gabaġau tu nanigosi kefina, ġana ġaniġani dagarari tu madudu e gode nanuri moġo.

⁷ Eġobatato-ġoi, ekirato, “Tarima ta au murigu na beiaġomani, ġia ġena seġuka na au ġegu seġuka tu evanaġiani. Au maki asi ilaila ġia ġena tamaka varona baruġaiani.

⁸ Au na ġomi tu nanu na ababatisomini, a ġia na tu Iauka Veaġa na bebabatisomini.”

Ioane na Iesu ebabatisoato

Mataio 3:13-17; Luka 3:21-22

⁹ Mo negai Iesu tu Nasareta, Galilea vanuġana ta, na eiaġomato, benamo Ioane na Ioridana ġarukanai ebabatisoato.

¹⁰ Iesu nanu na eraka-raḡasito nuḡanai, guba eḡitaiato, evekeo-fakato, benamo Iauka Veaḡa pune kavana emariḡoto ḡia ḡenai.

¹¹ Benamo garo ta guba na ekea-riḡoto, ekirato, “Ḡoi tu au Natugu, aura-
vinimuni; ema ḡemu ai aiaku-rakavani maki.”

Satani na Iesu eribaḡaniato

Mataio 4:1-11; Luka 4:1-13

¹² Moḡa murinai Iauka Veaḡa na Iesu tano fakana ḡana etuḡu-iaḡoato.

¹³ Monai ḡaro e boḡi gabana vasivasi (40) etanuto, Satani na eriba ḡaniato-
ḡoi. Ḡia tu boḡa bairi ḡesi ḡetanuto-ḡoi, aneru na ḡenariato-ḡoi.

Iesu ḡena ḡauvei esinaiato Galileai

Mataio 4:12-17; Luka 4:14-15

¹⁴ Ioane ḡediburaiato murinai, Iesu Galilea ḡana eiaḡoto, Barau Varina
Namona ea ḡobata iaḡiato-ḡoi.

¹⁵ Eḡobatato, ekirato, “Barau ḡena ḡaro tu varau beraḡasi, ḡena Basileia
bevotu, (ḡena veḡitaḡau seḡukana evaḡa-ruḡaiani maiḡa)! Ḡemi rakava
ḡerina ḡovetuḡamaḡi-kure, Vari Namona nuḡami na ḡovaḡa-moḡonia!”

Iesu na tarima vasivasi (4) ekearito, ḡia murinai beḡene raka

Mataio 4:18-22; Luka 5:1-11

¹⁶ Iesu Galilea kou rikina na eraka-iaḡoto-ḡoi nuḡanai, Simona ma tarina
Anduru ḡesi eḡitarito, ḡeri reke kou ai ḡefuato, korana ḡia tu maina
tarimari.

¹⁷ Benamo Iesu na evaḡa-guruḡarito, ekirato, “Ḡoiḡoma, murigu ai ḡoma
raka, be au na tu tarimarima maina viniri bana vaḡa-ribami.”

¹⁸ Benamo maoromaoro ḡeri reke ḡeraga-kwanerito, Iesu murinai
ḡerakato.

¹⁹ Asi ḡeraka-manaḡato, benamo Iesu na Iakobo (o Iames) Sebedaio, tarina
Ioane ḡesi eḡitarito, ḡasi ai ḡeri reke ḡwadareri ḡeturirito-ḡoi;

²⁰ ekearito, benamo ḡia na tamari Sebedaio ma ḡena ḡauvei tarimari ḡesi
ḡasi ai ḡeraga-kwanerito, Iesu murinai ḡerakato.

Iauka rakavana na eboroḡiato tarimana

Luka 4:31-37

²¹ Geraka-iaḡoto, Kaperanaumai ḡevotuto. Monai Sabadi ai Iesu Iuda
tarimari ḡeri rubu ai eraka-toḡato, benamo evevaḡa-ribato.

²² Ḡia ḡena vevaḡa-riba guruḡari tarimarima na ḡeseḡaḡirito nai, ḡeḡaba-
rakavato, korana tu ḡena guruḡa ma seḡukana, dia taravatu ḡevevaḡa-riba
iaḡiato-ḡoi tarimari ḡeri guruḡa kavana.

²³ Mo rubu ai tarima ta tu iauka rakavana na eboroḡiato tarimana. Ḡia
ekeato, ekirato,

²⁴ “Iesu, Nasareta tarimamu o, kara ḡemai noveia otoni? Ḡoi tu ḡai vaḡa-
rakavama uranai boiaḡoma? Au ribagu ḡoi tu deikara, ḡoi tu Barau ḡena
Veaḡa Tarimamu!”

²⁵ Iesu na ekira-ḡoiato, “Gurumu! Ḡia ḡenana noraka-vaḡi!”

²⁶ Benamo iauka rakavana na mo tarima evaḡa-ḡoḡo-ḡoḡoato, benamo
ma ḡabana ḡesi eraka-vaḡito.

²⁷ Tarimarima mabarari ḡeḡaba-rakava rakavato, benamo tauḡeri
ḡevedanaḡi-vedanaḡito, ḡekirato, “Mai tu kara? Vevaḡa-riba variḡuna? Ḡia
tu ma seḡukana na iauka rakavari evaḡa-guruḡarini, ema garona maki
ḡeseḡaḡiani!”

28 Benamo Iesu varina asikauna eraga-rovorovoto Galilea vanuğari mabarari ai.

Iesu na keve tarimari vovoka evağa-namorito

Mataio 8:14-15; Luka 4:38-39

29 Rubu na ġeraka-rosito murinai, Iakobo (o Iames) ema Ioane ġesi ġeiağoto, Simona ema Anduru ġeri numai ġea rağekauto.

30 Simona ġena tağama vavinena tu ekeveto, tauğanina eseğukato, be egena-tağoto-ğoi, benamo Iesu ġekira-varaiato.

31 Iesu eiağoto ġenai, ġimanai eğabito, benamo evağa-tanu vaisiatio. Mo keve ekorito, benamo ġia eğuburito.

32 Lavilavi, ġaro eketoto murinai, tarimarima na keve tarimari e iauka rakavari na ġeboroğirito tarimari Iesu ġenai ġeğori-iağorito.

33 Vanuğa tarimari mabarari numa ġoiranai ġevevogoto.

34 Iesu na keve irauirau tarimari vovoka evağa-namorito e iauka rakavari ġutuma elai-vağirito. Iauka rakavari mururi ekourito asi beğene guruğa, korana ġia ribari Iesu.

Iesu Galilea vanuğari ai eğobatato

Luka 4:42-44

35 Boğiboği rekenai, roğosi bene lağani nai, Iesu evariğisito, tano fakana ġana eiağoto, ea ġuriğurito.

36 Benamo Simona ma karonna ġesi Iesu ġea vetauato,

37 ġea doğariato nai, ġekiraiato, ġekirato, “Tarimarima na tu ġoi ġevetaumuni!”

38 Iesu evağa-veseto, ekirato, “Vanuğa kavinağiri ġana si-iağo. Moğeri ai maki bana ġobata, au ġegu iağoma korana tu moğa.”

39 Benamo ġia eiağoto Galilea vanuğari mabarari ġana. Rubu ai eğobatato-ğoi e iauka rakavari elai vağirito-ğoi.

Lepera tarimana Iesu na evağa-namoato

Mataio 8:1-4; Luka 5:12-16

40 Lepera tarimana ta Iesu ġenai eiağoto, evetui-tarito, benamo enoğiato, ekirato, “Bema ġoi ourani nai, moğoni boiarevaguni, bovağa-namoguni riba.”

41 Iesu na evetuğaiato, ġimana etuğu-iağoato, eğabi-karaiato, benamo ekirato, “Aurani, be nonamo!”

42 Benamo vağa-sebo lepera na eraga-kwaneato, enamoto.

43 Iesu na evağa-guruğa gwağiğiato, ekirato,

44 “Mai veiğa tarima ta asi bono kira-varaia. Noiağo, Rubu Veğa verena na bene ġitamu, ema veiareva varevare dagarari Mose na ekirağiato ilailanai bono vinia. Be tarimarima beğene riba, ġoi tu bonamo.”

45 Senaği ġia tu eiağoto, mo veiğa varina efiuato. Moğesi nai Iesu tu vanuğa tai asi ma eraka-toğato, a tano fakari ai moğo etanuto-ğoi. Senağina tarimarima gabu irauirauri na Iesu tu roğo ġeiağo-viniato-ğoi.

2

Iesu na rakava etuğamaği-fitoğarito

1 Ġaro kotari ġevanağito vau, Iesu Kaperanauma ġana eğenoğito. Tari-marima na varina ġeseğağiato Iesu tu numai.

2 Moğa lorinai tarimarima ġutuma ġeğaru-vegogoto, numa nuğana ġevağa-vonuato, eiağoto ġatama-boka korana maki asi faka ta. Monai vau Iesu na Vari Namona eğobata-vinirito,

³ nuḡanai tarima vasivasi (4) na tauḡanina tavi ta emaseto tarimana ta Iesu ḡenai ḡeḡwa-iaḡoato.

⁴ Tarimarima ḡutuma nai, asi ḡeri dabara Iesu sevina ḡana beḡe raka-kavi iaḡoni. Naima ḡia na Iesu eruḡato iatana ḡuduḡuna ḡeḡiu-vaḡiato vau, keve rakava tarimana ma gedana ḡesi ḡetuḡu-riḡoato Iesu ḡoirana ḡana.

⁵ Iesu na ḡeri veḡabidadama eḡitaiato nai, ḡia na keve rakava tarimana evaḡa-guruḡaiato, ekirato, “Natugu, ḡemu rakava batuḡamaḡi-fitoḡari.”

⁶ Taravatu ḡevevaḡa-riba iaḡiato-ḡoi tarimari kotari monai tanutaḡori ai, nuḡari ai maiḡesi ḡetuḡamaḡito,

⁷ “Karase nai mai tarima moḡesina ekirani? ḡia na Barau ekira-fitoḡaiani. Dei na rakava betuḡamaḡi-fitoḡarini? Barau moḡo ḡereḡana!”

⁸ Iesu ma ribana ḡia kara ḡetuḡamaḡirito-ḡoi nai edanaḡirito, ekirato, “Karase nai maniḡesi ḡotuḡamaḡini?”

⁹ Aiḡesina baguruḡani tu meraḡa, keve rakava tarimana bavaḡa-guruḡaia, bakira, ‘Ḗemu rakava batuḡamaḡi-fitoḡari’ banasi, ba bara kiraia, ‘Noruḡa-vaishi, ḡemu geda noḡabia, be noraka’ barasi?

¹⁰ Au na navaḡa-ḡitami, Tarimarima Natuna tu ma ḡena maoro, rakava betuḡa-maḡi-fitoḡarini mai tanobarai.” Ḗia na keve rakava tarimana evaḡa-guruḡaiato, ekirato,

¹¹ “Akiramuni, noruḡa-vaishi, ḡemu geda noḡabia, be numa ḡana noiaḡo!”

¹² Maoromaoro eruḡa-vaishito, ḡena geda eḡabiato, tarimarima ḡoirari ai eraka-rosito. Moḡa lorinai mabarari ḡeḡaba-rakava rakavato, Barau ḡevaḡa-raḡeato, ḡekirato, “Maiḡesina kavana ta roḡosi tara ḡitaia.”

Iesu takesi gogo tarimari ḡesi ḡeḡaniḡani-vegogoto

Mataio 9:9-13; Luka 5:27-32

¹³ Iesu ma eiaḡoto kou rikinai. Tarimarima ḡutuma ḡia ḡenai ḡeiaḡoto, benamo ḡia na evaḡa-ribarito.

¹⁴ Iesu eraka-iaḡoto-ḡoi nuḡanai, ḡia na Alfeo natuna arana Levi takesi moniri ḡeḡabito-ḡoi numanai tanutaḡo eḡitaiato, benamo ekiraiato, ekirato, “Murigu ai noma raka.” Benamo Levi evariḡisito, Iesu murinai erakato.

¹⁵ Iesu Levi ḡena numai eḡani-ḡanito-ḡoi nai, takesi gogo tarimari e vei-rakava tarimari ḡutuma maki Iesu ma ḡena mero ḡesi ḡeḡaniḡani-vegogoto, korana tarimarima vovoka ḡia murinai ḡerakato-ḡoi.

¹⁶ Taravatu ḡevevaḡa-riba iaḡiato-ḡoi tarimari, Farisea ḡeri doḡoro tarimari, na Iesu ḡeḡitaiato, takesi gogo tarimari e vei-rakava tarimari ḡesi ḡeḡaniḡani-vegogoto-ḡoi, benamo ḡia na Iesu ḡena mero ḡedanaḡirito, ḡekirato, “Ḗia tu karase nai takesi gogo e vei-rakava tarimari ḡesi ḡeḡaniḡani-vegogoni?”

¹⁷ Iesu eseḡaḡito, benamo evaḡa-guruḡarito, ekirato, “Namo tarimari na doketa asi beḡe vetaurini, senaḡina keve tarimari na moḡo. Au aiaḡomato maki dia vei-iobukaiobuka tarimari keakeari, senaḡi vei-rakava tarimari.”

Ḗaniveaḡa

Mataio 9:14-17; Luka 5:33-39

¹⁸ Ḗaro ta Ioane Babatiso ḡena mero e Farisea tarimari ḡeḡani-veaḡato-ḡoi nai, tarima kotari Iesu ḡenai ḡeiaḡoto, benamo ḡedanaḡiato, ḡekirato, “Kara dainai Ioane Babatiso ḡena mero e Farisea tarimari ḡeri mero tu ḡeḡani-veaḡani, senaḡi ḡoi ḡemu mero tu asiḡi?”

¹⁹ Iesu na evaḡa-veserito, ekirato, “Ḗomi ḡotuḡamaḡini, veḡaraḡo variḡu tauna ḡatana seviri ai etanuni nuḡanai beḡe ḡani-veaḡani ba? Asiḡina! Veḡaraḡo variḡu tauna ḡatana seviri ai neganai, asi beḡe ḡani-veaḡani.

²⁰ Ĝarona eiaĝomani veĝaraĝo tauna ĝatana ĝerina beĝe ĝabi-veĝitaiani, monai vau beĝe ĝani-veaĝani.

²¹ Tarima ta na dabuĝa variĝuna veseana dabuĝa guinena ĝesi asi bebani-vegogoani. Bema moĝesina beveiani nai, dabuĝa variĝuna na guinena bedareani, ema vedarena maki bebaregoni.

²² Tarima ta na vine nanuna variĝuna nanigosi kefina guinenai asi besisiani. Bema moĝesina beveiani nai, vine nanuna variĝuna na nanigosi kefina guinena bevei-fakaiani. Vine nanuna e kefi beĝe rakavani. Senaĝi vine nanuna variĝuna nanigosi kefina variĝunai besisiani tu namo.”

*Iesu tu Sabadi Verena
Mataio 12:1-8; Luka 6:1-5*

²³ Sabadi tai Iesu ma ĝena mero ĝesi widi vamokari na ĝeraka-vanaĝito-ĝoi nai, ĝena mero tu rakarakari ai widi ĝebukito-ĝoi.

²⁴ Farisea tarimari na Iesu ĝekiraiato, ĝekirato, “Noĝitari, ĝia kara ĝeveini! Maniĝesi asi beĝene vei Sabadi ai, taravatu.”

²⁵ Iesu na evaĝa-veserito, ekirato, “Davida na kara eveiato guruĝari ĝoiaviato ba asiĝina, ĝia ma karona ĝesi ĝevitorito nai?”

²⁶ Barau ĝena numai eraka-toĝato, Barau ĝoiranai ĝetorerito-ĝoi beredi eĝabito, eĝanito, karona maki evinirito. Mo beredi tu veaĝa veĝata, Rubu Veaĝa vereri ĝereĝari moĝo ĝari. Mo veiĝa tu Abiata Rubu Veaĝa verena baregona ĝena negai eĝorato.”

²⁷ Benamo Iesu na ma ekirarito, ekirato, “Barau na Sabadi eveiato tu tarimarima ĝeri, dia tarimarima eveirito Sabadi ĝena.

²⁸ Moĝesi nai Tarimarima Natuna tu Sabadi Verena.”

3

Ĝima boso tarimana

¹ Ĝaro tai Iesu rubu ai ma eraka-toĝato. Ĝima boso tarimana ta tu monai.

² Tarima kotari maki monai, Iesu ĝeĝita-taĝoato-ĝoi, Sabadi ai mo tarima bevaĝa-namoani ba, beĝene ĝita-kaua, be beĝene vaĝa-bade-iaĝia ĝetato-ĝoi nai.

³ Iesu na ĝima boso tarimana evaĝa-guruĝaiato, ekirato, “Noruĝa-vaisi, tarima mabarari ĝoirari ai noma ruĝa.”

⁴ Benamo Iesu na edanaĝirito, ekirato, “Aiĝa tu maoro, Sabadi ai veiĝa namori veiveiri namo ba veiĝa rakavari sini veiri? Tana vevaĝa-maĝuri ba tana vaĝivaĝi?”

Senaĝi ĝia asi ĝeguruĝato.

⁵ Iesu ma baruna e ma nuĝa-metona ĝesi eĝita-ĝeĝeraĝirito, korana tarimarima ĝenuĝa-bubuto nai. Benamo ĝima boso tarimana ekiraiato, ekirato, “Ĝimamu notuĝu-roroĝotoa.” Ĝimana etuĝu-roroĝotoato, benamo enamoto.

⁶ Moĝa murinai Farisea tarimari rubu na ĝeraka-rosito, Heroda murinai ĝerakato-ĝoi tarimari ĝesi ĝeboioĝa-vegogoto, Iesu kamasi beĝe vaĝiani dabarana ĝevetauato.

*Tarimarima ĝutuma Galilea kouna rikinai
Luka 6:17-19*

⁷ Iesu ma ĝena mero ĝesi ĝeraka-veĝitato, Galilea kouna ĝana ĝeiaĝoto. Tarimarima ĝutuma lelevaĝi Galilea na ĝia murina na ĝeiaĝoto, ema vovoka lelevaĝi maki Iudea na,

⁸ Ierusalemna na, Idumea na, Ioridana ĝaruka mo reke na, Taia e Sidono rekeri na ĝeiaĝoto, korana Iesu varina ĝeseĝaĝiato nai.

⁹ Tarimarima ġutuma nai, Iesu na ġena mero ekirarito, ġasi misina ta beġene ġabi-torea, tarimarima ġutuma be beġe ruġaruġa-ġauani garina.

¹⁰ Iesu na keve tarimari ġutuma evaġa-namorito dainai, keve tarimari mabarari maki ġeġoto-iaġoto, Iesu ġenai beġene veġabi-kau ġana.

¹¹ Iauka rakavari na ġeboroġirito tarimari na ġia ġeġitaiato tu, ġoiranai ġeketo-tarito, ġekoġoto, ġekirato, “Ġoi tu Barau Natuna!”

¹² Iesu na evaġa-guruġa gwaġiġirito, asi beġene vaġa-foforia ġia tu deikara.

Iesu na tarima gabanana ruarua (12) eġabi-viriġirito

Mataio 10:1-4; Luka 6:12-16

¹³ Moġa murinai Iesu ġoro ġana evaraġeto, benamo eura-vinirito tauri ea kearito, benamo ġia ġenai ġeiaġoto.

¹⁴ Iesu na tarima gabanana ruarua (12) eġabi-viriġirito, arari apostolo evatorito, ġia beġene kavaia. Benamo ma bene tuġuri, beġene ġobata,

¹⁵ ema seġuka beġene ġabi, iauka rakavari beġene lai-vaġiri.

¹⁶ Eġabi-viriġirito tarimari tu maiġeri: Simona, arana variġuna evatoato Petero;

¹⁷ Iakobo (o Iames), Sebedaio natuna, ma tarina Ioane ġesi, arari variġuna evatoato, Boanere, anina tu guba eguruani natuna;

¹⁸ Anduru; Filipino; Batolomeo; Mataio; Tomasi; Iakobo (o Iames), Alfeo natuna; Tadeo; Simona, Selote tarimana;

¹⁹ ema Iudas Isakariota, ġia tu Iesu berevaiani tarimana.

Iesu ema Belsebul

Mataio 12:24-32; Luka 11:14-23; 12:10

²⁰ Iesu tu numai ma eraġekauto. Tarimarima ġutuma lelevaġi ma ġevegogo-ġenoġoito nai, ġia ma ġena mero ġesi asi ġeri ġaniġani dabarana.

²¹ Iesu garagarana na varina ġeseġaġiato, benamo ġabiġoina ġeiaġoto, korana tarimarima ġekirato, “Ġia tu bebabo!” ġetato nai.

²² Taravatu ġevevaġa-riba iaġiato-ġoi tarimari Ierusalemna na ġemariġoto, ġekirato, “Belsebul, (mai tu Satani), iauka rakavari ġeri vere, na ġia eboroġiato nai, iauka rakavari elai-vaġirini.”

²³ Benamo Iesu na ekea-iaġoma-rito, barabore ai evaġa-guruġarito, eki-rato, “Satani na Satani kamasi belai-veġitaiani?”

²⁴ Bema gavamani ta bevetavini, tauġena bevevaġi-vinini nai, mo gava-mani asi beruġani riba.

²⁵ Bema doġoro ta bevetavini, tauġena bevevaġi-vinini, mo doġoro maki asi beruġani riba.

²⁶ Bema Satani bevetavini, tauġena bevevaġi-vinini, ġia asi beruġani, senaġi bekorini.

²⁷ Tarima ta na gwada tarimana ġena numai asi beraka-toġani riba, ġena farefare asi beverariani riba, senaġi mo gwada tarimana bebarubarugineani vau, ġena numa farefareri beverariani.

²⁸ Moġoni akiramini, tarimarima rakava beġe veini ema Barau beġe kira-fitogaiani tarimari ġeri rakava mabarari Barau na betuġamaġi-fitogaiani riba.

²⁹ Senaġi tarima ta na Iauka Veġa bekira-fitogaiani tarimana, ġena rakava asi betuġamaġi-fitogaiani, mo rakava tu betanu-vanaġi vanaġini.”

³⁰ Iesu moġesi ekirato, korana tarima kota ġekirato, “Ġia tu iauka rakavana ġia nuġanai” ġetato nai.

Iesu sinana ema tarina

Mataio 12:46-50; Luka 8:19-21

³¹ Benamo Iesu sinana ma tarina ġeraġasito. Numa murikanai ġeruġa-tarito, ġevetuġuto, Iesu ġea kiraia, ġema vaġa-guruġaia ġana.

³² Ġia tu tarimarima ġutuma na ġetanu-ġeġeraġiato, benamo ġekiraiato, ġekirato, “Ġoi sinamu e tarimu tu murikai, ġoi ġevetaumuni.”

³³ Iesu na evaġa-veserito, ekirato, “Au sinagu e au tarigu tu deiri?”

³⁴ Benamo ġetanu-ġeġeraġiato tarimari eġitarito, ekirato, “Au sinagu e au tarigu tu maiġeri!”

³⁵ Barau ġena ura ġeveirini tarimari tu au tarigu, e au tobagu, ema au sinagu.”

4

Barabore - Iaraġa tarimana na widi ġueri efiurito

¹ Iesu ma ea vevaġa-riba ġenoġoito Galilea kouna rikinai. Tarimarima ġutuma lelevaġi na ma ġea vegogo-ġeġeraġiato nai, ġasi ai ma eraġekauto, benamo etanu-tarito. Gasi kota ġelei-veġitato, a tarimarima tu kou rikina na moġo ġevegogo-iaġoto.

² Iesu na dagara vovoka evaġa-ribarito barabore ai. Ġia ġena vevaġa-riba nuġanai ekirato,

³ “Ġoseġaġi! Iaraġa tarimana ta eiaġoto, ġena widi ġueri benea fiuri ġana.

⁴ Efiurito-ġoi nai, kota tu dabarai ġeketoto. Benamo manu ġeiaġomato, ġeġanirito.

⁵ Kotari tu forefore gaburi ai ġeketokauto tano maġiġiri ai. Asikauna ġetubu-raġeto, korana tano iatanai moġo.

⁶ Benamo ġaro eraġekauto nai, ġia ġemaġuġuto, korana lamuri asi ġevariġo-ġitakauto lorinai, asikauna ġemaseto.

⁷ Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġetubu-baregato, varovaro dagarari ġetubu-ġaurito e ġetuturarito nai, asi ġeġwato.

⁸ Kotari tu tano namonai ġeketoto, benamo ġetubu-ġinikauto, ġegara-baregato, ġeġwato kotari ġwari tu gabana toitoi (30), kotari tu gabana imaima ma gabanana (60), kotari tu sinau sebona (100).”

⁹ Benamo Iesu ekirato, “Ma seġana tarimana bene seġaġi!”

Kara dainai Iesu na barabore ekiraġirito

Mataio 13:10-17; Luka 8:9-10

¹⁰ Iesu ġereġana moġo ġaronai, ġena mero gabanana ruarua (12) ma ġia murinai ġerakato-ġoi tarimari kotari tu ġia sevinai ruġa-ġeġeraġi, benamo mo barabore anina ġevedanaġi-iaġiato.

¹¹ Iesu na evaġa-guruġarito, ekirato, “Barau ġena Basileia guruġari vekuretoġari ġomi ġemi ai tu fofori, senaġi murika tarimari tu barabore ai avaġa-guruġarini, korana tu,

¹² ‘beġene ġitaia,

senāġi anina asi beġene ribaia,

beġene seġaġia,

senāġi asi beġene tuġamaġi-maoroa,

beġe vetuġamaġi-kureni Barau ġenai,

benamo ġeri rakava betuġamaġi-fitoġarini garina.’ ”

Widi ġueri baraborena anina

Mataio 13:18-23; Luka 8:11-15

¹³ Benamo Iesu na ma evaġa-guruġarito, ekirato, “Mai barabore anina asi ġoribaiani nai, barabore tari tu kamasi boġo ribarini?”

14 Iaraḡa tarimana na Barau ḡena guruḡa efiuani.

15 Tarima kotari tu widi ḡueri dabarai ḡeketoni kavana. Guruḡa ḡeseḡaḡini nai, Satani na eḡabivaḡi-ḡariḡaririni.

16 Tarima kotari tu widi ḡueri forefore ai ḡeketoni kavana. Guruḡa ḡeseḡaḡini nai, ma iakuri ḡesi ḡeḡabi-raḡeani.

17 Senaḡi guruḡa tarima nuḡari ai asi ḡevetoreni nai, asi ḡetanu-maukani. Barau ḡena guruḡa dainai, nega rakavari ḡeḡoitaḡoni, e ḡevanerini, o ḡevaḡa-midigu midigurini ḡarori ai ḡia ḡenana ḡeraka-veḡitani.

18 Tarima kotari tu widi ḡueri ḡauḡa ḡiniḡiniri nuḡari ai ḡefiurini kavana. Barau ḡena guruḡa ḡeseḡaḡiani,

19 senaḡi tanobara dagarari tuḡamaḡiri na, tanobara farefareri ḡetuḡamaḡi-gogogorini, ema ḡeri ura dagarari kotari na Barau ḡena guruḡa ḡelautariani, naima Barau ḡena guruḡa ḡia ḡeri ai asi ḡwaḡwari.

20 Tarima kotari tu widi ḡueri tano namonai ḡefiurini kavana. Guruḡa ḡeseḡaḡiani, ḡeḡabi-raḡeani, tauri ḡevetoreni kotari tu gabana toitoi (30), kotari tu gabana imaima ma gabanana (60), kotari tu sinau sebona (100).”

Lamefa betore-kauani

Luka 8:16-18

21 Iesu na ma evaḡa-guruḡarito, ekirato, “Tarima ta lamefa begabuani nai, ḡuro na beḡoḡoi-tariani o fata gaburenai betoreani? Asigina, toretorena fatanai betore-kauani.

22 Vekuretoḡa dagarari mabarari beḡe foforini, ḡeseḡo-ḡaurito dagarari mabarari beḡe ḡabi-fakarini.

23 Ma seḡana tarimana bene seḡaḡi!”

24 Iesu na ma ekirarito, ekirato, “Boḡo seḡaḡirini guruḡari boḡono tuḡamaḡi-ginikauri. Ḡemi seḡaḡi ilailari ai Barau na riba e tuḡamaḡi-faka bevinimini. Tuḡamaḡi-faka kotari ma betore-kaurini.

25 Ma ḡena seḡaḡi tarimana tu tuḡamaḡi-faka beviniani, asi ḡena seḡaḡi tarimana, ḡena tuḡamaḡi-faka misina maki beḡabi-vaḡiani.”

Barabore - Widi ḡueri tauḡeri ḡetubuni

26 Iesu ma ekirato, “Barau ḡena Basileia tu noḡa moḡo tarima ta, widi ḡueri tano ai efiurini kavana.

27 Ḡia tu boḡi ai egenani, laḡani ai evariḡisini nuḡanai, mo widi ḡueri ḡetubuni, ḡegarani, senaḡina ḡia tu asi ribana kamasi ḡegarani.

28 Tano tauḡena na tauna evaḡa-ḡorai. Guine tu gwabena etoreani, gabivau fekana, moḡa murinai tauna etoreani feka nuḡanai.

29 Tauna bekirini nai, bebasiani, korana basibasi ḡarona bevotu.”

Barabore - Mastadi ḡauna ḡutuna

Mataio 13:31-32; Luka 13:18-19

30 Iesu evedanaḡito, ekirato, “Barau ḡena Basileia tu kara ḡesi bita vaḡa-ilailai? Kamara barabore na bevaḡa-foforiani?

31 Ḡia tu mastadi ḡauna ḡutuna ta noḡa, tanobarai varovaro dagarari ḡueri mabarari fakari ai ḡia ḡereḡana misina korokoro, tano ai ḡevaroani.

32 Senaḡi tano ai ḡevaroani nai, egara-varaḡeni, varovaro dagarari mabarari fakari ai ḡia moḡo barego vedaurea. Ḡia legana maki baregori ḡetubuni. Monai rovo manuri ḡia legana iauḡanai ḡenuḡini.”

33 Moḡesina kavana baraboreri asisebo ai Iesu na Barau ḡena guruḡa eḡobata-vinirito-ḡoi, ḡia ḡeri riba e tuḡamaḡi-faka ilailari ai.

34 Ḡena ḡobatai barabore asi eraga-kwanerito-ḡoi, senaḡi ḡena mero moḡo ḡereḡari ai vau, guruḡa aniri mabarari evaḡa-foforirito-ḡoi.

Iesu na iavara e geta o ureure ekira-ḡoirito

Mataio 8:23-27; Luka 8:22-25

³⁵ Mo lavilavi ai Iesu na ḡena mero ekirarito, ekirato, “Siveḡasi-vanaḡi, kou mo rekena ḡana.”

³⁶ Benamo mo tarimarima ḡutuma ḡeraga-kwanerito, ḡena mero na ḡekavaiato Iesu etanu-taḡoto-ḡoi ḡasinai, benamo ḡeḡura-rakaiato. Ḳasi kotari maki ḡia ḡesi.

³⁷ Iavara asi keikeina ta eraḡasito e ureure barego maki ḡasi ai evebubu-ḡurato-ḡoi, ḡasi maki dori evonuto-ḡoi.

³⁸ Iesu tu ḡasi gabinau fila iatanai egenato-ḡoi. Ḳena mero na ḡevaḡoato, ḡekirato, “Vevaḡa-riba tarimamu o, ḡoi tu asi ogarini? Ḳita tu mai taburuni!”

³⁹ Benamo Iesu evariḡisito, iavara ekira-ḡoiato e ureure ekiraiato, “Nodoko, asi noḡareva.” Benamo iavara edokoto e emeḡomeḡo-tarito, asi eḡareva-ḡarevato.

⁴⁰ Iesu na ḡena mero ekirarito, ekirato, “Karase nai ḡogarini? Ḳomi tu roḡo asi ḡemi veḡabidadama?”

⁴¹ Ḳia ḡegari-rakava rakavato, benamo tauḡeri ḡevedanaḡi-vedanaḡito, ḡekirato, “Mai tu kamara tarima? Iavara e ureure na maki garona ḡeseḡaḡiani!”

5

Iesu na iauka rakavari na ḡeboroḡiato tarimana evaḡa-namoato

¹ Kou tavi tai ḡea vanaḡito Gerasa (o Gadara) tarimari ḡeri gabu ai.

² Iesu ḡasi na eraka-rigoto-ḡoi nai, iauka rakavana na ebororoḡiato tarimana ta gara gabuna na eiaḡomato-ḡoi Iesu ḡenai.

³ Ḳia tu gara kouḡari ai etanuto-ḡoi. Tarimarima ḡia barutarinai ḡeferauto, seini maki ḡia ḡenai asi gwaḡiḡi.

⁴ Nega ḡutuma kwakuna e ḡimana seini na ḡebarurito-ḡoi, senaḡi seini edabu-ḡuturito-ḡoi, ema kwakunai auri dagarari maki elau-kirarito-ḡoi. Ḳia tu gwada rakava, tarima ta na maki asi bevaḡa-maranaiani riba.

⁵ Boḡi e laḡani ai ḡia tu garai e ḡoro tuḡuri ai ekoḡoto-ḡoi ema tauḡena maki fore na everamato-ḡoi.

⁶ Ḳia na Iesu manaḡai eḡitaiato, eraga-iaḡoto, ḡoiranai eketo-tarito,

⁷ ekoḡoto edueto, ekirato, “Iesu o, Iaru-korokoro Barauna Natuna, kara au ḡegu ai noveia otoni? Barau aranai anoḡimuni, asi bono vaḡa-midigu midigugu.”

⁸ Ḳia moḡesi ekirato, korana Iesu na evaḡa-guruḡaiato, ekirato, “Iauka rakavamu, mani tarima ḡenana noraka-vaḡi!”

⁹ Benamo Iesu na edanaḡiato, ekirato, “Ḳoi aramu tu deikara?” Ḳia evaḡa-veseto, ekirato, “Au aragu tu ‘Vetari Tarimari Ḳutuma,’ korana ḡai tu voyoka.”

¹⁰ Ḳia na Iesu enoḡi-ḡiḡiraḡeato, mo gabu na asi bene lai-rosiri.

¹¹ Monai bai serina ḡoro gabakanai ḡedokadokato-ḡoi.

¹² Moḡesina nai iauka rakavari na Iesu ḡenoḡiato, ḡekirato, “Notuḡuma bai ḡeri ai, ḡia nuḡari ai ḡaraka-toḡa.”

¹³ Iesu na etuḡu-iaḡorito. Benamo iauka rakavari mo tarima ḡenana ḡeraka-vaḡito, bai nuḡari ai ḡeraka-toḡato. Benamo lalaḡa na ḡekokosi-firiḡoto, kou ai ḡevebora-ḡuḡututo. Mo bai serina nuḡanai bai mabarari 2,000 kavana.

14 Bai ġitaġauri tarimari ġeragato, mo vari ġea fiuato vanuġa barana nuġanai e vanuġa keiri ai. Tarimarima ġeraka-rosito, ġeiaġoto mo kara eġorato dagarana ġitaġitana.

15 Iesu ġenai ġeragasio nai, ġia na mo tarima iauka rakavari vovoka na ġeboroġiato tarimana ġeġitaiato, ma dabuġana e ġena tuġamaġi maki maoro etanu-taġoto-ġoi, benamo ġia mabarari ġegarito.

16 Mo veiġa ġeġorato, ġeġitarito tarimari na iauka rakavari na ġeboroġiato tarimana varina, ema bai variri, tarimarima ġekira-vararito.

17 Benamo ġia na Iesu ġenoġiato, ġeri tano na bene raka-veġita.

18 Iesu ġasi ai eraġekauto-ġoi nai, iauka rakavari ġenana ġeraka-vaġito tarimana na enoġiato, Iesu ġesi bene iaġo etato.

19 Senaġi Iesu na ekiraiato, ekirato, “Noġenoġoi numa ġana e ġemu numa tarimari ġeri ai. Benamo bonoa kira-varari, Barau na ġemu ai kara beveia ema ġena vevetuġaġwa ġemu ai beġora dagarana.”

20 Benamo ġia eiaġoto Vanuġa Gabanana (10) tanori ai, ea vevari-fiuto, kara Iesu na ġia ġenai eveiato. Benamo tarimarima mabarari ġeġaba-rakavato.

Iesu na kekeni ta ema vavine ta evaġa-namorito

Mataio 9:18-26; Luka 8:40-56

21 Iesu ġasi na ma eġenoġoito kou tavi ta ġana maia. Mo kou rikinai tarimarima ġutuma lelevaġi na ma ġea ġaru-ġeġeraġiato.

22 Rubu ġitaġauna tarimana ta arana Iairo eiaġoto, Iesu eġitaiato nai, kwakuna koranai evetui-tarito,

23 ma nuġana mabarana ġesi enoġiato, ekirato, “Au natugu kekenina bekeve-rakava, dori emaseni. Mani ġemu veiġa, noiaġoma, ġimamu iatanai bono tore-kaua, be natugu bene namo!”

24 Benamo Iesu ġia ġesi ġeiaġoto-ġoi nai, tarimarima ġutuma lelevaġi maki ġeġotokauto, ġia na ġeraka-vebibi vebibiato-ġoi.

25 Monai vavine ta, ġena keve tu rara kevena, laġani gabanana ruarua (12) ekeve-iaġiato.

26 Doketa vovoka na muramura ġeviniato-ġoi, senaġi asi enamoto-ġoi. Ġena moni mabarari evaġa-koririto, nenamo ġana, senaġi asi enamoto-ġoi, ġena keve moġo emeto-iaġoto-ġoi.

27 Ġia na Iesu varina eseġaġiato naima eiaġomato, tarimarima ġutuma nuġari na eraka-rokarokato mo Iesu murinai ea raġasito, benamo ġena dabuġai eveġabikauto.

28 Korana tu ġia evetuġamaġito, “Ġena dabuġai moġo haveġabikauni nai banamoni.”

29 Benamo rara kevena edokoto, tauġaninai emami-raġiato ġena keve varau ekorito.

30 Mo negai Iesu eribato, ġia ġenana seġuka eraka-vaġito. Benamo tarimarima ġutuma nuġari na eruġa-kureto, evedanaġito, ekirato, “Deikara na au ġegu dabuġa beġabi-karaia?”

31 Ġena mero ġevaġa-veseto, ġekirato, “Noboġeboġe, mai tarimarima tu ġutuma na ġebebesi-karamuni, kamasi tu ma ovedanaġini, okirani, ‘Deikara na beġabi-karagu?’ ”

32 Senaġi Iesu tu roġo eboġeboġeto-ġoi, eġabi-karaiato tarimana eġita-vetauato-ġoi.

33 Mo vavine eriba-maoroto kara ġenai eġorato, benamo ma garina e ma ġoġo-ġoġona ġesi Iesu kwakuna koranai ea vetui-tarito, benamo kara eġorato mabarana ekiraġi-foforirito.

³⁴ Iesu na mo vavine evaḡa-guruḡaiato, ekirato, “Natugu, ḡemu veḡabidadama na bevaḡa-namomu. Be, ma iakumu ḡesi noiaḡo, ḡemu keve bekori-moḡovaḡi.”

³⁵ Iesu roḡo eguruḡato-ḡoi nuḡanai, rubu ḡitaḡauna tauna Iairo ḡena numa na tarima kotari ḡeiaḡomato, Iairo ḡekiraiato, ḡekirato, “Natumu tu bemase. Vevaḡa-riba tarimana asi novaḡa-vekwarāḡia.”

³⁶ Iesu na mo guruḡa tu eseḡaḡi-ḡuirāḡiato moḡo, benamo rubu ḡitaḡauna tarimana evaḡa-guruḡaiato, ekirato, “Asi bono gari, bono veḡabidadama moḡo.”

³⁷ Benamo Iesu na mabarari ekira-ḡoirito, murina na asi beḡene iaḡo, senaḡi Petero, e Iakobo (o Iames), ema tarina Ioane moḡo ḡia ḡesi beḡene iaḡo.

³⁸ Iairo ḡena numai ḡeraḡasito, benamo Iesu na tarimarima eḡitarito, ḡeguru-raḡeto-ḡoi e ḡetaḡi-guruḡa guruḡato-ḡoi.

³⁹ Benamo Iesu numai eraka-toḡato, evaḡa-guruḡarito, ekirato, “Karase nai ḡoguru-raḡeni e ḡotaḡini? Kekeni tu asi bemase, ḡia tu egenani moḡo.”

⁴⁰ Senaḡina tarimarima na ḡerikiriki-iaḡiato. Benamo Iesu na etuḡu-rosirito, bena kekeni tamana sinana e ḡia ḡekavaiato tarimari toitoi ḡesi moḡo kekeni ḡevaḡa-genaiato gabunai ḡeraka-toḡato.

⁴¹ Benamo Iesu na kekeni ḡimanai eḡabito, evaḡa-guruḡaiato, ekirato, “Talita kumi!” Mo guruḡa anina tu “Kekeni, au na ḡoi akiramuni, no-variḡisi!”

⁴² Benamo kekeni vaḡa-sebo evariḡisito, erakaorakaoto. Ḗia ḡena laḡani tu gabanana ruarua (12). Mai veḡa eḡorato nai, tarimarima ḡeḡaba-rakava rakavato.

⁴³ Iesu na evaḡa-guruḡarito, mai veḡa varina asiḡina ḡinavaḡi beḡene kiraḡia etato, ema ekirarito, mo kekeni beḡene ḡubua.

6

Iesu Nasareta tarimari na asi ḡegubakauato

¹ Iesu na mo gabu eraga-kwaneato, benamo ḡena vanuḡa ḡana eiaḡoto; ḡia ḡena mero maki murina na ḡeiaḡoto.

² Sabadi ḡaronai Iesu tu rubu ai ma ea vevaḡa-ribato, tarimarima ḡutuma na ḡeseḡaḡiato tu, ḡeḡaba-rakavato, ḡekirato, “Mai tarima mai riba tu ainana eḡabito? Ḗena iaunega maki dei na eviniato? Mai nuḡa-farevaḡi veḡa boruri tu kamasi eveirini ḡimana na?”

³ Ḗia tu kamuda tarimana, ene? Maria natuna; Iakobo (o Iames), e Iosefa, e Iudas, e Simona kakari, ema tobana maki sevirai iniḡeri.” Benamo asi ma ḡevaḡa-moḡoniato-ḡoi.

⁴ Iesu na ekirarito, ekirato, “Peroveta tarimana tu gabu mabarari ai beḡe gubakauani, senaḡi ḡena vanuḡa korikori, garagarana, ema ḡena numa tarimari, na moḡo asi beḡe gubakauani.”

⁵ Monai ḡia na seḡuka veḡari boruri asi eveito, a keve tarimari tu sebosebo moḡo iatari ai ḡimana etore-kauato, evaḡa-namorito.

⁶ Iesu edaradara-rakavato, korana asi ḡeri veḡabidadama nai.

Iesu ḡena mero gabanana ruarua (12) etuḡurito

Mataio 10:5-15; Luka 9:1-6

Benamo Iesu ma erakato, eiaḡoto vanuḡa kotari ai ma ea vevaḡa-ribato-ḡoi.

⁷ Benamo Iesu na ġena mero gabanana ruarua (12) ekearito, benamo ruari ruari etuġurito, ema seġuka evinirito, iauka rakavari beġene lai-vaġiri ġana.

⁸ Iesu na evaġa-naġirito, ekirato, “Kara ta asi boġono ġabi-kaua ġemi iaġoiāġo ai, toġoi moġo. Dura, ġaniġani dagarari e moni maki asi boġono ġwakau.

⁹ Tamaka boġono vei, senaġi sedi ruarua asi boġono vei.”

¹⁰ Ma evaġa-guruġarito, ekirato, “Numa tai boġo raġekauni nai, mo numai moġo boġono tanu, bene iaġo mo, vanuġa boġono raga-kwanea.

¹¹ Bema vanuġa tai asi beġe ġabi-raġemini e garomi asi beġe seġaġirini nai, boġono raga-kwanea, kwakumi kauri moġo boġono kwari-ketoketori ġia ġeri kira-sirivaġi vaġa-moġoniri ġana.”

¹² Benamo ġeiaġoto, ġea ġobatato, tarimarima ġeri rakava na beġene vetuġamaġi-kure e beġene raka-kure ġana.

¹³ Iauka rakavari vovoka tarimarima ġerina ġelai-vaġirito, keve tarimari ġutuma maki diġa na ġedaurito, ġevaġa-namorito.

Ioane Babatiso ġena mase

Mataio 14:1-12; Luka 3:19-20; 9:7-9

¹⁴ Heroda, Galilea verena, na mai veiġa variri ea seġaġirito, korana Iesu arana gabu mabarana eraga-rovorovoto. Tarima kotari ġekirato, “Ioane Babatiso mase na ma bevariġisi-ġenoġoi. Moġa lorinai mai veiġa baregori mabarari evaġa-foforirini.”

¹⁵ Ma kota ġekirato, “Mai tu Elia,” ma kota ġekirato, “Mai tu Peroveta tarimana ta, peroveta tarimari guineri kavana.”

¹⁶ Senaġi Heroda eseġaġito nai, ekirato, “Mai tu Ioane Babatiso, au na debana abasi-ġutuato tarimana, mase na ma bevariġisi-ġenoġoi!”

¹⁷ Korana Heroda tauġena evetuġuto, Ioane ġea ġabi-tariato, benamo dibura numai ġebarubaruato, ġebiri-ġauato. Mo veiġa eveiato, korana tu etava-rariato vavinena Herodia, ġia kakana Filipino ġaraġona, bene vaġa-iakua ġana.

¹⁸ Ioane na Heroda evaġa-guruġaiato-ġoi, ekirato, “Ġoi na kakamu ġaraġona boġaraġo-veraria tu asi maoro!”

¹⁹ Moġesina nai Herodia na Ioane ebaru-viniato, ġena ura bene vaġia, senaġina asi ġena dabara,

²⁰ korana Heroda na Ioane egari-viniato-ġoi e eġita-ġauato-ġoi. Heroda ribana Ioane tu vei-iobukaiobuka ema veaġa tarimana. Ioane garona eseġaġiato nai, edaradarato-ġoi, senaġi eurato bene seġaġi-vinia.

²¹ Herodia ġena ġaro namona ta eraġasito. Heroda ġena ġora ġarona vetuġamaġi-iaġina verekona o betdei pati eveiato, ġena veguine-iaġi tarimari baregori, e vetari ġorikauri tarimari, ema Galilea vanuġari ai veguine-iaġi tarimari ekearito.

²² Herodia natuna ġuiatona ema raka-toġato, benamo ebarato nai, Heroda ma ġena varivari tarimari mabarari ġesi evaġa-iakurito. Benamo Heroda na mo ġuiato ekiraiato, ekirato, “Ġoi kara oura-viniani dagarana nokiraġia, benamo bavinimuni.”

²³ Benamo ekiraiato, ekirato, “Kara bonoġiguni dagarana bavinimuni, ġegu Basileia tavina bonoġiguni maki bavinimuni.”

²⁴ Benamo eraka-rosito, sinana edanaġiato, ekirato, “Kara banasi?” Sinana na evaġa-veiato, ekirato, “Ioane Babatiso debana, bonosi!”

²⁵ Benamo mo ġuiato ma eraga-ġenoġoito, benamo vere barana Heroda enoġiato, ekirato, “Au aurani inimoġo Ioane Babatiso debana diġu ai novinigu.”

²⁶ Vere barana ma evetuġamaġi-ġenoġoito, senaġi asi eurato bene kira-sirivaġi, korana ġena varivari tarimari ġoirari ai ekiraġi-toreato bene.

²⁷ Maoromaoro vere barana Heroda na tarima debari ebasi-ġuturito-ġoi tarimana ta etuġuato, Ioane debana bene ġwa-iaġomaia ġana. Benamo ġia eiaġoto, Ioane Babatiso dibura numanai debana ebasi-ġutuato.

²⁸ Benamo diġu ai eġwa-ġenoġoiato, benamo mo ġuiato ema viniato. Ġia na sinana eviniato.

²⁹ Ioane ġena mero na mo vari ġeseġaġiato, benamo ġeiaġoto, tauġanina ġea ġabiato, benamo gara gabunai ġea guriato.

Iesu na tarima daġara imaima (5,000) eġuburito

Mataio 14:13-21; Luka 9:10-17; Ioane 6:1-13

³⁰ Apostolo tarimari ma ġeġenoġoito Iesu ġenai, benamo kara ġeveito e ġevevaġa-riba iaġirito dagarari mabarari ġekira-varaiato.

³¹ Iesu na evaġa-guruġarito, ekirato, “Gabu fakana ta ġana si-iaġosi, ġoa iaġaraġi kotuna.” Korana tarimarima vovoka ġeiaġomato-ġoi ema mainana ġeiaġoto-ġoi, be ġia maki asi ilaila beġene iaġaraġi o beġene ġaniġani.

³² Benamo mabarari ġasi tai ġeraġeto, gabu fakana ta ġana ġeiaġoto.

³³ Senaġi tarimarima ġutuma na ġeġitarito, ġeribato aiġana ġeiaġoni. Benamo vanuġa tata tarimarimari mabarari kwakuri na ġeraka-ragaraga-iaġoto, mo gabu ai ġea raġasi-guineto.

³⁴ Iesu ġasi na eraka-riġoto nai, tarimarima vovoka lelevaġi eġitarito, benamo evetuġarito, korana ġia tu noġa moġo mamoe asi ġitaġauri tarimana ta noġa. Benamo ġia na dagara vovoka evaġa-ribarito.

³⁵ Elavilavito-ġoi nai, Iesu ġena mero ġia ġenai ġeiaġoto, benamo ġekirato, “Mai tu gabu fakana e ġaro maki mo evariġoni.

³⁶ Notuġu-rakari, vamoka vei tarimari ġeri tanu gaburi e vanuġa kav-inaġiri ġana ġeiaġo, be ġari ġaniġani ġea voi.”

³⁷ Senaġi Iesu na evaġa-veserito, ekirato, “Ġomi na ġaniġani tari ġoviniri.” Benamo ġia na ġedanagiato, ġekirato, “Ġoi ourani tu ġaiaġo, beredi silva moniri sinau ruarua (200) na ġavoiri, benamo ġama-ġuburi otoni?” (Mai tu tarima ta davana ġue imaima toitoi (8) nuġanai beġabini kavana).

³⁸ Iesu na ekirarito, ekirato, “Ġomi ġemi ai beredi tu vira manġeri? Ġoiaġo, ġoa ġitari.” Ġea ġitarito, benamo ġekirato, “Beredi imaima, maġani-kone ruarua maki.”

³⁹ Iesu na ġena mero evaġa-guruġarito, tarimarima beġene vareri, doġoro doġoro ai ġauġa iatari ai beġene tanutanu-tari.

⁴⁰ Benamo doġoro loriri ai ġetanuto, tari sinau sebori (100), tari gabana imaimari (50).

⁴¹ Benamo Iesu na mo beredi imaima e maġani-kone ruarua eġabirito, eboġe-raġeto, gubai eġitaiato, Barau evaġa-namoato vau, beredi etavik-irakirarito, benamo ġena mero evinirito beġene vareri ġana. Maġani-kone ruarua maki moġesina edudu-ġutuġuturito.

⁴² Tarimarima mabarari ġeġani-maseto.

⁴³ Murinai vau Iesu ġena mero na beredi kwari e maġani-kone kwari mabarari ġevaġa-vegogo-rito, boseġa gabanana ruarua (12) ġevaġa-vonurito.

⁴⁴ Ġeġaniġanito tauri mabarari tu 5,000.

*Iesu nanu iatanai erakato
Mataio 14:22-33; Ioane 6:16-21*

⁴⁵ Maoromaoro Iesu na ġena mero ġasi ai evaġa-raġerito, benamo etuġu-guinerito kou tavi tai Betesaida ġana, ma ġia tu mo tarimarima ġutuma roġo etuġu-lausirito.

⁴⁶ Benamo etuġu-lausirito murinai, ġoro ġana evaraġeto ġurigiuri.

⁴⁷ Emukuna-mukunato-ġoi nai, ġasi tu kou nuġanai, a Iesu tu ġereġana tano ai.

⁴⁸ Benamo ġena mero eġitarito, ġevewaraġi rakavato-ġoi levai, korana iavara tu ġoirari na eiaġomato-ġoi. Benamo Iesu ġeri ai eraka-iaġoto nanu iatana na, ġasi bene raka-vanaġia etato. Mo tu horaġauna 3 ema 6 koloko vefakanai boġiboġi rekenai.

⁴⁹ Senaġi ġena mero na ġeġitaiato, nanu iatanai erakato-ġoi, ġetuġamaġito, ġekirato, “Murava ta!” ġetato. Benamo ġeġaba-fouto,

⁵⁰ korana mabarari na ġeġitaiato e ġegari-rakavato.

Senaġina Iesu na eraga-vaġa-guruġarito, ekirato, “Ġokokore, mai tu au, asi ġogari!”

⁵¹ Benamo ġasi ai eraġekauto, ema iavara maki edokoto. Ġena mero ġeġaba-rakavato,

⁵² korana tu mo beredi evaġa-ġutumarito nuġa-farevaġi veiġana anina roġosi ġere tuġamaġi-doġaria, nuġari roġo bubu nai.

*Iesu na keve tarimari evaġa-namorito e evaġa-maġuririto Genesareta ai
Mataio 14:34-36*

⁵³ Benamo ġasi ai kou na ġevanaġito, Genesareta tanonai ġeraġasito. Ġeri ġasi monai ġebaru-tariato.

⁵⁴ Benamo ġasi na ġeraka-vaġito nai, maoromaoro tarimarima na ġeġitaleiato, ġeribato mo tu Iesu.

⁵⁵ Benamo mo tano mabarana ġeraga-ġauato, benamo ġeri keve tarimari ma gedari ġesi Iesu ainai ġeseġaġiato-ġoi gaburi ġana ġeġwa-iaġorito-ġoi.

⁵⁶ Iesu na eiaġo-vinirito-ġoi gaburi mabarari ai, vanuġa barari ai, vanuġa keiri ai, vamoka vei tarimari ġeri tanu gaburi ai, ġeri keve tarimari maketi gaburi ai ġetorerito-ġoi, benamo ġenoġiato-ġoi, ġena dabuġa rikinai moġo maki beġene veġabikau. Ġeveġabikauto-ġoi tarimari tu ġenamoto-ġoi e ġemaġurito-ġoi.

7

Namo e rakava

¹ Farisea tarimari e taravatu ġevevaġa-riba iaġiato-ġoi tarimari kota Ierusalemna na ġeiaġomato, Iesu ġevegogo-ġeġeraġiato.

² Benamo ġena mero ġeġitarito, ġeġaniġanito-ġoi kota ġimari ma “mirori” ġesi, ġimari asi ġeġurigiirito ġia seneri vereri ġeri vevaġa-naġi ilailanai.

³ Boġono riba, Farisea tarimari e Iuda tarimari mabarari tu asi roġo beġe ġaniġanini, senaġi ġimari roġo beġe ġurigiirini murinai vau beġe ġaniġanini. Mai tu ġia seneri vereri na ġevaġa-moġoniato ema ġevei-iaġomaiato-ġoi veiġana.

⁴ Maketi gaburi na beġe iaġomani maki asi roġo beġe ġaniġanini, senaġi beġe veġurigi-guineni vau. Seneri ġeri vevaġa-naġi vovoka kotari maki ġekorana-iaġirito-ġoi, kapusi ġurigi, ġuro, ketolo [e gEDA maki] ġeġurigiirito-ġoi.

⁵ Moġesi nai Farisea tarimari e taravatu ġevevaġa-riba iaġiato-ġoi tarimari na Iesu ġedanaġiato, ġekirato, “Karase nai ġemu mero na senera vereri ġeri vevaġa-naġi asi ġekorana-iaġirini, ġimari ma ‘mirori’ ġesi ġeġaniġanini?”

⁶ Iesu na evaġa-veserito, ekirato, “Isaia na eperoveta-iaġimito ġofaġofa tarimami tu moġoni, maiġesi etoreato, ‘Mai besena tu mururi koriri ai moġo au ġegubakauguni ġeri Barau, senaġina ġia nuġari tu manaġa rakava.

⁷ Ġetoma-rakariġo vini-kavaguni, ġeri vevaġa-riba tu tarimarima ġeri vevaġa-naġi taravaturi, a dia au ġegu!’

⁸ Ġomi na Barau ġena taravatu tu ġoraga-kwanerini, benamo tarimarima ġeri vevaġa-naġi ġokorana-iaġirini.”

⁹ Iesu na ma ekirarito, “Moġoni, ġomi na Barau ġena taravatu ġotuġamaġi-fitoġarini, tauġemi ġemi vevaġa-naġi boġono korana-iaġiri ġana.

¹⁰ Mose ekirato, ‘Tamami sinami boġono gubakauri. Dei na tamana o sinana guruġa rakavari eviniani tarimana tu boġono vaġi-masea.’

¹¹ Senaġi ġomi ġokirani, tarima ta na tamana o sinana bevaġa-guruġaiani, bekirani, ‘Au na ġomi asi bavaġa-kavamini, korana bara vinimi dagarana tu au na Koban aviniani nai.’ Koban anina tu Barau ġena.

¹² Moġesi veiġai ġomi na tarima ġokouani, tamana e sinana asi bene vaġa-kavari ġana.

¹³ Ġomi na senemi ġeri vevaġa-naġi ġerina Barau ġena guruġa asi tauri ai moġo ġovaġa-iaġorini. Dagara vovoka moġesi ġoveirini.”

Tarimarima ġevaġa-rakavarini dagarari

Mataio 15:10-20

¹⁴ Benamo Iesu na tarimarima ġutuma ma ekea-vegogorito ġenai, benamo ekirarito, ekirato, “Mabarami ġoseġaġi ema boġono riba-maoro.

¹⁵ Tarimarima murika na ġeġanirini, ġevariġoni tarima nuġari ġana, dagarari na tarima asi ġevaġa-rakavarini, senaġi tarimarima nuġari o loruri ġuturi na ġemaraġeni dagarari na vau tarimarima ġevaġa-rakavarini. [¹⁶ Ma seġana tarimana bene seġaġi!]”

¹⁷ Iesu na mai tarimarima ġutuma eraga-kwanerito, numai eraġekauto; benamo ġena mero na mo barabore anina ġevedanaġi-iaġiato.

¹⁸ Iesu na evaġa-guruġarito, ekirato, “Ġomi maki asi ġotuġamaġi-fakani? Asi ġoribani, murika na ġevariġoni dagarari na tarimarima asi ġevaġa-rakavarini?”

¹⁹ Korana mo tu dia loruna na ġevariġoni, senaġina sinaġena na ġevariġoni, be ġeiaġoni moġo.” Moġa anina tu, ġia na ġaniġani mabarari evaġa-moġonirito, asi ġeri rakava.

²⁰ Benamo ma ekirato, “Kara tarimarima loruna na emaraġeni, monana tarimarima evaġa-rakavaiani,

²¹ korana tarima loruna na tuġamaġi rakavari, kima veiġari, lema, vaġivaġi,

²² veġura-vanaġi, mata-ġaniġani, veiġa rakavari mabarari, ġofaġofa, mata-boraġa, mama, vevaġa-bade, veiavi, vei-babobabo ġeiaġomani.

²³ Mabarari dagara rakavari, maiġeri loruna na ġemaraġeni, tarima ġevaġa-rakavarini.”

Vavine ta ġena veġabidadama

Mataio 15:21-28

²⁴ Iesu monana evariġisito, Taia e Sidono tanori ġana eiaġoto. Benamo numa tai ea raġekau-ġairito, ġia asi eurato tarima ta na bene ribaia ġia tu monai, senaġi asi ġena vekuretoġa dabarana.

²⁵ Vavine ta, natuna ġuiatona iauka rakavana na eboroġiato, Iesu varina eseġaġiato nai, eiaġoto, kwakuna koranai evetui-tarito.

²⁶ Mo vavine tu Grik vavinena, Siriafonesia ai emagurito. Benamo ġia na Iesu enoġiato, mo iauka rakavana natuna ġuiatona ġenana bene lai-vaġia.

²⁷ Benamo Iesu na ekiraiato, ekirato, “Mero misiri roġo beġene ġani-mase guine, korana asi maoro, mero misiri ġari ġaniġani bita ġabirini, kwaiva bita fiu-vinirini.”

²⁸ Vavine na ma evaġa-veaseato, ekirato, “Vereġauka, mani tu moġoni, senaġi kwaiva maki fata gaburenai mero misiri ġeġaniġanini momori tu ġeġanirini.”

²⁹ Benamo ġia na mo vavine ma evaġa-guruġaiato, ekirato, “Maniġesi bovaġa-vease dainai, noġenoġoi, iauka rakavana tu natumu ġenana beraka-vaġi.”

³⁰ Benamo mo vavine eġenoġoito ġena numa ġana nuġanai, natuna ġuiatona ea doġariato, ġena gedai egena-taġoto-ġoi eġitaiato, iauka rakavana tu moġoni eraka-vaġito.

Iesu na seġa-bubu e muru-bubu tarimana evaġa-namoato

³¹ Benamo Iesu Taia tanona eraga-kwaneato, Sidono e Vanuġa Gabanana (10) tanori eraka-vanaġirito, Galilea kou ai eraġasito.

³² Benamo tarima kotari na seġa-bubu e asi eguruġa-ginikauto-ġoi tarimana ta ġeġabi-iaġoato, benamo ġenoġiato, ġimana iatanai bene tore-kaua.

³³ Benamo Iesu na tarimarima ġutuma nuġari na eġori-veġitaiato, didina seġana kouġanai eduġi-toġarito, ekanunuto, benamo meana eġabi-karaiato.

³⁴ Gubai eboġe-raġeto, eiaġa-raġeto ma ġabana ġesi, ekirato, “Efata!” anina tu “Noġwa-faka!”

³⁵ Benamo seġana ġeġwa-fakarito, meana everuġato, eroroġototo, benamo eguruġa-ġitakauto.

³⁶ Iesu na ekirarito, tarima ta asi beġene kira-varaia, senaġi ekirarito-ġoi guruġari tu asi ġeseġaġiato-ġoi, ġia varina tu ġefiu-rovorovoato-ġoi.

³⁷ Tarimarima nuġari ġefarevaġi-rakavato, ġekirato, “Ġia na dagara mabarari evei-ġitakaurini, seġa-bubu tarimari evaġa-seġaġirini, muru-bubu tarimari evaġa-guruġarini.”

8

Iesu na tarimarima daġara vasivasi (4,000) eġuburito

¹ Mo negai tarimarima ġutuma lelevaġi ma ġevegogo-ġenoġoito. Ġia asi ġari ġaniġani nai, Iesu na ġena mero ekea-kavirito sevina ġana, benamo evaġa-guruġarito, ekirato,

² “Au na mai tarimarima avetuġarini, korana mai tu ġaro toitoi veġata au ġesi maiġeri, nuġanai tu asi ġari ġaniġani.

³ Bema au na batuġu-ġenoġoirini ġeri vanuġa ġana ma vitori ġesi nai, dabarai beġe borimarini, korana kotari tu gabu manaġa na ġeiaġomato nai.”

⁴ Benamo ġena mero na ġevaġa-veaseato, ġekirato, “Kamara dabarai tarima ta na mai tarimarima beredi na beġuburini mai tano fakanai?”

⁵ Benamo Iesu na edanaġirito, ekirato, “Ġomi ġemi ai beredi tu vira?” Ġia ġevaġa-veseto, ġekirato, “Imaima ruarua (7).”

⁶ Iesu na vegogo tarimari evaġa-guruġarito, tano ai ġetanutanu-tari. Benamo beredi imaima ruarua (7) eġabirito, Barau evaġa-namoato, ebuki-ġuturito, ġena mero evinirito, mo tarimarima ġoirari ai beġene toretoretariri ġana. Benamo moġesi ġevairito.

⁷ Ġia ġeri ai maki maġani-kone misiri kotari. Iesu na Barau ma evaġa-namoato, ġena mero ekirarito, moġeri maki ġevareri.

⁸ Benamo tarimarima ġeġani-maseto murinai, Iesu ġena mero na ġaniġani kwari ġegogorito, boseġa mabarari imaima ruarua (7) ġevaġa-vonurito.

⁹ Tarimarima mabarari tu 4,000 kavana. Benamo Iesu na etuġurovorovorito,

¹⁰ ma ġia ema ġena mero ġesi ġasi ai ġeraġeto, Dalmanuta tanona ġana ġeiaġoto.

Farisea tarimari ġeri ura vetoġa ta guba na bene mariġo

Mataio 16:1-4

¹¹ Farisea tarimari kota Iesu ġenai ġeiaġoto, benamo ġedanaġi-ribaġaniato. Ġeri ura vetoġa ta guba na bene mariġo.

¹² Iesu iaġana eġaniato ma nuġa metona ġesi, benamo ekirato, “Karase nai toma ġuru tarimari na vetoġa ġeġita-vetaurini? Moġoni akiramini, vetoġa ta asiġina ġinavaġi baviminini!”

¹³ Benamo eraga-kwanerito, ġasi ai ma eraġeto, kou tavi ta ġana ea vanaġito.

Farisea tarimari e Heroda

Mataio 16:5-12

¹⁴ Iesu ġena mero ġevetuġa-rekwato, ġaniġani asi ġeġabikauto, beredi sebona moġo ġasi ai.

¹⁵ Benamo Iesu na esisiba-vinirito, ekirato, “Lorimi boġono vetore, Farisea tarimari e Heroda ġari farao evaġa-tubuani muramurana garina.”

¹⁶ Benamo mo guruġa tauġeri fakari ai ġeverori-iaġiato, ġekirato, “Moġesina bekira, korana ġita tu asi ġara beredi nai.”

¹⁷ Iesu na eribarito, benamo evaġa-guruġarito, ekirato, “Karase nai beredi ta sevimi ai asiġi guruġana ġoveini? Ġomi roġosi boġono riba, roġosi boġono tuġamaġi-faka? Nuġami maki roġo bubu?”

¹⁸ Ma matami, senaġi asi ġoġitani? Ma seġami, senaġi asi ġoseġaġini? Asi ġovetuġamaġi-taġoni maki?

¹⁹ Au na beredi imaima abuki-ġutuġuturito tarimarima 5,000 ġari nai, beredi kwari ġogogorito tu, boseġa vira ġovaġa-vonurito?” Ġia ġevaġa-veseto, ġekirato, “Gabanana ruarua (12).”

²⁰ “Au na beredi imaima ruarua (7) abuki-ġutuġuturito tarimarima 4,000 ġari nai, beredi kwari ġogogorito tu boseġa vira ġovaġa-vonurito?” Ġia ġevaga-veseto, ġekirato, “Imaima ruarua (7).”

²¹ Benamo Iesu na ekirarito, “Ġomi roġosi boġono tuġamaġi-faka?”

Iesu na mata-bubu tauna matana evaġa-iaġaiato Betesaida ai

²² Ġia Betesaida ġana ġeiaġoto, benamo tarima kotari na mata-bubu tauna ta Iesu ġenai ġeġori-iaġoato, benamo ġenoġiato, bene ġabi-karaia.

²³ Benamo Iesu na mata-bubu tauna ġimanai eġabito, eġori-rosiato vanuġa na, benamo matana ekanunuato, ma ġimana ġenai etore-kaurito, edanaġiato, “Dagara tari oġitarini ba?”

²⁴ Mo tarima eboḡe-vaishito, ekirato, “Oi, tarima tari aḡitani, senaḡina noḡa moḡo ḡau noḡa ḡerakao-rakaoni.”

²⁵ Benamo Iesu ḡimana matanai ma etore-kaurito, benamo eboḡeboḡe-ginikauto, dagara mabarari eḡita-ginikaurito.

²⁶ Benamo Iesu na numa ḡana etuḡu-iaḡoato, evaḡa-guruḡaiato, ekirato, “Vanuḡa nuḡana na asi bono iaḡo.”

Petero na Iesu tu Kerisona ekiraḡito

Mataio 16:13-20; Luka 9:18-21

²⁷ Iesu ma ḡena mero ḡesi Kaisarea Filipi tanona vanuḡari ḡana ḡeiaḡoto-ḡoi nuḡanai, dabarai Iesu na ḡena mero edanaḡirito, ekirato, “Tarimarima tu kara ḡetoni au tu dei?”

²⁸ ḡia ḡevaḡa-veseto, ḡekirato, “Kotari ḡekirani tu Ioane Babatiso, ma kotari tu Elia, ma kotari tu peroveta tarimana ta.”

²⁹ Iesu na edanaḡirito, ekirato, “Senaḡi ḡomi tu kara ḡotoni au tu dei?” Petero na evaḡa-veseato, ekirato, “ḡoi tu Keriso, (Barau na ekiraḡi-toreato vevaḡa-maḡuri tauna).”

³⁰ Benamo Iesu na evaḡa-guruḡarito, tarima ta asi beḡene kira-varaia.

Iesu ḡena mase e variḡisi-ḡenoḡoi guruḡari

Mataio 16:21-28; Luka 9:22-27

³¹ Benamo Iesu na ḡena mero ma evaḡa-ribarito, ekirato, “Tarimarima Natuna tu midigu vovoka roḡo beḡanini. Iuda vereri, e Rubu Veaḡa vereri baregori, e taravatu ḡevevaḡa-riba iaḡiani tarimari na beḡe ruḡaiani; ema beḡe vaḡi-maseani maki, senaḡina ḡaro toitoi murinai mase na ma bevariḡisi-ḡenoḡoini.”

³² Mai guruḡa ekiraḡi-foforiato, benamo Petero na eḡori-veḡitaiato, ekira-ḡoiato.

³³ Senaḡi Iesu eruḡa-kureto, ḡena mero eḡitarito, ḡia na Petero ekira-ḡoiato, ekirato, “Satani, noraka-veḡita, korana ḡemu tuḡamaḡi tu dia Barau ḡena, senaḡi tarimarima ḡeri moḡo.”

³⁴ Iesu na tarimarima ḡutuma ma ḡena mero ḡesi ekea-vegogorito, benamo evaḡa-guruḡarito, ekirato, “Bema tarima ta euranai au murigu ai bene raka etoni tarimana, tauḡena bene veruḡa, ḡena satauro bene ḡwaia, au murigu ai bene raka.

³⁵ Korana deikara ḡena maḡuri moḡo lorina etoreani tarimana, ḡena maḡuri befitoḡaiani. A deikara au daigu ai e Vari Namona dainai ḡena maḡuri befitoḡaiani tarimana, ḡena maḡuri asi bevei-rekwarekwaiani.

³⁶ Bema tarima ta na tanobara mabarana uranai ḡena maḡuri befitoḡaiani, ḡena namo tu kara ḡia ḡenai?

³⁷ Korana tarima ta ḡena maḡuri efitoḡaiato nai tu, kara na vau ma bevoi-ḡenoḡoiani?

³⁸ Deikara na au bemaika-viniguni ema ḡegu guruḡa bemaika-viniani mai veḡura-vanaḡi e vei-rakava tarimari ḡoirari ai, ḡia maki Tarimarima Natuna na bemaika-viniani ḡena iaḡomai, ḡia Tamana mamana marevana e seḡuka baregona e ma ḡena aneru veaḡari ḡesi beḡe iaḡomani ḡaronai.”

9

¹ Benamo ekirarito, ekirato, “Moḡoni akiramini: Tarima kotari mai ḡeruḡa-taḡoni tu asi roḡo beḡe maseni, beiaḡoni mo, Barau ḡena Basileia ma seḡukana ḡesi beiaḡomani beḡe ḡitaiani.”

Iesu vetoġana eirauto
Mataio 17:1-13; Luka 9:28-36

² Ġaro imaima sebona (6) ġevanaġito murinai, Iesu na Petero, e Iakobo (o Iames), ema Ioane eġabirito, benamo ġoro baregona tai eġori-raġerito. Monai ġia ġereġari moġo nuġanai Iesu ġeġitaiato, vetoġana eirauto,

³ ema ġena dabuġa ekuro-ġaroġaroto, tanobarai tarima ta na asi ilaila moġesina bevaġa-kurokuroani.

⁴ Benamo ġia ġoirari ai Elia ma Mose ġefoforito, Iesu ġesi ġeguruġa guruġato-ġoi.

⁵ Benamo Petero na Iesu evaġa-guruġaiato, ekirato, “Vevaġa-riba tari-mamu o, namo vedaurea ġita tu maġera, be fouta toitoi ġaragari. Ta ġoi ġemu, ta Mose ġena, ta Elia ġena.”

⁶ Petero asi ribana kara bekiraġiani, korana ġia tu ġegari-rakavato.

⁷ Benamo magube na ema iauka-taririto, ekumu-ġaurito nuġanai, ġaro ta magube nuġana na ekea-rosito, ekirato, “Mai tu au Natugu, aura-viniani; ġia boġono seġaġi-vinia!”

⁸ Ġia na mo gabu ġeraga-ġita-ġeġeraġiato, senaġi ta asi ġeġitaiato ġia ġesi, Iesu moġo ġereġana.

⁹ Ġoro na ġemariġoto-ġoi nuġanai, Iesu na evaġa-guruġarito, kara ġeġitaiato dagnarana tarima ta asi beġene kira-varaia, bene iaġo mo, Tarimarima Natuna mase na ma bene variġisi-ġenoġoi.

¹⁰ Moġa lorinai ġena guruġa fakari ai moġo etanuto, senaġi ġia fakari ai ġeverorito, mai mase na variġisi-ġenoġoi anina tu kara.

¹¹ Benamo ġia na Iesu ġedanaġiato, ġekirato, “Karase nai taravatu ġevevaġa-riba iaġiani tarimari ġekirani, Elia tu beiaġoma-guineni?”

¹² Iesu evaġa-veseto, ekirato, “Moġoni, Elia tu beiaġoma-guineni, dagara mabarari bevaġa-variġurini. A Tarimarima Natuna guruġana kamasi ġetoreato midigu vovoka beġanini e beġe ġita-fitoġaiiani?”

¹³ Senaġi akiramini, Elia tu varau eiaġomato, ema ġeri ura veġari ġia ġenai varau ġeveirito, ġia guruġana Buka Veaġai ġetore-guineato ilailanai.”

Iesu na iauka rakavana na eboroġiato merona evaġa-namoato
Mataio 17:14-21; Luka 9:37-43

¹⁴ Ġena mero ġeri ai ġevotuto tu, tarimarima ġutuma lelevaġi na ġeruġa-ġeġeraġirito, ġeġitarito, taravatu ġevevaġa-riba iaġiato-ġoi tarimari maki ġia ġesi ġeveġare veġareto-ġoi.

¹⁵ Tarimarima na Iesu ġeġitaiato nai, nuġari ġefarevaġito, benamo ġenai ġeraga-iaġoto, ġea vaġa-namoato.

¹⁶ Iesu na edanaġirito, ekirato, “Mai tarima ġesi tu kara veġare-veġarena ġoveini?”

¹⁷ Benamo tarima ta ġutuma nuġari na evaga-veseto, ekirato, “Vevaġa-riba tarimamu, au natugu ġoi ġemu ai baġori-iaġomaia. Ġia tu muru-bubu iaukana na eboroġiato nai, asi eguruġani.

¹⁸ Ma mai iauka na eġabiani ġarori ai, tano ekwaraġi-iaġiani. Bokana na kaburoburo ġeraka-rosini, gadikana eveġara-tarini, tauġanina egwaġiġini. Moġa lorinai ġoi ġemu mero banoġiri, mai iauka rakavana ġelai-vaġia basi, senaġi beġe lai-kavaia.”

¹⁹ Benamo Iesu ekirato, “Asi veġabidadama tarimami! Ġaro vira au ġomi sevimi ai bana tanu? Ġaro vira bana vevaġa-gwaġiġi vinimi? Ġoġori-iaġomaia!”

²⁰ Benamo mo mero Iesu sevina ġana ġeġori-iaġoato. Iauka rakavana na Iesu eġitaiato nai, vaġa-sebo mero evaġa-ġoġo-ġoġoato, tano ai eketoto, egena-vebiro vebiroto, bokana na kaburoburo ġeraka-rosito.

²¹ Iesu na mero tamana edanaġiato, ekirato, “Aitoma mai keve edoġariato?” Tamana evaġa-veseto, ekirato, “Mai tu keina na veġata!

²² Nega vovoka iauka rakavana na karavai efiu-kauani, ema nanu ai efiu-reiani bene vaġia ġana. Bema dagara ta boveiani riba nai, mani ġemu veġa, boro vetuġa-ġwama, boro vaġa-kavama.”

²³ Benamo Iesu ekirato, “Bema dagara ta boveiani riba otoni? Barau ġenai eveġabi-dadamani tarimana dagara mabarari beveirini riba.”

²⁴ Benamo mero tamana asikauna eġaba-fouto, ekirato, “Au aveġabidadamani, senaġi ġegu tuġamaġi iauvoiauvo noma boroġia.”

²⁵ Iesu na tarimarima ġutuma ġeraga-vegogoto-ġoi eġitarito nai, ġia na mo iauka rakavana ekira-ġoiato, ekirato, “Muru-bubu e seġa-bubu iaukana, akiramuni, noraka-vaġi, ma nuġanai asi ma bono raka-toġa ġenoġoi!”

²⁶ Benamo iauka rakavana eġaba-fouto, ġia na mero evaġa-ġoġoġoġo rakavaiato, benamo eraka-vaġito. Mero tu ġitaġitana noġa emaseto, moġa lorinai tarimarima ġutuma ġekirato, “Mai tu bemase.”

²⁷ Senaġi Iesu na ġimanai eġabito, einu-vaisiato, benamo eruġa-vaisito.

²⁸ Moġa murinai Iesu numai eraġekauto, ġena mero na vekuretoġai ġedanaġiato, ġekirato, “Karase nai ġai na iauka rakavana asi ilaila baġa lai-vaġia?”

²⁹ Benamo Iesu na evaġa-veserito, ekirato, “Iauka maiġesina lailairi tu kara ta asiġina, senaġina ġauġau [e ġaniveaġa] ġereġana moġo.”

Iesu ġena mase ma ekiraġi-ġenoġoiato

Mataio 17:22-23; Luka 9:43-45

³⁰ Mo gabu ġeraga-kwaneato, Galilea tanona na ġevanaġito. Iesu asi ġena ura tarima ta bene riba ġia tu ainai,

³¹ korana ġena mero evaġa-ribarito, ekirato, “Tarimarima Natuna tu beġe revaiani vau, tarimarima ġimari ai beġe toreani, benamo beġe vaġi-maseani, senaġi beġe vaġiani nai, ġaro toitoi murinai tu ma bevariġisi-ġenoġoini.”

³² Senaġi ġia tu asi ġeriba-maoroto Iesu tu kara ekiraġiato, senaġi asi ma ġedanaġiato, korana ġegarito nai.

Deikara tu barego vedaurea

Mataio 18:1-5; Luka 9:46-48

³³ Kaperanaumai ġeraġasito, benamo Iesu na numa nuġanai vau edanaġirito, ekirato, “Ġomi dabarai tu kara ġokiraġiani-ġoi?”

³⁴ Senaġi ġia tu asi ġevaġa-veseto, korana dabarai tu, deikara barego vedaurea ġekiraġiato-ġoi.

³⁵ Iesu etanu-tarito, ġena mero gabanana ruarua (12) ekearito, benamo ekirarito, ekirato, “Dei bene guine etoni tarimana tu gabi taunai bene iaġo, ema tarimarima mabarari vetuġunaġiri bene iaġo-vini.”

³⁶ Benamo ġia na mero keina ta eġabiato, ġia fakari ai evaġa-ruġa-tariato, efani-vaisiato, benamo ekirarito, ekirato,

³⁷ “Dei na mero keina maiġesina kavana beġabi-raġeani au aragu ai, ġia na tu au beġabi-raġeguni. Bema tarima ta na au beġabi-raġeguni tu, dia au ġereġagu moġo beġabi-raġeguni, senaġi etuġuguto Barauna maki beġabi-raġeani.”

Deikara na ġita asi bevaġa-rakavarani tarimana tu ġita ġesi

Luka 9:49-50

³⁸ Ioane na Iesu ekiraiato, ekirato, “Vevaḡa-riba tarimamu, tarima ta ḡaḡitaiato, ḡoi aramu ai iauka rakavari elai-vaḡirito-ḡoi, senaḡi ḡai na ḡakira-ḡoiato, korana ḡia tu dia ḡita ḡesi taraka-vegogoni.”

³⁹ Iesu na ekirarito, ekirato, “Asi boḡono kira-ḡoia, korana tarima ta au aragu ai nuḡa-farevaḡi veiḡa boruri eveirini tarimana tu, au murigu ai au asi ma bekira-rakavaguni.

⁴⁰ Korana deikara na ḡita asi evaḡa-rakavarani tarimana tu ḡita ḡesi.

⁴¹ Moḡoni akiramini, tarima ta na nanu kapusina au aragu ai bevinimini, korana ḡomi tu Keriso ḡena tarima nai, ḡia voina tu beḡabiani veḡata.”

*Tarima ta na mero misina ḡena veḡabidadama asi bene vaḡa-rakavaia
Mataio 18:6-9; Luka 17:1-2*

⁴² “Bema tarima ta na au eḡabidadama-viniguni mero misina ta ḡena veḡabidadama evaḡa-rakavaiani, ḡia tu bere namo fore baregona ta ḡaiḡonai ḡere baru-kaua, davarai ḡere fiu-reia.

⁴³ Bema ḡoi ḡimamu na evaḡa-rakavamuni nai, bono basi-ḡutua. ḡimamu sebonai maḡuri vanaḡivanaḡi bono doḡaria tu namo, a asi namo ḡimamu ruarua karava eḡara-vanaḡi vanaḡini asi ebuseni gabuna ḡana boiaḡoni. [⁴⁴ Monai ‘dimo na beḡe ḡani-vanaḡi vanaḡimini, ema karava asi ebuseni.’]

⁴⁵ Bema ḡoi kwakumu na evaḡa-rakavamuni nai, bono basi-ḡutua. Kwakumu sebonai maḡuri vanaḡivanaḡi bono doḡaria tu namo, a asi namo kwakumu ruarua karava eḡara-vanaḡi vanaḡini gabunai beḡe fiu-kaumuni. [⁴⁶ Monai ‘dimo na beḡe ḡani-vanaḡi vanaḡimini, ema karava asi ebuseni.’]

⁴⁷ Bema ḡoi matamu na evaḡa-rakavamuni nai, bono ḡibo-vaḡia. Matamu sebonai Barau ḡena Basileiai bono raka-toḡa tu namo, a asi namo matamu ruarua karava eḡara-vanaḡi vanaḡini gabunai beḡe fiu-kaumuni.

⁴⁸ Monai ‘dimo na beḡe ḡani-vanaḡi vanaḡimini, ema karava asi ebuseni.’

⁴⁹ Mabarari karava na bedamenarini, beiarevarini.

⁵⁰ Damena tu namo, senaḡi bema damena mamina bekorini nai, mamina kamasi ma bovaḡa-mamina ḡenoḡoiani? Nuḡami ai damena bene tanu, e ḡomi tata karomi ḡesi maino nuḡanai boḡono tanu.”

10

Veḡaraḡo ruḡaruḡana

¹ Iesu mo gabu eraga-kwaneato, benamo Iudea tanona ḡana eiaḡoto, Ioridana ḡarukana tavi tai evanaḡito. Tarimarima ḡutuma lelevaḡi ḡia ḡenai ma ḡeiaḡoto, benamo eveito-ḡoi kavana ma evaḡa-ribarito.

² Benamo Farisea tarimari ma ḡeiaḡoto, benamo ḡea danaḡi-ḡofakauato, ḡekirato, “Tau ta ḡaraḡona befitoḡaiiani nai, taravatu na beḡabiani?”

³ Iesu na ma evaḡa-veserito, ekirato, “Mose ḡena taravatu nuḡanai kara etoni?”

⁴ Ḗkirato, “Mose ḡena taravatu tu maiḡesi ekirani, veḡaraḡo ruḡaruḡana fefana betoreani vau, ḡaraḡona betuḡu-rakaiani.”

⁵ Iesu na ekirarito, ekirato, “Mose na mai taravatu etoreato, korana ḡomi nuḡami tu roḡo bubu.

⁶ Senaḡina Barau na dagara mabarari eveirito nai, ḡia na tarimarima maki eveirito tau e vavine.

⁷ Moḡesina nai tau ta na tamana e sinana beraga-kwanerini, ḡaraḡona ḡesi beḡe tanuni.

⁸ Benamo ḡia tauri ruarua beḡe sebonani, moḡa lorinai ḡia tu dia ruarua, senaḡi sebona moḡo.

⁹ Moĝesi nai dei Barau na evaĝa-sebonarito tu, tarima ta na asi ma bene tore-kirari.”

¹⁰ Ma ĝeĝenoĝoito numai, ĝena mero na ma ĝedanaĝiato mo guruĝa anina tu kara.

¹¹ Iesu na evaĝa-veserito, ekirato, “Deikara na ĝaraĝona betuĝu-rakaiani, vavine ta ma beĝaraĝoani, ĝia tu beveĝura-vanaĝini.

¹² Vavine maki moĝesina, ĝia ĝaraĝona beraga-kwaneani, tau ta na ma beĝaraĝoani, ĝia maki beveĝura-vanaĝini.”

Iesu na mero misiri evaĝa-namorito

Mataio 19:13-15; Luka 18:15-17

¹³ Tarima kotari na naturi ĝeĝwa-iaĝorito-ĝoi Iesu ĝenai bene ĝabi-karari ĝana, senaĝi ĝena mero na ĝekira-ĝoirito.

¹⁴ Iesu na eĝitarito nai tu ebaruto. Benamo ĝena mero ekirarito, ekirato, “Mani mero misiri ĝeiaĝoma au ĝegu ai, asi ĝolai-ĝoiri, korana Barau ĝena Basileia tu maniĝesina kavana tarimari ĝeri.

¹⁵ Moĝoni akiramini, dei na Barau ĝena Basileia asi beĝabi-raĝeani mero misina na kavana, ĝia Basileiai tu asi beraka-toĝani.”

¹⁶ Benamo Iesu na mero misiri efaĝa-vaisirito, benamo ĝimana iatari ai etore-kaurito, evaĝa-namorito.

Farefare vovoka tarimana

Mataio 19:16-30; Luka 18:18-30

¹⁷ Iesu monana ma evaisi-raĝeto, benamo erakato nuĝanai, tarima ta ĝenai eraga-iaĝoto, benamo ĝoiranai ea vetui-tarito, edanaĝiato, ekirato, “Vevaĝa-riba tarimamu namona, au tu kara haveini vau maĝuri vanaĝivanagi baĝabiani?”

¹⁸ Iesu na evaĝa-veŝeato, ekirato, “Ĝoi tu karase nai au namogu okiraĝini? Tarima ta asi namo, Barau moĝo ĝereĝana.

¹⁹ Taravatu mabarari ma ribamu, ‘Asi bono vaĝivaĝi, asi bono veĝura-vanaĝi, asi bono lema, asi bono vevaĝa-daĝa ĝofaĝofa, asi bono ĝabikuretoĝa, tamamu sinamu bono gubakauri.’ ”

²⁰ Benamo mo tarima ekirato, “Vevaĝa-riba tarimamu, au tu keigu na beĝoma toma, mani taravatu mabarari akorana-iaĝirini.”

²¹ Iesu na eĝitaiato ma veuravinina ĝesi ekirato, “Dagara sebona moĝo orabuni, noiaĝo, ĝemu farefare mabarari noa voivoi-iaĝiri, rabu tarimari bono viniri, benamo gubai tu ma ĝemu farefare; ma bono iaĝoma, murigu ai bonoma raka.”

²² Mo tarima na mai guruĝa eseĝaĝiato nai, ĝoirana evaĝa-gwaĝiĝiato, nuĝana ma metona ĝesi eraka-veĝitato, korana ĝia ĝena farefare tu ĝutuma lelevaĝi.

²³ Benamo Iesu na ĝena mero eĝita-ĝeĝeraĝirito, benamo evaĝa-guruĝarito, ekirato, “Ĝeri farefare vovoka tarimari Barau ĝena Basileiai ĝeri rakatoĝa tu gwaĝiĝi rakava.”

²⁴ Benamo Iesu ĝena mero na mo guruĝa ĝeseĝaĝiato nai, nuĝari ĝefarevaĝito, senaĝi Iesu na ma evaĝa-guruĝa ĝenoĝoirito, ekirato, “Natuĝore, Barau ĝena Basileia rakatoĝana tu gwaĝiĝi rakava.

²⁵ Kamela nila kadarena na bevanaĝini tu kotuna gwaĝiĝi, senaĝi ĝena farefare vovoka tarimana Barau ĝena Basileiai ĝena rakatoĝa tu gwaĝiĝi rakava.”

²⁶ Benamo ĝena mero nuĝari ĝefarevaĝi-rakavato, benamo ĝevaĝa-guruĝaiato, ĝekirato, “Be deikarari vau maĝuri beĝe ĝabiani?”

²⁷ Iesu na eġitarito, benamo ekirato, “Tarimarima ġeri ai tu asi ilaila, senaġi Barau ġenai tu ilaila, korana Barau ġenai dagara mabarari tu ilaila.”

²⁸ Petero na ekiraiato, ekirato, “Ġoi ribamu, ġai ġema dagara mabarari tu ġaraga-kwanerito, benamo ġoi murimu ai ġarakani.”

²⁹ Iesu evaġa-veseto, ekirato, “Moġoni akiramini, tarima ta ġena numa eraga-kwaneato, o tarikakana merori, tobana, sinana, tamana, natuna e ġena tano au daigu ai ema Vari Namona dainai,

³⁰ ġia mai maġuri nuġanai ġena numa, tarikakana merori, tobana, sinana, natuna e tano sinau-sin角度 beġoitaġoni, ema midigumidigu maki; ema ġaro beiaġomani nai, maġuri vanaġivanaġi bedoġariani.

³¹ Senaġi tarimarima ġutuma toma ġeguineni tu beġe gabini, gabi tarimari tu beġe guineni.”

Iesu ġena mase ma ekiraġi-foforiato

Mataio 20:17-19; Luka 18:31-34

³² Iesu ma ġena mero ġesi Ierusalemata ġana ġevaraġeto-ġoi, dabara na ġeraka-iaġoto-ġoi, Iesu tu ġoirari ai erakato, benamo ġia ġeġaba-rakavato, ema muriri na ġerakato tarimari maki ġegarito. Benamo Iesu na ġena mero gabanana ruarua (12) ma eġori-veġitarito, benamo ġenai kara beġe ġorani dagarari ekira-vararito,

³³ ekirato, “Ġoseġaġi, ġita tu Ierusalemata ġana tavarāġeni. Monai Tarimarima Natuna tu Rubu Veaġa vereri baregori e taravatu ġevevaġa-riba iaġiani tarimari ġimari ai beġe toreani. Ġia na ġena mase guruġana beġe vaġa-moġoniani, benamo irau bese (o Roma) tarimari ġimari ai beġe toreani.

³⁴ Ġia na beġe vaseva-vaseva iaġiani, beġe kanunuani, beġe kwariani e beġe vaġi-maseani. Senaġi ġaro toitoi murinai ma bevarigisi-ġenoġoini.”

Iakobo (o Iames) ma Ioane ġeri noġinoġi

Mataio 20:20-28

³⁵ Benamo Sebedaio natuna, Iakobo ma Ioane, Iesu ġenai ġeiaġoto, benamo ġekirato, “Vevaġa-riba tarimamu, ġai ġaurani kara baġa noġimuni dagarana bono vinima.”

³⁶ Iesu na ekirarito, ekirato, “Kara ġemi ai bana veia ġotoni?”

³⁷ Benamo ġia na ġevaġa-guruġaiato, ġekirato, “Ġai ġaurani, ġai ta aroribamu rekenai, ma ta tu kaurimu rekenai baġana tanu ġoi ġemu Basileia marevana nuġanai.”

³⁸ Senaġi Iesu na ekirarito, ekirato, “Ġomi tu asi ribami kara ġonoġiani. Au na midigu bedina banuani ġomi maki boġo niuni riba? Au beġe babatisoguni babatisona ġomi na maki boġo ġabiani riba?”

³⁹ Ma ġevaġa-veseto, ġekirato, “Oi.” Iesu na ekirarito, ekirato, “Moġoni, au banuani bedinai ġomi maki boġo niuni, ema au beġe babatisoguni babatisona ġomi maki beġe babatisomini.

⁴⁰ Senaġi aroribagu rekenai o kaurigu ai boġono tanu ġotoni tu, dia au na bavaġa-moġoniani, a mai tu Barau na eġabi-torerito tarimari ġeri.”

⁴¹ Mai guruġa mero gabanana (10) ġeseġaġiato nai, Iakobo e Ioane ġebaru-vinirito.

⁴² Benamo Iesu na mabarari ekea-vegogorito, benamo evaġa-guruġarito, ekirato, “Ġomi ribami, irau bese tarimari ġeri vere na tarimarima ġedori-naġinaġirini, ema ġeri veguine-iaġi tarimari baregori na tu ġeri maoro seġukari na ġelaunaġi-naġirini.

⁴³ Senaġi ġomi fakami ai moġesina tu asi boġono vei. Bema ta ġomi fakami ai bene vere etoni nai tu, ġomi mabarami vetuġunaġimi bene iaġo-vini,

⁴⁴ ema dei bene guine etoni tarimana, ġia tu mabarari ġeri vetuġunaġi tarimanai bene iaġo.

⁴⁵ Korana Tarimarima Natuna eiaġomato tu, dia tarimarima na ġia vetuġunaġina beġene iaġo-vini ġana, senaġina ġia eiaġomato tu, tarimarima vetuġunaġiri bene iaġo-vini, ema ġena maġuri bene tore-taria, tarimarima ġutuma bene voi-ġenoġoiri e bene vaġa-maġuriri ġana.”

Iesu na mata-bubu tarimana Batimeo matana evaġa-namoato

Mataio 20:29-34; Luka 18:35-43

⁴⁶ Ieriko ai ġeraġasito, monana Iesu ma ġena mero e tarimarima ġutuma lelevaġi ġesi Ieriko ma ġeraga-kwaneato nuġanai, Batimeo, mata-bubu e noġivegame tarimana, Timeo natuna, dabara rikinai etanu-taġoto-ġoi.

⁴⁷ Ġia eseġaġito Iesu, Nasareta tarimana, tu ġia sevinai, benamo ekea-fouto, ekirato, “Iesu o, Davida natuna, au novetuġa-ġwagu!”

⁴⁸ Tarimarima ġutuma na ġekira-ġoiato, asi bene guruġa ġetato, senaġi ġia ekea-ġiġiraġe ġiġiraġeto-ġoi, “Davida Natuna o, au novetuġa-ġwagu!”

⁴⁹ Iesu eruġa-tarito, benamo ekirato, “Ġokeaia.” Benamo ġia na mata-bubu tarimana ġekeaiato, ġekirato, “Asi bono gari, novariġisi, Iesu na ekeamuni bene.”

⁵⁰ Benamo ġena koudi efitoġaiato, eburi-vaisito, Iesu sevina ġana eiaġoto.

⁵¹ Benamo Iesu na edanaġiato, ekirato, “Kara ġemu naveia otoni?” Mata-bubu tarimana evaġa-veseto, ekirato, “Vevaġa-riba tarimamu, matagu noma keo-fakaia.”

⁵² Benamo Iesu ekirato, “Noiaġo, ġemu veġabidadama na bevaġa-namomu.” Benamo asikauna matana enamoto e eboġeboġe-ginikauto, benamo Iesu murina na dabara na eraka-iaġoto.

11

Iesu ġena rakatoġa Ierusalem ai ġevonevone-raġe viniato

Ioane 12:12-19

¹ Ġeraka-iaġoto-ġoi, Ierusalem ġekavinaġiato-ġoi, ma Betefage e Betania ai ġeraġasito Olive Ġorona rekenai, benamo Iesu na ġena mero ruarua etuġu-guinerito,

² ekirarito, ekirato, “Ġoiġo, ġoira vanuġana ġana. Boġo raġasini nai, doniki natuna ta barutarinai boġo ġitaiani, iatanai tarima ta roġosi bene raġe. Boġono ruġaia, benamo boġono ġori-iaġomaia.

³ Bema tarima ta na bedanaġimini, bekirani, ‘Ġomi tu karase nai maniġesi ġoveiani?’ betoni nai, boġono kiraia, ‘Vereġauka na eura-viniani, vau ma betuġu-ġenoġoiani.’ ”

⁴ Benamo ġerakato, ġeiaġoto, doniki natuna ġea ġoitaġoato numa ta ġoiranai barutari. Ġeruġaiato-ġoi nuġanai,

⁵ monai ġeruġa-taġoto-ġoi tarimari na ġedanaġirito, ġekirato, “Ġomi tu karase nai mani doniki natuna ġoruġaiani?”

⁶ Benamo ġevaġa-veserito Iesu na ekirarito kavana, vau ġetuġu-rakarito.

⁷⁻⁸ Benamo doniki natuna Iesu ġenai ġeġori-iaġoato, ġeri dabuġa barari doniki doġenai ġeia-va-kaurito, benamo Iesu etanukauto. ⁸ Tarimarima ġutuma ġeri dabuġa barari dabarai ġeia-avarito. Kota tu ġau lauri boġai ġebasito, benamo dabarai ġetorerito.

⁹ Ġoirai e gabi ai ġerakato tarimari mabarari na ġevone-raġeato-ġoi, ġekirato,

“Hosana, Vereġauka aranai eiaġomani tarimana sivaġa-namoa!

10 Davida ġita Tamara
 ġena Basileia eiaġomani,
 sivaġa-namoa!
 Hosana guba tuġunai!”

11 Iesu Ierusalemaj eraġasito nai, Rubu Veaġa nuġanai eraka-toġato, daga mabarari eġita-vaġa-ġaurito. Senaġi elavilavito nai, ġia ma ġena mero gabanana ruarua (12) ġesi ġeraka-rosito, Betania ġana ma ġeġenoġoito.

Iesu na figi ġauna etovoġaiato

Mataio 21:18-19

12 Ma elaġanito, ġia na Betania ġeraga-kwaneato, ġeraka-iaġoto-ġoi nuġanai, Iesu evitoato.

13 Eboġeto, figi ġauna ma launa ta eġitaiato fakana kota manaġai, benamo eiaġoto, nea ġitaia ma tauna ba asiġina. Monai ea raġasito tu, ġwana ta asi edoġariato, launa korina moġo, korana ġena ġwa ġarona roġo nai.

14 Benamo Iesu na figi ġauna ekiraiato, ekirato, “Ġoi ġwaġwamu tarima ta na asi ma beġaniani, toma beiaġoni vanaġivanaġi!” Mai guruġa ġena mero na ġeseġaġiato.

Iesu na Rubu Veaġa eiarevaiato

Mataio 21:12-17; Luka 19:45-48; Ioane 2:13-22

15 Ierusalemaj ġevotuto, Iesu Rubu Veaġa nuġanai eraka-toġato, benamo voivoi tarimari elai-rosirito. Moni ġesenisito-ġoi tarimari ġeri fata e pune ġevoivoi-iaġirito-ġoi tarimari ġeri diġoka eġuke-vebuburito.

16 Rubu Veaġa nuġana na ġeri farefare ġeġwa-iaġorito-ġoi tarimari maki ekira-ġoirito.

17 Benamo tarimarima evaġa-ribarito, ekirato, “Buka Veaġa nuġanai tu maiġesi etoreato, Barau ekirato, ‘Au ġegu numa tu bese irauirau ġeri ġuriġuri numanai beġe kiraġiani,’ senaġi ġomi na tu lema tarimari ġeri gumu gabunai boġo vaġa-iaġoa.”

18 Rubu Veaġa vereri baregori e taravatu ġevevaġa-riba iaġiato-ġoi tarimari na ġeseġaġiato nai, Iesu beġene vaġia dabarana ġevetauato. Iesu garina ġeveito-ġoi, korana tarimarima mabarari na ġena vevaġa-riba guruġari ai ġeġaba-rakavato-ġoi.

19 Elavilavito, benamo Iesu ma ġena mero ġesi vanuġa barana ġeraga-kwaneato.

Figi ġauna emaseto

Mataio 21:20-22

20 Boġiboġi ai dabara na ma ġeraka-vanaġito nuġanai, mo figi ġauna ġeġitaiato, emarai-ġosito, ġokana maki ġemaseto.

21 Petero na etuġamaġi-taġoato, benamo Iesu ekiraiato, ekirato, “Vevaġa-riba tarimamu, noġitaia, ġoi na mo figi ġauna otovoġaiato dagarana tu varau bemase.”

22 Benamo Iesu na evaġa-veserito, ekirato, “Barau boġono ġabidadamavinia.

23 Moġoni akiramini, tarima ta na mai ġoro bekiraiani, ‘Noveraġa-raġe, be davarai noa vefu-rei,’ benamo nuġana asi ma bedaradarani, senaġi bevaġa-moġoniani, kara bekiraġiani dagarana bemoġonini nai, mo veġa tu beġorani.

24 Moġa lorinai akiramini, kara boġo noġini ġauġau ai nai, boġo vaġa-moġonia, boġo doġaria, benamo boġo ġabiani.

25 Bema ġoruġa-tarini, benamo ġoġauġauni nai, rakava boġono tuġamaġi-fitogari, bema tarima ta ġenai ma ġemi nuġa meto nai, benamo ġomi Tamami gubai etanuni na maki ġemi rakava betuġamaġi-fitogarini. [26 Senaġi bema

gomi na tarima ġeri rakava asi boġo tuġamaġi-fitoġarini nai, ġomi Tamami gubai etanuni na maki ġemi rakava asi betuġamaġi-fitoġarini.]”

Iesu ġena seġuka korana ġedanaġiato

Mataio 21:23-27; Luka 20:1-8

²⁷ Benamo ġia Ierusalemaj ma ġeraġasito. Monaj Iesu Rubu Veaġa nuġanaj erakato-ġoi nuġanaj, Rubu Veaġa vereri baregori, e taravatu ġevevaġa-riba iaġiato-ġoi tarimari, ema Iuda vereri ġia ġenaj ġeiaġoto.

²⁸ Benamo ġedanaġiato, ġekirato, “Kamara maoro ai ġoi na mai veiġa oveirini? Dei na maoro evinimuto?”

²⁹ Iesu na evaġa-veserito, ekirato, “Au na vedanaġi sebona avinimini, boġo vaġa-veseani nai, au na kamara maoro ai mai veiġa aveirini bakira-varamini.

³⁰ Ioane ġena babatiso veiġana tu guba na eiaġomato, ba tarimarima ġerina?”

³¹ Ġia fakari ai ġeverorito, ġekirato, “Bema ġita bita kirani, ‘Barau ġenana’ bita toni nai, ġia bekirani, ‘Karase nai Ioane asi ġovaġa-moġoniato?’ betoni.

³² Senaġi bema ġita bita kirani, ‘Tarimarima ġerina’ bita toni nai maki asi ilaila.” Ġia tu tarimarima gariri ġegarito, korana ġia ribari, Ioane tu peroveta tarimana korikori.

³³ Moġa lorinaj ġia na Iesu ġevaġa-veseato, ġekirato, “Ġai asi ribama.” Benamo Iesu na ġia maki ekirarito, ekirato, “Au na maki kamara maoro ai mai veiġa aveirini asi bakira-varamini.”

12

Barabore - Vine tavoġana ġitaġauna tarimari rakavari

¹ Iesu na barabore ai ma evaġa-guruġarito, ekirato, “Tarima ta vine tavoġana evaroato, maġuna eġabiato, tano ai vine gigi-gigina gurina ekwa-iato, tavoġa ġitaġauna numana maki evaġa-ruġaiato. Moġa murinaj tavoġa ġitaġauna tarimari ġeri ai ġena tavoġa eraga-kwaneato, benamo erakato gabu ta ġana.

² Vine ġwari (o grapes) ġemaġeto, benamo ġia na ġena vetuġunaġi tauna ta etuġuato tavoġa narinarina tarimari ġeri ai, vine ġwari kota benea ġabi ġana.

³ Senaġi ġeġabi-tariato, benamo ġekwariato vau, ġimana kori ġetuġu-ġenoġoiato.

⁴ Tavoġa biaguna na ġena vetuġunaġi tauna ta ma etuġuato, senaġi ġia tu debana ġekodo-fakaiato e ġevei-maiaka maiakaiato.

⁵ Benamo ta ma etuġuato, senaġi ġevaġi-maseato; ema vetuġunaġi tarimari ġutuma etuġurito, kota tu ġekwaririto, kota tu ġevaġirito.

⁶ Tarima sebona ta tu roġo ġia sevinaj, ġia natuna korikori, ġena lalokau merona. Dokonaj ġia etuġuato, ekirato, ‘Natugu natuġua, ġia na beġene gubakau.’

⁷ Senaġi tavoġa ġitaġauna tarimari tauġeri ġeveguruġa-vevinito, ġekirato, ‘Mani tu tavoġa beġaunaiani merona, be siġabia, sivaġia, benamo tavoġa tu ġita ġera.’

⁸ Benamo ġeġabi-tariato, ġevaġiato, vine tavoġana murikanaj ġefiu-rošiato.”

⁹ Iesu evedanaġito, ekirato, “Tavoġa biaguna na tu kara beveiani? Ġia beiaġomani, tavoġa narinarina tarimari bevaġi-ġosirini, benamo vine tavoġana tarima irauri tari ma bevinirini.

¹⁰ Gomi na mai toretore Buka Veaġaj asi ġoiaviani, iniġesi ekirani,

‘Fore numari ġeragarini
tarimari na asi ġeura-viniato
ma ġefitoġaiato forena tu
duġu forenai eiāġoto.

11 Mai veīġa maiġa tu
Vereġauka na eveiato,
matara na taġitaiani,
ġitaġitana irau veġata.’ ”

12 Benamo Iuda vereri na Iesu beġene ġabia dabarana ġevetauato, korana ġia ribari, Iesu na mai barabore tu ġia ekiraġirito-ġoi nai. Senaġi tarimarima ġutuma ġevegogo-taġoto-ġoi gariri ġeveito naima ġeraga-kwaneato, ġerakato.

*Kaisara, Roma ġeri vere, ġena takesi moniri
Mataio 22:15-22; Luka 20:20-26*

13 Gabivau Farisea tarimari e Heroda murinai ġerakato-ġoi tarimari kotari Iesu ġenai ġetuġu-iaġorito, ġena guruġai beġene vaġa-vedaġa-raġea e beġene ġabia ġana.

14 Ġeiaġomato, benamo Iesu ġema ribaġaniato, ġekirato, “Vevaġa-riba tarimamu, ġai ribama ġoi tu moġoni vei-iobukaiobuka tarimamu, tarimarima gariri asi oveini. Tarima ġeri dagi maki asi otuġamaġirini, senaġi ġoi na moġoni ai Barau ġena dabara ovevaġa-riba iaġi-ġitakauani. Novaġa-ribama, Kaisara, Roma ġeri vere, ġenai takesi baġana dava ba asiġi? Baġana vinia ba asi baġana vinia?”

15 Senaġi Iesu na ġeri ġofaġofa eribaiato nai, ekirarito, ekirato, “Karase nai au ġoribaġaniguni? Silva monina ta ġoġwa-iaġomaia, nama ġitaia.”

16 Benamo ta ġeġwa-iaġomaiato, Iesu na edanaġirito, ekirato, “Mai tu dei laulauna e dei arana?” Ġia ġevaġa-veseto, ġekirato, “Kaisara ġena.”

17 Iesu na ekirarito, “Kaisara ġena dagara Kaisara boġono vinia, Barau ġena dagara Barau boġono vinia.” Benamo ġeġaba-rakavato ġia ġenai.

*Variġisi-ġenoġoi guruġari
Mataio 22:23-33; Luka 20:27-40*

18 Sadukea tarimari kota Iesu ġenai ġeiaġoto. Ġia ġeri tuġamaġi tu, mase tarimari asi ma beġe variġisi-ġenoġoini. Benamo Iesu ġedanaġiato, ġekirato,

19 “Vevaġa-riba tarimamu, Mose na taravatu ġai ġema maiġesina etoreato, ‘Bema tau ta kakana bemaseni, vabuna bemase-kwaneani, ma asi naturi nai, mo tau na kakana vabuna bene ġaraġoa, naturi beġene maġuri mase tauna ġena.’

20 Mero mabarari tu imaima ruarua (7). Mero guinena na eġaraġoato, ma emaseto asi natuna.

21 Mero vaġa-ruaruana na vabuna ma eġaraġoato, senaġi ġia maki emaseto asi natuna. Mero vaġa-toitoina maki moġesina moġo.

22 Moġa nuġanai ġia mabarari tu imaima ruarua (7), naturi ta asi ġevaġa-ġoraiato. Dokonai mo vavine maki emaseto.

23 Variġisi-ġenoġoi ġaronai mo vavine tu dei ġaraġona? Korana ġia tu tauri 7 na ġeġaraġoato.”

24 Iesu na evaġa-veserito, ekirato, “Ġomi tu ġokerereni, korana Buka Veaġa anina ema Barau ġena seġuka asi ribami.

25 Mase na ma beġe variġisi-ġenoġoini tarimari tu asi ma beġe veġaraġoni. Ġia tu aneru kavana gubai.

²⁶ Mase na ma beḡe variḡisi-ḡenoḡoini guruḡari Mose ḡena bukai asi ḡoiaviani? ḡau eḡaraiato varina nuḡanai Barau na Mose ekiraiato, ekirato, ‘Au tu Aberahamo ḡena Barau, Isako ḡena Barau, ema Iakobo ḡena Barau.’

²⁷ Gia tu dia mase tarimari ḡeri Barau, senaḡi maḡuri tarimari ḡeri Barau. ḡomi tu ḡokerere-rakava rakavani!”

Veuvavini tu taravatu mabarari evanaḡirito

Mataio 22:34-40; Luka 10:25-28

²⁸ Taravatu ḡevevaḡa-riba iaḡiato-ḡoi tarimana ta eiaḡomato, ḡeri guruḡa-guruḡa eseḡaḡiato, benamo eḡitaiato, Iesu na evaḡa-vese ginikaurito nai, edanaḡiato, ekirato, “Taravatu mabarari nuḡari ai aiḡa tu barego vedaureana?”

²⁹ Iesu na evaḡa-veseato, ekirato, “Barego vedaureana tu maiḡa: ‘Isaraela tarimami o, ḡoseḡaḡi, Vereḡauka ḡita ḡera Barau tu Vereḡauka sebona kwariḡutu.

³⁰ Vereḡauka ḡoi ḡemu Barau bono ura-vinia ma nuḡamu mabarana, ma iaukamu mabarana, ma ḡemu tuḡamaḡi mabarana, ma kokoremu mabarana ḡesi.’

³¹ Vaḡa-ruaruana tu maiḡa: ‘Sevimu tarimana bono ura-vinia, ḡoi tauḡemu oveura-vinini kavana.’ Taravatu ta na mai taravatu ruarua asi bevanaḡirini.”

³² Taravatu evevaḡa-riba iaḡiato-ḡoi tarimana ma evaḡa-veseto, ekirato, “Vevaḡa-riba tarimamu, ḡoi ḡemu guruḡa tu moḡoni, Barau tu sebona moḡo, asi ta maia.

³³ Bono ura-vinia ma nuḡamu mabarana, ma ḡemu tuḡamaḡi mabarana, ma gwadamu mabarana, ema sevimu ai etanuni tarimana maki bono ura-vinia, ḡoi tauḡemu oveura-vinini kavana. Maiḡa tu barego vedaurea, ginitaḡo dagarari e boubou dagarari mabarari evanaḡirito.”

³⁴ Benamo Iesu na mo tarima ḡena vevaḡa-vese eḡitaiato ma iaunegana e ma tuḡamaḡi-fakana ḡesi, benamo ekiraiato, ekirato, “ḡoi e Barau ḡena Basileia fakami tu asi manaḡa.”

Moḡa murinai tarima ta na asi ma edanaḡiato, korana ḡegarito nai.

Keriso tu Davida natuna ba Davida ḡena Vereḡauka?

Mataio 22:41-46; Luka 20:41-44

³⁵ Iesu Rubu Veḡa nuḡanai evevaḡa-ribato-ḡoi nuḡanai, ekirato, “Taravatu ḡevevaḡa-riba iaḡiani tarimari tu kamasi nai Keriso tu Davida natuna ḡetoni?”

³⁶ Davida Iauka Veḡa na riba e tuḡamaḡi-faka eviniato, benamo eguruḡa-foforito, ekirato,

‘Barau na au ḡegu Vereḡauka ekiraiato:

Au ḡimagu aroribana rekenai

noma tanu,

bene iaḡo mo, ḡoi ḡebaru-vinimuni tarimari ḡoi kwakumu gaburenai batorerini.’

³⁷ Davida na Keriso tu ‘Vereḡaukana’ ekiraḡito; kamasi nai Keriso tu Davida natuna?”

Taravatu ḡevevaḡa-riba iaḡiato-ḡoi tarimari ḡeri ḡofaḡofa veiḡari

Mataio 23:1-36; Luka 11:37-54; 20:45-47

Tarimarima ḡutuma lelevaḡi Iesu ḡena guruḡa ma iakuri ḡesi ḡeseḡaḡiato.

³⁸ ḡena vevaḡa-riba nuḡanai ekirato, “Taravatu ḡevevaḡa-riba iaḡiani tarimari boḡono ḡita-ginikauri. ḡia ḡeurani dabuḡa maukari beḡene riḡo,

maketi gaburi ai beġene rakao-rakao, tarimarima na beġene vaġa-namori urari ai.

³⁹ Rubu nuġari ai e ġanivegogo gaburi ai ġeri ura sea namori ai beġene tanu.

⁴⁰ Ġia na vabu ġeri numa e farefare ġevaġa-koririni. Ġeri ġauġau tu mauka kenene, ġeġofaġofani. Ġia tu meto barego vedaurea beġe ġabini.”

Vabu ġena boubou monina

Luka 21:1-4

⁴¹ Iesu moni-tore mauġana ġoiranai etanu-tarito, benamo tarimarima moni ġeġurato-ġoi eġitarito. Farefare e moni vovoka tarimari ġutuma moni barari ġeġurato-ġoi.

⁴² Senaġi asi-ġena e asi-ġana vabuna ta eiaġomato, ġena moni misiri ruarua moġo eġura-rigorito, mai tu noġa moġo toea sebona kavana.

⁴³ Benamo Iesu na ġena mero ekearito ġia ġenai, benamo ekirarito, ekirato, “Moġoni akiramini, mai vabu na beġuraia monina na mabarari ġeri vini bevanaġiri.

⁴⁴ Korana ġia mabarari ġeri moni vovoka ġerina koturi moġo beġe vini, senaġi mai vabu tu asi ġena-ġana na nuġanai ġenai kara ġetanuni ġena maġuri ai bere vevaġa-kava-iaġiri dagarari mabarari beġurari.”

13

Iesu na vau beġea ġorani dagarari ekiraġirito

¹ Iesu Rubu Veaġa na eraka-rosito-ġoi nai, ġena mero ta na ekiraiato, ekirato, “Vevaġa-riba tarimamu, mai fore asikeikeiri noġitari e mai numa baregori ma marevari maki noġitari.”

² Iesu na evaġa-veurato, ekirato, “Mai numa baregori oġitarini? Mai fore ta fore ta iatanai asi beġe tanuni, mabarari beġe vare-bubu-rigorini.”

³ Iesu Olive Ġorona tuġunai etanu-taġoto-ġoi, Rubu Veaġa Ierusalemaj eġita-iaġoato-ġoi nuġanai, Petero, e Iakobo (o Iames), e Ioane, ema Anduru na ġedanaġi-ġairiato, ġekirato,

⁴ “Nokira-varama, mai dagara tu aitoma beġe ġorani, ema beġe ġorani nai, kamara vetoġa na bevaġa-foforiani, maniġeri mabarari beġe ġorani?”

⁵ Benamo Iesu na evaġa-veserito, ekirato, “Ġomi lorimi boġono vetore, tarima ta na asi bene ġofami.

⁶ Tarima vovoka au aragu ai beġe iaġomani, beġe kirani, ‘Tarimana tu au maiġegu!’ Tarima ġutuma beġe ġofarini.

⁷ Bema ġomi na vetari o tuari gururi e tuari variri boġo seġaġirini nai, nuġami asi beġene raġe. Maniġeri dagara tu beġe ġorani, senaġi dokona tu asi roġo.

⁸ Tanobara ta tanobara ta ġesi beġe vevaġini, gavamani ta gavamani ta ġesi beġe vetarini. Gabu ġutuma nuġari ai tano beġe iagani, doġe maki beġe ġorani. Mai tu midigu moġo besinaiani, noġa moġo mero keina emaġurini midiguna kavana.

⁹ Tauġemi boġono venari-ginikau, korana beġe ġabimini, Iuda ġeri kanisoro tarimari ġeri ai beġe ġori-iaġomini e rubu nuġari ai beġe kwarimini. Au ġoġabi-raġeguni dainai, gavana e vere barari o kini ġoirari ai roġo boġo ruġani, au vaġa-moġonigu ai boġono iaġo.

¹⁰ Vari Namona tu tanobara mabarari nuġari ai beġe ġobata-iaġi guineani.

¹¹ Bema Kota tarimari ġoirari ġana beġe ġori-iaġomini nai, kara toma boġo kiraġirini guruġari asi boġono nuġa-vekvaraġi-iaġiri. Ġarona beraġasini vau,

Barau na kara bevaḡa-ribamini guruḡari boḡono kiraḡiri, korana dia ḡomi boḡo guruḡani, senaḡi Iauka Veaḡa beguruḡani.

¹² Kakana na tarina berevaiani bene mase ḡana, tamana na natuna maki moḡesina beveiiani. Naturi na tamari sinari beḡe seḡafore-vinirini ema beḡe vaḡirini.

¹³ Tarimarima mabarari na beḡe iau-rakavamini, korana au ḡoḡabi-raḡeguni nai. Senaḡina deikara bevevaḡa-gwaḡiḡini mo dokona tu be-maḡurini.”

Vevaḡa-gari dagarana befoforini

Mataio 24:15-28; Luka 21:20-24

¹⁴ “Bema ḡomi na dagara rakava vedaureana, vevaḡa-gari dagarana, boḡo ḡitaiani, asi bene ruḡa gabunai beruḡani.” Mai guruḡa beiaviani tarimana bene riba maoro anina tu kara. “Benamo deidei Iudeai ḡetanuni tarimari ḡoro ḡana beḡene raga-iaḡo.

¹⁵ Deikara numa tuḡunai etanu-taḡoni tu, asi ma bene raka-toḡa numa nuḡana ḡana ḡena farefare ḡabiḡabiri.

¹⁶ Deikara vamoka nuḡanai maki asi ma bene ḡenoḡoi ḡena koudi ḡabi-ḡabiri.

¹⁷ Mo negai vavine ma baniri e ḡabi-variḡu vavineri kika ma vetuḡari!

¹⁸ Boḡono ḡauḡau, mai dagara asi bene ḡora ḡura e nagure ḡarori ai!

¹⁹ Korana mo negai rakava e midigu barego beḡe raḡasini, Barau na tano-bara eveiato beiāḡoma maitoma, rakava e midigu moḡesina asi ḡeḡorani. Ma maiḡa murinai moḡesina kavana ta asi ma beḡorani.

²⁰ Bema Vereḡauka na mo ḡaro rakavari asi bere vaḡa-kubiri, tarima ta asi bere maḡuri riba, senaḡi eḡabi-hidirito tarimari dairi ai, ḡia na ḡarori evaḡa-kubirito.

²¹ Mo negai, bema tarima ta na bekiramini, ‘Ḡoḡitaia, Keriso tu maiḡa!’ o ‘Ḡoḡitaia, ḡia tu iomoḡa!’ betoni nai, asi boḡono vaḡa-moḡonia.

²² Korana tu Keriso ḡofaḡofari e peroveta tarimari ḡofaḡofari beḡe foforini, vetoḡa boruri e nuḡa-farevaḡi veiḡari beḡe veirini, Barau na eḡabi-viriḡirito tarimari beḡene ḡofa-veḡonuri ḡana.

²³ Moḡesi nai tauḡemi boḡono venari; dagara mabarari tu akiravara-guinemini, aoa roḡosi bene raḡasi nai.”

Tarimarima Natuna ḡena iaḡoma

Mataio 24:29-31; Luka 21:25-28

²⁴ “Senaḡi mo negai, rakava beḡe ḡorani murinai, ḡaro bemukunani e ḡue maki asi bemamani,

²⁵ visiḡu guba na beḡe ketoni e guba seḡukari beḡe iaḡaiagani.

²⁶ Benamo tarima na Tarimarima Natuna beḡe ḡitaiani, magube na beiāḡomani ma seḡuka barana e ma marevana ḡesi.

²⁷ Benamo ḡia na aneru betuḡurini, eḡabi-viriḡirito tarimari beḡe vaḡa-vegogorini tanobara mabarari na.”

Barabore - Vevaḡa-riba figi ḡauna ḡenana

Mataio 24:32-35; Luka 21:29-33

²⁸ “Figi ḡauna ḡenana mai barabore boḡono ribaia: Kabona ḡefori-raḡeni e launa ḡefafani nai, ḡoribani, ḡaro ḡena tora taimina tu bekavinaḡi ḡotoni.

²⁹ Moḡa ilailanai, ḡomi maki bema mai dagara beḡe ḡorani boḡo ḡitarini nai, boḡono riba, Tarimarima Natuna tu bekavinaḡi ḡatama bokai.

³⁰ Moḡoni akiramini, mai ḡuru asi bekorini, beiāḡoni mo, mai dagara mabarari beḡe ḡorani.

³¹ Guba e tanobara beḡe rekwa-rekwani, senaḡi au ḡegu guruḡa tu asi beḡe rekwa-rekwani, beḡe tanu-vanaḡi vanaḡini.”

Ḡaro ema hora tarima ta asi ribana

Mataio 24:36-44

³² “Senaḡi mo ḡaro ema aoa tu tarima ta asi ribana, e aneru gubai asi ribari, ema Natuna maki asi ribana, senaḡi Tamana ḡereḡana moḡo ma ribana.

³³ Lorimi boḡono vetore, boḡono venari-ginikau, korana asi ribami, aitoma mo aoa beraḡasini.

³⁴ Ḡia tu maiḡesina kavana, tarima ta eraka-ḡerevaḡito, ḡena numa eraga-kwaneato, benamo ḡena vetuḡunaḡi tarimari maoro evinirito, tata ḡeri ḡauvei beḡene vei. Ḡatama-boka narinarina tarimana maki ekiraiato, bene rivigaua.

³⁵ Moḡesi nai ḡomi maki tataḡa-taḡo boḡono tanu, korana numa biaguna beḡenoḡoini aoana tu asi ribami, lavilavi ai, ba boḡi nuḡanai, ba kokoroku beḡoḡini ai, ba boḡiboḡi ai.

³⁶ Irau mai moḡo beraḡasini, benamo genami ai beḡoitaḡomini ḡesi.

³⁷ Au na kara ḡomi akira-varamini guruḡana tu tarimarima mabarari maki akira-vararini, akirani, “Tataḡa-taḡo boḡono tanu e boḡono venari-ginikau!”

14

Iesu beḡene vaḡia dabarana ḡevetauato Ioane 11:45-53

¹ Ḡaro ruarua moḡo, benamo Pasova verekona o Iuda tarimari mase aneruna na evanaḡirito asi evaḡirito verekona e asi etubuni faraona verekona beḡe veiani nuḡanai, Rubu Veaḡa vereri baregori e taravatu ḡevevaḡa-riba iaḡiato-ḡoi tarimari na Iesu beḡene ḡabi-lemmaia, benamo beḡene vaḡi-masea dabarana ḡevetauato-ḡoi.

² Senaḡi ḡekirato, “Dia vereko nuḡanai bene ḡora, korana vereko beḡe iaḡoma tarimari ḡia iatana na beḡe burini garina.”

Vavine ta ḡena veiḡa namona

Mataio 26:6-13; Ioane 12:1-8

³ Iesu Betania ai Simona lepera tarimana ḡena numai eḡaniḡanito-ḡoi nuḡanai, vavine ta eraka-toḡato, kavabu namona ta, alabasta forena na ḡeveiato kavabuna, eḡabi-kauato, nuḡanai tu muramura ma bonana namona. Mo muramura tu ḡauḡa arana nad ḡokana na ḡeveito-ḡoi dagarana, ma voina tu varaḡe rakava. Mo vavine na mo kavabu bokana ebota-fakaiato, benamo muramura Iesu debanai ebubuato.

⁴ Ḡia sevinai tarimari kota tu ma nuḡa-metori ḡesi ḡeveguruḡa-vevinito, ḡekirato, “Karase nai mai muramura bonana namona efitoḡa-kavaiani?”

⁵ Bere voivoi-iaḡia, benamo silva moniri sinau toitoi (300) bere ḡoitaḡoa, (mai tu tarima ta davana laḡani ta nuḡanai kavana), benamo asi ḡeri-ḡari tarimari bere viniri.” Benamo ḡia na mo vavine ḡevaneato.

⁶ Senaḡi Iesu ekirato, “Ḡoraga-kwanea! Kara dainai ḡomi na meto ḡoviniani? Mai vavine na tu veiḡa namona au ḡegu ai beveia.

⁷ Asi ḡeri-ḡari tarimari tu ḡomi ḡesi boḡo tanu-vanaḡi vanaḡini, be boḡo urani nai, boḡono vaḡa-kavari. Senaḡi au tu dia ḡaro mabarari ḡomi ḡesi batanuni.

⁸ Mai vavine na tu kara bere veia dagarana beveia, ḡia na au tauḡanigu ai muramura bebubu-guinea gurigurigu ḡana.

⁹ Moĝoni akiramini, Vari Namona beĝe ĝobata-iaĝiani tanobara mabarari nuĝari ai, mai vavine na veiĝa beveia veiĝana maki beĝea kiraĝiani, ĝia tuĝamaĝi-iaĝina.”

Iudas na Iesu erevaiato

Mataio 26:14-16; Luka 22:3-6

¹⁰ Benamo Iudas Isakariota, gabanana ruarua (12) tarimana ta, Rubu Veaĝa vereri baregori ĝeri ai eiaĝoto, Iesu benea revaia ĝia ĝeri ai ĝana.

¹¹ Benamo ĝia na ĝeseĝaĝiato nai, ĝeiku-rakavato, benamo ĝekira-toreato, moni beĝe viniani. Benamo Iudas na ĝimari ai betore-kauani dabarana ma evetauato-ĝoi.

Iesu ma ĝena mero ĝesi ginitaĝo mamoenā ĝeĝaniato

Mataio 26:17-25; Luka 22:7-14; 22:21-23; Ioane 13:21-30

¹² Ĝaro giniguinenai, asi etubuni faraona verekona veiveina e ginitaĝo mamoenā vaĝivaĝina ĝaronai, Iesu ĝena mero ĝevedanaĝito, ĝekirato, “Ĝai tu ainai Pasova verekona baĝana vei-torea, bono ĝania?”

¹³ Benamo Iesu na ĝena mero ruarua etuĝurito, ekirarito, ekirato, “Vanuĝa baregonai boĝono raka-toĝa, benamo tarima ta nanu gwaĝutuna befaĝaiani boĝo ĝoitaĝoani. Murina na boĝono iaĝo.

¹⁴ Benamo beragekauni numanai numa biaguna boĝono vaĝa-guruĝaia, boĝono kira, ‘Vevaĝa-riba tarimana ekirani: Au ĝegu varivari daiĝutuna tu aiĝa, ĝegu mero ĝesi monai ginitaĝo mamoenā baĝana ĝania?’

¹⁵ Benamo ĝia na daiĝutu baregona ta numa tuĝunai bevaĝa-ĝitamini iarevatore. Monai boĝono dabaraia ĝita ĝara.”

¹⁶ Benamo mero ĝeiaĝoto, vanuĝa barana nuĝanai ĝeraka-toĝato, Iesu na ekiraĝirito ilailari ai ĝedoĝaririto. Monai vereko ĝeveiato.

¹⁷ Elavilavito, Iesu ma ĝena mero gabanana ruarua (12) ĝesi ma ĝeraĝasito.

¹⁸ Ĝeĝaniĝanito-ĝoi nuĝanai Iesu ekirato, “Moĝoni akiramini, ĝomi ta na au borevaguni, ta au ĝesi ini taĝaniĝani-vegogoni tarimamu ta na.”

¹⁹ Ĝia mabarari nuĝari ma metori ĝesi irau sebori irau sebori na ĝedanaĝiato, ĝekirato, “Moĝoni dia au, ene?”

²⁰ Iesu na ekirarito, ekirato, “Mai tu ĝomi gabanana ruarua (12) fakami ai ta dei au ĝesi diĝu sebonai ĝanaba-riĝoni tarimana.

²¹ Tarimarima Natuna bemaseni, Buka Veāĝai ĝetoreato ilailanai. Senaĝi Tarimarima Natuna berevaiani tarimana vetuĝana kekei, asi bere maĝuri tu namo.”

Vereĝauka ĝena ĝanivegogo veaĝana

Mataio 26:26-30; Luka 22:15-20; 1 Korinto 11:23-25

²² Ĝia ĝeĝaniĝanito-ĝoi nuĝanai, Iesu na beredi eĝabiato, Barau evaĝa-namoato, etaviato, evinirito, benamo ekirato, “Ĝoĝabia, mai tu au tauĝanigu.”

²³ Ĝia na kapusi ma eĝabiato, evaĝa-namoato murinai evinirito, benamo mabarari na ĝeniuato.

²⁴ Benamo Iesu na ekirarito, ekirato, “Mai tu au raragu, Ginitaĝo Variĝuna evaĝa-moĝoniani, bevebubuni, tarimarima ĝutuma vaĝa-maĝuriri.

²⁵ Moĝoni akiramini, vine nanuna asi ma banu-ĝenoĝoiani, beiaĝoni mo, Barau ĝena Basileiai vau ma banu-ĝenoĝoiani.”

²⁶ Benamo mari ta ĝemariato murinai, ĝeraka-rosito, Olive Ĝorona ĝana ĝeiaĝoto.

*Iesu na Petero ġena vekira-ġuniġau ekiraġi-toreato
Mataio 26:31-35; Luka 22:31-34; Ioane 13:36-38*

²⁷ Benamo Iesu na evaġa-guruġarito, ekirato, “Ġomi mabarami ġemi veġabidadama au ġegu ai boġo raga-kwaneani, korana Buka Veaġai maġesi etoreato,

‘Au na mamoe ġitaġauri
tarimana bavaġiani,
benamo mamoe mabarari
beġe raga-lausini.’

²⁸ Senaġi au mase na ma bavariġisi-ġenoġoini murinai, baraka-guineni Galilea ġana. Monai vau bitana vedoġari.”

²⁹ Petero ekirato, “Mabarari na ġeri veġabidadama ġoi ġemu ai beġe raga-kwaneani, senaġi au na tu asigina.”

³⁰ Iesu na evaġa-veseato, ekirato, “Moġoni akiramuni, toma boġi koko-roku vaġa-ruarua roġosi bene goġi nuġanai, ġoi na au vaġa-toittoi bokira-ġuniġauguni.”

³¹ Senaġi Petero eguruġa-ġiġiraġeto, ekirato, “Bema ġoi ġesi bita mase-vegogoni maki, au na ġoi tu asi veġata bakira-ġuniġaumuni.” Mabarari moġesi moġo ġekirato.

*Iesu eġauġauto Getesemane ai
Mataio 26:36-46; Luka 22:39-46*

³² Ġia gabu arana Getesemane ai ġea raġasito, benamo Iesu na ġena mero evaġa-guruġarito, ekirato, “Mainai ġotanau, au tu naiaġo, naġuriġuri roġo.”

³³ Benamo Petero, e Iakobo (o Iames), ema Ioane moġo eġoririto, ġia ġesi ġeiaġoto. Moġa nuġanai Iesu tauġanina efarakaiato, egarito, nuġana maki evekwaraġito-ġoi.

³⁴ Benamo ekirarito, ekirato, “Au nuġagu na meto asikei eġwaiani, dori evaġiguni; mainai ġotanau, boġono venari.”

³⁵ Iesu kota ma eraka-naġito, tano ai eketo-tarito, benamo Barau enoġiato, ekirato, bema ma dabara ta moġa neganai, mai aoa metona ġenana bene vanaġi.

³⁶ Ekirato, “Tama, Tamagai o, dagara mabarari ġoi ġemu ai veiveiri tu ilaila. Mai midigu bedina ġeguna noma ġabi-vaġia. Senaġi dia au ġegu ura, ġoi ġemu ura moġo.”

³⁷ Benamo eġenoġoito nuġanai tu, ġena mero genamaseri ai eġoitaġo-rito, benamo Petero ekiraiato, ekirato, “Simona, ġoi tu ogenani? Aoa sebna ta kavana maki asi bovevaġa-gwaġiġini?”

³⁸ Boġono venari, boġono ġauġau, be veribaġani beiaġomani nai, asi boġono moira. Iauka tu moġoni eurani, senaġi tauġani tu emoirani.”

³⁹ Benamo ma eraka-veġitato, ea ġuriġurito, mo ġauġau guruġari guineri ma ea kiraġirito.

⁴⁰ Ma eġenoġoi-iaġomato nuġanai tu, genamaseri ai ma edoġaririto, korana matari tu gena na eġabi-rakavarito. Ġia asi ribari kamasi beġe vaġa-veseani.

⁴¹ Vaġa-toitoina ma eġenoġoito, benamo ekirarito, ekirato, “Ġomi tu roġo ġogenani e ġoiaġaraġini? Bevaitovo! Aoana varau beraġasi! Ġoġitaia, Tarimarima Natuna tu beġe revaia, rakava tarimari ġimari ai beġe torea.

⁴² Ġovariġisi, be si-iaġosi! Ġoġitaia, au revarevagu tarimana mai be-raġasi!”

*Iesu tuari tarimari o soldia na ġeġabiato
Mataio 26:47-56; Luka 22:47-53; Ioane 18:3-12*

⁴³ Iesu roĝo eguruĝato-ĝoi nuĝanai, Iudas, mero gabanana ruarua (12) tauna ta, eraĝasito. Tarimarima ĝutuma maki ĝia ĝesi ma ĝeri vetari baĝari e vevaĝi kwariri. Ĝia tu Rubu Veaĝa vereri baregori, e taravatu ĝevevaĝa-riba iaĝiato-ĝoi tarimari, ema Iuda vereri na ĝetuĝurito.

⁴⁴ Reva tarimana na vetoĝa ta ekiravara-torerito, ekirato, “Baverauani tarimana tu moĝa. Boĝono ĝabi-taria, boĝono ĝori-iaĝoa ĝomi ĝemi veĝitaĝau gaburenai.”

⁴⁵ Iudas eraĝasito nai, maoromaoro eiaĝoto Iesu ĝenai, benamo ekirato, “Vevaĝa-riba tarimamu o!” benamo everauato.

⁴⁶ Benamo tuari tarimari na ĝeĝabi-tariato, ĝedegodegoato.

⁴⁷ Senaĝi monai eruĝa-taĝoto-ĝoi tarimana ta, ĝena vetari baĝana einuvaĝiato, edaveato, benamo Rubu Veaĝa verena baregona ĝena vetuĝunaĝi tarimana seĝana ebasi-vaĝiato.

⁴⁸ Iesu na ekirarito, ekirato, “Au tu seĝafore doĝorona ta aĝori-kauani? Be ĝomi boĝo iaĝoma au ĝabiĝabigu tu, ma ĝemi vetari baĝari e vevaĝi kwariri ĝesi?”

⁴⁹ Ĝaro mabarari ai au tu ĝomi sevimi ai Rubu Veaĝa nuĝanai avevaĝa-ribato-ĝoi, senaĝi asi ĝoĝabiguto. A mai tu Buka Veaĝai ĝetore-guineato guruĝana vaĝa-moĝonina ĝana.”

⁵⁰ Ĝena mero mabarari na ĝeraga-kwaneato, ĝeraka-rovorovoto.

⁵¹ Mero variĝuna ta tu kefina korina, senaĝi dabuĝa ta na moĝo tauĝanina eriĝo-ĝauato, Iesu murinai erakato. Ĝia maki ĝeĝabi-tariato,

⁵² senaĝi ĝena dabuĝa ĝimari ai eraga-kwaneato, kefina kori moĝo eraga-kwaraĝato.

Iesu kanisoro tarimari ĝoirari ai

Mataio 26:57-68; Luka 22:54-55; 22:63-71; Ioane 18:13-14; 18:19-24

⁵³ Ĝia na Iesu ĝeĝori-iaĝoato Rubu Veaĝa verena baregona ĝenai, ema Rubu Veaĝa vereri baregori, e Iuda vereri, ema taravatu ĝevevaĝa-riba iaĝiato-ĝoi tarimari mabarari ĝeraka-vegogoto.

⁵⁴ Petero na Iesu eraka-ĝiuato, senaĝi ma fakana eiaĝoto mo, Rubu Veaĝa verena baregona ĝena numa maĝuna nuĝanai eraka-toĝato. Monai gadi tarimari fakari ai ea tanuto, benamo karava na etunuato-ĝoi.

⁵⁵ Rubu Veaĝa vereri baregori e Iuda ĝeri kanisoro tarimari mabarari na tu Iesu vaĝa-masena korana ta ĝevetauato, senaĝi ta tu asi ĝedoĝari-ato.

⁵⁶ Tarimarima ĝutuma ĝeri ĝofaĝofa guruĝari na ĝevaĝa-badeato-ĝoi, senaĝi ĝeri guruĝa tu asi ĝesebonato-ĝoi.

⁵⁷ Benamo tarima kota ĝeruĝa-vaesito, benamo mai ĝofaĝofa guruĝari ĝekiraĝirito, ĝekirato,

⁵⁸ “Ĝai tu ĝia ĝena guruĝa baĝa seĝaĝia, bekira, ‘Au na mai tarimarima ĝimari na ĝeragaiato Rubu Veaĝana barovoani, ema ĝaro toitoi nuĝanai ta ma baragaiani dia ĝima veiveina rubuna.’ ”

⁵⁹ Senaĝi ĝia ĝeri vevaĝa-bade guruĝari maki asi sebona.

⁶⁰ Benamo Rubu Veaĝa verena baregona ĝoirari ai eruĝa-vaesito, benamo Iesu edanaĝiato, ekirato, “Ĝoi tu asi bovaĝa-veseni? Maĝeri na ĝoi ĝevarifiu-iaĝimuni guruĝari tu kamasi?”

⁶¹ Senaĝi Iesu asi eguruĝato, ma asi evaĝa-veserito. Benamo Rubu Veaĝa verena baregona na ma edanaĝi-ĝenoĝoiato, ekirato, “Ĝoi tu Keriso, ĝevaĝa-namoani Barauna Natuna?”

⁶² Iesu na evaġa-veſeato, ekirato, “Tarimana au maiġegu! Ġomi na Tarimarima Natuna roġo boġo ġitaiani, Seġuka Barauna ġimana aroribanai betanuni, e guba maguberi iatari na beiġomani!”

⁶³ Benamo Rubu Veaġa verena baregona na ġena dabuġa edareato, ekirato, “Karase vevaġa-ġita tarimari roġo tavetaurini?”

⁶⁴ Barau vaġa-rakavana guruġana boġo seġaġia. Ġomi kara ġotoni?” Ġia mabarari ġekirato, “Bene mase moġo.”

⁶⁵ Benamo kota na ġekanunuato, matana ġekumu-ġauato, ġefaiſiato, ġekiraiato, ġekirato, “Ġoi tu peroveta tarimana, be nokiraġia, deikara na bekwarimu?” Benamo gadi tarimari na ġeġabiato, ġimari na ġeforoato.

Petero na Iesu ekira-ġuniġauato

Mataio 26:69-75; Luka 22:56-62; Ioane 18:15-18; 18:25-27

⁶⁶ Petero roġo numa maġuna nuġanai, Rubu Veaġa verena baregona ġena vetuġunaġi ġuiatori ta eiaġoto.

⁶⁷ Ġia na Petero karava na etunuato-ġoi eġitaiato, benamo eġita-ġinikauato, ekiraiato, ekirato, “Ġoi maki Iesu, Nasareta tauna, ġesi orakaoto-ġoi, okavaiato-ġoi.”

⁶⁸ Senaġi ġia evekira-ġuniġauto, ekirato, “Au asi ribagu ġoi kara okiraġiani,” benamo eraka-rosito maġu ġatama bokana ġana, benamo kokoroku egoġito.

⁶⁹ Mo vetuġunaġi ġuiatona na ma eġitaiato, benamo monai ġeruġa-taġoto tarimari ekirarito, ekirato, “Tarimana ta tu maniġa.”

⁷⁰ Petero ma evekira-ġuniġauto. Nega kotuna evanaġito nuġanai, ġia sevinai ġeruġa-taġoto-ġoi tarimari na ġekiraiato, ġekirato, “Moġoni, ġoi maki ġia ġesi ġorakaoto-ġoi tarimamu ta, korana ġoi tu Galilea taumu.”

⁷¹ Benamo Petero na ekirarito, ekirato, “Asiġina ġinavaġi, akira-korikorimini, ġomi na ġokiraġiani tarimana au tu asi ribagu.”

⁷² Kokoroku vaġa-ruaruana ma egoġito, benamo Petero na Iesu ġena guruġa etuġamaġi-doġariato, ekiraiato, “Kokoroku vaġa-ruaruana roġosi bene goġi nai, ġoi na au vaġa-toitoi bokira-ġuniġauguni.” Benamo etaġi-rakava rakavato.

15

Iesu Pilato ġoiranai

¹ Boġiboġi iamoiamo, Rubu Veaġa vereri baregori, e Iuda vereri, e taravatu ġevevaġa-riba iaġiato-ġoi tarimari, ema kanisoro tarimari mabarari na ġevaġa-moġoniato. Benamo Iesu ġebarubaruato, ġeġori-iaġoato, Roma Gavana Pilato ġea viniato.

² Pilato na edanaġiato, ekirato, “Ġoi tu Iuda tarimari ġeri vere o kini?” Iesu na evaġa-veſeato, ekirato, “Oi, okiraġiani maniġa.”

³ Benamo Rubu Veaġa vereri baregori na Iesu ġevaġa-badeato, guruġa ġutuma ġekiraġirito.

⁴ Pilato na ma edanaġi-ġenoġoiato, ekirato, “Ġoi tu asi bovaġa-veseni? Noġitaia, ġoi iatamu ai tu meto ġutuma ġekiraġirini.”

⁵ Senaġi Iesu asi eguruġato, benamo Pilato tu edaradarato.

Pilato na Iesu ġena mase ekiraġiato

Mataio 27:15-26; Luka 23:13-25; Ioane 18:38-19:16

⁶ Vanaġivanaġi Pasova verekona ġaronai tu Pilato na ġia ġeri dibura numanai etanuni, beġe kiraġiani tarimana ta, etuġu-roſiato-ġoi.

⁷ Mo laḡani ai tarima ta arana Barabas, ḡia tu dibura numai etanuto tarima kota ḡesi, korana ḡevevaḡito nai, tarima ta ḡevaḡi-maseato.

⁸ Benamo ḡutuma monai ḡevevogoto tarimari Pilato ḡenoḡiato, eveini kavana ma bene vei ḡana.

⁹ Pilato na edanaḡirito, ekirato, “Ḣomi ḡourani au na Iuda tarimami ḡemi vere natuḡu-rosia ba?”

¹⁰ Ḣia ribana, Rubu Veaḡa vereri baregori ḡeri mama dainai, Iesu ḡia ḡimanai ḡetoreato.

¹¹ Senaḡi Rubu Veaḡa vereri baregori na tarimarima nuḡari ḡeḡanirito, Pilato na Barabas bene tuḡu-rosia.

¹² Benamo Pilato na ma edanaḡirito, ekirato, “O mai Iuda tarimami ḡemi vere ḡotoni tu kamasi bana veia?”

¹³ Ḣia ḡefararato, ḡekirato, “Novaḡa-satauroa!”

¹⁴ Pilato na edanaḡirito, ekirato, “Karase nai, kamara veiḡa rakavana eveiato nai?” Senaḡi mabarari ḡefarara-gigitarito, ḡekirato, “Novaḡa-satauroa!”

¹⁵ Pilato ḡena ura mo tarimarima ḡutuma nuḡari bene vaḡa-namori ḡana, ḡia na Barabas etuḡu-rosiato, senaḡi Iesu tu ḡekwariato murinai, evinirito beḡene vaḡa-satauroa ḡana.

Iesu ḡevaseva-vaseva iaḡiato

Mataio 27:27-31; Ioane 19:2-3

¹⁶ Vetari tarimari na Iesu ḡeḡori-iaḡoato gavana ḡena numa nuḡanai, benamo karori mabarari ḡekea-vegogorito.

¹⁷ Benamo dabuḡa kakakakana ḡevaḡa-veiato, debana dagarana ḡau ma giniginina na ḡevatoato, korona noḡa ḡeveiato, benamo Iesu debanai ḡetore-kauato.

¹⁸ Benamo ḡevaḡa-namoato, ḡekirato, “Iuda ḡeri Kini o, ḡaro namona!”

¹⁹ Benamo oro kwarina na debana ḡekwari-ḡenoḡoi ḡenoḡoiato-ḡoi, ḡekanunu-kanunuato, ḡevetui-tari viniato, ḡetoma-rakariḡo ḡofakau-viniato.

²⁰ Ḣevaseva-vaseva iaḡi-ḡosiatu murinai, dabuḡa kakakakana ḡekoki-vaḡiato, ḡena dabuḡa korikorina ma ḡevaḡa-veiato. Benamo ḡeḡori-rosiato beḡenea vaḡa-satauroa ḡana.

Iesu ḡevaḡa-satauroato

Mataio 27:32-44; Luka 23:26-43; Ioane 19:17-27

²¹ Kurene tarimana ta arana Simona, Alesanda e Rufo tamari, gunika vanuḡana ta na eiaḡomato-ḡoi, vetari tarimari na ḡelaunaḡi-naḡiato Iesu ḡena satauro neḡwaia.

²² Benamo Iesu ḡeḡori-iaḡoato gabu ta arana Golgota ḡana, anina tu “Deba Ḣavana Gabuna.”

²³ Benamo ḡia na vine nanuna, midigu vaḡa-keina muramurana arana muro ḡesi ḡebubu-vegogoato, ḡeviniato, senaḡi asi eniuato.

²⁴ Benamo ḡevaḡa-satauroato; ḡena dabuḡa dainai laki ḡerena ta ḡeveiato, benamo ḡevarerito fakari ai.

²⁵ Boḡiboḡi ai horaḡauna 9 koloko rekenai ḡevaḡa-satauroato.

²⁶ Kara koranai ḡevaḡa-satauroato guruḡana satauro iatanai maiḡesi ḡetoreato, “IUDA TARIMARI ḢERI VERE.”

²⁷ Lema tarimari ruarua maki Iesu ḡesi ḡevaḡa-sataurorito, ta aroribana rekenai, ma ta kaurina rekenai. [²⁸ Monana Buka Veaḡai ḡetore-guineato guruḡana evaḡa-moḡoniato, ekirato, “Ḣia vei-rakava tarimari ḡesi ḡeiavi-vegogoato.”]

29 Ġeraka vanaġito-ġoi tarimari na guruġa rakavari Iesu ġeviniato-ġoi, debari ġekorakorarito, ġekirato, “Aha, be ġoi okirato Rubu Veaġa borovoani, ġaro toitoi nuġanai ma bovaġa-ruġa ġenoġoiani otato!

30 Satauro tuġuna na noraka-riġo, tauġemu novevaġa-maġuri!”

31 Rubu Veaġa vereri baregori e taravatu ġevevaġa-riba iaġiato-ġoi tarimari na maki fakari ai maiġesi ġevaseva-vaseva iaġiato, ġekirato, “Ġia na tarima boruri evaġa-maġuririto, senaġi tauġena tu asi evevaġa-maġurini!

32 Keriso, Isaraela tarimari ġeri vere, satauro na inimoġo noraka-riġo ġai ġoiramai, be baġana vaġa-moġonimu!” Iesu ġesi ġevaġa-satauro vegogorito tarimari ruarua na maki ġeguruġa-rakava viniato.

Iesu ġena mase

Mataio 27:45-56; Luka 23:44-49; Ioane 19:28-30

33 Horaġauna 12 koloko ea ġabiato nai, tanobara mabarana mukuna na eġabi-ġauato; mukuna etanuto, eiagoto mo, horaġauna 3 koloko.

34 Horaġauna 3 koloko rekenai Iesu eġabato, ekirato, “Eloi, eloi, lama sabaktani?” anina tu, “Au ġegu Barau, au ġegu Barau, kara dainai au boraga-kwanegu?”

35 Iesu sevinai ġeruġa-taġoto-ġoi tarimari kota ġeseġaġito, benamo ġekirato, “Ġoseġaġi, Elia ekeaiani.”

36 Benamo tarima ta eragato, nanu erimaiani dagarana ta eġabiato, vine nanuna mamakina nuġanai efereiato, gobu lefai egwanu-kauato, benamo eduġi-raġeato Iesu na neniua ġana, ekirato, “Siġitaia, Elia beiaġomani, bema ġabi-riġoani ba?”

37 Benamo Iesu eġaba-fouto murinai emaseto.

38 Benamo Rubu Veaġa nuġanai veaġa lelevaġi daiġutuna kouġauna dabuġana o ketin evedare-kikimato, eruaruato, tuġuna na mo gabigabina.

39 Roma vetari verena Iesu ġoiranai eruġa-taġoto-ġoi, ġena ġaba eseġaġiato e kamasi emaseto eġitaiato, benamo ekirato, “Moġoni veġata, mai tarima tu Barau Natuna!”

40 Vavine kotari maki ġemarere-to-ġoi, kotuna manaġai ġeruġato, fakari ai tu Maria, Magadala vavinena; e Maria, mai tu Iakobo (o Iames) keina e Iosefa ġesi sinari; ema Salome.

41 Galileai mai vavine tu Iesu murina na ġerakato-ġoi e ġia vetuġunaġina ġeiaġo-vinito-ġoi. Vavine vovoka ġia ġesi Ierusalemna ġana ġemaraġeto vavineri maki monai.

Iesu ġeguriato

Mataio 27:57-61; Luka 23:50-55; Ioane 19:38-42

42 Mo lavilavi ai vereko beġe vei-toreani, Sabadi ġarona roġosi bere ġabianai.

43 Iosefa, Arimatea vanuġa tarimana, ġematauraiato-ġoi kanisoro fakari ai tarimana ta, Barau ġena Basileia evaġa-nogaiato-ġoi tarimana, Pilato ġenai eiagoto, benamo enoġi-ginikauato, Iesu tauġanina bene ġabia etato.

44 Pilato eseġaġito Iesu tu varau emaseto nai, nuġana efarevaġito, benamo vetari verena ekeaiato, edanaġiato, ekirato, “Moġoni, Iesu tu bemase ba?”

45 Benamo vetari verena na Iesu ġena mase evaġa-moġoniato vau, Iesu tauġanina Iosefa eviniato.

46 Moġa murinai Iosefa na dabuġa kurokurona namona ta evoiato, benamo Iesu eġabi-riġoato, dabuġa na ekumuato. Gara gabuna fore kouġanai ea tore-toġaiato murinai, fore baregona na ġatama-boka ekure-ġauato.

47 Maria, Magadala vavinena, e Maria, Iosefa sinana, na etoreato gabuna ġeġita-kauato.

16

Iesu evariġisi-ġenoġoito

Ioane 20:1-10

¹ Iuda tarimari ġeri Sabadi ekorito murinai, Maria, Magadala vavinena, e Maria, Iakobo (o Iames) sinana, ema Salome muramura ma bonana namona ġevoito, beġene iaġo, Iesu tauġanina beġene daua ġana.

² Fura ġarona giniguinena o Sandei ai, boġiboġi ġaro eraġekauto nai, gara ġana ġeiaġoto.

³ Benamo tauġeri moġo ġeverorito-ġoi, ġekirato, “Deikara na mo fore barana gara ġekouġau-iaġiato tu, dei na toma ea kure-veġitaiani?”

⁴ Senaġi ġeboġe-iaġoto nuġanai, mo fore baregona tu irau ai vetore.

⁵ Ġia gara kouġana nuġanai ġeraka-toġato nai tu, mero variġuna ta ġeġitaiato, aroriba rekenai etanuto, ġena dabuġa tu kurokuro e mauka kenene, benamo nuġari ġefarevaġi-rakavato.

⁶ Ġia na ekirarito, ekirato, “Asi ġogari, au ribagu ġomi tu Iesu, Nasareta tauna, ġevaġa-satauroato tarimana ġovetauani. Ġia tu bevariġisi-ġenoġoi! Ġia mainai tu asigina, ġetoreato gabuna ġoma ġitaia.

⁷ Be ġoiaġo, ġena mero e Petero boġonoa kira-varari, boġono kira, ‘Iesu tu beguineni Galilea ġana. Monai vau boġoa ġitaiani evaġa-guruġamito ilailanai.’ ”

⁸ Benamo mo vavine ġeraka-rosito gara nuġana na, korana nuġari ġefarevaġito e tauġaniri ġeġoġo-ġoġorito-ġoi nai. Tarima ta maki asi ġevaġa-guruġaiato, korana ġegarito nai.

Maria, Magadala vavinena, na Iesu eġitaiato

Mataio 28:9-10; Ioane 20:11-18

[⁹ Fura ġarona giniguinenai, boġi-boġi iamoiamonai, Iesu evariġisi-ġenoġoito, benamo Maria, Magadala vavinena, ġenai efofori-guinetto. Ġia ġenana tu iauka rakavari imaima ruarua (7) elai-vaġirito.

¹⁰ Ġia eiaġoto, benamo Iesu murina na ġerakato-ġoi tarimari ġeri nuġaraġe e taġitaġi nuġanai ekira-vararito.

¹¹ Ġeseġaġiato Iesu tu maġuri, Maria na eġitaiato, senaġi ġena guruġa asi ġevaġa-moġoniato.

Dabarai tarima ruarua na Iesu ġeġitaiato

Luka 24:13-35

¹² Moġa murinai ġia tauri ruarua gabu ta ġana ġeraka-iaġoto-ġoi nuġanai, Iesu ġeri ai efoforito, senaġi vetoġana tu eirauto.

¹³ Benamo tauri ruarua ġeġenoġoito, karori ġekira-vararito, senaġi ġeri guruġa asi ġevaġa-moġonirito.

Iesu ġena mero ġeri ai efoforito e ġia na seġuka evinirito

Mataio 28:16-20; Luka 24:36-49; Ioane 20:19-23

¹⁴ Moġa murinai ġena mero gabanana sebna (11) ġeġaniġanito-ġoi nuġanai, ġeri ai efoforito, evanerito, korana asi ġeri veġabidadama e ġeri nuġa-gwaġiġi dainai, korana mase na evariġisi-ġenoġoito murinai, ġeġitaiato tarimari ġeri guruġa asi ġevaġa-moġonirito.

¹⁵ Benamo ekirarito, ekirato, “Ġoiaġo, tanobara mabarari ai Vari Namona tarimarima mabarari ġoirari ai boġono ġobata-iaġia.

¹⁶ Deikara na mai Vari Namona bevaġa-moġoniani ema babatiso beġabiani tarimana tu bemaġurini, senaġi asi bevaġa-moġoniani tarimana Barau na rakava voina beviniani.

¹⁷ Ĝeveĝabi-dadamani tarimari ĝesi mai vetoĝa beĝe iaĝo-sebonani: Iauka rakavari au aragu ai beĝe lai-vaĝirini. Garo variĝuri irauirau ai beĝe guruĝani.

¹⁸ Mota rakavari beĝe ĝabi-vaisini, mase ĝarikiri beĝe niurini, senaĝi asi beĝe vaĝa-rakavarini. Ĝimari keve tarimari iatari ai beĝe tore-kaurini, benamo keve tarimari beĝe namoni.”

Iesu tu Barau na eĝabi-varaĝeato guba ĝana

Luka 24:50-53; Apostolo 1:9-11

¹⁹ Iesu Vereĝauka na evaĝa-guruĝarito murinai, Barau na eĝabi-vaisiato, guba ĝana evaraĝeto, benamo Barau aroribana rekenai etanu-tarito.

²⁰ Benamo Iesu ĝena mero ĝeraka-lausito, gabu mabarari ai ĝea ĝobatato. Vereĝauka maki ĝia ĝesi ĝeĝauvei-vegogoto-ĝoi, ema ĝeri guruĝa evaĝa-moĝonirito-ĝoi nuĝa-farevaĝi veiĝa boruri ai.]

VARI NAMONA LUKA NA ETOREATO

Luka vaġa-foforina guruġari

Luka tu doketa tarimana, ma ġia tu irau bese tarimana. Ġia tu dia mo Iesu ġena mero 12 vekaravari ai tarimana ta, senaġi ġia tu Paulo ġesi erakaorakaoto-ġoi tauna.

Luka na mai Vari Namona tu Teofilo ġena etoreato. Etoreato laġanina tu 60 beiaġo 65 fakanai ta, mo tu Iesu emaseto murinai.

Luka ġena ura baregona Teofilo e Grik tarimari ema tarimarima mabarari maki beġene riba, Iesu tu Barau na evaġa-moġoniato, e tarima namo vedaureana, e tarimarima na Barau ġena vevaġa-maġuri beġene ġabia ġana uranai eruġa-boroġirito, benamo ġeri rakava eġwaiato, satauro ai emaseto, ema Iesu ġereġana ġenana moġo Barau ġena vevaġa-maġuri tarimarima na beġe ġabiani.

Luka ġena toretore tu maiġesina eboioġaiato:

1. Iesu keina na beiaġo mo etarimato varina - karoa 1:1-4:13
2. Iesu ġena vetuġunaġi ġauveiri eveirito variri - karoa 4:14-21:38
3. Iesu ġena midigumidigu ema ġena mase variri - karoa 22-23
4. Iesu ġena variġisi-ġenoġoi, e ġena tarimarima ġeri ai efoforito, ema guba vanuġana evaraġeto variri - karoa 24

Luka na Vari Namona etoreato Teofilo ġena

¹ Vere taumu Teofilo, ġoi atore-vinimuni. Tarimarima ġutuma Iesu na eveirito veiġari ġita fakarai variri varau ġetorerito.

² Tovotovona na tarimarima na matari na ġeġitarito dagarari ema ġeġobata-iaġirito variri ilailari ġevaġa-ribarato.

³ Moġa lorinai au maki atuġamaġini, namona maiġa, Vere o, karakara ġeġorato dagarari sigana toġana na bavetau-ġitakauri, benamo ġeġorato ilailari ai ama torerini ġoi ġemu.

⁴ Benamo vau bono riba, ġevaġa-ribamuto-ġoi guruġari tu moġoni veġata.

Ioane Babatiso ġena ġora ġekiraġi-foforiato

⁵ Heroda, vere barana o kini, na Iudea tanona eġitaġauato-ġoi nuġanai, Rubu Veaġa verena ta etanuto-ġoi arana Sakaria, Abia ġena doġoro tarimana. Ġaraġona arana tu Elisabeta. Ġia maki Arona senena, Rubu Veaġa vereri doġorori vavinena.

⁶ Ġia tauri ruarua tu vei-iobukaiobuka tarimari Barau ġoiranai. Vereġauka ġena taravatu ema vevaġa-naġi mabarabarari ġekorana-iaġirito-ġoi ma nuġari mabarari ġesi.

⁷ Senaġi tauri ruarua asi naturi, korana Elisabeta tu gabani, ema ġia tauri ruarua tu varau ġeġaukato.

⁸ Ġaro ta Sakaria ġena vevaġa-veaġa ġauveiri eveirito Rubu Veaġai Barau ġoiranai, korana ġena doġoro ġeri nega dainai.

⁹ Benamo Rubu Veaġa vereri ġeri veiġa ilailanai Sakaria ġeġabi-hidiato, muramura ma bonana namona bene gabu ġana. Moġa lorinai eraka-toġato Vereġauka ġena Rubu Veaġa nuġanai,

¹⁰ a tarimarima mabarari tu murikai ġeġuriġurito-ġoi muramura egabuto-ġoi nuġanai.

¹¹ Benamo Vereġauka ġena aneru ta ġia ġenai efoforito, muramura goġuna ma bonana fatana veaġana aroriba rekenai eruġataġoto-ġoi.

¹² Sakaria na eġitaiato nai, nuġana efarevaġito ema egarito.

¹³ Senaġi aneru na ekiraiato, ekirato, “Sakaria, asi nogari, korana ġemu ġauġau Barau na beseġaġia. Ġaraġomu Elisabeta na natumu ta beġabiani, arana bono vatoa Ioane.

¹⁴ Goi boiakuni, boverereni, tarimarima ġutuma maki ġia bemaġurini nai, beġe iakuni.

¹⁵ Korana Vereġauka ġoiranai ġia tu vere baregonai beiaġoni. Ġia tu vine nanuna asi bene niua ema niuniu dagarari gwaġiġiri maki asiġina moġo. Ġia roġo sinana dianai, Iauka Veaġa na bevaġa-vonuani.

¹⁶ Ġia na Isaraela tarimari vovoka beġori-kurerini Vereġauka, ġeri Barau, ġenai.

¹⁷ Vereġauka ġoiranai berakani Elia peroveta tarimana ġena kokore ema ġena seġuka kavana. Tama e natu ġia na ma bevaġa-tanu vegogorini. Kira-sirivaġi tarimari maki bevaġa-tanu kurerini, vei-iobukaiobuka tarimari ai beġe iaġoni; benamo ġia na tarimarima beġabi-torerini Vereġauka ġena.”

¹⁸ Sakaria na aneru ekiraiato, ekirato, “Au tu kamasi baribaiani? Au tu ġauka, ġaraġogu maki beġauka.”

¹⁹ Aneru evaġa-veseto, ekirato, “Au tu Gabriela, Barau ġoiranai aruġani. Barau na au betuġugu, bana vaġa-guruġamu ema mai vari namona bana kira-varamu.

²⁰ Senaġi au ġegu guruġa asi ovaġa-moġoniani nai, ġoi murumu bebubuni, asi boguruġani, beiaġoni mo, mai guruġa anina bea ġorani ġaronai. Aki-raġirini dagarari ġeri nega korikori ai beġe ġorani.”

²¹ Mai veġa eġorato-ġoi nuġanai, tarimarima na ġenari-kavaiato nai, ġeverorito karase nai Sakaria Rubu Veaġa nuġanai ea kwaibo-rakavato.

²² Eraka-rosito nai, asi evaġa-guruġarito, benamo ġeribato, ġia tu emata-vanaġito, kara ta eġitaiato Rubu Veaġa nuġanai. Benamo ġia na vetoġai moġo evaġa-ribarito, asi eguruġato, korana muruna ebubuto nai.

²³ Sakaria ġena ġauvei ġarori Rubu Veaġai evaġa-koririto murinai, eġenoġoito ġena vanuġa ġana.

²⁴ Moġa murinai ġia ġaraġona Elisabeta varau ekuġato, benamo ġue imaima (5) etanu-vekuretoġato numai.

²⁵ Ekirato, “Vereġauka na bevetuġagu, maiġesina au ġegu ai beveia. Ġegu maiaka tarimarima ġoirari ai beġabi-vaġia.”

Iesu ġena ġora aneru na ekiraġiato

²⁶ Elisabeta ma banina ġue imaima sebona (6) nuġanai, Barau na aneru ta arana Gabriela etuġuato vanuġa ta Galilea nuġanai arana Nasareta ġana.

²⁷ Ġuiato ta monai. Ġia tu ma kirakauna arana Iosefa, Davida ġena doġoro tarimana. Mo ġuiato arana tu Maria.

²⁸ Aneru ġia ġenai eiaġoto, ekirato, “Ġaro namona, Vereġauka tu ġoi ġesi ema ġena vevaġa-namo bara ġoi ġemu ai.”

²⁹ Maria na mai guruġa eseġaġiato nai, nuġana evekwaraġi-rakavato, etuġamaġito mai vevaġa-namo anina tu kara.

³⁰ Benamo aneru na ma ekiraiato, ekirato, “Maria, asi nogari, Barau na ġena namo e varevare-bara ġoi iatamu ai betorea.

³¹ Goi tu bokuġani ema mero ta boġabiani, arana bono vatoa Iesu.

³² Ġia arana bevaraġeni ema beġe kiraġiani Iaru-korokoro Barauna Natuna. Barau tuġutuġu na kini ai bevaġa-iaġoani, ġia senena Davida kavana.

³³ Ġia tu vere tuġutuġu ai beiaġoni, vere betanu-vanaġi vanaġini Iakobo besena ġeri, ġena Basileia asi bekorini.”

³⁴ Maria na aneru ekiraiato, ekirato, “Mai tu kamasi beğorani? Au tau ta ġesi tu roğosi bağana gena-vegogo.”

³⁵ Aneru na evağā-vešeato, ekirato, “Iauka Veağā ġoi iatamu ai befoforini, Barau ġena seğuka na beboroğimuni. Moğesina nai ġoi ġemuna bemağurini merona veağana tu Barau Natunai beğe kirağiani.

³⁶ Bono riba, ġoi garagaramu Elisabeta, ġia varau beğauka, senaği ma banina. Ribamu, tarimarima na ġekirağiato-ğoi, ġia tu gabani vavinena ġetato-ğoi, senaği toma ġena ġue imaima sebona (6) maiğā.

³⁷ Korana Barau tu dagara mabarari veiveiri ma ribana.”

³⁸ Maria ekirato, “Au tu Vereğauka ġena vetuğunaği vavinegu, be bokira kavana au ġegu ai bene ġora.” Benamo aneru na eraga-kwaneato, erakato.

Maria Elisabeta ġenai eiağoto

³⁹ Mo negai Maria evariğisito, Iudea ġorori vanuğana ta ġana eraga-iağoto.

⁴⁰ Monai Sakaria ġena numai erağekauto, Elisabeta evağā-namoato.

⁴¹ Elisabeta na Maria ġena vevağā-namo guruğana eseğağiato nai, natuna tu diana nuğanai eğarevato, benamo Elisabeta Iauka Veağā na evağā-vonuato, mamina eğabiato.

⁴² Benamo eguruğā-baregato, ekirato, “Vavine vefakari ai Barau ġena vevağā-namo ġoi iatamu ai tu barego vedaurea, ema boğabiani merona iatanai maki!

⁴³ Senaği au ġegu namo tu kara Vereğauka sinana ġegu ai beiağoma?

⁴⁴ Ġemu vevağā-namo guruğana baseğağia nai, natugu tu nuğagu ai eiakuni nai eğarevani.

⁴⁵ Ġoi overereni, korana oveğabi-dadamato, Vereğauka ġena guruğā bemoğonini otato nai.”

Maria ġena iaku marina

⁴⁶ Benamo Maria ekirato,
“Au nuğagu na Vereğauka evağā-rağeani.

⁴⁷ Au iaukagu na maki au vağā-mağurigu Barauna eiaku-viniani,

⁴⁸ korana tu au,
ġena vetuğunaği vavinena,
ġegu tanu lealei roğo
etuğamaği-tağoguni!

Mainana, beiağoni mo,
ġuru mabarari beğe kirani,
Barau ġena vevağā-namo tu
au iatagu ai beğe toni,

⁴⁹ korana tu veiğā baregori
Seğuka Barauna na au ġegu ai beveiri.

Ġia arana tu veağā.

⁵⁰ Ġena vetuğağwa tu
ġia ġegari-viniani tarimari
iatari ai betoreani,
ġuru ta beiağoni ġuru ta
iatari ai betanuni.

⁵¹ Ġia ġimana eğabi-vaisirito seğukana na ġeveiavini tarimari elai-karovorito.

⁵² Ġia na vere baregori
ġeri tanutanu gaburi na
edori-firiğorito,
a tanu lealea tarimari
ġia na eğabi-vaisirito.

⁵³ Vito tarimari maki dagara namori ai evaḡa-vonurito,
a farefare vovoka tarimari
ḡia na ḡimari kori
evaḡa-ḡenoḡoirito.

⁵⁴ Gena kiraḡitore ḡita tubura ḡatara Isaraela tarimari ḡesi asi etuḡa-
rekwarito,
ema ḡia eiaḡomato

ḡena vetuḡunaḡi tarimari Isaraela bene vaḡa-kavari ḡana,

⁵⁵ senera ekiraḡitore-vinirito ilailana.

Aberahamo ma besena ḡesi roḡo bevetuḡa-ḡwa vanaḡi-vanaḡirini, etato.”

⁵⁶ Maria monai tu Elisabeta ḡesi ḡetanuto ḡue toitoi (3). Moḡa murinai
ḡena vanuḡa ḡana ma eḡenoḡoi-iaḡoto.

Ioane Babatiso emaḡurito

⁵⁷ Elisabeta ḡena ḡabi ḡarona varau eraḡasito nai, mero ta eḡabiato.

⁵⁸ Benamo sevinai ḡetanuto tarimari ema garagarana na varina
ḡeseḡaḡiato nai, ḡia ḡesi ḡeiaku-vegogoto, korana Vereḡauka ḡena namo e
varevare-bara ḡia ḡenai eḡorato nai.

⁵⁹ Ḡaro vaḡa-imaima toitoinei (8) mero tauḡanina kefina beḡene lama-
vaḡia ḡana ḡevegogoto. Mai ḡaro sebonai maki arana beḡene vatoa Sakaria,
tamana beḡene turaia ḡetato.

⁶⁰ Senaḡi sinana asi eurato nai ekirato, “Asiḡina! Ḡia arana tu Ioane.”

⁶¹ Ḡia ḡekirato, “Senaḡi ḡoi ḡemu bese nuḡanai mai ara tu asiḡina!”

⁶² Benamo ḡia na mero tamana ḡimari ai moḡo ḡedanaḡiato, mero arana
tu deikara beḡene si.

⁶³ Sakaria na toretore vetuḡuna ta ekiraḡiato, benamo maiḡesi etoreato,
“Ḡia arana tu Ioane.” Benamo mabarari nuḡari ḡefarevaḡito.

⁶⁴ Monai vau muruna evekeoto, meana maki eroroḡototo, benamo
eguruḡato, Barau evaḡa-namoato.

⁶⁵ Moḡa lorinai sevirai ai ḡetanuto tarimari mabarari ḡeḡaba-rakavato ema
mo veiḡa varina Iudea ḡoro vanuḡari mabarari nuḡari ai ḡevari-fiutato.

⁶⁶ Varina ḡeseḡaḡiato tarimari mabarari na ḡetuḡamaḡi-iaḡiato, ḡekirato,
“Mai mero tu kamasi beveini?” Korana tu Vereḡauka ḡimana seḡukana tu
ḡia iatanai.

Sakaria ḡena mari

⁶⁷ Ioane tamana Sakaria Iauka Veaḡa na evaḡa-vonuato, benamo Barau
ḡena guruḡa evaḡa-foforiato, ekirato,

⁶⁸ “Vereḡauka,

Isaraela tarimari ḡeri Barau,

sivaḡa-namoa,

korana tu ḡia ḡena bese

tarimari eiaḡoma-vinirito

bene voi-ḡenoḡoiri ema

bene vaḡa-maḡuriri ḡana.

⁶⁹ Vevaḡa-maḡuri tauna ma seḡukana ḡesi etuḡuato ḡita ḡera,

ḡia tu ḡena vetuḡunaḡi tauna

Davidara garakana.

⁷⁰ Mai kiraḡitore tu

ḡena peroveta tarimari veaḡari na irau laḡani ai ḡekiraḡi-foforiato:

⁷¹ Ḡita tu ḡia na ekira-ḡaurato,

g̃evetari-vinirani ema g̃ebaru-vinirani tarimari g̃imari na g̃ia na bevaḡa-maḡurirani etato.

⁷² Ekirato maki, g̃ita tubura g̃atara bevetuḡa-g̃warini, ema g̃ena kiraḡitore veaḡana asi betuḡa-rekwaiani.

⁷³ G̃ia na g̃ita senera Aberahamo ekiraḡitore-viniato,

⁷⁴ benamo ekirato, g̃evetari-vinirani tarimari g̃imari na beḡabi-maḡurirani. Benamo vetuḡunaḡina bisini iaḡo-vini asi garira g̃esi.

⁷⁵ Goiranai bisini raka ma veaḡara e ma iobukaiobukara g̃esi g̃era maḡuri g̃arori mabarari ai.

⁷⁶ Natugu o, g̃oi tu Iaru-korokoro Barauna g̃ena peroveta tarimana beḡe kiraḡimuni,

korana tu boraka-guineni Vereḡauka g̃ena dabara bono vaḡa-maḡataia g̃ana.

⁷⁷ G̃ena bese tarimari bono vaḡa-ribari,

g̃ia na g̃eri rakava bene tuḡamaḡi-fitoḡari ema bene vaḡa-maḡuriri.

⁷⁸ Korana g̃ita g̃era Barau g̃ena vetuḡaḡwa tu barego g̃ita g̃erai.

G̃aro eraḡekauni mamana kavana vevaḡa-maḡuri g̃ita iatarai betanuni.

⁷⁹ Benamo mukunai e mase gari nuḡanai g̃etanuni tarimari bevaḡa-mamarini, ema maino dabaranai beḡori-kaurini.”

⁸⁰ Ioane ebaregoto ema iaukana egwadato. Tano fakanai etanuto-g̃oi, eiaḡomato mo, Isaraela tarimari g̃eri ai eforito g̃arona.

2

Iesu g̃ena g̃ora

¹ Mo negai Kaisara Augusto, Roma g̃eri vere, na g̃ena vevaḡa-naḡi etuḡuato, tanobara tarimari mabarari arari beḡene toreri, sensisi beḡene g̃abia.

² Mai tu sensisi giniginena, Kwirinio na Siria evereato-g̃oi neganai g̃eḡabiato.

³ Moḡa lorinai tarimarima mabarari arari toretoreri uranai tata g̃eri vanuḡa korikori g̃ana g̃eḡenoḡoito.

⁴ Iosefa maki erakato. Nasareta, Galilea rekena vanuḡa ta na, Betelehema g̃ana eiaḡoto, Iudea rekena vanuḡa ta, Davida g̃ena vanuḡa. Mo g̃ana eiaḡoto, korana g̃ia tu Davida g̃ena doḡoro tarimana.

⁵ Monai arana beḡene torea g̃ana, g̃ia kirakauna Maria g̃ia g̃esi g̃eiaḡoto. G̃ia tu ma banina.

⁶ Tauri ruarua monai g̃etanuto-g̃oi nuḡanai, g̃ena g̃abi g̃arona varau evotuto.

⁷ Gia eḡabito, mero guinena eḡabiato, dabuḡai eseḡoato, boromakau g̃eri g̃aniḡani fatanai evaḡa-genakauato, korana varivari tarimari g̃eri numa asi faka ta dainai.

Mamoe narinari tarimari ma aneru g̃esi

⁸ Mo tano monai mamoe g̃enaririto-g̃oi tarimari kota tu boḡai g̃etanuto-g̃oi, boḡi ai g̃eri mamoe g̃eḡitaḡaurito-g̃oi.

⁹ Benamo Vereḡauka g̃ena aneru ta g̃ia g̃eri ai eforito, Vereḡauka mamana na emama-taririto; g̃egari-rakavato,

¹⁰ senaḡi aneru na ekirarito, ekirato, “Asi g̃ogari! Vari Namona au na baḡwa-iaḡomaia g̃omi g̃emi, tarimarima mabarari vaḡa-iakuri ema vaḡa-verereri g̃ana.

11 Maitoma Davida ġena vanuġai ġemi vevaġa-maġuri tarimana bemaġuri, Keriso Vereġauka!

12 Vetuġana tu maigā, mero raraka-raraka boġo doġariani boromakau ġeri ġaniġani fatanai genakau, dabuġa na beseġoa.”

13 Benamo asikauna guba aneruri ġutuma mai aneru sebna ġesi ġefofori-barato, Barau ġevaġa-namoato, ġekirato,

14 “Guba tuġuna vanigerenai
Barau beġene vonevone-raġe vinia,
ema tanobarai maino
ġia na eiaunamo-vinirini
tarimari na beġene ġabia!”

15 Aneru mabarari na ġeraga-kwanerito, guba ġana ġeġenoġoito murinai, mamoe ġitaġauri tarimari ġeguruġa-vegogoto, ġekirato, “Ġita tu Betelehema ġana si-iaġo, Vereġauka na bevaġa-ribara dagarana sia ġitaia.”

16 Benamo ġeraga-iaġoto, Maria e Iosefa ġedoġaririto, mero keina maki boromakau ġeri ġaniġani fatanai genataġonai ġeġoitaġoato.

17 Mero ġeġitaiato, benamo aneru na ġevaġa-ribarito mero varina ġekiraġi-foforiato.

18 Benamo ġeseġaġito tarimari mabarari mamoe ġitataġori tarimari ġeri guruġa na nuġari ġefarevaġito.

19 Maria na mo guruġa mabarari nuġanai etorerito ema etuġamaġirito-ġoi.

20 Mamoe ġeġitaġauto-ġoi tarimari ġeġenoġoito, Barau ġevevato-iaġiato, ġevaġa-raġeato, korana ġeseġaġirito ema ġeġitarito dagarari tu moġoni, aneru na ġia evaġa-ribarito ilailana.

Iesu arana ġevatoato

21 Ġaro vaġa-imaima toitoinei (8), mero tauġanina kefina beġe lama-vaġiani ġaronai, ġia arana ġevatoato, Iesu. Sinana na roġosi bene ġoitaġoa nuġanai, aneru na ekiraġiato arana ġeviniato.

Iesu Rubu Veaġai ġea vaġa-foforiato

22 Mero eġorato ġaro gabana vasivasi (40) murinai, ġia ġeri veiareva ġarona eraġasito, Mose ġena taravatu ekirani ilailanai. Benamo Iosefa e Maria na Iesu Ierusalemā ġana ġeġwa-iaġoato, Vereġauka ġoiranai ġea vaġa-foforia ġana.

23 Korana Vereġauka ġena taravatu ekirani, “Ġora guine merori mabarari tu veaġa Vereġauka ġena.”

24 Vere-ġauka ġena taravatu ilailana varevare dagarana beġene vinia ġetato, pune ruarua o pune variġuri ruarua.

25 Tau ta Ierusalemā etanuto-ġoi, arana tu Simeona. Ġia tu vei-iobukaiobuka tarimana ema Barau ġena taravatu ekorana-iaġiato-ġoi tarimana. Ġia na Isaraela ġeri vevaġa-maġuri enariato-ġoi ema Iauka Veaġa na evaġa-vonuato.

26 Iauka Veaġa na maki evaġa-guruġaiato, ekirato, ġia asi roġo bemaseni mo, Keriso, (Barau na ekiraġi-toreato vevaġa-maġuri tauna), roġo beġitaiani.

27 Iauka Veaġa na Rubu Veaġa nuġanai Simeona eġori-toġaiato vau, Iesu tamana ema sinana na ġeġwa-toġaiato, taravatu ekirani veiġana beġene veia ġana.

28 Benamo Simeona na mero eġabiato, efaniato, Barau evaġa-namoato, ekirato,

29 “Vereġauka, ġemu vetuġunaġi tauna mai vau bono tuġu-fitoġagu, ma mainogu ġesi mai baiaġoni

gemu kiraġitore vaġa-ilailana.

³⁰ Varau ġemu vevaġa-maġuri matagu na bama ġitaia,

³¹ ġoi na ovei-toreato tarimarima mabarari ġoirari ai.

³² Mamana maiġa, bese iraurau vaġa-mama-iaġiri, ma ġoi ġemu bese Isaraela vevato-iaġiri ġana.”

³³ Mero tamana e sinana na Simeona ġena guruġa ġeseġaġito nai, ġeġaba-rakavato.

³⁴ Benamo Simeona na tauri ruarua evaġa-namorito, Maria ekiraiato, ekirato, “Mai mero na Isaraela tarimari ġutuma vaġa-ketori ema ġutuma vaġa-vaisirageri ai beiaġoni. Ġia tu vetoġa ta Barau ġenana, tarimarima ġutuma na beġe kiraġi-fitoġaiani,

³⁵ moġesi tarimarima nuġari vekuretoġari dagarari mabarari beġea fororini. Ġoi, Maria, maki midigumidigu asikei boġoitaġoni, noġa moġo lorumu kaia na beġe gwanu-toġaiani midiguna kavana.”

³⁶ Monai peroveta vavinena ta arana Ana. Ġia tu Fanuela natuna, Asere ġena doġoro vavinena. Ġia tu eveġaraġoto, laġani imaima ruarua (7) ġaraġona ġesi ġetanuto,

³⁷ benamo evabuto, laġani gabana imaima ma gabana toitoi vasivasi (84) etanuto, varau eġaukato. Rubu Veaġa asi eraga-kwaneato, laġani e boġi ai Barau etoma-rakariġo viniato-ġoi, eġuriġurito-ġoi ema eġaniveaġato-ġoi.

³⁸ Mo hora sebonai ġia maki eraġasito, benamo Barau evaġa-namoato, Ierusalem vaġa-maġurina ġenariato-ġoi tarimari ġoirari ai mai mero varina ekiraġiato.

Nasareta ġana ma ġeġenoġoito

³⁹ Iosefa ema Maria na Vereġauka ġena taravatu ekirani veġari mabarari ġeveirito murinai, Galilea ġana ġeġenoġoito, ġeri vanuġa Nasareta ġana.

⁴⁰ Mai mero ebareġoto ma gwadana ġesi; Barau ġena iaunega na evonuvonu-raġeto ema ġena namo e varevare-bara tu ġia iatanai.

Iesu Rubu Veaġa nuġanai

⁴¹ Laġani mabarari nuġari ai Iesu tamana ema sinana tu Ierusalem ġana ġeiaġoto-ġoi, Pasova verekona dainai. (Moġa tu Iuda tarimari mase aneruna na evanaġirito moġo, asi evaġirito verekona).

⁴² Iesu ġena laġani gabanana ruarua (12) eġabiato nai, ġia maki tamana ema sinana ġesi vereko urana ġeiaġoto, ġeveito-ġoi kavana.

⁴³ Vereko ekorito murinai, ġeġenoġoito ġeri vanuġa ġana, senaġi ġia asi ribari, Iesu tu Ierusalem ġeraga-kwaneato.

⁴⁴ Ġia ġeri tuġamaġi Iesu tu ġia ġesi. Ġaro sebona ġerakato murinai, garagarari ema ġatari fakari ai ġevetauato.

⁴⁵ Ġevetauto nuġanai asi ġeġoitaġoato, moġa lorinai ma ġeġenoġoito Ierusalem ġana Iesu vetauvetauna.

⁴⁶ Ġaro toitoi murinai ġeġoitaġoato, Iesu tu Rubu Veaġa nuġanai Iuda tarimari ġeri vevaġa-riba tarimari ġesi. Barau ġena guruġa ġekiraġirito-ġoi eseġaġirito-ġoi ema ġia na maki edanaġirito-ġoi mai guruġa aniri tu kara.

⁴⁷ Mabarari na Iesu ġena vedanaġi ema evaġa-veseto guruġari ġeseġaġito nai, ġeġaba-rakavato.

⁴⁸ Iesu tamana ema sinana mainai ġeġoitaġoato nai, nuġari ġefarevaġi-rakavato, benamo sinana na ekiraiato, ekirato, “Natugu, karase nai ġoi na

ġai maiġesi boveima? Ġoi tamamu ema au tu ġoi daimu ai dabarama maki beġe doko, kamasi ta mai bovei baġasi.”

⁴⁹ Iesu ekirato, “Karase nai au ġovetauguni? Ġomi asi ribami au tu Tamagu ġena numai?”

⁵⁰ Senaġi ġia asi ribari, Iesu karase maiġesina evevaġa-veseto.

⁵¹ Moġa murinai Iesu tamana ma sinana ġesi ġeġenoġoito Nasareta ġana. Ġeri guruġa mabarari eiaġo-vinirito-ġoi. Maġeri dagara ġeġorato mabarari Maria na nuġanai etorerito ema etuġamaġi taġorito-ġoi.

⁵² Iesu efutuato ma iaunegana ġesi, Barau ema tarimarima na maki ġeuraviniato-ġoi.

3

Ioane Babatisto eġobatato

Ioane 1:19-28

¹ Tiberio Kaisara, Roma ġeri vere, evereto laġani gabanana imaima (15) nuġanai, Pontio Pilato tu Iudea ġeri gavana, Heroda tu Galilea verena, tarina Filipo tu Iturea ma Trakoniti tanori ġeri vere, Lisania tu Abilene verena.

² Anas ma Kaiafas tu Rubu Veaġa vereri baregori. Mo negai Barau na Ioane Sakaria evaġa-guruġaiato tano fakanai.

³ Benamo Ioane na Ioridana ġarukana tanona mabarana eraka-vaġa-ġauato, eġobatato-ġoi, tarimarima ġeri rakava ġerina beġene vetuġamaġi-kure e beġene raka-kure, ema babatisto beġene ġabia, Barau na ġeri rakava bene tuġamaġi-fitoġari ġana.

⁴ Isaia, peroveta tarimana, ġena bukai etoreato ilailanai, ekirato, “Tarima ta tano fakanai ekeani, ekirani, ‘Vereġauka ġena dabara ġoiarevaia, ġena iaġoma dabarana ġovaġa-maoromaoroa.

⁵ Douka gaburi mabarari boġono vaġa-vonuri, ġoro baregori e ġoro keiri mabarari boġono vaġa-faiarari. Dabara ġeġeva-ġeġevari boġono vaġa-maoromaorori, ema dabara koufakoufari maki boġono vaġa-vonuri.

⁶ Benamo tarimarima mabarari na Barau ġena vevaġa-maġuri beġe ġitaiani!’ ”

⁷ Tarimarima ġutuma Ioane ġenai ġeiaġoto, bene babatisori ġana. Benamo Ioane na eġobatarito, ekirarito, “Ġomi mota naturi, dei na bekirami, Barau ġena vevaġa-maoro ġenana boġo raga-maġurini?

⁸ Ġemi rakava ġerina boġono vetuġamaġi-kure, ema boġono raka-kure Barau ġenai, benamo ġemi maġuri ai ġwaġwa namori boġono buri. Asi boġono kira, ‘Aberahamo tu ġai tamama, (be Barau na beġabi-raġemani).’ Korana boġono riba, Barau tu ma seġukana Aberahamo natuna tu mai fore ġerina bevaġa-ġorarini!

⁹ Koko tu ġau korari ai varau beġe toreri. Benamo ġwaġwa namori asi beġe ġwani ġauri mabarari tu beġe basirini, karavai beġe fiu-raġerini.”

¹⁰ Vegogo tarimari na Ioane ġedanaġiato, ġekirato, “Be, ġai tu kara baġana vei?”

¹¹ Ġia na evaġa-veserito, ekirato, “Ġomi deidei ġemi sedi ruarua nai, ta tu asi ġena sedi tarimana bono vinia, e ma ġana ġaniġani tarimana na maki moġesi bene vei.”

12 Takesi gogo tarimari maki babatiso beġene ġabi ġana Ioane ġenai ġeiaġoto, ġedanaġiato, ġekirato, “Vevaġa-riba taumu, ġai tu kamasi baġana vei?”

13 Ġia evaġa-veseto, ekirato, “Taravatu ekirani lorinai moġo boġono gogo.”

14 Vetari tarimari o soldia na maki ġedanaġiato, ġekirato, “Ġai maki kamasi baġana vei? Ġia evaġa-veseto, ekirato, “Tarima ġeri moni asi boġono verariri ema asi boġono kira-rakavari. Ġomi davami dainai maki asi boġono mugumu.”

15 Tarimarima nuġari ai maġesi ġetuġamaġito, “Mai tarima tu Keriso, (Barau na ekiraġi-toreato vevaġa-maġuri tauna), banaġu,” ġetato.

16 Benamo Ioane na mabarari evaġa-guruġarito, ekirato, “Au tu nanu na ababatisomini, senaġi tarima ta beiaġomani, ġia ġena seġuka na au ġegu seġuka tu evanaġiani. Au tu asi ilaila ġia ġena tamaka varona baruġaiani. Ġia na Iauka Veaġa ema karava na bebabatisomini.

17 Ġia ġimanai tu iareva-iareva dagarana, widi momona tu widi tauri ġenana bene iareva-ġitakauri ġana. Benamo widi tu ġena vaġa-vegogo numanai bevaġa-vegogorini, senaġi widi momona tu begabuani asi ebuseni karavanai.”

18 Ioane na mo guruġai ema guruġa ġutumai maki Barau ġena Vari Namona tarimarima eġobata-vinirito, ema enoġirito, ġeri rakava ġerina beġene vetuġamaġi-kure.

19 Ioane na maki Heroda, Galilea verena, evaneato, korana tu ġia kakana Filipo ġaraġona eġaraġoato nai, ema veiġa rakavari ġutuma eveirito nai.

20 Heroda na mo rakava mabarari iatari ai ta ma etore-kauato, ġia na Ioane dibura numanai ma ekou-ġauato.

Ioane na Iesu ebabatisoato

Mataio 3:13-17; Mareko 1:9-11

21 Tarimarima mabarari Ioane na ebabatisorito-ġoi nai, Iesu maki ebabatisoato. Benamo Iesu eġauġauto-ġoi nuġanai, guba evekeo-fakato,

22 Iauka Veaġa emariġoto ġia iatanai, vetoġana noġa pune kavana. Garo ta guba na ekea-riġoto, ekirato, “Ġoi tu au Natugu, aura-vinimuni; ema ġemu ai aiaku-rakavani maki.”

Iesu tubuna ġatana arari

Mataio 1:1-17

23 Iesu na ġena ġauvei esinaiato nai, ġena laġani tu gabana toitoi (30) kavana. Tarimarima ġekirato-ġoi, ġia tu Iosefa natuna. Besena tu maġeri: Iosefa tu Heli natuna,

24 Heli tu Matat natuna, Matat tu Levi natuna. Levi tu Melki natuna. Melki tu Ianai natuna. Ianai tu Iosefa natuna.

25 Iosefa tu Matatia natuna. Matatia tu Amosa natuna. Amosa tu Nahum natuna. Nahum tu Eseli natuna. Eseli tu Nagai natuna.

26 Nagai tu Mahat natuna. Mahat tu Matatia natuna. Matatia tu Semein natuna. Semein tu Ioseka natuna. Ioseka tu Ioda natuna.

27 Ioda tu Ioanan natuna. Ioanan tu Resa natuna. Resa tu Serubabele natuna. Serubabele tu Sealtiele natuna. Sealtiele tu Neri natuna.

28 Neri tu Melki natuna. Melki tu Adi natuna. Adi tu Kosam natuna. Kosam tu Elmadam natuna. Elmadam tu Ere natuna.

29 Ere tu Iosua natuna. Iosua tu Eliesere natuna. Eliesere tu Iorim natuna. Iorim tu Matat natuna. Matat tu Levi natuna.

30 Levi tu Simeona natuna. Simeona tu Iuda natuna. Iuda tu Iosefa natuna. Iosefa tu Ionam natuna. Ionam tu Eliakim natuna.

³¹ Eliakim tu Melea natuna. Melea tu Mena natuna. Mena tu Matata natuna. Matata tu Natan natuna. Natan tu Davida natuna.

³² Davida tu Iese natuna. Iese tu Obed natuna. Obed tu Boas natuna. Boas tu Salmone natuna. Salmone tu Nasona natuna.

³³ Nasona tu Aminadab natuna. Aminadab tu Admin natuna. Admin tu Areni natuna. Areni tu Hesron natuna. Hesron tu Perese natuna. Perese tu Iuda natuna.

³⁴ Iuda tu Iakobo natuna. Iakobo tu Isako natuna. Isako tu Aberahamo natuna. Aberahamo tu Tera natuna. Tera tu Nahoro natuna.

³⁵ Nahoro tu Serug natuna. Serug tu Reu natuna. Reu tu Peleg natuna. Peleg tu Ebere natuna. Ebere tu Sela natuna.

³⁶ Sela tu Kainana natuna. Kainana tu Afasada natuna. Afasada tu Sem natuna. Sem tu Noa natuna. Noa tu Lameka natuna.

³⁷ Lameka tu Metusela natuna. Metusela tu Enoka natuna. Enoka tu Iared natuna. Iared tu Mahalalel natuna. Mahalalel tu Kainana natuna.

³⁸ Kainana tu Enos natuna. Enos tu Seta natuna. Seta tu Adamu natuna. Adamu tu Barau natuna.

4

Satani na Iesu eriba-ḡaniato

¹ Iesu Ioridana ḡarukanai Iauka Veāḡa na evaḡa-vonuato vau, ea ḡenoḡoito, benamo Iauka na tano fakana ḡana eḡori-iaḡoato.

² Monai ḡaro e boḡi gabana vasivasi (40) Diabolo na eribaḡaniato-ḡoi. Mo ḡaro mabarari nuḡari ai asi eḡaniḡanito-ḡoi, moḡa lorinai mo ḡaro ḡekorito murinai, ḡia evito-rakavaiaito.

³ Diabolo na ekiraiato, ekirato, “Bema ḡoi Barau Natuna nai, mai fore nokiraia, be ḡaniḡani ai neiaḡo.”

⁴ A Iesu na evaḡa-veseato, ekirato, “Buka Veāḡa nuḡanai maiḡesi ekirani, ‘Tarimarima tu dia ḡaniḡani na moḡo bemaḡurini.’ ”

⁵ Benamo Diabolo na Iesu eḡori-raḡeato gabu ta tuḡunai, tanobara basileiari mabarari vaḡa-sebo evaḡa-ḡitaiato.

⁶ Benamo Diabolo ekirato, “Au na seḡuka baviniḡuni, maiḡeri dagara mabarari boḡita-ḡaurini, aramu maki bebareḡoni. Mai dagara mabarari tu au ḡegu, benamo aura-viniḡani tarimana baviniḡani.

⁷ Moḡa lorinai bema au botoma-rakariḡo viniḡuni nai, maiḡeri dagara mabarari boḡabirini ḡoi ḡemu.”

⁸ Senaḡi Iesu evaḡa-veseto, ekirato, “Buka Veāḡai tu maiḡesi ḡetoreato, ‘Vereḡauka, ḡoi ḡemu Barau bono toma-rakariḡo vinia, ḡia moḡo ḡereḡana vetuḡunāḡina bono iaḡo-vini!’ ”

⁹ Benamo Satani na Ierusalemā ḡana eḡori-iaḡoato, Rubu Veāḡa tuḡunai evaḡa-ruḡakauato, ekiraiato, “Bema ḡoi Barau Natuna, mainana noburi-firiḡo,

¹⁰ korana Buka Veāḡa nuḡanai maiḡesi ekirani, ‘Barau na ḡena aneru bekirarini, ḡoi beḡe narimuni.’

¹¹ Ekirani maki, ‘Aneru na ḡimari na beḡe ḡobemuni, beḡe ḡabi-vaisimuni, kwakumu fore ai asi boraraiani.’ ”

¹² Iesu evaḡa-veseto, ekirato, “Buka Veāḡa nuḡanai maki ekirani, ‘Vereḡauka ḡoi ḡemu Barau asi bono riba-ḡania.’ ”

¹³ Satani ḡena veribaḡani mabarari evaḡa-koririto, benamo eraga-kwaneato, eiaḡoto mo, ḡaro ta.

*Iesu ḡena ḡauvei esinaiaito Galileai
Mataio 4:12-17; Mareko 1:14-15*

¹⁴ Iesu ma eġenoġoito Galilea ġana, Iauka Veaġa seġukana maki ġia ġesi. Ġia varina Galilea tano nuġanai ġefiu-rovorovoato.

¹⁵ Iesu tu ġeri rubu nuġari ai evevaġa-ribato-ġoi, mabarari na ġevaġa-raġeato.

Nasareta tarimari na Iesu asi ġeġabi-raġeato

Mataio 13:53-58; Mareko 6:1-6

¹⁶ Benamo Iesu Nasareta ġana eiaġoto. Mai tu ġia ebaregoto vanuġana. Vanaġivanaġi eveito-ġoi kavana Sabadi ai ġia rubu ai eraka-toġato. Benamo Buka Veaġa bene iavia ġana evariġisito nai,

¹⁷ Isaia peroveta tarimana ġena buka rubu ġitaġauna tarimana na Iesu eviniato, benamo ġia na ereraiato, ġena iavi-iavi gabuna eġoitaġoato, maiġesi ekirani,

¹⁸ “Vereġauka Iaukana tu

au ġegu ai maiġa,

korana ġia na tu

au eboroġiguto,

ema eviriġiguto,

Vari Namona gara veġubu tarimari bana ġobata-viniri ġana.

Etuġuguto, dibura tarimari ġeri ai Barau na dibura na varau eġabi-vaġirato
varina bana varifiua ġana,

ema mata-bubu tarimari

matari maki beġene fafa.

Ġevaġa-rakavarini tarimari

bana vaġa-maġuriri,

¹⁹ ema Vereġauka na tarimarima bevaġa-maġuririni laġanina bana ġobata-iaġia.”

²⁰ Benamo Iesu na buka ma eiokuato, rubu ġitaġauna tarimana ma evini-ġenoġoiato, benamo etanu-tarito. Mabarari rubu nuġanai tarimari na ġeġita-karakaraiato.

²¹ Benamo Iesu na eġobata-vinirito, ekirato, “Mai boġo seġaġia guruġana tu toma ġaro ai bemoġoni.”

²² Benamo mabarari na ġevaġa-namoato e ġeġabato, korana guruġa namori ekiraġirito nai. Ġekirato, “Mai tu Iosefa natuna ba?”

²³ Benamo Iesu na ekirarito, ekirato, “Au ribagu ġomi na mai sisiba guruġana au ġegu ai boġo kira-varaguni, boġo kirani, ‘Doketa tarimamu, tauġemu bono vevaġa-maġuri! Kaperanaumai oveirito veiġari variri ġama seġaġirito, be mainai ġemu vanuġa korikori ai maki bono vei.’ ”

²⁴ Moġoni akiramini, peroveta tarimana tu ġena vanuġa korikori ai asi beġe ġabi-raġeani.

²⁵ Maiġa maki boġono seġaġi: Moġoni, Elia ġena negai vabu ġutuma Isaraelai ġetanuto-ġoi. Laġani toitoi (3) ma ġue imaima sebona (6) nuġanai ġura asi eraguto-ġoi, tanobara mabarana doġe na eġabi-ġauato.

²⁶ Senaġi mo Isaraela vaburi ġeri ai Barau na Elia asi etuġu-iaġoato. Irau gabu vanuġana ta arana Sarefata, Sidono tanonai, vabu ta ġenai etuġu-iaġoato.

²⁷ Elisa, peroveta tarimana, ġena negai lepera tarimari ġutuma Isaraelai ġetanuto-ġoi, senaġi sebona ta asi evaġa-namoato, Naman, Siria tarimana, moġo ġereġana.

²⁸ Rubu ai ġeveogoto tarimari mabarari mo guruġa ġeseġaġiato nai, ġebaru-rakavato.

²⁹ Benamo ġevariġisito, Iesu vanuġa na ġeinu-rosiato, ġeri vanuġa ġevaġa-ruġaiato ġorona tavi ta reke lofa asikeina na beġene fiu-riġoa ġetato.

³⁰ Senaġi Iesu tu ġia fakari na moġo eraka-vaġito, mo eiaġoto.

Iesu na iauka rakavana elai-vaġiato

Mareko 1:21-28

³¹ Iesu tu Kaperanauma, Galilea vanuġana ta, ġana evariġoto. Benamo Sabadi ai evevaġa-ribato.

³² Ġia ġena vevaġa-riba guruġari tarimarima na ġeseġaġiato nai, ġeġaba-rakavato, korana ġena guruġa ma seġukana.

³³ Rubu nuġanai iauka rakavana na eboroġiato tarimana ta etanu-taġoto-ġoi. Ġia ekoġo-gigitarito, ekirato,

³⁴ “Iesu, Nasareta taumu o, kara ġemai noveia otoni? Ġoi ġai vaġa-rakavama uranai boiaġoma, ene? Au ribagu, ġoi tu Barau ġena Veaġa Tarimamu.”

³⁵ Iesu na ekira-ġoiato, ekirato, “Gurumu, ġia ġenana noraka-vaġi!” Benamo mo iauka rakavana na tano eġidara-iaġiato tarimarima ġoirari ai, ġia ġenana eraka-vaġito, fau ta maki asi efoforito ġia ġenai.

³⁶ Benamo tarimarima mabarari nuġari ġefarevaġi-rakavato, ġeveguruġa-vevinito, ġekirato, “Mainai kamasi eguruġani? Be, ma seġukana e ma gwadana ġesi iauka rakavari evaġa-guruġarini, benamo ġeraka-vaġini!”

³⁷ Benamo Iesu varina mo gabu mabaranai ġefiu-rovorovoato.

Iesu na Simona ġena taġama evaġa-namoato

Mataio 8:14-15; Mareko 1:29-31

³⁸ Iesu rubu eraga-kwaneato, benamo Simona ġena numa ġana eiaġoto. Simona ġena taġama vavinena ekeveto, tauġanina eseġuka-rakavato; benamo Iesu ġenoġiato bene vaġa-kavaia.

³⁹ Benamo Iesu eiaġoto mo vavine sevinai eruġato, keve ekira-ġoiato, benamo keve ekorito. Vavine maoromaoro evariġisito, benamo eġuburito.

Keve tarimari ġutuma Iesu na evaġa-namorito

Mataio 8:16-17; Mareko 1:32-34

⁴⁰ Ġaro ea keto-firiġoto-ġoi nai, tarimarima na keve irauirau tarimari mabarari Iesu ġenai ġeġori-iaġorito. Ġia ġimana tarima tata iatari ai etore-kaurito evaġa-namorito.

⁴¹ Iauka rakavari maki tarimarima ġutuma ġerina ġeraka-vaġito, benamo iauka rakavari ġekoġoto, ġekirato, “Ġoi tu Barau Natuna!” Senaġi Iesu na evaġa-guruġarito asi beġene guruġa, korana ġia ribari Iesu tu Keriso, (Barau na ekiraġi-toreato vevaġa-maġuri tauna).

Iesu rubu nuġari ai eġobatato-ġoi

Mareko 1:35-39

⁴² Elaġanito, Iesu evariġisito, tano fakana ġana eiaġoto. Tarimarima na ġea vetauato, ġedoġariato, ġeġabi-tariato asi ġeri ura ġia na bene raga-kwaneri ġetato.

⁴³ Senaġi Iesu na evaġa-guruġarito, ekirato, “Au tu vanuġa irauri ai maki bana ġobata, Barau ġena Basileia varina namona bana fua, Barau na etuġuguto korana tu moġa.”

⁴⁴ Benamo Iudea tanona ruburi nuġari ai eġobatato-ġoi.

5

Iesu na ġena mero ekearito

¹ Ĝaro ta Iesu tu Genesareta kouna rikinai eruĝa-taĝoto-ĝoi, tarimarima na ĝeraga-ĝeĝeraĝiato, Barau ĝena guruĝa beĝene seĝaĝia ĝana.

² Ĝia tu ĝasi ruarua eĝitarito, kou rikinai ĝeinu-raĝerito; maina tarimari na ĝeraga-kwanerito, ĝeri reke ĝeĝurigirito-ĝoi.

³ Benamo Iesu tu mo ĝasi tai eraĝeto, Simona ĝena ĝasi. Ĝia na Simona ekiraiato, kota negini-rosia nanu ĝana. Benamo ĝasi ai etanu-tarito, tarimarima ĝutuma evaĝa-ribarito.

⁴ Eguruĝa-ĝosito vau, ĝia na Simona ekiraiato, ekirato, “Ĝemi ĝasi dodoku rekena ĝana ĝogini-rosia, be ĝemi reke boĝono toreri, maĝani-kone boĝono vaĝi ĝana.”

⁵ Simona evaĝa-veseto, ekirato, “Vevaĝa-riba taumu, ĝai tu baĝa vek-waraĝi-laĝani, maĝani-kone ta maki asi baĝa doĝaria, senaĝi ĝoi ĝemu guruĝa dainai reke atorerini.”

⁶ Benamo ĝetorerito, maĝani-kone asisebo ĝetoĝato, ĝeri reke maki dori ĝevedareto.

⁷ Moĝesi nai karori ĝasi tai ĝelau-iaverito, beĝene iaĝoma, be ĝia beĝenema vaĝa-kavari ĝetato. Ĝeiaĝomato, ĝasi ruarua maĝani-kone na ĝevaĝa-vonurito, dori ĝeburuto-ĝoi.

⁸ Simona Petero na mo veiĝa eĝorato dagarana eĝitaiato, benamo Iesu kwakuna koranai eketo-tarito vau ekiraiato, ekirato, “Vereĝauka, noraka-veĝita au ĝeguna, au tu vei-rakava tarimagu!”

⁹ Korana tu ĝia ma karonna mabarana ĝesi nuĝari ĝefarevaĝi-rakavato, mo maĝani-kone asisebo ĝevaĝirito nai.

¹⁰ Simona ĝesi ĝemainna-vegogoto-ĝoi tarimari maki Iakobo (o Iames) e Ioane, Sebedaio natuna, ĝeĝaba-rakavato. Iesu na Simona ekiraiato, ekirato, “Asi nogari; maitoma bevesina beiaĝoni, ĝoi tu tarimarima bomainna-vinirini.”

¹¹ Benamo ĝasi ruarua tu kou rikinai ĝeinu-raĝerito, ĝeri dagara mabarari ĝeraga-kwanerito, Iesu murinai ĝerakato.

Iesu na lepera tarimana evaĝa-namoato

Mataio 8:1-4; Mareko 1:40-45

¹² Ĝaro ta Iesu tu vanuĝa ta nuĝanai, tarima ta monai kefina mabarana lepera moĝo. Ĝia na Iesu eĝitaiato nai, ĝoiranai evetui-tarito, enoĝiato, ekirato, “Vereĝauka, bema ĝoi ourani nai, moĝoni boiarevaguni, bovaĝa-namoguni riba!”

¹³ Iesu ĝimana etuĝu-iaĝoato, eĝabi-karaiato, ekirato, “Aurani, be non-amo!” Benamo vaĝa-sebo lepera na eraga-kwaneato.

¹⁴ Iesu na evaĝa-guruĝaiato, ekirato, “Tarima ta asi bono kira-varaia.” Ma ekirato, “Noiaĝo, Rubu Veaĝa verena na bene ĝitamu, ema veiareva varevare dagarari Mose na ekiraĝiato ilailanai bono vinia, be tarimarima beĝene riba, ĝoi tu bonamo.”

¹⁵ Senaĝi Iesu varina tarimarima na ĝefiu-rovorovoato-ĝoi vau, tarimarima ĝutuma-bara ĝevegogoto-ĝoi, ĝia ĝena guruĝa seĝaĝi-seĝaĝiri e ĝeri keve vaĝa-namori uranai.

¹⁶ Senaĝi Iesu tu eraka-veĝitato-ĝoi tano fakana ĝana, ea ĝurigirito-ĝoi.

Iesu na rakava etuĝamaĝi-fitoĝarito

Mataio 9:1-8; Mareko 2:1-12

¹⁷ Ĝaro tai Iesu evevaĝa-ribato-ĝoi nuĝanai, Farisea tarimari e taravatu vaĝa-riba-iaĝina tarimari Galilea e Iudea vanuĝari mabarari na, ema

Ierusalemema na ġeiaġomato, ġia sevinai ġema tanu-tarito. Barau ġena seġuka Iesu ġenai evaġa-foforiato, keve tarimari bene vaġa-namori ġana.

¹⁸ Tarima kotari na tauġanina tavi ta emaseto tarimana ta gedai genagenanai ġeġwa-iaġoato. Numa nuġanai beġene raka-toġa dabarana ġevetauato, Iesu ġoiranai beġene tore-taria ġetato.

¹⁹ Senaġi tarimarima ġutuma naima, rakatoġa dabara ta asi ġedoġariato. Moġa lorinai keve rakava tarimana ma gedana ġesi ġeġwa-raġeato numa tuġunai, ġuduġu ġeġiu-fakaiato vau, ġetuġu-riġoato tarimarima fakari ai Iesu ġoiranai.

²⁰ Iesu na ġeri veġabidadama eġitaiato, benamo keve rakava tarimana ekiraiato, ekirato, “Ġata, ġoi ġemu rakava batuġamaġi-fitoġari.”

²¹ Farisea tarimari e taravatu ġevevaġa-riba iaġiato-ġoi tarimari maiġesi ġetuġamaġito, “Mai tu deikara, ġia na Barau ekira-fitoġaiani? Barau ġereġana na moġo rakava etuġamaġi-fitoġarini!”

²² Iesu ma ribana ġia kara ġetuġamaġirito-ġoi, benamo evaġa-guruġarito, ekirato, “Karase nai nuġami ai maniġesi ġotuġamaġini?”

²³ Aiġesina baguruġani tu meraġa, ‘Ġemu rakava batuġamaġi-fitoġari’ banasi, ba bara kira, ‘Novariġisi, be noraka’ barasi?

²⁴ Au na navaġa-ġitami, Tarimarima Natuna tu ma seġukana rakava betuġamaġi-fitoġarini tanobarai.” Ġia na keve rakava tarimana evaġa-guruġaiato, ekirato, “Novariġisi, ġemu geda noġabia, be numa ġana noiġo!”

²⁵ Benamo ġia maoromaoro evariġisito tarimarima ġoirari ai, egena-iaġirito dagarari eġabirito, ġena numa ġana eiaġoto, Barau evaġa-raġeato.

²⁶ Tarimarima mabarari nuġari ġefarevaġito ema Barau ġevaġa-raġeato. Gari na evaġa-vonurito, benamo ġekirato, “Veiġa boruri toma ġaro ai bita ġita!”

Iesu na takesi gogo tarimana arana Levi ekeaiato

Mataio 9:9-13; Mareko 2:13-17

²⁷ Moġa murinai Iesu tu vanuġa na eraka-rosito, benamo takesi gogo tarimana arana Levi takesi moniri ġeġabito-ġoi numanai tanutaġo eġitaiato. Benamo Iesu na ekiraiato, ekirato, “Murigu ai noma raka.”

²⁸ Benamo Levi evariġisito, ġena dagara mabarari eraga-kwanerito, Iesu murinai erakato.

²⁹ Benamo Levi na ġaniġani baregona ġena numai eveiato Iesu ġana. Varivari tarimari vefakari ai tarimarima ġutuma takesi gogo tarimari ema tarima tari ġia ġesi ġeġaniġanito.

³⁰ Farisea tarimari tari e taravatu ġevevaġa-riba iaġiato-ġoi tarimari, ġia ġeri doġoro tarimari, ġevanevaneto Iesu ġena mero ġeri ai, ġekirato, “Karase nai ġomi tu takesi gogo tarimari e vei-rakava tarimari ġesi ġoġaniġanini ema ġoniuniu-vegogoni?”

³¹ Iesu na evaġa-veserito, ekirato, “Namo tarimari tu doketa asi beġe vetaurini, senaġi keve tarimari moġo.

³² Au maki vei iobukaiobuka tarimari keakeari asi aiaġomato, senaġi vei-rakava tarimari beġene vetuġamaġi-kure e beġene raka-kure ġana aiaġomato.”

Ġaniveaġa

Mataio 9:14-17; Mareko 2:18-22

³³ Farisea tarimari na Iesu ġevaġa-guruġaiato, ġekirato, “Ioane Babatiso ġena mero nega-ġutuma ġeġani-veaġani e ġeġuriġurini. Ġai ġema mero maki moġesi ġeveini, a ġoi ġemu mero tu ġeġaniġanini e ġeniuniuni moġo.”

³⁴ Iesu na evaḡa-veserito, ekirato, “Ĝomi ḡotuḡamaḡini veḡaraḡo variḡu tarimana ḡatana seviri ai etanuni nuḡanai beḡe ḡani-veaḡani ei?”

³⁵ Ĝarona eiagomani, veḡaraḡo variḡu tarimana ḡia ḡerina beḡe ḡabi-veḡitaiani, monai vau beḡe ḡani-veaḡani.”

³⁶ Iesu na ḡeri barabore ta ma ekiraḡiato, ekirato, “Tarima ta na dabuḡa variḡuna asi bedareani, dabuḡa guinena bani-iaḡina. Bema moḡesi beveini nai, dabuḡa variḡuna bedareani, ema dabuḡa variḡuna veseana dabuḡa guinena ḡesi asi beḡe ilailani.

³⁷ Tarima ta na vine nanuna variḡuna nanigosi kefina guinenai asi besisiani. Bema moḡesi beveini nai, vine nanuna variḡuna na kefi guinena beḡani-fakaiani. Vine nanuna bevebubuni e kefina berakavani.

³⁸ Senaḡi vine nanuna variḡuna nanigosi kefina variḡunai besisiani tu namo!

³⁹ Ema tarima ta na vine nanuna guinena eniuani murinai vine nanuna variḡuna asi beura-viniani, korana ḡia bekirani, ‘Vine nanuna guinena tu namo vedaurea.’ ”

6

Iesu tu Sabadi Verena

¹ Sabadi tai Iesu widi vamokari nuḡari na eraka-iaḡoto-ḡoi, benamo ḡena mero widi ḡebukito, ḡimari ai ḡemuturito-ḡoi, benamo tauri tu ḡeḡanirito-ḡoi.

² Farisea tarimari kotari na ḡedanaḡirito, ḡekirato, “Ĝomi tu kara dainai ḡaina taravatu asi ḡokorana-iaḡiani, Sabadi ai widi ḡobukini?”

³ Iesu na evaḡa-veserito, ekirato, “Ĝomi Davida ma karona ḡesi ḡevitorito nai, Davida na veiḡa ta eveiato guruḡana tu asi ḡoiaviani?”

⁴ Barau ḡena numai eraka-toḡato, Barau ḡoiranai ḡetorerito-ḡoi beredi eḡabito, eḡanito ema karona maki evinirito. Mo beredi tu veaḡa, Rubu Veaḡa vereri moḡo ḡari, taravatu.”

⁵ Iesu na ma ekirarito, ekirato, “Tarimarima Natuna tu Sabadi Verena.”

Ĝima boso tarimana

Mataio 12:9-14; Mareko 3:1-6

⁶ Ma Sabadi tai Iesu rubu ai eraka-toḡato, benamo evevaḡa-ribato-ḡoi. Monai tarima ta tu ḡimana aroribana tu ebosoto.

⁷ Taravatu ḡevevaḡa-riba iaḡiato-ḡoi tarimari e Farisea tarimari na tu ḡia ḡeḡita-taḡoato-ḡoi, mai Sabadi ai bevevaḡa-namoni ba asiḡi, korana beḡene samania ḡana.

⁸ Senaḡina Iesu na ḡia kara ḡetuḡamaḡiato-ḡoi tu eribaiato, benamo mo tarima ḡimana boso ekiraiato, ekirato, “Noruḡa-vaisi, mainai noma ruḡa.” Benamo eruḡa-vaisito, ea ruḡato.

⁹ Benamo Iesu na evaḡa-guruḡarito, ekirato, “Nadanaḡimi roḡo, taravatu nuḡanai aiḡa tu namo, Sabadi ai veiḡa namori veiveiri namo ba veiḡa rakavari sini veiri? Tana vevaḡa-maḡuri ba tana vaḡivaḡi?”

¹⁰ Eboḡe-ḡeḡeraḡito, mabarari eḡitarito, benamo mo tarima ekiraiato, ekirato, “Ĝimamu notuḡu-roroḡotoa.” Ĝimana etuḡu-roroḡotoato, benamo enamoto ḡimana reke ta kavana.

¹¹ Senaḡina ḡia tu ḡebaru-rakavato, benamo tauḡeri fakari ai moḡo ḡeguruḡa-vegogoto Iesu kamasi ta beḡene veia ḡana.

Iesu na tarima gabanana ruarua (12) eḡabi-hidirito

Mataio 10:1-4; Mareko 3:13-19

¹² Mo ġaro tai Iesu ġoro ta tuġuna ġana evaraġeto ġuriġuri, benamo mo boġi vinubana Barau ġenai eġauġauto.

¹³ Elaġanito, ġena mero ekea-vegogorito, benamo gabanana ruarua (12) eġabi-viriġirito, arari evatorito, apostolo.

¹⁴ Simona, arana ta tu Petero, ma tarina Anduru; e Iakobo (o Iames), e Ioane, e Filippo, e Batolomeo,

¹⁵ e Mataio, e Tomasi; e Iakobo (o Iames), Alfeo natuna; e Simona, Selote tarimana;

¹⁶ e Iudas, Iakobo (o Iames) natuna; ema Iudas Isakariota, Iesu berevaiiani tarimana.

Iesu evevaġa-ribato e keve evaġa-namorito

Mataio 4:24-25; Mareko 3:7-12

¹⁷ Ġia ġesi ġoro na ġeseiriġoto tano faiaranai, benamo Iesu ema ruġa-tarito. Ġia ġenai riba ġeġabito-ġoi tarimari ġutuma ema tarimarima ġutuma lelevaġiri maki Iudea ema Ierusalem na ġeiaġomato, Taia konena na e Sidono konena na ġeiaġomato,

¹⁸ ġia beġene seġaġia uranai ema ġeri keve bene vaġa-namori ġana. Iauka rakavari na ġeboroġirito tarimari maki evaġa-namorito.

¹⁹ Benamo tarimarima mabarari ġeurato-ġoi Iesu beġene ġabi-karaia, korana tu seġuka ġia ġenana eiaġomato-ġoi, benamo tarimarima mabarari ġeri keve ġenamoto-ġoi.

Deikara beġene iaku e deikara ġeri ai tu rakava

Mataio 5:1-12

²⁰ Iesu eboġeboġeto, benamo eboġe-iaġoto ġena mero eġitarito vau ekirato:

“Gara veġubu tu ġoiaku,
korana Barau ġena Basileia tu ġomi ġemi.

²¹ Ġomi deidei toma ġevitomini tu boġono iaku,
korana ġomi roġo boġo ġani-maseni bene.

Ġomi deidei toma ġotaġi-taġini tu boġono iaku,
korana boġo rikini bene.

²² Boġono verere bema tarima na beġe baru-vinimini, beġe kira-fitogaġmini, beġe rori-toremmini, ema arami beġe vaġa-rakavarini Tarimarima Natuna dainai.

²³ Moġeri beġe ġorani ġaronai boġono iaku e boġono buri-vaisi ma vereremi ġesi, korana davami tu asikeikeina gubai. Korana ġia seneri na maki peroveta tarimari moġesi ġeveirito.

²⁴ Senaġina ġomi ma ġemi
farefare ġutuma tarimami
vetuġami kika,
korana vaġa-iakumi farefareri tu varau ġoġabito bene.

²⁵ Toma ġoġani-maseni tarimami,
vetuġami,
korana beġea vitomini.

Toma ġorikini tarimami,
vetuġami kika,
korana nuġami beġea metoni
e boġoa taġini.

²⁶ Tarimarima na ġekiraġi-varaġe varaġemini tarimami, vetuġami, korana seneri na maki peroveta tarimari ġofaġofari tu maniġesi ġevaġa-raġerito.”

Ĝevaĝa-rakavamini tarimari boĝono ura-viniri

Mataio 5:38-48

²⁷ “Senaĝina au ĝoseĝaĝiguni tarimami akiramini: Ĝebaru-vinimini tarimari boĝono ura-viniri, ĝevaĝa-rakavamini tarimari veiĝa namori boĝono vei-viniri.

²⁸ Ĝekira-rakavamini tarimari boĝono vaĝa-namori ema veiĝa rakavari ĝevei-vinimini tarimari ĝeri boĝono ĝurigiuri.

²⁹ Bema tarima ta na taĝomu tavi ta beforoani nai, taĝomu reke ta maki bono vinia. Tarima ta na ĝemu koudi beĝabiani nai, sedi maki asi bono ĝabitaria, bene ĝabia.

³⁰ Ĝemu ai beĝe noĝinoĝini tarimari bono viniri ema deikara na ĝemu dagara ta beĝabi-rakaiani, ĝabigoina guruĝana asi bono vei.

³¹ Kara ourani tarimarima na ĝemu ai beĝene veia veigana, ĝia ĝeri ai maki mo veigā bono veia.

³² Bema ĝoura-vinirini tarimari tu ĝomi ĝeura-vinimini tarimari moĝo nai, ĝomi ĝemi namo tu kara? Rakava tarimari maki ĝeura-vinirini tarimari moĝo ĝeura-vinirini.

³³ O bema veigā namori ĝemi ai ĝeveini tarimari moĝo veigā namori ĝovei-vinirini, ĝomi ĝemi namo tu kara? Rakava tarimari maki mani veigā sebona ĝeveiani.

³⁴ O bema ma beĝe vini-ĝoimini tarimari moĝo ĝovinirini, ĝomi ĝemi namo tu kara? Rakava tarimari na maki tarima ĝevinirini, murinai tu mabarari ma beĝene dava-ĝoiri ĝetoni.

³⁵ Senaĝina ĝebaru-vinimini ema ĝevaĝa-rakavamini tarimari boĝono ura-viniri, veigā namori ĝeri ai boĝono vei, boĝono viniri, a tuĝu vaĝa-voi tuĝamaĝina asi boĝono vei. Benamo davami beĝene barego, ema Iarukorokoro Barauna natunai boĝono iaĝo, korana tu ĝia na asi ĝevaĝa-namoani tarimari e vei-rakava tarimari evaĝa-namorini.

³⁶ Boĝono vevetuĝa-ĝwa, ĝomi Tamami evevetuĝa-ĝwani kavana.”

Nuĝami ai tarimarima asi boĝono vaĝa-rakavari

Mataio 7:1-5

³⁷ “Nuĝami ai tarimarima asi boĝono kira-kerereri. Moĝesi tu Barau na maki asi bekiraĝimini ĝomi tu kerere. Rakava voina tarimarima ĝeri ai asi boĝono kiraĝi-kaua, benamo Barau na rakava voina ĝemi ai asi bekiraĝi-kauani. Rakava boĝono tuĝamaĝi-fitoĝaia, be Barau na maki ĝemi rakava bene tuĝamaĝi-fitoĝari.

³⁸ Boĝono vini, be Barau na maki bene vinimi, ĝutumari bene dori-riĝori, bene kora-vegogori, bene vonu-fokafoka, bene ĝiĝiĝiĝi-seĝi, bene bubu-riĝoa ĝemi ai. Korana aiĝesi ĝomi ĝovinini, Barau na maki moĝesi bevinimini.”

³⁹ Iesu na barabore ta ma ekira-vararito, ekirato, “Mata-bubu tarimana na mata-bubu tarimana ta beĝori-kauani riba ba? Ba tauri ruarua koufai beĝea keto-ĝurani?

⁴⁰ Riba vetau merona na evaĝa-ribaiani tarimana asi bevanaĝiani, senaĝina ĝena sikuli bevaĝa-koriani vau, evaĝa-ribaiani tarimana ĝesi beĝe ilailani.

⁴¹ Kara dainai tarikakamu matanai libika oĝitaiani, senaĝi ĝoi matamu ai ĝau tubina tu asi otuĝamaĝiani.

⁴² Kamara dabarai ĝoi tarikakamu okiraiani, okirani, ‘Ĝata, au na roĝo matamu ai libika nakokia,’ senaĝina ĝoi tauĝemu matamu ai ĝau tubina tu asi oĝitaiani? Ĝofaĝofa tarimamu, guine tu ĝoi matamu ai ĝau tubina

nokoki-vaġia roġo, benamo boboġeboġe-ginikauni vau, tarikakamu matanai libika bono kokia.”

Ġau ta ġwaġwana

Mataio 7:16-20; 12:33-35

⁴³ “Ġau namona beġwani ġwaġwana tu dia rakava, ema ġau rakavana beġwani ġwaġwana tu dia namo.

⁴⁴ Ġau mabarari tu ġwari ai bita ribani. Figi ġwari maki ġau ma giniginiri ġerina asi ġebokoni, ema vine ġwari (o grapes) ġauġa ġiniginiri ġeri ai asi ġebokoni.

⁴⁵ Tarima namona na dagara namori nuġanai evaġa-vegogorini dagarari bevaġa-raka-rosirini. Tarima rakavana na dagara asi namori nuġanai evaġa-vegogorini dagarari bevaġa-raka-rosirini. Korana tarima tu nuġana na kara eiaġomani murunai ekiraġirini.”

Numa ġeragani tarimari ruarua

Mataio 7:24-27

⁴⁶ “Karase nai au ġokiraġiguni, ġokirani, ‘Vereġauka, Vereġauka,’ nuġanai au aguruġani veiġari tu asi ġoveirini?

⁴⁷ Navaġa-ribami, deikara au ġegu ai eiaġomani, au ġegu guruġa ema seġaġini ma veiġari eveirini tu kamasi.

⁴⁸ Ġia tu tarima ta ġena numa eragaiato kavana. Guri ekwa-variġo kwareġaiato, ema fore iatanai evaġa-ruġaiato, benamo ġabata baregona eragato, mo numa edoriato, senaġi asi eketoto, korana fore iatanai eragaiato nai.

⁴⁹ A tarima ta au ġegu guruġa eseġaġirini, senaġi veiġari tu asi eveirini, ġia tu numa eragaiato nai, tano moirana iatanai moġo evaġa-ruġaiato, ġabata na mo numa edoriato nai, eketo-tarito, benamo eġwa-rovorovoato.”

7

Roma vetari verena ġena vetuġunaġi merona

¹ Iesu na moġeri guruġa mabarari tarimarima ġoirari ai ekiraġi-ġosirito vau, Kaperanauma vanuġanai eraka-toġato.

² Monai Roma vetari verena ta etanuto-ġoi. Ġena vetuġunaġi merona, euravini-baregoato-ġoi merona, ekeve-rakavato, dori emaseto-ġoi.

³ Vetari verena na Iesu varina eseġaġiato, benamo Iuda tarima baregori kota etuġu-iaġorito, Iesu beġene noġia, bene iaġoma, ġena vetuġunaġi merona benema vaġa-namoa.

⁴ Benamo Iesu ġenai ġeiaġoto, ma nuġari mabarari ġesi ġenoġiato, ġekirato, “Mai vetari verena tu tarima namona naima bono vaġa-kavaia.

⁵ Korana ġia na ġita besera eura-vinirini, ema ġai ġema rubu maki ġia na eragaiato.”

⁶ Iesu ġia ġesi ġeiaġoto. Numa ġeraka-kavinaġiato-ġoi nai, vetari verena na ġatana kota etuġu-iaġorito Iesu ġoirana ġana, benamo vetari verena ġena guruġa Iesu ġekira-varaiato, ġekirato, “Vereġauka, asi novekwaġi, au tu asi ilaila, ġoi ġegu numai boraġekauni.

⁷ Au maki asi ilaila, ġoi ġemu ai baiaġosini. Senaġi ġoi noguruġa moġo, benamo au ġegu vetuġunaġi merona benamoni.

⁸ Au maki tarima kota ġeri veġitaġau gabureri ai ema vetari tarimari o soldia tu au gaburegu ai. Au na ta bakiraiani, ‘Noraka!’ benamo berakani, ma ta bakiraiani, ‘Noiaġoma!’ benamo beiaġomani. Ema au ġegu vetuġunaġi merona bakiraiani, ‘Maiġa noveia!’ benamo beveiani.”

⁹ Iesu na mai guruḡa eseḡaḡiatio nai, eḡaba-rakavato, eruḡa-kureto, ḡia murinai ḡerakato tarimari ḡutuma evaḡa-guruḡarito, ekirato, “Au na ḡomi akiramini, veḡabidadama maḡesi kavana Isaraela nuḡanai asi adoḡariatio.”

¹⁰ Benamo vetari verena na etuḡurito tarimari ma ḡeḡenoḡoito ḡia ḡena numa ḡana. Keve merona ḡedoḡariatio, ḡena keve varau ekorito.

Iesu na vabu ta natuna mase na evaḡa-maḡuri-ḡenoḡoiatio

¹¹ Moḡa murinai Iesu tu vanuḡa ta ḡana eiaḡoto arana Nain. ḡena mero ema tarimarima ḡutuma maki ḡia ḡesi ḡeiaḡoto.

¹² Vanuḡa nuḡanai roḡosi ḡene raka-toḡa nuḡanai, mase ta vanuḡa nuḡana na ḡeḡwa-rosiatio-ḡoi. Vabu ta natuna merona ḡora ḡereḡa emaseto. Vanuḡa tarimari ḡutuma na vabu ḡekavaiatio.

¹³ Iesu na mo vabu eḡitaiatio, benamo evetuḡaiatio, ekiraiatio, ekirato, “Asi notaḡi.”

¹⁴ Benamo Iesu eraka-kavi-iaḡoto, mase mauḡana eḡabi-karaiatio. Mauḡa ḡeḡwaiatio tarimari ḡeruḡa-tarito. Benamo Iesu ekirato, “Mero futua, akiramuni, novariḡisi!”

¹⁵ Benamo etanu-vaisito, eguruḡato. Moḡa murinai Iesu na ḡia sinana ma evini-ḡenoḡoiatio.

¹⁶ Mabarari gari na evaḡa-vonurito. Barau ḡevaḡa-raḡeato, ḡekirato, “Peroveta tarimana barana ta ḡita fakarai bema fofori!” ema, “Barau na ḡena bese tarimari benema vaḡa-kavari ḡana beiaḡoma!”

¹⁷ Benamo mai veiḡa varina Iudea mabaranai ema Iudea sevina vanuḡari mabarari ai ḡefiu-rovorovoato.

Iesu ma Ioane Babatiso

Mataio 11:2-19

¹⁸ Ioane ḡena mero na mai dagara mabarari ḡeḡorato dagarari ḡekiravaraiatio. Benamo Ioane na ḡena mero ruarua ekearito,

¹⁹ etuḡurito Vereḡauka ḡenai, ḡene danaḡia, “Ioane na ekiraḡiatio, beiaḡomani tarimana tu ḡoi, ba tarima boruna ta baḡana vaḡa-nogaia?”

²⁰ Tauri ruarua Iesu ḡenai ḡeraḡasito, benamo ḡekirato, “Ioane Babatiso na betuḡuma, bekira, ‘Ḗia na ekiraḡiatio beiaḡomani tarimana tu ḡoi, ba tarima boruna ta baḡana vaḡa-nogaia?’ ”

²¹ Mo aoa ai Iesu na tarimarima ḡutuma evaḡa-namorito, keve tarimari, midigu ḡeḡanito-ḡoi tarimari, iauka rakavari na ḡeboroḡirito tarimari. Mata-bubu tarimari ḡutuma maki matari evaḡa-iaḡarito.

²² Benamo Iesu na tauri ruarua evaḡa-veserito, ekirato, “Ḗoḡenoḡoi, ḡomi na boḡo ḡitari e boḡo seḡaḡiri veiḡari Ioane boḡono kira-varaia: Mata-bubu tarimari ḡeboḡeboḡeni, kwaku rakava tarimari ḡerakani, lepera tarimari ḡenamoni, seḡa-bubu tarimari ḡeseḡaḡini, mase tarimari ḡevariḡisi-ḡenoḡoini, ema asi ḡeri-ḡari tarimari ḡeri ai Vari Namona eḡobata-vinirini.

²³ Ḗena veḡabidadama au ḡegu ai asi beraga-kwaneani tarimana tu eiakuni!”

²⁴ Ioane ḡena vetuḡunaḡi tarimari ḡerakato vau, Iesu na ḡevegogoto tarimari evaḡa-guruḡarito, Ioane varina ḡeri ekiraḡiatio, ekirato, “Kara boḡono ḡitaia ḡana tano fakana ḡana ḡoiḡoto? Gobu iavara na ekwari-ḡareva ḡarevaiani ḡitaḡitana ḡoiḡoto?”

²⁵ Kara boḡono ḡitaia ḡana ḡoiḡoto? Dabuḡa namona eveiani tarimana ḡitaḡitana ḡoiḡoto? Asigina, dabuḡa namori ḡeveirini tarimari ema ḡaniḡani namori ḡeḡanirini tarimari tu vere tarimari ḡeri numai ḡetanuni!

26 Be, kara boĝono ĝitaia ĝana ĝoiĝoto? Peroveta tarimana dainai? Aba! Akiramini, ĝoĝitaiato tarimana tu peroveta tarimari mabarari evanaĝirini.

27 Ioane varina Buka Veĝai maĝesi etoreato, Barau ekirato, 'Au na ĝegu vetuĝunaĝi tarimana tu batuĝu-guineani, ĝemu dabara ĝoiramu ai vaĝa-maĝatana.' ”

28 Iesu ma ekirato, “Akiramini, mai tanobarai beĝe maĝuri tarimari mabarari fakari ai ta na Ioane asi bevanaĝiani. Senaĝi Barau ĝena Basilea nuĝanai gabi tarimana na Ioane tu evanaĝiani.”

29 Tarimarima mabarari ema takesi gogo tarimari maki mai guruĝa ĝeseĝaĝiato nai, ĝia na Barau ĝena dabara ĝevaĝa-moĝoniato, Ioane ĝena babatiso ĝeĝabiato.

30 Senaĝi Farisea tarimari e taravatu ĝevevaĝa-riba iaĝiato-ĝoi tarimari na Barau ĝena vevaĝa-maĝuri dabarana ĝia ĝeri ai ĝetuĝamaĝi-fitoĝaiato. Ioane ĝena babatiso ĝia ĝeri ai asi ĝeĝabi-raĝeato.

31 “Toma ĝuru tarimari tu deikarari ĝesi bana vaĝa-ilailari? Ĝia tu kamasi?

32 Ĝia tu noĝa mero keiri kavana, vanuĝa ĝatamanai ĝetanu-taĝoni, ĝeĝereni, tavi ta merori na tavi tai ĝekea-vinirini, ĝekirani, 'Ĝai tu veĝaraĝo vererenai gita ĝalauto-ĝoi ĝomi ĝemi, senaĝi ĝomi tu asi ĝobarato-ĝoi! Ĝai tu mase mariri ĝaĝabito-ĝoi, senaĝi ĝomi tu asi ĝotaĝito-ĝoi!'

33 Korana tu Ioane Babatiso eiaĝomato, eĝani-veaĝato ema vine nanuna asi eniuato. Benamo ĝomi ĝokirani, 'Ĝia tu iauka rakavana na eboroĝiato,' ĝotoni.

34 Tarimarima Natuna eiaĝomato, ĝia tu ĝaniĝani ta asi eruĝaiani. Benamo ĝomi ĝokirani, 'Ĝia tu boĝeka tarimana ema vine nanuna eniu-ĝutumani tarimana, takesi gogo tarimari e vei-rakava tarimari ĝatari,' ĝotoni.

35 Senaĝi Barau ĝena iaunega ĝeĝabi-raĝeani tarimari na Barau ĝena iaunega ĝevaĝa-moĝoniani.”

Iesu tu Simona, Farisea tarimana, ĝena numai

36 Farisea tarimana ta na Iesu enoĝiato, beĝene ĝaniĝani-vegogo etato. Benamo Iesu eiaĝoto ĝena numa ĝana, ĝaniĝani gabunai etanu-tarito.

37 Mo vanuĝai vavine ta etanuto-ĝoi, ĝia tu mata-boraĝa vavinena. Ĝia eseĝaĝito, Iesu tu Farisea tarimana ĝena numai eĝaniĝanito-ĝoi, benamo fore kavabuna namona, alabasta forena na ĝeveiato kavabuna, nuĝanai tu muramura ma bonana namona eĝabi-kauato,

38 eiaĝoto Iesu murinai eritoĝo-tarito, kwakuna koranai etaĝi-rakavato, benamo matana nanuna na Iesu kwakuna evaĝa-nufarito. Benamo ĝwina na ma edau-kaukaurito, kwakuna everauato, muramura ma bonana namona kwakunai ebubuat.

39 Farisea tarimana na, mo veĝa eĝitaiato nai, ĝia nuĝanai maĝesi etuĝamaĝito, “Mai tau bema moĝoni peroveta tarimana nai tu, ĝia bere riba, ĝia eĝabi-karaiani vavinena tu deikara. Ĝia bere riba, mo vavine tu mata-boraĝa vavinena!”

40 Benamo Iesu na ĝia evaĝa-guruĝaiato, ekirato, “Simona, au tu ma ĝegu guruĝa ĝoi ĝemu ai.” Simona ekirato, “Vevaĝa-riba taumu, noguruĝa, be naseĝaĝi.”

41 Iesu ekirato, “Tarima ruarua na moni evinito-ĝoi tarimana ĝenai moni ĝeĝabi-toreto. Tarima ta na silva moniri sinau imaima (500) eĝabi-torerito, ma ta na tu silva moniri gabana imaima (50) eĝabi-torerito.

⁴² Senaġi mai tarima ruarua na ġeri ġabitore vaġa-ġenoġoina tu gwaġiġi rakava nai, moni evinito-ġoi tarimana na ġeri ġabitore etuġamaġi-fitoġaiato moġo. Dei na mo tarima euravini-baregoato?”

⁴³ Simona evaġa-veseto, ekirato, “Au atuġamaġini tu, eġabitore-baregato tarimana.” Iesu ekirato, “Oi, ġemu vaġa-vese tu maoro.”

⁴⁴ Moġa murinai Iesu etanu-kureto, vavine eġoiraiato vau, Simona ekiraiato, ekirato, “Mai vavine oġitaiani? Au ġoi ġemu numai bama raġekau nai, kwakugu ġurigi-ġurigina nanuna ta asi boġwa-iaġomaia, a mai vavine na tu matana gorana na au kwakugu beġurigia vau, ġwina na bedau-kaukauri.

⁴⁵ Ġoi na ġita ġera veġabiraġe veraunai au asi boġabi-raġegu, a mai vavine oġitaiani, roġosi bene doko au kwakugu roġo everauani.

⁴⁶ Ġoi na debagu ai diġa ta asi bobubua, a ġia tu au kwakugu muramura ma bonana namona na bevaġa-fari vekoraġiri.

⁴⁷ Moġa lorinai au na ġoi akiramuni, ġena rakava ġutuma, senaġi Barau na varau betuġamaġi-fitoġari. Moġa lorinai ġena veuravini tu barego. A ġena rakava koturi moġo etuġamaġi-fitoġarito tarimana tu ġena veuravini maki asi barego.”

⁴⁸ Benamo Iesu na mai vavine ekiraiato, ekirato, “Ġemu rakava varau bama tuġamaġi-fitoġari.”

⁴⁹ Ġia ġesi ġeġaniġani-vegogoto tarimari ġevedanaġi-vedanaġito, ġekirato, “Mai tu kamara tarima, be ġia na tarima ġeri rakava maki etuġamaġi-fitoġarini etoni?”

⁵⁰ Senaġi Iesu na vavine ma evaġa-guruġaiato, ekirato, “Ġemu veġabidadama na varau bevaġa-maġurimu. Maivau noiaġo ma nuġa namomu ġesi.”

8

Vavine kota Iesu ġesi ġeiaġoto

¹ Moġa murinai Iesu na vanuġa barari e vanuġa keiri eiaġo-vinirito-ġoi, Barau ġena Basileia Varina Namona eġobata-iaġiato-ġoi. Ġena mero gabanana ruarua (12) ġia ġekavaiato.

² Vavine kota maki ġia ġesi ġeiaġoto. Iesu na iauka rakavari mo vavine ġerina elai-vaġirito ema ġeri keve evaġa-namorito. Ta tu Maria, arana ġevatoato Magadala vanuġana vavinena. Mai tu iauka rakavari imaima ruarua (7) ġia ġenana elai-vaġirito vavinena.

³ Ma ta tu Ioana, Kusa ġaraġona. Kusa tu Heroda ġena farefare eġita-ġaurito-ġoi tarimana ta. Ta tu Susana ema vavine vovoka maki. Moġeri vavine na Iesu ma ġena mero ġeri farefare na ġevaġa-kavarito.

Barabore - Iaraġa tarimana widi ġueri evaroto

Mataio 13:1-9; Mareko 4:1-9

⁴ Tarimarima ġutuma bara ġevegogoto, vanuġa mabarari na Iesu ġenai ġeiaġoto. Benamo ġia na ġeri barabore ta ekiraiato, ekirato,

⁵ “Iaraġa tarimana vamoka ġana eiaġoto, ġena widi ġueri bene fiurovorori ġana. Efiurito-ġoi nai, kota dabarai ġeketoto. Benamo tarimarima na ġefana-veġonurito ema guba manuri na ġeġanirito.

⁶ Kotari tu fore tanonai ġeketoto. Ġetubuto, senaġi asikauna ġemaraito, korana tano tu asi nanuna nai.

⁷ Kotari tu ġauġa ġiniġiniri nuġari ai ġeketoto. Benamo ġauġa ġiniġiniri ġesi ġetubu-sebonato, senaġi varovaro dagarari ġetuturarito nai ġemaseto.

⁸ Kotari tu tano namonai ġeketoto. Benamo ġetubu-ġinikauto, ġeġwato, tata ġwana sinau ta (100).” Benamo Iesu garona evaġa-baregoato, ekirato, “Ma seġana tarimana bene seġaġi.”

Kara dainai Iesu na barabore ekiraġirito

Mataio 13:10-17; Mareko 4:10-12

⁹ Ġena mero na Iesu ġedanaġiato mo barabore anina tu kara.

¹⁰ Iesu evaġa-veseto, ekirato, “Barau ġena Basileia guruġari vekuretoġari ġemi ai evaġa-foforirini, senaġi mabarari tu barabore ai avaġa-guruġarini, beġene ġita, senaġi anina asi beġene ribaia, beġene seġaġi, senaġi asi beġene tuġamaġi-fakaia.”

Widi ġueri baraborena anina

Mataio 13:18-23; Mareko 4:13-20

¹¹ Mai barabore anina tu maġa: Widi ġueri tu Barau ġena guruġa.

¹² Dabarai ġeketoto widi ġueri tu tarimarima na Barau ġena guruġa ġeseġaġiani. Senaġi Satani eiaġomani, Barau ġena guruġa ġia nuġari na eġabi-vaġirini, Vari Namona beġe vaġa-moġoniani e beġe maġurini garina.

¹³ Tano ma forenai widi ġueri ġeketoto tu tarimarima na Barau ġena guruġa ġeseġaġiani e ma iakuri ġesi ġeġabi-raġeani. Senaġi ġia tu noġa tarima asi lamuri kavana. Nega-kotuna moġo Barau ġena guruġa ġekorana-iaġiani, senaġi veribaġani beraġasini nai, beġe ketoni.

¹⁴ Ġauġa ġiniġiniri nuġari ai ġeketoto widi ġueri tu tarimarima na Barau ġena guruġa ġeseġaġiani, senaġi ġetuġamaġi-ġutumani, tanobara farefareri ġetuġamaġi-gogo gogorini ema tanobara ġena maġuri iakuri na Vari Namona elau-tariani. Moġa lorinai ġwaġwa namori asi ġeġorani.

¹⁵ Senaġi tano namonai ġeketoto widi ġueri tu tarimarima na Barau ġena guruġa ġeseġaġiani, ma nuġari namori e ma manauri ġesi ġeġabi-raġeani, ġeġabi-tariani mo, ġwaġwa namori ġeġorani.

Lamefa toretorena gabuna

Mareko 4:21-25

¹⁶ “Tarima ta lamefa begabuani nai tu, dia ġuro na beġoġoi-tariani o fata gaburenai betoreani. Asiġina, ġia tu lamefa toretorena fatanai betorekauani. Benamo tarima beġe raġekauni nai, mabarari na mama beġene ġitaia ġana.

¹⁷ Vekuretoġa dagarari mabarari beġe foforini, veġuni guruġari beġe ribani e beġe kiraġi-foforirini.

¹⁸ Moġa lorinai ġoseġaġirini guruġari loriri boġono toreri. Korana ma ġena seġaġi tarimana Barau na riba e tuġamaġi-faka beviniani, asi ġena seġaġi tarimana, ġia etuġa-maġini ma ġena tuġamaġi-faka, senaġi ġena tuġamaġi-faka aiġesi misina maki beġabi-vaġiani.”

Iesu sinana ema tarina merori

Mataio 12:46-50; Mareko 3:31-35

¹⁹ Iesu sinana ema tarina merori ġia ġenai ġeiaġoto, senaġi tarimarima ġutuma nai, asi ġeri dabara Iesu ġenai beġe raka-kavini.

²⁰ Tarima ta na Iesu ekira-varaiato, ekirato, “Ġoi sinamu ema tarimu tu murikai ġeruġa-taġoni, ġoi ġevetaumuni.”

²¹ Benamo Iesu na mabarari ekirarito, “Barau ġena guruġa ġeseġaġirini e ġeveirini tarimari tu au sinagu ema au tarigu.”

Iesu na iavara e geta o ureure ekira-ġoirito

Mataio 8:23-27; Mareko 4:35-41

22 Ĝaro ta Iesu ma ĝena mero ĝesi ĝasi ai ĝeraĝekauto, benamo Iesu na evaĝa-guruĝarito, ekirato, “Siveĝasi-vanaĝi, kou mo rekena ĝana.” Benamo ĝeiaĝoto.

23 Ĝeiaĝoto-ĝoi nuĝanai, Iesu egena-maseto. Benamo iavara asikei kou ai eraĝasito, benamo ureure ĝasi nuĝanai ĝevebubu-ĝurato nai, ĝasi dori eburuto.

24 Benamo ĝena mero Iesu ĝenai ĝeiaĝoto, ĝevaĝoato, ĝekirato, “Vevaĝa-riba taumu o, vevaĝa-riba taumu o, ĝita tu mai taburuni!” Iesu evariĝisito, iavara e ureure ekira-ĝoirito, benamo ĝedokoto, ĝemeĝomeĝo-tarito.

25 Iesu na ĝena mero evaĝa-guruĝarito, ekirato, “Ĝomi ĝemi veĝabidadama tu ainai?” Ĝia ĝegarito e ĝeĝaba-rakavato nai, tauĝeri mo ĝevedanaĝi-vedanaĝito, ĝekirato, “Mai tarima tu dei? Ĝia na iavara e ureure evaĝa-guruĝarito nai, garona ĝeseĝaĝiani!”

*Iesu na iauka rakavari na ĝeboroĝiato tarimana evaĝa-namoato
Mataio 8:28-34; Mareko 5:1-20*

26 Monana Iesu ma ĝena mero ĝeiaĝoto, Gerasa (o Gadara) tarimari ĝeri gabu ai ĝeraĝasito, Galilea tavi ta kefonai.

27 Iesu ĝasi na eraka-riĝoto nuĝanai, iauka rakavari na ĝeboroĝiato tarimana ta eiaĝomato Iesu ĝenai. Ĝia tu mo vanuĝa tarimana. Kai-veĝata asi dabuĝana etanuto-ĝoi, dia numai, senaĝi gara gabuna fore kouĝari ai.

28 Ĝia na Iesu eĝitaiato nai, ekoĝo-fouto, benamo Iesu kwakuna koranai eketo-tarito, ekirato, “Iesu o, ĝoi Iaru-korokoro Barauna Natuna, kara au ĝegu ai noveia otoni? Anoĝimuni, asi bono vaĝa-midigu midigugu!”

29 Ĝia moĝesi ekirato, korana Iesu na iauka rakavana evaĝa-guruĝaiato, mo tarima ĝenana neraka-vaĝi. Nega ĝutuma iauka rakavana na eĝabiato-ĝoi, kwakuna e ĝimana seini na ĝebarurito-ĝoi, senaĝi seini edabu-ĝuturito-ĝoi, benamo iauka rakavana na tano fakana ĝana eĝwa-iaĝoato-ĝoi.

30 Iesu na edanaĝiato, ekirato, “Ĝoi aramu tu deikara?” Ĝia na evaĝa-veŝeato, ekirato, “Au aragu tu ‘Ĝutuma,’ ” korana iauka rakavari vovoka na ĝeboroĝiato nai.

31 Benamo iauka rakavari na Iesu ĝenoĝiato-ĝoi, guri variĝo kwareĝana ĝana asi bene tuĝu-iaĝori. (Mo tu iauka rakavari ĝeri dibura gabuna).

32 Monai bai serina tu ĝoro gabakanai ĝedokadokato-ĝoi. Moĝa lorinai iauka rakavari na Iesu ĝenoĝiato, bai nuĝari ai ĝeraka-toĝa, ĝetato. Benamo Iesu na ekirarito, “Be, ĝoiaĝo!”

33 Benamo iauka rakavari mo tarima ĝenana ĝeraka-vaĝito, bai ĝeri ai ĝeraka-toĝato. Benamo moĝeri bai ĝeĝwa-bubu-lausiato, lalaĝa na ĝekokosi-firiĝoto, kou ai ĝevebora-maseto.

34 Bai ĝitaĝauri tarimari na kara eĝorato dagarana ĝeĝitaiato, benamo ĝeragato, mo vari ĝea fiuato vanuĝa baranai e vanuĝa keiri ai.

35 Tarima-rima ĝeĝoto-iaĝoto, kara eĝorato dagarana ĝea ĝitaia ĝana. Iesu ĝenai ĝeraĝasito nai, ĝia na mo tarima, iauka rakavari vovoka ĝia ĝenana ĝeraka-vaĝito tarimana, ĝedoĝariato, Iesu kwakuna koranai etanu-taĝoto-ĝoi ma dabuĝana e ĝena tuĝamaĝi maki maoro. Benamo ĝia mabarari ĝegarito.

36 Mo veiĝa ĝeĝitaiato tarimari na iauka rakavari na ĝeboroĝiato tarimana kamasi enamoto varina tarimarima ĝekira-vararito.

37 Benamo Gerasa tano tarimari mabarari na Iesu ĝenoĝiato, neraga-kwaneri ĝetato, korana ĝegari-rakavato nai. Moĝa lorinai Iesu ĝasi ai eraĝekauto, ma eĝenoĝoito.

³⁸ Iauka rakavari ġia ġenana ġeraka-vaġito tarimana na enoġiato, Iesu ġesi bene iaġo etato. Senaġi Iesu na etuġu-ġenoġiato, ekirato,

³⁹ “Noġenoġoi ġemu numa ġana. Barau na ġoi ġemu ai beveia veiġana tarimarima bono kira-varari.” Benamo ġia eiaġoto, ġena vanuġa tarimari mabarari Iesu ġena veiġa ġia ġenai ġeġorato eġobata-iaġirito.

Iesu na kekeni ta ema vavine ta evaġa-namorito

Mataio 9:18-26; Mareko 5:21-43

⁴⁰ Iesu kou mo reke na ma eġenoġoito nai, tarimarima ġutuma na ġeġabi-raġeato ma iakuri ġesi, korana mabarari na Iesu ġevaġa-nogaiato-ġoi.

⁴¹ Benamo tau ta arana Iairo, rubu ġitaġauna tarimana, Iesu ġenai eiaġoto, kwakuna koranai evetui-tarito, enoġiato, ġena numa ġana ġeiaġo etato,

⁴² korana ġia natuna kekenina, ġora ġereġa, dori emaseto-ġoi nai. Ġena laġani tu gabanana ruarua (12).

Iesu eiaġoto-ġoi nuġanai, tarimarima ġutuma na ġeraka-vebibi vebibiato-ġoi.

⁴³ Moġa nuġanai vavine ta, ġena keve tu rara kevena; laġani gabanana ruarua (12) ekeve-iaġiato. Ġia na ġena farefare e moni mabarari evaġa-koririto doketa ġeri ai ġena keve beġene vaġa-namoa ġana. Senaġi ta na asi evaġa-namoato.

⁴⁴ Tarimarima ġutuma muriri ai vau ebebibi-toġato, ma tavi ta na ea raka-roso mo, Iesu sevinai ea raġasito. Iesu ġena dabuġa dudunai eveġabikauto. Benamo vaġa-sebo ġena rara kevena ekorito.

⁴⁵ Iesu evedanaġito, ekirato, “Dei na au beġabi-karagu?” Mabarari ġevekira-ġuniġauto, ġekirato, “Au tu asiġi.” Benamo Petero ekirato, “Ve-vaġa-riba taumu, tarimarima oġitarini, ġekou-ġeġeraġimuni ema ġeraka-vebebesi vebebesini.”

⁴⁶ Senaġi Iesu ekirato, “Ta na au beġabi-karagu, korana au ribagu, seġuka au ġeguna varau beraka-vaġi.”

⁴⁷ Mai vavine varau eribato, ġia asi ġena vekuretoġa dabarana, benamo ma ġoġo-ġoġona ġesi eiaġoto, Iesu kwakuna koranai evetui-tarito, Iesu kara dainai eġabi-karaiato ema ġena keve vaġa-sebo ekorito varina ekiraġi-foforirito tarimarima ġoirari ai.

⁴⁸ Benamo Iesu na ekiraiato, ekirato, “Natugu, ġemu veġabidadama na bevaġa-namomu. Be, ma nuġa namomu ġesi noiaġo.”

⁴⁹ Iesu roġo mo eguruġato-ġoi nuġanai, tarima ta rubu ġitaġauna tauna Iairo ġena numa na eiaġomato, ekirato, “Natumu varau bemase. Vevaġa-riba tauna asi novaġa-vekwaraġia.”

⁵⁰ Iesu na mo guruġa eseġaġiato nai, Iairo ekiraiato, ekirato, “Asi bono gari, bono veġabidadama moġo, benamo ġia tu bemaġurini.”

⁵¹ Iairo ġena numai eraġasito, benamo Iesu na tarimarima ekirarito, numai asi beġene raġekau, Petero, e Iakobo (o Iames), e Ioane, ema kekeni tamana ma sinana moġo.

⁵² Mabarari tu ġetaġito-ġoi ema ġetaġi-guruġa guruġato-ġoi nuġanai, Iesu ekirato, “Asi ġotaġi, kekeni tu asi bemase, ġia tu egenani moġo.”

⁵³ Tarimarima na ġerikiriki-iaġiato, korana ġia ribari, kekeni tu emaseto.

⁵⁴ Senaġi Iesu na kekeni ġimanai eġabito, evaġa-guruġaiato, ekeato, “Natugu o, novariġisi!”

⁵⁵ Benamo iaukana eġenoġoito, ma emaġurito, vaġa-sebo evariġisito. Iesu na ekirarito, kekeni beġene ġubua.

⁵⁶ Ġia tamana sinana ġeġaba-rakavato, senaġi Iesu na evaġa-naġirito, mai veiġa varina tarima ta asi beġene kira-varaia.

9

Iesu na ġena mero gabanana ruarua (12) etuġurito

¹ Iesu na ġena mero gabanana ruarua (12) ekea-vegogorito, seġuka evinirito, iauka rakavari mabarari beġene lai-vaġiri, ema keve tarimari beġene vaġa-namori ġana.

² Benamo etuġurito, Barau ġena Basileia varina beġene ġobata-iaġia, ema keve tarimari beġene vaġa-namori.

³ Evaġa-guruġarito, ekirato, “Ġemi iaġoiaġo ai kara ta asi boġono ġabi-kaua, togoi, dura, ġaniġani dagarari, moni, ema sedi ruarua maki asi boġono ġabi.

⁴ Beġe ġabi-raġemini numanai boġono tanu, bene iaġo mo, vanuġa boġono raga-kwaneana.

⁵ Bema vanuġa tai asi beġe ġabi-raġemini nai, mo vanuġa boġono raga-kwaneana, kwakumi kauri boġono kwari-ketoketori, ġia ġeri kira-sirivaġi vaġa-moġoniri ġana.”

⁶ Iesu ġena mero ġerakato, vanuġa tata ġana ġeiaġoto, Vari Namona ġeġobata-iaġiato-ġoi ema keve tarimari ġevaġa-namorito-ġoi gabu mabarari ai.

Heroda ġena daradara

Mataio 14:1-2; Mareko 6:14-16

⁷ Heroda, Galilea tanona verena, Iesu varina eseġaġiato, benamo edaradara-rakavato, korana tarima kota ġekirato, Ioane Babatiso tu mase na ma evariġisi-ġenoġoito.

⁸ Ma kota ġekirato, Elia efororito. Ma kota ġekirato, peroveta tarimana guinena ta evariġisi-ġenoġoito, ġetato.

⁹ Senaġi Heroda ekirato, “Ioane debana tu au na abasi-ġutuato. Be, mai varina aseġaġiani tarimana tu dei?” Heroda eurato Iesu bene ġitaia.

Iesu na tarimarima daġara imaima (5,000) eġuburito

Mataio 14:13-21; Mareko 6:30-44; Ioane 6:1-13

¹⁰ Iesu ġena apostolo ma ġeġenoġoito, karakara ġeveirito veiġari variri Iesu ġekira-varaiato. Benamo Iesu na eġori-ġerevaġirito, vanuġa ta arana Betesaida ġana eġori-iaġorito.

¹¹ Senaġi tarimarima na ġeseġaġirito nai, Iesu murina na ġerakato. Benamo Iesu na eġabi-raġerito, Barau ġena Basileia varina eġobata-vinirito ema keve tarimari evaġa-namorito.

¹² Ġaro evariġoto-ġoi nuġanai, ġena mero gabanana ruarua (12) Iesu ġenai ġeiaġoto, ġekirato, “Mai tarimarima notuġuri, be kavinaġi vanuġari ai ema vamoka vei tarimari ġeri tanu gaburi ai, ġari ġaniġani e gena-gaburi ġea vetau, korana mai tu tano fakana nai.”

¹³ Senaġi Iesu na evaġa-guruġarito, ekirato, “Ġomi na ġaniġani ġoviniri.” Ġia na ġevaġa-veseato, ġekirato, “Ġai ġemai beredi tu imaima (5) ema maġani-kone ruarua (2) moġo. Ġoi ourani ġai baġana iaġo, ġaniġani baġana voiri mai tarimarima ġutuma ġari?”

¹⁴ Korana tau mabarari tu 5,000 kavana.

Iesu na ġena mero ekirarito, ekirato, “Tarimarima ġovareri doġoro ta gabana imaima (50), doġoro ta gabana imaima (50), benamo ġene tanutanu-tari.”

¹⁵ Iesu ekirato lorinai ġeveiato, tarimarima mabarari ġevaġa-tanutanu-taririto.

¹⁶ Moġa murinai Iesu na beredi imaima e maġani-kone ruarua eġabirito, gubai egaga-raġeto, Barau evaġa-namoato vau, ebuki-ġutuġuturito ema ekini-misimisirito, benamo ġena mero evinirito beġene vareri.

¹⁷ Tarimarima na ġeġanirito nai, mabarari ġeġani-maseto. Gabivau Iesu ġena mero na ġaniġani kwari ġevaġa-vegogorito, boseġa gabanana ruarua (12) ġevaġa-vonurito.

Petero na Iesu tu Kerisona ekiraġito

Mataio 16:13-19; Mareko 8:27-29

¹⁸ Ġaro ta Iesu ġereġana eġuriġurito, ġena mero maki ġia ġesi. Benamo Iesu na edanaġirito, ekirato, “Tarimarima tu kara ġetoni au tu dei?”

¹⁹ Ġia ġevaġa-veseto, ġekirato, “Kota ġekirani ġoi tu Ioane Babatiso, ma kota tu Elia, ma kota tu peroveta tarimana guinena ta evariġisi-ġenoġoito.”

²⁰ Iesu na ekirarito, ekirato, “Senaġi ġomi tu kara ġotoni au tu dei?” Petero na evaġa-veveto, ekirato, “Ġoi tu Barau ġena Keriso, ġia na ekiraġi-toreato vevaġa-maġuri tauna.”

Iesu ġena mase ema variġisi-ġenoġoi ekiraġirito

Mataio 16:20-28; Mareko 8:30-9:1

²¹ Iesu na elaunaġirito, ġia varina tarima ta asi beġene kira-varaia.

²² Ġia ma ekirato, “Tarimarima Natuna midigu vovoka roġo beġanini. Iuda vereri, e Rubu Veaġa vereri baregori, e taravatu ġevevaġa-riba iaġiani tarimari na beġe ruġaiani; ema beġe vaġi-maseani maki, senaġina ġaro vaġa-toitoinai vau mase na ma bevariġisi-ġenoġoini.”

Maġuri guruġari o Iesu murinai raka

Mataio 10:33; 10:39; Ioane 12:25

²³ Iesu na ġia mabarari evaġa-guruġarito, ekirato, “Bema tarima ta eurani au murigu ai bene raka etoni tarimana, tauġena bene vekira-fitoġa, ġena satauro bene ġwaia ġaro mabarari ai, au murigu ai bene raka.

²⁴ Korana deikara ġena maġuri moġo lorina etoreani tarimana, ġena maġuri befitoġaiani. A deikara au daigu ai ġena maġuri befitoġaiani tarimana, ġena maġuri asi bevei-rekwarekwaiani.

²⁵ Bema tarima ta na tanobara mabarana uranai ġena maġuri befitoġaiani, a ġia tauġena ġena maġuri bevaġa-rakavaiani, ġena namo tu kara ġia ġenai?

²⁶ Bema tarima ta na au ema ġegu guruġa maiakari na bemaikaiani nai tu, Tarimarima Natuna na maki ġia bemaika-viniani ġena iaġomai, ma mamana marevana e seġuka baregona ġesi, Tamana ma aneru veaġari ġesi beġe iaġomani ġaronai.

²⁷ Moġoni akiramini, mainai ġeruġa-taġoni tarimari kota asi roġo beġe maseni, Barau ġena Basileia beġe ġitaiani.”

Iesu vetoġana eirauto

Mataio 17:1-13; Mareko 9:2-13

²⁸ Mai guruġa ekiraġi-ġosiato murinai, ġaro imaima toitoi (8) kavana ġevanaġito vau, Iesu na Petero, e Ioane, ema Iakobo (o Iames) eġabirito, ġoro ta ġana ġevaraġeto bene ġuriġuri ġana.

²⁹ Eġauġauto-ġoi nuġanai, ġia ġoirana vetoġana eirauto, ema ġena dabuġa ekuro-ġarogorito.

³⁰ Benamo tarima ruarua ġefoforito, Mose ma Elia, Iesu ġesi ġeguruġa guruġato-ġoi.

³¹ Tauri ruarua ma marevari e mamari ġesi ġefoforito, Iesu ġesi ġeguruġato, Ierusalemi bemaseni ġetato, Barau ġena ura ilailanai.

³² Petero ma karona ġegena-maseto, senaġi ma ġetataġato nai, Iesu ma marevana e mamana ġesi ġeġitaiato, ema ġia ġesi ġeruġa-taġoto tarimari maki ġeġita-rito.

³³ Tauri ruarua Iesu ġeraga-kwanea ġana nuġanai, Petero na Iesu eki-raiato, ekirato, “Vevaġa-riba taumu, namo vedaurea ġita tu maġera, be mainai fouta toitoi ġaragari. Ta ġoi ġemu, ta Mose ġena, ta Elia ġena.” Ġia asi ribana kara ekiraġiato.

³⁴ Ġia roġo eguruġato-ġoi nai, magube na ema iauka-taririto. Magube na eġabi-ġaurito nai, ġia ġegarito.

³⁵ Garo ta magube nuġana na ekea-rosito, ekirato, “Mai tu au Natugu, aġabi-hidiato tarimana, ġia boġono seġaġi-vinia!”

³⁶ Mo garo ekorito nai, Iesu ġereġana ġeġitaiato. Mai veġa ġeġitarito dagarari, tarima ta asi ġekira-varaiato mo negai.

*Iesu na iauka rakavana na eboroġiato merona evaġa-namoato
Mataio 17:14-21; Mareko 9:14-29*

³⁷ Ġaro ta ekorito murinai, ġia tu ġoro na ġeraka-variġoto-ġoi nuġanai, tarimarima ġutuma lelevaġi ġesi ġeraka-veġoitaġoto.

³⁸ Benamo tau ta ġutuma nuġari na ekea-fouto, ekirato, “Vevaġa-riba taumu o, anoġimuni, au natugu merona noma ġitaia. Mai tu au natugu sebona, ġora ġereġa.

³⁹ Nega tari ai ġia tu iauka rakavana na eġabiani, benamo ekoġo-founi; tauġanina maki evaġa-ġoġo-ġoġoani, benamo bokana na kaburoburo ġeraka-rosini. Maiġesina evaġi-mase vanaġi-vanaġiani.

⁴⁰ Ġoi ġemu mero banoġiri, ġelai-vaġia basi, senaġi ġia asi beġe ilaila.”

⁴¹ Iesu evaġa-veseto, ekirato, “Asi veġabidadama ema kira-sirivaġi ġuruna o! Ġaro vira au tu sevimi ai bana tanu? Ġaro vira bana vevaġa-gwaġiġi-vinimi?” Benamo Iesu na mo tau ekiraiato, ekirato, “Natumu noġori-iaġomaia.”

⁴² Mero eiaġomato-ġoi nai, iauka rakavana na tano ekwaraġi-iaġiato, tauġanina evaġaġoġo-ġoġoato. Senaġi Iesu na iauka rakavana ekira-ġoiato, mero evaġa-namoato, benamo tamana ma evini-ġenoġoiato.

⁴³ Tarima mabarari ġeġaba-rakavato, korana Barau ġena seġuka ġeġitaiato nai.

*Iesu ġena mase ma ekiraġi-ġenoġoiato
Mataio 17:22-23; Mareko 9:30-32*

Tarimarima roġo Iesu ġena veġa ġeġaba-iaġiato-ġoi nai, Iesu na ġena mero evaġa-guruġarito, ekirato,

⁴⁴ “Au na guruġa ta ġemi nakiraġia, be ġoseġaġi ema asi boġono tuġa-rekwaia. Tarimarima Natuna tu beġe revaiani vau tarimarima ġimari ai beġe toreani.”

⁴⁵ Senaġi ġena mero na asi ġetuġamaġi-doġariato, Iesu tu kara ekiraġiato. Mo guruġa anina tu ġia ġeri ai vekuretoġa, asi beġene ribaia ġana, ema Iesu maki asi ġedanaġiato, korana ġegarito nai.

*Deikara tu barego vedaurea
Mataio 18:1-5; Mareko 9:33-37*

⁴⁶ Iesu ġena mero fakari ai vevane eġorato, korana tu ġekirato, dei tu barego vedaurea ġia fakari ai.

⁴⁷ Iesu varau eribato kara ġetuġamaġiato, moġa lorinai mero keina ta eġabiato, ġia sevinai evaġa-ruġa-tariato vau,

⁴⁸ ekirarito, ekirato, “Dei na mai mero beḡabi-raḡeani au aragu ai, ḡia na au beḡabi-raḡeguni. Bema tarima ta na au beḡabi-raḡeguni, etuḡuguto Barauna maki beḡabi-raḡeani. Korana deikara ḡomi na ḡokira-fitoḡaiiani tarimana ḡomi fakami ai, ḡia tu barego vedaurea.”

Iesu arantai nuḡa-farevaḡi veḡa boruri eveirito tarimana

Mareko 9:38-40

⁴⁹ Ioane na Iesu evaḡa-guruḡaiato, ekirato, “Vevaḡa-riba taumu, tarima ta ḡaḡitaiato, ḡoi aramu ai iauka rakavari elai-vaḡirito-ḡoi, senaḡi ḡai na ḡakira-ḡoiato, korana ḡia tu dia ḡita ḡesi taḡauveini nai.”

⁵⁰ Iesu na ekirarito, ekirato, “Asi boḡono kira-ḡoia, korana deikara na ḡomi asi evaḡa-rakavamini tarimana tu ḡomi evaḡa-kavamini.”

Samaria tarimari kotari na Iesu asi ḡeḡabi-raḡeato

⁵¹ Iesu guba ḡana bevaraḡeni ḡarona ekavinaḡiato-ḡoi nai, Ierusalemabe bene iaḡo-vinia, etato.

⁵² Benamo Iesu na vetuḡunaḡi tarimari etuḡu-guinerito, Samaria vanuḡana tai ḡeraḡasito, Iesu ḡena totoḡa gabuna ḡea vetauato.

⁵³ Senaḡi vanuḡa tarimari na Iesu asi ḡeḡabi-raḡeato, korana tu Ierusalemabe eiaḡo-viniato-ḡoi nai.

⁵⁴ Iesu ḡena mero Iakobo (o Iames) e Ioane mo veḡa ḡeḡitaiato, benamo ḡekirato, “Vereḡauka, ḡoi ourani karava guba na baḡana kiraḡia, bene mariḡo, bene vaḡa-rakavari?”

⁵⁵ Iesu eruḡa-kureto, tauri ruarua ekira-ḡoirito.

⁵⁶ Benamo ḡia ma ḡerakato, vanuḡa ta ḡana ḡeiaḡoto.

Iesu murinai beḡene raka ḡetato tarimari

Mataio 8:19-22

⁵⁷ ḡia dabara na ḡeiaḡoto-ḡoi nai, tarima ta na Iesu evaḡa-guruḡaiato, ekirato, “Ḗemu iaḡoiaḡo gaburi mabarari ai bana kavamu.”

⁵⁸ Iesu na ekiraiato, ekirato, “Boḡa kwaivari ma ḡeri kouḡa, ema manu ma ḡeri nuḡi, senaḡi Tarimarima Natuna tu asi ḡena gena-gabuna.”

⁵⁹ Iesu na tarima ta ma evaḡa-guruḡaiato, ekirato, “Murigu ai noma raka.” Senaḡi mo tarima evaḡa-veseto, ekirato, “Vereḡauka, asi roḡo, naḡenoḡoi, be tamagu roḡo naguria.”

⁶⁰ Iesu na evaḡa-veseato, ekirato, “Mani tu noiaḡuiri, mase tarimari (o Barau asi ḡekorana-iaḡiani tarimari) na ḡeri mase tauḡeri na beḡene guriri. Senaḡi ḡoi tu noiaḡo, Barau ḡena Basileia varina noa vari-fiua.”

⁶¹ Tarima ta na ma ekiraiato, ekirato, “Vereḡauka, murimu ai naraka, senaḡi naiḡo roḡo, ḡegu numa tarimari ḡesi ḡaveḡabi-tuḡu.”

⁶² Iesu na evaḡa-veseato, ekirato, “Tarima ta efokafokani nai, murina ḡana ma eboḡe-ḡenoḡoini, ḡia tu asi ilaila Barau ḡena Basileia beḡabiani.”

10

Iesu na tarima gabana imaima ema gabana ruarua ma ruarua (72) etuḡurito

¹ Moḡa murinai Vereḡauka na tarima 72 eḡabi-viriḡirito, benamo ruari ruari etuḡu-guinerito, ḡia beiaḡoni vanuḡari e gaburi mabarari ḡana.

² Evaḡa-guruḡarito, ekirato, “Kwakwa ḡaniḡaniri tu ḡutuma lelevaḡi, senaḡi kwakwa tarimari tu viravira moḡo. Moḡa lorinai kwakwa Vereḡaukana ḡonoḡia, be kwakwa tarimari tari ma bene tuḡu-iaḡori, ḡaniḡani beḡenea kwari.

³ Ĝoiāgo, au na mamoe kavana atuĝumini, boĝa kwaivari rakavari fakari ai.

⁴ Moni fusefuseri, dura e tamaka asi boĝono ĝabikau; dabarai tarima ta asi boĝono vaĝa-guruĝaia.

⁵ Bema numa tai boĝo raĝekauni nai, boĝono kira, 'Maino mai numai bene tanu.'

⁶ Bema maino eura-viniani tarimana monai etanuni nai, ĝemi maino guruĝana ĝia iatanai bene tanu. Bema asiĝina nai, maino tu ĝemi ai ma bene ĝenoĝoi.

⁷ Karakara beĝe vinimini boĝono ĝaniri e boĝono niuri, korana eĝauveini tarimana davana bene ĝabia ĝana. Numa ta na ma numa ta ĝana asi boĝono iaĝo, senaĝi mo numa sebonai moĝo boĝono tanu.

⁸ Bema vanuĝa tai boĝo raĝasini, beĝe ĝabi-raĝemini, karakara ĝoirami ai beĝe tore-rosirini dagarari boĝono ĝaniri.

⁹ Mo vanuĝai keve tarimari boĝono vaĝa-namori e tarimarima boĝono vaĝa-guruĝari, boĝono kira, 'Barau ĝena Basileia, (ĝena veĝitaĝau seĝukana evaĝa-ruĝaiani), tu sevimi ai maĝa.'

¹⁰ Senaĝi bema vanuĝai boĝo raĝasini, benamo asi beĝe ĝabi-raĝemini nai, ĝatamanai boĝono raka-rosi, boĝono kira,

¹¹ 'Ĝemi vanuĝa gagauri kwakumai beĝe kafakau dagarari maki mai ĝakora-vaĝirini ĝemi kira-sirivaĝi vaĝa-foforiri ĝana. Senaĝi boĝono riba, Barau ĝena Basileia tu bekavi-naĝi.'

¹² Au na akiramini, Kota baregona ĝaronai mai vanuĝa na meto beĝwaiani tu, Sodoma ĝena meto maki bevanaĝiani."

Asi veĝabidadama vanuĝari

Mataio 11:20-24

¹³ "Korasini o, ĝoi ema Betesaida, vetuĝami kika! Korana nuĝa-farevaĝi veĝari ĝemi ai ĝefoforito-ĝoi tu, Taia e Sidono nuĝari ai beĝere fofori, benamo ĝia tu irau laĝani ai ĝere vetuĝamaĝi-kure, fuse rakavari ai e tauĝaniri ma gurumari ai ĝeri vetuĝamaĝi-kure ĝere vaĝa-foforia.

¹⁴ Barau na tarimarima bekota-vinirini ĝarona baregonai, ĝomi na boĝo doĝariani metona tu Taia e Sidono ĝeri meto bevanaĝiani.

¹⁵ Ĝoi maki, Kaperanauma o, ĝoi ourani guba ĝana bono varaĝe otoni? Asiĝina, ĝoi tu mase gabuna ĝana boiaĝoni!"

¹⁶ Iesu na ĝena mero evaĝa-guruĝarito, ekirato, "Dei na ĝomi beseĝaĝi-vinimini, au maki beseĝaĝi-viniguni; dei na asi beĝabi-raĝemini, au maki asi beĝabi-raĝeguni; ema dei na asi beĝabi-raĝeguni, etuĝuguto Barauna maki asi beĝabi-raĝeani."

Iesu na etuĝurito tarimari 72 ĝeĝenoĝoito

¹⁷ Ĝena mero 72 ma ĝeĝenoĝoito ma iakuri ĝesi, ĝekirato, "Vereĝauka o, iauka rakavari ĝoi aramu ai ĝavaĝa-guruĝarito, benamo garoma ĝeseĝaĝirito-ĝoi."

¹⁸ Iesu na evaĝa-veserito, ekirato, "Satani aĝitaiato, kiriku ekimoreani kavana guba na eketo-firiĝoto.

¹⁹ Boĝono riba, au na seĝuka varau avinimito, mota ema kavikavi boĝono fana-tariri, ema Satani ĝena seĝuka maki boĝono vaĝa-farakaia ĝana; dagara ta na asi bevaĝa-rakavamini.

²⁰ Senaĝina, dia boĝono iaku korana iauka rakavari ĝomi ĝemi seĝuka nuĝanai, asiĝina, a ĝomi tu boĝono verere korana arami gubai etorerito nai."

Iesu eiakuni
Mataio 11:25-27; 13:16-17

²¹ Mo tanu-vegogo nuġanai Iauka Veaġa na Iesu tu iaku na evaġa-vonuato, benamo ekirato, “Tamagu o, avaġa-namomuni, guba ema tanobara Verena! Korana ġoi na ma iaunegari e riba tarimari ġeri ai okure-toġarini dagarari tu, asi ġeri riba tarimari ġeri ai ovaġa-foforirini. Aba, Tamagu, mai tu ġoi ġemu veuravini korana evaġa-foforiani.

²² Dagara mabarari Tamagu na eviniguto. Tarima ta asi ribana ġia Natuna, Tamana moġo ġereġana, ema ta asi ribana ġia Tamana, senaġi Natuna ġereġana moġo, ema Natuna na eura-vinirini tarimari ġeri ai vau evaġa-foforirini.”

²³ Benamo Iesu eboġe-kureto ġena mero ġeri ai, veġuni ai evaġa-guruġarito, ekirato, “Ġomi tu boġono iaku, korana tu mai ġoġitarini dagarari dairi ai.

²⁴ Au na akiramini, peroveta tarimari e tanobara vereri baregori o kini vovoka ġeurato, mai ġoġitarini dagarari beġere ġitari, senaġi asi ġeġitarito, ema ġoseġaġirini dagarari beġere seġaġiri, senaġi asi ġeseġaġirito.”

Barabore - Samaria tarimana namona

²⁵ Taravatu evevaġa-riba iaġiato-ġoi tarimana ta evariġisito, benamo Iesu eribaġaniato, ekirato, “Vevaġa-riba taumu, au tu kara haveini vau, maġuri vanaġivanaġi badoġariani?”

²⁶ Iesu na evaġa-veseato, ekirato, “Taravatu tu kara etoni? Ġoi na tu kamaši oiaviani?”

²⁷ Ġia evaġa-veseto, ekirato, “ ‘Vereġauka ġoi ġemu Barau bono ura-vinia ma nuġamu mabarana, ma iaukamu mabarana, ma kokoremu mabarana, e ma tuġamaġimu mabarana’; ema ‘Sevimu tarimana maki bono ura-vinia ġoi tauġemu oveura-vinini kavana.’ ”

²⁸ Iesu na ekiraiato, ekirato, “Bovaġa-vese maoro, maniġesi bono vei, be bono maġuri.”

²⁹ Senaġi taravatu evevaġa-riba iaġiato-ġoi tarimana tu ma veiavina ġesi Iesu ma edanaġi-veribaġaniato, ekirato, “Au sevigu tarimana tu dei?”

³⁰ Iesu evaġa-veseto, ekirato, “Tau ta Ierusalem na Ieriko evariġo-viniato-ġoi nuġanai, lema tarimari na dabarai ġeguru-viniato, ġena dabuġa ġekokirito, ġevaġa-vevaġiato, dori moġo ġevaġi-maseato, benamo monai ġeraga-kwaneato.

³¹ Moġa Rubu Veaġa verena ta mo dabara na evariġoto-ġoi nai, mo tau edoġariato, senaġi eraka-ġevi-raġiato moġo.

³² Levi doġorona tarimana ta, (Rubu Veaġai vetuġunaġi tauna), maki moġesi, mo tau ea doġariato nai, maki eraka-ġevi-raġiato moġo.

³³ Senaġina Samaria tarimana ta ġena iaġioiaġo ai mo tau ea doġariato, eġitaiato nai, evetuġaiato.

³⁴ Sevina ġana eiaġoto, diġa e vine nanuna manuġanai ebubuto, ekumuato, benamo ġena doniki ai evaġa-tanu-kauato, vinitaġo numana ġana eġori-iaġoato, monai enariato.

³⁵ Boġiboġi evariġisito nai, silva moniri ruarua numa ġitaġauna tarimana eviniato, ekirato, ‘Mai tau bono nariġau-ġitakaua. Bema moni asi beilailani nai, ġegu ġenoġoi ai vau ġemu moni davana bavinimuni.’ ”

³⁶ Iesu evedanaġito, ekirato, “Ġoi tu kara otoni? Mai tarima toitoi fakari ai deikara sevina tarimana tu mo lema tarimari na ġevaġa-vevaġiato tauna ġenai bita kiraġiani?”

³⁷ Taravatu evevaġa-riba iaġiato-ġoi tarimana evaġa-veseto, ekirato, “Evetuġaiato tarimana.” Benamo Iesu na ekiraiato, “Noiaġo, ġoi maki moġesi bono vei.”

Mareta e Maria

³⁸ Iesu ma ġena mero ġesi ġeri iaġoiġo ai vanuġa tai ġea votuto. Monai vavine ta arana Mareta ġena numai eġabi-raġeato.

³⁹ Ġia tu ma tarina arana Maria, benamo Maria tu eiaġoto, Vereġauka kwakuna koranai etanu-tarito, ġena guruġa eseġaġirito-ġoi.

⁴⁰ Mareta tu veġabiraġe dagarari eveito-ġoi, evekwaraġito-ġoi. Benamo eiaġomato, ekirato, “Vereġauka, ġoi tu otuġamaġini ba? Tarigu na beraga-kwanegu, au ġereġagu moġo avekwaraġini. Nokiraia, be nema vaġa-kavagu!”

⁴¹ Vereġauka na evaġa-veseato, ekirato, “Mareta! Mareta! Dagara ġutumari na nuġamu ġevaġa-veġonuani e ġevaġa-vekwaraġiani,

⁴² senaġi dagara sebona moġo ġerevaġi. Maria na tu namona beġabi-viriġia, ta na ġia ġenana asi ma beġabi-vaġiani.”

11

Iesu na ġena mero ġuriġuri evaġa-ribarito

¹ Ġaro tai Iesu tu gabu tai eġauġauto. Ekorito nai, ġena mero ta na evaġa-guruġaiato, ekirato, “Vereġauka o, ġuriġuri novaġa-ribama Ioane na ġena mero evaġa-ribarito ilailanai.”

² Iesu na ekirarito, ekirato, “Ġoġuriġurini nai, boġono kira: ‘Ġai Tamama o, ġoi aramu baġana vaġa-veaġaia; ġemu Basileia bene iaġoma.

³ Ġaro tata ġai ġema-ġama bonoma vinima.

⁴ Ġema rakava notuġamaġi-fitoġari, korana ġai maki ġevaġa-rakavamani tarimari ġeri rakava ġatuġamaġi-fitoġarini.

Ema veribaġani ai asi bono ġori-kauma.’ ”

⁵ Benamo Iesu na evaġa-guruġarito, ekirato, “Bema ġomi ta boġi nuġanai ġatana ġenai bere iaġo, bere noġia, bere kira, ‘Ġatagu o, ġaniġani dagarari kota naġabi-toreri roġo,

⁶ korana au ġatagu ta tu ġena iaġoiġo ai ġegu ai beiaġoma, senaġi au tu asi ġegu ġaniġani ġia baġubuanai.’

⁷ Benamo mo tarima na numa nuġana na bere vaġa-vesea, bere kira, ‘Asi novaġa-vekwaraġigu. Ġatama-boka varau babiria, ema au tu natugu ġesi ġagenani. Au tu asi bavariġisini, dagara ta asi bavanimuni.’

⁸ Akiramini, enabe ġia ġatana, senaġi asi bevariġisini, ġaniġani asi bevini-ani, senaġi ġena noġinoġi ġenoġoi-ġenoġoi dainai bevariġisini, eura-vinirini dagarari beviniani.

⁹ Moġa lorinai, au na ġomi akiramini, noġinoġi ai Barau na bevinimini, ve-tauvetau ai boġo doġarini, sekeseke o fidifidi ai ġemi ġatama-boka bekeoani.

¹⁰ Korana benoġi-noġini tarimana tu beġabini, bevetauni tarimana bedoġarini, ema beseke-sekeni tarimana Barau na ġena ġatama boka bekeoani.

¹¹ Ġomi tama fakami ai deikara bema natumu merona maġani-kone benoġini nai, ġoi na tu mota boviniani?

¹² O ġatoi benoġini nai, kavikavi boviniani?

¹³ Boḡono tuḡamaḡi, ḡomi tu rakava tarimami, senaḡi dagara namori natumi viniviniri ma ribami, moḡa lorinai ḡomi Tamami gubai etanuni, ḡia na Iauka Veaḡa ḡenoḡi-viniani tarimari bevinirini veḡatana!”

Iesu e Belsebul

Mataio 12:22-30; Mareko 3:20-27

¹⁴ Iesu na iauka rakavana, muru-bubu iaukana, elai-vaḡiato, benamo mo muru-bubu tarimana eguruḡato. Tarimarima ḡutuma na ḡevaḡa-raḡeato,

¹⁵ senaḡi tarima kota ḡekirato, “Mai tu Belsebul, iauka rakavari ḡeri vere, ḡena seḡukai iauka rakavari elai-vaḡirini.”

¹⁶ Tarima kotari na Iesu ḡedanaghi-veribaḡaniato, vetoḡa ta guba na bene viniri ḡetato.

¹⁷ Senaḡi Iesu na ḡia ḡeri tuḡamaḡi eribarito, benamo evaḡa-guruḡarito, ekirato, “Gavamani ta beveḡabi-kirani, ḡia tu berakavani, ema doḡoro ta beveḡabi-kirani, ḡia tu beketoni.

¹⁸ Moḡa lorinai Satani tu tauḡena moḡo bebevare-kirani, ḡena basileia tu kamasi beruḡani? Maiḡesi akiraḡiani, korana tu ḡomi ḡokirani, au tu Belsebul ḡena seḡukai iauka rakavari alai-vaḡirini.

¹⁹ Bema au iauka rakavari Belsebul ḡena seḡukai alai-vaḡirini nai, ḡomi murimi ai ḡerakani tarimari na iauka rakavari aiḡesi ḡelai-vaḡirini? Ḗia na ḡevaḡa-moḡoniani ḡomi ḡemi guruḡa tu asi anina.

²⁰ Senaḡi bema au iauka rakavari Barau ḡena seḡukai alai-vaḡirini nai, boḡono riba, Barau ḡena Basileia, ḡena veḡitaḡau seḡukana, tu ḡomi ḡemi ai varau beraḡasi.

²¹ Kokore tarimana ma ḡena vaḡivaḡi dagarari ḡesi ḡena numa beḡitaḡauani nai, ḡena farefare tu roḡo beḡe tanu-ginikauni.

²² Senaḡina kokore vedaurea tarimana ta ma beiaḡomani, mai tarima bevaḡa-vevaḡiani, benamo bevaḡa-darereani, ḡia ḡena vaḡivaḡi dagarari, veḡabidadama dagarari, beverariani, benamo ḡena farefare mabarari bevare-rovorovorini.

²³ Deikara dia au ḡatagu tu, au ḡegu inai tarimana, ema deikara au ḡesi asi etore-vegogoni tu eveiari-lausilausini.”

Iauka rakavana ma eḡenoḡoito

Mataio 12:43-45

²⁴ “Iauka rakavana ta tarima ta ḡenana eraka-rosito, benamo gabu kaukauri na eraka-vanaḡito, iaḡana bene ḡania etato, senaḡi iaḡaraḡi gabuna ta asi edoḡariato. Benamo ḡia tauḡena ekirato, ‘Naḡenoḡoi, araga-kwaneato numana ḡana.’

²⁵ Eḡenoḡoi-iaḡoto, numa edoḡariato. Numana tu veiareva ema ḡitaḡitana namo vedaurea.

²⁶ Benamo ḡia na iauka rakava kwaikwairi imaima ruarua (7) ma eḡori-iaḡorito, mabarari ḡeraka-toḡato, monai ḡetanuto. Moḡa lorinai mo tarima tu tovotovonai ḡena rakava tu kota misina, senaḡi dokonai ḡena rakava tu barego vedaurea.”

Verere moḡonina

²⁷ Mo guruḡa ekiraḡiato-ḡoi nai, vavine ta tarimarima ḡutuma fakari na eguruḡa-vaisito, ekirato, “Ḗoi evaḡa-maḡurimoto e evini-rurumuto vavina tu namo!”

²⁸ Senaḡi Iesu evaḡa-veseto, ekirato, “Iniḡesi nokira, Barau ḡena ḡuruḡa ḡeseḡaḡiani ema ḡekorana-iaḡiani tarimari neḡi namo!”

*Seḡuka vetoḡana ḡevetauato
Mataio 12:38-42; Mareko 8:12*

²⁹ Tarimarima ḡutuma na Iesu ḡeruḡa-ḡeḡeraḡiato, benamo evaḡa-guruḡarito, ekirato, “Toma ḡuru tu ḡuru rakavana! Seḡuka vetoḡana ḡevetauani, senaḡi vetoḡa ta asi beḡe doḡariani, Iona, peroveta tarimana, vetoḡana moḡo.

³⁰ Korana Iona tu vetoḡa ta Nineva tarimari ḡeri ai, moḡa ilailanai Tarimarima Natuna tu vetoḡai beiaḡoni mai ḡuru tarimari ḡeri ai.

³¹ Barau na tarimarima bekota-vinirini ḡaronai, Seba vavine baregona o Kwin beruḡa-vaisini, mai ḡuru tarimari besamanirini, korana ḡia tu ḡena tanobara manaḡana na eiaḡomato, Solomona ḡena iaunega guruḡari bene seḡaḡiri ḡana. Senaḡi ḡoḡitaia, tarima ta na Solomona evanaḡiani tu maiḡa.

³² Barau ḡena Kota baregona ḡaronai, Nineva tarimari beḡe ruḡa-vaisini, toma ḡuru tarimari beḡe samanirini, korana Iona ḡena ḡobata ḡeseḡaḡiato neganai, ḡia ḡeri rakava ḡerina ḡevetuḡamaḡi-kureto. Senaḡi tarima ta na Iona evanaḡiani tu maiḡa.”

*Tauḡani mamana
Mataio 5:15; 6:22-23*

³³ “Tarima ta na lamefa begabuani nai, asi bekure-toḡaiiani, diḡu na asi beḡoḡoi-tariani, senaḡi lamefa tore-torena gabuna korikorinai betoreani, beḡe raka-toḡani tarimari na mama beḡene ḡitaia ḡana.

³⁴ Ḡoi matamu tu ḡoi tauḡanimu ḡena lamefa kavana. Bema ḡoi matamu namo nai, tauḡanimu mabarana bemamani. Senaḡi ḡoi matamu rakava nai, tauḡanimu mabarana bemukunani.

³⁵ Moḡa lorinai, lorimu bono vetore, mama ḡoi nuḡamu ai bemukunani garina.

³⁶ Bema ḡoi tauḡanimu mabarana mama na bevonuvonu-raḡeni, mukuna kota maki asi betanuni, ḡia tu mama dikadika, lamefa emore-rovorovoni, ḡoi evaḡa-mamamuni kavana.”

*Iesu na Farisea tarimari ema taravatu ḡevevaḡa-riba iaḡiato-ḡoi tarimari evanerito
Mataio 23:1-36; Mareko 12:38-40; Luka 20:45-47*

³⁷ Iesu eguruḡa-ḡosito nai, Farisea tarimana ta na ekeaiato, ḡia ḡesi beḡene ḡaniḡani-vegogo; benamo ḡena numa ḡana eiaḡoto, ḡaniḡani gabunai etanutarito.

³⁸ Mo Farisea tarimana na eḡitaiato nai, nuḡana efarevaḡi-rakavato, korana Iesu tu asi eveḡurigo, (ḡia seneri vereri ḡeri vevaḡa-naḡi ilailanai), senaḡi eḡani-ḡanito moḡo.

³⁹ Benamo Vereḡauka na evaḡa-guruḡaiato, ekirato, “Ḡomi Farisea tari-mami na ḡemi kapusi ema disi muriri rekeri moḡo ḡoḡuriḡi-ginikaurini, senaḡi nuḡami tu verariverari ema vei-taḡuitaḡui na ḡevonu-fokafokato.

⁴⁰ Ḡomi tu babo! Ḡomi asi ḡoribani, murika rekena eveiatio Barauna na nuḡana rekena maki ḡia na eveiatio?

⁴¹ Senaḡi kapusi ema disi nuḡari dagarari tu asi ḡeri-ḡari tarimari boḡono viniri vau, dagara mabarari ḡemi ai beḡe veiarevani.

⁴² Farisea tarimami, vetuḡami kika! Korana ḡomi na Barau ḡovarevareviniani dagarari misimisiri, ḡemi sivoḡa, kodukarava ema ḡaniḡani ḡailauri maki karava gabanana (10) ḡoveirini, karava sebona boubou dagaranaḡi ḡovaḡa-iaḡoani, senaḡina vei-iobukaiobuka ema Barau uravinina maḡurina tu ḡoleaiiani. Ḡomi na tu maiḡeri veiḡa baregori ḡoro veiri ema mo veiḡa keiri maki asi boḡoro iaḡuiri.

⁴³ Farisea tarimami, vetuḡami kika! Korana ḡemi ura rubu ai tu tanutanu namori ai boḡono tanu, ema ḡemi ura maki maketi gaburi ai beḡene vaḡa-namomi.

⁴⁴ Vetuḡami kika! Ġomi tu asi ḡita vetoḡari gara gaburi kavana, tarimarima iatari na ḡeraka-vanaḡini nai ḡemirorini, ḡia asi ḡeribani mo tu gabu raka-vana.”

⁴⁵ Taravatu ḡevevaḡa-riba iaḡiato-ḡoi tarimana ta na Iesu evaḡa-guruḡaiato, ekirato, “Vevaḡa-riba taumu o, maiḡesi okirani nai, ḡai maki okira-fitoḡamani!”

⁴⁶ Iesu evaḡa-veseto, ekirato, “Ġomi taravatu ḡovevaḡa-riba iaḡiani tarimami maki vetuḡami kika! Ġomi na maruna metori tarimarima ḡovaḡa-faḡarini, senaḡi ḡimami didina ta maki ḡeri marunai asi ḡoveḡabikauni, asi ḡovaḡa-kavarini.

⁴⁷ Vetuḡami kika! Ġomi tubumi ḡatami na peroveta tarimari ḡevaḡi-maserito, ema ḡomi na tu ḡeri gara gaburi namori ḡoveirini.

⁴⁸ Moḡesi ḡomi tauḡemi tubumi ḡatami ḡeri veḡa ḡokiraḡi-foforirini ema ḡovaḡa-moḡonirini; moḡoni veḡata, tubumi ḡatami na peroveta tarimari ḡevaḡi-maserito, ema ḡomi na ḡeri gara gaburi ḡoveirini.

⁴⁹ Moḡa lorinai Barau ḡena Iaunega ekirani, ‘Au na peroveta tarimari ema apostolo tarimari batuḡu-iaḡorini ḡeri ai, benamo tari tu beḡe vaḡi-maserini, ma tari tu beḡe lai-lausilausirini.’

⁵⁰ Moḡesi nai, peroveta tarimari mabarari ḡevaḡi-maserito, Barau na tanobara eveiato veḡata beiaḡoma mo maitoma, metona tu toma ḡuru tarimari na beḡe ḡabiani.

⁵¹ Abela ḡevaḡi-maseato, monana eiaḡomato mo Sakaria, ḡia tu fata veaḡana ema Barau ḡena numa veaḡana fakari ai ḡevaḡi-maseato. Aba, au na akiramini, mabarari metori tu toma ḡuru tarimari na beḡe ḡabiani!

⁵² Taravatu ḡovevaḡa-riba iaḡiani tarimami, vetuḡami kika! Riba numana keo-fakana ḡatama-boka kina tu ḡomi na ḡoḡabiato. Ġomi ḡereḡami asi boḡo raka-toḡani, ema ḡeraka-toḡa ḡetoni tarimari ḡeri dabara ḡomi na ḡokourini!”

⁵³ Iesu mo gabu na eraka-rosito, benamo taravatu ḡevevaḡa-riba iaḡiato-ḡoi tarimari ema Farisea tarimari na ḡekira-fitoḡaiato, ema dagara vovoka ḡevedanaḡi-viniato,

⁵⁴ ḡeribaḡaniato, ḡeri ura tu dagara ta bene kiraḡi-kererea, be beḡene samania ḡana.

12

Ḡeḡofaḡofani tarimari boḡono nariri

¹ Mo faka nuḡanai tarimarima ḡutuma lelevaḡi varau ḡevegogoto, asi-iaḡo asi-fana, benamo Iesu na ḡena mero evaḡa-guruḡa guinerito, ekirato, “Boḡono venari-ginikau Farisea tarimari ḡeri farao evaḡa-tubuani muramura ḡerina, korana mani tu ḡia ḡeri ḡofaḡofa veḡana bene.

² Vekouḡau dagarari mabarari beḡea foforini, vekuretoḡa guruḡari mabarari beḡea ribani.

³ Moḡa lorinai kara dagara mukunai ḡokiraḡiato, mamai beḡea seḡaḡiani, kara dagara koutoḡai seḡai ḡoguruḡa-ḡurato dagarana, beḡea kiraḡi-foforiani numa tuḡuna na, tarimarima mabarari na beḡene seḡaḡia ḡana.”

*Barau bitana gari-vinia
Mataio 10:28-31*

⁴ “Ġataġu mabarami, akiramini, tauġani beġe vaġiani, ma murinai kara ta ma asi beġe veiani tarimari gariri asi boġono vei.

⁵ Senaġi navaġa-ribami, deikara garina boġono vei: Barau boġono gari-vinia. Tauġani bevaġiani murinai ma ġena seġuka, ġomi ma befiu-ġuramini, karava eġara-vanaġi vanaġini gabunai. Aba, au na akiramini, ġia moġo boġono gari-vinia!

⁶ Bisini imaima (5) maki fene ruarua na moġo ġevoirini, ene? Senaġina Barau na tu sebona ta maki asi etuġa-rekwaiani.

⁷ Moġoni veġatana, ġomi tu debami ġuiri maki mabarari Barau na eiaviginikaurito. Be asi boġono gari; ġomi voimi tu varaġe lelevaġi, bisini ġutuma voiri maki ġovanaġirito!”

*Iesu bekiraġi-foforiani ema bekira-ġuniġauani
Mataio 10:32-33; 12:32; 10:19-20*

⁸ “Au na akiramini, deikara na au tarimarima ġoirari ai bekiraġi-foforiguni, ġia maki Tarimarima Natuna na Barau ġena aneru ġoirari ai bekiraġi-foforiani.

⁹ Senaġina au deikara na tarimarima ġoirari ai beruġaguni e bekira-ġuniġauguni, ġia maki Barau ġena aneru ġoirari ai baruġaiani e bakira-ġuniġauani.

¹⁰ Tarimarima Natuna deikara na bekira-rakavaiani, Barau na ġia ġena rakava betuġamaġi-fitoġaiani, senaġina deikara na Iauka Veaġa bekira-rakavaiani, ġia ġena rakava tu asi betuġamaġi-fitoġaiani.

¹¹ Iuda tarimari ġeri rubu ai beġe vaġa-kotamini, ema vanuġa vereri e Kota baregori ġeseġaġini tarimari ġoirari ġana beġe ġori-iaġomini nai, nuġami asi beġene vekwaraġi, aiġesi toma boġo guruġani o kara toma boġo kiraġirini.

¹² Korana Iauka Veaġa na mo ġaro ai kara boġo kiraġirini guruġari bevaġa-ribamini.”

Barabore - Farefare vovoka tarimana

¹³ Tarimarima ġutuma nuġana na tarima ta na Iesu ekiraiato, ekirato, “Vevaġa-riba tarimamu o, au kakagu nokiraia, ġai tamama na eragakwanerito farefareri nevareri, be au tavi ta nevinigu.”

¹⁴ Iesu na evaġa-veveato, ekirato, “Ġoi tau o, au tu deikara na ġomi taumi ruarua ġemi farefare-tore viriġi-viriġina ġana etoreguto?”

¹⁵ Benamo evaġa-guruġarito, ekirato, “Boġono boġeboġe! Lorimi boġono vetore, farefare vovoka mata-ġaniġaniri boġo veini garina; korana tarimarima ġeri maġuri korikori tu dia ġeri farefare vovoka na ġevaġa-ġorarini.”

¹⁶ Benamo mai barabore ekiraġiato, ekirato, “Farefare vovoka tarimana ta ġena tano na ġaniġani namori evaġa-ġorarito.

¹⁷ Ġia etuġa-maġito, ekirato, ‘Kamasi toma baveini? Mai ġaniġani mabarari tu ainai bana vaġa-vegogori?’

¹⁸ Benamo ekirato, ‘Au tu maiġesi navei. Ġaniġani atornerini numari guineri narovori, benamo numa baregori naragari. Mainai vau au ġegu ġaniġani e farefare mabarari monai bana vaġa-vegogori.

¹⁹ Benamo au tauġegu bana vekira, ‘Ġoi ġemu dagara namori tu ġutuma gorogoro bovaġa-vegogori laġani vovoka ġana. Be, noiaġaraġi, noġaniġani, noniuniu e noverere.’

²⁰ Senaġina Barau na ekiraiato, ekirato, ‘Kamuto, ġoi tu babo! Toma boġi ġoi ġemu maġuri aġabi-vaġiani ġemuna, benamo mai ġemu farefare bovaġa-vegogorini tu deikara na beġabirini?’

21 Maïgesina mo deidei tauġeri moġo ġeri farefare ġevaġa-vegogoni tari-mari tu asi ġeri farefare Barau ġoiranai.”

Asi bono tuġamaġi-vekwaraġi

Mataio 6:25-34

22 Benamo Iesu na ġena mero evaġa-guruġarito, ekirato, “Moġa lorinai, akiramini, ġemi maġuri asi boġono tuġamaġiri, kara boġo ġanini; o tauġanimi kara na boġo dabuġarini.

23 Maġuri tu dagara baregona, a ġaniġani tu dagara keina, ema tauġani tu dagara baregona, a dabuġa tu dagara keina.

24 Gaio ġotuġamaġiri, asi ġevarovaroni ema asi ġekwa-kwani; asi ġeri ġaniġani-tore numari, senaġina Barau na eġuburini! Ġomi tu dagara baregomi, a manu tu kei!

25 Ġomi deikara otuġamaġi-vekwaraġini nai, ġemu maġuri kota maia bovaġa-maukaiani?

26 Mai dagara misina asi boveiani riba, karase nai tu dagara tari maia urari ai ovetuġamaġini?

27 Boġa veraverari ġoġitari aiġesi ġegarani. Asi ġeġauveini ema dabuġa asi ġeturini. Senaġina akiramini, Kini Solomona ġena vedabuġa marevana maki ġevanaġiani.

28 Bema Barau na tanobara ġauġari moġesi edabuġarini, ġia toma tu ġegarani, ma boinani tu karavai beġe fiu-raġerini, Barau na ġomi tu bevaġa-dabuġa ginikau-raġemini. Ġomi veġabidadama misimisi tarimami!

29 Moġa lorinai asi boġono boġe vetau-vetau, kara toma ġoġanini e kara toma ġoniuni; ema asi boġono tuġamaġi-vekwaraġi maki.

30 Korana Barau asi ribari tarimari mabarari tu maniġeri dagara ġevetaurini, a ġomi Tamami tu ma ribana maniġeri dagara tu ġoura-vinirini.

31 Senaġina Barau ġena Basileia boġono vetaua, benamo maniġeri dagara mabarari bevinimini.”

Farefare boġono vaġa-vegogo gubai

Mataio 6:19-21

32 “Seri misina, asi boġono gari, korana Tamami ġena ura tu ma nuġa namona ġesi ġena Basileia bene vinimi.

33 Ġemi farefare ġovoivoi-iaġiri, ma moni asi-ġeri e asi-ġari tarimari ġoviniri. Asi beġe rakavani moni fusefuseri ġoġabiri, ġemi farefare gubai ġovaġa-vegogori, monai tu asi beġe korini, monai lema tarimari asi beġe raka-kavini ema faro na maki asi beġe vaġa-rakavarini.

34 Korana tu ġomi ġemi farefare ainai, ġomi nuġami maki monai.”

Vetuġunaġi tarimari namori

Mataio 24:42-51

35 “Gauvei ġana boġono vedabuġa-tore ema ġemi lamefa beġene ġara-taġo.

36 Vetuġunaġi tarimari na ġeri vere numai ġenari-taġoani kavana boġono tanu. Vevaġa-veġaraġo verekona na ma beġenoġoini, ġatama-bokai befidifidini nai, ġena ġatama beġene raga-keoa ġana.

37 Vetuġunaġi tarimari roġo tataġa ġeri vere beġenoġoini tu namo. Moġoni akiramini, ġena rami beriġoani, ġaniġani gabunai bevaġa-tanurini, benamo ġaniġani bevinirini.

38 Mo vetuġunaġi tarimari roġo naritaġo ġeri vere beġenoġoini tu namo, kamasi boġi nuġanai o boġiboġi rekenai beiaġomani.

³⁹ Senaḡi boḡono riba, bema numa tarimana ma ribana, kamara horai lema tarimana beiaḡomani tu, numa benariani, be lema tarimana maki lema bevedaureani.

⁴⁰ Moḡa lorinai ḡomi maki boḡono venari-taḡo, korana Tarimarima Natuna tu asi ḡotuḡamaḡiani aoanai beiaḡomani.”

⁴¹ Benamo Petero na edanaḡiato, ekirato, “Vereḡauka, mai barabore tu ḡai ḡemai moḡo okiraḡiani, ba tarimarima mabarari ḡeri ai maki?”

⁴² Vereḡauka evaḡa-veseto, ekirato, “Deikara tu mo farefare nari tarimari na guruḡa eseḡaḡini ema veḡa roroḡotori eveini, ḡena vere na eḡabi-viriḡiato, numa ema vetuḡunaḡi tarimari bene ḡitaḡauri, ema ḡaniḡani maki nega korikori ai bene viniri?

⁴³ Mo vetuḡunaḡi tarimana, ḡena vere na ekiraiato ilailanai eḡauveini, bema-ḡoitaḡoani tu namo.

⁴⁴ Moḡoni akiramini, ḡia tu ḡena vere ḡena farefare mabarari ḡitaḡauri tarimanai bevaḡa-iaḡoani.

⁴⁵ Senaḡina bema vetuḡunaḡi tarimana bekirani, ‘Au ḡegu vere ḡena ḡenoḡoi tu bekwaibo rakava,’ benamo vetuḡunaḡi tauri ema vavineri bekwaririni, ma beḡanini e beniu-babobaboni.

⁴⁶ Vetuḡunaḡi tarimana ḡena vere ḡena ḡenoḡoi ḡarona tu asi etuḡamaḡiani ḡaronai, ma asi eribaiani aoanai beraḡasini. Gena vere na bea basi-ḡutuḡutuani, ma asi ḡevaḡa-moḡonini tarimari ḡesi bea toreani.

⁴⁷ Mo vetuḡunaḡi tarimana ḡena vere ḡena ura tu ma ribana, senaḡi asi eḡabi-kavini ema ḡena vere ḡena ura asi eveiani tu, ribi baregona korikori beḡabiani.

⁴⁸ A vetuḡunaḡi tarimana asi ribana ḡena vere ḡena ura, ma bea ḡauveikavani, voina tu ribi, senaḡi asi vovoka beḡabini. ḡutumari eviniato tarimana ḡenana tu ḡutumari ma beura-viniani; vovoka lelevaḡiri eviniato tarimana ḡenana tu vovoka lelevaḡiri ma bevetau-viniani.”

Dia maino, senaḡi vetavi

Mataio 10:34-36

⁴⁹ “Au tu karava aḡabi-iaḡomaiato tanobara ḡana, ema ḡegu ura bere ḡarakau guine tu namo!

⁵⁰ Senaḡi au tu babatiso ta baḡabiani, ema au tu anuḡa-vekwaraḡini, beiaḡoni mo, bavaḡa-koriani!

⁵¹ Ḗomi ḡotuḡamaḡini, au tu maino tanobara ḡana aḡabi-iaḡomaiato? Asigi, senaḡi akiramini, vetavi-kirakira urana na aiaḡomato.

⁵² Toma beiaḡoni mo ḡoira laḡaniri ai, bese tai imaima tu beḡe vetavikirani, toitoi beḡe veḡitani ruarua ḡerina, ema ruarua beḡe veḡitani toitoi ḡerina.

⁵³ Tamana natuna tauna ḡenana beveḡitani, natuna tauna tamana ḡenana beveḡitani; sinana natuna vavinena ḡenana beveḡitani, ma natuna vavinenana sinana ḡenana beveḡitani; taḡama vavine barana taḡama vavine keina ḡenana beveḡitani, ma taḡama vavine keina taḡama vavine barana ḡenana beveḡitani.”

Aoa beraḡasini vetoḡana

Mataio 16:1-4

⁵⁴ Iesu na tarimarima ḡutuma evaḡa-guruḡarito, ekirato, “Bema ḡaro eketoni rekenai magube dubadubari ḡeraḡekauni ḡoḡitarini nai tu, ḡokirani, ‘Ḗura beraguni,’ benamo eraguni.

⁵⁵ Ma gabina rekena (o south) na iavara eiaḡomani nai ḡokirani, ‘Ḡaro beseḡukani,’ benamo ḡaro eseḡukani.

⁵⁶ Ḡofaḡofa tarimami! Tanobara e guba vetoḡari kiraḡi-kiraḡiri tu ma ribami; kamasi nai mai toma ḡaro vetoḡana tu asi ribami?

⁵⁷ Karase nai tauḡemi na asi ḡotuḡamaḡi-fakaiani kara tu maoro?

⁵⁸ Esamanimuto tarimana ḡesi roḡo ḡoiḡoni Kota ḡana nuḡanai boḡono maino. Bema asiḡina nai, Kota eseḡaḡini tarimana ḡimanai bea tore-kaumuni, ma Kota eseḡaḡini tarimana na folisi ḡimanai bea tore-kaumuni, benamo folisi na dibura numanai bea fiu-toḡamuni.

⁵⁹ Akiramuni, asi boraka-vaḡini, beiaḡoni mo, moni mabarana boa vaḡa-voi-ḡosiani.”

13

Ḡemi rakava ḡerina boḡono vetuḡamaḡi-kure e boḡono raka-kure boḡo maseni ḡesi

¹ Mo negai tarima kota Iesu ḡenai ḡeiaḡoto, benamo Iesu ḡekira-varaiato, Galilea tarimari Pilato na evaḡirito, ḡeri ginitaḡo dagarari Barau ḡeviniato-ḡoi nuḡanai; ḡia rarari tu ginitaḡo dagarari rarari ḡesi ebubu-sebonarito.

² Iesu na evaḡa-veserito, ekirato, “Ḡomi ḡotuḡa-maḡini, mo Galilea tarimari moḡesi ḡevaḡirito-ḡoi nai, monana ḡevaḡa-moḡoniato, ḡeri rakava tu Galilea tarimari mabarari ḡeri rakava evanaḡirito?

³ Asiḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami moḡesi boḡo maseni ḡia ḡemaseto kavana.

⁴ A mo tarima gabanana imaima toitoi (18) Siloam kounai numa baregona eketoto ḡia iatari ai nai, evaḡirito tu kamasi? Gomi ḡotuḡamaḡini, mo tarima ḡeri rakava tu Ierusalemata tarimari mabarari ḡeri rakava evanaḡirito?

⁵ Asiḡina! Au na akiramini, bema ḡemi rakava ḡerina asi boḡo vetuḡamaḡi-kureni, ḡomi mabarami maki boḡo maseni ḡia ḡemaseto kavana.”

Barabore - Figi ḡauna asi ḡwana

⁶ Iesu na mai barabore ekira-vararito, ekirato, “Tarima ta ḡena vine tavoḡana nuḡanai figi ḡauna evaroato. Benamo eiaḡoto, figi ḡauna ḡwaḡwana ea vetauato, senaḡina ḡwana ta asi edoḡariato.

⁷ Moḡa lorinai ḡena vamoka narinarina tarimana evaḡa-guruḡaiato, ekirato, ‘Noḡitaia, laḡani toitoi beḡe iaḡo, au mai ḡau ḡitaḡitana aiaḡomani, senaḡina ḡwana ta asi adoḡariani. Nobasi-laua, korana asi tauna bene! Mai tano eḡauvei-iaḡi-taḡuiani.’

⁸ Senaḡi vamoka ḡitaḡauna tarimana evaḡa-veseto, ekirato, ‘Vereḡauka, noraga-kwaneana, mai laḡani sebona moḡo bene tanu. Au na bakwa-ḡeḡeraḡiani ema tano namori ma babubuni.

⁹ Benamo ḡwaḡwana namori beḡe burini laḡani ḡoirai tu namo, bema asiḡi nai, vau bono basia.’ ”

Iesu na Sabadi ai asi erakato vavinena evaḡa-namoato

¹⁰ Sabadi tai Iesu tu evaḡa-ribatoḡoi rubu ta nuḡanai.

¹¹ Vavine ta monai iauka rakavana na eboroḡiato, evei-kevekeveato laḡani gabanana imaima toitoi (18). Ḡia doḡena eḡeḡevato, asi eruḡa-vaisito-ḡoi.

¹² Iesu na eḡitaiato, benamo ekea-iaḡomaiato, ekiraiato, “Vavine o, ḡoi tu mani keve manina na varau bofaka.”

¹³ Benamo Iesu ḡimana mo vavine iatanai eveḡabikauto nai, vaḡa-sebo moḡo doḡena eroroḡototo, Barau evaḡa-raḡeato.

¹⁴ Rubu ġitaġauna tarimana ebaruto, korana Iesu na Sabadi ai evevaġa-namoto nai. Moġa lorinai ġia na tarimarima evaġa-guruġarito, ekirato, “Ġaro imaima sebona tarimarima ġeri ġauvei ġarori. Mo ġaro ai vevaġa-namo uranai boġono iaġoma, senaġi Sabadi ai asi boġono iaġoma.”

¹⁵ Vereġauka na evaġa-veſeato, ekirato, “Ġofaġofa tarimami! Sabadi ai ġemi boromakau o doniki asi ġoruġarini, ġeri numa na asi ġoġori-rosirini nanu niu?”

¹⁶ A mai vavine, Aberahamo besena vavinena, Satani na laġani gabanana imaima toitoi (18) ebarubaruato, au na Sabadi ai barubaru ġenana asi baruġaiani ba?”

¹⁷ Moġesi ekirato nai, ġebaru-viniato-ġoi tarimari ġemaiakarito, senaġi tarimarima mabarari na Iesu ġena veiġa boruri ġeġitarito nai, ġeikurakavato.

Barabore - Mastadi ġauna ġutuna

Mataio 13:31-32; Mareko 4:30-32

¹⁸ Benamo Iesu na edanaġirito, ekirato, “Barau ġena Basileia tu aiġesi? Kara ġenai bavaġa-ilailaiani?”

¹⁹ Ġia tu mastadi ġauna ġutuna kavana. Tarima ta na eġabiato, ġena vamokai evaruato. Mastadi ġauna ġutuna egarato, ġau ai eiaġoto, benamo guba manuri leganaġi ġesikokauto.”

Faroo evaġa-tubuani muramurana

Mataio 13:33

²⁰ Iesu na ma edanaġirito, ekirato, “Barau ġena Basileia tu kara ġesi bavaġa-ilailaiani?”

²¹ Ġia tu maiġesi, vavine ta na farao evaġa-tubuani muramurana kotuna ta moġo eġabiato, benamo farao fuseri toitoi ġesi egiroato, eiaġoto mo, muramura na mabarana evaġa-tubu baregoato.”

Barau ġena Basileia rakatoġana

Mataio 7:13-14; 7:21-23

²² Iesu Ierusalem dabanana eiaġoto-ġoi nai, vanuġa baregori ema keiri nuġari ai evevaġa-ribato-ġoi.

²³ Tarima ta na edanaġiato, ekirato, “Vereġauka, tarima viravira moġo beġe maġurini ba?” Iesu na evaġa-veserito, ekirato,

²⁴ “Boġono vebibi-toġa, ġatama-boka kibobona boġono raka-toġa ġana, korana au na akiramini, tarimarima ġutuma ġeraka-toġa ġetoni, senaġi asi beġe raka-toġani.

²⁵ Numa tarimana bevariġisini, ġatama-boka bekouani murinai, ġomi tu murikai boġo ruġa-taġoni, ġatama-bokai boġo fidifidini, boġo kirani, ‘Vereġauka, ġai ġema ġatama-boka nokeoa!’ senaġi ġia bekirani, ‘Au asi ribagu ġomi ainana boġo iaġoma!’

²⁶ Benamo ġomi boġo kirani, ‘Ġai tu ġoi ġesi taġaniġanito-ġoi ema taniuniu-vegogoto-ġoi; ema ġoi tu ġai ġema vanuġa ġatamanai ovevaġa-ribato-ġoi!’

²⁷ Senaġina ġia ma bekirani, ‘Au asi ribagu ġomi ainana ġoiaġomani. Au ġeguna ġoraka-veġita vei-rakava tarimami!’

²⁸ Benamo Aberahamo, Isako, Iakobo, ema peroveta tarimari mabarari boġo ġitarini Barau ġena Basileia nuġanai, senaġi ġomi tu murikai beġe dorirosimini; mo ġaro ai boġo taġini, gadikami beġe veġara-tarini.

²⁹ Tarimarima ġaro eraġekauni ema ġaro evariġoni, e debana (o north) ema gabina (o south) rekena na beġe iaġomani, beġe tanu-tarini vereko ai Barau ġena Basileia nuġanai.

³⁰ Boḡono riba, toma ḡegabini tarimari tu beḡe guineni, a ḡeguineni tarimari tu beḡe gabini.”

Iesu Ierusalemata taḡina eveito

Mataio 23:37-39

³¹ Mo negai Farisea tarimari kota Iesu ḡenai ḡeiaḡoto, ḡevaḡa-guruḡaiato, ḡekirato, “Mai gabu noraga-kwanea, gabu ta ḡana noiaḡo, korana Heroda eurani ḡoi bene vaḡimu etoni.”

³² Iesu evaḡa-veseto, ekirato, “Ḡoiḡo, mo boḡa kwaivana ḡoa kiraia, ‘Au tu iauka rakavari alai-vaḡirini ema tarimarima avaḡa-namorini toma, boinani, ema ḡaro vaḡa-toitoinai ḡegu ḡauvei bavaḡa-kori ginikauani.’

³³ Senaḡi toma, boinani, ilaḡani ḡegu iaḡoiḡo ai roḡo baiḡoni, korana peroveta tarimana tu irau gabu ai asi bemaseni, senaḡi Ierusalemata moḡo!

³⁴ Ierusalemata, Ierusalemata o, ḡoi na peroveta tarimari ovaḡirini ema Barau na etuḡu-iaḡosirini tarimari fore na otaki-maserini. Nega ḡutuma aurato, natumi bana gana-ḡeḡeraḡiri, kokoroku vavinena na natuna egoru-taririni kavana, senaḡi ḡomi tu asi ḡourato!

³⁵ Moḡa lorinai ḡemi vanuḡa e Rubu Veḡa korina betanuni. Au na akiramini, ḡomi roḡo au asi boḡo ḡitaguni, beiaḡoni mo, ḡaro ta beraḡasini, monai vau boḡo kirani, ‘Barau aranai eiaḡomani tauna sivaḡa-namoa.’ ”

14

Iesu na Sabadi ai keve tarimana evaḡa-namoato

¹ Sabadi tai Iesu (ḡekeaiato nai) eiaḡoto, Farisea ḡeri veḡorikau tarimana ta ḡena numai beḡene ḡaniḡani ḡana, benamo tarimarima na ḡena veḡa ḡeḡita-ginikaurito-ḡoi.

² Monai tarima ta ḡia tauḡanina eroro-roroto, Iesu ḡoiranai etanu-taḡoto.

³ Benamo Iesu na taravatu ḡevevaḡa-riba iaḡiato-ḡoi tarimari e Farisea tarimari edanaḡirito, ekirato, “Sabadi ai keve vaḡa-namo tu maoro ba asiḡina?”

⁴ Senaḡi ḡia asi ḡeguruḡato, ta na maki asi evaḡa-veḡeato. Benamo Iesu na mo keve tarimana eḡabiato, evaḡa-namoato murinai etuḡuato.

⁵ Benamo ekirarito, ekirato, “Ḡomi deikara natumu o ḡemu boromakau nanu gurina nuḡanai bere keto-ḡura nai, ḡoi na Sabadi ai boro inu-raḡea ba asiḡina?”

⁶ Senaḡi ḡia na Iesu asi ḡevaḡa-veḡeato.

Barabore - Veḡaraḡo verekona

⁷ Iesu na varivari tarimari eḡitarito, tanutanu namori moḡo ḡeḡaunarito, benamo ḡeri barabore ta ekiraḡiato, ekirato,

⁸ “Bema tarima ta na bekeamuni, veḡaraḡo verekona raka-vegogonai, gabu namonai asi bono tanu-tari, korana irau vereko ḡorikauna tauna na tarima barana ta bekeaiani ḡesi.

⁹ Benamo ekeamito tarimana beiaḡomani, bekiramuni, ‘Noveḡita, mai vere ḡena tanutanu novaḡa-fakaia.’ Ḡoi tu bemaikamuni, benamo botanu-riḡoni.

¹⁰ Bema ḡoi ḡekeamuni nai, tanutanu tanonai bono tanu. Benamo vereko ḡorikauna tarimana beiaḡomani nai, bekirani, ‘Ḡata, tuḡuna ḡana novaraḡe.’ Benamo ḡoi tu beḡe vaḡa-raḡemuni vereko tarimari mabarari na.

¹¹ Korana tu tauḡena eveḡabi-vaisini tarimana tu, Barau na betore-riḡoani, a tauḡena evetore-riḡoni tarimana tu, beḡabi-vaisiani.”

12 Iesu na vereko ġorikauna tarimana ekiraiato, ekirato, “Bema ġoi ġaniġani o vereko ta bodabaraiani nai, ġatamu, tarikakamu, garagaramu o sevimu ai ġetanuni taġa tarimari asi bono keari, korana ġia na ġoi ma beġe keamuni, ġoina keakau beġe vaġa-voiani.

13 Senaġi bema vereko ta bodabaraiani nai, gara veġubu, tauġaniri rakava, kwaku rakava, mata-bubu tarimari bono keari,

14 benamo ġoi tu Barau ġena vevaġa-namo boġoitaġoani. Moġoni, ġia na asi beġe vaġa-voimuni, senaġi veġa iobuka-iobuka tarimari mase na ma beġe variġisi-ġenoġoini ġaronai vau, voimu boa ġoitaġoani.”

Barabore - Vereko barana

Mataio 22:1-10

15 Iesu ġesi ġeġaniġani-vegogoto tarimana ta na mo guruġa eseġaġiato nai, ekiraiato, ekirato, “Barau ġena Basileiai vereko bea ġaniani tarimana tu beiakuni.”

16 Iesu na evaġa-veaseato, ekirato, “Tarima ta na vereko barana ta edabaraiato, benamo tarimarima ġutuma ekearito.

17 Ġani-vereko ġaronai ġena vetuġunaġi tarimana ta etuġuato, ekearito tarimari nea kirari, ‘Ġoiaġoma, dagara mabarari beġe rovina-toreri.’

18 Senaġi ġia mabarari ġekira-sirivaġito. Ta ekirato, ‘Au tu tano ta bavoia, be aurani bana ġitaia nai, asi bono baru.’

19 Ta ma ekirato, ‘Au tu boromakau gabanana (10) bavoiri nai, aiaġoni fokafokai atovo-naġirini, be asi bono baru.’

20 Ta ma ekirato, ‘Au tu inivau mo haveġaraġo nai, asi baiaġosini.’

21 Vetuġunaġi tarimana eġenoġoito, ġena vere ekira-varaiato. Benamo numa tarimana ma baruna ġesi ġena vetuġunaġi tarimana ekiraiato, ekirato, ‘Noraga-iaġo vanuġai, gara veġubu, tauġaniri rakava, mata-bubu ema kwaku rakava tarimari bono ġori-iaġomari.’

22 Benamo vetuġunaġi tarimana eġenoġoito, ekirato, ‘Vere o, mani ġemu ura ġauveina tu varau haveia, senaġi numa roġosi bene vonu.’

23 Benamo vere na vetuġunaġi tarimana ma ekiraiato, ekirato, ‘Noiaġo dabara barai ema vamoka dabarari ai, tarimarima bono kirari, beġene iaġoma, be auna numa benema vonu.

24 Au na akiramini, akearito tarimari ta na ġegu vereko ġaniġanina misina ta asi bevaġa-mamiani.’ ”

Barabore - Iesu ġena mero tu vevaġa-gwaġiġi tarimari

Mataio 10:37-38

25 Tarimarima ġutuma-bara Iesu ġesi ġeiaġoto-ġoi, benamo eruġa-kureto, ekirarito, ekirato,

26 “Bema tarima ta eurani, au ġegu ai bene iaġoma etoni, senaġi ġia tamana ema sinana, ġaraġona ema natuna, kakana tarina ema tauġena ġena maġuri maki veuraviniri asi betuġamaġi-fitoġaiani nai, ġia tu dia au ġegu mero.

27 Deikara tauġena ġena satauro asi beġwaiani, benamo au murigu na asi berakani, ġia tu dia au ġegu mero.

28 Bema ġomi ta eurani numa ta bene ragaia etoni nai, betanu-tari guineni, numa voina beribaiani, moni beilailani ba asiġina, ene?

29 Irau ġauvei besinaiani, benamo asi bevaġa-koriani, mabarari na beġe ġitaiani tarimari na beġe rikiriki-iaġiani,

30 beġe kirani, ‘Mai tarima na esinaiato, senaġi asi evaġa-koriato.’

31 O kamara vanuġa verena, irau vanuġa verena ta bene vetari-vinia etoni, benamo asi betanu-tari guineni, sisiba asi bevetauni, ġena vetari

tarimari mabarari 10,000, ema reke ta vere ġena 20,000, ġia ġeiaġoma-viniani nai, bevaġa-darereani ba?

³² Bema ġia asi ilaila nai, ġia aranai ġena tarima tari betuġu-iaġorini, mo doġoro barana roġo fakari manaġa nuġanai, maino beġene ġabia dabarana beġea veiani.

³³ Moġa ilailanai deikara ġena dagara mabarari asi beiaġuirini tu asi au ġegu mero.”

Barabore - Damena
Mataio 5:13; Mareko 9:50

³⁴ “Damena tu namo, senaġi bema damena mamina berekwa-rekwani nai, kamara dabarai mamina ma beġenoġoini?

³⁵ Ġia tu asi ilaila tano vaġa-namona ema asi namo varovaro dagarari ġesi vaġa-garari ġana; moġa lorinai tarima na beġe fitoġaiiani. Ma seġana tarimana bene seġaġi!”

15

Barabore - Rekwerekwa mamoen
Mataio 18:12-14

¹ Takesi gogo tarimari ema vei-rakava tarimari ġutuma Iesu ġenai ġeiaġoto, ġena guruġa beġene seġaġiri ġana.

² Farisea tarimari ema taravatu ġevevaġa-riba iaġiato-ġoi tarimari ġemugumuguto, ġekirato, “Mai tarima tu rakava tarimari eġabi-raġerini ema ġia ġesi ġeġaniġani-vegogoni!”

³ Benamo Iesu na mai barabore ġeri ekiraġiato, ekirato,

⁴ “Bema ġomi ta ma ġena mamoe sinau ta (100), benamo sebna berekwa-rekwani nai, ġia tu kara beveini? Ġia na 99 tano fakanai beraga-kwanerini, edobito mamoen bevetauani mo beġoitaġoani.

⁵ Bedoġariani nai, ġabanai befaġa-gabagabaiani ma iakuna ġesi,

⁶ benamo numa ġana beiaġoni. Beraġasini nai, ġatana e sevina tarimari bekearini, bekirani, ‘Sima iaku-vegogo, korana ġegu mamoe, edobito dagarana, ma badoġaria.’

⁷ Au na akiramini, moġa ilailanai rakava tarimana ta ġena rakava ġerina evetuġamaġi-kureni nai, gubai iaku ema verere tu barego lelevaġi, a vei-iobukaiobuka tarimari 99 ġeri vei-iobukaiobuka dairi ai asi beġe vetuġamaġi-kureni maki bevanaġirini.”

Barabore - Rekwerekwa monina

⁸ “Bema vavine ta ġena silva moniri mabarana gabanana (10), benamo sebna bevei-rekwa-rekwani nai, ġia tu kara beveini? Ġia na lamefa begabuani, numa bedaroani, mo moni sebna bevetau-ġitakauani mo bea ġoitaġoani.

⁹ Bedoġariani nai, ġia na ġatana e sevina tarimari bekearini, bekirani, ‘Sima iaku-vegogo, korana tu ġegu silva monina, erekwa-rekwato dagarana, varau badoġaria.’

¹⁰ Au na akiramini, rakava tarimana ta ġena rakava ġerina evetuġamaġi-kureni nai, Barau ġena aneru moġesi beġe iakuni.”

Barabore - Rekwerekwa merona

¹¹ Iesu ma ekirato, “Tarima ta natuna ruarua.

¹² Tau muriseina na tamana ekiraiato, ekirato, “Tama, ġitana farefare novareri, be au debugu farefareri tu novinigu.’ Benamo farefare mabarari natuna ruarua fakari ai evarerito.

13 Ĝaro asi vovoka ĝeiaĝoto nuĝanai, tau muriseina ĝena farefare evaĝa-vegogoto, benamo tano manaĝa ĝana erakato. Monai ĝena farefare ea ĝere-iaĝirito.

14 Ĝena farefare mabarari evaĝa-koririto murinai, mo tano ai doĝe barego eĝorato. Ĝia varau asi-ĝena, asi-ĝana.

15 Benamo eiaĝoto, mo tanobara tarimana ta ĝenai ĝauvei ea vetauto, benamo ĝia na etuĝuato ĝena tano ai bai bene ĝitaĝauri ĝana.

16 Ĝia evito-rakavaiato nai, bai ĝari ĝaniĝani bene ĝaniri etato, senaĝi mo ĝaniĝani maki ta na asi eviniato.

17 Benamo ea vetuĝamaĝi-kureto, ekirato, 'Tamagu ĝena ĝauvei tarimari tu vovoka, ema ĝari ĝaniĝani maki ĝutuma, senaĝi au tu mainai vitona evaĝiguni.

18 Naĝenoĝoi, tamagu ĝenai naiaĝo, benamo bana kiraia: Tama, Barau ĝoiranai ema ĝoi ĝoiramu ai avei-rakavato.

19 Au tu asi ilaila ĝoi natumu ai ma bono kiraĝigu; senaĝi anoĝimuni, ĝemu vetuĝunaĝi tarimanai bono vaĝa-iaĝogu, banasi.'

20 Benamo evariĝisito, tamana ĝenai eiaĝoto.

Gabu manaĝa na roĝo eiaĝomato-ĝoi nai, tamana na varau eĝita-doĝariato, benamo evetuĝa-rakavaiato, benamo eraga-iaĝoto, ea faĝa-maĝuriato, everauato.

21 Benamo natuna na ekiraiato, ekirato, 'Tama, au tu Barau ĝoiranai ema ĝoi ĝoiramu ai ma ĝegu vei-rakava. Au tu asi ilaila ĝoi natumu ai bono kiraĝigu.'

22 Senaĝi tamana na ĝena vetuĝunaĝi tarimari evaĝa-guruĝarito, ekirato, 'Ĝoraga-vei! Dabuĝa namo vedaureana ta ĝoĝwa-iaĝomaia, ĝoma vaĝa-riĝoa. Rini ta didinai ĝoma dori-toĝaia, ema tamaka maki kwakunai ĝoma toreri.

23 Ema boromakau natuna ma monana ĝoĝwa-iaĝomaia, ĝovaĝia, benamo bisini ĝania e bisini verere-vegogo.

24 Korana natugu maiĝa emaseto, senaĝi ma bemaĝuri-ĝenoĝoi; erekwa-rekwato, senaĝi ma bama doĝaria!' Benamo ĝia ĝeverere-vegogoto.

25 Natuna tau guinena tu vamokai. Vamoka na eĝenoĝoito, numa eiaĝo-viniato-ĝoi nai, mari e bara gururi eseĝaĝirito.

26 Benamo vetuĝunaĝi tarimana ta ekeaiato, mo guru korana evedanaĝi-iaĝiato.

27 Vetuĝunaĝi tarimana na evaĝa-veŝeato, ekirato, 'Ĝoi tarimu beĝenoĝoi, tamamu na ma namona e ma maĝurina ĝesi bema doĝaria lorinai, ĝia na vetuĝunaĝi tarimari bevaĝa-guruĝari, boromakau natuna ma monana ĝesi beĝe vaĝia.'

28 Tau guinena ebaru-rakavato, numai asi eraka-toĝato, benamo tamana eraka-rosito, enoĝiato neraka-toĝa ĝana.

29 Senaĝi ĝia na tamana evaĝa-veŝeato, ekirato, 'Noĝitaia, au tu laĝani ĝutuma ĝoi rekemu ai atanuni, vetuĝunaĝimu aiaĝo-vinini, ĝemu ura mabarana akorana-iaĝirini, ĝemu vevaĝa-naĝi ta asi afitoĝaiato, senaĝi ĝoi na nanigosi natuna ta maki asi oviniguni au ma ĝatagu ĝesi vaĝa-iaku-iaĝima ĝana.

30 A mai natumu mata-boraĝa vavineri ĝeri ai ĝemu farefare mabarari bea vaĝa-koriri; bea ĝenoĝoi nai tu, ĝoi na tu boromakau natuna mona mase bovaĝia ĝia ĝana!'

31 Tamana evaĝa-veseto, ekirato, 'Natugu, ĝoi tu au sevigu ai otanu-vanaĝi vanaĝini, au ĝegu dagara mabarari tu ĝoi ĝemu.

³² A toma ġita si-iaku, bisini verere, korana tarimu emaseto, senaġi bemaġuri; erekwa-rekwato, senaġi ma bitama doġaria.’ ”

16

Vetuġunaġi tarimana ġena tuġamaġi-iobuka

¹ Iesu na ġena mero evaġa-guruġarito, ekirato, “Farefare e moni vovoka tarimana ta etanuto-ġoi. Benamo tarima kotari na farefare vovoka tarimana ġekira-varaiato, ġia ġena farefare ġitaġauna tarimana na ġena farefare eġere-iaġirini.

² Moġa lorinai taġa tarimana na ekea-toġaiato, benamo ekirato, ‘Ġoi varimu baseġaġia moġoni ba? Au ġegu ġauvei oġwa-raġaiato nai, novevarifiu-iaġia, korana inította ġoi tu dia au ġegu farefare narinarina tarimana.’

³ Benamo mo farefare ġitaġauna tarimana etuġamaġito, ekirato, ‘Au ġegu baregona na toma evaġa-dokoguni ġegu ġauvei na. Kara haveini? Au tu asi gwadagu baiaraġani ema noġinoġi au ġegu ai tu maiaka dagarana.’

⁴ Etuġamaġito-ġoi nuġanai, ekirato, ‘Mai bama riba kara haveiani! Benamo bevaġa-dokoguni nai, ġatagu namori ġutuma na beġe ġabi-raġeguni ġeri numai.’

⁵ Moġa lorinai ġena baregona ġenai ġeġabi-toreto tarimari mabarari ekea-vegogorito. Benamo ta edanaġiato, ekirato, ‘Ġoi ġemu ġabitore tu vira?’

⁶ Evaġa-veseto, ekirato, ‘Olive diġana kavaburi sinau imaima toitoi (800).’ Benamo farefare ġitaġauna tarimana na ekiraiato, ‘Ġemu ġabitore fefana maiġa, noraga-tanutari, benamo sinau vasivasi (400) notorea.’

⁷ Benamo ta ma edanaġiato, ekirato, ‘Ġoi ġemu ġabitore tu vira?’ Ġia ekirato, ‘Widi fuseri mabarari 1,000.’ Benamo farefare ġitaġauna tarimana na ekiraiato, ‘Ġemu ġabitore fefana maiġa, noġabia, benamo sinau imaima toitoi (800) notorea.’

⁸ Dokonai mo farefare narinarina tarimana rakavana ġena baregona na evaġa-raġeato, korana ġena tuġamaġi-iobuka dainai. Korana tanobara tarimari tu ġeiaunega-lelevaġito ġeri tanu-vegogo ai, a mamai ġetanuni tarimari tu asiġina.

⁹ Au na akiramini, mai tanobara farefareri e moniri rakavari ġerina tarimarima tu ġomi ġatami ai boġono vaġa-iaġori, korana ġemi moni bea korini nai, ġomi tu beġe tanu-vanaġi vanaġini numari ai beġene ġabi-raġemi gubai.

¹⁰ Deikara dagara misina ġauvei-iaġina ma ribana nai, dagara baregona maki ġauvei-iaġina ma ribana; ema deikara dagara keinai beġofaġofani nai, dagara baregonai maki beġofaġofani.

¹¹ Bema ġomi tanobara farefareri e moniri ġauvei-iaġiri asi ribami nai, Barau na kamasi farefare korikoriri gubai bevinimini boġo ġauvei-iaġirini?

¹² Ema bema ġomi tarima ta ġena farefare asi boġo ġitaġau-ginikaurini nai, Barau na ġomi ġemi farefare maki asi bevinimini?

¹³ Vetuġunaġi tarimana na baregona ruarua vetuġunaġiri asi beiaġo-vinirini riba. Korana ġia na ta tu asi beura-viniani, a ta tu beura-viniani; ta bevaġa-moġoniani, a ta tu beġofaġofa-iaġiani. Ġomi maki Barau ema moni nega sebonai vetuġunaġiri asi boġo iaġo-vinirini, asiġina-ġinavaġi.”

Iesu ġena guruġa kota

¹⁴ Farisea tarimari tu moni ġeuravini-baregorito-ġoi. Iesu ġena guruġa mabarana ġeseġaġiato nai, ġerikiriki-iaġiato.

15 Iesu na evaḡa-guruḡarito, ekirato, “Ĝomi tu tarimarima ḡoirari ai ḡovekiraḡini, senaḡi Barau tu nuḡami ribana. Tarimarima na ḡevaḡa-raḡerini dagarari Barau na tu asi eura-vinirini, etuḡamaḡi-fitoḡarini.

16 Mose ḡena taravatu ema peroveta tarimari ḡeri guruḡa ḡetanuto-ḡoi eiaḡomato mo, Ioane Babatiso ḡena negai. Monana Barau ḡena Basileia varina ḡeḡobata-iaḡiani nai, tarimarima mabarari ḡevebibi-toḡani beḡene raka-toḡa ḡana.

17 Guba ema tanobara beḡe rekwa-rekwani tu ma dabarana, senaḡi taravatu ḡena toutou ta maki asi berekwa-rekwani.

18 Tau ta na ḡaraḡona belaiani, benamo vavine ta ma beḡaraḡoani nai, ḡia mo tu veḡura-vanaḡi veigana beveiani; ma tarima boruna ta na mo tau na elaiato vavinena moḡa ma beḡaraḡoani nai, ḡia maki beveḡura-vanaḡini.”

Farefare e moni vovoka tarimana ema Lasaro

19 “Farefare e moni vovoka tarimana ta etanuto-ḡoi. Ĝia tu dabuḡa namori moḡo eveito-ḡoi e ḡaro mabarari ai everereto-ḡoi ema ḡaniḡani namona moḡo eḡanito-ḡoi.

20 Ĝena numa ḡatama bokanai tarima ta asi-ḡena ema asi-ḡana arana Lasaro egena-taḡoto-ḡoi. Ĝia tu kefina mabarana lakufodo.

21 Eura-baregoto-ḡoi taḡa tarimana ḡana ḡaniḡani momori bene ḡani. Kwaiva maki ḡeiaḡoto, ḡia manuḡana ḡeiamuserito-ḡoi.

22 Asi ḡena-ḡana tarimana emaseto, benamo aneru na Aberahamo sevina ḡana ḡeḡwa-iaḡoato. Farefare vovoka tarimana ma emaseto, benamo ḡeguriato.

23 Mase gabunai (o Hades) midigu eḡanito-ḡoi nai, eboḡe-raḡeto, manaḡai Aberahamo eḡitaiato, ema Lasaro maki ḡia ḡesi.

24 Benamo ekeato, ekirato, ‘Aberahamo, tamagu o, novetuḡagu, mani Lasaro notuḡua, ḡimana didina nanu ai nea duḡi-reia, be meagu moḡo nama vaḡa-ḡavea, korana tu au mai karava morenai midigu vovoka aḡanini.’

25 Senaḡi Aberahamo ekirato, ‘Natugu o, notuḡamaḡia, ḡoi omaḡurito-ḡoi ḡarori ai dagara namori oḡabito-ḡoi, a Lasaro tu dagara rakavari eḡabito-ḡoi. Senaḡi toma ḡia tu everereni, a ḡoi tu midigu oḡanini.

26 Ĝita fakarai maki koufa bara ta etanuni, moḡa lorinai maina na tarima ta maniḡana asi beiaḡosini, ema manina na maki ta maiḡana asi beiaḡomani.’

27 Benamo farefare vovoka tarimana ekirato, ‘Tamagu o, anoḡimuni, Lasaro notuḡua tamagu ḡena numa ḡana.

28 Au tarigu merori tu imaima. Ĝia na bene vaḡa-guruḡari, mai midigu ḡani gabuna ḡana beḡe iaḡomani garina.’

29 Senaḡi Aberahamo ekirato, ‘Mose ema peroveta tarimari tu ḡia ḡesi, be garori neḡi beḡene seḡaḡiri.’

30 Taḡa tarimana ekirato, ‘Asiḡi, tamagu! Senaḡi bema emaseto tarimana ta beiaḡoni nai, ḡia tu ḡeri rakava ḡerina beḡe vetuḡamaḡi-kureni.’

31 Aberahamo ekirato, ‘Bema Mose ḡena taravatu ema peroveta tarimari ḡeri guruḡa asi beḡe seḡaḡirini nai, mase na tarima ta bere varigiḡi-ḡenoḡoi maki asi ḡere seḡaḡi-vinia.’ ”

17

Vei-rakava ema rakava tuḡamaḡi-fitoḡari

¹ Iesu na ġena mero evaġa-guruġarito, ekirato, “Tarimarima vaġa-ketori dagarari roġo beġe ġorani, senaġi bevaġa-ġorarini tarimana tu vetuġana kekei.

² Ġia tu bere namo fore baregona ta ġaiġonai ġere baru-kaua, benamo davarai ġere fiu-reia, korana mai misimisiri ta rakavai beġofa-toġaiani garina.

³ Moġesi nai lorimi boġono vetore! Bema ġoi tarikakamu veġa rakavari eveini nai, bono kira-ġoia, ema ġena rakava ġerina bevetuġamaġi-kureni nai, ġena rakava bono tuġamaġi-fitoġari.

⁴ Bema ġia na ġaro ta vaġa-imaima ruarua (7) bevaġa-rakavamuni, ema vaġa-imaima ruarua (7) beġenoġoini ġemu ai, bekirani, ‘Bavetuġamaġi-kure,’ betoni nai, ġoi na ġena rakava bono tuġamaġi-fitoġari.”

Veġabidadama

⁵ Iesu ġena apostolo na Vereġauka ġevaġa-guruġaiato, ġekirato, “Ġema veġabidadama novaġa-baregori!”

⁶ Vereġauka na evaġa-veserito, ekirato, “Bema ġomi ġemi veġabidadama tu mastadi ġauna ġutuna ġena barego kavana, misina korokoro moġo, senaġi ġomi na mai ġau baregona o malberi ġauna boġo kiraiiani, ‘Noveraġa-vaġi, be davarai noa vevaro!’ boġo toni, benamo garomi tu beseġaġiani.”

Vetuġunaġi tarimana ġena ġauvei

⁷ “Bema ġomi ta ġemu vetuġunaġi tarimana tano befokani o mamoe beġita-ġaurini murinai, ġauvei gabuna na numa ġana beiaġomani nai, ġoi na bokiraiiani, ‘Noraka-ġariġari, be noma ġaniġani,’ botoni ba?

⁸ Asiġina, senaġi ġoi bokirani, ‘Ġagu ġaniġani novei, ema bono vedabuġa, be bonoma nari-ġaugu; au bana ġaniġani ema bana niuniu-ġosi murinai vau, ġoi ma bono ġaniġani ema bono niuniu.’

⁹ Ba vetuġunaġi tarimana ġena seġaġi ai dainai bevaġa-namoani? Asiġina.

¹⁰ Ġomi maki moġesi; bema Barau na bekiramini ġauveiri mabarari boġo veirini nai, boġo kirani, ‘Ġita vetuġunaġi tarimara ġera ġauvei.’ ”

Iesu na lepera tarimari gabanana (10) evaġa-namorito

¹¹ Iesu Ierusalemia eiaġo-viniato-ġoi nai, Samaria ema Galilea tanori vefakari na eraka-vanaġito.

¹² Vanuġa tai eraka-toġato, benamo lepera tarimari gabanana (10) ġesi ġevedoġarito. Roġo manaġai ġeruġa-tarito,

¹³ ġia ġekeato, ġekirato, “Iesu! Ġema Vereġauka! Novetuġama!”

¹⁴ Iesu na eġitarito, benamo evaġa-guruġarito, ekirato, “Rubu Veaġa vereri ġeri ai ġoiġo, be beġenea ġitami.” Benamo ġeiġoto-ġoi nuġanai, tauġaniri ġeveiarevato, ġenamoto.

¹⁵ Tarima sebna moġo ġia fakari ai kefina eġitaiato enamoto, benamo eġenoġoi-iaġoto, Barau evonevone-raġe viniato.

¹⁶ Benamo Iesu kwakuna koranai evetui-tarito, evaġa-namoato. Ġia tu Samaria tarimana.

¹⁷ Iesu ekirato, “Tarima mabarari tu gabanana (10) beġe namo. Imaima vasivasi (9) tu aiġeri?

¹⁸ Kara dainai mai irau gabu tarimana ġereġana moġo beġenoġoi-iaġoma, Barau bema vaġa-raġea?”

¹⁹ Benamo Iesu na ekiraiato, ekirato, “Novariġisi, noiaġo, ġemu veġabidadama na bevaġa-maġurimu.”

*Barau ġena Basileia beiaġomani guruġari
Mataio 24:23-28; 24:37-41*

²⁰ Farisea tarimari kota na Iesu ġedanaġiato, Barau ġena Basileia tu aitoma beiaġomani. Ġia na evaġa-veserito, ekirato, “Barau ġena Basileia beiaġomani tu asi boġo ġitaiani dagarana.

²¹ Tarima ta asi bekirani, ‘Noġitaia, iniġa!’ o ‘Tomoġa!’; korana Barau ġena Basileia tu ġomi fakami ai maniġa.”

²² Benamo ġia na ġena mero evaġa-guruġarito, ekirato, “Ġaro ta beraġasini nai, ġomi ġemi ura baregona tu Tarimarima Natuna ġena ġaro sebna ta moġo boġono ġitaia, senaġi asi boġo ġitaiani.

²³ Kotari na beġe kiramini, ‘Tarimana iomoġa!’ o ‘Tarimana maiġa!’ beġe toni. Senaġi asi boġono iaġo, murinai asi boġono raka.

²⁴ Korana kiriku eragani nai, morena gubai reketa-reketa ġana eiaġoni kavana, Tarimarima Natuna ġena ġaro nuġanai maki moġesi bevevini.

²⁵ Senaġi ġia midigumidigu vovoka roġo beġani-guineni, ema toma ġuru tarimari na roġo beġe kira-fitoġaiani.

²⁶ Tarimarima Natuna beiaġomani ġaronai tu Noa ġena negai kavana.

²⁷ Tarimarima mabarari ġeġaniġanito-ġoi, ġeniuniuto-ġoi, tau e vavine ġeveġaraġoto-ġoi, eiaġomato mo, Noa ġena lagatoi ai eraka-toġato ġaronai, benamo ġutuġutu na mabarari eġutu-maserito.

²⁸ Lota ġena negai maki moġesi moġo. Ġeġaniġanito-ġoi, ġeniuniuto-ġoi, ġevoivoito-ġoi, ġevaro-varoto-ġoi, numa ġeragato-ġoi.

²⁹ Senaġi Lota Sodoma eraga-kwaneato ġaronai, karava ma salfa o fore seġukari ġesi guba na ġeketo-firiġoto, mabarari evaġi-masemaserito.

³⁰ Tarimarima Natuna befoforini nai, maki moġesina beġorani.

³¹ Mo ġaro ai, bema tarima ta tu numa tuġunai etanu-taġoni, numai asi ma bene raka-toġa ġena farefare bene ġabiri. Ema bema tarima ta tu vamokai nai, ġia ġena numa ġana asi ma bene ġenoġoi ġena farefare ġabiġabiri.

³² Lota ġaraġona boġono tuġamaġia!

³³ Deikara tauġena moġo ġena maġuri lorina etoreani tarimana, ġena maġuri beleaiani; a ġena maġuri eleaiani tarimana na maġuri bedoġariani.

³⁴ Akiramini, mo boġi ai tarima ruarua geda sebna beġe genani nuġanai, ta tu Barau na beġabi-vaġiani, (korana beġabi-raġeani nai), a ta tu betanuni, (korana bekira-fitoġaiani nai).

³⁵ Vavine ruarua widi giro dagarana beġe giro-vegogoani nai, ta tu beġabi-vaġiani, a ta tu betanuni. [³⁶ Tarima ruarua vamokai beġe ġauvevini nai, ta tu beġabi-vaġiani, a ta tu betanuni.]”

³⁷ Iesu ġena mero na ġedanaġiato, ġekirato, “Vereġauka o, ainai beġorani?” Iesu evaġa-veseto, ekirato, “Mase tauġanina etanuni gabunai, gaio maki monai beġe vegogoni, (be ġia na beġe vaġa-foforiani).”

18

Barabore - Vabu ema Kota eseġaġini tarimana

¹ Benamo Iesu na ġena mero ġeri barabore ta ekiraġiato. Mo barabore na bene vaġa-ribari, be vanaġivanagi beġene ġauġau ema asi beġene moiramaira ġana.

² Maġesi ekirato, “Vanuġa tai Kota eseġaġini tarimana ta etanuto-ġoi. Ġia tu Barau garina asi eveito-ġoi, ema tarimarima maki asi egubakaurito-ġoi.

³ Mo vanuġa vabuna ta mai Kota eseġaġini tarimana ġenai eiaġo-ġenoġoi ġenoġoito-ġoi, ġena maoro evevaġa-doġe-gani viniato-ġoi ema ekirato-ġoi, ‘Novaġa-kavagu, be ġevaġa-rakavaguni tarimari davari noviniri!’

⁴ Nega emanaġato nuġanai, Kota eseġaġini tarimana na vabu ġena ura veiġana asi eveiato. Senaġi ġaro ta ġia tauġena evetuġamaġito, ekirato, 'Au tu Barau garina asi aveini ema tarimarima maki asi agubakaurini,

⁵ senaġi dagara sebona tu, mai vabu na au evaġa-doġe-ganiguni nai, ġena ura veiġana naveia, korana vanaġivanaġi beiaġomani, benamo au bevaġa-doġe-gani iaġoguni ġesi."

⁶ Vereġauka ma ekirato, "Mo Kota eseġaġini tarimana kara etato, ġoseġaġia.

⁷ Be kamasi? Barau na eviriġirito tarimari, ġia ġenai boġi ema laġani mabarari ai ġetaġitaġini ema ġenoġinoġi-viniani tarimari, vevaġa-maoro nuġanai tu asi bevaġa-kavarini? Nevaġa-kavari ġana nai tu bekwaiboni?

⁸ Au na akiramini, ġeri maoro ai ġia na bevaġa-kava ġariġaririni. Senaġi Tarimarima Natuna ma beiaġomani nai, ġia veġabi-dadama tanobarai bedoġariani ba asiġina?"

Farisea tarimana ema takesi gogo tarimana

⁹ Tarima kotari ġeri tuġamaġi ġia tu vei-iobukaiobuka, a tarimarima mabarari tu vei-rakava tarimari. Iesu na mai tarima ġeri barabore ekiraġiato, ekirato,

¹⁰ "Tarima ruarua Rubu Veaġa ġana ġeiaġoto, ġea ġuriġurito; ta tu Farisea tarimana, a ta tu takesi gogo tarimana.

¹¹ Farisea tarimana ġereġana reke tai eruġato, benamo eġauġauto, ekirato, 'Barau o, avaġa-namomuni, korana au tu dia tarima mabarari kavana, be seġafore tarimari, vei ġeġeva-ġeġeva tarimari, veġura-vanaġi tarimari. Avaġa-namomuni, korana au tu dia iomo takesi gogo tarimana kavana.

¹² Fura o wiki ta nuġanai au tu ġaro ruarua aġani-veaġani, ema adoġarini dagarari karava gabanana (10) aveirini, benamo karava sebona tu ġoi avinimuni.'

¹³ Senaġi takesi gogo tarimana tu manaġai eruġato, asi eboġe-raġeto gubai, kobana ebotaiao, ekirato, 'Barau o, au tu rakava tarimagu, noma vetuġagu!'

¹⁴ Au na akiramini, takesi gogo tarimana tu Barau na evaġa-moġoniato, ma vei-iobukaiobukana ġesi vanuġa ġana eġenoġoito, a Farisea tarimana tu asiġina. Korana tauġena moġo eveġabi-varaġeni tarimana tu, Barau na bevaġa-variġoani, a tauġena evevaġa-variġoni tarimana tu, bevaġa-varaġeani."

Iesu na mero misiri evaġa-namorito

Mataio 19:13-15; Mareko 10:13-16

¹⁵ Tarima kotari mero misimisiri Iesu ġenai ġeġwa-iaġorito, ġimana iatari ai bene toreri ġana. Ġena mero na ġeġitarito, benamo ġekira-ġoirito.

¹⁶ Senaġi Iesu na mero misiri ekea-iaġomarito, ġena mero ekirarito, ekirato, "Mani mero misiri au ġegu ai ġeiaġoma, asi ġolairi, korana maniġesina kavana tu Barau ġena Basileia tarimari.

¹⁷ Moġoni au na ġomi akiramini, dei na Barau ġena Basileia asi beġabi-raġeani mero misina kavana, Basileiai asi beraka-toġani."

Farefare vovoka tarimana

Mataio 19:16-30; Mareko 10:17-31

¹⁸ Iuda tarimari ġeri vere tauna ta na Iesu edanaġiato, ekirato, "Ve-vaġa-riba taumu namona, au kara haveini vau, maġuri vanaġivanaġi badoġariani?"

¹⁹ Iesu na evaḡa-veſeato, ekirato, “Ĝoi karase nai au namogu okiraḡini? Tarima ta asi namo, Barau moḡo ḡereḡana.

²⁰ Taravatu ma ribamu, ‘Asi bono veḡura-vanaḡi, asi bono vaḡivaḡi, asi bono lema, asi bono vevaḡa-daḡa ḡofaḡofa, tamamu sinamu bono gubakauri.’”

²¹ Mo tarima ekirato, “Au keigu na beiaḡoma toma mani taravatu mabarari akorana-iaḡirini.”

²² Iesu na mo guruḡa eseḡaḡiato, benamo ekiraiato, “Ĝoi tu dagara sebonai moḡo orabuni. Ĝemu farefare mabarari novoivoi-iaḡiri, moniri tu asi-ḡeri ema asi-ḡari tarimari bono viniri, benamo gubai ḡoi ḡemu farefare bodoḡaririni. Moḡesi boveini vau, au murigu ai bonoma raka.”

²³ Mo guruḡa eseḡaḡiato nai, nuḡana emeto-rakavato, korana ḡia tu farefare ḡutuma tarimana.

²⁴ Iesu na eḡitaiato, benamo ekiraiato, ekirato, “Farefare vovoka tarimari Barau ḡena Basileia ḡeri rakatoḡa tu gwaḡiḡi rakava!

²⁵ Kamela nila kadarena na ḡena rakatoḡa tu kotuna gwaḡiḡi, a farefare vovoka tarimana Barau ḡena Basileia rakatoḡana ḡia ḡenai tu gwaḡiḡi rakava.”

²⁶ Tarimarima na mai guruḡa ḡeseḡaḡiato, benamo Iesu ḡedanaḡiato, ḡekirato, “Be, deikarari vau maḡuri beḡe doḡariani?”

²⁷ Iesu evaḡa-veseto, ekirato, “Tarimarima na asi beḡe veirini riba dagarari tu Barau na beveirini riba.”

²⁸ Petero na ekiraiato, ekirato, “Ĝoi ribamu, ḡai tu ḡema dagara mabarari ḡaraga-kwanerito, murimu ai ḡarakani.”

²⁹ Iesu na ekirarito, “Moḡoni akiramini, tarima ta ḡena numa eraga-kwaneato, o ḡaraḡona, kakana, tarina, tamana, sinana, natuna Barau ḡena Basileia uranai,

³⁰ ḡia na mai maḡuri nuḡanai dagara ḡutuma beḡoitaḡoni, ema mo negai vau maḡuri vanaḡivanaḡi bedoḡariani.”

Iesu na ḡena mase ma ekiraḡi-foforiato

Mataio 20:17-19; Mareko 10:32-34

³¹ Iesu na ḡena mero gabanana ruarua (12) eḡori-veḡitarito, benamo ekirarito, ekirato, “Goſeḡaḡi! Gita tu Ierusalemata ḡana tavaḡaḡeni. Monai peroveta tauri na Tarimarima Natuna varina ḡetore-guineto guruḡari aniri mabarari beḡe moḡonini.

³² Irau bese (o Roma) tarimari ḡimari ai beḡe toreani. Ĝia na beḡe vaseva vaseva-iaḡiani, beḡe rikiriki-iaḡiani e beḡe kanunu-kanunuani.

³³ Beḡe botaiani e beḡe vaḡi-maseani, senaḡi ḡaro vaḡa-toitoinai vau ma bevariḡisi-ḡenoḡoini.”

³⁴ Iesu ḡena mero mo guruḡa tauna asi ḡeḡoitaḡoato. Guruḡa anina ḡia ḡeri ai tu vekuretoḡa. Ĝia asi ribari Iesu na kara ekiraḡiato.

Iesu na mata-bubu tauna evaḡa-namoato

Mataio 20:29-34; Mareko 10:46-52

³⁵ Iesu tu Ieriko ekavinaḡiato nai, mata-bubu tauna ta dabara rikinai etanu-taḡoto-ḡoi, enoḡinoḡito-ḡoi.

³⁶ Tarimarima ḡutuma dabarai ḡeraka-vanaḡito eseḡaḡito, benamo evedanaḡito, “Mai guru anina tu kara?”

³⁷ Ĝekirato, “Iesu, Nasareta tauna, eraka-vanaḡini.”

³⁸ Benamo ekea-fouto, ekirato, “Iesu o, Davida natuna, au novetuḡagu!”

³⁹ Ĝoirai ĝerakato tarimari na ĝekira-ĝoiato, senaĝi ĝia ekea-ĝigiraĝe ĝigiraĝeto-ĝoi, “Davida Natuna o, au novetuĝagu!”

⁴⁰ Iesu eruĝa-tarito, benamo ekirato, “Ĝoĝori-iaĝomaia!” Ĝia eiaĝomato, benamo Iesu na edanaĝiato, ekirato,

⁴¹ “Kara ourani ĝemu ai naveia otoni?” Ĝia evaĝa-veseto, ekirato, “Vereĝauka o, matagu noma vaĝa-iaĝaia.”

⁴² Iesu ekirato, “Be, matamu nenamo, ĝemu veĝabidadama na bevaĝa-namomu.”

⁴³ Vaĝa-sebo matana enamoto, eboĝeboĝe-ginikauto, Iesu murinai erakato, Barau evaĝa-raĝeato. Mo veĝa ĝeĝitaiato tarimari mabarari na maki Barau ĝevaĝa-raĝeato.

19

Iesu ema Sagaio

¹ Iesu Ieriko ai eraĝasito, benamo vanuĝa nuĝana na eraka-iaĝoto-ĝoi.

² Monai tu takesi gogo tarimari ĝeri vere ta arana Sagaio; ĝia tu moni ema farefare vovoka tarimana.

³ Ĝia ĝena ura tu Iesu neĝita-vetoĝaia ĝia tu dei, senaĝi tarimarima ĝutuma ema ĝia tu tau kubina nai, neĝitaia ĝana egera-kavato.

⁴ Moĝa lorinai eraga-guine-iaĝoto, sikamoa ĝauna tai eraĝeto, Iesu monana beraka-vanaĝini nai, bene ĝitaia ĝana.

⁵ Iesu mo gabu ai eraĝasito, eboĝe-raĝeto, eĝitaiato, benamo ekiraiato, “Sagaio, norakariĝo-ragaraga, korana au toma tu ĝoi ĝemu numai batanuni bene.”

⁶ Benamo Sagaio eraga-rakariĝoto, ma iakuna ĝesi Iesu eĝori-iaĝoato ĝena numa ĝana.

⁷ Ĝeĝitaiato tarimari mabarari ĝemuĝumuĝuto, ĝekirato, “Mai tau tu rakava tarimana, ĝena numai ea tanuni.”

⁸ Sagaio eruĝa-vaisito, Vereĝauka evaĝa-guruĝaiato, ekirato, “Vereĝauka, noseĝaĝi! Ĝegu farefare reke-ta tu gara veĝubu tarimari bavirinini, ema ĝena farefare aĝabi-kavaiato tarimana tu, nega vaĝa-vasivasi bavini-ĝenoĝoiani.”

⁹ Iesu na ekiraiato, ekirato, “Toma vevaĝa-maĝuri tu mai numai bema raĝasi, korana mai tarima maki Aberahamo natuna.

¹⁰ Korana Tarimarima Natuna tu rekwarekwa tarimari vetauvetauri ema bene vaĝa-maĝuriri ĝana eiaĝomato.”

Barabore - Vetuĝunaĝi tarimari moni ĝenarito

Mataio 25:14-30

¹¹ Mabarari ĝeseĝaĝito-ĝoi nuĝanai, Iesu na ĝeri barabore ta ekiraĝiato. Korana ĝia tu Ierusema ekavi-naĝiato nai, ĝia maboru ĝekirato, Barau ĝena Basileia tu mo negai beforinini.

¹² Benamo ĝia ekirato, “Dagi baregona tarimana ta gabu manaĝana ĝana eiaĝoto, kini o vere dagina bene ĝabia vau, ma bene ĝenoĝoi ĝana.

¹³ Roĝosi bere raka nai, ĝena vetuĝunaĝi tarimari gabanana (10) ekea-iaĝomarito, golo moniri ĝia tata sebori-sebori evinirito, benamo ekirarito, ekirato, ‘Au murigu ai boĝono ĝauvei-iaĝiri, be moni boruri tari ma boĝono doĝari.’

¹⁴ Senaĝi ĝena tanobara tarimari na asi ĝeura-viniato-ĝoi nai, murina na guruĝa ĝetuĝuto, ĝekirato, ‘Ĝai asi ĝaurani mai tarima ĝai ĝema vere ai bene iaĝo.’

¹⁵ Senaġi mo tarima na kini dagina ġeviniato murinai, eġenoġoi-iaġomato. Benamo ġena vetuġunaġi tarimari ekea-iaġomarito, beġene vaġa-ribaia, moni boruri vira ġia tata ġedoġarito.

¹⁶ Tarima giniguinena eiaġomato, benamo ekirato, 'Vereġauka, golo mon-ina sebna oviniguto nuġanai, au na tu moni gabanana (10) ma adoġaririto.'

¹⁷ Ġia na evaġa-namoato, ekirato, 'Ġoi tu vetuġunaġi taumu namona! Dagara misiri oġauvei-iaġi ginikaurini nai, au na vanuġa mabarari gabanana (10) avinimuni, ġoi na boġita-ġaurini.'

¹⁸ Vaġa-ruaruana eiaġomato, benamo ekirato, 'Vereġauka, sebna oviniguto nuġanai, au na moni imaima ma adoġaririto.'

¹⁹ Ġena vere na ekiraiato, 'Ġoi tu vanuġa imaima boġita-ġaurini.'

²⁰ Vetuġunaġi tarimana ta ma eiaġomato, benamo ekirato, 'Vereġauka o, ġoi ġemu moni sebna tu iniġa, au na muko ai akumuato, akure-toġaiato.

²¹ Au tu ġoi garimu aveito, korana ġoi tu asi vegubakau taumu. Tarima ġeri dagara oġabirini, ema dia ġoi na ovarorito dagarari obasirini e okwarini.'

²² Ġena vere na ekiraiato, 'Ġoi tu vetuġunaġi tarimana rakavana! Tauġemu ġemu guruġa na bavevaġa-maoro vinimuni. Ġoi ribamu au tu asi vegubakau taugu, dia au ġegu dagarari aġabirini, ema dia avaroto dagarari abasirini.

²³ Be, karase nai ġegu moni tu banikai asi otoreato? Benamo au bara ġenoġoi nai tu, ma torekauna o interestina ġesi bara doġaria.'

²⁴ Benamo monai ġeruġa-taġoto-ġoi tarimari ekirarito, ekirato, 'Mani moni sebna ġenai maniġa ġoġabia, moni gabanana (10) tarimana ġovinia.'

²⁵ Senaġi ġia na ġekiraiato, 'Vereġauka, ġia ġena moni tu varau 10 beġabia.'

²⁶ Ġia evaġa-veseto, ekirato, 'Au na akiramini, ma ġena-ġana tarimana tu ġutumari ma baviniiani, a asi ġena-ġana tarimana tu, ġenai misina maki baġabi-vaġiani.

²⁷ Senaġi au ġebaru-viniguni tarimari, asi ġeurato au ġia bana guine-iaġiri ġetato tarimari, ġoġori-iaġomari, au ġoiragu ai ġoma vaġi-maseri!' ”

Iesu ġena rakatoġa Ierusalemaj ġevonevone-raġe viniato

Mataio 21:1-11; Mareko 11:1-11; Ioane 12:12-19

²⁸ Eguruġa-ġosito vau, Iesu eraka-guinetto, Ieruselema ġana evaraġeto.

²⁹ Betefage e Betania ekavinaġirito-ġoi nai, Olive Ġorona rekenai, benamo Iesu na ġena mero ruarua etuġu-guinerito, ekirarito, ekirato,

³⁰ "Ġoira vanuġana ġana ġoiago. Boġo raġasini nai, doniki natuna ta barutari boġo ġitaiiani, iatanai tarima ta roġosi bene raġe. Boġono ruġaia, benamo boġono ġori-iaġomaia.

³¹ Bema tarima ta na bedanaġimini, bekirani, 'Karase nai ġoruġaiiani?' betoni nai, ġomi boġono kira, 'Vereġauka na eura-viniani.' ”

³² Benamo tauri ruarua ġeiaġoto, Iesu na ekira-vararito ilailanai ġedoġariato.

³³ Doniki natuna ġeruġaiato-ġoi nuġanai, doniki biaguri na ġedanaġirito, "Ġomi tu karase mani doniki ġoruġaiiani?"

³⁴ Ġevaġa-veseto, ġekirato, "Vereġauka na eura-viniani."

³⁵ Benamo Iesu ġenai ġeġori-iaġoato. Ġeri dabuġa barari doniki doġenai ġeivarito vau, Iesu ġevaġa-tanu-kauato.

³⁶ Iesu eiaġoto-ġoi nai, tarimarima ġeri dabuġa barari dabarai ġeivarito.

³⁷ Ieruselema varau ekavinaġiato, Olive Ġorona na evariġoto-ġoi, benamo Iesu ġena mero ġutuma lelevaġi ġeikuto, Barau ġevonevone-raġe viniato, korana nuġa-farevaġi veiġari ġeġitarito nai.

³⁸ Ġekirato,

“Ĝera Vere baregona,
Vereĝauka aranai eiaĝomani Kinina,
sivaĝa-namoa!

Maino gubai bene barego ema vevaĝa-raĝe tu guba tuĝunai!”

³⁹ Benamo Farisea tarimari kota na tarimarima ĝutuma nuĝari na Iesu ĝekiraiato, ĝekirato, “Vevaĝa-riba taumu, ĝoi ĝemu mero nokira-ĝoiri!”

⁴⁰ Iesu na evaĝa-veserito, ekirato, “Au na akiramini, bema ĝia asi beĝe koĝoni nai, mai fore beĝe koĝoni.”

Iesu Ierusalemata ĝina eveito

⁴¹ Iesu vanuĝa barana Ierusalemata ĝana eraka-kavinaĝito, eĝitaiato, benamo taĝina eveito,

⁴² ekirato, “Toma ĝaro ai ĝemu maino korana boro ribaia bere namo! Senaĝi toma, ĝoi na asi oĝitaiani.

⁴³ Ĝarona beraĝasini nai, ĝebaru-vinimuni tarimari na tano beĝe ragaiani, beĝe kobe-ĝeĝeraĝimuni, asi ĝemu rakarosi dabarana.

⁴⁴ Benamo ĝoi ema nuĝamu ai ĝetanuni tarimari beĝe fuki-bubu-riĝomini tano ai; fore maki ta iatanai asi beĝe iaĝuiani, korana Barau ĝena vevaĝa-kava emariĝoto asi oribaiani nai.”

Iesu na Rubu Veaĝa eiarevaiato

Mataio 21:12-17; Mareko 11:15-19; Ioane 2:13-22

⁴⁵ Iesu Rubu Veaĝa nuĝanai eraka-toĝato, voivoi tarimari elai-rosirito,

⁴⁶ ekirarito, ekirato, “Buka Veaĝa nuĝanai tu maĝesi ekirani, ‘Ĝegu numa tu ĝuriĝuri numana beĝe kiraĝiani,’ senaĝi ĝomi na tu lema tarimari ĝeri gumu gabunai boĝo vaĝa-iaĝoa.”

⁴⁷ Iesu tu ĝaro mabarari ai Rubu Veaĝa nuĝanai evevaĝa-ribato-ĝoi. Rubu Veaĝa vereri baregori, e taravatu ĝevevaĝa-riba iaĝiato-ĝoi tarimari, ema Iuda vereri na ĝia beĝene vaĝia dabarana ĝevetauato-ĝoi.

⁴⁸ Senaĝi asi ĝeri dabara, korana tu tarimarima mabarari ĝeurato-ĝoi, Iesu ĝena guruĝa ta maki asi beĝene vei-ketoa.

20

Ierusalemata vereri na Iesu ĝena seĝuka korana ĝevedanaĝi-iaĝiato

¹ Ĝaro tai Iesu tu Rubu Veaĝa nuĝanai evevaĝa-ribato-ĝoi, Vari Namona tarimarima eĝobata-vinirito-ĝoi. Benamo Rubu Veaĝa vereri baregori, e taravatu ĝevevaĝa-riba iaĝiato-ĝoi tarimari, ema Iuda vereri Iesu ĝenai ĝeiaĝoto,

² ĝedanaĝiato, ĝekirato, “Kamara seĝukai ĝoi na mai dagara oveirini? Dei na mai seĝuka evinimuto?”

³ Iesu na evaĝa-veserito, ekirato, “Au na maki vedanaĝi ta avinimuni. Ĝokira-varagu,

⁴ Ioane ĝena babatise veĝana tu Barau ĝenana eiaĝomato, ba tarimarima ĝerina?”

⁵ Ĝia fakari ai ĝeverorito, ĝekirato, “Bema ĝita bita kirani, ‘Barau ĝenana,’ bita toni nai, ĝia bekirani, ‘Karase nai Ioane asi ĝovaĝa-moĝoniato?’ betoni.

⁶ Senaĝi bema ĝita bita kirani, ‘Tarimarima ĝerina,’ bita toni nai, tarimarima mabarari na fore na beĝe taki-maserani, korana ĝia ĝekirani, Ioane tu peroveta tarimana, ĝetoni.”

⁷ Iesu ĝevaĝa-veŝato, ĝekirato, “Ĝai asi ribama,” ĝetato.

⁸ Benamo Iesu na ĝia maki ekirarito, ekirato, “Au na maki kamara seĝukai mai dagara aveirini asi bakira-varamini.”

Barabore - Tavoḡa ḡitaḡauna tarimari rakavari

Mataio 21:33-46; Mareko 12:1-12

⁹ Benamo Iesu na tarimarima mai barabore ekira-vararito, ekirato, “Tarima ta vine tavoḡana evaroato vau, tavoḡa ḡitaḡauna tarimari ḡeri ai eraga-kwaneato. Benamo erakato gabu ta ḡana. Monai ḡaro ḡutuma ea tanuto.

¹⁰ Vine ḡwari (o grapes) ḡemaḡeto, benamo ḡia na ḡena vetuḡunaḡi tauna ta etuḡuato tavoḡa narinarina tarimari ḡeri ai, vine ḡwari kota benea ḡabi ḡana. Senaḡi tavoḡa ḡitaḡauna tarimari na ḡekwariato vau, ḡimana kori ḡetuḡu-ḡenoḡoiato.

¹¹ Benamo vetuḡunaḡi tauna ta ma etuḡuato, senaḡi ḡia maki ḡevaḡa-vevaḡiato, ḡevei-maiaka maiakaiato, ḡimana kori ḡetuḡu-ḡenoḡoiato.

¹² Vetuḡunaḡi tauna vaḡa-toitoina maki etuḡuato, senaḡi ḡevaḡa-vevaḡi rakavaiato, kefina maki ma fauri vau ḡelai-rosiato.

¹³ Benamo tavoḡa biaguna ekirato, ‘Au tu kara ma haveini? Au natugu, auravini-baregoani merona, na-tuḡua, atuḡamaḡini ḡia beḡe gubakauani!’

¹⁴ Senaḡi tavoḡa narinarina tarimari na ḡeḡitaiato nai, tauḡeri ḡeveguruḡa-vevinito, ḡekirato, ‘Mani tu tavoḡa biaguna natuna, be sivaḡia, benamo tavoḡa tu ḡita ḡera.’

¹⁵ Benamo tavoḡa murikanai ḡeinu-rosiato, ḡevaḡi-maseato.

Iesu evedanaḡito, ekirato, “Tavoḡa biaguna tu kara beveiani ḡia ḡeri ai?”

¹⁶ Ḣia beiaḡomani, tavoḡa ḡitaḡauna tarimari bevaḡi-ḡosirini, benamo tavoḡa tu tarima irauri ma bevinirini.” Tarimarima na mai guruḡa ḡeseḡaḡiato nai, ḡekirato, “Asiḡi, maiḡesi asi bene vetore!”

¹⁷ Iesu na eḡitarito, benamo edanaḡirito, ekirato, “Be, mai guruḡa Buka Veaḡa nuḡanai anina tu kara? Maiḡesi ekirato, ‘Fore numari ḡeragarini tarimari na asi ḡeura-viniato ma ḡefitoḡaiato forena tu duḡu forenai eiaḡoto.’

¹⁸ Deikara mo fore iatanai beketokauni tarimana beḡwa-kirakiraiani; ema mai fore tarima ta iatanai beketokauni nai, belau-fatafataiani.”

Kaisara, Roma ḡeri vere, ḡena takesi moniri

Mataio 22:15-22; Mareko 12:13-17

¹⁹ Taravatu ḡevevaḡa-riba iaḡiato-ḡoi tarimari e Rubu Veaḡa vereri baregori na Iesu inimoḡo beḡene ḡabia dabarana ḡevetauato-ḡoi, korana ḡia ribari, Iesu na mai barabore tu ḡia iatari ai ekiraḡirito-ḡoi nai. Senaḡi tarimarima ḡutuma vegogo-taḡo naima ḡegarito.

²⁰ Moḡa lorinai ḡeḡita-taḡoato moḡo. Gabivau ḡofaḡofa tarimari ḡetuḡurito, ḡia na beḡene danaḡia noḡa vei-iobukaiobuka tarimari kavana; beḡene danaḡia, bema Iesu ḡena guruḡa beiaḡo-irauni nai, Iesu beḡene ḡabia, Roma gavanana ḡimana seḡukanai beḡene torea.

²¹ Mo ḡofaḡofa tarimari na Iesu ḡedanaḡiato, ḡekirato, “Vevaḡa-riba taumu o, ḡai ribama, ḡemu guruḡa e ḡemu vevaḡa-riba tu maoromaoro. Tarimarima ḡeri dagi asi otuḡamaḡirini, senaḡi ḡoi na Barau ḡena dabara ovevaḡa-riba-iaḡi ḡitakauani ma moḡonimu ḡesi.

²² Nokirama, Kaisara, Roma ḡeri vere, takesi moniri bitana vinia tu namo ba asiḡi?”

²³ Iesu na ḡeri ḡofaḡofa varau eḡitaiato, benamo ekirarito, ekirato,

²⁴ “Silva monina ta ḡovaḡa-ḡitaḡu! Mai tu dei iouiouna e dei arana?” Ḣia ḡevaḡa-veseto, ḡekirato, “Mai tu Kaisara laulauna e arana,” ḡetato.

²⁵ Benamo Iesu na ekirarito, “Kaisara ġena, Kaisara boġono vinia, Barau ġena, Barau boġono vinia.”

²⁶ Iesu ġena guruġa tarimarima ġoirari ai tu maoro nai, asi ġeri dabara ġia beġe ġofa-darereani, senaġi ġena vevaġa-veve na nuġari ġefarevaġito, asi ma ġeguruġato.

Variġisi-ġenoġoi guruġari

Mataio 22:23-33; Mareko 12:18-27

²⁷ Sadukea tarimari kota Iesu ġenai ġeiaġoto. Ġeri tuġamaġi tu, mase tarimari asi ma beġe variġisi-ġenoġoini. Iesu ġedanġiato, ġekirato,

²⁸ “Vevaġa-riba taumu o, Mose na taravatu ġai ġema maiġesi etoreato, ‘Bema tau ta kakana bemaseni, ma vabuna tu roġo maġuri, senaġi asi naturi nai tu, mo tau na kakana vabuna bene ġaraġoa. Korana tu ġia na naturi tari beġene vaġa-maġuriri mo mase tauna ġena.’

²⁹ Tarikaka tau moġo korina mabarari tu imaima ruarua (7). Tau guinena na vavine ta eġaraġoato, ma emaseto, natuna ta asi evaġa-ġoraiato.

³⁰ Tau vaġa-ruaruana na vabu ma eġaraġoato,

³¹ tau vaġa-toitoina maki moġesina moġo. Moġa nuġanai ġia mabarari tu imaima ruarua (7), senaġi mabarari ġemaseto, naturi ta asi ġevaġa-ġoraiato.

³² Dokonai mo vavine maki emaseto.

³³ Variġisi-ġenoġoi ġaronai mo vavine tu dei ġaraġona, korana ġia tu tau imaima ruarua (7) na ġeġaraġoato nai?”

³⁴ Iesu na evaġa-veserito, ekirato, “Mai tanobarai tau e vavine ġeveġaraġoni,

³⁵ senaġi roġo beiaġomani Basileianai, vei-iobukaiobuka tarimari beġe variġisi-ġenoġoini. Ġia tu asi beġe veġaraġoni.

³⁶ Ġia asi beġe maseni maki, senaġi aneru kavana beġe tanuni. Barau natunai beġe iaġoni, korana ġia tu variġisi-ġenoġoi tarimari.

³⁷ Mose na evaġa-moġoniato, mase na ma beġe variġisi-ġenoġoini. Ġau eġaraiato-ġoi varina nuġanai, Mose na Vereġauka tu ‘Aberahamo ġena Barau, Isako ġena Barau, Iakobo ġena Barau’ ekiraġiato.

³⁸ Moġoni, ġia tu maġuri tarimari ġeri Barau, dia mase tarimari ġeri Barau. Korana Barau ġenai tu, tarimarima mabarari tu maġuri.”

³⁹ Taravatu ġevevaġa-riba iaġiato-ġoi tarimari kota ġekirato, “Vevaġa-riba taumu o, vevaġa-veve namona tu maniġa.”

⁴⁰ Benamo moġa murina na asi ma ġedanġi-ġenoġoiato, ġegarito nai.

Keriso tu Davida natuna ba Davida ġena Vereġauka?

Mataio 22:41-46; Mareko 12:35-37

⁴¹ Iesu na ekirarito, ekirato, “Ġia tu kamasi nai Keriso tu Davida natuna ġetoni?”

⁴² Davida tu Salamo nuġanai ekirato,

‘Barau na ġegu Vereġauka ekiraiato:

Au ġimagu aroribana rekenai bono tanu,

⁴³ bene iaġo mo, ġoi ġebaru-vinimuni tarimari ġoi kwakumu gaburenai batorerini.’

⁴⁴ Davida na Keriso tu ‘Vereġauka’ etato. Kamasi nai Keriso tu Davida natuna?”

Taravatu ġevevaġa-riba iaġiato-ġoi tarimari ġeri ġofaġofa

Mataio 23:1-36; Mareko 12:38-40; Luka 11:37-54

⁴⁵ Tarimarima mabarari ġoirari ai Iesu na ġena mero ekirarito, ekirato,

⁴⁶ “Taravatu ġevevaġa-riba iaġiani tarimari ġerina lorimi boġono vetore. Ġia ġeurani dabuġa maukari beġene riġo, maketi gaburi ai beġene rakao-rakao, tarimarima na beġene vaġa-namori urari ai. Rubu nuġari ai ema ġani-vegogo gaburi ai ġeri ura tanutanu namori ai beġene tanu.

⁴⁷ Ġia na vabu ġeri numa ma farefare ġevaġa-koririni. Ġeri ġauġau tu mauka kenene, senaġi ġeġofaġofani. Moġesi ġeveini tarimari meto barego vedaurea beġe ġabini.”

21

Vabu ġena boubou monina

¹ Iesu eboġe-vaesito nai, moni vovoka tarimari ġeri boubou moni mauġai ġeġurato-ġoi eġitarito.

² Asi-ġena ema asi-ġana vabuna ta eiaġomato, eġitaiato, ġena moni misiri ruarua moġo eġura-riġorito, (mai tu noġa moġo toea sebona kavana).

³ Benamo Iesu ekirato, “Moġoni, au na akiramini, mai vabu na beġuraia monina tu mabarari ġeri vini bevanaġiri.

⁴ Korana mabarari ġeri moni vovoka ġerina koturi moġo beġe vini, senaġi mai vabu tu ġena moni misina ġenana moġo, ġena maġuri ai bere vevaġa-kava-iaġiri dagarari mabarari beġurari.”

Iesu na vau beġea ġorani dagarari ekiraġirito Mataio 24:1-14; Mareko 13:1-13

⁵ Iesu ġena mero kota na Rubu Veaġa ġeguruġa-iaġiato, ġitaġitana ma marevana, ma ġena fore namori ġesi ema Barau ġevarevare-viniato varevare dagarari namori na ġevaġa-veraiato, ġetato. Senaġi Iesu ekirato,

⁶ “Ġarona beraġasini, mainai ġoġitarini dagarari mabarari tarima tari na beġe vare bubu-riġorini, fore ta fore ta iatanai asi beġe tanuni.”

⁷ Benamo Iesu ġedanaġiato, ġekirato, “Vevaġa-riba taumu, aitoma beġorani? Ema beġorani nai, kamara vetoġa na bevaġa-moġoniani?”

⁸ Iesu evaġa-veseto, ekirato, “Ġomi lorimi boġono vetore, beġe ġofamini ġesi. Korana tu tarimarima ġutuma au aragu ai beġe iaġomani, beġe kirani, ‘Tarimana tu au maiġegu!’ ema, ‘Ġarona beraġasi!’ beġe toni. Senaġi ġia muriri ai asi boġono raka.

⁹ Bema ġomi na vetari o tuari gururi e gururaġe boġo seġaġirini nai, nuġami asi beġene raġe. Mai dagara beġe ġora-guineni, senaġi dokona asi roġo beraġasini.”

¹⁰ Iesu ma ekirato, “Tanobara ta tanobara ta ġesi beġe vevaġini, gavamani ta gavamani ta ġesi beġe vetarini.

¹¹ Gabu ġutuma nuġari ai tano beġe iagaiagani, doġe beġe ġorani, ema tarimarima ġutuma keve beġe doġarini ta ġenana bevanaġini ta ġenai. Vevaġa-gari vetoġari baregori guba na beġe foforini.

¹² Senaġi mo dagara roġosi beġene ġora nai, ġia na ġomi beġe ġabimini, beġe vaġa-midigumini. Rubu ai beġe vaġa-kotamini, dibura numari ai beġe tore-toġamini. Kini e gavana ġoirari ai beġe ġori-iaġomini, korana au ġoġabi-raġeguni nai.

¹³ Mai tu ġomi ġemi nega namona au vaġa-moġonigu ai boġo iaġoni.

¹⁴ Boġono vetuġamaġi, ġemi vevaġa-vese guruġari asi boġono tuġamaġi-guine guineri,

¹⁵ korana tu au na guruġa e iaunega bavini mini, beġe baru-vini mini tarimari na beġe kira-ġoimini, senaġi asi beġe kokoreni.

16 Tamami, sinami, kakami, tarimi, garagarami, e ġatami na tarimarima ġimari ai beġe revamini. Ġomi kota maki beġe vaġi-masemini.

17 Tarimarima mabarari na beġe iau-rakavamini, korana au ġoġabi-raġeguni nai.

18 Senaġi debami ġuiri sebona maki asi berekwa-rekwani.

19 Boġo vevaġa-gwaġiġini nai tu, boġo maġurini.”

Ierusalem beġe vaġa-rakavaiani

Mataio 24:15-21; Mareko 13:14-19

20 “Vetari o tuari doġorori na Ierusalem beġe tanu-ġeġeraġiani boġo ġitaiani, benamo boġo ribani, Ierusalem dori ġevaġa-rakavaiani.

21 Mo negai Iudeai ġetanuni tarimari tu ġoro ġana beġene raga-iaġo. Vanuġa barana Ierusalem nuġanai ġetanuni tarimari tu, vanuġa beġene raga-kwanea, ema gunikai ġetanuni tarimari tu vanuġa barana nuġanai asi beġene raka-toġa.

22 Korana mo negai tu Barau na tarimarima ġeri rakava voiri bevinirini Buka Veaġai ġetore-guineato vaġa-moġoniri.

23 Vavine ma baniri e ġabi-variġu vavineri kika ma vetuġari! Midigu barego mai tano ai beġe raġasini, ema Barau na ġena bese tarimari bevaġa-maoro vinirini.

24 Tarima kota tu vetari baġari na beġe vaġi-maserini, kota tu beġe ġabi-maġuririni, tanobara mabarari ġana beġe ġori-iaġorini, beġea diburarini; ema irau bese tarimari na Ierusalem beġe fana-tariani, beiaġoni mo, ġeri ġaro bea korini.”

Tarimarima Natuna ġena iaġoma

Mataio 24:29-31; Mareko 13:24-27

25 “Ġaro, ġue, ema visiġu nuġari ai vetoġa beġe ġorani. Tanobara beseri davara ema ureure gururi ai beġe gari-rakavani.

26 Tarimarima beġe keto-founi gari dainai, ġeri tuġamaġi maki roġo beġe korini mo beġe ġorani dagarari dairi ai; korana tu guba seġukari beġe iagaiagani.

27 Mo negai Tarimarima Natuna beġe ġitaiani, magube nuġana na beiaġomani ma seġukana e ma mamana baregona ġesi.

28 Mo dagara beġe ġorani nai, boġono variġisi, boġono boġe-vaisi, korana vaġa-maġurimi tu varau bekavinaġi.”

Barabore - Vevaġa-riba figi ġauna ġenana

Mataio 24:32-35; Mareko 13:28-31

29 Iesu na ġeri barabore ta ekiraġiato, ekirato, “Figi ġauna ema ġau mabarari ġoġitari.

30 Lauri variġuri ġefafani ġoġitarini, ġomi ġoribani, ġaro ġena tora taimina varau bekavinaġi.

31 Moġa ilailanai, ġomi maki bema boġo ġitarini, mai dagara beġe ġorani nai, boġo ribani, Barau ġena Basileia tu bekavinaġi.

32 Moġoni akiramini, mai ġuru asi bekorini, beiaġoni mo, mai dagara mabarari beġe ġorani.

33 Guba e tanobara beġe rekwa-rekwani, senaġi au ġegu guruġa tu asi beġe rekwarekwani, beġe tanu-vanaġi vanaġini.”

Boġono venari

34 “Lorimi boġono vetore, ġaniġani e niuniu ġutuma, ema tanobara ġena tuġamaġi dagarari na ġomi nuġami beġe vaġa-metorini ġesi. Benamo mo ġaro na nuġami bevaġa-farevaġirini.

³⁵ Korana mo ġaro tu tanobarai ġetanuni tarimari mabarari ġeri ai beraġasini.

³⁶ Moġa lorinai boġono venari, boġono ġauġau ġaro mabarari ai, beġe ġorani dagarari mabarari ġerina boġono raga-maġuri ġana, korana Tarimarima Natuna ġoiranai roġo boġo ruġani.”

³⁷ Ġaro mabarari ai Iesu tu Rubu Veaġai evevaġa-ribato-ġoi, a lavilavi ai tu eraka-rosito-ġoi, Olive Ġorona tuġunai ea ġenato-ġoi.

³⁸ Boġiboġi iamoiamonai tarimarima mabarari Rubu Veaġai ġevegogoto-ġoi ġia ġena guruġa beġene seġaġia ġana.

22

Iesu beġene vaġia dabarana ġevetauato

¹ Asi etubuni faraona verekona arana Pasova varau ekavi-naġito. (Mo tu Iuda tarimari mase aneruna na evanaġirito moġo, asi evaġirito verekona).

² Rubu Veaġa vereri baregori ema taravatu ġevevaġa-riba iaġiato-ġoi tarimari na Iesu beġene ġabia, benamo beġene vaġi-ġairia dabarana ġevetauato, korana tarimarima ġariri ġeveito.

Iudas na Iesu erevaiato

Mataio 26:14-16; Mareko 14:10-11

³ Mo negai Satani na Iudas Isakariota, tarima ta gabanana ruarua (12) fakari ai, eboroġiato.

⁴ Benamo Iudas eiaġoto Rubu Veaġa vereri baregori ema Rubu Veaġa narinarina tarimari ġeri vere ġeri ai, Iesu tu ġia ġimari ai kamasi bene toreka-dabarana ġeboioġa-vegogoato.

⁵ Ġia ġeiyaku-rakavato, ġekira-toreato, moni beġe viniani, ġetato.

⁶ Iudas na eġabi-raġeato, benamo Iesu ġia ġimari ai vekuretoġai betorekauani dabarana evetauato-ġoi.

Ginitaġo mamoeni ġerovina-toreato

Mataio 26:17-25; Mareko 14:12-21

⁷ Ginitaġo mamoeni beġe vaġirini ġarona varau eraġasito.

⁸ Benamo Iesu na Petero ma Ioane etuġurito, ekirato, “Ġoiaġo, Pasova verekona boġono dabaraia, bitana ġania.”

⁹ Ġevaġa-veseto, ġekirato, “Ġai tu ainai baġana dabara-torea?”

¹⁰ Benamo Iesu na ekirarito, ekirato, “Vanuġa baregonai boġo raka-toġani nai, tarima ta nanu gwaġutuna befaġaiani boġo ġoitaġoani. Murina na boġono iaġo, ġia beraġekauani numanai boġono raġekau.”

¹¹ Benamo numa tarimana boġono vaġa-guruġaia, boġono kira, “Vevaġa-riba tauna ekirani, ‘Varivari daiġutuna tu aiġa, au ema ġegu mero ġesi monai ginitaġo mamoeni baġana ġania?’

¹² Benamo ġia na daiġutu baregona ta numa tuġunai bevaġa-ġitamini, ġeiyareva-toreato. Monai boġono dabara-torea.”

¹³ Benamo ġeiyato, Iesu na ekiraġirito kavana ġedoġaririto. Monai vereko ġedabaraiato.

Ġani-vegogo veaġana

Mataio 16:26-30; Mareko 14:22-26; 1 Korinto 11:23-25

¹⁴ Ginitaġo mamoeni beġe ġaniani aoana eraġasito. Iesu tu ġena apostolo tarimari ġesi ġaniġani gabunai ġetanu-tarito.

¹⁵ Benamo Iesu na evaġa-guruġarito, ekirato, “Au ġegu ura baregona mai ginitaġo mamoeni ġomi ġesi bitana ġani-vegogo-guinea vau, midigu bana ġani.”

¹⁶ Korana tu akiramini, ginitaḡo mamoeana asi ma baḡaniani, beiaḡoni mo, ginitaḡo anina korikorina bea foforini Barau ḡena Basileia nuḡanai.”

¹⁷ Benamo Iesu na kapusi ta eḡabiato, evaḡa-namoato, ekirato, “Maiḡa tu ḡoḡabia, mabarami boḡono niua.

¹⁸ Korana tu akiramini, vine nanuna asi ma baniau-ḡenoḡoiani, beiaḡoni mo, Barau ḡena Basileia beiaḡomani vau.”

¹⁹ Benamo Iesu na beredi eḡabiato, evaḡa-namoato, ebuki-ḡutuato, evinirito, ekirato, “Mai tu au tauḡanigu, ḡomi avinimini; maiḡa boḡono veia, au vetuḡamaḡi-iaḡigu ḡana.”

²⁰ Ḡeḡani-ḡosito vau, kapusi ma eḡabiato, ekirato, “Mai kapusi tu Ginitaḡo Variḡuna, au raragu na bevaḡa-moḡoniani, bevebubuni ḡomi vaḡa-maḡurimi ḡana.

²¹ Senaḡi au berevaguni tarimana tu mainai au ḡesi taḡani-vegogoni!

²² Moḡoni, Tarimarima Natuna bemaseni, Barau na ekiraḡi-guineato ilailanai, senaḡi berevaiani tarimana vetuḡana kekei!”

²³ Benamo tauḡeri ḡevedanaḡi-vedanaḡito, ḡia deikara na moḡesi beveiani.

Deikara tu barego vedaurea

Mataio 20:25-28; Mareko 10:42-45

²⁴ Benamo Iesu ḡena mero tauḡeri ḡeveḡare-veḡareto, deikara ḡia fakari ai barego lelevaḡi.

²⁵ Iesu na evaḡa-guruḡarito, ekirato, “Irau bese tarimari ḡeri vere na tarimarima ḡedori-naḡinaḡirini, ema veguine-iaḡi tarimari baregori na ḡeri maoro seḡukari na ḡelaunaḡi-naḡirini, ema tarimarima na beḡene vevato-iaḡiri ḡetoni.

²⁶ Senaḡi ḡomi tu dia moḡesina. Ḡomi fakami ai tau guinena tu tau muriseinai bene iaḡo, ema vere tauna tu vetuḡunaḡi taunai bene iaḡo.

²⁷ Dei tu barego, ḡaniḡani gabunai etanu-taḡoni tarimana ba vetuḡunaḡi tarimana? Ḡaniḡani gabunai etanu-taḡoni tarimana, ene? Senaḡi au tu ḡomi fakami ai vetuḡunaḡi tarimana noḡa.

²⁸ Ḡomi tu au ḡeribaḡaniguto-ḡoi nai, ḡotanu-gwaḡiḡito-ḡoi tarimami.

²⁹ Moḡa lorinai au Tamagu na maoro eviniguto, Basileia ta au ḡegu ekiraḡiato ilailanai, au maki Basileia ta ḡomi ḡemi akiraḡiani.

³⁰ Benamo ḡomi maki au ḡegu Basileiai bita ḡaniḡani-vegogoni e bita niuniu-vegogoni, ema ḡomi teronai o vere seari ai boḡo tanuni, Isaraela beseri gabanana ruarua (12) boḡo vaḡa-maoro vinirini.”

Iesu na Petero ḡena vekira-ḡuniḡau ekiraḡi-toreato

Mataio 26:31-35; Mareko 14:27-31; Ioane 13:36-38

³¹ “Simona, Simona o, noseḡaḡi! Au na akiramini, Barau na Satani maoro eviniato, ḡomi bene ribaḡanimi, namo e rakava bene tore-kirari ḡana, noḡa iaraḡa tarimana na widi ema momo etore-kirarini kavana.

³² Senaḡi au na ḡemu varau aḡuriḡurito, ḡemu veḡabidadama asi bene keto ḡana. Benamo ma bovetuḡamaḡi-ḡenoḡoini au ḡegu ai nai, tarikakamu bono vaḡa-kokoreri.”

³³ Petero evaḡa-veseto, ekirato, “Vereḡauka, au tu ḡoi ḡesi dibura numai beḡe torerani ema bita mase-vegogoni!”

³⁴ Iesu ekirato, “Petero, au na akiramuni, toma kokoroku asi begoḡini, beiaḡoni mo, ḡoi na au vaḡa-toitoi bokira-ḡuniḡauguni, bokirani, ‘Au tu asi ribagu ḡia,’ botoni.”

Nega rakavana

³⁵ Iesu na ġena mero evaġa-guruġarito, ekirato, “Au na ġomi atuġumito nai, asi ġemi fusefuse, dura, o tamaka. Ġomi dagara tai ġorabuto ba? Ġia ġevaġa-veseto, ġekirato, “Asiġina!”

³⁶ Iesu na ma evaġa-guruġarito, ekirato, “Senaġi toma ġomi deikara ma ġena fusefuse ema dura, bene ġabiri; ema deikara asi ġena vetari baġana, ġena koudi bene voivoi-iaġia, benamo ta ma bene voia.

³⁷ Korana au na akiramini, Buka Veaġa nuġanai ekirani, ‘Seġafore tarimari ġesi beġe iavi-vegogoani.’ Mo guruġa au ġegu ai bemoġonini.”

³⁸ Iesu ġena mero ġevaġa-veseto, ġekirato, “Noġitaia, Vereġauka, vetari baġari ruarua maiġeri.” Iesu evaġa-veseto, ekirato, “Benamo!”

Iesu eġuriġurito Getesemane ai

Mataio 26:36-46; Mareko 14:32-42

³⁹ Benamo Iesu tu vanuġa barana eraga-kwaneato, Olive Ġorona ġana eiaġoto eveito-ġoi kavana. Ġena mero ġia murinai ġerakato.

⁴⁰ Monai ġeraġasito, benamo Iesu na evaġa-guruġarito, ekirato, “Boġono ġauġau, be veribaġani ai asi boġono moira.”

⁴¹ Benamo ġereġana eraka-ġerevaġito, fore tafiurini ġea keto-tarini ġena manaġa ilailanai, benamo evetui-tarito, eġuriġurito.

⁴² Ekirato, “Tamagu o, bema nuġamu ilaila nai, mai midigu bedina au ġeguna noma ġabi-vaġia; senaġi dia au ġegu ura, ġoi ġemu ura moġo.”

[

⁴³ Benamo aneru ta guba na emariġoto, Iesu kokore eviniato.

⁴⁴ Midigu barana na ġia nuġana evaġa-vonuato, benamo eġauġauto ma nuġana mabarana ġesi, eiaġoto mo, seġurina tano ai eriġoto rara kabudona noġa.]

⁴⁵ Eġauġau-ġosito vau, evariġisito, ġena mero ġeri ai eġenoġoi-iaġoto, ġenari ai eġoitaġorito, dabarari ġedokoto nai.

⁴⁶ Benamo ġia na evaġa-guruġarito, ekirato, “Karase nai ġomi ġogenani? Ġovariġisi, ġoġuriġuri, be veribaġani ai asi boġono moira.”

Iesu tuari tarimari na ġeġabi-tariato

Mataio 26:47-56; Mareko 14:43-50; Ioane 18:3-11

⁴⁷ Iesu roġo mo eguruġato-ġoi nuġanai, tarimarima ġutuma ġeraġasito, Iudas, mero ta gabanana ruarua (12) fakari ai, ġia na eġori-kaurito. Iesu eiaġo-viniato bene veraua ġana.

⁴⁸ Senaġi Iesu na ekiraiato, ekirato, “Iudas o, Tarimarima Natuna verau na borevaiani ba?”

⁴⁹ Iesu sevinai ġeruġa-taġoto merori na ġeġitaiato kara beġorani, benamo ġedanaġiato, ġekirato, “Vetari baġana na baġana basiri ba?”

⁵⁰ Benamo ġia ta na Rubu Veaġa verena baregona ġena vetuġunaġi tarimana vetari baġana na eiaġo-viniato, benamo seġana aroribana ebasi-vaġiato.

⁵¹ Senaġi Iesu ekirato, “Benamo, ġovaġa-dokoa!” Mo tarima seġana eġabi-karaiato, evaġa-namoato.

⁵² Benamo Iesu ġabiġabina ġeiaġomato tarimari, Rubu Veaġa vereri baregori e Rubu Veaġa ġitaġauna tarimari ġeri baregona ema Iuda vereri ġia na evaġa-guruġarito, ekirato, “Ġomi boġo iaġoma ma ġemi vetari baġari e ma ġemi fato ġesi, noġa moġo seġafore tarimana ta ġabiġabina ġoro iaġoma kavana?”

⁵³ Ĝaro mabarari ai au tu ĝomi sevimi ai Rubu Veaĝa nuĝanai, senaĝi asi ĝoĝabi-tariguto. Mai tu ĝomi ĝemi nega, mukuna (o Satani) ĝena seĝuka negana.”

Petero na Iesu ekira-ĝuniĝauato

Mataio 26:57-58; 26:69-75; Mareko 14:53-54; 14:66-72; Ioane 18:12-18; 18:25-27

⁵⁴ Benamo ĝia na Iesu ĝeĝabi-tariato, Rubu Veaĝa verena baregona ĝena numa ĝana ĝeĝori-iaĝoato. Petero maki ĝia murinai erakato, senaĝi ma fakana.

⁵⁵ Numa maĝuna nuĝanai tarima kota na karava ĝevaĝa-ĝaraiato, benamo ĝetanu-ĝeĝeraĝiato. Petero maki ĝia seviri ai etanu-tarito.

⁵⁶ Benamo vetuĝunaĝi ĝuiatona ta na karava mamanai eĝitaiato, eĝita-karakaraiato, ekirarito, ekirato, “Mai tarima maki Iesu ekavaiato-ĝoi!”

⁵⁷ Senaĝi ĝia evekira-ĝuniĝauto, ekirato, “Ĝoi vavine, au tu asi ribagu ĝia!”

⁵⁸ Nega kotuna evanaĝito nuĝanai, tarima ta na Petero eĝitaiato, ekiraiato, “Ĝoi maki ĝia karori ta!” Senaĝi Petero evaĝa-veseto, ekirato, “Ĝoi tau, au tu asigi!”

⁵⁹ Aoa ta evanaĝito vau, tarima ta ma eguruĝato ma nuĝana mabarana ĝesi, ekirato, “Moĝoni, ĝia maki Iesu ĝesi tarimana ta, korana ĝia maki Galilea tauna!”

⁶⁰ Senaĝi Petero evaĝa-veseto, ekirato, “Ĝoi tau, au asi ribagu ĝoi kara okiraĝiani!” Ĝia roĝo mo eguruĝato-ĝoi nuĝanai, kokoroku egoĝito.

⁶¹ Benamo Vereĝauka eruĝa-kureto, ĝia na Petero eĝitaiato nai, Vereĝauka ĝena guruĝa etuĝamaĝi-doĝariato, ekiraiato, “Toma kokoroku asi begoĝini, beiaĝoni mo, ĝoi na au vaĝa-toitoi bokira-ĝuniĝauguni.”

⁶² Benamo Petero eraka-rosito, etaĝi-rakava rakavato.

Iesu ĝevaseva-vaseva iaĝiato

Mataio 26:67-68; Mareko 14:65

⁶³ Iesu ĝenariĝauato tarimari na ĝevaseva vaseva-iaĝiato e ĝekwariato.

⁶⁴ Matana ĝekumu-ĝauato, ĝekiraiato, ĝekirato, “Ĝoi tu peroveta tarimana, be nokiraĝia, dei na bekwarimu?”

⁶⁵ Guruĝa rakavari ĝutuma ĝia ĝeviniato.

Iesu kanisoro tarimari ĝoirari ai

Mataio 26:59-66; Mareko 14:55-64; Ioane 18:19-24

⁶⁶ Elaĝanito, Iuda vereri, e Rubu Veaĝa vereri baregori, ema taravatu ĝevevaĝa-riba iaĝiato-ĝoi tarimari ĝeraka-vegogoto. Iesu ĝeĝori-iaĝoato Iuda kanisoro tarimari ĝoirari ai.

⁶⁷ Benamo ĝekiraiato, ĝekirato, “Nokira-varama, ĝoi tu Keriso, (Barau na ekiraĝi-toreato vevaĝa-maĝuri tauna), ba?” Iesu na evaĝa-veserito, ekirato, “Bema au na bakiramini, ĝomi na asi boĝo vaĝa-moĝoniguni,

⁶⁸ ema bema vedanaĝi ta bavininini, asi boĝo vaĝa-veseguni.

⁶⁹ Senaĝi toma beiaĝoni mo ĝoira laĝaniri ai, Tarimarima Natuna tu Seĝuka Barauna ĝimana aroribanai betanu-taĝoni.”

⁷⁰ Benamo mabarari ĝekirato, “Be, ĝoi tu Barau Natuna otoni?” Ĝia evaĝa-veseto, ekirato, “Ĝomi na ĝokiraĝiani maniĝa.”

⁷¹ Ĝia ĝekirato, “Karase vevaĝa-moĝoni tarimari tari roĝo tavetaurini? Ĝia tauĝena muruna na bekiraĝia bita seĝaĝia.”

23

Iesu Pilato ġoiranai

Mareko 15:1-5; Ioane 18:28-38

¹ Benamo vegogo tarimari mabarari ġevariġisito, Iesu ġeġori-iaġoato gavana Pilato ġenai.

² Monai ġeġofaġofa-iaġiato, ġekirato, “Mai tarima maiġa baġa doġaria, ġai ġema bese tarimari eġorikau-kerererini, ekirani, Kaisara, Roma ġeri vere, ġena takesi moniri asi beġene vinya etoni, ema tauġena evekiraiġini, ġia tu Keriso, Barau na ekiraiġi-toreato verena o kinina.”

³ Benamo Pilato na edanaġiato, ekirato, “Ġoi tu Iuda tarimari ġeri vere ba?” Iesu evaġa-veseto, ekirato, “Oi, okiraiġiani maniġa.”

⁴ Benamo Pilato na Rubu Veaġa vereri baregori e tarimarima ġutuma ekirarito, ekirato, “Kerere ta asi badoġaria mai tarima ġenai.”

⁵ Senaġi mo tarimarima roġo ġeġiġiraġeto, ġekirato, “Ġia ġena vevaġa-riba guruġari na Iudea tarimari mabarari nuġari evei-veġonurini. Galileai esinaġiato mo beiaġoma mai gabu ai.”

Iesu Heroda ġoiranai

⁶ Mo guruġa eseġaġiato nai, Pilato evedanaġito, ekirato, “Mai tarima tu Galilea tarimana ba?”

⁷ Benamo Pilato eribato, Iesu tu Heroda ġena seġuka gaburenai nai, Iesu Heroda ġenai ġetuġu-iaġoato. Ġia maki Ierusalem ai mo ġaro ai.

⁸ Heroda eiaku-rakavato Iesu eġitaiato nai, korana Heroda na Iesu varina eseġaġiato, ema kai-veġata evaġa-nogato Iesu bene ġitaia ġana. Ġia eurato Iesu na nuġa-farevaġi veġari kota bene veiri bene ġitari.

⁹ Moġa lorinai vedanaġi ġutuma Iesu edanaġiato, senaġi ġia asi evaġa-veseto.

¹⁰ Rubu Veaġa vereri baregori ema taravatu ġevevaġa-riba iaġiato-ġoi tarimari monai ġeruġa-taġoto-ġoi, Iesu ġeġofaġofa-iaġi lelevaġiato-ġoi.

¹¹ Heroda ema ġena vetari tarimari o soldia na Iesu ġerikiriki-iaġiato-ġoi, ġevei-veġare veġareato, ema dabuġa namona ta ġevaġa-dabuġa-iaġiato, benamo ma ġetuġu-ġenoġoiato Pilato ġenai.

¹² Pilato ema Heroda ġevebaru-vevinito-ġoi, senaġi mo ġaro ai ġeveġata-ġenoġoito.

Iesu vaġa-ruaruana Pilato ġoiranai

Mataio 27:15-26; Mareko 15:6-15; Ioane 18:38-19:16

¹³ Pilato na Rubu Veaġa vereri baregori, e Iuda vereri, ema tarimarima mabarari ekea-vegorito,

¹⁴ ekirarito, ekirato, “Ġomi na mai tarima boġo ġori-iaġomaia au ġegu ai, ġokirani, ġia na tarimarima eġorikau-kerererini ġotoni. Toma au na ġomi ġoirami ai ġemi guruġa bavetauri, senaġi kerere ta asi badoġaria.

¹⁵ Heroda maki kerere ta asi edoġariato ġia ġenai nai, ma betuġu-ġenoġoi iaġomaia ġita ġerai. Ġomi na ġoġitaiani, ġia tu rakava ta asi eveiato bene mase ġana.

¹⁶ Moġa lorinai au na mai akwariani vau baruġaiani.” [

¹⁷ Vanaġivanaġi eveini kavana Pilato na Pasova verekona ġaronai dibura numai etanuni tarimana ta beruġaiani.]

¹⁸ Senaġi tarimarima mabarari ġekoġo-vegogoto, ġekirato, “Bono vaġia! Barabas noruġaia, novinima!”

¹⁹ Barabas tu dibura numai ġekou-ġauato, korana vanuġa barana nuġanai ġevevaġito ema tarima ta ġevaġi-maseato nai.

20 Pilato enuĝa-vekwaragito Iesu bene ruĝaia, moĝa lorinai tarimarima ma evaĝa-guruĝa ĝenoĝoirito,

21 senaĝi ĝia ma ĝekoĝo-ĝenoĝoi ĝenoĝoito-ĝoi, ĝekirato, “Novaĝa-satauroa, novaĝa-satauroa!”

22 Nega vaĝa-toitoina evaĝa-guruĝarito, ekirato, “Karase nai, kamara rakava mai tarima na eveiato? Au na rakava ta asi aĝoitaĝoani eveiato bene mase ĝana. Moĝa lorinai au na mai akwariani vau baruĝaiani.”

23 Senaĝi ĝia ĝekoĝoto ma nuĝari mabarari ĝesi, ĝekirato, novaĝa-satauroa; benamo dokonai ĝia ĝeri ura ekwalimuto.

24 Benamo Pilato na ĝia ĝeri ura eĝabi-raĝeato.

25 Mo vevaĝi ema vaĝivaĝi dainai dibura numanai etanuto tarimana, eruĝa-fitoĝaiato ĝeri noĝinoĝi ilailanai, a Iesu tu evinirito ĝeri ura veĝana beĝene veia.

Iesu ĝevaĝa-satauroato

Mataio 27:32-44; Mareko 15:21-32; Ioane 19:17-27

26 Vetari tarimari na Iesu ĝeĝori-rosiato, benamo ĝeĝori-iaĝoato-ĝoi nai, tarima ta ĝesi ĝevedoĝarito, Simona, Kurene tarimana, ĝia tu gunika na ema raka-rosito vanuĝa barana ĝana eiaĝoto-ĝoi nai, tuari tarimari na ĝeĝabi-tariato, satauro ĝia faĝanai ĝetore-kauato. Ĝia na satauro efaĝaiato, benamo Iesu murina na eiaĝoto-ĝoi.

27 Tarimarima ĝutuma tu Iesu murinai ĝerakato. Ĝia vefakari ai tari tu vavine, ĝia tu Iesu taĝina ĝeveito-ĝoi ema ĝetaĝi-guruĝa guruĝato-ĝoi.

28 Benamo Iesu eruĝa-kureto, evaĝa-guruĝarito, ekirato, “Ierusalemavavinemi! Au taĝigu asi ĝotaĝi, senaĝi tauĝemi taĝimi ema natumi taĝiri ĝovei.

29 Korana ĝaro rakavari beĝe iaĝomani, tarimarima maiĝesi beĝe kirani, ‘Sinaĝe gabani vavineri ema ratari asi ĝerururini vavineri beĝene iaku!’

30 Benamo ĝoro baregori beĝe vaĝa-guruĝarini, beĝe kirani, ‘Ĝai iatamai ĝoketokau!’ ema ĝoro keiri beĝe kirarini, ‘Ĝai ĝolautarima!’

31 Bema au, ĝau maĝurigu, na maiĝesi beĝe veiguni nai tu, ĝomi, ĝau matuĝumi, kamasi beĝe veimini?”

32 Seĝafore tarimari ruarua maki Iesu ĝesi ĝeĝori-rosirito ĝia ĝesi beĝene vaĝa-sataurori ĝana.

33 Gabu ta arana “Deba Ĝavana” ai ĝeraĝasito. Monai seĝafore tarimari ĝesi ĝevaĝa-satauroato, ta aroribana rekenai, ma ta kaurina rekenai.

34 Iesu ekirato, “Tamagu o, ĝeri rakava bono tuĝamaĝi-fitoĝari, korana kara ĝeveiani ĝia asi ribari.” Benamo laki ĝerena ta ĝeveiato vau, ĝena dabuĝa ĝevarerito.

35 Tarimarima ĝeruĝa-tarito, ĝe-marereto-ĝoi, ema Iuda tarima baregori na ĝerikiriki-iaĝiato-ĝoi, ĝekirato, “Ĝia na tarima tari evaĝa-maĝuririto, a ĝia tauĝena tu asi bevevaĝa-maĝurini bema ĝia Keriso, Barau na eĝabi-viriĝiato vevaĝa-maĝuri tauna.”

36 Vetari tarimari na maki ĝevaseva-vaseva-iaĝiato, ĝia ĝenai ĝeiaĝoto, vine nanuna mamakina ĝeduĝi-viniato,

37 benamo ĝekirato, “Bema ĝoi Iuda tarimari ĝeri vere otoni, ĝoi tauĝemu novevaĝa-maĝuri.”

38 Toretore ta maki ĝia iatanai ĝetoreato, ekirato: “MAI TU IUDA TARI-MARI ĜERI VERE.”

³⁹ Seġafore tarimana ta, ġia ġesi ġevaġa-satauro vegogoato tarimana, na evaneato, ekirato, “Ġoi tu dia Keriso, (Barau na ekiraġi-toreato vevaġa-maġuri tauna)? Ġoi tauġemu novevaġa-maġuri, ġai maki novaġa-maġurima!”

⁴⁰ Ġia karonna na ekira-ġoiato, ekirato, “Ġoi Barau garina asi ogarini? Ġoi maki bomaseni ġia ilailanai.

⁴¹ Dagara sebona, ġita taura ruarua tamaseni ġera rakava voiri dainai, senaġi mai tarima tu asi ġena vei-rakava.”

⁴² Benamo ġia na Iesu enoġiato, ekirato, “Iesu, ġemu Basileia boġabiani nai, au maki bono tuġamaġigu.”

⁴³ Iesu na evaġa-veseato, ekirato, “Moġoni akiramuni, toma ġaro ai ġoi tu au ġesi paradaiso ai.”

Iesu ġena mase

Mataio 27:45-56; Mareko 15:33-41; Ioane 19:28-30

⁴⁴ Ġaroġota, horaġauna 12 koloko varau eġabiato, ġaro ġena seġuka eko-rito, tanobara mabarana mukuna na eġabi-ġauato, eiaġoto mo, horaġauna 3 koloko.

⁴⁵ Benamo Rubu Veaġa nuġanai veaġa lelevaġi daiġutuna kouġauna dabuġana o ketin evedare-kikimato.

⁴⁶ Iesu ekoġoto, ekirato, “Tamagu o, iaukagu tu ġoi ġimamu ai atoreani!” Eguruġa-ġosito vau emaseto.

⁴⁷ Vetari verena na mo veiaġa eġitaiato, benamo Barau evaġa-raġeato, ekirato, “Moġoni veġata, mai tarima tu vei-iobukaiobuka tarimana!”

⁴⁸ Marere tarimari ġutuma na mo veiaġa eġorato dagarana ġeġitaiato, benamo kobari ġeifarito, ġevetuġamaġi-rakavato, ġeri numa ġana ġeġenoġoito.

⁴⁹ Senaġi Iesu ġeribaiato tarimari mabarari, Galilea na ġia murina na ġeiaġomato vavineri maki, manaġai ġeruġato, ġeġorato dagarari ġeġitarito.

Iesu ġeguriato

Mataio 27:57-61; Mareko 15:42-47; Ioane 19:38-42

⁵⁰⁻⁵¹ Tarima ta arana Iosefa etanuto-ġoi Iudea vanuġana Arimatea nuġanai. Ġia tu varina namo tarimana ta, Barau ġena Basileia evaġa-nogaiato-ġoi. Ġia maki Iuda kanisoro tarimana, senaġi ġevekira-toreto veiaġana asi eġabi-raġeato.

⁵² Benamo Pilato ġenai eiaġoto, Iesu tauġanina bene ġabi-riġoa etato.

⁵³ Moġa murinai Iesu tauġanina eġabi-riġoato, dabuġa kurokurona namona na ekumuato, gara gabuna fore ġebasiato kouġanai etore-toġaiato. Mo gara tu variġuna, nuġanai mase ta roġosi beġere torea.

⁵⁴ Mo veiaġa tu Fraidei lavilavi ai eġorato, Sabadi ġana ġevei-toreato-ġoi ġarona, Sabadi dori eraġasito nai.

⁵⁵ Galilea na Iesu ġesi ġeiaġomato vavineri, Iosefa murina na ġeiaġoto, gara kouġana ema Iesu tauġanina aiġesi etore-toġaiato ġeġitaiato.

⁵⁶ Benamo ġeġenoġoito Ierusalemata sitina ġana, muramura ma bonari ema daudau muramurari ġeġabi-torerito.

Sabadi ai ġeiaġaraġito taravatu ekirani lorinai.

24

Iesu evariġisi-ġenoġoito

Ioane 20:1-10

¹ Fura ġarona giniguenai o Sandei ai, vavine tu boġiboġi iamoiamonai gara ġana ġeiaġoto, muramura bonari namori ġerovina-torerito dagarari ġeġwa-iaġorito.

2 Gara kouḡana forena tu kure-veḡita, irau ai vetore ḡeḡitaiato.

3 Gara kouḡana na ḡeraka-toḡato, senaḡi Iesu Vereḡauka tauḡanina tu asi ḡedoḡariato.

4 Ġia roḡo mo ḡedaradarato-ḡoi nuḡanai, tau ruarua ḡia seviri ai ḡeruḡa-tarito, ḡeri dabuḡa tu kuro-ḡaroḡarori.

5 Vavine tu ḡegari-rakavato, tano ai ḡetutuḡu-tarito, benamo mo tarima na ḡevaḡa-guruḡarito, ḡekirato, “Karase nai maḡuri tarimana mase gabunai ḡovetauani?”

6 Ġia tu dia mainai; mase na ma bevariḡisi-ḡenoḡoi. Galileai etanuto-ḡoi nai, evaḡa-guruḡamito guruḡana boḡono tuḡamaḡia,

7 ekirato, “Tarimarima Natuna tu rakava tarimari ḡeri ai beḡe revaiani, beḡe vaḡa-satauroani, ḡaro vaḡa-toitoinai vau ma bevariḡisi-ḡenoḡoini.’ ”

8 Benamo vavine na mo guruḡa ḡetuḡamaḡi-doḡariato.

9 Gara ḡeraga-kwaneato, ḡeḡenoḡoito, mo dagara eḡorato dagarana varina mabarana Iesu ḡena mero gabanana sebona (11) ma karori ḡesi ḡekira-vararito.

10 Vavineri tu maiḡeri: Maria, Magadala vavinena, e Ioana, e Maria, Iakobo (o Iames) sinana, ema karori tari maki. Ġia na mai vari Iesu ḡena apostolo tarimari ḡeri ḡekiraḡito.

11 Senaḡi vavine ḡeri guruḡa asi ḡevaḡa-moḡonirito, korana apostolo ḡetuḡamaḡito, ḡia noḡa ḡeguruḡa-babobaboto-ḡoi.

12 Senaḡi Petero tu evariḡisito, eraga-iaḡoto, gara kouḡanai ea boḡe-toḡato, senaḡi Iesu ḡekumuato dabuḡari moḡo eḡitarito. Benamo numa ḡana eḡenoḡoi-iaḡoto nuḡanai, ḡeḡorato dagarari etuḡamaḡirito nai, eḡabarakavato.

Iesu Emausa dabaranai efoforito

Mareko 16:12-13

13 Mo ḡaro sebonai Iesu ḡena mero ruarua tu Emausa vanuḡana ḡana ḡeiaḡoto; mo gabu ḡena manaḡa Ierusalemna na tu 11 kilomita kavana.

14 Ġerakato-ḡoi nuḡanai, ḡeḡorato dagarari ḡeguruḡa-guruḡa iaḡirito-ḡoi.

15 Ġeri raka guruḡa-guruḡai Iesu maki eraka-kavi-iaḡoto, ḡia ḡesi ḡeraka-iaḡoto-ḡoi.

16 Senaḡi tauri ruarua asi ḡeribato ḡia tu dei.

17 Iesu na edanaḡirito, ekirato, “Ġomi tu kara mai dabarai ḡoraka-guruḡa guruḡa-iaḡiani?” Benamo tauri ruarua ḡeruḡa-tarito, ḡeboḡe-vetuḡato.

18 Benamo ḡia ta, arana Kleopa, na evaḡa-veḡeato, ekirato, “Ierusalemna ḡana ḡeiaḡomato tarimari fakari ai betaḡu ḡoi moḡo ḡereḡamu mainai beḡe ḡora dagarari asi ribamu?”

19 Iesu evedanaḡito, ekirato, “Kamara dagara?” Ġia ḡevaḡa-veseto, ḡekirato, “Iesu, Nasareta tarimana, ḡenai ḡeḡorato dagarari. Ġia tu peroveta tarimana, Barau ḡoiranai e tarimarima mabarari ḡoirari ai ḡena veiḡa ema ḡena guruḡa maki ma seḡukari.

20 Gita ḡera Rubu Veḡa vereri baregori ema ḡera veḡorikau tarimari na ḡerevaiato bene mase ḡana, ḡevaḡa-satauroato.

21 Senaḡi ḡai ḡatuḡamaḡito, ḡia na Isaraela tarimari bevaḡa-maḡuririni.

Mai dagara eḡorato beiaḡoma toma tu varau ḡaro toitoi beḡe iaḡo.

22 Moḡa iatanai, ḡema vavine tari na ḡai nuḡama beḡe vaḡa-farevaḡiri. Ġia tu boḡiboḡi iamoiamonai gara ḡana beḡe iaḡo.

²³ Senaġi tauġanina asi beġe doġaria. Benamo beġe ġenoġoi-iaġoma, beġe kira tu, aneru beġe ġitari, mo aneru na beġe kirari, ‘Ġia tu varau bemaġuri-ġenoġoi,’ beġesi.

²⁴ Ġai karoma tari maki gara ġana beġe iaġo, vavine na beġe kiraġia kavana beġe doġaria, senaġi Iesu asi beġe ġitaia.”

²⁵ Benamo Iesu na ekirarito, ekirato, “Ġomi tu babo, peroveta tarimari ġeri guruġa vaġa-moġoniri ai maki kwaibo rakava!

²⁶ Keriso tu moġesi bene midigu-midigu murinai vau, mareva namonai bene raka-toġa, ene?”

²⁷ Benamo ġia varina Mose e peroveta tarimari ġeri bukai ema Buka Veaġa mabarana maki ġetorerito guruġari aniri evaġa-ribarito.

²⁸ Ġeiaġo-viniato-ġoi vanuġana Emausa ġekavinaġiato, benamo ġia tu bene raka-vanaġi etato.

²⁹ Senaġi ġekira-ġoiato, ġekirato, “Ġai ġesi notanu, korana belavilavi ema ġaro maki mai emukunani bene.” Benamo ġia ġesi ġeraka-toġato, ġetanuto.

³⁰ Ġaniġani gabunai ġetanu-taġoto-ġoi nai, Iesu na beredi eġabiato, evaġa-namoato, edudu-ġutuato, tauri ruarua evinirito.

³¹ Benamo matari ġevekeoto, ġeribato mo tu ġia. Senaġi ġia tu ġoirari ai erekwa-rekwato.

³² Benamo tauri ruarua ġeveguruġa-vevinito, ġekirato, “Dabarai evaġa-guruġarani-ġoi nai, ema Buka Veaġai ġetorerito guruġari aniri ġera ekiraġi-maġatarini-ġoi nai, ġita nuġara tu ġeseġuseġuni-ġoi, noġa moġo karava na ġeġararini-ġoi, ene?”

³³ Benamo maoromaoro ġevariġisito, Ierusalem ma ġeġenoġoi-iaġoto, Iesu ġena mero gabanana sebna (11) ma karori ġesi vegogo-taġori ai ġedoġaririto.

³⁴ Ġia na tauri ruarua ġevaġa-guruġarito, ġekirato, “Moġoni veġata, Vereġauka tu bevariġisi-ġenoġoi ema Simona ġenai maki efoforito.”

³⁵ Benamo tauri ruarua na dabarai eġorato dagarana ema kamasi Iesu na beredi edudu-ġutuato vauro, Iesu ġia na ġeġita-leaiato ġeri ġekiraġito.

Iesu tu ġena mero ġeri ai efoforito

Mataio 28:16-20; Mareko 16:14-18; Ioane 20:19-23

³⁶ Mo tarima ruarua roġo ġeguruġato-ġoi nuġanai, Vereġauka ġia fakari ai eruġa-rosito, benamo ekirarito, ekirato, “Maino ġemi ai bene tanu.”

³⁷ Ġia tu nuġari maki ġefarevaġi-rakavato ema ġegarito, ġia mataboru ġekirato, murava ta ġeġitaiato.

³⁸ Senaġi ġia ekirato, “Karase nai nuġami beġe vekwaraġi-rakava? Kara dainai ġodaradarani?”

³⁹ Ġimagu ema kwakugu ġoma ġitari, benamo boġono riba mai tu au. Ġoma ġabi-karagu, benamo boġono riba, korana murava tu asi viriġona ema asi turiġana, ġoġitaguni au tu ma viriġogu e ma turiġagu.”

⁴⁰ Moġesi ekirato, benamo ġimana ema kwakuna evaġa-ġitarito.

⁴¹ Senaġi ġia tu roġo ġedaradarato-ġoi ġeri iaku ema ġeri nuġa-farevaġi dainai; benamo Iesu na edanaġirito, ekirato, “Ġaniġani tari maniġeri ba?”

⁴² Ġia na maġani-kone gabugabuna ta ġeviniato.

⁴³ Benamo Iesu na eġabiato, ġoirari ai eġaniato.

⁴⁴ Benamo evaġa-guruġarito, ekirato, “Au tu roġo ġomi ġesi tatanu-vegogoto-ġoi nai, akiramito-ġoi: Mose ġena taravatu e peroveta tarimari ġeri guruġa ema Salamo ai au varigu ġetorerito guruġari mabarari beġe moġonini.”

⁴⁵ Benamo Iesu na nuḡari ekeorito, Buka Veāḡa guruḡari aniri beḡene tuḡamaḡi-fakari ḡana.

⁴⁶ Ma ekirarito, ekirato, “Maḡesi ḡetoreato: Keriso tu moḡesi roḡo bemidigu-midiguni, ema ḡaro vaḡa-toitoinai mase na ma bevariḡisi-ḡenoḡoini.

⁴⁷ Ema ḡia aranai vetuḡamaḡi-kure ema rakava tuḡamaḡi-fitoḡari beḡene ḡobata-iaḡi-rovorovori tanobara mabarari ai, Ierusalema na bene ve-matama.

⁴⁸ Mai dagara vaḡa-moḡoniri tarimami tu ḡomi.

⁴⁹ Au tauḡegu na tu Tamagu na ekiraḡi-toreato Iaukana batuḡuani, iatami ai befoforini. Ḣomi tu Ierusalemai boḡono tanu, bene iaḡo mo, guba na bemaḡiḡoni seḡukana boḡo ḡabiani.”

Iesu Barau na eḡabi-varaḡeato guba ḡana

Mareko 16:19-20; Apostolo 1:9-12

⁵⁰ Moḡa murinai Iesu na Ierusalema na eḡori-rosirito, ḡeiaḡoto mo, Betania ḡana, benamo ḡimana eḡabi-vaisirito, evaḡa-namorito.

⁵¹ Evaḡa-namorito-ḡoi nuḡanai, Iesu tu ḡia ḡerina eveḡitato, Barau na eḡabi-varaḡeato guba ḡana.

⁵² Ḣia na ḡetoma-rakariḡo viniato murinai, ma iakuri e ma verereri ḡesi Ierusalema ḡana ma ḡeḡenoḡoi-iaḡoto.

⁵³ Benamo Rubu Veāḡai ḡetanuto-ḡoi, Barau ḡevaḡa-raḡeato-ḡoi.

VARI NAMONA IOANE NA ETOREATO

Ioane vaġa-foforina guruġari

Ioane tu Iesu ġena apostolo tarimari gabanana ruarua (12) nuġari ai tarimana ta. Ġia tamana tu Sebedaio, ma ġia tu kone ai maina tarimari.

Ioane ġena mai Vari Namona tu laġani 85 beiaġo 95 fakari ai ta etoreato, mo tu Iesu emaseto murinai. Ġia na mai Vari Namona tu tanobara tarimari mabarari, ġemaġuri-ġenoġoito ema asi ġemaġuri-ġenoġoito, ġeri etoreato.

Ġia ġena ura baregona tanobara tarimari mabarari bene vaġa-ribari, Iesu Nasareta tarimana tu moġoni Barau Natuna, e Iesu tu moġoni Barau na tanobara ġana etuġu-mariġoato, tanobara tarimari ġia ġenana maġuri beġene ġabia uranai, ema Barau vetoġana korikorina tu ġia ġenana ema vevaġa-foforiato tarimarima ġeri ai. Siri baregona Ioane ġena Vari Namona bukana nuġanai tu karoa 20:31, “Maiġeri guruġa atorerito, korana tu ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai tu, ġia aranai maġuri vanaġivanaġi boġo ġabiani.”

Ioane ġena toretore tu maiġesina eboioġaiato:

1. Barau Natuna - karoa 1:1-18
2. Barau ġena vetuġunaġi Iuda tarimari fakari ai ema iaġo-vinito - karoa 1:19-12:50
3. Barau ġena vetuġunaġi Iesu tauġena ġena mero fakari ai ema iaġo-vinito - karoa 13-17
4. Barau vetuġunaġina ema iaġo-vinito tanobara vaġa-maġurina ġana - karoa 18-21

Maġuri guruġana

¹ Tovotovonai veġata Guruġa etanuto-ġoi. Mo Guruġa tu Barau ġesi ġetanuto-ġoi, ema mo Guruġa tu Barau.

² Ġia tu tovotovona na veġata Barau ġesi ġetanuto-ġoi.

³ Dagara mabarari tu Barau na ġia ġenana eveirito. Ma Barau na dagara sebona kwariġutu ta maki dabara borunai ta maki asi eveiato, asiġina ġinavaġi.

⁴ Maġuri tu ġia nuġanai etanuni; mo maġuri tu tarimarima ġeri mama.

⁵ Mama tu mukuna nuġanai emamani, senaġi mukuna na asi etuġamaġi-fakaiato e asi eġita-leaiato.

⁶ Barau na tarima ta etuġuato, arana tu Ioane.

⁷ Ġia tu guruġa moġonina kiraġi-kiraġina ema mama vaġa-foforina ġana eiaġomato. Be ġia ġenana tarimarima mabarari na vari beġene seġaġia e beġene vaġa-moġonia ġana.

⁸ Ġia tauġena tu dia mo mama, senaġi ġia eiaġomato tu, mama benema kiraġia ġana.

⁹ Mo mama tu mama korikorina, tanobara ġana eiaġomato, tarimarima mabarari mama benema viniri ġana.

¹⁰ Guruġa tu tanobarai etanuto-ġoi, ema mo guruġa ġenana Barau na tanobara eveiato, senaġi tanobara na tu asi eribaiato.

¹¹ Ġia tu ġena tanobara ġana eiaġomato, senaġi ġena tarimarima na asi ġeġabi-raġeato.

¹² A tarimarima kotari na ġeġabi-raġeato e ġevaġa-moġoniato nai, ġia na maoro evinirito, Barau natunai beġene iaġo.

13 Ĝia Barau natunai ĝeiaĝoto tu dia tauĝanina ĝenana. Mo tu dia sina tama rarari na o tauĝani ĝena urai o sina tama ĝeri urai. Asiĝi, tarimarima tu Barau tauĝena ĝereĝana na moĝo ĝia natunai evaĝa-iaĝorini.

14 Mo Guruĝa tu tarimarima tauĝaninai eiaĝoto, benamo ĝai fakamai ema tanuto. Ĝia marevana e seĝukana baregona ĝaĝitaiato. Moĝa tu Barau na Natuna sebona kwariĝutu eviniato marevana e seĝukana. Varevare-bara ema guruĝa e maĝuri moĝonina na evonuvonu-raĝeto.

15 Ioane na ĝia guruĝana ekiraĝi-foforiato, ekeato, ekirato, “Au na akiraĝiato tarimana tu maiĝa, akirato, ‘Au murigu na beiaĝomani tarimana na au evanaĝiguto. Korana tu au maki roĝosi roĝo bana maĝuri nuĝanai veĝata, ĝia tu etanuto-ĝoi.’ ”

16 Ĝia tu varevare-bara na evonuvonu-raĝeto. Mo ĝena varevare-bara lorinai ĝita mabarara vevaĝa-namo iatai-iatai maki evinirani.

17 Korana Barau na Mose ĝenana taravatu evinirato, a varevare-bara ema guruĝa e maĝuri moĝonina tu Iesu Keriso na eĝwa-iaĝomarito.

18 Tovotovona na veĝata beiaĝoma maitoma tarima ta na Barau asi eĝitaiato. Natuna ĝora ĝereĝa, Tamana sevinai etanuni tarimana, ĝia na Barau ema vaĝa-foforiato.

Ioane Babatiso ĝena guruĝa-fofori

Mataio 3:1-12; Mareko 1:7-8; Luka 3:15-17

19 Ioane ĝena guruĝa-fofori tu maiĝa. Iuda tarimari na Rubu Veaĝa vereri e Levi doĝorona tarimari, (mai tu Rubu Veaĝai vetuĝunaĝi tarimari), kotari Ierusalemna na Ioane ĝenai ĝetuĝu-iaĝorito, beĝene danaĝia ĝana, beĝene kira, “Ĝia tu deikara?”

20 Benamo Ioane asi evekira-ĝuniĝauto, senaĝi ĝoirari ai eguruĝa-foforito, ekirato, “Au tu dia Keriso, (Barau na ekiraĝi-toreato vevaĝa-maĝuri tauna).”

21 Ma ĝedanaĝiato, ĝekirato, “Ba ĝoi tu deikara? Ĝoi tu Elia ba?” Ĝia ekirato, “Au tu dia Elia.” Ma ĝekirato, “Ĝai na peroveta tarimana ĝanariani tarimana tu ĝoi ba?” Ĝia evaĝa-veseto, ekirato, “Asiĝina!”

22 Benamo ĝia na ma ĝedanaĝi-ĝenoĝoiato, ĝekirato, “Ba ĝoi tu deikara? Ĝemu vevaĝa-vese novini-ginikauma, be beĝe tuĝuma tarimari ĝeri ai baĝana iaĝo, baĝana vaĝa-ribari. Ĝoi tauĝemu varimu tu aiĝesi?”

23 Benamo Ioane tauĝena evevari-fiuto, ekirato, “Au tu garo ta tano fakanai ekea-koĝokoĝoni, ekirani, ‘Vereĝauka ĝena dabara boĝono iareva-toretorea.’ ” Isaia peroveta tarimana na ekiraĝi-guineato ilailana.

24 Mo vetuĝu ĝeiaĝo-viniato tarimari tu Farisea tarimari.

25 Benamo Ioane ĝedanaĝiato, ĝekirato, “Bema ĝoi tu dia Keriso, e dia Elia, e dia mo peroveta tarimana, karase nai ĝoi tu ovevaĝa-babatisoni?”

26 Ioane evaĝa-veseto, ekirato, “Au tu nanu na moĝo ababatisoni, senaĝina tarima ta tu ĝomi fakami ai eruĝa-taĝoni, ma ĝomi tu asi ribami ĝia.

27 Ĝia tu au murigu na eiaĝomani, ema au tu asi ilaila, ĝia ĝena tamaka varori baruĝarini.”

28 Mai dagara mabarari tu Betania, Ioridana ĝarukana mo rekenai, ĝeĝorato, Ioane ebatisoto-ĝoi gabunai.

Barau ĝena ĝinitaĝo mamoen

29 Ma elaĝanito nuĝanai, Ioane na Iesu eĝitaiato, ĝia ĝenai eiaĝomato-ĝoi, benamo ekirato, “Ĝoboĝe, mani tu Barau ĝena Mamoe Natuna, ĝia na tanobara ĝena rakava beĝabi-vaĝiani.

³⁰ Au na tu ġia akiraġiato, akirato, ‘Au murigu na eiaġomani tarimana na evanaġiguto, korana tu au roġosi roġo bara maġuri nuġanai veġata, ġia tu etanuto-ġoi.’

³¹ Tovo-tovonai au tu asi ribagu ġia, senaġi au aiaġomato nanu na ababatisoni, korana tu Isaraela tarimari na Iesu beġene ribaia ġana.”

³² Benamo Ioane ma eguruġa-foforito, ekirato, “Iauka aġitaiato, guba na emariġoto pune noġa, ġia iatanai etanukauto.

³³ Tovotovonai au tu asi ribagu ġia, senaġi Barau na etuġuguto, bana iaġoma tu, tarimarima nanu na bana babatisori ġana. Ġia na evaġa-guruġaguto, ekirato, ‘Ġoi na tarima ta boġitaiani, Iauka bemariġoni, iatanai betanu-kauni. Mo tau tu tarimarima Iauka Veaġa na bebabatisorini.’ ”

³⁴ Ioane ekirato, “Au na aġitaiato naima akiraġi-foforiani, ġia tu Barau Natuna.”

Iesu ġena mero giniguineri

³⁵ Ma elaġanito nai tu, Ioane e ġena mero ruarua ġesi monai ma ġeruġa-taġoto-ġoi.

³⁶ Ġeruġa-taġoto-ġoi nuġanai tu, Iesu eraka-vanaġito, eġitaiato, benamo ekirato, “Ġoboġe, Barauna Mamoe Natuna, (ġena ginitaġo mamoen), ġoġitaia.”

³⁷ Ma Ioane ġena mero ruarua na mo guruġa ġeseġaġiato, benamo Iesu murina na ġeiaġoto.

³⁸ Iesu eruġa-kureto, ma murinai ġerakakauto tarimari ruarua eġitarito, benamo edanaġirito, ekirato, “Ġomi tu kara ġourani?” Ġia ġevaġa-veseto, ġekirato, “Rabi, ġoi tu ainai otanuni?” Rabi anina tu vevaġa-riba tarimana.

³⁹ Ġia evaġa-veseto, ekirato, “Ġoiaġoma, ġoma ġitaia.” Benamo ġia ġesi ġeiaġoto, ma ġena tanu gabuna ġea ġitaiato, mo ġaro vinubana tu ġia ġesi ġebukato. Mo tu horaġauna 4 koloko lavilavi rekenai.

⁴⁰ Ioane ġena guruġa ġeseġaġiato, benamo Iesu murinai ġerakato tarimana ta tu Anduru, Simona Petero tarina.

⁴¹ Anduru na Iesu eraga-kwaneato. Asikauna kakana Simona edoġariato, benamo ekiraiato, ekirato, “Ġai na Mesia baġa doġaria.” Mesia anina tu Keriso, (Barau na ekiraġi-toreato vevaġa-maġuri tarimana).

⁴² Benamo ġia na Simona Iesu ġenai eġori-iaġoato. Iesu na eġitaiato, benamo ekirato, “Ġoi aramu tu Simona, Ioane natuna, senaġi ġoi toma aramu beġe kiraġiani tu Kefas beġe toni.” Mai ara “Kefas” ema “Petero” aniri tu sebna, garo ai anina tu “Fore”.

Iesu na Filipino e Natanaela ekearito

⁴³ Ma elaġanito nai tu, Iesu tu Galilea tanona ġana neiaġo etato. Ġia na Filipino edoġariato, benamo ekiraiato, ekirato, “Murigu ai noma raka.”

⁴⁴ Filipino tu Betesaida tarimana, Anduru e Petero ġesi vanuġa sebna.

⁴⁵ Filipino na Natanaela edoġariato, benamo ekiraiato, ekirato, “Mose ġena taravatu ai ema peroveta tarimari ġeri bukai varina ġetoreato tarimana tu baġa doġaria; ġia tu Iesu, Nasareta tarimana, Iosefa natuna.”

⁴⁶ Natanaela evedanaġito, ekirato, “Nasareta na dagara namona ta beiaġomani?” Filipino ekirato, “Noiaġoma, noma ġitaia.”

⁴⁷ Iesu na Natanaela eġitaiato, eiaġomato-ġoi, benamo ġia ekiraġiato, ekirato, “Ġoboġe, mani tarima tu Isaraela tarimana korikorina, ġia ġenai ġofaġofa ta tu asi etanuni.”

⁴⁸ Natanaela na edanaġiato, ekirato, “Kamasi boribagu?” Iesu na evaġa-veaseato, ekirato, “Filipo tu vau bekeamu. Au na ġoi tu baġita-guinemu figi ġauna gaburenai roġo otanuto-ġoi nai.”

⁴⁹ Benamo Natanaela na evaġa-veaseato, ekirato, “Vevaġa-riba tarimamu, ġoi tu Barau Natuna; ġoi tu Isaraela Verena.”

⁵⁰ Iesu na ma evaġa-veaseato, ekirato, “Ġoi na au ovaġa-moġoniguni, korana au na bakira-varamu, ġoi tu figi ġauna gaburenai baġita-guinemu, nene? Veġa tari vau boġitarini, mai veġa maiġa maki beġe vanaġiani.”

⁵¹ Benamo ma ekirarito, ekirato, “Moġoni veġata, au na ġomi akiramini, guba bevekeo-fakani boġo ġitaiani, ema Barau ġena aneru beġe varaġeni e beġe mariġoni boġo ġitarini Tarimarima Natuna ġenai.”

2

Veġaraġo verekona Kana vanuġanai

¹ Ġaro ruarua ġekorito murinai, Kana vanuġana nuġanai veġaraġo verekona ta ġeveiato. Kana vanuġana tu Galilea tanona nuġanai. Mo veġaraġo verekona nuġanai tu Iesu sinana maki monai.

² Ema Iesu ma ġena mero ġesi maki ġeura-maġirito, be mo veġaraġo verekona nuġanai ġeraka-toġato.

³ Vine nanuna o wain ekorito, benamo Iesu sinana na Iesu evaġa-guruġaiato, ekirato, “Ġia tu asi ġari vine nanuna.”

⁴ Iesu na evaġa-veaseato, ekirato, “Vavine, karase nai au oma kira-varaguni? Mani tu ġomi ġemi ġauvei. Au ġegu ġaro tu roġosi bene votu.

⁵ Benamo sinana na vetuġunaġi tarimari evaġa-guruġarito, ekirato, “Kara bekira-varamini veġana boġono veia.”

⁶ Monai tu fore gwaġuturi imaima sebona (6) vaġa-ruġa, Iuda tarimari ġeri veiareva veġari ġari ġeġauvei-iaġirito-ġoi. Mo fore gwaġuturi tata nuġari tauri galon gabana ruarua (20) o gabana toitoi (30) kavari.

⁷ Iesu na vetuġunaġi tarimari ekirarito, ekirato, “Mani gwaġutu nanu na ġovaġa-vonuri!” Benamo ġevaġa-vonu fokafokarito.

⁸ Moġa murinai ma ekirarito, ekirato, “Kota ġoġutu-vaġia, ġoġwa-iaġoa vereko ġorikauna tarimana ġenai.” Ġeġutu-vaġito, benamo ġeġwa-iaġoato,

⁹ vereko ġorikauna tarimana na mo nanu, vine nanunai evaġa-iaġoato moġa, eniu-tovoato. Ġia tu asi ribana mo vine nanuna tu ainana eiaġomato; a nanu ġesiatto merori ġereġari moġo ma ribari. Benamo vereko ġorikauna tarimana na veġaraġo variġu tauna ekea-iaġomaiato, benamo evaġa-guruġaiato, ekirato,

¹⁰ “Tarimarima mabarari na vine nanuna namo vedaureana tu ġetore-rosi guineani, benamo vereko tarimari ġeniu-maseni murinai vau, vine nanuna kota namo raġina ma ġetore-rosiani. Senaġina ġoi na tu vine nanuna namo vedaureana tu boġabi-taria mo maitoma.”

¹¹ Mai tu Iesu ġena vetoġa boruna giniguinena evaġa-foforiato Kana vanuġanai, Galilea tanona nuġanai. Monana ġia marevana e seġukana baregona evaġa-foforiato, ema ġena mero na ġevaġa-moġoniato.

¹² Moġa murinai Iesu ma sinana e tarina merori, ema ġena mero ġesi ġevariġoto Kaperanauma ġana. Ma monai ġaro viravira ta ġetanuto.

Iesu na Rubu Veġa eiarevaiato

Mataio 21:12-13; Mareko 11:15-17; Luka 19:45-46

¹³ Iuda tarimari ġeri Pasova o Iuda tarimari mase aneruna na evanaġirito moġo verekona ġoirai ekavinaġito naima, Iesu tu Ierusalemā ġana evarāġeto.

¹⁴ Rubu Veāġa nuġanai tarimarima na boromakau, e mamoe, ema pune ġevoivoi-iaġirito-ġoi, ema tarima kotari teibolo ai ġetanuto ma moni ġesenisito-ġoi edoġaririto.

¹⁵ Benamo varo kwarina ta evatoato. Monana Rubu Veāġa na mamoe e boromakau mabarari ema lailai-rosirito. Moni ġesenisirito-ġoi tarimari ġeri fata eġuke-vebuburito, ġeri moni ebubu-lausilausirito.

¹⁶ Benamo pune ġevoito-ġoi tarimari ekira-ġoirito, ekirato, “Maiġeri dagara mainana ġoġabi-rosiri! Au Tamagu ġena numa tu voivoi numanai asi ġovaġa-iaġoa!”

¹⁷ Benamo ġena mero na Buka Veāġai evetoreto guruġana ġetuġamaġi-dogariato, ekirani, “Ġoi ġemu numa uravinina nuġagu ai tu karava noġa eġarani.”

¹⁸ Moġa murinai Iuda tarimari na ġevaġa-guruġaiato, ġekirato, “Maiġesi oveini anina tu kara? Kamara vetoġa na bevaġa-foforimuni ġai ġemai, ġoi tu ma ġemu maoro maiġeri boveirini?”

¹⁹ Iesu evaġa-veseto, ekirato, “Mai Rubu Veāġa ġorovoa, benamo ġaro toitoi nuġanai au na ma bana vaġa-ruġa-vaishi ġenoġoia.”

²⁰ Ġia na ġekiraiato, ġekirato, “Mai Rubu Veāġa tu laġani gabana vasivasi ma imaima sebona (46) nuġari ai ġeragaġiato. A ġoi na tu ġaro toitoi nuġanai ma boraga-ġenoġoiani otoni?”

²¹ Senaġi Iesu na tu ġia tauġanina Rubu Veāġai evaġa-ilailaiato.

²² Iesu mase na evaisi-raġeto murinai, ġena mero na mo guruġa ġetuġamaġi-dogariato, benamo ġia na Buka Veāġa ema Iesu na evaġa-ribarito guruġari ġevaġa-moġonirito.

Iesu ribana tarimarima ġeri veġa

²³ Iesu Pasova o Iuda tarimari mase aneruna na evanaġirito moġo verekona ġarori ai Ierusalemā etanuto-ġoi nai, tarima vovoka na ġevaġa-moġoniato, korana tu vetoġa boruri ġutuma eveirito ġeġitarito nai.

²⁴ Senaġi Iesu na ġia asi evaġa-moġonirito, korana tarimarima mabarari ġia tu ma ribana ginikau.

²⁵ Ema tarima ta tu asi ilaila ġia tarimarima ġeri maġuri dabarari bekiravaraiani, korana tarimarima mabarari nuġari tu ġia ma ribana.

3

Iesu e Nikodemo

¹ Farisea tarimana ta etanuto-ġoi arana Nikodemo; ġia tu Iuda tarimari ġeri veġorikau tauna ta.

² Nega ta boġi ai Iesu ġenai eiaġoto, benamo ekirato, “Rabi, ġai ribama, ġoi tu vevaġa-riba tarimamu, Barau ġenana oiaġomato, korana tu vetoġa boruri oveirini maiġeri tu Barau na asi evaġa-kavaiani tarimana na tu asiġina ġinavaġi beveirini riba.”

³ Iesu na evaġa-veseato, ekirato, “Moġoni veġata akiramuni, asi beġora-ġenoġoini tarimana na Barau ġena Basileia tu asiġina ġinavaġi beġitaiani.”

⁴ Benamo Nikodemo na edanaġiato, ekirato, “Tarima baregona ta tu kamasi ma beġora-ġenoġoini? Sinana nuġanai ma beraka-toġani, benamo ma beġora-ġenoġoini?”

⁵ Iesu ma evaḡa-veseto, ekirato, “Au na akira-korikorimuni, tarima ta Barau ḡena Basileia nuḡanai asi berakatoḡa-kavani, senaḡina nanu ḡenana beḡorani ema Iauka ḡenana maki beḡorani tarimana vau beraka-toḡani.

⁶ Tarimarima tauḡanina ḡenana eḡorani tu tauḡani, ma Barau Iaukana ḡenana eḡorani tu iauka.

⁷ Ġoi nuḡamu asi bene farevaḡi maḡesi akiramuni nai, korana au bakira, ‘Ġomi mabarami boḡono ḡora-ḡenoḡoi.’

⁸ Iavara etoḡani tu, eurani gaburi ḡana eḡau-iaḡoni. Guruna tu ḡoseḡaḡiani, senaḡi ainana eiaḡomani, ma aiḡana eiaḡoni tu asi ḡoribaiani. Barau Iaukana ḡenana ḡeḡorani tarimari mabarari maki moḡesina, asi ḡoribani kamasi ḡeḡorani.”

⁹ Nikodemo ma evedanaḡito, ekirato, “Mai dagara tu kamasi beḡe ḡorani?”

¹⁰ Iesu ma evaḡa-veseto, ekirato, “Ġoi tu Isaraela ḡeri vevaḡa-riba tari-mamu, senaḡi maḡeri dagara ḡoi tu asi ribamu?

¹¹ Au na akira-korikorimuni, ḡai tu ribama dagarari ḡaguruḡa-iaḡirini, ema ḡaḡitarito dagarari ḡakiraḡi-foforirini, senaḡina ḡema guruḡa tu asi ḡoḡabi-raḡerini.

¹² Au na ḡomi ḡemi tu tanobara dagarari akiraḡirini, senaḡi asi ḡovaḡa-moḡoniguni, a guba dagarari bakira-varamini nai tu, kamasi boḡo vaḡa-moḡoniguni?

¹³ Tarima ta guba ḡana asiḡina ḡinavaḡi evaraḡeto, senaḡina guba na emariḡoto tarimana ḡereḡana moḡo, mo tu Tarimarima Natuna.

¹⁴ Mose na tano fakanai mota eḡabi-vaisiato ilailanai, Tarimarima Natuna maki moḡesi beḡe ḡabi-vaisiani.

¹⁵ Monana vau ḡia ḡenai beḡe veḡabidadamani tarimari mabarari na maḡuri vanaḡivanāḡi beḡe ḡabiani.

¹⁶ Korana Barau na tanobara euravini-baregoato nai, Natuna ḡora ḡereḡa evinirato, be ḡia beḡe ḡabidadama-viniani tarimari mabarari tu asi beḡe maseni, a maḡuri vanaḡivanāḡi beḡe ḡabiani.

¹⁷ Korana Barau na Natuna etuḡu-mariḡoato tanobara ḡana tu, dia tanobara bene vaḡa-kotaia ḡana, senaḡi tanobara ḡia bakunai bene maḡuri ḡana.

¹⁸ Ġia ḡenai eveḡabidadamani tarimana tu meto asi beviniani, senaḡi asi eveḡabidadamani tarimana tu varau meto eḡwa-taḡoani, korana ḡia na tu Barau Natuna ḡora ḡereḡa asi eḡabidadama-viniani nai.

¹⁹ Mo meto korana tu maḡesi: Mama tu tanobarai varau ema foforito, senaḡi tarimarima na mukuna ḡeuravini-baregoato, korana ḡeri veḡa tu rakava nai.

²⁰ Veḡa rakavari ḡeveini tarimari mabarari na tu mama ḡeruḡaiani, mama asi ḡeiaḡo-viniani. Ġia tu ḡegarini, korana ḡeri veḡa rakavari beḡe foforini mamai garina.

²¹ Senaḡi deikara dabara moḡonina ekorana-iaḡiani tarimana na mama eiaḡo-viniani, benamo tarimarima na beḡe ḡita-ginikauani, ḡena veḡa namori eveirito tu Barau ḡenana eveirito.

Iesu ema Ioane

²² Moḡa murinai Iesu ma ḡena mero ḡesi Iudea tanona rekena ḡana ḡeiaḡoto. Monai Iesu tu ḡena mero ḡesi ḡetanuto-ḡoi e ebatisoto-ḡoi.

²³ Ioane maki Aenon ai, Salim rekenai, ebatisoto-ḡoi, korana nanu tu barego monai. Tarimarima mo ḡana ḡeiaḡoto-ḡoi, ea babatisorito-ḡoi.

²⁴ Mo tu Ioane dibura numanai roḡosi ḡere kou-ḡaua nuḡanai.

²⁵ Moġa ġaronai Ioane ġena mero Iuda tarimana ta ġesi ġeveġare-veġareto. Ġia ġeri guruġa tu, kamara veġuriġi veġanai tu tarimarima benamo-vedaureani.

²⁶ Ioane ġena mero Ioane ġenai ġeiaġoto, benamo ġekirato, “Vevaġa-riba tarimamu, Ioridana ġarukana mo rekenai ġoi ġesi ġotanuto-ġoi e ġoi na oguruġa-iaġiato tarimana tu ebatisoni, ema tarimarima vovoka ġia ġenai ġeiaġoni.”

²⁷ Ioane evaġa-veseto, ekirato, “Tarima ta na dagara ta asi beġoitaġo-kavaiani, senaġi Barau na guba na bevini-riġoani vau beġoitaġoni.

²⁸ Ġomi tauġemi na ġoseġaġiguto, be ma ribami au akirato, ‘Au tu dia Keriso, (Barau na ekiraġi-toreato vevaġa-maġuri tauna), senaġi au tu etuġu-guineguto ġia ġoirana ġana.’

²⁹ Beveġaraġoni ġuiatona tu beġaraġoani futuana na beġaraġoani. A beveġaraġoni futuana ġatana tu eruġa-taġoni moġo, (mai tu au, Ioane), ema ġatana eseġaġi-ġauni, ma ġatana beveġaraġoni futuana garona beseġaġiani nai tu, beiakuni. Moġesi naima au tu iaku na bama vonuvonu-raġe.

³⁰ Ġia tu bene barego, a au tu bana kei.”

Iesu tu guba na eiaġomato

³¹ “Tuġuna na emariġoto tarimana tu dagara mabarari iatari ai; tano na eiaġomato tarimana tu tanobara tarimana ema tanobara guruġari moġo bekiraġini. Guba na eiaġomato tarimana dagara mabarari iatari ai.

³² Ġia tu monai eġitato e eseġaġito dagarari ekiraġi-foforirini, senaġi tarima ta na ġena guruġa asi eġabi-raġeani.

³³ Deikara na ġia ġena guruġa eġabi-raġeani tarimana na evaġa-moġoni korikoriani, Barau tu moġoni veġata.

³⁴ Korana tu Barau na etuġuato tarimana na Barau ġena guruġa beki-raġiani, korana tu Barau na ġena Iauka Veaġa eviniato ema evaġa-vonuvonu-raġeani.

³⁵ Tamana na Natuna eura-viniani, ema dagara mabarari ġia ġimanai etore-kaurito.

³⁶ Deikara na Natuna evaġa-moġoniani tarimana na maġuri vanaġivanaġi beġabiani. A Natuna asi evaġa-moġoniani tarimana na maġuri asi beġabiani, senaġi Barau ġena baru tu ġia iatanai betanuni.”

4

Iesu ema Samaria vavinena

¹ Farisea tarimari tu varau ġeseġaġito, Iesu na tarima vovoka eġabirito, ġena mero ai evaġa-iaġorito e ebatisorito, ma Ioane na tu asi vovoka eġabirito.

² Senaġina Iesu tauġena na ta tu asi ebatisoato; mo tu ġena mero moġo ġebabatisoto-ġoi.

³ Iesu eribato ġia varina Farisea tarimari na eseġaġiato, benamo Iudea eiaġuiato, Galilea ġana ma eġenoġoi-iaġoto.

⁴ Galilea ġana tu Samaria tanona na eraka-vanaġito.

⁵ Samaria vanuġana tai eraġasito. Mo vanuġa arana tu Sika. Mo vanuġa tu Iakobo na natuna Iosefa eviniato tanona sevinai.

⁶ Iakobo ġena nanu gurina maki monai. Iesu tu eraka-iaġomato, be egaugau-raġeto, benamo mo nanu gurina sevinai etanu-tarito. Mo tu horaġauna 12 koloko nuġanai ġaroġotai.

⁷ Etanu-taġoto-ġoi nuġanai, Samaria vavinena ta nanu ġutu eiaġoto, benamo Iesu na enoġiato, ekirato, “Nanu kota noma vinigu, be nama niu.”

8 Ĝena mero tu vanuĝa ĝana, ĝaniĝani voi ĝeiaĝoto.

9 Samaria vavinena evaĝa-veseto, ekirato, “Ĝoi tu Iuda taumu, ma au tu Samaria vavinegu, karase nai au ĝegu ai nanu onoĝini?” Moĝesi ekirato, korana Iuda tarimari tu Samaria tarimari ĝesi asi ĝevegara-garato-ĝoi.

10 Benamo Iesu na evaĝa-veseato, ekirato, “Bema Barau ĝena varevare dagarana boro riba, ema boro riba maki, nanu kota ĝemu ai enoĝiani tarimana tu deikara nai tu, ĝia boro noĝia, benamo ĝia na maĝuri nanuna bere vinimu.”

11 Vavine ekirato, “Vereĝauka, ĝoi tu asi ĝemu tuĝu-riĝo dagarana e guri maki variĝo. Mani maĝuri nanuna tu ainana boĝabiani?”

12 Ĝoi tu varaĝe lelevaĝi, ma ĝai senema Iakobo tu kei, ei? Mai nanu gurina tu ĝia na evinimato, ema ĝia tauĝena na eniuato-ĝoi, natuna mabarari na ema ĝena boromakau e mamoe seriri na maki ĝeniuato-ĝoi.”

13 Iesu na ma evaĝa-veseato, ekirato, “Mai nanu beĝe niuani tarimari mabarari bokari ma beĝe koke-ĝenoĝoini.

14 A au na baviniანი nanuna beniuani tarimana tu, bokana asi ma bekoke-ĝenoĝoini. Korana au na baviniანი nanuna tu ĝia nuĝanai nanu gurinai beiaĝoni, bevoneĝoi-voneĝoini ema maĝuri vanaĝivanagi beviniani.”

15 Mo vavine na enoĝiato, ekirato, “Vereĝauka, mani nanu novinigu, be bokagu asi ma bene koke-ĝenoĝoi, ema maĝana nanu-ĝutu asi ma bana iaĝoma.”

16 Benamo Iesu na evaĝa-guruĝaiato, ekirato, “Noiaĝo, ĝaraĝomu noa keaia, benamo taumi ruarua boĝono iaĝoma.”

17 Mo vavine evaĝa-veseto, ekirato, “Au tu asi ĝaraĝogu.” Iesu ekirato, “Mani tu moĝoni okirani, ‘Au tu asi ĝaraĝogu’ otoni tuna.

18 Ĝemu guruĝa tu moĝoni, korana ĝoi tu vaĝa-imaia veĝata oveĝaraĝoto, ema mani oĝabiato tarimana maniĝa tu dia ĝoi ĝaraĝomu.

19 Mo vavine ekirato, “Vereĝauka, au toma bama riba, ĝoi tu peroveta tarimamu.

20 Ĝai tubuma ĝatama na tu mai ĝoro ai Barau ĝetoma-rakariĝo viniato-ĝoi, a ĝomi Iuda tarimami ĝokirani, toma-rakariĝo gabuna tu Ierusalemaj moĝa, be tarimarima tu monai beĝene toma-rakariĝo.”

21 Iesu ekirato, “Vavine, ĝegu guruĝa bono vaĝa-moĝonia, ĝaro ta eiaĝomani, mai ĝoro ai e Ierusalemaj maki Tamara asi boĝo toma-rakariĝo viniani.

22 Ĝomi Samaria tarimami na ĝotoma-rakariĝo viniani Barauna tu asi ribami; a ĝai na ĝatoma-rakariĝo viniani Barauna tu ribama, korana vevaĝa-maĝuri tu ĝai Iuda tarimama ĝemana eiaĝomani.

23 Senaĝi ĝarona eiaĝomani ema varau beraĝasi maiĝa, toma-rakariĝo tarimari moĝoniri na Tamara Barau tu iaukai e moĝoni ai beĝe toma-rakariĝo viniani. Korana Tamara na tu moĝesi beĝe toma-rakariĝo viniani tarimari evetaurini.

24 Barau tu Iauka, ma beĝe toma-rakariĝo viniani tarimari na tu iaukai ema moĝoni ai beĝene toma-rakariĝo vinia.”

25 Mo vavine na ekiraiato, ekirato, “Au ribagu, Mesia, ĝekiraĝiani Keriso ĝetoni, tu beiaĝomani. Ĝia beiaĝomani ĝaronai, ĝia na dagara mabarari bekiraĝi-foforirini.”

26 Benamo Iesu na evaĝa-veseato, ekirato, “Tarimana tu au maĝegu, ĝoi avaĝa-guruĝamuni.”

Iesu ĝena mero ĝeĝenoĝoito

27 Iesu moġesi eguruġato-ġoi nuġanai, ġena mero ġeraġasito. Ġia mabarari nuġari ġefarevaġito, korana Iesu tu vavine ta ġesi ġeguruġa guruġato-ġoi, senaġi tarima ta asi ekirato, “Ġoi tu kara ourani?” O “Karase nai mai vavine ġesi ġoguruġa-guruġani?”

28 Benamo mo vavine na ġena nanu gwaġutuna eraga-kwaneato, eġenoġoi-iaġoto vanuġa ġana, benamo vanuġa tarimari ea kirarito.

29 Ekirato, “Ġoiġoma, tarima ta ġoma ġitaia. Ġia na au ġegu veġa aveirito dagarari mabarabarari bekiraġi-fofori foforiri. Betaġu ġia tu Keriso, (Barau na ekiraġi-toreato vevaġa-maġuri tauna), banaġu?”

30 Benamo tarimarima na vanuġa ġeiaġuiato, ma Iesu ġenai ġeiaġoto.

31 Mo faka nuġanai ġena mero na Iesu ġekiraiato, ġekirato, “Vevaġa-riba tarimamu, noġaniġani.”

32 Senaġi ġia evaġa-veseto, ekirato, “Au tu ma ġagu ġaniġani, ġomi asi ribami ġaniġanina.”

33 Moġesina naima ġena mero tauġeri ġevedanaġito, ġekirato, “Tarima ta na ġana ġaniġani beġwa-iaġoma ba?”

34 Iesu na ekirarito, ekirato, “Au ġagu ġaniġani tu etuġuguto Barauna ġena ura bana veia, ema eviniguto ġauveina bana vaġa-koria.

35 Ġomi ma ġemi sisiba guruġana, ġokirani, ‘Ġue vasivasi murinai vau kwakwa ġarona beiaġomani.’ A au na akiramini, matami ġokeori, benamo vamoka ġoġita-ġinikauri, tauri tu varau beġe gwaġiġi, kwakwa ġarona tu beraġasi.

36 Kwakwa tarimana ġena ġauvei voina tu beġabiani, ema vamoka ġaniġanina bevaġa-vegogoani tu, maġuri vanaġivanaġi ġana. Tauna moġa, varovarona tarimana e kwakwa tarimana beġe iaku-vegogoni.

37 Korana moġesi bevetoreni nai tu, iniġesina ġekiraġiani guruġana tu moġoni, ‘Tarima ta na tu evaroani, ma ta na tu ekwaiani.’

38 Au na ġomi atuġumito tu, asi ġovaro-vekwaraġito dagarari kwakwari. Varovarori vekwaraġiri tu tarima tari ġevewkaraġito, a ġomi na tu ġia ġeri vekwaraġi dagarari kwakwari boġo raka-toġa.”

Samaria tarimari ġutuma na Iesu ġevaġa-moġoniato

39 Benamo Samaria tarimari vovoka mo vanuġa nuġanai Iesu ġevaġa-moġoniato, korana tu mo vavine ġena vevarifiu guruġana ġenana naima, ġia ekirato, “Au ġegu veġa rakavari aveirito dagarari mabarabarari bekiraġi-fofori foforiri.”

40 Moġesina naima Samaria tarimari Iesu ġenai ġeiaġomato nai tu, ġenoġiato, ġia ġesi roġo beġene tanu. Moġa lorinai Iesu mo vanuġai ġaro ruarua ma etanuto.

41 Ma tarimarima vovoka na Iesu ġevaġa-moġoniato, korana ġena vevarifiu guruġari na.

42 Benamo ġia na mo vavine ġekiraiato, ġekirato, “Ġai na maitoma Iesu ġavaġa-moġoniani, dia ġoi ġemu guruġa lorinai, senaġi ġai tauġema na ġia baġa seġaġia, ma baġama riba-ġinikau, ġia tu moġoni Keriso, tanobara Vaġa-maġurina Tarimana.”

Vere ta natuna merona Iesu na keve na evaġa-maġuriato

43 Iesu monai ġaro ruarua etanuto murinai, Galilea ġana ma eiaġoto.

44 Iesu tauġena na ekiraġi-foforiato, ekirato, “Peroveta tarimana tu ġena vanuġa korikorina tarimari na asi beġe gubakauani.”

45 Benamo Galileai ea votuto nai tu, Galilea tarimari na ġeġabi-raġeato. Iesu ġeġabi-raġeato korana Ierusalemaj Pasova verekona nuġanai tu ġia

maki monai, be Iesu na kara eveirito dagarari mabarari tu, matari na ġeġitarito.

⁴⁶ Benamo Iesu ma eġenoġoito Galilea vanuġana ta arana Kana ġana. Kana tu Iesu na nanu wain ai evaġa-iaġoato vanuġana. Monai kini ġena vere ta Kaperanaumai etanuto-ġoi, ma ġia natuna merona tu ekeve-rakavato.

⁴⁷ Mo vere eseġaġito, Iesu tu Iudea na eiaġomato Galilea ġana, benamo eiaġoto ġia ġenai, benamo enoġiato, Kaperanauma ġana nevariġo, be ġia natuna merona nea vaġa-maġuria, korana ġia natuna merona tu dori emaseto-ġoi.

⁴⁸ Iesu na ekiraiato, ekirato, “Ġomi tu vetoġa boruri e nuġa-farevaġi veiġari asi boġo ġitarini tu, asi boġo vaġa-moġoniguni.”

⁴⁹ Mo vere ekirato, “Vereġauka, si-iaġo, natugu bemaseni ġesi.”

⁵⁰ Iesu na ekiraiato, ekirato, “Noiaġo, natumu merona tu bemaġuri bene.” Mo tarima na Iesu ġena guruġa evaġa-moġoniato, benamo eiaġoto.

⁵¹ Dabara na eġenoġoi-iaġoto-ġoi nuġanai, ġena vetuġunaġi tarimari ġesi ġevedoġarito, benamo ġekira-varaiato, ġekirato, “Ġoi natumu merona tu bemaġuri.”

⁵² Benamo ġia na edanaġirito, kamara horai natuna merona enamoto. Ġia ġevaġa-veseto, ġekirato, “Ġoraġani horaġauna 1 koloko lavilavi rekenai ġia mo keve na eraga-kwaneato.”

⁵³ Benamo tamana eriba-maoroto, mo aoa korikorinai enamoto, Iesu na ġia evaġa-guruġaiato, ekirato, “Ġoi natumu tu bemaġuri.” Benamo ġia e ġena numa tarimari mabarari ġesi Iesu ġevaġa-moġoniato.

⁵⁴ Mai tu vetoġa boruna vaġa-ruaruana Iesu na eveiato, Iudea na Galilea ġana eiaġoto murinai.

5

Kou ai Iesu na tarima ta evaġa-namoato

¹ Mai veiġa murinai Iesu tu Ierusalemata ġana ma evaraġeto, korana Iuda tarimari tu ġeri vereko ta ġeveiato-ġoi.

² Ierusalemata kou ta tu ġatama-boka baregona arana Mamoe Ġatama-bokana sevinai. Mo kou arana Heberu garo ai tu Betesda, ma ġia sevinai tu iaġaraġi foutari imaima (5).

³ Ġaro mabarari ai kevekeve tarimari vovoka monai ġegenataġoto-ġoi, mata-bubu, kwaku rakava, ema tauġaniri ġemaseto tarimari, [nanu ġena ġareva-ġareva ġevaġa-nogaġato-ġoi.

⁴ Korana aneru ta guba na emariġoto-ġoi, mo nanu evaġa-ġareva ġarevaiato-ġoi. Mo nanu eġarevato-ġoi nuġanai, eturu-ferei ġuinetto-ġoi tarimana tu ġena keve enamoto-ġoi.]

⁵ Monai tarima ta egena-taġoto-ġoi, ġena keve laġaniri tu gabana toitoi ma imaima toitoi (38).

⁶ Iesu na monai genataġonai eġitaiato, ma eribato, ġia tu ġaro vovoka veġata ekeve-iaġiato. Benamo Iesu na edanaġiato, ekirato, “Ġoi ourani nonamo ba?”

⁷ Keve tarimana na evaġa-veseato, ekirato, “Vereġauka, nanu eġareva-ġarevani nai, au kou ai tu asi tau raga tore-reigu tarimana ta. Mainana tauġegu kou aiaġo-viniani nai tu, ta eraka-rei-guineni.

⁸ Iesu na ekiraiato, ekirato, “Novariġisi, ġemu geda noġabi-vaisia, be noraka.”

⁹ Benamo mo tarima ġena keve asikau enamoto, ma ġena geda eġabi-vaissito, benamo eruġa-vaissito, erakato.

Mo veiġa tu Sabadi ai eġorato.

¹⁰ Moġa lorinai Iuda tarimari na mo keve na enamoto tarimana ġekiraiato, ġekirato, “Toma tu Sabadi, ġemu geda asi bono ġwa-rakao rakaoa, taravatu.”

¹¹ Ġia na evaġa-veserito, ekirato, “Au bevaġa-namogu tarimana na beki-ragu, bekira, ‘Ġemu geda noġabi-vaissia, be noraka,’ besi.”

¹² Benamo ġia na ġedanaġiato, ġekirato, “Mo tu kamara tarima na bekiramu, ‘Ġemu geda noġabi-vaissia, be noraka,’ besi?”

¹³ Senaġi mo Iesu na evaġa-namoato tarimana tu asi ribana, dei na evaġa-namoato, korana Iesu tu eraka-veġitato, tarima ġutuma mo gabu ai vekaravari na.

¹⁴ Gabivau Iesu na mo tarima Rubu Veaġa nuġanai edoġariato, benamo ekiraiato, ekirato, “Noseġaġi, maitoma ġoi tu bonamo. Veiġa rakavana ta asi ma bono vei-ġenoġoia, rakava barego vedaureana ta na beġabimuni ġesi.”

¹⁵ Benamo mo tarima erakato, eiaġoto, Iuda tarimari ea kira-vararito, ġia tu Iesu na evaġa-namoato.

¹⁶ Monana vau Iuda tarimari na Iesu ġevaġa-rakavaiato-ġoi, korana Sabadi ai mo vevaġa-maġuri veiġana eveiato nai.

¹⁷ Benamo Iesu na evaġa-veserito, ekirato, “Au Tamagu tu vanaġivanaġi eġauveini naima, au maki aġauveini.”

¹⁸ Moġesi ma ekirato nai, Iuda tarimari ġeri ura tu dabara ta veġata beġene ġoitaġoa, be Iesu tu beġene vaġi-masea ġetato. Dia mo Sabadi asi ekorana-iaġiato moġo dainai, senaġina ekirato, Barau tu ġia Tamana ma etato. Korana mo dabarai ġia tu Barau ġesi ilaila etato.

Barau Natuna ġena seġuka

¹⁹ Benamo Iesu na evaġa-veserito, ekirato, “Moġoni, au na akira-korikorimini, Natuna ġereġana na kara ta asi beveiani, senaġi Tamana ġena veiġa beġitarini veiġari moġo ġia na beveirini. Tamana kara eveini dagarari mabarabarari Natuna na maki beveirini.

²⁰ Korana tu Tamana na Natuna eura-viniani, ema ġia na eveirini dagarari mabarari maki evaġa-ġitaiani. Oba, dagara barego lelevaġiri maki ġenai bevaġa-foforiani, maiġeri dagara maki beġe vanaġirini, ġomi nuġami beġene farevaġi ġana.

²¹ Vaġa-ilailana Tamana na mase tarimari evaġa-vaiss-raġerini, benamo maġuri evinirini kavana, Natuna na maki ġena ura tarimari maġuri evinirini.

²² Tamana na tu tarima ta asi evaġa-kotaiani, korana vevaġa-kota seġukana mabarana tu Natuna eviniato.

²³ Moġa tauna tu, tarimarima mabarari na Natuna beġene gubakaua, Tamana ġeguba-kauani kavana. Natuna asi eguba-kauani tarimana na tu Tamana maki asi egubakauani, korana Tamana na tu Natuna etuġuato.

²⁴ Moġoni au na akiramini, au ġegu guruġa eseġaġiani ema etuġuguto Barauna evaġa-moġoniani tarimana na maġuri vanaġivanaġi varau beġabia. Ġia tu Barau ġena Kota nuġanai asi beraka-toġani. Asiġina. Mase varau beraga-kwanea, maġuri nuġanai varau beraka-toġa.

²⁵ Moġoni akiramini, ġarona roġo beiaġomani, ma varau bevotu, mase tarimari na Barau Natuna garona beġe seġaġiani, ma beġe seġaġiani tarimari tu beġe maġurini.

²⁶ Korana tu Tamana tauġena ġenai maġuri etanuni ilailanai, Natuna maki moġesi eviniato, maġuri ġenai etanuni.

27 Ema ġia Natuna maoro eviniato, bene vevaġa-kota ġana, korana ġia tu Tarimarima Natuna.

28 Nuġami asi beġene farevaġi! Ġarona mani eiaġomani, mase tarimari mabarari roġo gara nuġari ai na Barau Natuna garona beġe seġaġiani.

29 Benamo beġema raka-rosini: Vei-namo tarimari beġe vaisi-raġeni, maġuri beġene ġabia ġana, a vei-rakava tarimari beġe vaisi-raġeni, rakava voina metona beġene ġabia ġana.”

Iesu beġe kiraġi-foforiani

30 “Au tu ġereġaġu na dagara ta asi baveiani riba. Avevaġa-kotani maki Barau na ekiraguni aseġaġirini ilailari ai aveirini, moġa lorinaġi ġegu vevaġa-kota tu roroġoto, korana dia au tauġegu ġegu ura ta akorana-iaġiani, senaġi au etuġuguto Barauna ġena ura moġo aveiani.

31 Bema au tauġegu moġo bara vekiraġi-fofori nai tu, au ġegu guruġa tu asi tau vaġa-moġonina.

32 Senaġi tarima ta na maki au evaġa-moġoniguni, ma au ribaġu, ġia na au ekiraġi-foforiguni guruġana tu moġoni.

33 Ġomi na tarima kotari ġotuġu-iaġorito Ioane ġenai, benamo ġia na guruġa moġonina ekiraġiato.

34 Au vaġa-moġonigu guruġari tu dia tarimarima ġerina eiaġomani, a Ioane bakiraġia korana tu, ġomi maġuri boġono doġaria uranai.

35 Ioane tu noġa moġo lamefa eġarato-ġoi ema emore-taġoto-ġoi, benamo ġomi mo faka kotunaġi ġemi ura tu, ġia ġena mamai boġono iaku-tanu moġo ġotato-ġoi.

36 Senaġi au ġevaġa-moġoniguni veiġari na, Ioane na evaġa-moġoniguni guruġari, moġeri tu ġevanaġirini. Korana tu Tamagu na eviniguto ġauveina maitoma aveiani, mainana au evaġa-moġoniguni, au tu Tamagu na etuġuguto.

37 Au tu Tamagu na etuġuguto, ma ġia tauġena na maki au ekiraġi-foforiguto. Ġomi na ġia garona tu roġosi ġoro seġaġia, ema vetoġana maki roġosi ġoro ġitaia.

38 Ema ġena guruġa ġomi nuġami ai tu asi etanuni, korana ġia na etuġuato tarimana tu asi ġovaġa-moġoniani.

39 Ġomi na Buka Veaġa guruġari ġovetau-ginikaurini, korana ġomi ġotuġamaġini tu, moġeri guruġa nuġari ai maġuri vanaġivanaġi boġo doġariani. Moġeri guruġa na tu au ġekiraġiguni.

40 Senaġina ġomi maġuri ġabiġabina uranai au ġegu ai iaġoma tu asi ġourani.

41 Au tu tarimarima ġerina vevaġa-raġe tu asi avetauani.

42 Senaġi ġomi aiġesi, au tu ma ribaġu. Au ma ribaġu ġomi nuġami o lorumi ġuturi ai Barau uravinina tu asi etanuni.

43 Au aiaġomato tu Tamagu aranai, ma asi ġoġabi-raġeguni. Senaġi tarima boruna ma beiaġomani tauġena aranai nai tu, boġo ġabi-raġeani.

44 Ġomi tu tauġemi fakami ai moġo ġovevaġa-raġeni tu ġoġabi-raġerini. Senaġi mo vevaġa-raġe tu Barau ġereġana na moġo beveiani. Ma Barau ġenana eiaġomani mo vevaġa-raġe, ġomi na tu asi ġourani boġono ġabia. Bema ġomi maniġesi tauġemi fakami ai moġo ġovevaġa-raġeni nai tu, kamasi au boġo vaġa-moġoniguni?

45 Asi boġono tuġamaġi, au na Tamagu ġoiranai bavaġa-daġamini, asiġina. Vaġa-daġa tarimana tu ġoġabi-raġeani tarimana, Mose, ġia na ġomi bevaġa-daġamini.

⁴⁶ Bema ġomi na Mose moġoni boġoro vaġa-moġonia nai tu, au maki boġoro vaġa-moġonigu, korana ġia na tu au varigu etoreato.

⁴⁷ Senaġina bema ġia na etoreato guruġana asi boġo vaġa-moġoniani nai, au ġegu guruġa tu kamasi boġo vaġa-moġoniani?”

6

Iesu na daġara imaima (5,000) eġuburito

Luka 9:10-17

¹ Moġa murinai Iesu Galilea kouna na evanaġi-iaġoto tavi ta reke ġana. Mo kou arana ta tu Tiberia.

² Benamo tarimarima vovoka tabutabu ġia murina na ġeiaġoto, korana vetoġa boruri eveito keve tarimari ġeri ai ġeġitarito nai.

³ Moġa murinai Iesu ġoro ġana evaraġeto, benamo monai ġena mero ġesi ġetanu-tarito.

⁴ Iuda tarimari ġeri vereko arana Pasova ekavinaġito-ġoi ġoirai. (Mai tu Iuda tarimari mase aneruna na evanaġirito moġo, asi evaġirito, verekona).

⁵ Iesu eboġe-vaisito, tarimarima asisebo ġia ġenai ġeiaġomato-ġoi, benamo ġia na Filipo ekiraiato, ekirato, “Ġita ġaniġani tu ainai toma tavoini, maiġeri tarimarima mabarari taġubu-iaġirini?”

⁶ Iesu moġesi ekirato, korana Filipo nuġana bene ribaia ġana. A ġia tu ma ribana kara beveiani.

⁷ Filipo na evaġa-veiseato, ekirato, “Silva moniri sinau ruarua (200) na ġaniġani dagarari bita voini, senaġi asi beġe ilailani, mai tu koturi koturi moġo maki asi veġata mabarari beġe ġanini.” (Silva moniri sinau ruarua (200) tu tarima ta davana ġue imaima toitoi (8) nuġanai beġabini kavana).

⁸ Ġena mero ta arana Anduru, Simona Petero tarina, ġia na ma evaġa-veiseato, ekirato,

⁹ “Mero misina ta maiġa, ġia tu ma ġana beredi imaima (5) e maġani-kone ruarua (2). Senaġi asi beġe ilailani mai tarimarima mabarari ġeri ai tu-na.”

¹⁰ Iesu na ekirarito, ekirato, “Tarimarima ġokirari, ġetanutanu-tari.” Mo gabu moġa ġauġana tu vovoka. Benamo tarimarima mabarari ġetanutanu-tarito. Tau ġereġari moġo mabarari tu 5,000 kavana.

¹¹ Benamo Iesu na mo beredi eġabirito, Barau evaġa-namoato, benamo ġetanutanu-tarito tarimari mabarari ġevini-vaġa-ġaurito. Maġani-kone maki moġesi eveirito, mabarari ġeġabito ġeri ura ilailari ai.

¹² Ġia mabarari ġeġani-maseto, benamo Iesu na ġena mero ekirarito, ekirato, “Beredi kwari mabarari ġovaġa-vegogori, misina ta maki asi bene rekwa-rekwa.”

¹³ Benamo mo beredi ġeġanirito kwakwari moġeri mabarari ġevaġa-vegogorito, boseġa gabanana ruarua (12) ġevaġa-vonurito.

¹⁴ Tarimarima na Iesu na mai vetoġa boruna eveiato ġeġitaiato nai, ġekirato, “Moġoni, mai tu peroveta tarimana tanobara ġana beiaġomani ġetato tarimana.”

¹⁵ Iesu eribato, tarimarima tu beġe iaġomani, ġia beġema ġabi-tariani ġeri kini ai beġene vaġa-iaġoa ġana. Moġesina naima ġereġana ġoro ġana ma eiaġo-ġenoġito.

Iesu nanu iatanai erakato

Mataio 14:22-33; Mareko 6:45-52

¹⁶ Elaviboġi-iaġoto nai, Iesu ġena mero kou ġana ġevariġoto.

¹⁷ Monai ġasi tai ġeraġeto, benamo kou na ġevanaġito, Kaperanauma ġana ġeiaġoto. Mo tu varau eboġito, ma Iesu tu roġosi bere rakakau ġia ġeri ai.

18 A iavara baregona tu eragato-ḡoi, be mo kou ureurena maki ebaregote.

19 Iesu ḡena mero kilomita imaima (5) o imaima sebona (6) kavana ḡasi ḡelevaiato nuḡanai, ḡia na Iesu ḡeḡitaiato, nanu iatana na eraka-iaḡomato-ḡoi, ḡasi eiaḡoma-viniato-ḡoi, benamo ḡia tu ḡegarito.

20 Iesu na ekirarito, ekirato, “Asi ḡogari, mai tu au.”

21 Benamo ḡia ḡeḡabi-raḡeato, ḡasi ai eraḡekauto, ma asikauna tu ḡeiaḡo-viniato-ḡoi gabunai ḡevotuto.

Tarimarima na Iesu ḡevetauato

22 Elaḡanito boḡiboḡinai, tarimarima vovoka Iesu ḡena mero ḡasi ai ḡeraḡeto gabunai ḡeruḡa-taḡoto-ḡoi. Ḣia ḡeribato, tovtovonai monai ḡasi tu sebona moḡo mo kou rikinai. Ema ma ribari maki, Iesu tu ḡena mero ḡesi mo ḡasi ai asi eraḡeto, ḡena mero tu ḡereḡari moḡo ḡeraḡeto ema ḡevanaḡi-iaḡoto.

23 Ḣasi kotari Tiberia na ma ḡeiaḡomato, kou rikinai ḡema darokauto. Ḣia ḡedarokauto gabuna moḡa tu, Vereḡauka na beredi Barau evaḡa-namoato murinai, tarimarima evinirito, ḡeḡanirito gabuna sevinai.

24 Mo tarimarima ḡeriba-maoroto, Iesu ma ḡena mero ḡesi monai tu asiḡina, benamo mo ḡasi ai ma ḡeraḡekauto, Kaperanauma ḡana ḡevanaḡi-iaḡoto, Iesu ḡea vetauato.

Iesu tu maḡuri ḡaniḡanina

25 Tarimarima na Iesu kou tavi ta kefonai ḡedoḡariato, benamo ḡekiraiato, ḡekirato, “Vevaḡa-riba tarimamu, ḡoi tu aitoma mainai boma votu?”

26 Iesu na evaḡa-veserito, ekirato, “Au na moḡoni akiramini, ḡomi na au ḡovetauguni korana tu mo beredi ḡoḡanito, benamo ḡoḡani-maseto, a dia mo vetoḡa boruri ḡoḡitarito nai, ḡovetauguni.

27 Ma beḡe rakavani ḡaniḡaniri ḡauveiri asi boḡono vei, senaḡi ḡaniḡani roḡo betanu-iaḡoni, beiaḡoni mo, maḡuri vanaḡivanaḡi, ḡauveina boḡono vei. Mo ḡaniḡani tu Tarimarima Natuna na bevinimini, korana Tamana Barau na ḡia ḡenai vetoḡa ta eveiato, mo tu ḡia evaḡa-moḡoniato vetoḡana.”

28 Benamo ḡedanaḡiato, ḡekirato, “Ḣai Barau ḡena ura ḡauveiri ḡaveini baḡa toni tu kara baḡana veia?”

29 Iesu na evaḡa-veserito, ekirato, “Barau ḡena ḡauvei ḡomi na boḡono veia etoni ḡauveina tu maiḡa moḡo: Etuḡuato tarimana boḡono vaḡa-moḡonia.”

30 Ḣia na ma ḡedanaḡiato, ḡekirato, “Ḣoi na ḡai ḡema tu kamara vetoḡa boruna boveiani baḡa ḡitaiani, benamo ḡoi baḡa vaḡa-moḡonimuni? Ḣoi na kara boveiani?”

31 Ḣai senema na tu mana ḡeḡaniato tano fakanai, Buka Vevaḡa nuḡanai ekirani kavana, maiḡesi ekirani, ‘Ḣia na beredi guba na evini-riḡorito ḡeḡanito.’ ”

32 Iesu na evaḡa-veserito, ekirato, “Moḡoni veḡata akiramini, dia Mose na mo beredi guba na evinimito. Asiḡi. Au Tamagu na tu moḡoni beredi korikorina guba na evinimini.

33 Korana Barau ḡena beredi tu guba na emariḡoto tarimana. Ḣia na tanobarai ḡetanuni tarimari maḡuri evinirini.”

34 Benamo ḡia na ḡekiraiato, ḡekirato, “Vereḡauka, mani beredi ḡaro mabarari ai bono vinima.”

35 Iesu na ekirarito, ekirato, “Maḡuri beredina tu au maiḡegu. Au ḡegu ai beiaḡomani tarimana tu asi ma bevitoani, ema au bevaḡa-moḡoniguni tarimana tu, bokana asi ma bekokeni.

³⁶ Senaĝi au na ĝomi tu varau akiramito, ĝoĝitaguni, senaĝi asi ĝovaĝa-moĝoniguni.

³⁷ Tamagu na au eviniguto tarimari mabarari tu, au ĝegu ai beĝe iaĝomani, ema deikara au ĝegu ai beĝe iaĝomani tarimari, au na asi balai-ĝenoĝoirini.

³⁸ Korana au guba na amariĝoto tu, dia au ĝegu ura bana veia ĝana, senaĝina au etuĝuguto Barauna ĝena ura bana veia ĝana.

³⁹ Ema au etuĝuguto Barauna ĝena ura tu, au eviniguto tarimari mabarari ta asi bana vei-rekwa rekwaia, a mabarabarari mase na ma bana vaĝa-variĝisi ĝenoĝoiri ĝaro magonai.

⁴⁰ Korana au Tamagu ĝena ura tu, Natuna beĝe ĝitaiani ema beĝe vaĝa-moĝoniani tarimari mabarari na maĝuri vanaĝivanaĝi beĝe ĝabiani, ma ĝaro dokonai ma bavaĝa-variĝisi ĝenoĝoirini.”

⁴¹ Benamo Iuda tarimari ĝemugu-muguto, korana ĝia ekirato, “Au tu guba na amariĝoto beredina.”

⁴² Benamo ĝekirato, “Mai tarima tu Iesu, Iosefa natuna, nene? Ĝia tamana e sinana tu ĝita ribara. Ma kamara dabarai ĝia tu ekirani, ‘Au tu guba na amariĝoto?’”

⁴³ Iesu na evaĝa-veserito, ekirato, “Ĝomi tauĝemi fakami ai mugumugu ĝovaĝa-dokoa.

⁴⁴ Au ĝegu ai ta asi beiaĝoma-kavani, senaĝina Tamagu, au etuĝuguto Barauna, ĝia na deikara au ĝegu ai beinu-kaviani tarimana moĝo. Ema au ĝegu ai beiaĝomani tarimana tu, au na ĝaro dokonai mase na bavaĝa-variĝisi ĝenoĝoiani.

⁴⁵ Peroveta tarimari na maiĝesi ĝetoreato, ‘Ĝia mabarari Barau na bevaĝa-ribarini.’ Tamagu ĝeseĝaĝi-viniani ema ĝenana riba ĝeĝabini tarimari mabarari tu, au ĝegu ai beĝe iaĝomani.

⁴⁶ Au tu asi akirani, tarima ta na Tamagu eĝitaiato atoni, senaĝi Barau ĝenana eiaĝomato tarimana ĝereĝana na moĝo Tamagu eĝitaiato.

⁴⁷ Moĝoni akiramini, au evaĝa-moĝoniguni tarimana na maĝuri vanaĝivanaĝi beĝabiani.

⁴⁸ Maĝuri beredina tu au maiĝegu.

⁴⁹ Ĝomi senemi na tano fakanai mana ĝeĝanito-ĝoi, senaĝi ma ĝemaseto.

⁵⁰ A guba na emariĝoni beredina tu maiĝea, ĝia beĝaniani tarimana tu asi bemaseni.

⁵¹ Au tu maĝuri beredina guba na amariĝoto. Tarima ta na mai beredi beĝaniani, ĝia tu bemaĝuri-vanaĝi vanaĝini. Mai beredi au na baviniiani tu au viriĝogu. Au viriĝogu bavini-fitoĝaiani korana tu, tanobarai ĝetanuni tarimari na maĝuri beĝene ĝabia ĝana.”

⁵² Mainana Iuda tarimari tauĝeri fakari ai veĝare-veĝare baregona eĝorato, ĝia ĝekirato, “Mai tarima na tu kamara dabarai ĝia viriĝona bevinirani bita ĝaniani?”

⁵³ Iesu na ekirarito, ekirato, “Moĝoni akiramini, bema ĝomi na Tarimarima Natuna viriĝona asi boĝo ĝaniani ema rarana asi boĝo niuani nai, ĝomi nuĝami ai maĝuri asi betanuni.

⁵⁴ Deikara na au viriĝogu beĝaniani ema raragu beniuani tarimana tu, maĝuri vanaĝivanaĝi beĝabiani, ema au na ĝaro dokonai mase na bavaĝa-variĝisi ĝenoĝoiani.

⁵⁵ Korana au viriĝogu tu ĝaniĝani korikorina, ema au raragu maki niuniu dagarana korikorina.

⁵⁶ Deikara au viriĝogu beĝaniani e raragu beniuani tarimana tu, au nuĝagu ai betanuni, ema au maki ĝia nuĝanai batanuni.

⁵⁷ Tamagu mağurina na etuğuguto ema au tu ġia koranai amağurini. Moğa ilailanai au viriğogu beğaniani tarimana maki bemağurini, korana au amağurini.

⁵⁸ Au tu guba na emariğoto beredina maiğegu. Ġomi senemi tu mana ġeğanito ma ġemaseto. Senaği mai beredi beğaniani tarimana tu bemağurivanaği vanağini.”

⁵⁹ Iesu na maiğeri guruğa Iuda tarimari rubu ai ekirağirito, Kaperanau-mai evevağa-ribato-ğoi nuğanai.

Mağuri vanağivanaği guruğari

⁶⁰ Iesu ġena mero ġutuma na mai guruğa ġeseğağiato nai tu, ġekirato, “Mai vevağa-riba guruğana tu gwağigi rakava, dei na beğabi-rağeani.”

⁶¹ Iesu ribana ġena mero na mo guruğa ġemugumugu-iağiato-ğoi, benamo ekirarito, ekirato, “Mai guruğa na bevağa-dağa-rağemi?”

⁶² Bema ġomi na Tarimarima Natuna boğo ġitaiani, beğenoğoi-varağeni, etanu-iağiato gabuna ġana tu kamasi?

⁶³ Barau Iaukana na mağuri evinirani; tauğani na asi bevağa-kavarani. Au na avağa-guruğamini guruğari tu Iauka, ema ġia nuğari ai tu mağuri etanuni.

⁶⁴ Senaği ġomi kotari na tu asi ġovağa-moğoniguni.” Iesu ribana tovo-tovona na veğata, deikara ta na tu asi evağa-moğoniato-ğoi ema deikara na maki ġia berevaiani.

⁶⁵ Ma ekirato, “Moğesina naima au na akiramito, ta au ġegu ai asi beiağoma-kavani, senaği Tamagu na bevağa-moğoniani tarimana vau beiağomani.”

⁶⁶ Mo guruğa ġeseğağiato, monana Iesu ġena mero ġutuma ġia ġenana ġeraka-veğitato, ema ġia ġesi asi ma ġerakao-vegogoto-ğoi.

⁶⁷ Benamo Iesu na ġena mero gabanana ruarua (12) edanağirito, ekirato, “Ġomi maki ġourani boğono raka-veğita ba?”

⁶⁸ Simona Petero na evağa-veseato, ekirato, “Vereğauka, ġai tu deikara ġenai ma bağa iağoni? Mağuri vanağivanaği guruğari tu ġoi ġemu ai.

⁶⁹ Ġai na ġavağa-moğonimuni ema ġariba-korikorini, ġoi tu Barau ġena Veğa Tarimana.”

⁷⁰ Iesu evağa-veseto, ekirato, “Au na ġomi gabanana ruarua (12) ağabi-viriğimito nene? Senaği sebomu ta tu bodiabolo.”

⁷¹ Ġia na tu Iudas, Simona Isakariota natuna, ekirağiato. Iudas maki mo mero gabanana ruarua (12) fakari merona ta, senaği ġia na Iesu vau berevaiani.

7

Iesu ma tarina merori ġesi

¹ Moğa murinai Iesu tu Galileai erakaoto-ğoi. Ġia asi eurato, Iudea ġana bene iağo, korana Iuda tarimari monai ġeri ura tu, ġia beğene vağia.

² Iuda tarimari ġeri Fouta Verekona ġarona ekavinağito. (Mai fouta verekona ġeveiato-ğoi nai tu, fouta ġeragato-ğoi, benamo nuğari ai ġetanuto-ğoi, korana seneri tano fakanai fouta nuğari ai ġetanuto-ğoi, moğa beğene tuğamaği-iağia ġana).

³ Benamo Iesu tarina merori na ġekiraiato, ġekirato, “Mai gabu noragakwane, Iudea ġana bono iağo, benamo oveirini dagarari ġemu mero na beğene gitari.

⁴ Korana deikara tauĝena bene vevaĝa-fofori etoni tarimana, beĝene ribaia uranai tu, kara ta asi bevei-vekuretoĝaiani. Ma ĝoi tu maiĝeri veiĝa oveirini, be tanobara mabarari ai novevaĝa-fofori!”

⁵ Korana Iesu tarina mabarari na maki ĝia tu asi ĝevaĝa-moĝoniato-ĝoi.

⁶ Moĝa lorinai Iesu na ekirarito, ekirato, “Au ĝegu ĝaro tu roĝosi bene raĝasi. A ĝomi ĝemi ai ĝaro mabarari tu loriri ai moĝo.

⁷ Tanobara na ĝomi tu asi ebaru-vinimini, senaĝi au tu ebaru-viniguni, korana au tu veiĝa rakavari eveirini dagarari akiraĝi-foforirini.

⁸ Ĝomi boĝono iaĝo mo vereko ĝana. A au tu asi baiaĝoni, korana au ĝegu ĝaro korikori tu roĝosi roĝo bene raĝasi.”

⁹ Iesu moĝesi ekirato, benamo Galileai etanuto.

Iesu Ierusalem ai

¹⁰ Iesu tarina merori ĝeiaĝoto mo vereko ĝana, muriri ai Iesu maki ma eiaĝoto. Senaĝi asi eraka-foforito, a vekuretoĝai eiaĝoto.

¹¹ Mo vereko gabuna Iuda tarimari na tu mo vereko nuĝanai ĝevetauato-ĝoi, ĝevedanaĝi-vedanaĝito-ĝoi, ĝekirato-ĝoi, “Ĝia tu ainai?”

¹² Mo ĝutuma-bara nuĝanai Iesu kiraĝi-ĝairiĝairina tu ebarego-rakavato. Tarima kotari ĝekirato-ĝoi, “Ĝia tu tarima namona” ĝetato. Ma kotari tu ĝekirato-ĝoi, “Asiĝi, ĝia na tarimarima eĝorikau-darere darererini.”

¹³ Senaĝi tarima ta na asi eguruĝa-iaĝi foforiato, korana ĝia mabarari Iuda vereri gariri ĝeveito-ĝoi.

¹⁴ Vereko ĝarori kotari ĝekorito, kotari roĝo moĝeri nuĝanai vau, Iesu Rubu Veaĝai eraka-toĝato, benamo evevaĝa-ribato.

¹⁵ Benamo Iuda tarimari ĝeĝaba-vedaureato, ĝekirato, “Mai tarima vevaĝa-riba guruĝari tu kamasi eribato, ĝia vevaĝa-riba gabuna ta ĝana riba-vetau tu asi eiaĝoto.”

¹⁶ Iesu evaĝa-veseto, ekirato, “Kara au avevaĝa-riba iaĝini tu dia au ĝegu vevaĝa-riba, senaĝi au etuĝuguto Barauna ĝenana ĝeiaĝomani.

¹⁷ Bema tarima ta eurani Barau ĝena ura bene veiri etoni tarimana na, au ĝegu vevaĝa-riba guruĝari beribarini. Beribani, au ĝegu vevaĝa-riba guruĝari Barau ĝenana ĝeiaĝomani, o au tauĝegu ĝeguna moĝo.

¹⁸ Tarima ta deikara ĝena ura guruĝari ekiraĝini tu, tauĝena arana vaĝa-raĝena dabarana evetauani. Senaĝi au etuĝuguto Barauna vaĝa-raĝena dabarana eveiani tarimana ĝenai tu, guruĝa moĝonina etanuni, a ĝia ĝenai ĝofaĝofa ta tu asi etanuni.

¹⁹ Mose na ĝomi taravatu tu evinimito, ene? Senaĝi ĝomi ta na mo taravatu tu asi ĝokorana-iaĝiani. Ma karase nai ĝomi na au tu ĝovaĝigu ĝotoni?”

²⁰ Mo tarimarima ĝutuma ĝevaĝa-veseto, ĝekirato, “Ĝoi tu iauka rakavana ta na eboroĝimuto. Deikara na nevaĝimu otoni?”

²¹ Iesu na evaĝa-veserito, ekirato, “Au na mainai Ierusalem ai veiĝa boruna sebona aveiato nai, ĝomi mabarabarami nuĝami ĝefarevaĝini.

²² Mose na mero tauĝaniri kefi-lamavaĝi veiĝana evinimito, moĝa lorinai ĝomi na mero keiri Sabadi ai maki kefiri ĝolama-vaĝirini. Mo kefi-lamavaĝi veiĝana tu dia Mose na esinaiato, senaĝi ĝomi senemi na ĝesinaiato.

²³ Bema mero tauĝaniri kefiri Sabadi ai ĝolama-vaĝirini Mose ĝena taravatu boĝo vanaĝiani ĝesi, kara dainai au tu ĝobaru-viniguni, Sabadi ai tarima ta bavaĝa-namo ginikaua nai, ei?

²⁴ Ĝomi na dagara tu murikari vetoĝari ai asi boĝono ĝita-viriĝiri, senaĝi dagara mabarari veiĝa roroĝotori ai boĝono ĝita-viriĝiri.”

Mai tarima tu Keriso ba?

25 Benamo Ierusalemata tarimari kotari ġekirato, “Mai beġene vaġia ġetoni tarimana tu maiġa.

26 Ġoġitaia, ġia tu ma guguraġina ġesi eguruġani, ma ta na ġenai guruġa ta asi ekiraġiani. Ba betaġu kanisoro tarimari beġe riba, Keriso korikorina tu maiġa.

27 Senaġi Keriso, (Barau na ekiraġi-toreato vevaġa-maġuri tauna), beiaġomani nai, ta asi beribani ġia tu ainana beiaġomani. A mai tarima ainana eiaġomato ġita tu mabarara ma ribara.”

28 Iesu roġo Rubu Veaġai evevaġa-ribato-ġoi nuġanai, eguruġa-baregato, ekirato, “Moġoni, ġomi ma ribami au tu deikara e ainana aiaġomato. Senaġi au tu dia tauġegu ġegu urai moġo aiaġomato. Au etuġuguto Barauna tu moġoni. Ma ġomi tu asi ribami ġia.

29 Senaġi au ġia tu ma ribaġu, korana au tu ġia ġenana aiaġomato e ġia na etuġuguto.”

30 Benamo ġeġabi-taria ġetato, senaġi tarima ta ġimana ġia ġenai asi evenabakauto, korana ġena ġaro korikori tu roġosi bere votu bene.

31 Senaġi tarimarima vovoka mai ġutuma nuġanai ġia ġevaġa-moġoniato, ġekirato, “Keriso beiaġomani nai, vetoġa boruri veiveiri ai mai tarima bevanaġiani ba?”

Nariġau tarimari ġetuġurito Iesu beġene ġabia ġana

32 Farisea tarimari ġeseġaġito, tarimarima ġutuma na mo guruġa Iesu ġenai ġekiraġi-ġairiġairito-ġoi. Moġa ġaramanai Farisea tarimari e Rubu Veaġa vereri baregori na Rubu Veaġa ġitaġauna tarimari kota ġetuġurito, Iesu beġene ġabia ġana.

33 Iesu ekirato, “Au tu ġaro viravira moġo ġomi ġesi bita tanuni, moġa murinai ma baraka-veġitani, etuġuguto Barauna ġenai baiaġoni.

34 Ġomi na boġo vetauguni, senaġi asi boġo doġariguni; ema au batanuni gabuna ġana, ġomi tu asi boġo iaġoni riba.”

35 Benamo Iuda tarimari tauġeri ġevedanaġito, ġekirato, “Ġia tu aiġana beiaġoni, be ġita na asi bita doġariani riba etoni? Betaġu ġia tu beiaġoni irau bese tarimari ġeri tanobara ġana, Iuda tarimari ġutuma maki ġia fakari ai ġetanuni gaburi, monai irau bese tarimari bea vaġa-ribarini.

36 Mai tu kamara guruġa ġia na ekiraġiani, ekirani, ‘Boġo vetauguni, senaġi asi boġo doġariguni,’ ema, ‘Au batanuni gabuna ġana ġomi tu asi boġo iaġoni riba?’”

Maġuri eviniani nanuna

37 Vereko magona ġarona, mo tu ġaro barego lelevaġina, Iesu eruġa-vaesito, benamo eguruġa-fouto, ekirato, “Deikara nanu na bokana bekokeni tu, au ġegu ai bene iaġoma, nanu benema niu.

38 Buka Veaġa nuġanai ekirani ilailanai, ekirani, ‘Au bevaġa-moġoniguni tarimana nuġana na tu maġuri nanuna beġaru-rosini.’ ”

39 Iesu na Iauka moġesi ekiraġiato-ġoi, kamara tarima Iesu ġevaġa-moġoniani tarimari na vau beġe ġabiani. Mo ġaro ai Iauka Veaġa tu Barau na roġosi bere viniri, korana Iesu na Barau ġena mareva baregona maki roġosi bere ġabia nai.

Tarimarima tauġeri ġevetavito

40 Tarima kota mo ġutuma nuġari ai mo guruġa ġeseġaġiato, benamo ġekirato, “Moġoni, ġita na peroveta tarimana tanariani tarimana tu maiġea.”

41 Tarima kotari ġekirato, “Mai tu Keriso.” Senaġi kotari ġekirato, “Asiġi, Keriso tu Galilea na asi beiaġomani.

42 Buka Veaġa nuġanai ekirani, Keriso tu Davida besena na beiaġomani, ema Betelehemai, Davida etanuto-ġoi vanuġanai, bemaġurini.”

43 Moġesina naima tarima tauġeri fakari ai moġo ġevetore-kirato, korana Iesu ġaramanai.

44 Tarima kota ġeurato beġene ġabia, senaġina ta ġimana ġia ġenai asi evenabakauto.

Iuda vereri na Iesu asi ġevaġa-moġoniato

45 Rubu Veaġa ġitaġauna tarimari ġeġenoġoito, benamo Rubu Veaġa vereri baregori ema Farisea tarimari na ġedanaġirito, ġekirato, “Karase nai ġia tu asi boġo ġori-iaġomaia?”

46 Rubu Veaġa ġitaġauna tarimari ġevaġa-veseto, ġekirato, “Mai tarima eguruġani kavana, ta roġosi bene guruġa.”

47 Benamo Farisea tarimari na ġekirarito, ġekirato, “Be, ġomi maki ġia na beġofami?”

48 Veġorikau tarimana ta o Farisea tarimana ta na ġia evaġa-moġoniani ba? Asiġina!

49 A mai tarimarima na ġevaġa-moġoniani, ġia tu Mose ġena taravatu asi ribari tarimari. Barau na ġeri rakava voiri bevinirini.”

50 Farisea tarimana ta monai arana Nikodemo. Ġia tu boġi ta eiaġoto Iesu ea ġitaiato tarimana. Ġia na ekirarito, ekirato,

51 “Ġita ġera taravatu ekirani, tarima tu ġena guruġa ġeseġaġi-guineani roġo, moġa murinai vau ġena rakava voina metona beġe viniani.”

52 Ġia na ġevaġa-veseato, ġekirato, “Ġoi maki Galilea tarimamu ba? Buka Veaġa nuġana bono vetaua, monana boribani, peroveta tarimana ta Galilea na tu asi beiaġomani.”

[53 Benamo tarimarima mabarari ġeri numa ġana ġeiaġoto.

8

Veġura-vanaġi vavinena

1 Senaġi Iesu tu Olive Ġorona ġana eiaġoto.

2 Ma elaġanito boġiboġi iamoiamo tu ġia ma eġenoġoito Rubu Veaġa ġana. Monai tarimarima mabarari ġeiaġomato ġenai, ġetanu-ġeġeraġiato, benamo etanu-tarito, evaġa-ribarito.

3 Benamo taravatu ġevevaġa-riba iaġirito-ġoi tarimari e Farisea tarimari na vavine ta Iesu ġenai ġeġori-iaġoato. Mo vavine tu eveġura-vanaġito-ġoi nuġanai ġedoġariato, benamo ġeġori-iaġoato mo, Iesu ġesi ġetanu-taġoto-ġoi tarimari mabarari ġoirari ai ġea vaġa-ritoġoato.

4 Iesu ġekiraiato, ġekirato, “Vevaġa-riba tarimamu, mai vavine tu eveġura-vanaġini-ġoi nuġanai beġe ġoitaġoa.

5 Ma Mose ġena taravatu ekirani, moġesi beġe veini vavineri tu, fore na baġana taki-maseri. Ġoi tu kara mani otoni?”

6 Moġesi ġekirato tu, Iesu ġeriba-ġaniato, beġene vaġa-daġaia ġana. Senaġi Iesu etutuġu-tarito, tano ai didina ta na etoretoreto.

7 Ġia na roġo Iesu ġedanaġiato-ġoi nai, eruġa-vaisito, benamo ekirarito, ekirato, “Deikara ġomi fakami ai roġosi roġo bene vei-rakava nai tu, ġia na fore bene ġabia, mai vavine bene ġidara-guinea.”

8 Benamo Iesu ma etoġa-tarito, tano ai ma etoretoreto.

⁹ Ĝia na mo guruĝa ĝeseĝaĝiatio nai, ĝia tata nuĝari ai ĝeribato ma ĝeri vei-rakava, benamo irau sebori-sebori ĝerakaraka-veĝitato; tau ĝaukari ĝeraka-guineto murinai vau ĝuru-gabi ma ĝerakato. Iesu ĝereĝana moĝo etanuto, monai roĝo eruĝa-taĝoto-ĝoi vavinena ĝesi.

¹⁰ Ĝia eruĝa-vaisito nai tu, tarima ta asi eĝitaiato, mo vavine moĝo, benamo edanaĝiatio, ekirato, “Ĝoi beĝe vaĝa-daĝamu tarimari tu aiĝeri? Ta na ĝemu rakava voina metona asi bevinimu?”

¹¹ Mo vavine evaĝa-veseto, ekirato, “Vereĝauka, sebona ta maki asiĝina.” Benamo Iesu ekirato, “Au na maki ĝemu rakava voina metona asi bavini-muni. Noiaĝo, senaĝi asi ma bono vei-rakava ĝenoĝoi.”]

Iesu tanobara mamana

¹² Benamo Iesu na tarimarima ma eĝobata-vinirito, ekirato, “Au tu tanobara mamana. Deikara au murigu ai berakani tarimana tu, mukunai asi berakani, senaĝi maĝuri mamana beĝabiani.”

¹³ Farisea tarimari na ĝekiraiato, ĝekirato, “Ĝoi tu tauĝemu ovekiraĝini; be ĝoi ĝemu vekiraĝi tu asi moĝoni.”

¹⁴ Iesu evaĝa-veseto, ekirato, “Asiĝi, au tauĝegu avekiraĝini, senaĝina au na kara akiraĝiani tu moĝoni. Korana au ribagu ainana aiaĝomato ema aiĝana ma baiaĝoni. A ĝomi tu asi ribami au ainana aiaĝomato ema aiĝana ma aiaĝoni.

¹⁵ Ĝomi tu tarimarima ĝeri vevaĝa-maoro dabaranai ĝovevaĝa-maoroni. Au na ta tu asi avavaĝa-maoroni.

¹⁶ Senaĝi bema au havevaĝa-maoroni nai, ĝegu vevaĝa-maoro tu moĝoni. Korana au tu dia ĝereĝagu moĝo avevaĝa-maoroni, senaĝina Tamagu, au etuĝuguto Barauna, au ĝesi baĝa vevaĝa-maoroni.

¹⁷ Ĝomi ĝemi taravatu ai maki maiĝesi ekirani, tarima ruarua na guruĝa sebona moĝo ĝekiraĝiani nai tu moĝoni.

¹⁸ Au tu tauĝegu avekiraĝini; ema Tamagu, etuĝuguto Barauna, na maki au ekiraĝiguni.

¹⁹ Benamo ĝia na ĝedanaĝiatio, ĝekirato, “Ĝoi tamamu tu ainai?” Iesu evaĝa-veseto, ekirato, “Ĝomi tu asi ribami au, ma Tamagu maki asi ribami. Bema au boĝoro ribagu tu, Tamagu maki ĝoro ribaia.”

²⁰ Iesu na mai ĝena guruĝa tu Rubu Veaĝai evevaĝa-ribato-ĝoi, moni ĝevaĝa-vegogoto-ĝoi mauĝana gabunai. Tarima ta asi evenabakauto ĝenai, korana ĝia ĝena ĝaro roĝosi bere votu.

Au baiaĝoni gabuna ĝana ĝomi tu asi boĝo iaĝoni riba

²¹ Iesu na ma evaĝa-guruĝa ĝenoĝoirito, ekirato, “Au tu araka-veĝitani. Ma ĝomi na boĝo vetauguni, senaĝi ĝemi vei-rakava nuĝanai boĝo maseni. Au baiaĝoni gabuna ĝana, ĝomi tu asi boĝo iaĝoni riba.”

²² Benamo Iuda tarimari ĝekirato, “Ĝia bekira, ĝia beiaĝoni gabuna ĝana ĝita tu asi bita iaĝoni. Moĝa tauna ĝia tu tauĝena bevevaĝini ba?”

²³ Iesu evaĝa-veseto, ekirato, “Ĝomi tu mai tanobara maiĝa mainana eveimito, senaĝi au tu tuĝuna na amariĝoto. Ĝomi tu mai tanobara tarimari, senaĝi au tu dia mai tanobara tarimagu.

²⁴ Moĝa lorinai au na ĝomi bakirami, ĝemi rakavai boĝo maseni. Korana bema au, Keriso, asi boĝo vaĝa-moĝoniguni nai tu, ĝemi rakavai boĝo maseni.”

²⁵ Benamo ĝia na ĝedanaĝiatio, ĝekirato, “Ĝoi tu deikara?” Iesu na ma evaĝa-veserito, ekirato, “Tovotovonai veĝata ĝemi akiraĝito-ĝoi kavana.

²⁶ Guruḡa vovoka bara kiraḡiri ema bara vevaḡa-maoro vinimi, korana ḡemi veiḡa lorinai. Senaḡina sebona moḡo, au etuḡuguto Barauna tu moḡoni, ma ḡia ḡenana aseḡaḡito guruḡari tanobarai ḡetanuni tarimari akira-vararini.”

²⁷ ḡia tu asi ḡetuḡamaḡi-fakato Iesu na mo tu Tamana ekiraḡiato-ḡoi.

²⁸ Benamo ma ekirarito, ekirato, “ḡomi na Tarimarima Natuna ḡau ḡesi boḡo ḡabi-vaisiani murinai vau, boḡo ribani au tu Keriso. Benamo boḡo ribani, au ḡereḡagu na kara ta ḡegu urai moḡo asi aveiani, senaḡi Tamagu na au kara evaḡa-ribaguni guruḡari moḡo, au na ḡomi akira-varamini.

²⁹ Ema au etuḡuguto Barauna tu au ḡesi, au asi eraga-kwaneguni; korana au na vanaḡi-vanaḡi tu ḡia na eiaku-iaḡirini veiḡari moḡo aveirini.”

³⁰ Tarima vovoka na Iesu ḡevaḡa-moḡoniato, maiḡeri guruḡa ekiraḡirito-ḡoi nai.

Aberahamo natuna

³¹ Benamo Iesu na mo Iuda tarimari, ḡia ḡevaḡa-moḡoniato tarimari, ekirarito, ekirato, “Bema ḡomi na au ḡegu vevaḡa-riba guruḡari boḡo korana-iaḡirini nai, ḡomi tu moḡoni au ḡegu mero korikori.

³² Benamo guruḡa moḡonina boḡo ribaiani, ma mo guruḡa moḡonina na beruḡa-vaḡimini, dagara ta na asi ma bebarubarumini.”

³³ ḡia ḡevaḡa-veseto, ḡekirato, “ḡai tu Aberahamo garakana ema ḡai tu tarima ta ḡena tuḡu-rakaorakao tarimanai tu asi ḡaiḡoto. Ma ḡoi kamasi nai tu okirani, ‘Guruḡa moḡonina na beruḡa-vaḡimini?’”

³⁴ Iesu na evaḡa-guruḡarito, ekirato, “Akira-korikorimini, deikara rakava eveini, ḡia tu vei-rakava ḡena tuḡu-rakaorakao tarimana.

³⁵ Tuḡu-rakaorakao tarimana tu numai asi betanu-vanaḡi vanaḡini, senaḡi numa tarimana natuna tu numai betanu-vanaḡi vanaḡini.

³⁶ Moḡa lorinai bema Barau Natuna na beruḡa-vaḡimini nai, ḡomi tu boḡo raka-vaḡi korikorini, dagara ta na asi ma bebarubarumini.

³⁷ Au ribagu ḡomi tu Aberahamo garakana, senaḡi ḡomi ḡourani, au tu boḡono vaḡigu, korana ḡomi na ḡegu vevaḡa-riba guruḡari tu, asiḡina ḡinavaḡi moḡo ḡoḡabi-raḡerini.

³⁸ Au na tu kara Tamagu ḡenai aḡitarito dagarari ḡomi akira-varamini, a ḡomi tu tamamī ḡenana ḡoseḡaḡito dagarari ḡomi na ḡoveirini.”

³⁹ ḡia na Iesu ma ḡevaḡa-veseato, ḡekirato, “ḡai tamama tu Aberahamo.” Iesu na evaḡa-veserito, ekirato, “Bema ḡomi moḡoni Aberahamo natuna nai, ḡia na eveirito veiḡari ḡomi na maki ḡoro veiri.

⁴⁰ Au tu Barau ḡenana aseḡaḡirito guruḡari moḡoniri mabarari ḡomi akira-varamini, senaḡi ḡomi ḡourani tu, au ḡovaḡigu ḡotoni. Aberahamo moḡesi asi eveito.

⁴¹ ḡomi tu tauḡemi tamamī, (Diabolo), na kara eveini veiḡana ḡoveiani.” ḡia ḡevaḡa-veseto, ḡekirato, “ḡai tu dia kuḡa-gara tarimama. ḡai Tamama tu Barau moḡo ḡereḡana.”

Diabolo natuna

⁴² Iesu na ekirarito, ekirato, “Bema Barau moḡoni ḡomi Tamami nai tu, au ḡoro ura-vinigu. Korana au tu Barau sevina na aiaḡomato. Au ḡegu urai asi aiaḡomato, senaḡi ḡia na etuḡuguto.

⁴³ Karase nai au na kara akiraḡiani guruḡana asi ḡotuḡa-maḡi-fakani? Korana au ḡegu guruḡa tu asi ilaila boḡo seḡaḡirini.

⁴⁴ ḡomi tu tamamī Diabolo ḡena tarimarima, be ḡomi ḡourani tu tamamī na euravini-rakavarini veiḡari boḡono veiri. Tovotovona na veḡata ḡia tu vevaḡi-deba tarimana ema guruḡa moḡonina tu asi ekorana-iaḡiani, korana

gia nuġanai guruġa moġonina ta tu asi etanuni. Ġia eġofaġofani, moġa tu ġia ġena maġuri korikori. Korana ġia tu ġofaġofa tarimana, ema ġofaġofa mabarari tamari.

⁴⁵ Senaġi au na ġomi tu guruġa moġonina akira-varamini, nuġanai ġomi na au tu asi ġovaġa-moġoniguni.

⁴⁶ Ġomi ta na au ġegu ai vei-rakava ta bodoġaria ba? A bema au na guruġa moġonina akiraġiani nai, kara dainai au tu asi ġovaġa-moġoniguni, ei?

⁴⁷ Barau natuna na Barau ġena guruġa beseġaġiani. A ġomi tu dia Barau natuna, moġa lorinai asi ġoseġaġini.”

Iesu ema Aberahamo

⁴⁸ Benamo Iuda tarimari na Iesu ġekiraiato, ġekirato, “Ġai tu moġoni ġamaoroni. Ġoi tu Samaria tarimamu ema iauka rakavana na beboroġimu.”

⁴⁹ Iesu evaġa-veseto, ekirato, “Au tu iauka rakavana na asi beboroġigu. Au tu Tamagu agubakauani, senaġi ġomi na au tu asi ġogubakauuni.

⁵⁰ Au tauġegu aragu vaġa-raġena dabarana asi avetauani; senaġi tarima ta na evetauani, ma ġia tu Kota eseġaġini tarimana.

⁵¹ Moġoni veġata, akiramini, au ġegu guruġa bekorana-iaġirini tarimana tu asi bemaseni.”

⁵² Iuda tarimari ġekirato, “Ġai toma baġa riba-ginikau, ġoi tu iauka rakavana na eboroġimuto. Aberahamo emaseto, peroveta tarimari maki ġemaseto, a ġoi okirani, deikara na ġoi ġemu guruġa bekorana-iaġirini tarimana tu asi bemaseni.

⁵³ Ġai tamama Aberahamo emaseto. Ġoi na ġia, tamama Aberahamo, ovanaġiato, ei? Ġia emaseto ema peroveta tarimari maki ġemase-ġosito. Ġoi otuġamaġini, ġoi tu deikara?”

⁵⁴ Iesu evaġa-veseto, ekirato, “Bema au tauġegu bara vevaġa-raġe, ġegu vevaġa-raġe tu asi tauna. Senaġina au tu Tamagu na evaġa-raġeguni. Ma ġia tu ġomi na ġokiraġiani, ġokirani, ġomi ġemi Barau ġotoni.

⁵⁵ Ġomi tu asi ribami ġia, senaġi au tu ma ribagu ġia. Bema au bara kira, au asi ribagu ġia, au tu ġofaġofa tarimagu ġomi kavana, senaġi au ma ribagu ġia ema ġena guruġa akorana-iaġirini.

⁵⁶ Ġomi tamami Aberahamo etuġa-maġito, au ġegu iaġoma ġarona beġitaiani etato, benamo eiakuto. Eġitaiato, benamo iauna enamoto.”

⁵⁷ Iuda tarimari na Iesu ġekiraiato, ġekirato, “Ġoi ġemu maġuri laġaniri tu gabana imaima (50) maki roġosi bene doġaria, ma kamasi tu Aberahamo oġitaiato otoni?”

⁵⁸ Iesu na evaġa-veserito, ekirato, “Moġoni akiramini, Aberahamo roġosi roġo bere ġora veġata, au tu atanuto-ġoi.”

⁵⁹ Benamo fore ġeġabito, ġetakia ġetato, senaġi Iesu egumuto, benamo vekaravari na Rubu Veaġa na eraka-rosito.

9

Iesu na mata-bubu tarimana evaġa-namoato

¹ Iesu eraka-vanaġito-ġoi nuġanai, tarima ta eġitaiato. Mo tarima tu mata-bubu emaġurito.

² Ġena mero na Iesu ġedanaġiato, ġekirato, “Vevaġa-riba tarimamu, deikara evei-rakavato, benamo mai tarima matana bubu emaġurito? Ġia ba tamana sinana?”

³ Iesu evaġa-veseto, ekirato, “Dia ġia ġena rakava o dia tamana sinana ġeri rakava dainai, senaġi maiġesi evetoreto korana tu, Barau ġena seġuka ġia ġenana bene fofori ġana.

⁴ Au etuḡuguto Barauna ḡena ḡauvei tu laḡani nuḡanai bisini veiri. Boḡi mani eiaḡomani, ma ta asi beḡauveini riba.

⁵ Au roḡo tanobarai atanuni nuḡanai, au tu tanobara mamana.”

⁶ Mai guruḡa ekiraḡiato murinai, Iesu tano ai ekanunuto. Kanununa na nigo emoḡeato, benamo mo nigo na mata-bubu tarimana matana eianaiato.

⁷ Ma ekiraiato, ekirato, “Noiaḡo, ḡoiramu Siloam kounai noa ḡuriḡia.” Siloam anina tu “Barau na etuḡuato tarimana.” Benamo eiaḡoto, ḡoirana ea ḡuriḡiato, ma eḡenoḡoito nai, matana tu varau eiaḡaiato.

⁸ Ḣia sevina tarimari e vanaḡi-vanaḡi enoḡinoḡito-ḡoi gabunai ḡeḡitaiato-ḡoi tarimari ḡevedanaḡito, ḡekirato, “Mai tarima tu noḡinoḡi gabunai etanu-taḡoto-ḡoi tarimana ene?”

⁹ Kota ḡekirato, “Tarimana tu maniḡa.” Senaḡi kota ḡekirato, “Asiḡina, mani tu tarima boruna ta, senaḡina ḡitaḡitana moḡo ḡia kavana.” Benamo ḡia tauḡena ekirato, “Tarimana tu au maiḡegu.”

¹⁰ Tarimarima ḡekirato, “Be ḡoi matamu tu kamasi boiaḡaia?”

¹¹ Ḣia evaḡa-veseto, ekirato, “Mo tarima arana Iesu, ḡia na nigo bemoḡea, ma au matagu ai beianaia, benamo bekiragu, ‘Siloam kounai noa ḡuriḡia.’ Baiḡo, baḡuriḡia, benamo matagu baiḡaia.”

¹² Ma ḡedanaḡiato, ḡekirato, “Tarimana tu aiḡa?” Ḣia evaḡa-veseto, ekirato, “Au asi ribagu.”

Farisea tarimari na mo enamoto tarimana ḡevedanaḡi-iaḡiato

¹³ Benamo matana enamoto tarimana Farisea tarimari ḡeri ai ḡeḡori-iaḡoato.

¹⁴ Mo ḡaro Iesu na nigo emoḡeato, ma mata-bubu tarimana matana evaḡa-namoato tu Sabadi ḡarona.

¹⁵ Moḡa lorinai Farisea tarimari na ma ḡedanaḡi-ḡenoḡoiato, kamasi matana eiaḡaiato. Ḣia na ekirarito, ekirato, “Mo tarima na matagu nigo na eianaiato, benamo ḡoiragu aḡuriḡiato, ma toma tu aboḡeboḡeni.”

¹⁶ Farisea tarimari kotari ḡekirato, “Mai tarima tu dia Barau ḡenana eiaḡomato, korana ḡia na Sabadi asi ekorana-iaḡiani.” Ma kotari ḡekirato, “Vei-rakava tarimari na moḡesina veiḡari tu kamasi beḡe veirini?” Monana ḡia tauḡeri fakari ai ḡevetavi-kirato.

¹⁷ Benamo Farisea tarimari na mo tarima ma ḡedanaḡiato, ḡekirato, “Ḣoi okirani ḡia na matamu bevaḡa-iaḡaia otoni? Ḣoi na ḡia tu kamasi oḡitaiani?” Ḣia evaḡa-veseto, ekirato, “Ḣia tu peroveta tarimana.”

¹⁸ Iuda tarimari na mai tarima ḡena guruḡa asi ḡevaḡa-moḡoniato, korana ekirato, “Tovotovonai au matagu tu bubu, a mai vau aboḡeboḡe-ginikauni.’ Moḡa lorinai tamana e sinana ḡekea-iaḡomarito.

¹⁹ Benamo ḡia na ḡedanaḡirito, ḡekirato, “Mai tu ḡomi natumi ba? Ma moḡoni ḡia tu mata-bubu emaḡurito ḡotoni? Ma kamasi nai tu vau mai ma eboḡe-boḡeni?”

²⁰ Benamo tamana e sinana ḡevaḡa-veseto, ḡekirato, “Ḣai ribama, ḡia tu ḡai natuma, ema ḡai ribama maki, ḡia tu mata-bubu emaḡurito.

²¹ Senaḡi ḡai tu asi ribama, maitoma tu kamara dabarai eboḡeboḡeni. Ḣai maki asi ribama, dei na matana bevaḡa-namoa. Ḣodanaḡia, ḡia tu mero barego, be tauḡena bevaḡa-veseni.”

²² Tamana e sinana moḡesi ḡekirato, korana Iuda tarimari gariri ḡeveito nai. Korana Iuda tarimari na ḡevaḡa-moḡoniato, tarima ta na Iesu beki-raḡiani Keriso betoni tarimana tu, rubu na beḡe tore-veḡitaiani.

23 Moġesi naima tamana e sinana ġekirato, “Ġia mero barego, be ġodanaġia,” ġetato.

24 Matana enamoto tarimana ma ġekea-ġenoġoiato, benamo ġekiraiato, ġekirato, “Barau novaġa-raġea, be noguruġa-korikori. Ġai ribama, ġoi matamu bevaġa-namoa tarimana tu vei-rakava tarimana.”

25 Matana enamoto tarimana evaġa-veseto, ekirato, “Au asi ribagu, ġia tu vei-rakava tarimana ba asiġi. Dagara sebona moġo ma ribagu: Au matagu tu bubu, senaġi toma tu aboġeboġeni.”

26 Ġia na ġekiraiato, ġekirato, “Mo tarima tu kara eveiato ġoi ġemu ai? Ġoi matamu bubu na tu kamasi evaġa-fafaiato?”

27 Ġia evaġa-veseto, ekirato, “Au na ġomi tu varau bakira-varami, senaġi ġomi asi ġoseġaġini. Karase nai ġourani ma ġoseġaġi-ġenoġoi ġotoni? Ġomi maki ġia ġena mero ai boġono iaġo ġotoni ba?”

28 Benamo ġia na ġeguruġa-gwaġiġi viniato, ġekirato, “Ġoi neġi ġia ġena mero, ġai tu Mose ġena mero.

29 Ġai ribama Barau na Mose evaġa-guruġaiato. A mani tarima, ġai asi ribama ġia tu ainana eiaġomato!”

30 Matana enamoto tarimana evaġa-veseto, ekirato, “Ia, ġomi tu kamasi ma ġoguruġani, ma ġokirani ġomi tu asi ribami ġia tu ainana eiaġomato ġotoni? Senaġina ġoġitaia, ġia na tu au matagu bevaġa-namoa.

31 Ġita ma ribara, Barau na vei-rakava tarimari tu asi eseġaġi-vinirini, a deikara na ġia ġekorana-iaġiani e ġena ura veiġari ġeveirini tarimari, ġia na tu eseġaġi-vinirini.

32 Tanobara evesinato na veġata tarima ta roġosi tara seġaġi, tarima ta mata-bubu eġorato tarimana matana evaġa-iaġaiato.

33 Bema mai tarima Barau ġenana asi bere iaġoma, ġia na dagara ta asi bere veia riba.”

34 Ġia ġevaġa-veseto, ġekirato, “Ġoi tu omaġurito veġata na rakava tarimamu, ma kamasi tu ġai novaġa-ribama otoni?” Benamo rubu nuġana na ġelai-rosiato.

Farisea tarimari ġeri mata-bubu

35 Iesu eseġaġito, matana enamoto tarimana tu ġelai-rosiato, benamo tarimana edoġariato nai tu, ekiraiato, ekirato, “Tarimarima Natuna ovaġa-moġoniani ba, ei?”

36 Mo tarima evaġa-veseto, ekirato, “Vereġauka, ġia tu dei? Nokira-varagu, be bana vaġa-moġonia.”

37 Iesu na ekiraiato, ekirato, “Tarimana tu varau oġitaiani maiġa, ġoi initoma ġia ġesi ġoguruġa-guruġani.”

38 Benamo matana enamoto tarimana ekirato, “Vereġauka, avaġa-moġonimuni.” Benamo evetui-tarito, Iesu etoma-rakariġo viniato.

39 Iesu ekirato, “Au tu vevaġa-kota uranai mai tanobara ġana aiaġomato, mata-bubu tarimari beġene boġeboġe ġana, ema ġeboġeboġeni tarimari matari beġene bubu ġana.”

40 Farisea tarimari kota monai ġia ġesi, mai guruġa ġeseġaġiato, benamo ġekiraiato, ġekirato, “Ġoi okirani, ġai tu mata-bubu otoni?”

41 Iesu evaġa-veseto, ekirato, “Bema ġomi mata-bubu nai tu, ġomi asi ġemi rakava ġoro tanu, senaġi ġomi ġokirani ‘Ġai matama tu iaġataġo’ ġotoni, naima ġomi ġemi rakava tu roġo iatami ai.”

10

Mamoe narinariri tarimana

¹ Iesu ekirato, “Moĝoni, au na ĝomi akira-korikorimini, mamoe maĝuna ĝatama bokana na asi beraka-toĝani, senaĝi dabara ta na befaĝa-seĝini tarimana tu lema e verari-verari tarimana.

² A mamoe ĝitaĝauri tarimana tu ĝatama-boka na beraka-toĝani.

³ Ĝatama-boka narinarina tarimana na ĝena ĝatama-boka bekeoani, benamo mamoe na ĝia garona ĝeseĝaĝiani. Ĝia na ĝena mamoe arari evatorini, benamo eĝori-rosirini.

⁴ Ĝena mamoe mabarari eĝori-rosirini, benamo ĝia ĝoirari ai erakani, ma ĝena mamoe ĝia murinai ĝerakakauni, korana mamoe ma ribari ĝia garona.

⁵ A tarima boruna ta murina na tu asi beĝe iaĝoni, asiĝina ĝinavaĝi; tarima boruna ĝenana tu beĝe raga-kwareĝani, korana ĝia garona mamoe tu asi ribari.”

⁶ Iesu na mo barabore ekira-vararito, senaĝi ĝia tu asi ĝetuĝamaĝi-fakato.

Iesu tu mamoe ĝitaĝauri tarimana namona

⁷ Benamo Iesu na ma ekirarito, ekirato, “Au na moĝoni akiramini. Au tu mamoe ĝeri ĝatama-boka.

⁸ Ĝeiaĝoma-guineto tarimari mabarari tu lema e verari-verari tarimari. A mamoe na garori asi ĝeseĝaĝirito.

⁹ Au tu ĝatama-boka. Deikara au ĝeguna beraka-toĝani tarimana tu bemaĝurini. Beraka-toĝani, beraka-rosini, ema ĝaniĝani beĝoitaĝoni.

¹⁰ Lema tarimana tu asi beiaĝoma-kavani. Senaĝi ĝia tu lema beiaĝomani, vaĝivaĝi beiaĝomani, vevaĝa-rakava kwaikwai beiaĝomani. A au aiaĝomato tu, maĝuri beĝene ĝabia, ema maĝuri na beĝene vonuvonu-raĝe ĝana.

¹¹ Au tu mamoe ĝitaĝauri tarimagu namona. Mamoe narinariri tarimana namona tu ĝena maĝuri etore-tariani mamoe urari ai.

¹² Ĝauvei tarimana ĝevoiani vau mamoe eĝitaĝauni tarimana, ĝia tu dia mamoe ĝitaĝauri tarimana korikori, ema ĝia tu dia mamoe biagunari. Moĝa lorinai boĝa kwaivana rakavana eiaĝomani beĝitaiani nai, mamoe beiaĝuirini ma beraga-kwareĝani. Benamo boĝa kwaivana rakavana na beĝabi-taririni, benamo bevaĝa-gari lausirini.

¹³ Ma voina tarimana eraga-kwareĝani, korana ĝia tu vetuĝunaĝi tarimana ma voina, ema mamoe maki asi etuĝamaĝi-kaurini.

¹⁴ Au tu mamoe narinariri tarimagu namona. Ĝegu mamoe ribagu e ĝegu mamoe maki ma ribari au.

¹⁵ Vaĝa-ilailana Tamagu ribana au e au maki ribagu Tamagu kavana. Ema ĝegu maĝuri maki atore-tariani ĝia urari ai.

¹⁶ Au ma ĝegu mamoe irauri kotari ĝetanuni. Senaĝi ĝia mai seri nuĝanai tu asi tauri roĝo. Au na ĝia maki baĝori-iaĝomarini. Ĝia na au garogu beĝe seĝaĝiani, ema ĝia maki mai seri sebonai beĝe iaĝoni e ĝitaĝauri tarimana maki sebona.

¹⁷ Tamagu na eura-viniguni, korana ĝegu maĝuri tu atore-tariani, ema ma baĝabi-ĝenoĝoiani.

¹⁸ Tarima ta na au ĝegu maĝuri asi beĝabi-vaĝiani au ĝeguna. Au tauĝegu ĝegu urai atore-tariani. Au tu ma ĝegu seĝuka batore-tariani, ema ma ĝegu seĝuka baĝabi-ĝenoĝoiani. Moĝa tu au Tamagu na ekiraguto bana veia.”

¹⁹ Mai guruĝa ĝaramanai Iuda tarimari tauĝeri vekaravari ai moĝo ma ĝevewarekira-ĝenoĝoito.

²⁰ Tarima vovoka ĝekirato, “Ĝia tu iauka rakavana na beboroĝia, be bebabo. Karase nai ĝia ĝoseĝaĝi-viniani?”

21 Senaġi tarima kotari ġekirato, “Tarima ta iauka rakavana na be-boroġiani nai tu, maiġesi asi beguruġani. Iauka rakavana na mata-bubu tarimari matari tu kamasi bevaġa-fafarini?”

Iuda tarimari na Iesu ġebaru-viniato

22 Monai Rubu Veaġa Vaġa-veaġana Verekona Ierusalemaj ġarona eġabiato. Mo tu faraka ġueri nuġanai.

23 Ma Iesu tu Rubu Veaġai Solomona ġena touraġe na eraka-iaġoto-ġoi.

24 Benamo Iuda tarimari na ġeruġa-ġeġeraġiato, benamo ġedanaġiato, ġekirato, “Ġai tu roġo ġadaradarani. Aitoma vau bokira-varamani, ġoi tu deikara? Bema ġoi moġoni Keriso, (Barau na ekiraġi-toreato vevaġa-maġuri tauna), nai tu, ġemai novekiraġi-fofori ginikau.”

25 Iesu na evaġa-veserito, ekirato, “Au na tu varau akiramito, senaġina asi ġovaġa-moġoniguni. Au Tamagu aranai aveirini veiġari na tu au ġevaġa-foforiguni.

26 Senaġi ġomi na asi ġovaġa-moġoniguni, korana ġomi tu dia au ġegu mamoe.

27 Au ġegu mamoe na tu au garogu ġeseġaġiani. Ema au ribagu ġia, ema ġia tu au murigu ai ġerakani.

28 Benamo au na maġuri vanaġivanaġi avinirini, ema ġia tu asiġina ġinavaġi beġe maseni; ema ta na au ġeguna asi beġabi-ġerevaġirini.

29 Ġia tu au Tamagu na au eviniguto, e au Tamagu tu iaru-korokoro, ta na asi bevanaġiani. Ema ta na maki asi ilaila ġia ġena veġitaġau seġukana ġenana beġabi-ġerevaġirini.

30 Au ema au Tamagu tu sebona moġo.”

31 Benamo Iuda tarimari fore ma ġeġabito, ġetakia ġetato.

32 Iesu na ekirarito, ekirato, “Veġa namori vovoka ġomi ġoirami ai aveirito. Mo veġa mabarari tu au Tamagu na eviniguto bana veiri etato. Moġeri veġa mabarari fakari ai tu, kamara veġa ġaramanai ġourani au ġotakigu ġotoni?”

33 Iuda tarimari ġekirato, “Veġa namona ta ġaramanai ġoi tu asi ġatakimuni, senaġi ġoi na Barau okira-fitoġaiani nai. Ġoi tu tarimarima moġo, senaġi tauġemu Barau ai ovevaġa-iaġoni.”

34 Iesu na evaġa-veserito, ekirato, “Ġomi ġemi taravatu nuġanai guruġa ta tu maiġesi ekirani, ‘Au akirato, ġomi tu barau.’

35 Ġita ma ribara, kara Buka Veaġai ekiraġiani guruġana tu etanu-vanaġi vanaġini. Barau na mo tarimarima ekiraġirito ‘barau’, ma Barau na ġena guruġa evinirito tarimari tu ġia.

36 A au tu Tamagu na eġabi-viriġiguto, ema etuġuguto tanobara ġana; ma kamasi nai tu ġokiraguni, ġokirani, au na Barau akira-fitoġaiani, korana au akirani, ‘Au tu Barau Natuna’ atoni ei?

37 Bema au Tamagu ġena veġa asi aveirini nai, asi boġono vaġa-moġonigu.

38 Senaġi ġena veġa aveirini nai, mo veġa boġono vaġa-moġoniri, bema au asi boġono vaġa-moġonigu ġotoni tu. Boġono riba ema boġono vaġa-moġonia, Tamagu tu au nuġagu ai etanuni, ema au maki Tamagu nuġanai atanuni.”

39 Mo guruġa ġaramanai ġeurato, Iesu ma ġeġabi-taria ġetato, senaġina ġimari na moġo ma eveġabi-vaġito, erakato.

40 Benamo monana Iesu ma eġenoġoito. Eraka-iaġoto, Ioridana ġarukana eraka-vanaġito, eiaġoto reke ta kefo, guinenai Ioane ebatisoto-ġoi gabuna ġana; monai ea tanuto.

⁴¹ Tarima vovoka ġia ġenai ġeiaġoto, benamo ġekirato, “Ioane na vetoġa boruna ta asi eveiato, senaġi mai tarima guruġana ekiraġirito guruġari mabarari tu moġoni veġata.”

⁴² Monai tarima vovoka Iesu ġevaġa-moġoniato.

11

Lasaro ġena mase

¹ Betania tarimana ta arana Lasaro ekevento. Betania tu Maria ma tobana ġuiatona Mareta ġeri vanuġa.

² Mai Maria maiġa mainana Vereġauka muramura bonana namo vedaureana na edioroato, ema Vereġauka kwakuna maki ġuina na edau-kaukauato ġuiatona. Lasaro tu Maria tobana futuana.

³ Benamo mai ġuiato ruarua na Iesu ġena guruġa ġetuġuto, ġekirato, “Vereġauka, ġoi na oura-viniani tarimana tu bekeve.”

⁴ Iesu na mo vari eseġaġiato nai tu, ekirato, “Mani keve na tu asi bevei-maseani. Mani tu Barau ġena seġuka e mareva baregona bene fofori ġana. Ema maniġa ġenana Barau Natuna beġene vaġa-raġea.”

⁵ Iesu na Mareta ma tarina ġuiatona Maria ema Lasaro tu eura-vinirito-ġoi.

⁶ Senaġi Lasaro ġena keve varina eseġaġiato tu, ġaro ruarua roġo ma etanuto, mo etanuto-ġoi gabunai.

⁷ Mo ġaro ruarua muriri ai ġena mero evaġa-guruġarito, ekirato, “Ġita tu ma siġenoġoi-iaġo Iudea ġana.”

⁸ Ġena mero na ġekiraiato, ġekirato, “Vevaġa-riba tarimamu, ini ġoraġani Iuda tarimari na tu fore na ġetakimu ġetato, a toma tu siġenoġoi-iaġo ma otoni.”

⁹ Iesu na evaġa-veserito, ekirato, “Ġaro ta nuġanai horaġauna mabarana tu 12 ene? Bema tarima ta laġani mamanaġi erakani nai tu, asi bevefutu-naġini, korana ġia tu mai tanobara laġani mamanaġi eboġeboġeni.

¹⁰ Senaġi mukunai erakani tarimana tu evekaġe-kaġekauni, korana ġia nuġanai mama tu asi etanuni.”

¹¹ Iesu maiġesi evaġa-guruġa-ġosirito murinai, ma ekirarito, ekirato, “Ġita ġatara Lasaro tu egenani, senaġi au tu aiaġoni, ġena na navaġo-tataġaia ġana.”

¹² Benamo ġena mero ġekirato, “Vereġauka, bema egenani nai tu, vau ma benamoni.”

¹³ Senaġina Iesu na mo tu emaseto ekiraġiato-ġoi. A ġena mero mataboru ġekirato-ġoi tu, eiaġaraġini nai egena-maseto ekiraġiani, ġetato-ġoi.

¹⁴ Benamo Iesu na ekiravara-ginikaurito, ekirato, “Lasaro tu bemase.

¹⁵ Senaġi ġomi ġemi namo atuġamaġiani nai aiakuni, mo ġaro ai au ġia ġesi tu asiġi, korana maiġa ġenana au boġo vaġa-moġoniguni. Be si-iaġo ġenai.”

¹⁶ Benamo Tomasi, arana ta tu Didimo o Kafa ġetato-ġoi, na Iesu ġena mero kotari ekirarito, ekirato, “Ġita maki ġia ġesi si-iaġo, be ġia ġesi bisini mase-sebona.”

Iesu tu maġuri korana

¹⁷ Iesu ma eraġasito nai eribato, Lasaro tauġanina tu ġaro vasivasi (4) guri ai varau begena.

¹⁸ Betania e Ierusalemata vefakari tu kilomita toitoi (3) kavana.

¹⁹ Ema Iudea tarimari vovoka Mareta e Maria ġeri ai ġeiaġoto, tauri beġene vaġa-gwaġiġiri ġana, korana tobari emaseto bene.

²⁰ Mareta eseḡaḡito, Iesu tu eiaḡomato-ḡoi nai, eraga-raka toreḡau-iaḡoto Iesu ḡesi ḡea vedoḡarito. A Maria tu numai etanu-gwaḡiḡito.

²¹ Benamo Mareta na Iesu ekiraiato, ekirato, “Vereḡauka, ḡoi bere mainai kavana tu, au tobagu asi bere mase.

²² Senaḡi au ribagu, initoma maki kara dagara Barau bonoḡiani tu, Barau na bevinimuni.”

²³ Iesu na ekiraiato, ekirato, “Ḡoi tobamu tu bevariḡisi-ḡenoḡoini.”

²⁴ Mareta na Iesu evaḡa-veaseato, ekirato, “Au ribagu, ḡaro magonai variḡisi-ḡenoḡoi ḡaronai ḡia tu ma bevariḡisi-ḡenoḡoini.”

²⁵ Iesu na Maria ekiraiato, ekirato, “Au tu variḡisi-ḡenoḡoi ema maḡuri. Au bevaḡa-moḡoniguni tarimana tu bemaseni, senaḡina roḡo maḡuri betanuni.

²⁶ Ema deikara maḡuri etanuni nuḡanai, au evaḡa-moḡoniguni tu asiḡina ḡinavaḡi bemaseni. Mai guruḡa ovaḡa-moḡoniani ba?”

²⁷ Mareta na ekiraiato, ekirato, “Oi Vereḡauka, au na avaḡa-moḡoni korikorimuni, ḡoi tu moḡoni Keriso, Barau Natuna, tanobara ḡana boiaḡomani tarimamu.”

Iesu etaḡito

²⁸ Mareta moḡesi ekirato murinai eḡenoḡoi-iaḡoto, benamo tarina Maria vekuretoḡai ea kea-ḡairiato, ekirato, “Vevaḡa-riba tarimana tu beiaḡoma ema ḡoi ekeamuni.”

²⁹ Maria na mo guruḡa eseḡaḡiato nai, asikauna evariḡisito, benamo Iesu ḡenai eiaḡoto.

³⁰ Mo horai Iesu tu vanuḡai roḡosi roḡo bere raka-toḡa, ḡia roḡo Mareta na mo edoḡariato gabunai roḡo.

³¹ Iuda tarimari, Maria ḡetanu-dukudukuato-ḡoi tarimari, na Maria ḡeḡitaiato, eraga-variḡisito ma eraka-rosito nai tu, murina na ḡerakato. Ḡia mataboru ḡekirato, Maria tu gara ḡana eiaḡoni, mase tarimana nea taḡi-vinia ḡana.

³² Maria eiaḡoto, Iesu sevinai eraḡasito, ma Iesu eḡitaiato nai tu, kwakuna koranai evetui-tarito, benamo evaḡa-guruḡaiato, ekirato, “Vereḡauka, ḡoi bere mainai kavana tu, au tobagu asi bere mase.”

³³ Iesu na Maria eḡitaiato etaḡito-ḡoi, ema mo Iuda tarimari, ḡia ḡesi ḡeiaḡomato tarimari, maki ḡetaḡito-ḡoi nai tu, ḡia nuḡana maki tuḡamaḡina eḡabi-rakavaiato, dori etaḡito.

³⁴ Benamo Iesu na edanaḡirito, ekirato, “Ainai ḡotoreato?” Ḡia na ḡevaḡa-veaseato, ḡekirato, “Vereḡauka, noiaḡoma, be noma ḡitaia.”

³⁵ Iesu etaḡito.

³⁶ Benamo Iuda tarimari ḡekirato, “Ḡoḡitaia, Lasaro tu euravini-rakavaiani.”

³⁷ Senaḡi Iuda tarimari kotari ḡekirato, “Mai tarima na mata-bubu tarimana matana evaḡa-iaḡaiato, be Lasaro maki asi veḡata bere vaḡa-masea, ene?”

Iesu na Lasaro mase na evaḡa-variḡisi ḡenoḡoiato

³⁸ Monana Iesu nuḡana ma evaḡa-vekwaraḡi lelevaḡiato, benamo gara gabuna ḡana eiaḡoto. Mo gara forena kouḡana tu fore ta na ḡetabe-ḡauato.

³⁹ Iesu ekirato, “Fore ḡoḡabi-veḡitaia.” Ma Mareta, mo mase tarimana tobana, na Iesu ekiraiato, ekirato, “Vereḡauka, ḡia emaseto ḡarona na beiaḡoma toma tu ḡaro vaḡa-vasivasina (4), be bonana tu rakava kwaikwai banaḡu.”

⁴⁰ Iesu na Mareta ekiraiato, ekirato, “Au na ḡoi tu bakiramu, bema bovaḡa-moḡoniguni nai, Barau marevana baregona boḡitaiani basi, ene?”

⁴¹ Benamo mase tarimana ġetoreato gabuna na fore ġeġabi-veġitaiato. Moġa murinai Iesu eboġe-vaesito, benamo ekirato, “Tamagu o, au na ġoi atanikumuni, korana ġoi na varau boseġaġigu.

⁴² Au ribagu, ġoi na vanaġivanagi oseġaġiguni. Senagi maiġesi akirani korana tu mai tarimarima ġeruġa-taġoni maiġeri urari ai. Be ġia na beġene vaġa-moġonia, au tu ġoi na otuġuguto.”

⁴³ Moġesi eguruġato murinai ekea-fararato, ekirato, “Lasaro, noma rakarosi!”

⁴⁴ Benamo mo emaseto tarimana mase dabuġari na ġimana kwakuna viriviri-tari e ġoirana ekumu-iaġiato dabuġana ġesi ema raka-rosito. Iesu na ekirarito, ekirato, “Ġoruġaia, be neraka.”

Iesu vaġivaġina dabarana ġevetauato

Mataio 26:1-5; Mareko 14:1-2; Luka 22:1-2

⁴⁵ Benamo mo Iuda tarimari vovoka, Maria ġenai ġeiaġoto moġeri, Iesu na mo veġa eveirito ġeġitarito nai, vovoka tu Iesu ġevaġa-moġoniato.

⁴⁶ Senagi kotari tu ġeġenoġoi-iaġoto Farisea tarimari ġeri ai, benamo Iesu na kara eveirito dagarari ġea kira-vararito.

⁴⁷ Benamo Rubu Veaġa vereri baregori ema Farisea tarimari na kanisoro tarimari ġekea-vegogorito, benamo ġekirato, “Ġita tu kara toma taveiani? Mai tarima na vetoġa boruri vovoka eveirini.

⁴⁸ Bema ġia maiġesi ġita na bita ġita-ġuiragiiani moġo nai tu, tarimarima mabarari na ġia beġe vaġa-moġoniani. Benamo Roma tarimari beġe iaġomani, ġita ġera ġabu (o Rubu Veaġa) ema ġera tanobara ġita ġerana beġema ġabi-vaġiani.”

⁴⁹ Benamo ġia fakari ai tarima ta arana Kaiafas, ġia mo laġani ai tu Rubu Veaġa verena baregona, ġia na ekirarito, ekirato, “Ġomi dagara ta tu asi ribami!

⁵⁰ Ġomi asi ġotuġamaġi-fakani, namona tu tarima sebona moġo tarimarima mabarari urari ai bene mase, a mai tanobara mabarana beġe vaġa-rakava ġosiġosiani tu asi namo.”

⁵¹ Ġia moġesi ekirato tu, dia ġia tauġena nuġana siga moġo eguruġato; senagi ġia mo laġani ai tu Rubu Veaġa verena baregona, moġa lorinai ġia mo tu eperovetato, Iesu tu bene mase Iuda tarimari mabarari urari ai.

⁵² Ema Iesu tu dia Iuda tarimari moġo urari ai bemaseni. Senagi Barau natuna ġabu irauirau ai ġetanu-lausilausini tarimari mabarari bene ġabi-vegogori, doġoro sebonai bene vaġa-iaġori ġana.

⁵³ Moġa lorinai mo ġaro na evesinato eiaġoto tu, Iuda tarimari baregori na Iesu kamasi beġe vaġi-maseani dabarana ġevetauato.

⁵⁴ Moġesina naima Iuda tarimari ġoirari ai Iesu asi eraka-foforito-ġoi. Mo ġabu na eraka-veġitato, eiaġoto tano fakana asi tarimarimana gabuna sevina, vanuġa ta arana Efraim ġana. Ġena mero ġesi monai ġea tanuto-ġoi.

⁵⁵ Iuda tarimari ġeri Pasova verekona tu ekavinaġito. (Moġa tu Iuda tarimari mase aneruna na evanaġirito moġo, asi evaġirito verekona). Ma Iuda tarimari vovoka mo tanobarai ġetanuto Ierusalemaj ġema raka-vegogoto. Ġia ġema raka-vegogoto tauna korikori, Barau ġoiranai beġene veiareva vauro, Pasova verekona bene vesina.

⁵⁶ Ġia na Iesu ġeġita-vetauato-ġoi, ma Rubu Veaġa nuġanai ġeruġa-vegogoto nai tu, tauġeri fakari ai moġo ġevedanaġi-vedanaġito, ġekirato, “Ġomi tu kamasi mani ġotuġamaġini? Mai vereko ai toma ema ġoira-refoni ba?”

⁵⁷ Rubu Veāga vereri baregori ema Farisea tarimari na vevaāga-naḡi guruḡana tu varau Iuda tarimari ḡevinirito, ḡekirarito, bema ta beseḡaḡini Iesu tu ainai, ḡia tu maoromaoro bene iaḡo, Iuda vereri benea kira-varari, be beḡene ḡabia.

12

Maria na Iesu ediḡaiato Betania ai

¹ Pasova o Iuda tarimari mase aneruna na evanaḡirito moḡo verekona tu ḡaro imaima sebona (6) roḡo ḡoirai nuḡanai, Iesu Betania ḡana eiaḡoto. Lasaro tu Betaniai etanuto-ḡoi, ema monai emaseto, ma Iesu na mase na evaḡa-variḡisiato.

² Monai Iesu ḡabiraḡena ḡaniḡanina ḡeveiato. Mareta na ḡari ḡaniḡani edabaraiato, ma Lasaro maki monai ḡaniḡani gabunai ḡetanu-vegogoto tarimari ḡesi ḡetanu-vegogoto, ḡeḡaniḡanito.

³ Benamo Maria na muramura bonana namo vedaureana lita kwana kavana eḡabiato, benamo Iesu kwakuna fanafanana ediḡa-iaḡiato, ema ḡuina na Iesu kwakuna fanafanana ma edau-kaukauato. Ma numa mabarana tu mo muramura bonana na evaiato. Mo muramura tu ḡauḡa arana nad ḡokana na ḡeveito-ḡoi, ema voina tu varaḡe rakava.

⁴ Senaḡi Iesu ḡena mero ta arana Iudas Isakariota, mai tu Iesu vau ma bea revaiani tarimana, ekirato,

⁵ “Karase mai muramura mabarana tu silva moniri sinau toitoi (300) ai asi bevoivoi-iaḡia? (Mai tu tarima ta davana laḡani ta nuḡanai kavana). Bere voivoi-iaḡia, be voina monina bere ḡabia tu, asi ḡeri-ḡari tarimari bere viniri.”

⁶ Ḡia moḡesina eguruḡato tu, dia asi ḡeri-ḡari tarimari evetuḡa-ḡwarito-ḡoi lorinai, senaḡi korana ḡia tu lema tarimana naima. Ḡia na tu moni fusena eḡwa-rakao rakaoato-ḡoi, ma mo fuse ai moni elemarito-ḡoi, benamo ḡena ura dagarari evoi-iaḡirito-ḡoi.

⁷ Benamo Iesu ekiraiato, ekirato, “Ḡoraga-kwanea, mai vavinena tu kara bere veia dagarana beveia, ḡia na au tauḡanigu muramura na bedau-guinea, gurigurigu ḡana.

⁸ Asi ḡeri-ḡari tarimari tu vanaḡivanaḡi ḡomi ḡesi boḡo tanuni, a au tu vanaḡivanaḡi ḡomi ḡesi asi batanuni.”

Rubu Veāga vereri baregori na Lasaro beḡene vaḡia ḡetato

⁹ Iuda tarimari vovoka tabutabu ḡeseḡaḡito Iesu tu Betania ai. Benamo moḡana ḡeiaḡoto, dia Iesu moḡo uranai, senaḡi Lasaro maki beḡene ḡitaia ḡana. Lasaro tu mase na Iesu na evaḡa-variḡisi ḡenoḡoiato.

¹⁰ Moḡesi naima Rubu Veāga vereri baregori tu ḡeboioḡato, Lasaro maki beḡene vaḡi-masea ḡetato.

¹¹ Korana tu ḡia dainai Iuda tarimari vovoka ḡia ḡerina ḡeraka-veḡitato, benamo Iesu ḡevaḡa-moḡoniato.

Iesu ḡena rakatoḡa Ierusalemāi ḡevonevone-raḡe viniato

Mataio 21:1-11; Mareko 11:1-11; Luka 19:28-40

¹² Ma elaganito nai, vereko uranai ḡeiaḡomato tarimari vovoka ḡeseḡaḡito, Iesu tu Ieruselema ḡana varau eraka-iaḡomato-ḡoi.

¹³ Galamo lauri noḡa dagarari ḡeḡabito, benamo Iesu ḡenai ḡeiaḡoto, ḡeḡabato, ḡekirato,

“Hosana!

Isaraela ḡeri Kini sivaḡa-namoa,

Vereḡauka aranai eiaḡomani

tarimana sivaġa-namoa!”

¹⁴ Ma Iesu na doniki natuna ta edoġariato, benamo iatanai etanukauto, Buka Veaġa nuġanai ekirani ilailanai,

¹⁵ “Siona natuna,
(Ierusalem tarimami), asi ġogari,
ġoboġe, ġemi Vere eiaġomani,
ġia tu doniki natuna iatanai betanukau.”

¹⁶ Mo ġaro ai ġena mero na maiġeri tu asi ġetuġamaġi-fakarito. Senaġi Barau na Iesu evaġa-raġeato e mareva baregona eviniato murinai vau, ġia ġeribamaoroto, maiġeri mabarari ġetorerito tu, ġia ġekiraġiato. Ema ġeribato, mo veiġa mabarari tu ġia ġenai ġeveirito.

¹⁷ Iesu na Lasaro gara forena kouġana na ekea-rosiato, ema mase na evaġa-varigiato ġaronai, tarimarima tu ġutuma-bara ġia ġesi. Benamo moġeri tarima na mo veiġa ġeġitaato varina tu roġo ġevari-fuato-ġoi.

¹⁸ Tarima ġutuma ġeiaġoto Iesu ġesi vedoġari, korana ġeseġaġito, Iesu na mo vetoġa boruna eveiato dainai.

¹⁹ Moġesina nai Farisea tarimari tauġeri fakari ai ġevedare-mutukato, ġekirato, “Ġoġitaiani, ġomi tu asi ġokokoreni. Ġoboġe, mai tanobara tarimana mabarana tu ġia murinai ġerakani.”

Grik tarimari kotari na Iesu ġevetauato

²⁰ Vereko ġaronai toma-rakariġo uranai Ierusalem ġana ġevaraġeto tarimari fakari ai tu, Grik o Helene tarimari kotari maki ġerakakauto.

²¹ Ġia ġeiaġoto Filipino ġenai, benamo ġekiraiato, ġekirato, “Verebara, ġai ġaurani tu Iesu ġaġitaia ġatoni.” Filipino tu Galilea tanonai vanuġa arana Betesaida tarimana.

²² Filipino eiaġoto Anduru ea kiraiato, benamo tauri ruarua ġeiaġoto, Iesu ġekiraiato.

²³ Iesu na evaġa-veserito, ekirato, “Ġarona varau bema-raġasi, Tarimarima Natuna mareva baregona beġabiani.

²⁴ Moġoni korikori akiramini, widi ġuena tano nuġanai beketo-ġurani ema bemaseni vau, vovokari ġia ġenana beġe ġorani. A widi ġuena tano ai asi beketoni ema asi maki bemaseni nai, ġereġana moġo betanuni.

²⁵ Ġena maġuri eura-viniani tarimana na maġuri vanaġivanaġi tu asi beġabiani, beleaiani. A mai tanobarai ġena maġuri etuġamaġi-fitoġaiani tarimana na, ġena maġuri tu etore-taġoani maġuri vanaġivanaġi ġana.

²⁶ Au vetuġunaġigu eiaġo-vinini tarimana tu au murigu na bene raka; be au ainai, au vetuġunaġigu eiaġo-vinini tarimana maki monai au ġesi. Au vetuġunaġigu eiaġo-vinini tarimana tu, au Tamagu na ġia maki bevaġa-namoani.”

Iesu ġena mase eguruġa-iaġiato

²⁷ “Maitoma au nuġagu tu evekwaragi, e ġegu tuġamaġi bebarego. Be kara batoni? Nakira, ‘Tama, mai hora na noma vaġa-maġurigu’ nasi? Asiġina, au ġegu iaġoma tauna korikori aoanai tu mai bama raġasi maiġea.

²⁸ Tamagu, ġoi aramu novaġa-raġea.” Benamo garo ta guba na emariġoto, ekirato, “Au na aragu tu varau bavaġa-raġea, ema mai maki ma bavaġa-raġe ġenoġoiani.”

²⁹ Tarima ġutuma monai ruġa-vegogo na mo garo ġeseġaġiato, benamo ġekirato, “Guba begurua.” Ma kotari ġekirato, “Aneru ta na bevaġa-guruġaia.”

³⁰ Iesu na evaḡa-veserito, ekirato, “Mani garo tu dia au uragu ai nai beiaḡoma, senaḡi ḡomi urami ai nai beiaḡoma.

³¹ Maitoma tu tanobarai Barau na vevaḡa-maoro eveiani. Maitoma Barau na mai tanobara verena, Satani, evaḡa-darereani.

³² Benamo au tano iatana na beḡe ḡabi-vaisiguni, monana tarimarima mabarari au ḡegu ai bainu-kavirini.”

³³ Ġia maiḡesi eguruḡato tu, ḡia ḡena mase ai tu aiḡesi bemaseni moḡa ekiraḡi-rosiato.

³⁴ Tarimarima ḡevaḡa-veseto, ḡekirato, “Ġai taravatu guruḡari na ḡaseḡaḡito, Keriso tu betanu-vanaḡi vanaḡini, ma ḡoi kamasi nai tu okirani, Tarimarima Natuna tu beḡe ḡabi-vaisiani? Tarimarima Natuna tu deikara ei?”

³⁵ Benamo Iesu na ekirarito, ekirato, “Mama ḡomi ḡesi tu asi betanu-maukani. Mama roḡo ḡomi ḡesi nuḡanai, mamai ḡoraka, mukuna na beḡabimini garina. Mukuna nuḡanai erakani tarimana tu asi ribana, ḡia tu aiḡana eiḡoni.

³⁶ Mama roḡo ḡomi ḡesi nuḡanai, mama boḡono vaḡa-moḡonia, be mama natunai boḡono iaḡo.”

Maiḡeri guruḡa ekiraḡi-ḡosirito murinai eraga-kwanerito, benamo eiḡoto, asi beḡe ḡoitaḡoani gabunai etanuto-ḡoi.

Iuda tarimari na Iesu roḡo asi ḡevaḡa-moḡoniato-ḡoi

³⁷ Iesu na Iuda tarimari ḡoirari ai vetoḡa boruri vovoka eveirito, senaḡi roḡo mo asi ḡevaḡa-moḡoniato-ḡoi.

³⁸ Monana peroveta tarimana arana Isaia ḡena guruḡa emoḡonito, Isaia maiḡesi ekirato,

“Vereḡauka, deikara na ḡai ḡema guruḡa bevaḡa-moḡonirini? Deikara ḡenai Vereḡauka ḡena seḡuka befoforini?”

³⁹ Ġia na Iesu asi ḡevaḡa-moḡoniato anina tu, Isaia gabu tai ḡena toretore ai ma ekirato,

⁴⁰ “Barau na matari evaḡa-tufarito, ema nuḡari evei-mukunarito, korana matari na asi beḡene boḡeboḡe, ema nuḡari ai asi beḡene tuḡamaḡi-faka ḡana. Au ḡegu ai beḡe ḡenoḡoini, benamo bavaḡa-namorini garina.”

⁴¹ Isaia moḡesi ekirato, korana ḡia na Iesu marevana e seḡukana baregona eḡita-guineato nai, benamo ḡia eguruḡa-iaḡiato.

⁴² Iuda ḡorikauna vereri vovoka na maki Iesu ḡevaḡa-moḡoniato, senaḡi Farisea tarimari gariri ḡeveito-ḡoi, be Iesu asi ḡekiraḡi-foforiato-ḡoi. Korana bema beḡe kiraḡi-foforiani nai tu, Farisea tarimari na rubu na beḡe tuḡu-vaḡirini garina.

⁴³ Korana mo Iuda vereri ḡeri ura baregona tu, tarimarima na beḡene vaḡa-raḡeri, a Barau na bene vaḡa-raḡeri tuḡamaḡina tu asi ḡeveiato-ḡoi.

Iesu ḡena guruḡa na tarimarima bekota-vinirini

⁴⁴ Iesu efararato, ekirato, “Au bevaḡa-moḡoniguni tarimana tu dia au evaḡa-moḡoniguni, senaḡi au etuḡuguto Barauna evaḡa-moḡoniani.

⁴⁵ Ema au eḡitaguni tarimana na tu au etuḡuguto Barauna eḡitaiani.

⁴⁶ Au tu mama, mai tanobara ḡana aiaḡomato, be au bevaḡa-moḡoniguni tarimana tu mukuna nuḡanai asi betanuni.

⁴⁷ Ma bema tarima ta na au ġegu guruġa eseġaġiani, senaġi asi evaġa-moġoniani, au na mo tarima tu asi bakota-viniani. Korana au tu dia tanobara kota-vinina ġana aiaġomato. Asiġina. Au tu tanobara vaġa-maġurina ġana aiaġomato.

⁴⁸ Au eruġaguni ema au ġegu guruġa asi eġabi-raġerini tarimana, kota-vinina tarimana ta etanuni. Au na akiraġirito guruġari, moġeri guruġa na ġia beġea kota-viniani mo ġaro magonai.

⁴⁹ Korana au tu dia tauġegu ġegu maoro ai aguruġani. Senaġi Tamagu, au etuġuguto Barauna, na evaġa-naġiguto au na kara guruġana bana kiraġia ema kamasi bana kiraġia.

⁵⁰ Au ribagu, Tamagu ġena guruġa na tarimarima maġuri vanaġivanaġi beġe ġabini. Moġa lorinai au na kara akiraġirini guruġari tu, kara dagara Tamagu na ekiraguni bana kiraġiri etoni guruġari moġo.”

13

Iesu na ġena mero kwakuri eġuriġirito

¹ Pasova o Iuda tarimari mase aneruna na evanaġirito moġo verekona tu dori eġabiato-ġoi, benamo Iesu eribato, mai tanobara beiaġuieni ma Tamana ġenai bevaraġeni ġarona tu varau beraġasi. Mai tanobarai ġena tarimarima ġetanuto euravini-rakavarito, ma ġena veuravini ġeri ai tu asi edokoto, eiaġoto mo magona.

² Iesu ma ġena mero ġesi lavilavi ġaniġanina ġeġaniato-ġoi nuġanai, Diabolo na Iudas Isakariota, Simona natuna, nuġana eġaniato, Iesu bene revaia ġana.

³ Iesu ribana, Tamana na dagara mabarari tu ġia ġena seġuka gaburenai etorerito. Ema ribana maki, ġia tu Barau ġenana eiaġomato, ema ma beġenoġoini Barau ġenai;

⁴ benamo ġaniġani gabuna na evariġisito, ġena koudi ekoki-vaġiato, benamo tauġela eriġoato.

⁵ Benamo naġu ai nanu ebubuto, benamo ġena mero kwakuri eġuriġirito, ma eriġoato tauġelana na tu edau-kaukaurito.

⁶ Kwakuri eġuriġi-iaġomato mo, Simona Petero ġenai eraġasito, benamo Petero na ekiraiato, ekirato, “Vereġauka, ġoi tu au kwakugu noġuriġia otoni?”

⁷ Iesu na evaġa-veurato, ekirato, “Maitoma au na kara aveiani veiġana tu asi otuġamaġi-fakaiani, senaġi gabivau boribani.”

⁸ Petero na ekiraiato, ekirato, “Asiġi, au kwakugu ġoi na tu asiġina ġinavaġi boġuriġiani.” Iesu na evaġa-veurato, ekirato, “Bema au na ġoi kwakumu asi baġuriġiani nai, ġoi tu dia au ġegu mero.”

⁹ Simona Petero ekirato, “Vereġauka, dia kwakugu moġo, senaġi ġimagu ema debagu maki.”

¹⁰ Iesu na ekiraiato, ekirato, “Efouni tarimana tauġanina mabarana tu veiareva, be ġia tu kwakuna moġo beġuriġiani. Ġomi mabarami tu veiareva, senaġi sebona ta moġo asi veiareva.”

¹¹ Iesu ma ribana deikara na ġia berevaiani; moġesina nai ekirato, “Dia mabarami veiareva.”

¹² Kwakuri eġuriġi-ġosito murinai, ġena dabuġa baregona ma eveiato, ema eiaġoto ġena tanutanu gabunai ea tanu-tarito, benamo ekirarito, ekirato, “Au na ġomi ġemi ai kara baveia veiġana tauna korikori boġo tuġamaġi-fakaia ba?”

13 Ĝomi na au ĝokiraĝiguni, ĝokirani 'Vevaĝa-riba Tarimana' ema 'Vereĝauka', mo tu moĝoni ĝokiraĝiguni, korana au tu moĝoni Vevaĝa-riba Tarimagu ema Vereĝauka.

14 Bema au ĝomi ĝemi Vereĝauka ema Vevaĝa-riba tarimagu na ĝomi kwakumi baĝuriĝiri nai, ĝomi maki tauĝemi fakami ai moĝo karomi tari kwakuri boĝono ĝuriĝiri.

15 Korana au na bavaĝa-ĝitami, be au na kara ĝomi ĝemi ai baveia veiĝana, ĝomi na maki boĝono veia.

16 Au na ĝomi moĝoni akiramini, ĝauvei merona na ĝena vere asi bevanaĝiani, e vetuĝunaĝi merona na betuĝua tarimana asi bevanaĝiani.

17 Toma maiĝeri dagara mabarari ĝomi na boĝo ribari, bema boĝo veirini nai tu boĝo iakuni.

Iesu ĝena mase ekiraĝi-foforiato

18 Au na ĝomi mabarami asi akiraĝimini, au na aĝabi-viriĝirito tarimari tu au ribagu. Senaĝi mai tu Buka Vevaĝa nuĝanai ĝetorerito guruĝari beĝene moĝoni ĝana: 'Deikara au ĝesi beredi baĝa ĝani-vegogoani tarimana tu, kwakuna gwadirina beĝabi-vaisiani au ĝegu ai.' (Moĝa anina tu, Iesu ma bekira-fitoĝaiani, benamo vaĝi-masena dabarana beveiani).

19 Toma au na ĝoirai beĝe ĝorani dagarari akira-varamini, be beĝe ĝorani nai tu boĝono riba-maoro, (Barau na etuĝuato) Tarimana tu Au.

20 Moĝoni akiramini, au na atuĝuani tarimana eĝabi-raĝeani tarimana na tu au eĝabi-raĝeguni. Ma au eĝabi-raĝeguni tarimana na au etuĝuguto tarimana, Barau, eĝabi-raĝeani."

Iesu Iudas Isakariota na berevaiani ekiraĝiato

Mataio 26:20-25; Mareko 14:17-21; Luka 22:21-23

21 Iesu na maiĝeri guruĝa ekiraĝirito murinai, nuĝana evekwaraĝi-baregato, benamo eguruĝa-foforito, ekirato, "Akira-korikorimini, ĝomi ta na tu au borevaguni."

22 Benamo ĝena mero ĝeveĝita-veĝitato, asi ribari deikara ekiraĝiato.

23 Ĝena mero vekaravari ai Iesu na eura-viniato-ĝoi merona tu ĝia ĝenai evetabekauto.

24 Ma Simona Petero na vetoĝai moĝo Ioane evaĝa-guruĝaĝiato, eurato, Iesu nedanaĝia deikara ekiraĝiani.

25 Benamo (Iesu na eura-viniato-ĝoi merona) Iesu ĝenai ma evetabekauto, benamo edanaĝiato ekirato, "Vereĝauka, mo tu deikara, ei?"

26 Iesu evaĝa-veseto, ekirato, "Au na beredi bafereiani, benamo ĝia baviniani tarimana tu moĝea." Benamo Iesu na beredi efereiato, ma Simona natuna, Iudas Isakariota, eviniato.

27 Iudas na mo beredi eĝabiato, benamo Satani nuĝanai eraka-ĝurato. Benamo Iesu na ekiraiato, ekirato, "Kara ourani noveia tu novei-ĝarimoĝia."

28 Senaĝi mo ĝeĝaniĝani-vegogoto tarimari tu sebona ta maki asi eribato, karase nai Iesu na moĝesi ekiraiato.

29 Moĝa nuĝanai Iudas tu moni mauĝa-mauĝana eĝita-ĝauato-ĝoi. Moĝesina naima ĝia kotari ĝetuĝamaĝito, Iesu na tu bekiraia, vereko ai karakara ĝeura-vinirini dagarari nea voiri, o asi ĝeri-ĝari tarimari dagara tari nea viniri ĝetato.

30 Iudas na mo beredi eĝabi-raĝeato murinai tu, asikauna mo numa na eraka-rosito. Mo tu varau eboĝito.

Iesu Petero na bekira-ĝuniĝauani ekiraĝiato

³¹ Iudas eraka-rosito murinai, Iesu ekirato, “Maitoma Tarimarima Natuna beġe vaġa-raġeani, ema Barau maki Natuna ġenana beġe vaġa-raġeani.

³² Bema Barau na Iesu bakunai vevaġa-raġe e mareva baregona beġabiani nai tu, Barau tauġena na maki tauġena ġena mareva baregona Tarimarima Natuna beviniani. Ma Barau na asikauna beviniani.

³³ Natugu, au ġomi ġesi tu asi bita tanu-maukani. Benamo ġomi na au ma boġo ġita-vetauguni. Au na Iuda tarimari avaġa-guruġarito ilailanai, ġomi maki mo guruġa sebona avinimini: Au aiāġoni gabuna ġana, ġomi tu asi boġo iaġoni riba.

³⁴ Taravatu guruġana variġuna avinimini. Tarikakami ġesi boġono veuravini. Au na ġomi aura-vinimini ilailanai, ġomi maki tarikakami ġesi boġono veuravini.

³⁵ Bema ġomi tarikakami ġesi boġo veura-vinini nai, tarimarima mabarari beġe ribani, ġomi tu au ġegu mero.”

³⁶ Simona Petero na Iesu edanaġiato, ekirato, “Vereġauka, ġoi tu aiġana oiaġoni?” Iesu evaġa-veseto, ekirato, “Au aiġana aiāġoni gabuna ġana, maitoma au murigu na tu asi boġo iaġomani, senaġi gabivau boġo iaġomani murigu na.”

³⁷ Petero na Iesu ekiraiato, ekirato, “Vereġauka, kara dainai toma au ġoi murimu na tu asi baiāġosini riba? Au tu ġoi uramu ai ġegu maġuri batoretariani, bamaseni.”

³⁸ Iesu na Petero evaġa-veseato, ekirato, “Ġoi ġemu maġuri tu au uragu ai botore-tariani otoni? Akira-korikorimuni, kokoroku roġosi roġo bene goġi nuġanai, ġoi na au tu vaġa-toitoi bokira-ġuniġauguni.”

14

Iesu tu dabara

¹ “Nuġami asi beġene raġe, ema asi boġono tuġamaġi-ġutuma. Barau boġono vaġa-moġonia, ema au maki boġono vaġa-moġonigu.

² Au Tamagu ġena numai daiġutu tu asisebo; bema asiġi nai tu, mai guruġa ġomi asi bara kira-varami: Au aiāġoni tu, ġomi ġemi gabu ta arovina-toreani.

³ Benamo aiāġoni, ġomi ġemi gabu barovina-toreani. Barovinatore-ġosiani vau, ma baġenoġoi-iaġomani, benamo ġomi baġori-iaġomini au ġesi bita tanuni. Be au ainai batanuni gabunai, ġomi maki monai au ġesi bita tanuni.

⁴ Au baiāġoni gabuna dabarana tu ġomi ma ribami.”

⁵ Tomasi na ekiraiato, ekirato, “Vereġauka, ġai tu asi ribama ġoi aiġana oiaġoni, ma dabara tu kamasi baġa ribaian?”

⁶ Iesu na ekiraiato, ekirato, “Dabara tu au, e moġonina maki au, ema maġuri maki au. Tarima ta Tamagu ġenai dabara boruna na ta asi beiaġoni. Asiġina ġinavaġi. Au ġeguna moġo.

⁷ Bema moġoni au ġomi na ġoribaguto tu, au Tamagu maki ġoro ribaia. Ma toma vau ġoribaiani ema varau boġo ġitaia.”

⁸ Filipino na Iesu ekiraiato, ekirato, “Vereġauka, Tamara novaġa-ribama, be nuġama beġene genatari.”

⁹ Iesu na ekiraiato, ekirato, “Filipo, au ġoi ġesi tu kai-veġata atanuto, ma ġoi na au tu roġosi roġo boro ribagu? Au eġitaguni tarimana na Tamagu eġitaiani. Ma ġoi tu kamasi nai okirani, “Tamara novaġa-ribama otoni?”

¹⁰ Ġoi na asi ovaġa-moġoniani, au tu Tamagu nuġanai, ma Tamagu tu au nuġagu ai, ei? Au na ġomi avaġa-guruġamini guruġari tu dia au tauġegu ġegu maoro ai avaġa-guruġamini. Asiġina. Mai tu Tamagu, ġia tu nuġagu ai etanuni, ġia na ġena ġauvei eveirini.

11 Au akirani, au tu Tamagu nuġanai atanuni ema Tamagu tu au nuġagu ai etanuni atoni nai tu boġono vaġa-moġonigu. Bema asiġina nai, mai veiġa aveirini ġoġitarini nai boġono vaġa-moġonigu.

12 Moġoni akiramini, au evaġa-moġoniguni tarimana tu, au na aveirini veiġari, ġia na maki beveirini. Ema ġia na tu veiġa barego lelevaġiri beveirini, au na aveirini veiġari tu bevanaġirini. Korana au tu Tamagu ġenai ma aiaġoni.

13 Ema au aragu ai karakara boġo noġirini tu, au na haveirini. Monana Tamagu beġe vaġa-raġeani Natuna bakunai.

14 Au aragu ai kara boġo noġi-raġerini dagarari mabarari tu, veiġari au na haveirini.”

Iesu na Iauka Veaġa ekiraġi-toreato

15 “Bema ġomi na au ġoura-viniguni nai tu, au ġegu taravatu guruġari boġo korana-iaġirini.

16 Benamo au na Tamagu banoġiani, bena ġia na vevaġa-kava tarimana ta ma bevinimini. Mo vevaġa-kava tarimana tu ġomi ġesi betanu-vanaġi vanaġini.

17 Ġia tu guruġa moġonina evaġa-foforiani Iaukana. Ġia tu tanobara maġurinai ġetanuni tarimari na asi beġe ġabi-raġeani riba, korana asi ġeġitaiani ema asi ġeribaiani. Senaġi ġia ġomi tu ma ribami, korana ġia tu ġomi ġesi ġotanuni ema ġomi nuġami ai betanuni.

18 Au na ġomi ġereġami gara noġa asi baiaġuimini. Au ma baġenoġoi-iaġomani ġomi ġemi ai.

19 Tanobara tarimari na asi ma beġe ġitaguni ġarona tu asi manaġa, senaġi ġomi na tu boġo ġitaguni. Ġomi tu au amaġuri-taġoni bakunai, be boġo maġuri-taġoni.

20 Mo ġaro ai ġomi boġo ribani, au tu Tamagu nuġanai atanuni, ema ġomi au nuġagu ai ġotanuni, ema au ġomi nuġami ai atanuni.

21 Au ġegu taravatu guruġari eġabi-raġerini ema ekorana-iaġirini tarimana na tu au eura-viniguni. Ema au eura-viniguni tarimana tu au Tamagu na maki beura-viniani. Au na maki baura-viniani ema au tauġegu ġia ġenai havevaġa-foforini.”

22 Iudas, dia Iudas Isakariota, na ekiraiato, ekirato, “Vereġauka, kamasi nai ġoi tauġemu ġai ġemai tu bovevaġa-foforini, senaġi tanobara ġenai tu asiġina?”

23 Iesu na evaġa-veaseato, ekirato, “Au eura-viniguni tarimana na au ġegu vevaġa-riba bekorana-iaġiani. Benamo au Tamagu na mo tarima beura-viniani. Benamo tauma ruarua baġa iaġoni ġia ġenai, bena ġia ġesi baġa tanu-vanaġi vanaġini.

24 Au asi eura-viniguni tarimana tu, au ġegu guruġa asi ekorana-iaġirini. Mai guruġa ġoseġaġirini tu dia au ġegu, senaġi Tamagu ġena; au tu ġia na etuġuguto.

25 Ġomi ġesi roġo atanuni nuġanai, maiġeri guruġa ġomi akira-varamini.

26 A ġomi vaġa-kavami tarimana tu Iauka Veaġa. Ġia tu au aragu ai Tamagu na betuġu-iaġomaiani. Ġia na dagara mabarari bevaġa-ribamini, ema au na kara akiraġirito dagarari, ġemi tuġamaġi ai ma bevaġa-fofori ġenoġoirini.

27 Maino ġomi ġesi mai aiaġuiani. Mai tu au ġegu maino ġomi avinimini. Ema mai maino au na ġomi avinimini tu, dia tanobara tarimari na ġomi ġevinimini kavana avinimini. Nuġami asi beġene raġe e asi boġono tuġamaġi-ġutuma ema asi boġono gari.

²⁸ Au baguruḡa boḡo seḡaḡia, au bakira, ‘Au tu araka-ḡerevaḡini, senaḡi ma baḡenoḡoi-iaḡomani ḡomi ḡemi ai.’ Bema au boḡoro ura-vinigu nai tu, Tamagu ḡenai aiaḡoni, be ḡoro iaku, korana au Tamagu tu iaru-korokoro, au iata-raḡegu ai.

²⁹ Mai veḡa tu roḡosi roḡo bere ḡora nuḡanai akira-varamini. Be mai veḡa befororini nai, boḡono vaḡa-moḡonigu.

³⁰ Au ḡomi ḡesi asi bita guruḡa-guruḡa maukani, korana mai tanobara eḡori-kauani verena, Satani, tu dori eraḡasini. ḡia tu asi kokorena, be au ḡegu ai kara ta asi beveiani.

³¹ Senaḡi mai tanobara tarimari beḡene riba, au na Tamagu aura-viniani. Ema au tu Tamagu na ekiraḡiato ilailanai aveini.

Be ḡovariḡisi, mai gabu na siraka-veḡita.”

15

Vine ema legana

¹ “Au tu vine ḡauna korikori, ma au Tamagu tu vine tavoḡana ḡauvei-iaḡina tarimana.

² Vine legari au ḡegu ai kafakau dagarari, asi ḡeḡwani legari tu, ḡia na ebasi-vaḡirini; ma lega mabarari ma ḡwari tu, ḡia na eiarevarini, beḡene ḡwa-vovoka uranai.

³ ḡomi tu varau boḡo iareva-ḡosi. Mo guruḡa avinimito moḡeri na beḡe iarevami.

⁴ Au ḡegu ai boḡono kafakau, be au maki ḡomi ḡemi ai kafakau-taḡo bana tanu. A vine legana ta ḡereḡana moḡo nai tu asi beḡwani, senaḡi vine ḡauna ḡenai bekafakau-taḡoni vau beḡwani. ḡomi maki moḡesi, bema au ḡesi asi boḡo sebonani nai, ḡwaḡwami ta asi bevetoreni.

⁵ Au tu vine, a ḡomi tu lega. Au ḡegu ai bekafakauni, au ḡia ḡenai bakafakauni kavana, tarimana tu ḡwaḡwana asisebo bevetoreni. Bema au boḡo iaḡuiguni nai, dagara ta asi boḡo veiani.

⁶ Au ḡegu ai asi ekafakauni tarimana tu, vine ḡauna legana noḡa beḡe ḡabiani, ma beḡe fitoḡaiiani, benamo bea kaukauni. Mo ḡau legari kakorori tu ḡeḡabi-vegogorini, benamo karavai ḡefiu-raḡerini, benamo ḡegaburini.

⁷ Bema ḡomi au ḡegu ai boḡo kafakauni o au ḡesi boḡo sebonani, ma au ḡegu guruḡa ḡomi ḡemi ai betanuni nai tu, kara ḡoura-vinirini dagarari boḡo noḡini tu, ḡemi noḡinoḡi dagarari boḡo ḡoitaḡorini.

⁸ Bema ḡwaḡwami asisebo asisebo beḡe vetoreni nai tu, tarimarima na au Tamagu ḡevaḡa-raḡeani, ema ḡomi maki au ḡegu mero korikori ai boḡo iaḡoni.

⁹ Tamagu na au eura-viniguni ilailanai, au na ḡomi maki aura-vinimini. Vanaḡivanaḡi au ḡegu veuravini nuḡanai boḡono tanu.

¹⁰ Bema au ḡegu taravatu guruḡari boḡo korana-iaḡirini nai, ḡomi tu au ḡegu veuravini nuḡanai boḡo tanuni, ilailana au Tamagu ḡena taravatu guruḡari akorana-iaḡirini, benamo ḡia ḡena veuravini nuḡanai atanuni kavana.

¹¹ Au na maiḡeri guruḡa ḡomi bavini anina tu, au ḡegu iaku ḡomi nuḡami ai bene tanu, be ḡomi maki nuḡami iaku na beḡene vonuvonu-raḡe.

¹² Au ḡegu taravatu guruḡana tu maiḡa, tauḡemi fakami ai karomi ḡesi boḡono veuravini, au na ḡomi aura-vinimini kavana.

¹³ Ma ḡena veuravini barego lelevaḡina tarimana tu, karona urari ai ḡena maḡuri gwaina asi eḡabiani, etore-tariani. Ma ḡena veuravini barego tarimana korikori tu moḡa, ma boruna ta tu asiḡina maia.

¹⁴ Bema au na kara akiramini veigari boĝo veirini nai, ĝomi tu au ĝatagu.

¹⁵ Au na ĝomi tu vetuĝunaĝi-iaĝovini tarimami asi ma bakiraĝimini, korana vetuĝunaĝi-iaĝovini tarimana na ĝena vere na kara eveiani, ĝia tu asi ribana. A ĝomi tu ĝata batoni, korana au Tamagu ĝenana kara aseĝaĝirito dagarari mabarari tu, ĝomi varau avaĝa-ribamito.

¹⁶ Ĝomi na au asi ĝoĝabi-viriĝiguto, senaĝi au na ĝomi aĝabi-hidimito, ema avaĝa-ruĝamito boĝono iaĝo, ĝwaĝwami boĝono vaĝa-ĝorari, ma moĝeri tu namo moĝo beĝene tanu-vanaĝi vanaĝi. Moĝesina tu karakara ĝoura-vinirini dagarari au aragu ai Tamagu boĝo noĝiani tu, Tamagu na bevinimini.

¹⁷ Au ĝegu taravatu guruĝana ĝomi avinimini tu maĝa, karomi ĝesi boĝono veuravini.”

Tanobara tarimari na Iesu ĝena mero ĝeiau-rakava vinirito

¹⁸ “Bema tanobara tarimari na beĝe iau-rakava vinimini nai, boĝono riba, au tu ĝeiau-rakava vini-guineguto.

¹⁹ Bema ĝomi tanobara ĝena tarimarima roĝo ĝoro tanu tu, tanobara tarimari na beĝere ura-vinimi, korana ĝomi tu ĝia ĝeri tarimarima bene. Senaĝi ĝomi tu dia tanobara ĝena tarimarima. Asiĝina. Ĝomi tu varau aĝabi-viriĝimito, ma tanobara maĝurina nuĝana na aĝabi-vaĝimito. Moĝa lorinai tanobara tarimari na ĝeiau-rakavamini.

²⁰ Akiramito guruĝana boĝono tuĝamaĝi-taĝoa: ‘Vetuĝunaĝi merona na etuĝu-naĝiani tarimana asi bevanaĝiani.’ Bema au ĝevaĝa-midigu midiguguto, ĝomi maki beĝe vaĝa-midigu midigumini. Bema au ĝegu guruĝa ĝekorana-iaĝirito, ĝomi ĝemi guruĝa maki beĝe korana-iaĝirini.

²¹ Ĝia na maĝeri veĝa asi namori mabarari ĝomi ĝemi ai beĝe veirini tauna korikori tu, ĝomi na au aragu ĝokorana-iaĝiani nai; korana au etuĝuguto Barauna ĝia tu asi ribari.

²² Bere au asi bara iaĝoma, ma asi bara guruĝa-viniri, ĝia tu asi ĝeri rakava. Senaĝi ĝia maitoma ĝeri rakava na tu asi ĝeri raga-maĝuri dabarana.

²³ Au eiau-rakavaguni tarimana na au Tamagu maki eiau-rakavaiani.

²⁴ Bere au na nuĝa-farevaĝi veĝari, tarima tari na roĝosi roĝo beĝene veiri dagarari, ĝia vefakari ai asi bara veiri, ĝia tu asi ĝeri vei-rakava. Senaĝi maitoma ĝia na moĝeri nuĝa-farevaĝi veĝari tu beĝe ĝitari, ma nuĝanai ĝia na au ma Tamagu ĝesi tauma ruarua tu ĝeiau-rakavamani.

²⁵ Senaĝi maĝeri veĝa ĝeĝorani korana tu, taravatu nuĝanai ĝetoreato guruĝana bene moĝoni ĝana. Mo guruĝa tu iniĝesi ekirani: ‘Au tu ĝeiau-rakava-kavaguto moĝo, asi korana tai.’

²⁶ Vevaĝa-kava Iaukana tu beiaĝomani. Ĝia tu guruĝa moĝoniri kiraĝi-kiraĝiri Iaukana, Tamagu ĝenana beiaĝomani. Au na ĝomi ĝemi ai batuĝuani, Tamagu sevinai batanuni nai tu. Ĝia na au bema kiraĝi-foforiguni.

²⁷ Ĝomi na maki au roĝo boĝono kiraĝi-foforigu, korana ĝomi tu au ĝesi tatanuni tovotovona na veĝata bene.”

16

¹ “Au na maĝeri guruĝa akira-varamini, korana asi aurani ĝemi veĝabidadama na boĝono raka-veĝita.

² Iuda tarimari ĝeri rubu na beĝe tore-veĝitamini. Aba, ĝarona mani eiaĝomani, tau ta na bevaĝi-masemini nai tu, ĝia maboru bekirani, ĝia tu Barau vetuĝunaĝina eiaĝo-viniani.

³ Maĝeri veĝa ĝomi ĝemi ai beĝe veirini korana tu ĝia na au Tamagu asi ĝeribaiato, ema au maki asi ĝeribaguto.

⁴ Senaġi au na maiġeri guruġa tu nakiravara-guinemi. Be ġoirai vau tarimarima na veiġari ġemi ai beġea veirini nai, maiġeri guruġa bakiravarami boġono tuġamaġiri.

Iauka Veaġa ġena ġauvei

Tovotovonai au tu roġo ġomi ġesi tatanuto-ġoi naima, maiġeri guruġa ġemi asi akiraġirito.

⁵ Senaġi toma tu etuġu-mariġoguto Barauna ġenai ma aġenoġoi-iaġoni, ma ta na tu asi odanaġiguni, ‘Ġoi tu aiġana oiaġoni?’ asi otoni.

⁶ Ġomi tu maiġeri guruġa bakira-varami nai, nuġami ġevewaraġini e ġetaġitaġini.

⁷ Senaġi moġoni akiramini, mai tu ġomi ġemi namo uranai ġomi vekaravami na araka-ġerevaġini, arakani. Korana tu bema au asi barakani nai, vevaġa-kava Iaukana ġemi ai asi beiaġomani. Senaġi bema au baiaġoni nai tu, ġemi ai batuġu-iaġomaiani.

⁸ Ma ġia beiaġomani nai, mai tanobara tarimari ġeri vei-rakava ma Barau ġena vei-iobukaiobuka ema Barau na tanobara tarimari bekota-vinirini aniri bevaġa-fofori ginikaurini.

⁹ Ġeri vei-rakava tauna korikori tu, au asi ġevaġa-moġoniguni.

¹⁰ Barau ġena vei-iobukaiobuka tauna korikori tu maiġa, au tu Tamagu ġenai aiaġoni, be asi ma boġo ġita-ġenoġoiguni.

¹¹ Ema Barau na tanobara tarimari bekota-vinirini anina tu maiġea, mai tanobara verena tu varau ekota-viniato.

¹² Dagara vovoka roġo aurani nakira-varami, senaġi mabarari maitoma tu asi ilaila boġo tuġamaġi-fakarini e asi boġo ġabi-raġerini.

¹³ Senaġi guruġa moġoni Iaukana beiaġomani, ġia na vau ġomi beġorkaumini, benamo guruġa moġoniri boġo ribarini. Korana ġia tu dia tauġena ġena tuġamaġi guruġari bekiragirini. Asigina. Ġia tu au ġeguna beseġaġini guruġari moġo bekiragirini. Ema gabivau beġe ġorani dagarari bekiravara-guinemini.

¹⁴ Ġia na au bevaġa-raġeguni, korana au ġeguna beġabirini guruġari ġomi bekira-varamini.

¹⁵ Au Tamagu ġena dagara mabarari tu au ġegu. Moġesi naima au bakira, ‘Ġia na au ġeguna beġabirini guruġari ġomi bekira-varamini.’ ”

“Ġemi nuġa-midigumidigu tu iaku verere ai beġe iaġoni”

¹⁶ “Ġaro asi manaġa nuġanai, ġomi na au asi ma boġo ġitaguni, ma ġaro asi manaġa murinai tu, ma boġo ġitaguni. [Korana au tu Tamagu ġenai aiaġoni.]”

¹⁷ Benamo ġena mero kotari tauġeri vefakari ai moġo ġeguruġa-guruġato, ġekirato, “Mai ġia na tu kara ekiraġiani, ekirani, ‘Ġaro asi manaġa nuġanai au asi ma boġo ġitaguni, ma ġaro asi manaġa murinai tu ma boġo ġitaguni,’ e ma ekirani, ‘Korana au tu Tamagu ġenai aiaġoni?’ ”

¹⁸ Moġesina naima ġekirato, “Mai ġia na tu kara ekiraġiani, ekirani, ‘Ġaro asi manaġa’ etoni? Ġita asi taribani ġia na tu kara ekiraġiani!”

¹⁹ Iesu eribato, ġena mero ġeri ura tu ġedanaġia ġetato-ġoi, naima ġia na evaġa-guruġarito, ekirato, “Ġomi tu tauġemi ġereġami au na kara bakiraġia vedare-mutukana ġoveini ei? Au bakira, ‘Ġaro asi manaġa nuġanai asi ma boġo ġitaguni, ma ġaro asi manaġa murinai tu ma boġo ġitaguni,’ basi anina ġovetauani?”

²⁰ Moĝoni akiramini, ĝomi tu boĝo taĝini e boĝo taĝi-vanoro vanoroni, senaĝi tanobara tarimari tu beĝe iakuni, beĝe verereni. Ĝomi tu boĝo nuĝa-midigu midiguni, senaĝi ĝemi nuĝa-midigumidigu tu iaku verere ai beĝe iaĝoni.

²¹ Vavine ta mero nevaĝa-maĝuria ĝana tu, emidigumidiguni, korana ĝena ĝabi aoana eraĝasini. Senaĝi mero emaĝurini nai, ĝenai mo midigumidigu tu etuĝa-rekwaiani, korana mero ta tanobarai varau bevaĝa-maĝuria iakunai.

²² Ĝomi maki moĝesina: Toma tu ĝonuĝa-midigu midiguni, senaĝi au na ma baĝita-ĝenoĝoimini, be ma boĝo iakuni. Ma tarima ta na ĝomi ĝemi mo iaku tu asi ilaila ĝemina ma beĝabi-veĝitaiani.

²³ Ma mo ĝaro ai ĝomi na au dagara ta asi ma boĝo noĝiguni. Moĝoni akiramini, au aragu ai karakara boĝo noĝirini dagarari mabarari, au Tamagu na bevinimini.

²⁴ Beiaĝoma mo initoma, ĝomi na au aragu ai dagara ta roĝosi roĝo boĝoro noĝia. Au aragu ai boĝono noĝi-raĝe, be boĝono doĝari; benamo nuĝami iaku na beĝene vonuvonu-raĝe.”

Iesu na tanobara ĝena seĝuka evaĝa-ketoato

²⁵ “Maiĝeri guruĝa au na ĝomi ĝemi tu barabore ai akiraĝirini, senaĝi ĝaro ĝoirai tu barabore ai asi ma bavaĝa-guruĝamini. Ĝoirai vau au Tamagu varina tu ĝemi bakiraĝi-fofori ginikauani.

²⁶ Mo ĝaro beraĝasini nai, ĝomi tu au aragu ai boĝo noĝinoĝini. A au tu asi akirani, au na ĝomi urami ai Tamagu banoĝiani;

²⁷ korana Tamagu tauĝena na ĝomi eura-vinimini. Ĝomi eura-vinimini, korana ĝomi na au ĝoura-viniguni, ema ĝovaĝa-moĝoniguni, au tu Barau ĝenana oiaĝomato.

²⁸ Au tu Tamagu sevina na mai tanobara ĝana amariĝoto. Ma toma tu mai tanobara aiaĝuiani, Tamagu ĝenai ma aĝenoĝoi-iaĝoni.”

²⁹ Ĝena mero na ĝevaĝa-guruĝaiato, ĝekirato, “Oĝitaiani, toma ĝoi tu oguruĝa-fofori ginikauni, asi oguruĝa-baraboreni.

³⁰ Toma ĝai ĝama riba-korikorini, ĝoi tu dagara mabarari ma ribamu. Tarima ta na nedanaĝimu betoni vedanaĝina maki, ĝoi na tu boriba-guineani. Moĝa lorinai ĝavaĝa-moĝonimuni, ĝoi tu moĝoni Barau ĝenana oiaĝomato.”

³¹ Iesu na evaĝa-veserito, ekirato, “Mai vau ĝovaĝa-moĝoniguni, ei?

³² Moĝoni, ĝarona mani eiaĝomani, varau beraĝasi, ĝomi tu boĝo raga-rovorovoni, tata ĝemi ura ragana boveini, benamo au tu ĝereĝagu boĝo iaĝui-momoraĝiguni. Senaĝi au tu dia ĝereĝagu, korana Tamagu tu au sevigui ai.

³³ Au aurani, au ĝegu ai boĝono kafakau, be au ĝegu ai maino boĝono ĝabi uranai, au na maiĝeri guruĝa ĝomi bakira-varami. Mai tanobarai ĝotanuni nai, midigumidigu boĝo ĝoitaĝoani. Senaĝi boĝono kokore! Au na tanobara ĝena seĝuka avaĝa-ketoato.”

17

Iesu ĝena ĝuriĝuri

¹ Iesu moĝesi eguruĝa-ĝosito murinai, egaga-raĝeto, guba eĝitaiato, benamo ekirato, “Tamagu, horana tu maĝa. Natumu marevana baregona novaĝa-foforia, be Natumu na ĝoi marevamu baregona maki bene vaĝa-foforia.

² Korana ġoi na maoro ġia oviniato, tarimarima mabarari ġia ġena veġitaġau gaburenai beġene tanu. Be ġoi na ġia oviniato tarimari mabarari maġuri vanaġivanaġi bene viniri.

³ Maġuri vanaġivanaġi tu maiġa: Maġuri vanaġivanaġi beġe ġabiani tarimari mabarari beġene riba, Barau moġonimu tu ġoi sebomu kwariġutu moġo, ema Iesu Keriso beġene ribaia. Iesu Keriso tu ġoi na otuġuato tanobara ġana.

⁴ Au na ġoi tanobarai bavaġa-raġemu. Ġoi na oviniguto bana veia otato ġauveina varau bavaġa-koria.

⁵ Tama, tanobara roġosi bere vesina ema au maki roġo ġoi ġesi atanuto-ġoi nuġanai, au ġegu ai tu mareva baregona etanuto-ġoi. Toma aurani, mo mareva ġoi tauġemu ġoiramu ai ġegu ai novaġa-foforia.”

Iesu ġena mero ġeri eġauġauto

⁶ “Tanobara maġurina nuġana na oġabi-vaġirito, benamo oviniguto tarimari ġeri ai ġoi tu avaġa-foforimuto. Moġeri tu ġoi ġemu tarimarima, ġoi na au oviniguto. Ma ġia na ġoi ġemu guruġa ġekorana-iaġiato.

⁷ Toma ġia beġe riba, ġoi na oviniguto dagarari mabarari tu ġoi ġemuna moġo ġeiaġomato.

⁸ Korana ġoi na oviniguto guruġari mabarari akira-vararito. Ġia na mo guruġa mabarari ġeġabi-raġerito, ma ġeriba-maoroto, au tu ġoi sevimu na aiaġomato. Ema ġevaġa-moġoniani, au ġoi na otuġu-iaġomaguto.

⁹ Au tu ġia ġeri aġuriġurini. Au tu dia mai tanobara maġurinai ġetanuni tarimari ġeri aġauġauni. Senaġi au oviniguto tarimari ġeri aġauġauni, korana ġia tu ġoi ġemu tarimarima.

¹⁰ Au ġegu tarimarima mabarari tu ġoi ġemu tarimarima. Ema ġoi ġemu tarimarima mabarari tu au ġegu tarimarima. Ema ġia ġerina au aragu evaraġeni, korana au ġegu mareva baregona ġevaġa-foforiani.

¹¹ Au tu ġoi ġemu ai aiaġosini, mai tanobarai asi batanu-rovaġini. Senaġi ġia tu tanobarai roġo beġe tanuni. Tamagu Veaġamu, ġoi na au oviniguto tarimari ġoi aramu seġukana na bono ġitaġauri. Be ġia mabarari beġene sebona, ġita taura ruarua kavana.

¹² Au tanobarai roġo ġia ġesi atanuto-ġoi nuġanai, ġoi aramu seġukana na ġia anariġaurito-ġoi. Ġoi na au oviniguto tarimari tu aġitaġau-ġinikaurito, be ta asi erekwarekwato; bene rekwarekwa tauna moġo, moġoni erekwarekwato, Buka Veaġai ġetoreato guruġana vaġa-moġonina ġana.

¹³ Senaġi toma au tu ġoi ġemu ai aiaġosini. Au tu roġo tanobarai maiġegu nuġanai, maiġeri guruġa bakiraġiri, au ġegu iaku e verere na ġia nuġari bene vaġa-vonuvonu raġeri ġana.

¹⁴ Ġoi ġemu guruġa au na ġia varau avinirito. Ma tanobara maġurinai ġetanuni tarimari na ġeiau-rakavarini, korana ġia toma tu dia mai tanobara tarimari, au kavana, au tu dia mai tanobara tarimagu.

¹⁵ Au tu dia ġia mai tanobara na bono ġabi-vaġiri ġuriġurina aveini. Senaġi anoġimuni, bono nariġauri, be Tarima Rakavana, Satani, na asi bene ġabiri atoni.

¹⁶ Ġia tu dia mai tanobara tarimari, au kavana, au tu dia mai tanobara tarimagu.

¹⁷ Ġoi ġemu guruġa moġonina na novaġa-veaġari; ġoi ġemu guruġa tu moġoni.

¹⁸ Ġoi na tanobara maġurinai ġetanuni tarimari fakari ai au otuġu-toġaguto ilailanai, au na ġia maki tanobara maġurinai roġo ġetanuni tarimari vekaravari ai batuġu-toġari.

19 Ĝia urari ai au tauĝegu avevaĝa-veaĝani, be ĝia maki beĝene veaĝa-korikori.”

Iesu eĝurigrurito veĝabidadama tarimari mabarari ĝeri

20 “Au tu dia ĝia ĝena mero ĝereĝari ĝeri moĝo aĝauĝauni. Asiĝi. Au tu ĝia na vari beĝea fiuani nai, au beĝe vaĝa-moĝoniguni tarimari mabarari maki ĝeri aĝurigrurini.

21 Be ĝia mabarari sebonai beĝene iaĝo, Tama, ĝoi au nuĝagu ai otanuni ema au ĝoi nuĝamu ai atanuni ilailana. Moĝesi kavana au aurani, ĝia maki beĝene sebona moĝo, ma ĝita nuĝarai beĝene tanu, be tanobara maĝurinai roĝo ĝetanuni tarimari beĝene riba, au tu ĝoi na otuĝu-mariĝoguto.

22 Ĝoi na au mareva baregona oviniguto dagarana ĝia avinirito, ĝia sebonai beĝene iaĝo uranai, be ĝita taura ruarua sebona kavana, ĝia maki beĝene sebona.

23 Au ĝia nuĝari ai, ma ĝoi au nuĝagu ai, be ĝia maki beĝene sebona-kwariĝuto korikori. Benamo monana tanobara maĝurinai roĝo ĝetanuni tarimari beĝene riba, au tu ĝoi na otuĝu-iaĝomaguto, ema beĝene riba maki, ĝoi na ĝia oura-vinirini au oura-viniguni kavana.

24 Tama, au ĝegu ura baregona tu, au ainai batanuni, au oviniguto tarimari maki au ĝesi, be monai baĝana tanu, be au mareva baregona oviniguto marevana beĝene ĝitaia. Mo mareva oviniguto, korana au ĝoi na tu tanobara roĝosi roĝo boro veia nuĝanai veĝata oura-viniguto.

25 Tamagu o, ĝoi tu vei-iobukaiobuka Baraumu, tanobara maĝurinai ĝetanuni tarimari na ĝoi asi ĝeribamuto. A au na tu ĝoi aribamuto, ema au ĝegu mero maĝeri tu beĝe riba, au tu ĝoi na otuĝu-mariĝoguto.

26 Ĝoi aramu ĝia akira-vararito, e roĝo bakiraĝi-foforiani. Korana monana au oura-viniguni veuravinina ĝia nuĝari ai betanuni, ema au maki ĝia nuĝari ai batanuni.”

18

Iesu tuari tarimari na ĝeĝabiato

1 Iesu na mo ĝauĝau ekiraĝi-ĝosiato murinai, ĝena mero ĝesi ĝerakato. Ĝeiaĝoto, Kidron ĝarukana na ĝeraka-vanaĝito, reke ta ĝana. Monai tu vamoka ta, ma ĝena mero ĝesi mo vamoka nuĝana na ĝeraka-toĝato.

2 Iudas, Iesu erevaiato tarimana, maki mo gabu tu ma ribana, korana Iesu ma ĝena mero ĝesi monai ĝaro vovoka ĝetanu-vegogoto-ĝoi.

3 Moĝesina naima Iudas na Roma vetari tarimari e Rubu Veaĝa ĝitaĝauna tarimari tari eĝoririto. Mo Rubu Veaĝa ĝitaĝauna tarimari tu Rubu Veaĝa vereri baregori e Farisea tarimari na ĝetuĝurito. Benamo mo vamoka ĝana ĝeiaĝoto, ma tosiri, ma lamefari, ema ma ĝeri vetari farefareri.

4 Iesu tu ribana guine, ĝia ĝenai kara beĝe ĝorani dagarari mabarari, naima eiaĝoto seviri ĝana, benamo edanaĝirito, ekirato, “Ĝomi na tu deikara ĝovetauani?”

5 Ĝia ĝevaĝa-veseto, ĝekirato, “Iesu, Nasareta tarimana.” Iesu na ekirarito, ekirato, “Tarimana tu au.” Ma Iudas, Iesu erevaiato tarimana, maki ĝia ĝesi monai ruĝataĝo.

6 Iesu na ekirarito, ekirato, “Tarimana tu au,” etato nai, ĝia mabarari ĝeruĝa-ĝenoĝoito, benamo tano ai ĝeketo-tarito.

7 Iesu na ma edanaĝi-ĝenoĝoirito, ekirato, “Ĝomi na tu deikara ĝovetauani?” Benamo ĝia ĝekirato, “Iesu, Nasareta Tarimana.”

⁸ Iesu evaḡa-veseto, ekirato, “Au na bakirami, tarimana tu au. Bema ḡomi tu au moḡo ḡovetauguni nai, maiḡeri tarima ḡotuḡuri, ḡeraka.”

⁹ Moḡesi ekirato, korana ḡia ḡena guruḡa tovotovonai ekiraḡiato guruḡana bene moḡoni ḡana, ekirato, “Au oviniguto tarimari tu sebona ta maki asi avei-rekwa-rekwaiato.”

¹⁰ Ma nuḡanai Simona Petero ḡimanai tu vetari baḡana ta. Mo vetari baḡana einu-vaḡiato, edaveato, benamo Rubu Veaḡa verena baregona ḡena vetuḡunaḡi-iaḡovini tarimana seḡana aroribana ebasi-vaḡiato. Mo vetuḡunaḡi-iaḡovini tarimana arana tu Malko.

¹¹ Benamo Iesu na Petero ekiraiato, ekirato, “Ḡoi na mani vetari baḡana faosinai noḡura-toḡaia! Au Tamagu na bevinigu midigumidigu bedina tu asi bana niua, ei?”

Iesu Anas ḡenai ḡeḡori-iaḡoato

¹² Benamo vetari tarimari ma ḡorikauri tarimana ema Iuda tarimari ḡeri Rubu Veaḡa ḡitaḡauna tarimari na Iesu ḡeḡabiato, benamo ḡebarubaruato,

¹³ benamo Anas ḡenai ḡeḡori-iaḡo guineato, korana Anas tu Kaiafas ḡena taḡama. Kaiafas na Anas natuna vavinena eḡaraḡoato. Kaiafas tu Rubu Veaḡa verena baregona mo laḡani ai.

¹⁴ Kaiafas na Iuda tarimari esisiba-vinirito, ekirato, “Namona tu tarima sebona ta moḡo tarimarima mabarari urari ai bene mase.”

Petero na Iesu ekira-ḡuniḡauato

Mataio 26:69-70; Mareko 14:66-68; Luka 22:55-57

¹⁵ Simona Petero e Iesu ḡena mero ta na tu Iesu ḡeraka-ḡiuato. Rubu Veaḡa verena baregona tu ma ribana, mo Iesu ḡena mero moḡa. Moḡesi nai ḡia maki Iesu ḡesi evaḡa-rakatoḡa sebonaiato, Rubu Veaḡa verena baregona ḡena numa maḡuna nuḡanai Kota gabunai.

¹⁶ Senaḡi Petero tu ḡatama-boka murikanai moḡo eruḡato. Ma mo Iesu ḡena mero, Rubu Veaḡa verena baregona na eribaiato merona, ma eḡenoḡoito, benamo ḡatama-boka eḡita-ḡauato ḡuiatona ea vaḡa-guruḡaiato, ma Petero eḡori-toḡaiato.

¹⁷ Benamo ḡatama-boka eḡita-ḡauato ḡuiatona na Petero ekiraiato, ekirato, “Ḡoi maki mai tarima ḡena mero ta, ene?” Petero evaḡa-veseto, ekirato, “Asiḡina, au tu asiḡi.”

¹⁸ Mo gabu faraka na eḡabiato, be vetuḡunaḡi-iaḡovini tarimari ema Rubu Veaḡa ḡitaḡauna tarimari na tu karava ta ḡetutuato. Benamo mo karava ḡeruḡa-ḡeḡeraḡiato, ḡevetunuto-ḡoi. Petero maki ḡia seviri ai eruḡato ma evetunuto-ḡoi.

Rubu Veaḡa verena baregona na Iesu edanaḡiato

Mataio 26:59-66; Mareko 14:55-64; Luka 22:66-71

¹⁹ Mo horai tu Rubu Veaḡa verena baregona na Iesu edanaḡiato, Iesu ḡena mero e ḡena vevaḡa-riba evedanaḡi-iaḡirito.

²⁰ Iesu na evaḡa-veaseato, ekirato, “Au tu tarimarima ḡutuma-bara ḡoirari ai aguruḡa-foforito. Au tu vanaḡivananai Iuda tarimari ḡeri rubu ai ema Rubu Veaḡa nuḡari ai avevaḡa-ribato-ḡoi, ma Iuda tarimari ḡema-raka-vegogoni gaburi ai, au asi aguruḡa-vekuretoḡato.

²¹ Kara dainai au odanaḡiguni? Mo au aguruḡato ḡeseḡaḡiguto tarimari noa danaḡiri, ḡia ma ribari au na kara akiravara-vinirito.”

²² Iesu moḡesi eguruḡato nai, Rubu Veaḡa ḡitaḡauna tarimana ta ḡia sevinai eruḡa-taḡoto-ḡoi, monana Iesu ḡoirana eforo-bubuḡauato. Benamo

Iesu ekiraiato, ekirato, “Ĝoi mai Rubu Veaĝa verena baregona tu maniĝesi ovaĝa-guruĝaiani?”

²³ Iesu na evaĝa-veŝeato, ekirato, “Bema au na guruĝa rakavana ta bakiraĝia nai, nokiraĝia, kamara guruĝa rakavana! Senaĝi bema au tu baguruĝa-korikori, kara dainai boforogu.”

²⁴ Benamo Anas na Iesu roĝo varo na barubaru Rubu Veaĝa verena baregona Kaiafas ĝenai etuĝu-iaĝoato.

Petero na Iesu ma ekira-ĝuniĝau ĝenoĝoiato

Mataio 26:71-75; Mareko 14:69-72; Luka 22:58-62

²⁵ Simona Petero tu roĝo ruĝataĝo karavai evetunuto-ĝoi. Benamo karava sevinai ĝeruĝa-vegogoto tarimari na ĝedanaĝiato, ĝekirato, “Ĝoi maki ĝia ĝena mero ta, ene?” Petero evekira-ĝuniĝauto, ekirato, “Asiĝina, au tu asiĝi.”

²⁶ Rubu Veaĝa verena baregona ĝena vetuĝunaĝi-iaĝovini tarimana ta tu mo Petero na seĝana ebasi-vaĝiato tarimana garagarana ta, ĝia ekirato, “Au atuĝamaĝini tu, ĝoi maki ĝia ĝesi mo vamoka nuĝanai aĝitamuto banaĝu, ene?”

²⁷ Petero ma evekira-ĝuniĝau ĝenoĝoito, ma nuĝanai asikauna tu kokoroku egoĝito.

Iesu Pilato ĝoiranai

Mataio 27:1-2 ema 27:11-14; Mareko 15:1-5; Luka 23:1-5

²⁸ Benamo Iuda tarimari na Iesu Kaiafas sevinai na ĝeĝori-iaĝoato Roma ĝeri gavana ĝena numa barana ĝana. Mo tu varau ekini-mama mamato-ĝoi. Ma Iuda tarimari tu asi ĝeurato, Roma ĝeri gavana ĝena numai beĝene rakatoĝa, korana ĝekirato, veiareva, asi rakavari, beĝene tanu. Ĝia ĝeri ura tu Pasova o mase aneruna na Isaraela tarimari evanaĝirito moĝo asi evaĝirito verekona beĝene ĝania veĝata.

²⁹ Benamo Pilato ĝeri ai eraka-rosito, benamo ekirato, “Mai tarima boĝo ĝabi-iaĝomaia ĝena kerere korana tu kara?”

³⁰ Ĝia na ĝevaĝa-veŝeato, ĝekirato, “Bema ĝia veĝa rakavari asi bere vei nai tu, ĝoi ĝemu ai asi baĝara ĝabi-iaĝomaia.”

³¹ Benamo Pilato na ekirarito, ekirato, “Goĝabia, ma ĝoĝori-iaĝoa, benamo ĝemi taravatu ekirani ilailanai ĝoa vaĝa-kotaia.” Moĝesi naima Iuda tarimari na Pilato ĝekiraiato, ĝekirato, “Ĝai ĝema taravatu na tu maoro asi evinimani, tarima ta baĝana vaĝi-masea.”

³² Maiĝa eĝorato anina tu, Iesu na ĝia aiĝesina bemaseni ekiraĝiato guruĝana bene moĝoni ĝana.

³³ Benamo Pilato numa barana ĝana ma erakatoĝa-ĝenoĝoito, bema Iesu ekeaiato, ma edanaĝiato, “Ĝoi tu Iuda tarimari ĝeri vere ba?”

³⁴ Iesu na evaĝa-veŝeato, ekirato, “Ĝoi maniĝesi au okiraĝini tu tauĝemu nuĝamu siga moĝo oguruĝani ba tarima tari na beĝe kira-varamu guruĝana.”

³⁵ Pilato evaĝa-veseto, ekirato, “Be, au tu Iuda tarimagu, ei? Ĝoi tu ĝemu tanobara tarimari na ema Rubu Veaĝa vereri na beĝe ĝabi-iaĝomamu, au beĝema vinigu. Ĝoi tu kara kererena oveiato?”

³⁶ Iesu na evaĝa-veŝeato, ekirato, “Au ĝegu Basileia tu dia mai tanobara dagarana. Bere au ĝegu Basileia mai tanobara nuĝanai bere vetore e bere ruĝa nai tu, au ĝegu vetuĝunaĝi-iaĝovini tarimari ĝere variĝisi, Iuda tarimari ĝesi ĝere vevaĝi, ma tarima ta maki asi bere ilaila, Iuda tarimari ĝimari ai bere toregu. Senaĝi au ĝegu Basileia tu dia mai tanobara nuĝanai eruĝani.”

³⁷ Pilato na moĝesina naima Iesu edanaĝiato, ekirato, “Be ĝoi tu vere ba?” Iesu evaĝa-veseto, ekirato, “Ĝoi okirani au vere otoni tu moĝoni oguruĝani. Au tanobarai ama maĝurito tauna korikori, guruĝa moĝonina bana vaĝa-foforia ĝana. Guruĝa moĝoninai ĝetanuni tarimari mabarari na au garogu tu ĝeseĝaĝiani.”

³⁸ Pilato ekirato, “Guruĝa moĝonina tu kara?”

Iesu bene mase guruĝana

Mataio 27:15-31; Mareko 15:6-20; Luka 23:13-25

Moĝesi eguruĝato murinai, ma eraka-rosito Iuda tarimari ĝeri ai, benamo ekirarito, ekirato, “Au na mai tarima ĝenai rakava ta tu asi badoĝaria.

³⁹ Senaĝi ĝomi ĝemi veĝa ta tu iniĝesi, Pasova verekona ĝaronai, dibura tarimana ta bana tuĝu-vaĝia. Be ĝomi ĝourani tu, ĝemi Iuda tarimari ĝeri vere natuĝu-vaĝia, ba?”

⁴⁰ Benamo ĝia mabarari ĝekoĝoto, ĝekirato, “Asiĝina! Ĝia tu asiĝi! Senaĝi Barabas.” A Barabas tu elemato-ĝoi e evevaĝito-ĝoi naima ĝediburaiato.

19

¹ Moĝesi naima Pilato na Iesu eĝabiato, vetari tarimari o soldia evinirito, benamo ĝekwariato.

² Ema soldia na varovaro ma giniri dagarana ĝebito-ĝeĝeraĝiato, korona noĝa ĝeveiato, benamo Iesu debanai ĝetore-kauato. Ema dabuĝa maukana kakakakana na ĝevaĝa-dabuĝaiato.

³ Benamo ĝoirana ĝana ĝeraka-kavito, benamo ĝekiraiato, ĝekirato, “Iuda tarimari ĝeri Vere, ĝaro namona!” Benamo ĝoirana ma ĝeforoato.

⁴ Pilato ma eraka-rosito Iuda tarimari ĝeri ai, benamo ekirarito, ekirato, “Ĝoĝitaia, au na ĝia ĝomi ĝoirami ai ama ĝori-rosiani anina tu nama vaĝa-ribami, au na ĝia ĝenai rakava ta tu asi badoĝaria.”

⁵ Benamo Iesu ema raka-rosito, debana tu ma koronana, ĝau ma giniginina ĝevatoato dagarana, ema dabuĝa kakakakana maki roĝo etogi-taĝoato-ĝoi. Benamo Pilato na Iuda tarimari ekirarito, ekirato, “Ĝoĝitaia, tarimana tu maiĝa.”

⁶ Moĝesi Rubu Veaĝa vereri baregori ma ĝeri vetuĝunaĝi-iaĝovini tauri na ĝeĝitaiaato nai, ĝefararato, ĝekirato, “Ĝovaĝa-satauroa! Ĝovaĝa-satauroa!” Benamo Pilato na ekirarito, ekirato, “Ĝomi tauĝemi na ĝoĝabi-iaĝoa, ma ĝoa vaĝa-satauroa, korana au na ĝia ĝenai kerere ta asi badoĝaria.”

⁷ Ma Iuda tarimari na ĝevaĝa-veseato, ĝekirato, “Ĝai tu ma ĝema taravatu, ma ĝai ĝema taravatu ekirani, ĝia tu bene mase veĝata, korana ĝia tu tauĝena moĝo Barau Natunai bevevaĝa-iaĝo.”

⁸ Pilato na mo guruĝa eseĝaĝiato nai, egari-rakava rakavato.

⁹ Benamo numa baregonai ma eraka-toĝato, benamo Iesu ekiraiato, ekirato, “Ĝoi tu ainana oiaĝomato, ei?” Senaĝi Iesu na asi evaĝa-veseato.

¹⁰ Benamo Pilato na ekiraiato, ekirato, “Ĝoi tu asi ourani au vaĝa-vesegu ei? Ĝoi asi ribamu au tu ma ĝegu seĝuka ĝoi bavaĝa-satauromuni, e ma ĝegu seĝuka ĝoi batuĝu-vaĝimuni?”

¹¹ Iesu evaĝa-veseto ekirato, “Bere Barau na guba na ĝoi seĝuka asi bere vinimu nai tu, toma au ĝoi ĝemu seĝuka gaburenai asi bara ritoĝo. Moĝa lorinai, au eĝabiguto ma ĝoi ĝimamu ai etoreguto tarimana, ĝena rakava tu barego lelevaĝi”.

¹² Pilato na mo guruḡa eseḡaḡiato, benamo dabara evetauto-ḡoi, ḡena ura Iesu bene tuḡu-vaḡia. Senaḡi Iuda tarimari roḡo ḡekoḡoto-ḡoi, ḡekirato-ḡoi, “Bema ḡoi na mai tarima botuḡu-vaḡiani nai, ḡoi tu dia Kaisara ḡatana. Kamara tarima tauḡena evekiraḡini vere etoni, ḡia na tu Kaisara, Roma ḡeri vere, ekira-fitoḡaiani.”

¹³ Pilato na mo guruḡa eseḡaḡiato, benamo Iesu ema ḡori-rociato, benamo eiaḡoto, Kota eseḡaḡini tarimana ḡena sea ai ea tanukauto. Mo gabu tu “Fore Touraḡena” ḡetato-ḡoi. Ma Heberu garonai tu “Gabata.”

¹⁴ Mo ḡaro tu Pasova o Iuda tarimari mase aneruna na evanaḡirito moḡo verekona ḡana rovinatore ḡarona, ma horaḡauna 12 koloko tu varau eḡabiato. Benamo Pilato na Iuda tarimari ekirarito, ekirato, “Ḡoboḡe, ḡemi vere iomaḡa!”

¹⁵ Senaḡi ḡia tu ḡefararato, ḡekirato, “Ḡoḡabi-veḡitaia! Ḡoḡabi-veḡitaia! Ḡoa vaḡa-satauroa!” Pilato na ma edanaḡirito, ekirato, “Ḡomi ḡemi vere tu navaḡa-satauroa, ei?” Rubu Veaḡa vereri baregori ḡevaḡa-veseto, ḡekirato, “Kaisara ḡereḡana moḡo ḡai ḡema vere, ma vere boruna ta tu asiḡina.”

¹⁶ Benamo Pilato na Iesu ḡia ḡimari ai etore-kauato beḡene vaḡa-satauroa ḡana.

Iesu ḡevaḡa-satauroato

Mataio 27:32-44; Mareko 15:21-32; Luka 23:26-43

Benamo vetari tarimari o soldia na Iesu ḡeḡabiato, ḡeḡori-iaḡoato.

¹⁷ Ma Iesu na ḡena satauro efaḡa-vaiciato, eraka-rosito, eiaḡoto gabu arana “Deba Ḡavana Gabuna” ḡana. Heberu garonai mo gabu arana tu “Golgota”.

¹⁸ Mo gabu ai ḡia na Iesu ḡevaḡa-satauroato tarima ruarua ḡesi; ta tavi tai, ta tavi tai, ma Iesu tu nuḡanai.

¹⁹ Ma Pilato na guruḡa tari ḡau lefalefa tai etorerito, benamo satauro tuḡunai ḡeikoko-kafakauato. Etorerito guruḡari tu maiḡeri, “IESU, NASARETA TAUNA, IUDA TARIMARI ḠERI VERE.”

²⁰ Mo guruḡa tu Heberu garo ai, e Roma garo ai, ema Grik garo ai etorerito. Iesu ḡevaḡa-satauroato gabuna tu vanuḡa baregona sevinai, be Iuda tarimari vovoka na mo guruḡa debana ḡeivaiato.

²¹ Benamo Rubu Veaḡa vereri baregori na Pilato ḡekiraiato, ḡekirato, “‘Tuda tarimari ḡeri Vere’ tu asi notorea, senaḡi iniḡesi notorea, ‘Ḡia ekirato, au tu Iuda tarimari ḡeri Vere.’”

²² Ma Pilato na evaḡa-veserito, ekirato, “Kara au na batorea guruḡana tu batorea veḡata.”

²³ Vetari tarimari na Iesu ḡevaḡa-satauroato murinai, ḡena dabuḡa ḡeḡabirito, ma karava vasivasi ḡeveirito, benamo vetari tarimari na ḡeri sebori sebori ḡeḡabito, ma vei-gabigabi dabuḡana tu ḡeiaḡuiato. Korana vei-gabigabi dabuḡana tu dabuḡa sebona na moḡo ḡeturiato. A ḡia tu dia dabuḡa vesavesari vovoka ḡeturi-kavikavito vau ḡeveiato dabuḡana.

²⁴ Moḡesina naima tauḡeri fakari ai ḡeguruḡa-vegogoto, ḡekirato, “Asi sidarea, senaḡi laki ḡerena ta siveia, bewinini tarimana na mo dabuḡa bene ḡabia uranai.” Mai veiḡa ḡeveiato tauna korikori tu, Buka Veaḡai ḡetorerito guruḡari beḡene moḡoni ḡana, maiḡesi ekirani, “Au ḡegu dabuḡa ḡia fakari ai ḡekaravarito, ema au ḡegu dabuḡa uranai laki ḡerena ta ḡeveiato.” Moḡesi naima vetari tarimari na maiḡeri veiḡa ḡeveirito.

²⁵ Iesu ġena satauro koranai tu vavine vasivasi (4) ġeruġa-taġoto-ġoi: Iesu sinana, e Iesu sinana tarina vavinena, e Maria, Klopa ġaraġona, ema Maria, Magadala vanuġana vavinena.

²⁶ Iesu na sinana e Iesu na eura-viniato-ġoi merona monai ruġataġo eġitarito, benamo Iesu na sinana ekiraiato, ekirato, “Natumu merona maniġa.”

²⁷ Ema ġena mero ekiraiato, ekirato, “Sinamu maniġa.” Mo ġaro na evesinato, Iesu ġena mai mero na Iesu sinana ġena numa ġana eġori-iaġoato, benamo enariato-ġoi.

Iesu ġena mase

Mataio 27:45-56; Mareko 15:33-41; Luka 23:44-49

²⁸ Moġa murinai Iesu eribato, ġena ġauvei mabarari tu varau bevaġa-koriri. Ma Buka Veaġai ġetoreato guruġana bene moġoni uranai ekirato, “Au bokagu bekoke.”

²⁹ A gwaġutu ta nuġanai tu vine nanuna mamakina monai toretaġo. Nanu erimaiani dagarana mo vine nanuna mamakinai ġeduġi-fereiato. Ma vine nanuna mamakina na evonuto, benamo isopo legana dudunai ġetore-kauato, benamo ġeduġi-varaġeato, Iesu bokanai ġetore-kauato.

³⁰ Iesu na mo vine nanuna mamakina eniuato, benamo ekirato, “Bemakori.” Ma debana eġero-riġoto, benamo tauġanina na ġia iaukana erakavaġito, emaseto.

Soldia ta na Iesu sebina egwanuato

³¹ Mo ġaro moġa tu rovinatore ġarona, korana beboġini ma belaġanini tu Sabadi veaġana baregona ta mo Pasova o Iuda tarimari mase aneruna na evanaġirito moġo verekona ġarori nuġari ai. Moġa lorinai Iuda tarimari asi ġeurato, mo Sabadi veaġana baregonai mase tarimari tauġaniri satauro tuġunai beġene tanu. Moġesi naima Pilato ġenogiato, Iesu ema mo tarima ruarua kwakuri beġene kwari-koruri, benamo satauro tuġuna na beġene ġabi-riġori.

³² Moġa lorinai vetari tarimari ġeiaġomato, benamo ġevaġa-satauro debaiato tarimana kwakuna ġekwari-koruato, ma tarima vaġa-ruaruana Iesu ġesi ġevaġa-satauroato moġa maki moġesi ġeveiato.

³³ Senaġi Iesu ġenai ġeiaġomato nai, Iesu tu varau emaseto ġeġitaiato, be kwakuna asi ġekwari-koruato.

³⁴ A vetari tarimana ta na moġo Iesu sebina garaġota na egwanuato. Benamo asikauna mo egwanuato gabuna na rara e nanu ġevebubu-rosito.

³⁵ Maiġa eġitaiato tarimana na evari-fiuato, ma ġia ġena vevarifu tu moġoni. Ġia ma ribana, ġia tu eguruġa-korikorini, ma ġia na ekiraġi-foforiani anina tu, ġomi na maki boġono vaġa-moġonia ġana.

³⁶ Maiġeri veiġa ġeveirito korana tu, Buka Veaġai ġetorerito guruġari beġene moġoni, ekirani, “Ġia tu turiġana sebna ta maki asi beġe laukoruani.”

³⁷ Ma Buka Veaġai etoreato guruġana ta tu maiġesi ekirani, “Sebina ġegwanuato tarimana ġenai ma beġe boġe-raġeni.”

Iesu ġeguriato

Mataio 27:57-61; Mareko 15; 42-47; Luka 23:50-56

³⁸ Maiġa murinai Iosefa, Arimatea tarimana, na Pilato enogiato, Iesu tauġanina bene ġabia ġana. Pilato na maoro eviniato, benamo eiaġoto, Iesu tauġanina ea ġabiato. Iosefa tu Iesu ġena mero ta, senaġi Iuda tarimari

gariri eveito-ḡoi, be eraka-vekuretoḡato-ḡoi, ḡena veḡabidadama asi evaḡa-foforito-ḡoi.

³⁹ Nikodemo, tovotovonai Iesu ḡenai boḡi eiaḡoto tarimana, maki eiaḡoto. Ḡia na tu muro e aloe ḡegiro-sebonarito muramurana kilogram gabana toitoi (30) maki eḡabi-kauato. (Mo vedau muramurana bonana tu namo vedaurea).

⁴⁰ Benamo Iesu tauḡanina ḡeḡabiato, ma tauri ruarua na dabuḡa kurokurona namona mamuramurana dagarana na ḡekumuato, Iuda seneri na mase tarimari ḡeveirito-ḡoi ilailanai.

⁴¹ Iesu ḡevaḡa-satauroato gabuna tu ma vamokana. Mo vamoka nuḡanai tu gara kouḡana ta fore na ḡeveiato, ma nuḡanai tarima ta tu roḡosi beḡere tore-toḡaia.

⁴² Mo ḡaro moḡa tu Iuda tarimari ḡeri rovinatore ḡarona, ema mo gara kouḡana maki kavinaḡi, be Iesu ḡeḡabiato, monai ḡea tore-toḡaiato.

20

Gara kouḡana tu korina

Luka 24:1-12

¹ Sabadi ḡarona murinai, Sandei boḡiboḡi iamoiamo, roḡo mukunamukunai, Maria, Magadala vavinena, gara ḡana eiaḡoto. Benamo eboḡeto, gara ḡatama bokana ḡetabe-ḡauato forena tu ḡeḡabi-veḡitaiato, be irau ai vetore eḡitaiato.

² Benamo eraga-ḡenoḡoi-iaḡomato, Simona Petero e Iesu ḡena mero ta, Iesu na eura-viniato-ḡoi merona, ḡeri ai, benamo ekirarito, ekirato, “Vereḡauka tu gara na beḡe ḡabi-rakaia, ma ḡita asi ribara ainai beḡe torea.”

³ Benamo Petero ema Iesu ḡena mo mero ta moḡa ḡeraka-rosito, benamo gara ḡana ḡeiaḡoto.

⁴ Ma tauri ruarua ḡeraga-vegogo-iaḡoto, senaḡi Iesu ḡena mo mero ta na Petero eraga-kwaneato, ma gara forenai ea raḡasi-guineto.

⁵ Etoḡa-tarito, benamo eboḡe-toḡato, Iesu ḡekumuato mo dabuḡa kurokurona eḡitaiato monai toretari. Ḡia tu eboḡe-toḡato moḡo, asi eraka-toḡato.

⁶ Benamo Simona Petero eraḡasito, benamo eraka-toḡato gara kouḡana nuḡanai, ma Iesu ḡekumuato dabuḡa kurokurona eḡitaiato monai toretari,

⁷ ema Iesu debana mabarana ḡebaru-ḡauato mukona eḡitaiato, Iesu tauḡanina ḡekumu-ḡauato mo dabuḡa kurokurona ḡesi tu asi tore-sebona. Senaḡi mo muko tu ḡereḡana iokuioku, be irau ai.

⁸ Benamo Iesu ḡena mo mero ema raḡasi-guineto, moḡa maki eraka-toḡato. Moḡeri dagara eḡitarito, benamo evaḡa-moḡoniato.

⁹ Korana ḡia na Buka Veaḡai evetoreto guruḡana tu roḡosi roḡo beḡene riba-korikoria, guruḡana tu maiḡa: Iesu tu mase na ma bevariḡisi-ḡenoḡoini.

¹⁰ Benamo Iesu ḡena mero ruarua ma ḡeḡenoḡoito ḡeri numa ḡana.

Iesu tu Maria, Magadala vavinena, ḡenai efoforito

¹¹ Senaḡi Maria tu gara kouḡana murikanai eruḡato vau etaḡito-ḡoi. Ma etaḡito-ḡoi nuḡanai etoḡa-tarito, benamo eboḡe-toḡato fore kouḡana nuḡana ḡana.

¹² Benamo aneru ruarua eḡitarito, dabuḡa kurokuro ḡetogito, Iesu ḡevaḡa-genaiato gabunai tanutaḡo. Ta tu debakanai etanuto, ma ta tu gabikanai etanuto.

¹³ Benamo mo aneru ruarua na ġekiraiato, ġekirato, “Vavine, ġoi tu karase nai otaġini?” Maria na evaġa-veserito, ekirato, “Korana au ġegu Vereġauka tu beġe ġabi-rakaia, ma au asi ribagu ainai ma beġea torea.”

¹⁴ Maiġesi eguruġa-ġosito murinai, eboġe-ġeġeraġito tu, Iesu monai ruġataġo eġitaiato. Senaġi Maria tu asi eriba-maoroto, mo tu Iesu eruġa-taġoto-ġoi.

¹⁵ Iesu na ekiraiato, ekirato, “Vavine, ġoi tu kara dainai otaġini?” Ġoi tu deikara ovetauani?” Maria etuġamaġito, Iesu tu mo vamokai eġaukarani tarimana, be ekiraiato, ekirato, “Verebara, bema ġoi na boġabi-rakaia nai tu, ainai botorea gabuna nokira-varagu, be naġabia.”

¹⁶ Iesu na ekiraiato, ekirato, “Maria!” Maria eruġa-kureto, benamo ekiraiato Heberu garo ai, ekirato, “Raboni!” Mai guruġa tauna tu, “Vevaġa-riba Tauna.”

¹⁷ Iesu na ekiraiato, ekirato, “Au asi noġabi-tarigu, korana au tu Tamagu ġenai roġosi roġo bara varaġe. Senaġi noiġo au tarikakagu ġeri ai, benamo bono kirari, ‘Au tu au Tamagu e ġomi Tamami, ema au ġegu Barau e ġomi ġemi Barau ġenai avaraġeni.’”

¹⁸ Maria, Magadala vavinena, Iesu ġena mero ġeri ai eiaġoto, benamo ekirarito, ekirato, “Au na Vereġauka tu baġitaia.” Benamo Vereġauka na evaġa-guruġaiato guruġari mabarari maki ma ekira-vararito.

Iesu ġena mero ġeri ai efoforito

Mataio 28:16-20; Mareko 16:14-18; Luka 24:36-49

¹⁹ Mo Sandei boġi ai, mo tu ġaro giniguinena fura ta nuġanai, Iesu ġena mero tu numa tai ġevegogoto. Ġia tu Iuda tarimari gariri ai, be ġeri numa ġatama bokana tu ġebiri-ġauato. Ma Iesu eiaġomato, ġia fakari ai eruġa-tarito, benamo ekirato, “Asi ġogari, nuġami ai maino netanu.”

²⁰ Moġesi eguruġa-ġosito murinai, ġimana ġeikorito e sebina ġegwanuato moġeri evaġa-ġitarito. Vereġauka ġeġitaiato nai, ġeikurakavato.

²¹ Benamo Iesu na ġia ma ekirato, “Asi ġogari, nuġami ai maino netanu! Tamagu na au etuġuguto kavana, au na maki ġomi atuġumini.”

²² Moġesina evaġa-guruġa ġosirito murinai, iaġana efururu-iaġoato ġeri ai, benamo ekirarito, ekirato, “Iauka Veaġa ġoġabia.

²³ Ġomi na ġena rakava boġo tuġamaġi-fitoġaiani tarimana, ġena rakava tu Barau na maki betuġamaġi-fitoġaiani. A ġena rakava asi boġo tuġamaġi-fitoġaiani tarimana tu, ġena rakava Barau na maki asi betuġamaġi-fitoġaiani.”

Iesu Tomasi ġenai efoforito

²⁴ Senaġi Tomasi tu Iesu ġena mero ġeri ai eiaġoto ġaronai ġia tu asiġina. Tomasi arana ta tu Didimo o Kafa, ema ġia maki Iesu ġena mero ta mo mero gabanana ruarua (12) nuġanai.

²⁵ Moġesina nai Iesu ġena mero na ġekira-varaiato, ġekirato, “Vereġauka tu ġai na baġa ġitaia.” A Tomasi tu ekirato, “Au tu ġimana ġeikorito gaburi baġitarini, ema didigu ikoko ġeraka-toġato gaburi na baduġi-toġaiani, e sebina ġegwanuato, monana didigu baduġi-toġaiani vau, bavaġa-moġoniani.”

²⁶ Ġaro imaima toitoi (8) ġekorito murinai, Iesu ġena mero tu numa nuġanai maia, ma mo ġaro ai tu Tomasi maki ġia ġesi. Mo numa ġatama bokana tu biribiri, senaġi Iesu tu eiaġomato, fakari ai eruġa-tarito, benamo ekirato, “Asi ġogari, nuġami ai maino netanu.”

²⁷ Benamo Tomasi ekiraiato ekirato, “Tomasi, ġimagu noġitari, didimu mai ikoko gaburi ai noma duġi-toġaia. E ġimamu notuġu-iaġomaia, be didimu au sebigu ġegwanuato mainai noma duġi-toġaia. Ġemu daradara novaġa-dokoa, ma novaġa-moġonigu.”

²⁸ Benamo Tomasi na Iesu evaġa-veſeato, ekirato, “Au ġegu Vereġauka ema ġegu Barau.”

²⁹ Iesu na ekiraiato, ekirato, “Tomasi, ġoi tu ovaġa-moġoniguni, korana boġitagu nai. A asi ġeġitaguni, senaġi ġevaġa-moġoniguni tarimari tu beġene iaku.”

Mai buka Ioane na etoreato anina tu kara

³⁰ Iesu na vetoġa boruri ġutuma ġena mero ġoirari ai eveirito. Senaġi moġeri mai bukai tu asi atorerito.

³¹ A maiġeri atorerito korana tu, ġomi na Iesu boġono vaġa-moġonia, ġia tu moġoni Keriso, Barau Natuna. Ma bema ġomi na ġia boġo vaġa-moġoniani nai, ġia aranai maġuri vanaġivanaġi boġo ġabiani.

Iesu mero imaima ruarua (7) ġeri ai eforito

21

¹ Moġa murinai Tiberia kouna rikinai Iesu ġena mero ġeri ai ma eforito. Monai tu maiġesi eforito:

² Simona Petero; Tomasi, arana ta tu Didimo o Kafa; Natanaela, Kana vanuġa tarimana, Kana tu Galilea tanonai; Sebedaio natuna ruarua; ema Iesu ġena mero ruarua; mabarari monai ġetanu-vegogoto-ġoi.

³ Benamo Simona Petero na ekirarito, ekirato, “Au tu kou ġana maina aiaġoni.” Ma mo kotari ġekirato, “Ġai maki ġoi ġesi taiġoni.” Benamo tauri imaima ruarua (7) ġeraka-rosito, ġeiaġoto, ġasi ai ġea raġekauto, benamo ġea mainato. Senaġi mo boġi barabara nuġanai tu maġani-kone ta maki asi ġeġoitaġoato.

⁴ Boġiboġi iamoiamo Iesu tu kou rikinai eruġa-taġoto-ġoi; senaġi ġena mero tu asi ġeriba-maoroto, mo tu Iesu eruġa-taġoto-ġoi.

⁵ Benamo Iesu na ekirarito ekirato, “Natugu, ġomi ġemi ai maġani-kone tari maniġeri, ba?” Ġia na ġevaġa-veſeato, ġekirato, “Asiġina.”

⁶ Benamo Iesu na ekirarito, ekirato, “Reke ġasi aroribana rekena na ġofiu-riġoa, maninai tu maġani-kone tari boġo ġoitaġoni.” Reke ġefiu-riġoato, benamo ma ġeinu-raġea ġetato nai tu ġeinu-kavaiato meto fanifani, korana tu maġani-kone vovoka tabutabu ġevaġa-toġarito bene.

⁷ Iesu ġena mero ta tu Iesu na eura-viniato-ġoi merona. Mai mero na Petero ekiraiato, ekirato, “Vereġauka tu iomoġa.” Simona Petero na mo guruġa eseġaġiato, “Vereġauka tu iomoġa” nai, asikauna ġena dabuġa eraga-veiato, benamo kou ai ebaba-reito. Mo dabuġa tu, eġauveito-ġoi be ekokiato.

⁸ Senaġi Iesu ġena mero kota tu mo bouti na vau ġeleva-iaġoto. Mo reke ma maġani-konena maki ġeinukau-iaġo sebonaiato. Korana ġia na mo reke ġefiu-riġoato gabuna ema fenu fakari tu asi manaġa, mita sinau sebona (100) kavana moġo.

⁹ Fenu ai ġea darokauto nai, ġeboġeto tu karava vaġa-ġara ġeġitaiato, e maġani-kone karava torekau ġeġitarito, ema beredi tari maki monai toretaġo.

¹⁰ Ma Iesu na ekirarito, ekirato, “Ġomi na reke ai boġo vaġa-toġari maġani-koneri tari ġoġabi-iaġomari.”

¹¹ Simona Petero ġasi ai eraġekauto, benamo reke fenu ai einu-raġeato. Mo reke tu maġani-kone baregori na evonuto, mo maġani-kone baregori

tu mabarari sinau sebona gabana imaima ma toitoi (153), ġutuma lelevaġi, senaġi reke tu asi evedareto.

¹² Iesu na ekirarito, ekirato, “Ġoiaġoma, ġoma ġaniġani.” Iesu ġena mo mero moġeri ta na Iesu tu iniġesi asi ma ġedanaġiato, “Ġoi tu dei, ei?” Korana ġia ribari, mo tu Vereġauka.

¹³ Iesu eiaġomato, beredi eġabiato, benamo evinirito, ma maġani-kone maki moġesi eveirito.

¹⁴ Mai tu nega vaġa-toitoina ġena mero ġeri ai efoforito, Barau na mase na evaga-variġisi ġenoġoiato murinai.

Iesu na Petero elaunaġiato

¹⁵ Ġeġaniġani-ġosito murinai, Iesu na Petero ekiraiato, ekirato, “Simona, Ioane natuna, ġoi na au oura-viniguni veuravinina na maġeri ġeri veuravini au ġegu ai ġetoreani maki evanaġiani, ei?” Petero ekirato, “Oi Vereġauka, ġoi ma ribamu, au na ġoi tu aura-vinimuni.” Iesu na ekiraiato, ekirato, “Au ġegu mamoe naturi bono ġuburi.”

¹⁶ Iesu na ma edanaġi-ġenoġoiato, ekirato, “Simona, Ioane natuna, au oura-viniguni, ei?” Petero evaġa-veseto, ekirato, “Oi Vereġauka, ġoi ma ribamu, au na ġoi tu aura-vinimuni.” Iesu ekirato, “Au ġegu mamoe bono nari-ginikauri.”

¹⁷ Iesu na Petero vaġa-toitoina ma edanaġiato, ekirato, “Simona, Ioane natuna, ġoi na au oura-viniguni, ei?” Petero enuġa-metoto, korana Iesu na mo tu vaġa-toitoina edanaġiato, “Ġoi au tu oura-viniguni, ei?” Petero ekirato, “Vereġauka, ġoi tu dagara mabarari ma ribamu, e ġoi ma ribamu, au na ġoi tu aura-vinimuni.” Iesu ekirato, “Au ġegu mamoe bono ġuburi.

¹⁸ Akira-korikorimuni, ġoi variġumu ai tu, tauġemu na gabakamu gabaġau na obaruato-ġoi, benamo oura-vinirito-ġoi gaburi ġana oiaġoto-ġoi. Senaġi ġoi boġaukani nai tu, ġimamu botuġu-roroġotoani, benamo tarima ta na ġimamu bebaruani, benamo beġori-kaumuni, ma asi oura-viniani gabuna ġana beġori-iaġomuni.”

¹⁹ Iesu na mai guruġa ekiraġiato tu, Petero bemaseni dabarana ema ġena mase na kamasi Barau bevaġa-raġe baregoani, etore-rosiato. Benamo Petero ekiraiato, ekirato, “Au murigu ai noma raka.”

Iesu ma ġena mero ta

²⁰ Petero eruġa-kureto tu, Iesu na eura-viniato-ġoi merona eġitaiato, muriri na eraka-iaġoto-ġoi. Mai mero tu, mo Iesu ġeġaniġani-vegogoto lav-ilavinai Iesu ġenai evetabekauto, benamo edanaġiato, ekirato, “Vereġauka, ġoi berevamuni tarimana tu dei, ei?”

²¹ Petero na mo mero (o Ioane) eġitaiato, benamo Iesu ekiraiato, ekirato, “Senaġi Vereġauka, ġia maġurina tu aiġesi ei?”

²² Iesu na evaġa-veseato, ekirato, “Bema au baurani, ġia tu maġuri bene tanu mo, au ma baġenoġoini, ġoi tu asi ġemu ġauvei ta maniġa ovedanaġi-iaġiani. Ġoi tu au murigu ai noma raka.”

²³ Mai guruġa dainai, tarikaka veġabidadama nuġanai fakari guruġa leileiri ġekiraġirito-ġoi, ġekirato, “Iesu ġena mai mero maġa tu asi bemaseni.” Senaġi Iesu tu asi ekirato, mo mero tu asi bemaseni. Iesu maġesi moġo ekirato, “Bema au baurani, ġia tu maġuri bene tanu mo, au ma baġenoġoini, ġoi tu asi ġemu ġauvei ta maniġa ovedanaġi-iaġiani.”

²⁴ Mo Iesu ġena mero dagarana tu maġa, maġeri guruġa evari-fiurini ema etorerini maġa. Ġita ribara, ġia ġena vevarifu guruġari tu moġoni.

²⁵ Iesu na dagara tu vovoka eveirito. Bere mabarari ġere toreri nai tu, au atuġamaġini, mai tanobara gabuna mabarana tu bere kei, asi veġata bere ilaila, moġeri buka mabarari ġetore-vegogori ġana uranai tu-na.

APOSTOLO ĜERI VEIĜA E ĜAUVEI

Apostolo ĝeri ĝauvei e veiĝa vaĝa-foforiri guruĝari

Mai apostolo ĝeri ĝauvei e veiĝa bukana anina baregona tu Iauka Veaĝa Barau ĝenana emariĝoto ema apostolo ĝerina ema ĝauveito variri.

Mai buka maki Luka na Teofilo ĝena ma etoreato. Etoreato laĝanina tu laĝani 63 beiaĝo 68 fakari ai ta kavana, mo tu Iesu emaseto murinai.

Guruĝa baregori Luka na Teofilo mai fefai evaĝa-ribaiato tu maiĝeri: 1) Kamasi ekalesia doĝorori ĝevesinato; 2) ma kamasi tanobara mabarana ekalesia doĝorori na evaiato; 3) kamasi Keriso guba na Iauka Veaĝa ĝenana mai tanobarai ĝena ekalesia doĝorona eragaiani; 4) ekalesia mabarari Iauka Veaĝa na bene vaĝa-vonuri, korana ĝia ĝenana vauro ĝia ĝeri vetuĝunaĝi ĝauveina bevaĝa-tubuani e bevaĝa-taunaiani, ema bevaĝa-kokoreani ema bevaĝa-seĝukaiani (Apostolo 1:8; Sekaraia 4:6).

Luka ĝena toretore tu maiĝesina eboioĝaiato:

1. Petero ĝena ĝauvei Iuda tarimari fakari ai - karoa 1-12
2. Paulo ĝena ĝauvei irau bese tarimari fakari ai - karoa 13-28

¹ Teofilo, ĝoi atore-vinimuni. Ĝegu toretore giniguinena nuĝanai, Iesu ĝena ĝauvei e ĝena vevaĝa-riba guruĝari mabarari atore-foforirito, ĝena ĝauvei esinaiato veĝata,

² eiaĝoto mo, Barau na guba ĝana eĝabi-varaĝeato. Roĝosi roĝo bere ĝabi-varaĝea nuĝanai, Iauka Veaĝa ĝenana eĝabi-viriĝirito apostolori evaĝa-ribarito.

³ Ĝena midigumidigu e mase murinai ĝia mai apostolo ĝeri ai efoforito ema vetoĝa moĝoniri vovokari ai ĝia tauĝena evevaĝa-moĝonito ĝia tu maĝuri etanuni. Ĝia tu ĝaro gabana vasivasi (40) nuĝanai apostolo ĝeri ai dabara vovokai efoforito-ĝoi, ĝeĝitaiato-ĝoi, ema Barau ĝena Basileia, (ĝena veĝitaĝau seĝukana evaĝa-ruĝaiani maiĝa), varina ĝeri ekiraĝiato-ĝoi.

⁴ Ma Iesu ĝesi ĝeraka-vegogoto nai, Iesu na ekirarito, ekirato, “Ierusalemasi boĝono iaĝuia, senaĝi au na akira-varamito varevarena roĝo boĝono vaĝa-nogaia, mo tu au Tamagu na ekiraĝi-toreato varevarena.

⁵ Korana Ioane tu moĝoni nanu na ebatisoto-ĝoi, senaĝina ĝomi tu ĝaro viravira beĝe korini murinai tu, Iauka Veaĝa na bebatisomini.”

Barau na Iesu guba ĝana eĝabi-varaĝeato

⁶ Apostolo Iesu ĝesi ĝevegogoto nai, Iesu ĝedanaĝiato, ĝekirato, “Vereĝauka, ĝoi na toma mai negai Isaraela tarimama, Roma ĝeri veĝitaĝau na bovaĝa-maĝurimani, benamo Isaraela ĝema veĝitaĝau o basileia ma bovini-ĝenoĝoimani ba?”

⁷ Iesu evaĝa-veseto, ekirato, “Mani tu au Tamagu ĝereĝana ĝena seĝukai ĝarori e negari etorerito, ĝomi na tu asi boĝo ribarini.

⁸ Senaĝi ĝomi tu Iauka Veaĝa iatami ai beraka-riĝoni, benamo seĝuka boĝo ĝabiani, ema au kiraĝi-foforigu tarimami ai boĝo iaĝoni, Ierusalemasi ai, Iudea ai e Samaria gaburi mabarari ai, beiaĝoni mo, tanobara gaburi mabarari ai.”

⁹ Eguruĝa-ĝosito murinai, matari ĝutuĝuturi ai Barau na guba ĝana eĝabi-varaĝeato. Ĝeĝita-ĝauato mo, magube na ekou-ĝauato, benamo asi ma ĝeĝitaiato.

¹⁰ Apostolo na Iesu guba ġana evaraġeto-ġoi roġo ġeġita-raġeato-ġoi nuġanai, tau ruarua dabuġa kurokurori na ġevedabuġato, asikauna ġia seviri ai ġema ruġa-tarito.

¹¹ Benamo ġekirato, “Galilea tarimami, karase maninai boġo ruġa vau guba ġoġita-taġoani? Mai Iesu, ġomi ġemina guba ġana beġabi-varaġea tarimana, tu ma beġenoġoi-iaġomani. Ġia tu guba ġana bevaraġe boġo ġitaia kavana, guba na ma bemariġoni.”

Apostolo tu Ierusalemata ai ġevegogoto

¹² Benamo apostolo Olive Ġorona na Ierusalemata ġana ma ġeġenoġoi-iaġoto. Mo gabu ruarua fakari tu kilomita sebona kavana.

¹³ Ierusalemata ġeraġasito, benamo ġetanuto-ġoi numana tuġuna daiġutuna ġana ġeraġekauto. Mo daiġutu ai apostolo ġevegogoto, arari tu Petero; Ioane; Iakobo (o Iames) e Anduru; Filipino e Tomasi; Batolomeo; Mataio; Iakobo Alfeo; Simona, Selote tauna; ema Iudas, Iakobo natuna.

¹⁴ Ġia mabarari ma nuġari sebona ġesi ġeġuriġuri-vegogoto-ġoi, vavine tari maki e Maria, Iesu sinana, ema Iesu tarina doġoro.

Iudas gabuna eġabiato tauna

¹⁵ Moġeri ġaro ai Iesu ġevaġa-moġoniato-ġoi tarimari mabarari tu sinau sebona ma gabana ruarua (120) ġevegogoto-ġoi. Ġia fakari na Petero eruġa-vaisto, benamo ekirato.

¹⁶ “Tarikakagu mabarami, toretore veaġana tu bema moġoni, mo tu Iauka Veaġa Davida muruna na kai-veġata ekirato, Iudas na Iesu ġabitarina tarimari beġori-kaurini guruġana.

¹⁷ Iudas tu ġai karoma ta, ema ġia maki apostolo ġauveina tarimana, ġai kavana.”

¹⁸ Ġena vei-rakava voina monina na tano ta evoiato. Monai ġia eketoto, benamo emaseto, ma nuġana eġwa-fakaiato, benamo sinagena ebebuburosito.

¹⁹ Ierusalemata tarimari mabarari na varina ġeseġaġiato, benamo mo tano arana ġeri garo ai ġekiraġiato “Akeledama” anina tu “Rara Tanona.”

²⁰ Korana Salamo bukanai varau ġetoreato, ekirani,
 ‘Ġena numa bene karovo,
 tarima ta asi bene tanu.’
 Ma guruġa ta Salamo nuġanai ekirani,
 ‘Ġena veġitataġo ġauveina maki
 ta na bene ġabia.’

²¹ Moġa lorinai namona tu tau ta siġabi-viriġia. Mo tau tu ġita ġesi vanaġivanaġi tarakao-vegogoto-ġoi, Iesu Vereġauka ġita fakarai tarakatoġato-ġoi e taraka-rosito-ġoi nai,

²² ema Ioane na tarima ebatatorito negana na, beiaġoma mo, Iesu ġai ġemana guba ġana eġabi-varaġeato ġarona tarimana ta. Korana tu ġia maki ġai ġesi Iesu ġena variġisi-ġenoġoi bene kiraġi-foforia.

²³ Moġa lorinai ġia na tau ruarua ġeġabirito, Iosefa, arana tu Barasaba ġetato-ġoi, arana ta maki Iusto; ema Matias.

²⁴ Benamo ġeġauġauto, ġekirato, “Vereġauka o, tarimarima mabarari nuġari ġoi na tu oribarini, moġa lorinai novaġa-ġitama, dei tu ġoi na boġabihidia,

²⁵ apostolo ġauveina bene veia Iudas gabunai; a Iudas tu eiaġoto ġena gabu korikorina ġana.”

²⁶ Benamo fore ġerena ġeveiato nuġanai, fore tu Matias aranai eketoto, benamo Matias apostolo gabanana sebona (11) ġesi ġeiavi-sebonaiato.

2

Iauka Veāga eraka-riḡoto

¹ Pentekoste ḡaronai, Iesu ḡevaḡa-moḡoniato-ḡoi tarimari mabarari gabu sebonai ḡevegogoto. Pentekoste anina tu gabana imaima (50), mo tu Pasova verekona ḡarona na beiaḡoma mo, mai ḡaro maiḡa.

² Benamo asikauna iavara baregona ta guruna noḡa guba na emariḡoto, ḡetanu-vegogoto numana nuḡana mabarana evaḡa-vonuato.

³ Benamo noḡa moḡo karava meari kavana ḡemariḡoto-ḡoi ḡeḡitarito. Mo karava meari ḡemariḡoto, benamo ḡia tata tubuari ai ḡemoreto.

⁴ Benamo ḡia mabarari Iauka Veāga na evaḡa-vonurito, benamo garo irauirauri ai ḡeguruḡato, Iauka Veāga na evinirito ilailanai.

⁵ Moḡa ḡaronai tu Iuda tarimari, Barau garina ḡeveito-ḡoi tarimari, tu tanobara gaburi mabarari na ḡeiaḡomato, benamo Ierusalemāi ḡetanuto-ḡoi.

⁶ Mo guru ḡeseḡaḡiato nai, tarimarima ḡutuma ḡeḡaru-vegogoto. Nuḡari ḡefarevaḡito, korana ḡia tata na Iesu ḡevaḡa-moḡoniato-ḡoi tarimari ḡeseḡaḡirito tu mo ḡeraka-vegogoto tarimari ḡeri garo ai ḡeguruḡato-ḡoi.

⁷ Ḡia ḡeḡaba-rakavato e ḡedaradarato, ḡekirato, “Mai ḡeguruḡani tarimari tu Galilea tarimari, ene?”

⁸ Kamara dabarai tu ḡita tata ḡera garo ai ḡeguruḡani taseḡaḡirini?

⁹ Ḡita tari tu Patia tarimara, tari tu Media tarimara e Elam tarimara. Tari tu Mesopotamia, Iudea e Kapadokia na, ema tari tu Ponto na e Asia na,

¹⁰ Frigia e Pamfilia na, Aigupito e Kurene sevina Libia tanori na, ema tari tu Roma na taiaḡomato,

¹¹ Iuda tarimara, e irau bese tarimari Iuda ḡera toma-rakariḡo ḡeḡabi-raḡeato tarimari; ema ḡita tari tu Krete e Arabia tarimara. Senaḡi ḡita mabarara na taseḡaḡirini ḡita tata ḡera garo ai Barau na veḡa baregori boruri eveirito-ḡoi ḡekiraḡi-foforirini.”

¹² Mabarari ma nuḡa-farevaḡiri e ma daradarari ḡesi tauḡeri ḡevedanaḡi-vedanaḡito, ḡekirato, “Mai veḡa anina tu kara?”

¹³ Senaḡina tarima tari na tu ḡevaseva-vaseva-iaḡirito, ḡekirato, “Maiḡeri tarima tu beḡe niu-rakava.”

Petero ḡena vevarifu

¹⁴ Benamo Petero ma apostolo gabanana sebana (11) ḡesi ḡeruḡa-vaisito, ma garona evaḡa-baregoato, benamo vegogo tarimari eḡobata-vinirito, ekirato, “Iuda tarimami e Ierusalemāi ḡotanuni tarimami mabarami, boḡono seḡaḡi-ginikau, mai veḡa tauna ḡemi nakiraḡi-maḡataia.

¹⁵ Maiḡeri tarima tu asi beḡe niu-rakava, ḡomi ḡotuḡamaḡini kavana. Mai tu roḡo boḡiboḡi horaḡauna 9 koloko.

¹⁶ Senaḡi maitoma tu Ioel, peroveta tarimana, na ekiraḡi-guineato kavana efoforini, ekirato,

¹⁷ ‘Barau ekirani:

Ḡaro dokori ai au Iaukagu babubu-riḡoani tarimarima mabarari iatari ai.

Benamo natumi merori e ḡuiatori beḡe perovetani,

ḡemi maraḡa variḡu beḡe mata-vanaḡini,

ema ḡemi tau ḡaukari beḡe nuvini.

¹⁸ Oi, moḡeri ḡaro ai au ḡegu vetuḡunaḡi tauri e vavineri iatari ai au Iaukagu babubu-riḡoani,

benamo beḡe perovetani.

¹⁹ Benamo nuḡa-farevaḡi veḡari guba tuḡunai bavaḡa-foforirini, ema vetoḡa dagarari tanobarai;

rara, e karava, ema goġu barukari.

²⁰ Ġaro ma bevetore-kureni bemukunani,
e ġue tu bekakakakani, rara kavanai beiaġoni,
Vereġauka ġena iaġoma ġarona baregona e irau vedaureana bekavinaġini
nai.

²¹ Benamo deikara Vereġauka aranai ekea-raġeni tarimana tu maġuri
beġabiani.'

²² Isaraela tarimami, mai guruġa boġono seġaġiri: Iesu, Nasareta tari-
mana, Barau na eviniato ġauveina tu ġomi ġemi ai evaġa-fofori ginikauato.
Ġia ġenana Barau ġena seġuka veiġari e nuġa-farevaġi veiġari ema vetoġa
tari eveirito ġomi vefakami ai, be ġomi tu ma ribami.

²³ Barau ġena urai e ribai varau eboioġa-guineato ilailanai, Iesu ġomi
ġimami ai etore-kauato, benamo rakava tarimari na ġevaġa-kavamito,
benamo Iesu satauro ai ġoikoko-kauato nai ġovaġi-maseato.

²⁴ Senaġina Barau na ġia mase na evaġa-variġisi ġenoġoiato, ema mase
midiguna na eġabi-vaġiato, korana mase na ġia tu asi ilaila beġabi-tariani
riba.

²⁵ Davida na ġia ekiraġiato, ekirato,
'Vereġauka tu ġaro mabarari ai ġoiragu ai aġitaiani.

Ġia tu au aroribagu ai,
be dagara ta na asi bevaġa-ġarevaguni.

²⁶ Moġa lorinai nuġagu iaku na bevonu,
ema ġegu guruġa tu iaku na beġe vonu.
Mase garina maki asi aveini,

²⁷ korana au tu mase tarimari ġeri gabu ai asi boraga-kwaneguni,
ema ġemu Tarima Veaġana tu asi beboragani.

²⁸ Maġuri dabarari tu varau ovaġa-ribaguto;
ġoi sevimu ai batanuni,
benamo iaku na bovaġa-vonuguni.'

²⁹ Tarikakagu mabarami, initoma au tu nuġagu ma kokorena ġesi baki-
rani, ġita senera baregona Davida tu emaseto ema ġeguriato, maitoma ġia
gurina tu ġita ġesi maiġea.

³⁰ Senaġi ġia tu peroveta tarimana, ema ma ribana Barau na tu varau
ekiraġi-toreato, ekirato: Davida besena ta tu ġia ġena teronai betanukauni
veġata.

³¹ Davida na eriba-guineato, Barau na kara ġoirai beveiani eġitaiato.
Benamo Keriso ġena variġisi-ġenoġoi guruġana ekiraġiato, ekirato, 'Ġia
tu mase tarimari ġeri gabu ai asi eraga-kwaneato, ema tauġanina asi
beboragani.'

³² Barau na mai Iesu, mase na evaġa-variġisi ġenoġoiato, ġai mabarama
ribama.

³³ Barau na eġabi-vaishiato, ġimana aroribanai etoreato, benamo Barau na
ekiraġi-toreato, Iauka Veaġa na Tamana ġenana eġabiato. Benamo ġia na
mo Iauka Veaġa toma bebubu-riġoa, ġomi na ġoġitaiani ema ġoseġaġiani.

³⁴ Korana Davida guba ġana tu asi evaraġeto, senaġi ekirato,
'Barau na au ġegu Vereġauka ekiraiato, ekirato:

Au aroribagu ai noma-tanu,

³⁵ bene iaġo mo, ġevetari-vinimuni tarimari bana tore-riġori,
kwakumu vaġa-ruġa tarina dagananai bana vaġa-iaġori.'

³⁶ Moġa lorinai Isaraela tarimari mabarari tu beġene riba-ginikau, mai Iesu, ġomi na ġovaġa-satauroato tu, Barau na Vereġauka e Keriso ai evaġa-iaġoato.”

Tarimarima ġutuma ġevetuġamaġi-kureto ma ġeraka-kureto

³⁷ Mai guruġa ġeseġaġiato nai, nuġari ġeraġeto, benamo Petero e mo apostolo tari ġedanaġirito, ġekirato, “Tarikaka, ġai tu kamasi toma ġaveini?”

³⁸ Petero na ekirarito, ekirato, “Ġomi tata ġemi rakava ġerina boġono vetuġamaġi-kure ma boġono raka-kure, ema Iesu Keriso aranai babatiso boġono ġabia, be ġemi rakava bene tuġamaġi-fitoġari; ema ġena varevare, Iauka Veaġa, boġono ġabia.

³⁹ Korana Barau ġena kiraġitore eveiato tu ġomi ġemi e ġomi natumi ġeri, ema manaġai ġetanuni tarimari ġeri. Aba, Vereġauka ġera Barau na ekiraġi-toreato Iauka Veaġana tu bekearini tarimari mabarari bevinirini.”

⁴⁰ Petero na guruġa ġutuma ekiraġirito, esisiba-vinirito e elau-naġirito, ekirato, “Mai bese tarimari rakavari ġerina tauġemi boġono raga-maġuri.”

⁴¹ Tarima ġutuma na ġena guruġa ġeġabi-raġeato, benamo babatiso ġeġabiato. Mo ġaro sebonai tarimarima mabarana daġara toitoi (3,000) kavana ġia ġeri doġoro nuġanai ġebere-toġato.

⁴² Benamo vanaġivanaġi apostolo tarimari ġerina riba ġeġabito-ġoi, ġevegogoto-ġoi e ġevevaġa-kavato-ġoi, beredi ġetavi-kirato-ġoi o anibou ġeġanito-ġoi e ġeġauġau-vegogoto-ġoi.

Iesu ġevaġa-moġoniato-ġoi tarimari ġeri maġuri

⁴³ Apostolo ġerina Barau na nuġa-farevaġi veġari e vetoġa boruri ġutuma eveirito-ġoi, ema tarimarima mabarari ġegari-rakavato.

⁴⁴ Iesu ġevaġa-moġoniato tarimari mabarari ġetanu-vegogoto-ġoi ema ġeri-ġari ġevevarevare-vevinito-ġoi.

⁴⁵ Ġeri farefare e tano ġevoivoi-iaġirito-ġoi, benamo moniri tu ġia mabarari vefakari ai ġevarerito-ġoi, tata ġena rabu ilailanai.

⁴⁶ Ġaro vanaġivanaġi mabarari Rubu Veaġai ġevegogoto-ġoi. Ġeri numai anibou ġeġanito-ġoi e ġeġaniġani-vegogoto-ġoi ma iakuri e ma mainori ġesi.

⁴⁷ Barau ġevaġa-raġeato-ġoi, ema tarimarima mabarari ġeri veiau-namo ġeverere-iaġiato-ġoi. Benamo ġaro mabarari ai Vereġauka na evaġa-maġuririto-ġoi tarimari ġia ġesi etore-vegogorito-ġoi.

3

Kwaku rakava tarimana enamoto

¹ Ġaro ta lavilavi horaġauna 3 koloko ai ġauġau horanai, Petero e Ioane Rubu Veaġa ġana ġeiaġoto.

² Monai tarima ta tu emaġurito kwakuna rakava ġeġoitaġoato. Ġaro mabarari ai ġeġwa-iaġoato-ġoi, Rubu Veaġa ġatama bokana arana “Namo Vedaurea” koranai ġevaġa-tanutariato-ġoi, benamo Rubu Veaġai ġeraka-toġato-ġoi tarimari ġeri ai moni enoġito-ġoi.

³ Ġia na Petero e Ioane ġeraka-toġa ġana nuġanai eġitarito, benamo kara ta ġevinia uranai enoġirito.

⁴ Tauri ruarua na ġeġita-karakaraiato, benamo Petero na ekiraiato, ekirato, “Ġai noġitama!”

⁵ Mo guruġa eseġaġiato lorinai, tauri ruarua eġitarito, ġia matoru ekirato tu, kara ta beġe viniani.

⁶ Senaĝi Petero na ekiraiato, ekirato, “Au tu asi ĝegu moni, senaĝina ĝegu ai kara etanuni dagarana avinimuni. Iesu Keriso, Nasareta tauna, aranai akiramuni, novariĝisi, noraka!”

⁷ Benamo Petero na kwaku rakava tarimana ĝimana aroribanai eĝabito, evaĝa-ruĝa-vaisiato. Asikauna ĝia kwakuna ema kwakuna komukomuri ĝetubutubu-kauto.

⁸ Ĝia eburi-vaisito, eruĝa-tarito, eraka-iaĝoto. Benamo Petero ema Ioane ĝesi Rubu Veaĝanai ĝeraka-toĝato, erakato e eburi-vaisito, Barau evaĝa-raĝeato.

⁹ Tarimarima mabarari na ĝeĝitaiato, erakato e Barau evaĝa-raĝeato-ĝoi,

¹⁰ ema ĝeĝita-leaiato, ĝia tu “Namo Vedaurea” ĝatama-boka koranai etanuto-ĝoi vau enoĝinoĝito-ĝoi tarimana nai, ĝia mabarari nuĝari ĝefarevaĝito e ĝeĝaba-rakavato, mo veiĝa ĝia ĝenai eĝorato nai.

Petero ĝena ĝobata Rubu Veaĝai

¹¹ Mo tau roĝo Petero e Ioane ĝeri ai eveĝabikau-taĝoto-ĝoi, touraĝe baregona arana “Solomona Ĝena Touraĝe” ai, tarimarima mabarari ĝeĝaba-rakavato, benamo ĝeraga-iaĝoto ĝeri ai.

¹² Petero na mo tarimarima eĝitarito, benamo evaĝa-guruĝarito, ekirato, “Isaraela tarimami, karase nai mai dagara tu ĝoĝaba-iaĝiani? Karase nai ĝai ĝoĝita-karakaramani? Ĝomi ĝotuĝamaĝini mai tu tauĝema ĝema seĝukai e Barau korana-iaĝinai naima, mai tarima baĝa vaĝa-rakaia ĝotoni?”

¹³ Aberahamo, Isako, Iakobo ĝeri Barau, ĝita senera mabarari ĝeri Barau, na ĝena vetuĝunaĝi tarimana Iesu evaĝa-raĝeato, senaĝi ĝomi na Roma tarimari ĝoviniato beĝene vaĝia ĝana, ma Pilato ĝena ura bene tuĝu-vaĝia asi beĝene vaĝia etato nai, ĝomi tu asi ĝourato.

¹⁴ Ĝia tu Veaĝa e Vei-Iobukaiobuka tarimana, senaĝi ĝomi na tu asi ĝouraviniato, ema Pilato ĝonoĝiato, vaĝivaĝi tarimana tu bene tuĝu-rosia ĝotato.

¹⁵ Maĝuri eĝwa-iaĝomaiato tarimana tu ĝomi na ĝovaĝi-maseato. Senaĝi Barau na mase na ma evaĝa-variĝisi ĝenoĝoiato. Ĝai maiĝa tu ribama e ĝakiraĝi-foforiani.

¹⁶ Ĝai ĝema veĝabidadama Iesu aranai nai, mai tarima ĝomi na ĝoĝitaiani e ribami bevaĝa-namo. Mai tu Iesu aranai ema veĝabi-dadama ĝia ĝenana eiāĝomani na, mai tarima bevaĝa-namo korikoria, ĝomi mabarami na ĝoĝitaiani maiĝa.

¹⁷ Tarikakagu mabarami, au toma aribani, kara ĝemi veĝorikau tarimari ĝesi ĝoveiato tu asi ribami dainai.

¹⁸ Senaĝina Barau na guinenai ĝena peroveta tarimari mabarari mururi na ekirato, ĝia ĝena Keriso tu midigu roĝo beĝanini etato. Mo guruĝa tu ĝomi ĝemina ema moĝonito.

¹⁹ Moĝa lorinai ĝovetuĝamaĝi-kure ma ĝoraka-kure Barau ĝenai, be ĝia na ĝemi rakava bene ĝabi-vaĝiri.

²⁰ Bema moĝesi boĝo veini nai, Iauka ĝena kokore Vereĝauka ĝenana beiaĝomani, ema ĝia na Iesu Keriso betuĝu-iaĝomaiani. Ĝia tu Barau na ĝomi ĝemi eĝabitore-guineato.

²¹ Ĝia tu gubai roĝo betanuni, beiaĝoni mo, Barau na dagara mabarari bevaĝa-variĝu ĝenoĝoirini. Ĝia na ĝena peroveta tarimari veaĝari mururi na kai-veĝata ekiraĝiato ilailanai.

²² Korana Mose ekirato, Vereĝauka ĝemi Barau na ĝomi ĝemi tarimarima fakari na ĝemi peroveta tarimana ta bevaĝa-ruĝaiani au kavana. Ĝia na bevaĝa-guruĝamini guruĝari mabarari tu boĝono seĝaĝiri.

²³ Tarima ta na ġia ġena guruġa asi beseġaġi-viniani tarimana tu, Barau na ġena tarimarima fakari na beġabi-vaġiani, benamo bevaġi-maseani.'

²⁴ Moġoni, peroveta tarimari mabarari Samuela na beiaġoma mo toma, ema ġia murina na ġeiaġomato peroveta tarimari maki ġutuma varau ġeguruġato, maġeri ġaro ġekiraġirito.

²⁵ Ġomi tu peroveta tarimari naturi, ema Barau ġena kiraġitore ġomi senemi ġeri eveiato maki ġomi ġemi. Barau na Aberahamo evaġa-guruġaiato nai, ekirato, 'Ġoi natumu ġenana tanobara beseri mabarari namo beġe ġabiani.'

²⁶ Moġa lorinai Barau na ġena vetuġunaġi tarimana Iesu evaġa-ruġaiato, benamo ġemi ai etuġu-iaġoġi guineato, ġomi bene vaġa-namomi ġana. Mo namo anina tu, ġomi tata ġemi rakava ġerina beġori-kuremini.

4

Petero e Ioane ġeġabi-taririto

¹ Petero e Ioane na tarima-rima roġo ġevaġa-guruġarito-ġoi nuġanai, Rubu Veaġa vereri, e Rubu Veaġa ġitaġauna tarimari ġeri vere, ema Sadukea tarimari ġeraġasito.

² Ġia tu ġebaruto, korana mai apostolo ruarua na tu tarimarima ġevaġa-ribarito-ġoi e ġeri ġeġobatato-ġoi nai tu ġekirato-ġoi, Iesu tu mase na evariġisi-ġenoġoito; moġa lorinai mase tarimari maki beġe variġisi-ġenoġoini.

³ Benamo tauri ruarua ġeġabi-taririto, benamo dibura numai ġebiri-ġaurito; monai beġene gena mo boġiboġi, korana tu ġaro maki ekofuto.

⁴ Senaġi Petero e Ioane ġeri ġobata tarima vovoka na ġeseġaġiato, benamo tarima ġutuma na ġevaġa-moġoniato, benamo tau numerana eiaġoto mabarana tu daġara imaima (5,000) kavana.

⁵ Elaġanito nai tu, Iuda vereri, e vanuġa tarima baregori, ema taravatu ġevevaġa-riba iaġiato-ġoi tarimari Ierusalemaj ġevevogoto.

⁶ Anas, Rubu Veaġa verena baregona, e Kaiafas, e Ioane, e Alesanda, ema Rubu Veaġa verena baregona ġena bese maki monai.

⁷ Benamo tauri ruarua ġeġori-iaġorito, benamo ġoirari ai ġea vaġa-ritoġorito vau ġedanaġirito, ġekirato, "Kamara seġukai o deikara aranai mai veiġa ġoveiato?"

⁸ Benamo Petero, Iauka Veaġa na evonuto, evaġa-veseto, ekirato, "Isaraela veremi e veġitaġau tarimami!

⁹ Bema ġai toma boġo kea-iaġomama tu, ġourani ġai na ġakira-varami, mai kwaku rakava tarimana ġenai veiġa namona baġa veia ema kamara dabarai ġia be-namo nai tu,

¹⁰ ġomi mabarami e Isaraela nuġanai tarimarima mabarami tu boġono riba, Iesu Keriso, Nasareta tarimana, ġomi na ġovaġa-satauroato, ma Barau na mase na evaġa-variġisi ġenoġoito tarimana, aranai mai tarima benamo-ġosiġosi, ġomi ġoirami ai eruġa-taġoni.

¹¹ Mo Iesu tu, 'ġomi, numa raga tarimami, na ġoruġaiato forena, ġia tu duġu barana forenai eiaġoto.'

¹² Vevaġa-maġuri tu ġia ġereġana ġenana bita doġarini; tanobara mabarana nuġanai Barau na ara ta tu asi evinirato, ġita bene vaġa-maġurira ġana."

¹³ Kanisoro tarimari na Petero e Ioane ġeġitarito, asi ġegarito-ġoi ema ġeribarito maki, ġia tu vevaġa-riba gabuna ta ġana asi ġeiaġoto, ma tauri

ruarua asi iaunegari. Moġa ġeġitaiato nai, ġeġabato e nuġari ġevekeoto, benamo ġeribato, ġia tu Iesu ġesi ġerakao-vekakoto-ġoi tarimari.

¹⁴ Ema mo tarima ġeġitaiato namo-ġosiġosi Petero e Ioane ġesi ġeruġa-taġoto-ġoi, benamo asi ġeri guruġa dabarana.

¹⁵ Moġa lorinai ġekirarito, mo vegogo gabuna na ġeraka-veġita. Benamo ġeraka-rosito murika ġana, benamo ġia ġereġari moġo ġevedanaġi-vevinito, ġekirato,

¹⁶ “Maiġeri tarima ruarua tu kamasi toma taveirini? Ierusalemaj ġetanuni tarimari mabarari ma ribari, ġia tu nuġa-farevaġi veġana ta beġe veia, ema ġita na asi bita kira-ġuniġauani riba.

¹⁷ Senaġi tarimarima na beġe vari-fiuani garinai, maiġeri tarima tu tana vaġa-gariri e tana kira-ġoiri, Iesu aranai tarima ta asi ma beġene vaġa-guruġa ġenoġoia.”

¹⁸ Benamo ma ġekea-toġarito, benamo ġekirarito, Iesu aranai asiġina ġinavaġi ma beġene ġobata e beġene vevaġa-riba.

¹⁹ Senaġi Petero e Ioane na ġevaġa-veserito, ġekirato, “Ġomi tauġemi ġotuġamaġi-viriġia, aiġa tu roroġoto Barau ġoiranai? Ġomi na kara ġokiraġiani baġana veia, ba Barau na ekiraġiani veġana baġana veia?

²⁰ Korana ġaġitarito e ġaseġaġirito dagarari tu ġai na asi ilaila baġa kira-ġuniġaurini e muruma maki moġeri kiraġi-kiraġiri ai asi baġa kourini riba.”

²¹ Ma ġevaġa-guruġa gwaġiġirito murinai, ġetuġu-rosirito. Vaġa-rakavari dabarana ta asi ġedoġariato, korana tarima mabarari na Barau ġevaġa-raġeato-ġoi, mo nuġa-farevaġi veġana lorinai.

²² Korana mo nuġa-farevaġi veġana na enamoto tarimana ġena maġuri laġaniri tu gabana vasivasi (40) maki evanaġiato.

Ekalesia ġeġuriġurito

²³ Petero e Ioane ġetuġu-vaġirito murinai, karori ġeri ai ġeġenoġoi-iaġoto. Ma Rubu Veaġa vereri baregori e Iuda vereri na kara ġekiravara-vinirito dagarari mabarari karori ġeri ġekiraġirito.

²⁴ Benamo karori na moġeri guruġa ġeseġaġirito nai, ġia mabarari Barau ġeġuriġuri-vini vegogoato, ġekirato, “Vereġauka o, guba, tanobara, daġaru-bara, ema nuġari ai ġetanuni dagarari mabarari ġoi na oveirito.

²⁵ Iauka Veaġa ġenana, ġai senema Davida, ġoi ġemu vetuġunaġi tarimana, muruna na oguruġato nai ekirato,

‘Kara dainai irau bese tarimari tu ġebaru-rakava rakavani?

Ema karase nai tarimarima na tu asi beġe ġauveini boioġari ġeveirini?

²⁶ Tanobara vereri ġeverovinato,

ema veġitaġau tarimari baregori ġeġaru-vegogoto,

Vereġauka ma ġena Keriso ġesi

beġene vetari-viniri ġana.’

²⁷ Moġoni veġata, Heroda e Pontio Pilato, irau bese tarimari e Isaraela tarimari ġesi mai vanuġa baregonai ġevevogoto, ġoi ġemu vetuġunaġi tarimana veaġana Iesu, ġia tu ġoi na oviriġiato e Keriso ai ovaġa-iaġoato, ġana boioġa ġetogato.

²⁸ Ġia na ġeveirito dagarari tu kara ġoi na ġemu seġukai e urai oboioġa-guinerito beġene vetore otato dagarari moġo.

²⁹ Moġa lorinai, Vereġauka o, ġeri vevaġa-gari veġari noġitari, ema ġai ġoi ġemu vetuġunaġi tarimama kokore novinima, be ġemu vari baġana kiraġia ma kokorema ġesi.

³⁰ Ĝimamu notuĝu-rosia, be keve tarimari bono vaĝa-namori, ema vetoĝa boruri e nuĝa-farevaĝi veiĝari bono veiri, Iesu, ĝoi ĝemu vetuĝunaĝi tari-mana veaĝana aranai.”

³¹ Ĝeĝauĝau-ĝosito murinai, ĝevegogoto numana eĝareva-ĝarevato. Benamo ĝia mabarari Iauka Veaĝa na ĝevonuto, benamo Barau ĝena vari ĝekiraĝiato ma kokoreri ĝesi.

Ekalesia guinena ĝena maĝuri

³² Iesu ĝevaĝa-moĝoniato-ĝoi tarimari mabarari ĝeri tuĝamaĝi e nuĝari tu sebonai moĝo. Ta ĝena farefare ĝia ĝereĝana ĝena asi etato-ĝoi, senaĝi ĝeri dagara mabarari ĝia tata ĝevevarevare-vevinito-ĝoi.

³³ Seĝuka barego ĝesi apostolo tarimari na Iesu Vereĝauka ĝena variĝisi-ĝenoĝoi ĝevari-fiuato-ĝoi, ema Barau ĝena namo e varevare-bara ĝia mabarari iatari ai ebubu-riĝoato.

³⁴ Ĝia fakari ai ta maki asi erabuto-ĝoi. Korana ma ĝeri tano o numa tarimari na, moĝeri numa e tano ĝevoivoi-iaĝirito-ĝoi, benamo davari moniri tu ĝeĝwa-iaĝorito-ĝoi,

³⁵ Apostolo ĝoirari ai ĝetore-taririto-ĝoi. Benamo mabarari ĝevini-ilailarito-ĝoi, tata ĝena rabu ilailanai.

³⁶ Iosefa tu apostolo na arana ĝevatoato Banabas, anina tu “Velaunaĝi Tarimana”. Ĝia tu Levi doĝorona, Saipras motumotunai emaĝurito.

³⁷ Ĝia ĝena tano evoiato, benamo voina monina tu eĝwa-iaĝoato, apostolo kwakuri koranai ea tore-tariato.

5

Anania e Safira

¹ A tau ta etanuto-ĝoi arana Anania, ĝaraĝona arana tu Safira. Anania na ĝeri tano ta ea voivoi-iaĝiato, ĝaraĝona na maki eĝabi-raĝeato.

² Senaĝina mo tano monina kwana tu eĝabi-tariato, ma kwana reke ta moĝo eĝwa-iaĝoato apostolo ĝoirari ai ea tore-tariato. Mo veiĝa eveiato ĝaraĝona tu ma ribana.

³ Benamo Petero na ekiraiato, ekirato, “Anania, karase nai Satani na beborogimu, benamo Iauka Veaĝa boĝofaia, tano monina kwana tu ĝoi ĝemu boĝabi-taria?”

⁴ Roĝosi boro voia nai tu, tano tu ĝoi ĝemu, ene? Ma beĝe voia murinai maki moni tu ĝoi ĝemu. Kara botuĝamaĝia nai, mai veiĝa bono veia bosu? Ĝoi na tu dia tarimarima boĝofari, senaĝi Barau boĝofaia.”

⁵ Anania na mo guruĝa eseĝaĝiato nai, eketo-tarito, emaseto. Benamo mo veiĝa eĝorato varina ĝeseĝaĝiato tarimari mabarari ĝegari-rakavato.

⁶ Benamo tarima variĝuri ĝevariĝisito, Anania tauĝanina dabuĝa na ĝeseĝoato, ĝeĝwa-rosiato, benamo ĝea guriato.

⁷ Hora toitoi kavana murinai, ĝaraĝona ema raka-toĝato, senaĝi ĝia kara eĝorato tu asi ribana.

⁸ Petero na edanaĝiato, ekirato, “Nokira-varagu, ĝomi taumi ruarua na tano monina boĝo ĝabia tu maĝa moĝo ba?” Ĝia evaĝa-veseto, ekirato, “Oi, voina tu maniĝa moĝo.”

⁹ Benamo Petero na ekiraiato, ekirato, “Karase nai ĝoi ma ĝaraĝomu ĝesi nuĝami ĝovaĝa-sebonarito, Vereĝauka Iaukana ĝoĝofaiato? Noboĝe, ĝoi ĝaraĝomu beĝe guria tarimari tu ĝatama-bokai ĝeruĝa-taĝoni, ĝia na ĝoi maki ma ĝeĝwa-rosimuni.”

10 Mo horai moĝo ĝia Petero kwakuna koranai eketo-tarito, emaseto. Benamo mo tarima variĝuri ĝeraka-toĝato, ma ĝeĝitaiato mase, benamo tauĝanina ĝeĝwa-rosiato, ĝaraĝona sevinaĝi ĝea guriato.

11 Ekalesia mabarana e varina ĝeseĝaĝiato tarimari mabarari gari baregona na eĝabirito.

Vetoĝa e veĝa boruri

12 Vetoĝa e veĝa boruri ĝutuma apostolo na tarimarima ĝoirari ai ĝeveirito-ĝoi. Ma Iesu ĝevaĝa-moĝoniato-ĝoi tarimari mabarari tu “Solomona Ĝena Touraĝe” ai ĝevegogoto-ĝoi.

13 Asi veĝabidadama tarimari na ĝevaĝa-raĝerito-ĝoi, senaĝi ĝegarito-ĝoi, be ĝia ĝesi asi ĝea vegogoto-ĝoi.

14 Senaĝi tau e vavine tu ĝutuma lelevaĝi na Vereĝauka ĝevaĝa-moĝoniato-ĝoi. Mo ĝevaĝa-moĝonito-ĝoi tauri e vavineri tu mabarari apostolo ĝeri doĝoro ai ĝerakaraka-toĝato.

15 Apostolo na ĝeveirito-ĝoi veĝari tarimarima na ĝeribarito, benamo keve tarimari ĝeĝwa-rosirito dabara ĝana, benamo genagena fatari ai e gedai ĝetorerito, Petero bene raka-vanaĝi nai, iouiouna na bene iauka-tariri ĝana.

16 Ema tarimarima ĝutuma-bara Ierusalemse sevina vanuĝari na keve tarimari e iauka rakavari na ĝeboroĝirito tarimari ĝeĝwa-iaĝorito, benamo mabarari ĝenamoto.

Apostolo tarimari ĝevaĝa-midigu midigurito

17 Benamo Rubu Veaĝa verena baregona ma karonu Sadukea doĝorona ĝesi, apostolo tarimari ĝeri ai ĝemama-rakavato.

18 Ĝia na apostolo tarimari ĝeĝabi-taririto, benamo dibura numai ĝebiri-ĝaurito.

19 Senaĝi mo boĝi Vereĝauka ĝena aneru na dibura numa ĝatama bokana erovoato, benamo apostolo eĝori-rosirito, benamo evaĝa-guruĝarito, ekirato,

20 “Ĝoiaĝo, Rubu Veaĝanai boĝono ruĝa, benamo mai maĝuri variĝuna mabarana tarimarima ĝeri boĝono kiraĝia.”

21 Boĝiboĝi iamoni-iamonai Rubu Veaĝi ĝeraka-toĝato, aneru na ĝevaĝa-guruĝarito ilailanai tarimarima ĝevaĝa-ribarito.

Rubu Veaĝa verena baregona ma karonu ĝesi ĝeraĝasito, benamo kanisoro tarimari e Isaraela vereri mabarari ĝekea-vegogorito, benamo dibura numa ĝana ĝevetuĝu-iaĝoto, apostolo tarimari urari na.

22 Senaĝi vetuĝunaĝi tauri dibura numai ĝea raĝasito nai tu, apostolo tarimari asi ĝedoĝaririto. Benamo ĝeĝenoĝoito, ĝea kira-vararito, ĝekirato,

23 “Dibura numana ĝatama bokana tu biribiri, ema ĝitaĝau tarimari maki ruĝataĝo; senaĝi ĝatama-boka baĝa rovo-fakaia nai tu, apostolo ta tu asi baĝa ĝoitaĝoa.”

24 Rubu Veaĝa ĝitataĝona tarimana baregona e Rubu Veaĝa vereri baregori na mo guruĝa ĝeseĝaĝiato nai tu, ĝeiauvoiauvo-rakavato, asi ribari mo veĝa anina tu kara.

25 Ĝedaradarato-ĝoi nuĝanai tu, tarima ta eraka-toĝato, benamo ekirarito, ekirato, “Ĝoseĝaĝi! Dibura numai ĝobiri-ĝaurito tarimari tu Rubu Veaĝi ĝeruĝa-taĝoni, ma tarimarima ĝevaĝa-ribarini.”

26 Benamo Rubu Veaĝa ĝitaĝauna tarimana baregona ma ĝena mero ĝesi apostolo tarimari ĝea ĝori-ĝenoĝoirito. Asi ĝevei-guguraĝirito, korana tarimarima na fore na beĝe ĝidararini garina.

27 Ĝeĝori-toĝarito, kanisoro ĝoiranai ĝevaĝa-ruĝarito, benamo Rubu Veaĝa verena baregona na edanaĝirito, ekirato,

28 “Ĝai na guruĝa gwaĝiĝina ĝavinimito, mai tarima aranai asi boĝono vevaĝa-riba, senaĝi ĝoĝitaia, ĝomi na kara boĝo veia! Gomi ĝemi vevaĝa-riba boĝo vaĝa-rega rovorovoa, benamo Ierusalemabara mabarana varau beĝaua, ema ĝomi ĝourani ĝia ĝena mase tu ĝai baĝana daĝa.”

29 Petero e apostolo kotari ĝevaĝa-veseto, ĝekirato, “Ĝai tu Barau ĝena ura baĝa korana-iaĝiani, dia tarimarima ĝeri ura.

30 Iesu tu ĝomi na satauro tuĝunai ĝoikoko-kauato nai, ĝovaĝi-maseato, senaĝi ĝita tamara ĝeri Barau na ma evaĝa-variĝisi ĝenoĝoiato.

31 Barau na eĝabi-vaŝiato, ĝia aroribanai evaĝa-ruĝaiato, Veĝitaĝau Verena e Vevaĝa-maĝuri Tarimanai evaĝa-iaĝoato. Isaraela tarimari bene vaĝa-vetuĝamaĝi-kureri, ema ĝeri rakava bene tuĝamaĝi-fitoĝari ĝana.

32 Ĝai tu mai dagara kiraĝi-foforiri tarimama. Iauka Veaĝa na maki maĝeri dagara ekiraĝi-foforirini. Mo Iauka Veaĝa tu Barau na ĝia ĝeseĝaĝi-viniani tarimari mabarari evinirito.”

33 Kanisoro tarimari na mai guruĝa ĝeseĝaĝiato nai tu ĝebaru-rakavato, ma ĝeri ura mo apostolo tarimari tu ĝevaĝi-maseri moĝo.

34 Senaĝi ĝia fakari ai Farisea tarimana arana Gamaliel, taravatu evevaĝa-riba iaĝiato-ĝoi, ema tarimarima mabarari na ĝegubakauato-ĝoi tarimana, kanisoro nuĝari na eruĝa-vaŝito. Benamo ekirato, moĝeri apostolo tarimari ĝeĝori-rosiri roĝo.

35 Benamo ĝia na kanisoro vegogona ekiraiato, ekirato, “Isaraela tari-mami, maĝeri tarima kamasi ĝoveiri ĝotoni ĝenai boĝono tuĝamaĝi-ginikau.

36 Ĝaro kotari varau beĝe iaĝo, Teuda eruĝa-vaŝito, evekiraĝito, ĝia tu tarima baregona ta, benamo tarima sinau vasivasi (400) kavana ĝia ĝesi ĝekauto. Senaĝi ĝia ĝevaĝi-maseato nai tu, ĝena tarimarima mabarari ĝeraga-rovorovoto; mo doĝoro toma tu asiĝina maia.

37 Moĝa murinai tu Iudas, Galilea tauna, tarimarima arari toretoreri o sensisi ĝabiĝabina ĝarori ai efoforito, ĝia maki ĝutuma-bara eĝori-kaurito, senaĝina ĝia maki ĝevaĝiato nai, ĝena tarimarima tu ĝeraga-rovorovoto.

38 Moĝa lorinai initoma veĝanai, au na akiramini, mai tarima ĝoraga-kwaneri, ema ĝeri ai kara ta asi boĝono veia. Korana bema ĝeri boioĝa e ĝauvei maĝeri tarimarima ĝerina eiaĝomani nai tu berekwa-rekwani.

39 Senaĝi bema mai tu Barau ĝenana eiaĝomani nai tu, ĝomi na maĝeri tarima tu asi ilaila boĝo kourini bene. Asi namo Barau boĝo vetari-viniani!”

Kanisoro na Gamaliel ĝeseĝaĝi-viniato.

40 Benamo apostolo ma ĝekea-toĝarito, ĝekwaririto, benamo ĝekirarito, Iesu aranai asiĝina ĝinavaĝi ma beĝene vevaĝa-riba ĝenoĝoi; benamo ĝetuĝu-rakarito.

41 Apostolo na kanisoro vegogona ĝeraga-kwaneato ma iakuri ĝesi, korana Barau na eĝabi-hidirito, ĝia tu ilaila Iesu aranai maiaka beĝe ĝabiani bene.

42 Benamo ĝaro vanaĝivanaĝi ai Rubu Veaĝai e tarimarima ĝeri numa nuĝari ai Vari Namona ĝevevaĝa-ribato-ĝoi e ĝeĝobata-iaĝiato-ĝoi, ĝekirato-ĝoi, Iesu tu Keriso.

6

Vevaĝa-kava tarimari imaima ruarua (7)

1 Moĝeri ĝaro ai Iesu ĝekorana-iaĝiato-ĝoi tarimari tu ĝeĝutuma-iaĝoto-ĝoi. Ma Iuda tarimari, Grik garo ai ĝeguruĝato-ĝoi tarimari, e Heberu garo ai ĝeguruĝato-ĝoi tarimari fakari ai veĝareveĝare eĝorato. Grik garo

ai ġeguruġato-ġoi tarimari ġekirato, ġia ġeri vabu tu ġaro tata ġaniġani ġevareto-ġoi nai tu ġevaġa-raburito-ġoi.

² Moġa lorinai apostolo gabanana ruarua (12) na Iesu ġekorana-iaġiato-ġoi tarimari mabarari ġekea-vegogorito, benamo ġekirato, “Ġai na ġaniġani varevarena uranai, Barau ġena guruġa asi baġa vari-fiuanu tu asi maoro.

³ Moġa lorinai, tarikakagu mabarami, ġomi vefakami ai tau imaima ruarua (7) ġoġabi-viriġiri, variri namo tarimari, Iauka Veaġa na e iaunega na ġevonuto tarimari; benamo mai ġauvei ġia baġana vini-vanaġiri.

⁴ A ġai tauġema ġema taimi mabaranai tu ġauġau e ġobatai baġana torea.”

⁵ Apostolo tarimari ġeri boioġa ġia mabarari na ġeikua-iaġiato. Benamo ġia na mai tau maiġeri ġeġabirito: Stefano, veġabidadama na e Iauka Veaġa na evonuto tarimana; e Filipo; Prokoro; Nikanoro; Timon; Pamena; e Nikolas, Antioka tarimana senaġi Iuda tarimari ġeri toma-rakariġo ekorana-iaġiato-ġoi.

⁶ Ġia na mai tau maiġeri apostolo ġoirari ai ġevaġa-ruġarito, benamo apostolo na ġia iatari ai ġeġuriġurito ema apostolo ġimari ġia iatari ai ġetorekaurito.

⁷ Benamo Barau ġena guruġa eraga-rovorovoto. Ema Iesu korana-iaġina tarimari Ierusalemaj ġevovoka-ġarimoġito, ema Rubu Veaġa vereri ġutuma gorogoro na maki Barau ġena guruġa ġeġabi-raġeato, benamo ġeveġabidadamato.

Stefano ġeġabi-tariato

⁸ Stefano tu Barau ġena varevare-bara e seġuka na evonuto tarimana, ġia na nuġa-farevaġi veiġari boruri baregori tarimarima ġoirari ai eveirito-ġoi.

⁹ Senaġi vekira-fitoġa barego evariġisito. Iuda tarimari ġeri rubu doġorona ta ġekiraġirito-ġoi “Ruġavaġi tarimari”. Ġia ema Iuda tarimari, Kurene e Alesandria na ema Kilikia e Asia tanobara na ġeiaġomato tarimari, Stefano ġesi ġeveġare-veġareto.

¹⁰ Senaġi Stefano ġena guruġa tu asi ġelautariato-ġoi, korana ġia tu Iauka Veaġa na eviniato-ġoi iauneganai eguruġato-ġoi.

¹¹ Benamo ġia na tarima kotari nuġari ġeġanirito beġene kira, “Ġai na Stefano ġaseġaġiato, ġia na Mose e Barau ekira-fitoġarito.”

¹² Mo dabaraj ġia na tarimarima, e Iuda vereri, ema taravatu ġevevaġa-riba iaġiato-ġoi tarimari ġekira-vaisivaisirito. Ġia Stefano ġenaj ġeiaġoto, ġea ġabi-tariato, benamo Iuda ġeri kanisoro ġoirana ġana ġeġori-iaġoato.

¹³ Monaj beġene ġofaġofa ġana vevaġa-bade tarimari kotari ġeġoritoġarito, benamo ġekirato, “Mai tarima na tu ġaro mabarari ai ġita ġera Rubu Veaġana e Mose ġena taravatu ekira-fitoġarini.

¹⁴ Ġai na ġaseġaġiato, ekirato, ‘Iesu, Nasareta tarimana, na mai Rubu Veaġana bevaġa-rakavaiani, ema Mose na evinirato veiġari mabarari bevaġa-iraurini.’”

¹⁵ Kanisoro ai ġevegogo-taġoto-ġoi tarimari mabarari na Stefano ġeġita-karakaraiato, ema ġoirana ġeġitaiato tu noġa moġo aneru ta ġoirana.

7

Stefano ġena ġobata

¹ Benamo Rubu Veaġa verena baregona na Stefano edanaġiato, ekirato, “Maiġeri guruġa tu moġoni ba?”

² Stefano na evaḡa-veserito, ekirato, “Tarikakagu e tamagu mabarami, au ḡoseḡaḡigu! Ĝita senera Aberahamo Haran vanuḡanai roḡosi roḡo berea tanu nai, mareva barego Barauna ḡia ḡenai efororito Mesopotamia ai,

³ benamo ḡia ekiraiato, ekirato, ‘Ĝemu bese e tanobara noiaḡuia, benamo au na bavaḡa-ḡitamuni tanobarana ḡana bono iaḡo.’

⁴ Benamo ḡia na Kaldea tanobarana eraga-kwaneato, benamo Haran ai ea vanuḡato. Ma tamana emaseto murinai, Barau na etuḡu-iaḡomaiato initoma ḡotanu-iaḡiani tanobarana ḡana.

⁵ A Barau na Aberahamo tu ḡena tano misina kota maki asi eviniato. Kwaku vaḡa-ruḡatarina gabuna ilailanai misina kota maki asi eviniato. Senaḡi Barau eguruḡa-toreto ḡia na tano ta beviniani, ḡia e ḡia murina na beḡe ḡorani tarimari na tano ta beḡe ḡaunaiani ḡia ḡeri. Mo ḡaro ai Aberahamo tu asi natuna.

⁶ Barau na ma evaḡa-guruḡaiato, ekirato, ‘Ĝoi ḡemuna beḡe ḡorani beseri tu tano boruna tai beḡe tanuni. Ma laḡani sinau vasivasi (400) mo gabu tarimari ḡeri vetuḡunaḡi tarimari ai beḡe vaḡa-iaḡorini e beḡe vaḡa-midigu midigurini.’

⁷ Barau ma ekirato, ‘Isaraela tarimari na vetuḡunaḡiri ḡeiaḡo-vinini beseri tu au na havevaḡa-maoro vinirini, moḡa murinai ḡia tu mo tano na beḡe raka-rosini, mai gabu ai au beḡema toma-rakariga viniguni.’

⁸ Benamo Barau na Aberahamo kefi-lamavaḡi veigana eviniato, mo tu ḡia ḡena kiraḡitore vetoḡana. Benamo Aberahamo na Isako evaḡa-ḡoraiato, ma ḡaro vaḡa-imaima toitoina (8) murinai tauḡanina kefina elama-vaḡiato. Moḡa murinai Isako na Iakobo evaḡa-ḡoraiato, ma Iakobo na ḡera doḡoro ḡedebanini tarimari gabanana ruarua (12) evaḡa-ḡorarito.

⁹ Doḡoro debari tarimari Iosefa ḡenai ḡemamato, benamo Aigupito tarimari ḡeri ai ḡevoivoi-iaḡiato. Senaḡina Barau tu Iosefa ḡesi,

¹⁰ ema ḡena dabara doko mabarari ḡerina evaḡa-maḡuriato. Barau na Iosefa iaunega eviniato, ema Pharao, Aigupito verena, nuḡana evaḡa-namoato Iosefa ḡenai, benamo Pharao na eura-viniato ema seḡuka eviniato, Aigupito tanona ema ḡia ḡena numa tarimari e farefareri bene ḡita-ḡauri.

¹¹ Benamo Aigupito tanona mabarana ema Kanana tanona mabaranai doḡe ḡeḡorato, monana vito e nanu mase baregona evaḡa-ḡoraiato, benamo ḡita senera tu asi ḡeri ḡaniḡani doḡari dabarana.

¹² Senaḡina Iakobo eseḡaḡito Aigupito tu ma widina, benamo ḡia na ḡita senera etuḡu-iaḡorito, mo tu ḡia ḡeri iaḡoiḡo giniginena.

¹³ Ma ḡeri iaḡoiḡo vaḡa-ruaruanai Iosefa tauḡena kakana e tarina ekiravararito ḡia tu deikara, benamo Pharao na Iosefa ḡena bese eribaiato.

¹⁴ Moḡa murinai Iosefa evetuḡuto, tamana Iakobo ma ḡena bese ḡeri ai Aigupito ḡana beḡene iaḡoma ḡana. Iakobo besena Kananai tu mabarana gabana imaima ma gabana ruarua imaima (75).

¹⁵ Benamo Iakobo Aigupito ḡana evariḡoto, monai ḡia e ḡita senera ḡemaseto.

¹⁶ Ĝia tauḡaniri tu Sekem ḡana ḡeḡwa-ḡenoḡoi iaḡorito, benamo monai ḡea guririto. Mo gara gabuna tu Aberahamo na Hamora naturi ḡerina moni na evoiato.

¹⁷ Barau na ḡena kiraḡitore Aberahamo ḡenai bevaḡa-moḡoniani ḡarona ekavinaḡito-ḡoi nai tu, ḡita ḡera tarimarima Aigupito ai ḡeḡutuma-gorogoroto.

¹⁸ Ma moḡa murinai tu vere ta na Aigupito eḡita-ḡauato. Mo vere moḡa tu asi ribana Iosefa.

19 Ĝia na ĝita senera eĝofarito-ĝoi e evaĝa-midigu midigurito-ĝoi, ema ekirarito-ĝoi, naturi raraka-rarakari ĝeri numa na beĝene tore-rosiri, beĝene mase ĝana.

20 Mo negai Mose emaĝurito. Ma Mose eĝorato nai, marevana tu namo vedaurea. Ma ĝia tu ĝue toitoi tamana ĝena numai ĝenariato,

21 benamo numa na ĝetore-rosiato nai tu, Pharao natuna ĝuiatona na eĝabiato, benamo natunai evaĝa-iaĝoato.

22 Mose tu Aigupito ĝeri riba e iaunega mabarana ĝevaĝa-ribaiato, ema ĝena guruĝa e veiĝa ma seĝukari tarimanai eiaĝoto.

23 Ma ĝena maĝuri laĝanina gabana vasivasi (40) eĝabiato, benamo karonna Isaraela tarimari nea raka-ĝitari etato.

24 Ĝia na Aigupito tarimana ta eĝitaiato, Isaraela tarimana ekwariato-ĝoi, benamo ĝia eiaĝoto gogobana eragato, benamo mo Aigupito tarimana evaĝi-maseato.

25 Mose matoru ekirato tu ĝena tarimarima beĝe tuĝamaĝi-fakani, ĝia ĝenana Barau na Isaraela tarimari bevaĝa-maĝuririni, senaĝi moĝa Isaraela tarimari na tu asi ĝeriba-maoroato.

26 Ma elaĝanito nai, ĝia na Isaraela tarimari ruarua eĝitarito ĝevevaĝito-ĝoi, benamo nevaĝa-mainori ĝana ekirarito, ekirato, 'Ĝomi tau ruarua, ĝoseĝaĝi, ĝomi tu tarikaka moĝo ruarua, ma kara dainai tu taumi ruarua ĝovevaĝini?'

27 Senaĝi vevaĝi ekoraiato tarimana na Mose edori-veĝitaiato, benamo ekirato, 'Ĝoi tu deikara na ĝai ĝema vere ema toto-iobukaiobuka tarimanai evaĝa-iaĝomuto?'

28 Ĝoi ourani tu ĝoraĝani Aigupito tarimana ovaĝi-maseato kavana au novaĝi-masegu otoni?'

29 Mose na mo guruĝa eseĝaĝiato, benamo eraga-kwareĝato, Midian ĝana egari-rakato. Monai etanuto-ĝoi nuĝanai natuna ruarua ĝemaĝurito.

30 Laĝani gabana vasivasi (40) ĝekorito murinai, aneru ta tano fakanai Sinai Ĝorona sevinai Mose ĝenai efoforito. Mo aneru tu ĝau ruguruguna ĝenai karava morenai eiaĝoto, benamo Mose ĝenai efoforito.

31 Mose na moĝa eĝitaiato nai, eĝabato; benamo nea ĝita-ginikaua ĝana eraka-kavinaĝi iaĝoto-ĝoi nuĝanai, Vereĝauka garona eseĝaĝiato, maiĝesi ekirato,

32 'Au tu ĝoi senemu Aberahamo, Isako, e Iakobo ĝeri Barau.' Mose egari-rakavato, benamo asi eurato ma bene boĝe-iaĝo ĝenoĝoi.

33 Barau na evaĝa-guruĝaiato, ekirato, 'Ĝemu tamaka kwakumu na novei-vaĝiri, korana mani oruĝa-taĝoni gabuna tu tano veaĝana.

34 Moĝoni, au ĝegu tarimarima Aigupito ai ĝevaĝa-midigu midigurini tu baĝitari ema ĝeri midigumidigu ĝabana guruna baseĝaĝiri nai, au bamariĝo tu navaĝa-maĝuriri ĝana. Toma noiaĝoma, au na ĝoi tu Aigupito ĝana atuĝu-ĝenoĝoimuni.'

35 Mai Mose tu Isaraela tarimari na ĝeruĝaiato tarimana. Maiĝesi ĝekirato, 'Ĝoi tu deikara na ĝai ĝema vere e toto-iobukaiobuka tarimanai evaĝa-iaĝomuto?' Mai tarima sebona moĝo tu Barau na etuĝuato bene vere e bene vevaĝa-maĝuri. Ema ĝia na maki ĝau rugurugunai karava moreri ai efoforito aneruna ĝenana evaĝa-kavaiato.

36 Ĝia na Isaraela tarimari Aigupito na eĝori-rosirito nai, nuĝa-farevaĝi veiĝari e vetoĝa boruri eveirito-ĝoi, Aigupito nuĝanai e Davara Kakakakanai ema tanobara fakanai laĝani gabana vasivasi (40).

³⁷ Mai Mose sebona na Isaraela tarimari ekirarito, ekirato, ‘Barau na ġemi peroveta tarimana ta betuġuani, au etuġuguto kavana. Mo peroveta tu ġomi ġemi tarimarima ta.’

³⁸ Ġia tu Isaraela tarimari ġeri vegogo nuġanai tano fakanai ġita senera ema Sinai Ġoronai evaġa-guruġaiato aneruna ġesi monai. Ġia na Barau ġena maġuri guruġana Barau ġenana eġabiato, ġita ma bene vaġa-ribara ġana.

³⁹ Senaġina ġita senera asi ġeurato ġena guruġa beġene ġabi-raġea, ema ġia ġekira-fitoġaiato ema nuġari ai ġeri ura tu Aigupito ġana ma ġeġenoġoi.

⁴⁰ Ġia na Arona ġekiraiato, ġekirato, ‘Ġita ġera barau tari noveiri, ġita ġoirarai beġene raka ġana. Korana mai Mose ġita Aigupito na eġori-rosirato tarimana tu ġita asi ribara kamasi ta bevei bene.’

⁴¹ Mo ġaro ai ġia na boromakau natuna kavana kwaivakukuna ġeveiato. Benamo mo kwaivakuku ġoiranai ginitaġo dagarari ġea toreto ema ġeġani-verekoto. Tauġeri ġimari na ġeveiato dagarana ġeverere-viniato.

⁴² Benamo Barau eraka-veġitato, ma Isaraela tarimari evini-iaġorito, guba visiġuri beġene toma-rakariġo viniri ġana. Mo tu peroveta tarimari ġeri bukai ġetoreato ilailanai, ekirani,

‘Isaraela tarimami! Laġani gabana vasivasi (40) tano fakanai ġovaġirito-ġoi mamoeiri, boromakauri, e ginitaġo dagarari tu dia au ġegu.

⁴³ Mo tu kwaivakuku barauna Molok ġena farai rubuna, ema ġemi barau Refan ġena visiġu iouiouna ġoġwaiato-ġoi; moġeri kwaivakuku tu ġomi na ġoveirito, boġono toma-rakariġo viniri ġana.

Moġa lorinai au na ġomi batuġu-rakamini Babulona mo rekena ġana.’

⁴⁴ Ġita senera tanobara fakanai ġetanuto-ġoi nai tu, farai rubuna maki ġia ġesi. Mo farai rubuna Barau na ġena guruġa moġoniri evaġa-foforirito-ġoi. Mo farai rubuna ġeragaiato tu Barau na Mose ekira-varaiato lorinai, ema Mose na farai rubuna vetoġana eġitaiato ilailanai moġo ġeveiato.

⁴⁵ Moġa murinai ġita senera na mo farai rubuna tamari ġerina ġeġabiato, benamo Iosefa ġena veġorikau neganai ġeġwakau-iaġoato irau bese tarimari tu ġita senera ġoirari ai Barau na ġeri tano na elai-veġitarito. Mo farai rubuna monai etanuto mo, Davida ġena nega.

⁴⁶ Davida na Barau ġena vevaġa-namo eġabiato, ema enoġinoġito, monai Iakobo ġena Barau ġena tanu numana bene ragaia etato.

⁴⁷ Senaġina Solomona na vau ġena numa eragaiato.

⁴⁸ Senaġi Iaru-korokoro Barauna tu tarimarima ġimari na ġeragarini numari ai tu asi etanuni, peroveta tarimana ekirani kavana,

⁴⁹ ‘Vereġauka ekirani,

“Guba tu au ġegu terona,

ema tanobara tu au kwakugu vaġa-ruġatarina gabuna.

Be, au ġegu numa tu kamasi-kamasi na boġo ragaiani?

Au ġegu iaġaraġi gabuna tu aiġa?

⁵⁰ Maiġeri dagara mabarari au ġimagu na asi aveirito, ei?” ’

⁵¹ Stefano ma eguruġato, ekirato, “Kira-ġuiragi tarimami! Ġomi nuġami e seġami tu Barau asi ġeura-viniani tarimari kavari. Ġomi tu senemi ġeveito-ġoi kavari ġoveini, vanaġivanagi Iauka Veaġa ġolai-veġitaiani!

⁵² Kamara peroveta tu ġomi senemi na asi ġevaġa-midigu midiguato? Ġia na tu Vei-iobukaiobuka Tarimana ġena iaġoma ġekiraġi-fofori guineato tarimari tu ġevaġi-maserito. Ma toma ġomi na tu Iesu boġo revaia e boġo vaġi-debaia.

⁵³ Barau ġena taravatu aneru na ġeġwa-mariġoato tu ġomi na ġoġabiato, senaġina asi ġokorana-iaġiato.”

Stefano forena ġeġidara-maseato

⁵⁴ Ġia na mo guruġa ġeseġaġiato nai, ġebaru-rakavato, gadikari maki ġeġara-taririto Stefano ġenai.

⁵⁵ Senaġi Stefano tu Iauka Veaġa na evaġa-vonuato, egaga-raġeto guba ġana, benamo gubai Barau marevana baregona eġitaiato, ema Iesu eġitaiato Barau aroribanai ruġataġo.

⁵⁶ Benamo ekirato, “Ġoboġe! Guba bevekeo-faka aġitaiani, ema Tari-marima Natuna tu Barau aroribanai eruġa-taġoni!”

⁵⁷ Mo guruġa ġeseġaġiato nai tu, ġimari na seġari ġekou-ġaurito vau ġefararato. Benamo mabarari vaġa-sebo ġia ġeraga-viniato,

⁵⁸ ġeġabiato, benamo siti murina ġana ġeinu-rosiato, benamo fore na ġeġidaraiato. Ma vaġa-moġoni tarimari ġeri dabuġa tu futua ta arana Saulo, ġia kwakuna koranai ġetorerito.

⁵⁹ Ġeġidaraiato-ġoi nuġanai, Stefano eġuriġurito, ekirato, “Iesu Vereġauka o, au iaukagu noġabi-raġea.”

⁶⁰ Evetui-tarito, benamo ma taġina ġesi ekea-raġeto, ekirato, “Vereġauka o, ġeri veiġa rakavana maiġa voina asi bono viniri.” Moġesi eguruġato, benamo emaseto.

8

¹ Saulo na Stefano vaġimasena tu eġabi-raġeato.

Ekalesia vaġa-midigumidiguna e lai-lausilausina evesinato

Mo ġaro ai Ierusalemata nuġanai ekalesia vaġa-midigumidiguna e lai-lausilausina baregona evesinato. Veġabidadama tarimari mabarari ġeraga-rovorovoto, Iudea e Samaria tanori mabarari ġana ġeiaġoto, senaġi apostolo tarimari ġereġari moġo ġeraga-kwanerito.

² Barau korana-iaġina tarimari kotari na Stefano taġina ġevei-rakavato e ma taġiri ġesi ġekeuato, benamo ġea guriato.

³ Senaġina Saulo na tu ekalesia nevaġa-rakava korikoria etato. Numa tata nuġari ai eraka-toġato-ġoi, benamo veġabidadama tauri e vavineri einu-rosirito-ġoi, ma eġabi-iaġorito-ġoi dibura numai ea biri-ġaurito.

Filipo Samaria ai eġobatato

⁴ Ġevaġa-karovorito tarimari tu ġeiaġoto gaburi ai Barau ġena guruġa ġea ġobata-iaġiato.

⁵ Filipino tu Samaria vanuġana baregona ġana eiaġoto, monai Keriso varina ea fiuato.

⁶ Ġutuma na Filipino ġena guruġa ġeseġaġiato ema nuġa-farevaġi veiġari eveirito ġeġitarito nai, ġia mabarari na ġeseġaġi-vini magomagoato.

⁷ Iauka rakavari tarimarima ġutuma ġerina ma ġabari ġesi ġeraka-vaġito, ema tauġaniri tavi tari ġemaseto tarimari e kwaku rakava tarimari ġutuma ġenamoto.

⁸ Moġa lorinai mo Samaria vanuġana nuġanai iaku baregona eġorato.

⁹ Mo vanuġai tarima ta etanuto-ġoi arana tu Simona. Guinenai ġena meġameġa e ġora veiġari na Samaria tarimari evaġa-ġaba rakavarito-ġoi. Tauġena evekiraġito-ġoi, ġia tu varaġe rakava,

¹⁰ ema tarimarima mabarari mo vanuġa nuġanai misina na beiġo mo baregona na ġeseġaġi-viniato-ġoi, ema ġekirato-ġoi, “Mai tarima tu mo Barau ġenana eiaġomato seġukana ġekiraġiani ‘Seġuka Baregona’.”

11 Ĝia ĝeseĝaĝi-viniato, korana ĝaro barego vedaurea ĝia ĝena meĝameĝa veigari na evaĝa-ĝabarito.

12 Senaĝi Filipo na Barau ĝena Basileia, (ĝena veĝitaĝau seĝukana evaĝa-ruĝaiani maigā), Varina Namona e Iesu Keriso arana varina eĝobata-vinirito nai, tau e vavine na ĝevaĝa-moĝoniato, benamo ebatisorito.

13 Simona na maki evaĝa-moĝoniato, benamo babatiso eĝabiato. Moĝa murinai Simona na Filipo ekaferi-kaferiato, ma Filipo na seĝuka veigari baregori e vetoĝa boruri eveirito-ĝoi nai, eĝaba-rakavato.

14 Apostolo tarimari Ierusalemaj ĝetanuto-ĝoi ĝeseĝaĝito, Samaria tarimari na tu varau Barau ĝena guruĝa ĝeĝabi-raĝeato, benamo Petero e Ioane ĝetuĝu-iaĝorito Samaria ĝana.

15 Tauri ruarua ĝeraĝasito nai tu, veĝabidadama tarimari iatari ai ĝeĝauĝauto, Iauka Veaĝa beĝene ĝabia ĝana.

16 Korana Iauka Veaĝa ĝia ta iatari ai tu roĝosi roĝo bere raka-riĝo. Ĝia tu Iesu Vereĝauka aranai moĝo babatiso ĝeĝabiato.

17 Petero e Ioane ĝimari ĝia iatari ai ĝeveĝabikauto, benamo ĝia na Iauka Veaĝa ĝeĝabiato.

18 Simona na apostolo tarimari eĝitarito, ĝimari ĝetore-kaurito vau Iauka Veaĝa ĝeĝabiato, benamo ĝia na moni Petero e Ioane eduĝi-vinirito, ekirato,

19 “Au maki mani seĝuka ĝovinigu, be ĝimagu ta iatanai bana tore-kaua nai, Iauka Veaĝa bene ĝabia.”

20 Senaĝi Petero na ekiraiato, ekirato, “Ĝoi ma ĝemu moni ĝesi karava gabuna ĝana ĝoiago, korana otuĝamaĝini Barau ĝena varevare tu moni na bovoiani!

21 Mai ĝauvei ai ĝoi tu asi ĝemu gabu, korana nuĝamu tu asi roroĝoto Barau ĝoiranai.

22 Mai ĝemu ura rakavana ĝenana novetuĝamaĝi-kure, benamo Vereĝauka nonoĝia, betaĝu ĝia na maniĝesi tuĝamaĝi ĝeĝevana oĝabiani nuĝamu ai maniĝa betuĝamaĝi-fitoĝaiani.

23 Korana aĝitamuni, ĝoi tu nuĝa-ĝirimaĝirima na ovonuto, ema rakava na ebaru-bubuĝaumuto.”

24 Benamo Simona na Petero evaĝa-veseato, ekirato, “Mani ĝemi veigā, au iatagu ai Vereĝauka nonoĝia, be mani bokiraĝiri dagarari ta au ĝegu ai asi bene ĝora.”

25 Petero e Ioane na Vereĝauka ĝena guruĝa ĝekiraĝi-foforiato e ĝevari-fiuto murinai, Ieruselema ĝana ĝeĝenoĝoito. Ĝeri ĝenoĝoi ai Samaria vanuĝari vovokari Vari Namona ĝeĝobata-iaĝiato.

Filipo e Itiopia tarimana baregona

26 Vereĝauka ĝena aneru ta na Filipo evaĝa-guruĝaiato, ekirato, “Novariĝisi, gabina (o south) rekena ĝana noiaĝo, bono iaĝo mo, Ieruselema na Gasa ĝana ĝeiaĝoni dabarana ĝana. Mo tu tano fakana dabarana, tarima ta asi etanuni.”

27 Benamo evariĝisito, eiaĝoto. Eiaĝoto-ĝoi nuĝanai, Itiopia tarimana ta, dagi baregona tarimana, tu ĝena vanuĝa ĝana eĝenoĝoito-ĝoi. Ĝia tu Itiopia ĝitaĝauna vavinena baregona ĝena farefare eĝitaĝaurito-ĝoi tarimana baregona. Ĝia tu eunuko, (seuri ĝefararito tarimana). Ĝia Ieruselema ĝana eiaĝoto tu, Barau benea toma-rakariĝo vinia ĝana.

28 Ĝena ĝenoĝoi ai kariota iatanai etanukauto vau, Isaia peroveta tarimana ĝena buka eiavi-iaĝoato-ĝoi.

29 Benamo Iauka Veāga na Filipino evaāga-guruāiato, ekirato, “Noiaāgo, mo kariota sevinai bonoa raka.”

30 Benamo Filipino kariota sevinai āgana eraga-iaāgato, benamo mo tarima eseāgiato, Isaia peroveta tarimana āgena buka eiaviato-āgoi. Benamo ekirato, “Mani guruāga oiaviani anina ma ribamu ba?”

31 Āgia evaāga-veseto, ekirato, “Au tu kamasi baribani. Mai tu tarima ta na bekira-varaguni vau bariba-maaroni.” Benamo Filipino ekiraiato, ekirato, “Kariotai noma raāekau, be sevigu ai noma tanu.”

32 Āgia na buka nuāganai eiaviato-āgoi toretorena tu maiāga,
 “Āgia tu mamoe kavana āgēgori-iaāgoato, beāgene vaāgi-masea āgana;
 ema āgia tu mamoe natuna kavana āguiri āgefakosi-vaāgirini nai tu, mururi asi
 āgekorini,
 moāgesina kavana āgia maki muruna asi ekeoato.

33 Āgetore-riāgoato e āgena Kota dabarana āgekouato.

Āgena bese tarimari tu
 dei na bekiraāgirini?

Korana āgena maāguri tanobarai tu bema kori.”

34 Eunuko tauna na Filipino enoāgiato, ekirato, “Nokira-varagu, mai peroveta tarimana na tu deikara moāgesi ekiraāgiato? Āgia tauāgena evekiraāgito ba ta ekiraāgiato?”

35 Benamo Filipino na mo toretore āgenana āgena guruāga esinaiato, ema Iesu Varina Namona evaāga-ribaiato.

36 Mo dabara na āgeiaāgato nuāganai, nanu gabuna tai āgeraāgasito. Benamo mo eunuko tauna na Filipino ekiraiato, ekirato, “Noboāge, nanu tu maiāga, kara na au babatisogu elau-āgauani?” [37 Benamo Filipino ekirato, “Bema nuāgamu mabarana āgesi ovaāga-moāgoniani nai tu ba-babatisomuni.” Āgia evaāga-veseto, ekirato, “Oi, nuāga mabarana āgesi avaāga-moāgoniani Iesu Keriso tu Barau Natuna.”]

38 Benamo āgena draiva ekiraiato, kariota nevaāga-ruāgataria, benamo kariota eruāga-tarito. Filipino e eunuko tauri ruarua nanu ai āgeraka-riāgato, benamo Filipino na eunuko tarimana ebabatisoato.

39 Tauri ruarua nanu na āgeraākauto-āgoi nai, Vereāgauka Iaukana na Filipino tu eāgabi-veāgitaiato. Eunuko tarimana na asi ma eāgitaiato, senaāgi āgena iaāgoiaāgo dabara na eiāgato-āgoi roāgo ma iakuna āgesi.

40 Filipino tu Asoto ai ma ea foforito. Monai vanuāga mabarari āgari eiāgato, Vari Namona ea āgobata-iaāgiato-āgoi, eiāgato mo Kaisarea ai eraāgasito.

9

Saulo evetuāamaāgi-kureto

1 Saulo roāgo Vereāgauka āgekorana-iaāgiato-āgoi tarimari vaāga-rakavari e vaāgi-maseri guruāgari evei-gwadato-āgoi ma baruna āgesi. Benamo eiāgato Rubu Veāga verena baregona āgenai,

2 enoāgiato, vevaāga-riba fefana bene torea, Damaseko ai Iuda tarimari āgeri rubu bene viniri āgana. Be, Iesu āgekorana-iaāgiani tauri e vavineri monai bene doāgariri nai tu bene barubaruri, benamo Ierusalema āgana bene āgori-āgenoāgi iaāgomari.

3 Benamo Saulo na Ierusalema eiāguiato ma Damaseko āgana eiāgato. Damaseko vanuāga ekavinaāgiato nuāganai, asikauna mama ta guba na emoreto, āgia enanagi-tariato.

4 Benamo āgia tano ai eketo-tarito, ma garo ta eseāgiato, ekirato, “Saulo, Saulo! Kara dainai au ovaāga-midigu midiguguni e olaiguni?”

⁵ Ĝia evedanaĝito, ekirato, “Vereĝauka, ĝoi tu deikara ei?”

Mo garo evaĝa-veseto, ekirato, “Au tu Iesu, ĝoi na au ovaĝa-rakavaguni tarimagu.

⁶ Senaĝi novariĝisi, vanuĝa baregonai noa raka-toĝa, monai vau tarima ta na bekiramuni kara ma bono vei.”

⁷ Ĝia ĝekavaiato tarimari mabarari ĝeruĝa-tarito, asi ĝeguruĝato, korana garo tu ĝeseĝaĝiato, a tarimana tu asi ĝeĝitaiato.

⁸ Saulo tano na evariĝisito, matana eiaĝiato nai tu, dagara ta asi eĝitaiato. Benamo karona na ĝimantai ĝeĝabito, Damaseko ĝana ĝeĝori-iaĝoato.

⁹ Ĝaro toitoi veĝata matana ebubuto asi eboĝeboĝeto, ema asi eĝaniĝanito e nanu o dagara ta asi eniuato.

¹⁰ Damaseko ai Iesu ekorana-iaĝiato-ĝoi tarimana ta arana Anania, mata-vanaĝi ai Vereĝauka na evaĝa-guruĝiato, ekirato, “Anania!” Ĝia evaĝa-veseto, ekirato, “Ou! Vereĝauka, au maĝegu.”

¹¹ Vereĝauka na evaĝa-guruĝiato, ekirato, “Novariĝisi, be dabara ta arana Roroĝoto Dabarana na noiaĝo. Bono iaĝo Iudas ĝena numa nuĝanai, Taso tarimana ta arana Saulo bonoa vedanaĝi-iaĝia, korana ĝia tu monai moĝa eĝuri-ĝurini.

¹² Ĝia na mata-vanaĝi ai tarima ta arana Anania beĝitaia, beraka-toĝa, ĝimana ĝia iatanai betore-kauri, matana bene fafa ĝana.”

¹³ Anania evaĝa-veseto, ekirato, “Vereĝauka, tarima ĝutuma na ĝegu ĝekiraĝito, mai tau na Ierusalemaj ĝoi ĝemu tarimarima veaĝari tu veĝa rakava kwaikwairi evei-vinirini.

¹⁴ Ema Damaseko ĝana beiaĝoma tu Rubu Veaĝa vereri baregori na maoro ĝeviniato, ĝoi aramu ĝevaĝa-raĝeani tarimari mabarari bene barubaruri e dibura numai bene toreri ĝana.”

¹⁵ Senaĝina Vereĝauka na ekiraiato, ekirato, “Noiaĝo, korana mai tau tu au na varau aĝabi-viriĝiato, bese irauirau tarimari e tanobara vereri baregori ema Isaraela tarimari ĝoirari ai au aragu bene kiraĝia ĝana.

¹⁶ Ema au na bavaĝa-ĝitaiani, ĝia au aragu bakunai tu midigumidigu vovoka roĝo beĝabini.”

¹⁷ Benamo Anania eiaĝoto, numai eraka-toĝato, ema ĝimana Saulo iatanai etore-kauato. Benamo ekirato, “Saulo tarikakagu, Vereĝauka Iesu, ĝia tu maĝana oiaĝomato-ĝoi nai dabara tumanai ĝemu ai eforito tarimana. Ĝia na betuĝugu, korana matamu ma bene fafa ema Iauka Veaĝa na ĝoi bene vaĝa-vonumu ĝana.”

¹⁸ Asikauna dagara ta maĝani-kone ĝunari noĝa matana na eketo-vaĝito, benamo ma eboĝeboĝe-ĝenoĝoito. Moĝa murinai evaisi-raĝeto, benamo babatiso eĝabiato.

¹⁹ Eĝaniĝanito murinai, tauna ma ekokore-ĝenoĝoito.

Saulo Damaseko ai eĝobatato

Ma Saulo Damaseko ai tu ĝaro kotari roĝo ma etanuto, Iesu ĝekorana-iaĝiato-ĝoi tarimari ĝesi.

²⁰ Ĝia asikauna rubu ĝana eiaĝoto, Iesu ea ĝobata-iaĝiato, ekirato, “Iesu tu Barau Natuna.”

²¹ Saulo ĝeseĝaĝiato tarimari mabarari nuĝari ĝefarevaĝito, benamo ĝekirato, “Mai tarima tu Iesu arana ĝekiraĝiani tarimari Ierusalemaj evaĝirini tarimana ene? Ema maĝana beiaĝoma tu mai veĝa sebona uranai bene ĝabiri, be Rubu Veaĝa vereri ĝeri ai bene ĝori-ĝenoĝoi-iaĝori ĝana ene?”

²² Senaĝi Saulo ĝena ĝobata seĝukana tu ebaregoto-ĝoi. Ĝena guruĝai Iesu evaĝa-moĝoniato-ĝoi, moĝoni Iesu tu Keriso, (Barau na ekiraĝi-toreato

vevaḡa-maḡuri tauna). Mo guruḡa Iuda tarimari Damaseko ai ḡetanuto-ḡoi tarimari tu asi ḡeri vaḡa-veve dabarana.

²³ Ġaro ḡutuma ḡekorito murinai, Iuda tarimari ḡevegogoto, Saulo vaḡi-masena dabarana ḡeboioḡaiato;

²⁴ senaḡi kara ḡeboioḡaiato dagarana tu tarima tari na Saulo ḡekiravaraiato, be eribaiato. Boḡi-laḡani vanuḡa barana ḡatama bokari ḡeḡita-ḡaurito-ḡoi, ḡia beḡene vaḡia uranai.

²⁵ Senaḡi boḡi ta Iesu ḡekorana-iaḡiato-ḡoi tarimari na ḡeḡabiato, boseḡai ḡeḡuraiato, benamo vanuḡa maḡuna murikana na ḡetuḡu-riḡoato.

Saulo Ierusalemā ai

²⁶ Saulo Ierusalemāi ea votuto nai tu, ḡena ura Iesu ḡekorana-iaḡiato-ḡoi tarimari ḡesi beḡene tanu-vegogo, senaḡi ḡia mabarari na ḡegari-viniato, korana asi ḡevaḡa-moḡoniato-ḡoi, ḡia tu moḡoni korikori Iesu ḡena mero.

²⁷ Senaḡi Banabas na ea ḡoriato, apostolo tarimari ḡeri ai eḡori-iaḡoato. Ġia na vau ḡeri ekiraḡito, Saulo na Vereḡauka dabarai kamasi eḡitaiato, ema Vereḡauka na eguruḡa-viniato. Ema ekira-vararito, kamasi Saulo tu Damaseko ai ma kokorena ḡesi, asi egarito, Iesu aranai eḡobatato nai.

²⁸ Moḡa lorinai Saulo ḡia ḡesi ḡetanuto-ḡoi ema Ierusalemā mabarānai eḡobatato-ḡoi Vereḡauka aranai ma kokorena ḡesi.

²⁹ Grik garo ai ḡeguruḡato-ḡoi Iuda tarimari ḡesi ḡeguruḡato-ḡoi e ḡeveḡare veḡareto-ḡoi, senaḡi ḡia na tu beḡene vaḡi-masea dabarana ḡevetauato-ḡoi.

³⁰ Tarikaka na mai boioḡa ḡeribaiato nai tu, Saulo Kaisarea ḡana ḡeḡori-variḡoato, ma monana Taso ḡana ḡetuḡu-rakaiato.

³¹ Moḡa lorinai ekalesia mabarana Iudea, Galilea, e Samaria tanori ai maino eḡorato. Ekalesia ḡena kokore ebaregato e Vereḡauka garina ḡeveito-ḡoi ema Iauka Veaḡa na evaḡa-kavarito.

Petero Lida e Iopa ai

³² Petero gabu mabarari ḡari eiaḡoto, nuḡanai tu Lida ḡana maki evariḡoto, Barau ḡena tarimarima veaḡari rakaḡitari.

³³ Monai tarima ta arana Aenea edoḡariato. Ġia kwakuna tu mase ema laḡani imaima toitoi (8) veḡata ḡena genagena bedina na asi evariḡisito.

³⁴ Benamo Petero na evaḡa-guruḡaiato, ekirato, “Aenea, Iesu Keriso na evaḡa-namomuni. Novariḡisi, ḡemu genagena noiokua.” Asikauna Aenea evariḡisito.

³⁵ Monai ḡetanuto-ḡoi Lida e Saron tarimari mabarari na ḡeḡitaiato, benamo Vereḡauka ḡenai ḡeraka-kureto.

³⁶ Iopai Iesu ekorana-iaḡiato-ḡoi vavinena ta arana Tabita etanuto-ḡoi. Grik garo ai arana tu Doreka, anina tu “deer”. Ġia tu veḡa namori ḡutuma eveito-ḡoi, ema asi ḡeri-ḡari tarimari evaḡa-kavarito-ḡoi.

³⁷ Mo negai ḡia tu ekeveto, benamo emaseto. Tauḡanina ḡeguriato, benamo numa tuḡunai daiḡutu tai ḡea toreto.

³⁸ Iopa e Lida fakari tu asi manaḡa. Be Iesu ḡekorana-iaḡiato-ḡoi tarimari Iopai ḡeseḡaḡito Petero tu Lidai nai, tarima ruarua ḡetuḡu-iaḡorito ḡia ḡenai, beḡene noḡia, beḡene kira, “Ġai ḡesi si-iaḡo, asi nokwaibo!”

³⁹ Moḡa lorinai Petero evariḡisito, benamo ḡia ḡesi ḡeiaḡoto. Eraḡasito nai tu, tuḡuna daiḡutuna ḡana ḡeḡori-varaḡeato. Monai vabu mabarari na ḡeruḡa-ḡeḡeraḡiato, benamo koudi e dabuḡa kotari, Doreka na maḡurinai eturirito-ḡoi dagarari, ḡia ḡevaḡa-ḡita-iaḡiato ma taḡiri ḡesi.

⁴⁰ Petero na ġia mabarari daiġutu na etuġu-rosirito, benamo evetui-tarito, eġuri-ġurito. Moġa murinai eboġe-tarito, mase vavinena eġitaiato, benamo ekirato, “Tabita, novariġisi!” Tabita na matana eiaġarito, ma Petero eġitaiato, benamo etanu-vaisito.

⁴¹ Petero na ġimanai eġabito, evaġa-ruġa-vaishiato. Benamo veġabidadama tarimari e vabu ekea-toġarito. Ġia ġema raka-toġato nuġanai, Tabita tu maġuri eruġa-taġoto-ġoi. Benamo Petero na ġeri ai etuġu-iaġoato.

⁴² Mai veġa varina Iopa mabaranai eraga-rovorovoto, benamo tarima ġutuma na Vereġauka ġevaġa-moġoniato.

⁴³ Petero ġaro vovoka Iopai etanuto, boromakau kefiru eġauvei-iaġirito-ġoi tarimana arana Simona ġesi.

10

Petero e Korenelio

¹ Tarima ta arana Korenelio, ġia tu Kaisarea vanuġanai etanuto-ġoi. Ma ġia tu Roma ġeri vetari tarimari sinau sebna (100) eġorikaurito-ġoi tarimana. Ġia na vetari doġorona arana ġekiraġiato-ġoi tu “Itali ġeri Vetari Doġorona” eġita-ġaurito-ġoi.

² Ġia e ġena numa tarimari mabarari ġesi tu Barau ġekorana-iaġiato-ġoi ema Barau garina ġeveito-ġoi. Ġia na asi ġeri-ġari Iuda tarimari evaġa-kava baregorito-ġoi, ema vanaġivanaġi eġauġauto-ġoi Barau ġenai.

³ Lavilavi ta, horaġauna 3 koloko rekenai ġia emata-vanaġito, Barau ġena aneru ta eġita-korikoriatu, ema raka-toġato, benamo ġia evaġa-guruġaiato, ekirato, “Korenelio!”

⁴ Benamo ma garina ġesi Korenelio na mo aneru eġita-karakaraiato, benamo ekirato, “Vereġauka, kara?”

Aneru na evaġa-veseato, ekirato, “Ġemu ġuriġuri e ġemu vevaġa-kava asi ġeri-ġari tarimari ġeri ai tu Barau na eġabi-raġerito, ema ġia na etuġamaġirini.

⁵ Toma, tau kotari Iopa ġana notuġu-iaġori, be tau ta arana Simona, ġia arana ta tu Petero, beġenea ġoria.

⁶ Ġia tu Simona, boromakau kefiru eġauvei-iaġirini tarimana ġesi etanuni; ġena numa tu kone rikinai.”

⁷ Mo evaġa-guruġaiato aneruna na eraga-kwaneato, benamo Korenelio na ġena vetuġunaġi tarimari ruarua ema ġena vetari tarimana ta ekea-iaġomarito. Ġena vetari tarimana moġa tu Barau ekorana-iaġiato-ġoi tarimana e ġia tu vanaġivanaġi Korenelio sevinai ġia vetuġunaġina ġeiaġo-viniato-ġoi tarimana ta.

⁸ Kara eġorato dagarari mabarari Korenelio na ekira-vararito, benamo Iopa ġana etuġu-iaġorito.

Petero ġena mata-vanaġi

⁹ Ma elaġanito, ġia tu dabara na roġo ġeiaġoto-ġoi, Iopa ġekavi-naġiato, ġaroġotai Petero tu numa tuġunai eraġekauto, nea ġuriġuri ġana.

¹⁰ Ġia varau evitoato, benamo ġena ura tu neġaniġani. Ma ġaniġani tu roġo ġerovinarito-ġoi nuġanai, ġia emata-vanaġito.

¹¹ Ġia na guba evekeoto eġitaiato, ema dagara ta dabuġa baregona kavana, daigunina vasivasi emariġoto-ġoi ġia ġenai, noġa moġo ġetuġu-mariġoato-ġoi tanobara ġana.

12 Ĝia emariĝoto-ĝoi nuĝanai tu maĝuri dagarari irauirau mabarari, kwakuri vasivasi ĝerakani dagarari, e ĝedarani dagarari, ema guba na ĝerovoni manuri.

13 Benamo garo ta na ekiraiato, ekirato “Petero, novariĝisi, be novaĝiri, noĝaniri!”

14 Senaĝi Petero evaĝa-veseto, ekirato, “Vereĝauka, asiĝina ĝinavaĝi! Rakava e asi veiareva dagarari ta au na roĝosi roĝo bara ĝania.”

15 Mo garo na ma evaĝa-guruĝa ĝenoĝoiato ekirato, “Barau na eiarevarito dagarari ta rakavana asi bono kiraĝi.”

16 Vaĝa-toitoi moĝesi eĝorato, benamo mo dabuĝa asikauna tu guba ĝana ma eĝabi-varaĝeato.

17 Petero na mo ĝena mata-vanaĝi ai eĝitarito dagarari anina roĝo etuĝamaĝi-vetaurito-ĝoi nuĝanai, Korenelio ĝena vetuĝunaĝi tarimari tu ĝevotuto, ma ĝeribato Simona ĝena numa tu ainai. Benamo ĝeiaĝoto mo numa ĝatama bokana korana ĝoiranai ĝea ritoĝo-tarito.

18 Benamo ĝekeato e ĝevedanaĝito, ĝekirato, “Simona, arana ta ĝekiraĝiani Petero, tu mainai etanuni ba?”

19 Petero na tu roĝo mo mata-vanaĝi anina etuĝamaĝi-vetauato-ĝoi nuĝanai, Iauka Veaĝa na evaĝa-guruĝaiato, ekirato, “Noseĝaĝi, ĝoi tu tarima toitoi na ĝevetaumuni.

20 Be novariĝisi, noraka-riĝo, ĝia ĝesi boĝono iaĝo. Asi bono ĝoiĝi, korana au na atuĝurito bene.”

21 Petero eraka-riĝoto mo tarima ĝeri ai, benamo ekirato, “Ĝovetauani tauna tu au maiĝegu. Kara dainai boĝo iaĝoma?”

22 Ĝia ĝevaĝa-veseto, ĝekirato, “Ĝai tu vetari tarimari sinau sebona (100) eĝori-kaurini tarimana arana Korenelio na betuĝuma. Ĝia tu vei-iobukaiobuka e Barau garina eveini tarimana, ema Iuda tarimari mabarari na maki ĝegubakau-baregoani. Ĝia tu Barau ĝena aneru ta na ekiraiato, ĝoi bene keakaumu, ĝena numa ĝana bono iaĝo, ema ĝoi na kara bokiraĝirini bene seĝaĝiri.”

23 Benamo Petero na mo tarima eĝabi-raĝerito ĝena numai, monai ĝegenato.

Petero tu Korenelio ĝena numa ĝana eiaĝoto

Boĝiboĝi ai ĝevariĝisito, benamo Petero ĝia ĝesi ĝeiaĝoto, ema tarikaka kotari Iopa na maki ĝia ĝesi ĝeiaĝo-sebonato.

24 Ĝia ĝeiaĝoto, dabara tumanai ĝea genato, ma elaĝanito vau Kaisareai ĝevotuto. Korenelio na tu ĝia enari-taĝorito-ĝoi, garagarana e ĝatana maki ekea-vegogorito ĝena numai.

25 Petero eraka-toĝato nuĝanai, Korenelio na edoĝariato, benamo kwakuna koranai evetui-tarito ma etutuĝutari-viniato.

26 Senaĝi Petero na evaĝa-ruĝa-vaisiato, ekirato, “Novariĝisi, au maki tarimarima moĝo.”

27 Numa nuĝanai ĝeraka-toĝato-ĝoi nai, Petero na Korenelio evaĝa-guruĝaiato-ĝoi. Ma numa nuĝanai tu tarimarima ĝutuma vegogotaĝo edoĝaririto.

28 Benamo ĝia na evaĝa-guruĝarito, ekirato, “Ĝomi tauĝemi maki ma ribami ginikau, ĝai ĝema taravatu ekirani, Iuda tarimana ta irau bese tarimana ta ĝesi asi bene tanu-vegogo o asi bene raka-ĝitaia maki, taravatu. Senaĝi Barau na bevaĝa-ĝitagu, au na tarima ta asi bana kiraĝia ĝia tu rakava o asi veiareva.

²⁹ Moġa lorinai boġo keakaugu nai, baiaġoma moġo, asi bakira-sirivaġi. Be nadanaġimi, au tu kara dainai boġo keakaugu?”

³⁰ Korenelio ekirato, “Ġaro vasivasi varau beġe iaġo, au tu ġegu numai aġauġauto-ġoi horaġauna 3 koloko lavilavi rekenai, maitoma horaġauna kavana. Benamo asikauna dabuġa kurokuro lelevaġina na evedabuġato tarimana ta ġoiragu ai eruġa-tarito,

³¹ benamo ekirato, ‘Korenelio! Barau na ġemu ġauġau beseġaġia e vevaġa-kava veġari asi ġeri-ġari tarimari ġeri ai etuġa-maġirito.

³² Iopa ġana novetuġu-iaġo, Simona, ġia arana ġekiraġiani Petero ġetoni, beġenea kiraia, be bene iaġoma. Ġia tu Simona, boromakau kefiru eġauvei-iaġirini tarimana ġena numai etanuni kone rikinai.’

³³ Moġa lorinai asikauna vetuġumu araga-veito, ema bovei-nauġa, veġa namo taumu, korana boiaġoma bene. Toma ġai mabarama tu Barau ġoiranai maiġema, ma Vereġauka na bevaġa-naġimu guruġari mabarari baġana seġaġiri ġana.”

Petero ġena ġobata

³⁴ Benamo Petero ġena guruġa esinaiato, ekirato, “Au toma bama riba-maoro, Barau na tarimarima mabarari tu eġabiraġe-ilailarini.

³⁵ Bese mabarari nuġari ai tu deikara na ġia garina eveini, ema veġa iobukari eveini tarimana moġo ġia na eġabi-raġeani.

³⁶ Barau na Isaraela tarimari ġeri ai etuġu-iaġomaiato varina tu maiġa, mo tu maino varina Iesu Keriso ġenana maino varina namona efluato-ġoi. Iesu Keriso tu tarima mabarari ġeri Vereġauka.

³⁷ Ġomi ma ribami Iudea nuġanai kara eġorato, Galilea na evesinato. Mo tu Ioane na babatiso eġobata-iaġiato murinai.

³⁸ Iesu, Nasareta tarimana varina, ġomi ma ribami, kamasi Barau na Iauka Veaġa e seġuka ġia iatanai ebubu-riġoato. Ġia tu gabu mabarari ġari eiaġoto, veġa namori eveirito-ġoi, ema Diabolo ġena seġuka na eġabirito tarimari mabarari evaġa-maġuririto-ġoi, korana Barau tu ġia ġesi.

³⁹ Ġai tu ġia na Iuda e Ierusalem tanori ai eveirito-ġoi dagarari mabarari ġavaġa-moġonirini tarimama. Ġia tu satauro ai ġeikoko-kauato nai ġevaġa-maseato.

⁴⁰ Senaġina Barau na ġaro vaġa-toitoinai (3) evaġa-variġisi ġenoġoiato ema evaġa-foforiato beġene ġitaia ġana.

⁴¹ Ġia tu tarimarima mabarari na asi ġeġitaiato, senaġi ġevaġa-moġoniani tarimari, mo tu Barau na eviriġi-quinerito tarimari na moġo ġeġitaiato. Ma moġeri tarimari tu ġai maiġema. Ġia evariġisi-ġenoġoito murinai, ġai tu ġia ġesi ġaġaniġani-vegogoto e ġaniuniu-vegogoto.

⁴² Ġia na evaġa-naġimato, tarimarima ġeri baġana ġobata e baġana kiraġi-foforia, ġia tu Barau na eġabi-hidiato, maġuri tarimari e mase tarimari ġeri vevaġa-maoro tarimanai evaġa-iaġoato.

⁴³ Peroveta tarimari mabarari na ġia ġekiraġi-foforiato-ġoi, ġekirato-ġoi, ġia beġe vaġa-moġoniani tarimari mabarari tu ġia arana seġukanai Barau na ġeri rakava betuġamaġi-fitoġarini.”

Irau bese tarimari Iauka Veaġa ġeġabiato

⁴⁴ Petero roġo eguruġato-ġoi nuġanai, Barau ġena guruġa ġeseġaġiato-ġoi tarimari mabarari iatari ai Iauka Veaġa eraka-riġoto.

⁴⁵ Iuda tarimari Iesu ġevaġa-moġoniato-ġoi ema Petero ġesi Iopa na ġeiaġomato tarimari tu ġeġaba-rakavato, korana Barau na Iauka Veaġa irau bese tarimari maki evinirito iatari ai ebubu-riġoato.

⁴⁶ Korana ġeseġaġirito garo irauri ai ġeguruġato-ġoi, ema Barau ġevaġa-raġeato. Benamo Petero ekirato,

⁴⁷ mai tarimarima na tu Iauka Veaġa varau beġe ġabia, ġita na taġabiato kavana. Be, nanu nuġanai babatiso beġene ġabia ġana tu deikara na bekira-ġoiiani?

⁴⁸ Moġa lorinai ġia na ekirarito, Iesu Keriso aranai beġene babatisori. Benamo ġia na Petero ġenoġiato, ġaro kotari ġia ġesi roġo ma beġene tanu.

11

Petero ġena guruġa-fofori Ierusalem a

¹ Apostolo e tarikaka Iudea tanonai mabarari ġeseġaġito, irau bese tarimari na maki Barau ġena guruġa varau ġeġabi-raġeato.

² Benamo Petero Ierusalem a ġana evaraġeto nai tu, Iesu ġevaġa-moġoniato-ġoi tarimari, senaġi tauġaniri kefiru tu ġelama-vaġirito, moġeri na ġeġau-fitoġaiato,

³ ġekirato, “Ġoi tu kefiru asi ġelama-vaġirini irau bese tarimari ġeri numai oa raka-toġato, ema ġia ġesi oa ġaniġani-vegogoto!”

⁴ Benamo Petero na vari mabarana ġeri ekiraġito, kamasi evesinato mo magona. Ekirato,

⁵ “Au tu Iopa vanuġana baregonai aġuriġurito-ġoi, nuġanai amata-vanaġito. Aboġeto, dagara ta dabuġa baregona kavana, daigunina tu vasivasi (4), guba na emariġoto-ġoi, noġa moġo ġetuġu-mariġoato-ġoi, ġoiragu ai ema vetore-tarito.

⁶ Aboġe-ġurato nai tu, maġuri dagarari irauirau, tanobarai kwakuri vasi-vasi na ġerakani bureġari, e boġai ġetanuni bureġari, e ġedarani dagarari, ema guba na ġerovoni manuri aġitarito.

⁷ Benamo garo ta aseġaġiato, ekirato, ‘Petero, novariġisi, be novaġiri e noġaniri!’

⁸ Senaġi au akirato, ‘Vereġauka, asiġina ġinavaġi, rakava e asi veiareva dagarari ta au murugu na roġosi beġere raka-toġa.’

⁹ Mo garo guba na ma eguruġa-ġenoġoito, ekirato, ‘Barau na eiarevarito dagarari tu rakavari asi bono kiraġiri.’

¹⁰ Vaġa-toitoina moġesi eġorato, benamo dagara mabarari guba ġana ma eġabi-varaġerito.

¹¹ Mo horaġauna sebonai tarima toitoi au atanuto-ġoi numanai ġeraġasito. Ġia tu Kaisarea na ġetuġurito au ġegu ai.

¹² Benamo Iauka Veaġa na ekiraguto, ġia ġesi bana iaġo, asi bana ġoiġi. Mai tarikaka imaima sebona (6) maki au ġesi Kaisarea ġana ġaiġoito, ema mabarama Korenelio ġena numai ġaraka-toġato.

¹³ Ġia na ġema ekiraġiato, kamasi aneru ta, ġia ġena numai eforito eġitaiato, ema ekiraiato, ekirato, ‘Iopa ġana novetuġu-iaġo, Simona, ġia arana ta tu Petero, beġenea kiraia, bene iaġoma.

¹⁴ Ġia na guruġa tari ġemu bekiraġirini, benamo mo guruġa ġerina Barau na ġoi ema ġemu numa tarimari mabarari bevaġa-maġurimini.’

¹⁵ Au na guruġa vau asinaiato nuġanai, Iauka Veaġa emariġoto ġia iataru ai, Pentekoste ġaronai ġita iataru emariġoto kavana.

¹⁶ Benamo Vereġauka na kara ekiraġiato dagarana atuġamaġi-doġariato, ekirato, ‘Ioane tu nanu na ebabatisoto-ġoi, senaġina ġomi tu Iauka Veaġa na bebabatisomini.’

17 Bema Barau na mo varevare sebona moĝo, ĝita Vereĝauka Iesu Keriso tavaĝa-moĝoniato nai evinirato varevarena, irau bese tarimari maki evinirito nai tu, au tu deikara, be au na Barau bakira-ĝoiani?”

18 Ĝia na mo guruĝa ĝeseĝaĝiato nai, ĝeri guruĝa barubaru ĝevaĝa-magoato, benamo Barau ĝevaĝa-raĝeato, ĝekirato, “O kato, irau bese tarimari maki Barau na vetuĝamaĝi-kure dabarana bevaĝa-ĝitari, maĝuri beĝene ĝabia ĝana.”

Ekalesia evesinato Antioka ai

19 Stefano emaseto nai, ekalesia vaĝa-midigumidiguna e lai-lausilausina eĝorato, benamo veĝabidadama tarimari ĝevaĝa-raga rovorovorito. Ĝia kotari ĝeiaĝoto mo Foenikia, Saipras e Antioka ai ĝea raĝasito. Monai Iuda tarimari ĝeri ai moĝo Iesu varina ĝeĝobata-iaĝiato-ĝoi.

20 Senaĝi veĝabidadama tarimari kotari, Saipras e Kurene tarimari tu Antioka ĝana ĝeiaĝoto, Grik tarimari ĝeri ai maki vari ĝea fiuato, Iesu Vereĝauka Varina Namona ĝeĝobata-iaĝiato-ĝoi.

21 Vereĝauka seĝukana tu ĝia ĝesi, be tarimarima ĝutuma-bara Vereĝauka ĝevaĝa-moĝoniato ema ĝevetuĝamaĝi-kureto.

22 Ierusalemema ekalesiari na mai vari ĝeseĝaĝiato, benamo ĝia na Banabas Antioka ĝana ĝetuĝu-iaĝoato.

23 Ĝia Antiokai eraĝasito, benamo Barau ĝena varevare-bara tarimarima ĝeri ai eĝitaiato nai, eiaku-rakavato. Ma mabarari elaunaĝirito, moĝoni ai Vereĝauka beĝene korana-iaĝia ma nuĝari mabarari ĝesi.

24 Banabas tu tarima namona, Iauka Veaĝa e veĝabidadama na evonuto. Ema tarimarima ĝutuma-bara Vereĝauka ĝena tarimarimai ĝeiaĝoto.

25 Benamo Banabas Taso ĝana eiaĝoto, Saulo vetau-vetauna.

26 Edoĝariato, benamo Antioka ĝana eĝori-iaĝoato. Monai mo laĝani sebona, tauri ruarua ekalesia ĝesi ĝevevogoto-ĝoi e tarimarima ĝutuma-bara ĝevaĝa-ribarito-ĝoi. Iesu ĝekorana-iaĝiato-ĝoi tarimari tu Antioka vanuĝanai vau ĝekiraĝirito “Christian”.

27 Mo ĝaro ai peroveta tarimari kotari Ierusalemema na Antioka ĝana ĝevariĝoto.

28 Ta ĝia fakari ai arana tu Agabo. Agabo evariĝisito, Iauka na evaĝa-ribaiato ilailanai tanobara mabaranoi doĝe baregona beĝorani varina efiuguineato. Mo doĝe baregona tu Klaudio ĝena veĝitaĝau ĝarori ai eĝorato.

29 Iesu ĝekorana-iaĝiato-ĝoi tarimari na ĝeura-iaĝiato, ĝia tata ĝeri doĝari ilailari ai tarikakari Iudeai ĝeri ai ĝeri varevare dagarari kotari beĝene tuĝu-iaĝo, beĝene vaĝa-kavari ĝana.

30 Mo veiĝa tu ĝeveiato, Banabas e Saulo ĝeri ai ĝeri moni ĝetuĝukauto, rubu ĝitataĝona tarimari beĝene viniri ĝana.

12

Ekalesia vaĝa-midigumidiguna e lai-lausilausina ebaregoto-ĝoi

1 Moĝeri ĝaro ai Kini Heroda na ekalesia tarimari kotari eĝabi-taririto, bene vaĝa-midigu midiguri ĝana.

2 Iakobo (o Iames), Ioane kakana, tu baĝa na debana ebasi-ĝutuato.

3 Heroda na Iuda tarimari eĝitarito, mo veiĝa ĝeiaĝo-iaĝiato nai tu, Petero maki ma ea ĝabi-tariato. Mo tu asi etubuni faraona verekona ĝarori ai eĝorato.

⁴ Petero eḡabi-tariato, benamo dibura numai etoreato. Monai vetari tarimari gabanana imaima sebona (16) etorerito, vasiri vasiri ai evaḡa-ruḡarito vauro, Petero ḡeḡita-ḡauato. Heroda ḡena ura tu Pasova murinai vauro, tarimarima ḡoirari ai bene ḡori-rosia ema bene vaḡa-kotaia.

⁵ Moḡa lorinai Petero tu dibura numai ḡeḡita-ḡauato-ḡoi, a ekalesia tu Barau ḡenai ḡeḡauḡau-kokore kokoreto-ḡoi Petero ḡena.

Aneru na Petero evaḡa-maḡuriato

⁶ Boḡi, ma belaḡanini tu Heroda na tarimarima ḡoirari ai Petero beḡori-rosiani, Petero tu seini na ḡebarubaruato, benamo vetari tarimari ruarua vekaravari ai egenato, ema ḡatama-boka ḡitaḡauna vetari tarimari na maki ḡatama-boka ḡenari-taḡoato-ḡoi.

⁷ Benamo Vereḡauka ḡena aneru ta efororito, Petero sevinai eruḡa-tarito, ema mama ta dibura numa nuḡanai enanagi-tariato. Mo aneru na Petero ḡabana ebota-karaiato, benamo evaḡo-tataḡaiato, ma ekiraiato, ekirato, “Ragavei, novariḡisi!” Benamo seini Petero ḡimana na ḡeketo-vaḡito.

⁸ Benamo aneru na evaḡa-guruḡaiato, ekirato, “Ḡemu gabaḡau nobarutaria, ema ḡemu tamaka noveiri.” Benamo Petero na eveirito. Aneru ma ekirato, “Ḡemu koudi na noveseḡo, be au murigu na noiaḡoma.”

⁹ Petero ḡia murinai erakato mo, dibura numa na eraka-rosito. Senaḡi ḡia tu asi ribana, mo aneru na kara eveiato-ḡoi tu moḡoni. Ḡia matoru ekirato tu, emata-vanaḡini etato-ḡoi.

¹⁰ Ḡatama-boka ḡitaḡauna tarimari ḡeruḡato gabuna ta ḡeraka-vanaḡiato, ma vaḡa-ruaruana ma ḡeraka-vanaḡiato, ḡeiaḡoto mo, auri ḡatama-bokanai ḡea raḡasito. Moḡa tu vanuḡa barana rakarosina ḡatama-bokana. Mo ḡatama-boka tu tauḡena moḡo ḡia ḡeri evekeoto, benamo ḡeraka-rosito. Dabara na ḡeraka-variḡoto-ḡoi nuḡanai, asikauna aneru na Petero eraga-kwaneato.

¹¹ Monai vau Petero eribato ḡia ḡenai kara eḡorato, benamo ekirato, “Au toma moḡoni bama riba, Vereḡauka na ḡena aneru betuḡua tu, Heroda ḡimana na, ema Iuda tarimari na au ḡegu ai kara ta beḡene veia ḡetato-ḡoi ḡenana bema vaḡa-maḡurigu.

¹² Mo veiḡa etuḡamaḡi-fakaiato, benamo Maria ḡena numa ḡana eiaḡoto. Maria tu Ioane Mareko sinana. Monai numa nuḡanai tu tarimarima ḡutuma ḡevegogoto, ḡeḡauḡauto-ḡoi.

¹³ Petero numa murikana ḡatama bokanai esekeseketo, benamo vetuḡunaḡi ḡuiatona ta arana Roda eiaḡoto, nea ḡitaia ḡana.

¹⁴ Senaḡi ḡia na Petero garona eseḡaḡi-leaiato, benamo iaku na evaḡa-vonuato, benamo ḡatama-boka tu asi ekeo-fakaiato, a ḡia tu eraga-ḡenoḡoito, ea kirarito, Petero tu murikai eruḡa-taḡoni.

¹⁵ Ḡia na ḡekiraiato, ḡekirato, “Ḡoi tu bebabomu ba!” Senaḡi ḡia eḡiḡiraḡeto-ḡoi, ekirato, “Moḡoni, Petero tu murikai eruḡa-taḡoni.” Benamo ḡekirato, “Mani tu ḡia ḡena aneru!”

¹⁶ Senaḡina Petero tu roḡo esekeseke-ḡiḡiraḡeto-ḡoi. Benamo ḡeiaḡoto, ḡatama-boka ḡea keo-fakaiato nai tu, Petero ḡeḡitaiato, ḡeḡaba-rakavato.

¹⁷ Petero ḡimana na ekira-ḡoirito asi beḡene guruḡa, benamo Vereḡauka na kamasi dibura numa na eḡori-rosiato ḡeri ekiraḡito. Ḡia na evaḡa-guruḡarito, ekirato, “Iakobo (o Iames) e tarikaka mabarari ḡeri mai vari boḡono kiraḡia.” Benamo ḡia tu erakato, gabu ta ḡana ma eiaḡoto.

¹⁸ Boḡiboḡi, vetari tarimari fakari ai tu daradara baregona eḡorato; ḡevedanaḡi-vedanaḡito, ḡekirato, “Petero tu kamasi bevei?”

¹⁹ Heroda na gabu mabarana evetau-ginikauato, senaġi Petero asi eġoitaġoato. Benamo Petero ġeġita-ġauato tarimari evaġa-kotarito murinai, ġena vetari tarimari o soldia ekirarito beġenea vaġi-maseri. Moġa murinai Heroda na Iudea eraga-kwaneato, ma Kaisareai ġaro tari ea tanuto.

Heroda emaseto

²⁰ Heroda tu Taia e Sidono tarimari ebaruvini-rakavarito; moġa lorinai Taia e Sidono tarimari ġeveġabi-vegogoto, ma Heroda ġea ġitaiato. Senaġi guine, Blasto, Heroda ġena ġena-daiġutuna ġitataġona tarimana ġesi roġo ġeveġatato, ġevaġa-maranaiato, ema ġia rekeri ai roġo ekauto. Moġa murinai vauro ġeiaġoto, Heroda ġenai maino ġea noġiato, korana ġia ġeri tanobara ġaniġanina tu Heroda ġena tanobarai ġeġabito-ġoi.

²¹ Benamo ekiraġi-toreato ġaronai, Heroda na ġena vere dabuġana eveiato, benamo ġena teronai ea tanukauto vau, tarimarima eguruġa-vinirito.

²² Benamo tarimarima ġeġabato, ġekirato, “Mai tu barau ta garona, dia tarimarima garona.”

²³ Mo horai Vereġauka ġena aneru ta na Heroda ekwariato, korana ġia na mo guruġa eseġaġiato nai, Barau tu asi evaġa-raġeato. Ġia tu ġuioġuio na ġeġaniato, emaseto.

²⁴ Senaġi Barau ġena guruġa tu ebaregato e eraga-rovorovoto.

²⁵ Banabas e Saulo tu ġeri ġauvei ġevaġa-koriato, benamo Ierusalemna na ġeġenoġoito; Ioane Mareko maki ġeġori-kauato.

13

Banabas e Saulo ġeġabi-viriġirito e ġetuġurito

¹ Antioka ekalesiana nuġanai tu peroveta e vevaġa-riba tarimari kotari. Arari tu Banabas; Simeona, arana ta tu Niga; Lukio, Kurene tarimana; Manaen, ġia tu Gavana Heroda ġesi ġevaġa-baregorito; e Saulo.

² Ġia na Vereġauka ġetoma-rakariġo viniato-ġoi e ġeġani-veaġato-ġoi nuġanai, Iauka Veaġa na ekirarito, ekirato, “Banabas e Saulo tu au ġegu boġono ġabi-ġerevaġiri, korana au na bakeari, ġegu ġauvei ta beġene veia ġana.”

³ Benamo ġia ġeġani-veaġato e ġeġuriġurito murinai, ġimari ġia iatari ai ġetore-kaurito, benamo ġetuġu-rakarito.

Saipras ai

⁴ Iauka Veaġa na Banabas e Saulo etuġurito, benamo tauri ruarua kone vanuġana Seleukia ġana ġevariġoto. Seleukia na tauri ruarua bouti ai ġeraġeto, benamo Saipras motumotu ġana ġevanaġito.

⁵ Banabas ma Saulo Salami ai ġevotuto nai, Barau ġena guruġa Iuda tarimari ġeri rubu tari ai ġea ġobata-iaġiato. Ioane Mareko maki ġia ġesi, ġia tauri ruarua evaġa-kavarito-ġoi.

⁶ Tauri ruarua na Saipras motumotu mabarana ġeraka-vanaġiato, ġeiaġoto Pafo vanuġanai ġea raġasito. Monai Iuda ġeri ġora e peroveta gofaġofa tarimana ta arana Bar-Iesu ġea doġariato.

⁷ Ma Bar-Iesu tu motumotu verena, ma iaunega rakavarakava tarimana arana Seregio Paulo ġatana. Mo vere na Banabas e Saulo ekea-iaġorito ġia ġoirana ġana, korana ġena ura tu Barau ġena guruġa bene seġaġia.

⁸ Senaġi mo ġora tarimana Elima, (Bar-Iesu arana ta tu Elima), na ġeri guruġa ekira-fitoġarito, ġena ura vere na Iesu asi bene vaġa-moġonia.

⁹ Benamo Saulo, arana ta tu Paulo, Iauka Veāga na evaāga-vonuato, benamo Elima eģita-karakaraiato.

¹⁰ Benamo ekirato, “Ĝoi tu Diabolo natuna, ema veīga iobukaiobukari mabarari tu ĝoi na ovetari-vinirini! Ĝoi tu ĝofaĝofa e rakava mabarari na ovonuto. Vereĝauka ĝena veīga iobukaiobukari ĝofaĝofai bono vaāga-iaĝori uranai ovededegwani. Mo veīga tu aitoma vau bovaāga-dokoani?”

¹¹ Noseĝaĝi! Toma Vereĝauka ĝena seĝuka ĝoi ĝemu ai befoforini, matamu bebubuni, ma laĝani mamana asi boĝitaiani, beiaĝoni mo, ĝaro ta.”

Asikauna Elima tu mukuna na matana eĝabi-ĝauato, benamo eraka-ĝeĝeraĝi ĝeĝeraĝito, ĝena ura ta na ĝimanai bene ĝabi, ma bene ĝori-kaua.

¹² Mo vere na kara eĝorato dagarana eĝitaiato nai, Vereĝauka evaāga-moĝoniato. Ema eĝaba-rakavato Vereĝauka ĝena vevaāga-riba guruĝari ai.

Antioka vanuĝana Pisidia ai

¹³ Paulo ma karona ĝesi Pafo ĝeraga-kwaneato, bouti na Pega ĝana ĝeiaĝoto. Pega tu Pamfilia nuĝanai. Pegai benamo Ioane Mareko na Paulo e Banabas eraga-kwanerito, ĝia tu Ieruselema ĝana ma eĝenoĝoi-iaĝoto.

¹⁴ Pega na kwakuri na Antioka ĝana ĝeiaĝoto. Antioka tu Pisidia tanonai. Sabadi ai tu Iuda tarimari ĝeri rubu ai ĝeraka-toĝato, bena ĝetanu-tarito.

¹⁵ Mose ĝena taravatu e peroveta tarimari ĝeri toretore ĝeivirito murinai, rubu ĝitaĝauna tarimari na noĝinoĝi ĝetuĝu-iaĝoato ĝia tauri ruarua ĝeri ai, ĝekirato, “Tarikaka, bema ma ĝemi vevaāga-gwaĝiĝi guruĝari mai tarimarima ĝeri ai nai tu, ĝai ĝaurani, ĝeri ĝokiraĝi.”

¹⁶ Paulo evariĝisito, ĝimana na eiave-taririto, benamo ekirato, “Isaraela taumi e irau bese tarimari fakari ai Barau garina ĝoveini tarimami, ĝoseĝaĝi!

¹⁷ Mai Isaraela tarimari ĝeri Barau na ĝai senema eĝabi-viriĝirito, ema ĝia na evaāga-ĝutumarito, Aigupito tanonai ĝetanuto-ĝoi nai. Ma Barau ĝena seĝuka baregona na Aigupito tanona na eĝori-rosirito,

¹⁸ ema laĝani gabana vasivasi (40) kavana tano fakanai ĝia ĝeri ai evevaāga-gwaĝiĝito.

¹⁹ Ĝia na Kanana tanonai bese imaima ruarua (7) tarimarimari evaāga-mou-taririto. Ma ĝeri tano tu eĝabiato, Isaraela tarimari evinirito e ĝeri tanobarai evaāga-iaĝoato.

²⁰ Mo dagara mabarari tu laĝani sinau vasivasi ma gabana imaima (450) kavana nuĝanai ĝeĝorato. Moĝa murinai ĝia na vevaāga-roroĝoto tarimari evinirito, eiaĝoto mo peroveta tarimana Samuela ĝena veĝitaĝau laĝanina.

²¹ Ma ĝeri vere o kini ta beĝene ĝabia noĝinoĝina ĝeveito nai, Barau na Saulo evinirito. Ĝia tu Kisa natuna, mo tu Beniamina ĝena doĝoro tarimana. Saulo na laĝani gabana vasivasi (40) eģita-ĝaurito.

²² Saulo kini dagina na eĝabi-vaĝiato murinai, Barau na Davida eĝabiato, Isaraela ĝeri kini ai evaāga-iaĝoato. Barau na Davida tu maĝesina ekiraĝi-foforiato, ekirato, ‘Au na Davida, Iese natuna, badoĝaria, ĝia tu au nuĝagu na euravini-rakavaiani tarimana. Ĝia na au ĝegu ura veīĝari mabarari beveirini.’

²³ Barau na ĝena guruĝatore ilailanai, Davida besena na, Isaraela tarimari ĝeri vevaāga-maĝuri tarimana etuĝu-mariĝoato. Mo vevaāga-maĝuri tarimana tu Iesu.

²⁴ Iesu roĝosi roĝo bere ĝauvei nuĝanai, Ioane na Isaraela tarimari mabarari eĝobata-vinirito, ekirarito, ĝeri rakava ĝerina beĝene vetuĝamaĝi-kure, benamo babatiso beĝene ĝabia.

²⁵ Ioane na ĝena ĝauvei dori evaāga-koriato nuĝanai, tarimarima ekirarito, ekirato, ‘Ĝomi ĝotuĝa-maĝini au tu dei? Au tu dia ĝomi na ĝovaāga-nogaiani

tarimana. Senaġi ġoboġe! Ġia tu au murigu na mani eiaġomani, ma au tu asi ilaila ġia kwakuna tamakari bakoki-vaġirini.'

²⁶ Tarikakagu, Aberahamo besena, ema ġomi irau bese fakari ai Barau garina ġoveini tarimami: Mai vevaġa-maġuri guruġana tu ġita ġera etuġua-iaġomaiato.

²⁷ Ierusalemata tarimari ma ġeri vere ġesi Iesu asi ġeġita-leaiato, ema Iesu, peroveta tarimari ġeri guruġa Sabadi mabarari ai ġeivavirito-ġoi, tu asi ġetuġamaġi-fakarito. Moġesina naima ġia na Iesu vaġi-masena guruġana ġekiraġito nai, peroveta tarimari ġeri guruġa ġevaġa-moġonirito.

²⁸ Oba, vaġi-masena korana ta tu asi ġedoġariato, senaġina Pilato ġenoġiato, bene vaġi-masea ġetato.

²⁹ Buka Veaġai ġia ġekiraġiato guruġari mabarari ġeveirito murinai, satauro tuġuna na ġeġabi-riġoato, benamo fore ġekwaiato kouġana garanai ġea toreato.

³⁰ Senaġi Barau na mase na ma evaġa-variġisi ġenoġiato,

³¹ ġia ġesi Galilea na Ierusalemata ġana ġeiaġoto-ġoi tarimari na ġaro vovoka ġeġitaiato. Ma ġia toma tu Isaraela tarimari ġeri ai Iesu ġekiraġi-foforiani.

³² Ema Barau na ġita senera kara ekiraġitore-vinirito Varina Namona ġomi ġakira-varamini.

³³ Mo kiraġitore tu Barau na ġita, ġia tuburi, ġera evaġa-moġoniatu, mo tu ġia na Iesu mase na ma evaġa-variġisi ġenoġiato nai. Salamo vaġa-ruaruanai etoreato ilailana, ekirani,

'Ġoi tu au Natugu;
toma au tu ġoi Tamamu ai baiaġo.'

³⁴ Barau na moġoni mase na evaġa-variġisi ġenoġiato e asi ma beġenoġoini gara ġana, benamo beborāġani. Barau na tu maġesi ekiraġiato, ekirato,

'Davida ġena akiraġi-torerito,
vevaġa-namo veaġari e moġoniri tu ġomi bavini mini.'

³⁵ Ema Salamo ta nuġanai ma ekirani,

'Ġoi ġemu tarima veaġana tu
asi beborāġani,
korana tu asi bene ġora otato.'

³⁶ Davida ġena ġuru ai Barau ġena vetuġunaġi eiaġo-vinito-ġoi nai emaseto, benamo senena seviri ai ġeguriato, ma tauġanina tu eborāġato.

³⁷ Senaġi Iesu, Barau na mase na evaġa-variġisi ġenoġiato tarimana, tu tauġanina asi eborāġato.

³⁸ Moġa lorinai, tarikakagu mabarami, au aurani boġono riba, ġai tu Iesu bakunai rakava tuġamaġi-fitoġari varina ġomi ġemi ġavari-fuani.

³⁹ Mose ġena taravatu na ġomi ġemi rakava tu asi beruġa-vaġirini riba, a Iesu na ġia ġevaġa-moġoniani tarimari mabarari ġeri rakava tu eruġa-vaġirini, vei-iobukaiobuka tarimari ai evaġa-iaġorini.

⁴⁰ Rorimi boġono vetore, be peroveta tarimari na ġekiraġirito dagarari, ġemi ai asi beġene ġora; ġekirato,

⁴¹ 'Ġomi veġabi-varaġevaraġe
tarimami ġoboġeboġe!
Nuġami ġefarevaġi, benamo ġomase!
Korana ġemi maġuri ġarori ai
au na veiġa ta baveiani,
enabe ta na ġemi bekiraġi-ginikauani,
senaġi asi boġo vaġa-moġoniani!' "

⁴² Paulo e Banabas rubu na ġeraka-riġoto-ġoi nuġanai, tarimarima na ġenoġirito, ġoira Sabadi ai ma beġene ġenoġoi, be mo guruġa kotari ma ġeri beġene kiraġi.

⁴³ Tarimarima vegogo na ġeġwa-lausiato murinai, Iuda tarimari ġutuma, ema irau bese tarimari, Barau ġekorana-iaġiato-ġoi tarimari, ġutuma maki Paulo e Banabas muriri na ġeiaġoto. Tauri ruarua na ġevaġa-guruġarito e ġelaunaġirito, Barau ġena varevare-bara nuġanai beġene ruġa-gwaġiġi.

⁴⁴ Sabadi vaġa-ruaruanai, dori moġo mo vanuġa baregona tarimari mabarari na Vereġauka ġena guruġa seġaġi-seġaġina ġeraka-vegogoto.

⁴⁵ Iuda tarimari na mo ġutuma ġeġitarito nai, ġemama-rakavato; benamo Paulo na kara ekiraġirito-ġoi guruġari, ġia na ġekira-fitoġarito e ġevei-veġare veġareato.

⁴⁶ Senaġi Paulo e Banabas tu ma kokoreri ġesi ġevaġa-veserito, ġekirato, “Barau ġena ura lorinai tu ġia ġena guruġa ġai na ġomi baġana kiravara-guinemi. Senaġi ġomi na asi ġoġabi-raġeani, monana tu ġomi tauġemi na ġovaġa-moġoniani, ġomi tu asi ilaila maġuri vanaġivanaġi boġo ġabiani. Moġa lorinai, ġai na ġomi ġaraga-kwanemini, ma irau bese tarimari ġeri ai ġaiaġoni.

⁴⁷ Korana Vereġauka na tu maiġesi evaġa-naġimato, ekirato, ‘Au na ġomi atoremto tu, irau bese tarimari ġeri mamai boġono iaġo, be vevaġa-maġuri boġono ġabi-rosia tanobarai ġetanuni tarimari mabarari ġeri ai.’”

⁴⁸ Irau bese tarimari na mo guruġa ġeseġaġiato nai, ġeiakuto e Vereġauka ġena guruġa ġevaġa-raġeato; ema Barau na eġabi-viriġirito maġuri vanaġivanaġi beġe ġabiani tarimari mabarari ġeveġabidadamato.

⁴⁹ Vereġauka ġena guruġa mo gabu mabarana nuġanai eraga-rovorovoto.

⁵⁰ Senaġi Iuda tarimari na irau bese vavineri, dagi baregori ġeġabi-taġorito-ġoi ma Barau ġekorana-iaġiato-ġoi vavineri, e vanuġa baregonai veġitaġau tauri, nuġari ġeġanirito. Benamo ġia na vevaġa-midigumidigu ġevaġa-ġoraiato Paulo e Banabas ġeri ai, ema ġeri gabu na ġelai-rosirito.

⁵¹ Tauri ruarua na kwakuri kauri ġekwari-ketoketorito, ġia ġeri kira-sirivaġi vaġa-moġoniri ġana, benamo Ikonja ġana ġeiaġoto.

⁵² Iesu ġekorana-iaġiato-ġoi tarimari Antiokai tu iaku e Iauka Veaġa na ġevonuvonu-raġeto.

14

Ikonja ai

¹ Ikonjai Paulo e Banabas tauri ruarua Iuda tarimari ġeri rubu ai ġeveito-ġoi kavana ġeraka-toġato, benamo ġeġobatato. Ġeri ġobata na Iuda e Grik tarimari ġutuma lelevaġi ġeveġabidadamato.

² Senaġi Iuda tarimari asi ġeurato Iesu beġene vaġa-moġonia, tarima kotari na irau bese tarimari ġelaunaġi-naġirito, benamo tarikaka veġabidadama nuġanai tarimari ġeiau-rakava vinirito.

³ Paulo e Banabas monai ġetanu-maukato. Ma kokoreri ġesi Vereġauka ġena varevare-bara guruġana ġekiraġiato-ġoi. Vereġauka na ġeri guruġa evaġa-moġonirito tu seġuka evinirito, vetoġa boruri e nuġa-farevaġi veġari ġeveito.

⁴ Senaġi mo vanuġa baregona tarimari tu ġeveware-kirato, reke-ta Iuda tarimari ġesi ġekauto, reke-ta tu apostolo tarimari ġesi.

⁵ Benamo irau bese tarimari e Iuda tarimari ma ġeri veguine-iaġi tauri ġesi ġeverori-vegogoto, ġeurato apostolo beġene vaġa-midigu midiguri e fore na beġene ġidara-maseri.

⁶ Senaġi Paulo e Banabas na mo boioġa ġeribaiato, benamo Likaonia tanonai vanuġa baregori ruarua Listera e Derebe, ema seviri tanori ġana ġegari-iaġoto e seviri vanuġari tari ġari.

⁷ Monai Vari Namona ġeġobata-iaġiato-ġoi.

Listera e Derebe ai

⁸ Listerai tarima ta etanuto-ġoi; ġia tu kwakuna rakava emaġurito, be asi erakato-ġoi.

⁹ Mo tarima tu eseġaġi-taġoto-ġoi Paulo eġobatato-ġoi nuġanai. Paulo na eġita-karakaraiato, benamo eribato ġia tu ġena veġabidadama na bevaġa-namoani riba,

¹⁰ benamo eguruġa-fararato, ekirato, “Novariġisi, noruġa-tari. Benamo eburi-vaisito, erakato.

¹¹ Tarimarima ġutuma na kara Paulo na eveiato ġeġitaiato nai, ġeri Likaonia garonai ġekoġoto, ġekirato, “Barau tu tarimarimai beġe iaġo, beġe raka-riġo ġita ġerai!”

¹² Ġia na Banabas arana tu Dios ġetato, ema Paulo arana tu Hemes ġetato, korana Paulo tu eguruġa-vovokato-ġoi.

¹³ Dios ġena Rubu Veaġa verena ġena rubu tu vanuġa barana murikanai. Ġia na boromakau e veravera vanuġa maġuna ġatama bokana ġana eġwa-iaġorito, korana tarimarima ġutuma ġesi ġeurato, apostolo ġeri ai ġinitaġo veġari beġene vei ġana.

¹⁴ Senaġina apostolo ruarua Banabas e Paulo na ġeseġaġirito, kara ġeveia ġetato nai, ġeri dabuġa ġedarerito, benamo ġutuma nuġari ai ġeraga-ġabaġaba-toġato.

¹⁵ Ġekirato, “Karase ġomi tau tu maġesi ġoveini? Ġai maki tarimarima moġo ġomi kavana! Ġai na tu Vari Namona ġomi ġemi ai ġaġabi-iaġomaiani, ġomi ġakiramini, mai asi tauri dagarari boġono raga-kwaneri, benamo Barau maġurina ġenai boġono raka-ġenoġoi ġatoni. Ġia na guba, tanobara, daġaru-bara, e ġetanu-iaġirini dagarari mabarari eveirito.

¹⁶ Guinenai ġia na bese mabarari etao-fitoġarito, tauġeri ġeri ura dabarari ai beġene raka ġana.

¹⁷ Senaġi dagara namori eveirini ġerina, ġia tauġena vanaġivanaġi evevaġa-moġonini: Ġia na ġura guba na evinimini e varovaro dagarari ġeri ġaro korikoriri ai evinimini. Ġia na ġaniġani asisebo evinimini e nuġami iaku na evaġa-vonurini.”

¹⁸ Moġesi ġevaġa-guruġarito, senaġina mo tarimarima ġutuma-bara tu ġia tauri ruarua ġeri ai ġinitaġo ġauveina ġeveia roġo ġetato-ġoi, kiraġoiri tu tauri ruarua ġeri ai tu egwaġiġito.

¹⁹ A Iuda tarimari kotari Antioka e Ikonja na ġeiaġomato, ma moġeri tarimari ġia rekeri ai ġeġabi-vanaġirito. Benamo Paulo fore na ġeġidaraiato ma ġeinu-rosiato vanuġa murina ġana. Ġia ġetuġamaġito tu varau emaseto.

²⁰ Senaġi Iesu ġekorana-iaġiato-ġoi tarimari na ġeruġa-ġeġeraġiato nai tu eruġa-vaisito, benamo vanuġa barana ġana ma erakatoġa-ġenoġoito. Boġiboġi tu Banabas ġesi Derebe ġana ġeiaġoto.

Siria Antiokana ġana ġeġenoġoito

²¹ Paulo e Banabas na Derebe ai Vari Namona ġeġobata-iaġiato, benamo tarimarima ġutuma Iesu korana-iaġina tarimari ai ġeġabi-toġarito. Benamo ma ġeġenoġoi-iaġoto Listera, e Ikonja, ema Pisidia Antiokana ġana.

²² Ġia na Iesu ġekorana-iaġiato-ġoi tarimari ġevaġa-kokorerito e ġelaunaġirito, ġeri veġabidadama beġene ġabi-gigitariri. Ema ġekirato, “Ġita tu midigumidigu vovoka bita ġabirini vau Barau ġena Basileiai bita raka-toġani.”

²³ Tauri ruarua na rubu tatai veġorikau tarimari ġevaġa-ruġarito. Ma tauri ruarua ġeġani-veaġato e ġeġauġauto murinai, Vereġauka ġimanai ġetore-kaurito. Mo tu ġia na ġeġabidadama-viniato-ġoi Vereġaukana ġenai.

²⁴ Pisidia tanona na ġeraka-vanaġito murinai tu, Pamflia tanonai ġeraġasito.

²⁵ Pega vanuġanai Vereġauka ġena guruġa ġeġobata-iaġiato murinai tu, Atalia vanuġana ġana ġeiaġoto.

²⁶ Atalia na tu bouti na ġeġenoġoi-iaġoto Antioka ġana. Monai tu, ġeri evanelia iaġoiaġona roġosi roġo beġene sinaia nai, tarikaka na Barau ġena namo e varevare-bara nuġanai ġetore-kaurito, mai ġauvei beġene veia ġana. Ġauveina tu toma beġe vaġa-koria.

²⁷ Antiokai ġeraġasito nai tu, ekalesia tarimari ġevaġa-vegogorito, benamo Barau na ġia ġerina kara eveirito dagarari mabarari, e kamasi ġia na irau bese tarimari ġeri veġabidadama ġatama bokana ekeoato variri, ġeri ekiraġito.

²⁸ Monai Iesu ġekorana-iaġiato-ġoi tarimari ġesi tauri ruarua ġetanu-maukato.

15

Ekalesia vegogona baregona Ierusalemaj

¹ Tau kotari Iudea na Antioka ġana ġevariġoto, benamo tarikaka veġabidadama nuġanai tarimari ġevaġa-ribarito, ġekirato, “Ġomi tu vevaġa-maġuri asi ilaila boġo ġabiani riba, bema mero tauġaniri kefi-lamavaġi veġana Mose ġena taravatu ai ekiraġiani dagarana asi boġo korana-iaġiani nai.”

² Mo guruġa ġaramanai, Paulo e Banabas ġia ġesi veġare-veġare baregona ġeveiato. Moġa lorinai Paulo e Banabas ema Antioka ekalesia tarimari kotari ġeviriġirito, Ierusalemaj ġana beġene varaġe, be apostolo e ekalesia ġeġori-kauato-ġoi tarimari ġeri ai mo guruġa beġenea vedanaġi-iaġia.

³ Ġia tu rubu na ġetuġu-iaġorito. Ma Foenikia e Samaria tanori nuġari na ġeraka-vanaġito nai tu, monai tarikaka ġeri ġekiraġito, kamasi irau bese tarimari Barau ġenai ġevetuġamaġi-kureto. Tarikaka mabarari na mo vari ġeseġaġiato nai, mabarari ġeiaku-rakavato.

⁴ Ierusalemaj ġeraġasito nai, ekalesia tarimari, e apostolo tauri, ema ekalesia ġeġita-taġoato-ġoi tarimari na ġeġabi-raġerito. Benamo Barau na ġia ġerina kara eveito dagarari mabarari ġeri ġekiraġito.

⁵ Senaġi Farisea doġoro na Iesu ġeġabidadama-viniato-ġoi tarimari kotari ġeruġa-vaisito, benamo ġekirato, “Irau bese tarimari maki tauġaniri kefri beġene lama-vaġiri, ema boġono kirari, Mose ġena taravatu beġene korana-iaġia.”

⁶ Benamo apostolo e ekalesia ġeġita-taġoato-ġoi tarimari ġetanu-vegogoto, ma mo vedanaġi ġetuġa-maġiato.

⁷ Ġeguruġa-iaġi maukaiato murinai, Petero evariġisito, benamo ekirato, “Tarikakagu mabarami, ġomi ma ribami, kai-veġata ġomi vefakami ai Barau

na au eġabi-hidiguto, irau bese tarimari ġeri Vari Namona bana kiraġia, be ġia maki beġene seġaġi e beġene veġabidadama.

⁸ Ema tarimarima nuġari eribarini Barauna na irau bese tarimari Iauka Veaġa evinirito, ġita evinirato kavana. Mo veġa ġenana evaġa-ġitarani, ġia maki eġabi-raġerito.

⁹ Ġita e ġia fakarai vaġa-irauro vetoġana ta tu asi eveiato, korana tu ġeri veġabidadama lorinai, Barau na nuġari eiarevarito.

¹⁰ Ma toma tu kara dainai Barau ġotovo-naġiani, Iesu ġekorana-iaġiani tarimari iatari ai meto ġotorerini. Mo tu ġita tauġera na e ġita senera na maki mo maruna ġwaġwana asi ġeilailato dagarana.

¹¹ Asiġina! Ġita taribani, ġita tu Iesu Vereġauka ġena namo e varevarebara lorinai, Barau na evaġa-maġurirani, ġia maki moġesina.”

¹² Petero moġesi ekirato nai, vegogo tarimari mabarari asi ġeguruġato. Benamo Banabas e Paulo ġeseġaġi-vinirito, Barau ġia ġerina vetoġa boruri e nuġa-farevaġi veġari, Grik tarimari fakari ai eveirito dagarari, mabarari ġekiraġirito.

¹³ Ġia ġeguruġa-ġosito vau, Iakobo (o Iames) eguruġato, ekirato, “Tarikakagu mabarami, ġoseġaġigu!

¹⁴ Simona na inivau bekiraġi-ginikaua, kamasi tovotovonai Barau na irau bese tarimari etuġamaġirito, benamo ġia fakari na bese ta eġabi-viriġiato, ġia arana beġene ġabia ġana.

¹⁵ Mai tu peroveta tarimari ġeri guruġa ġesi beġe ilaila-ginikau, korana maiġesi ġetoreato,

¹⁶ ‘Vereġauka ekirani:

Maġa murinai au ma baġenoġoi-iaġomani,

benamo Davida ġena numa,

eġwa-kafuato dagarana,

ma baraga-ġenoġoiani.

Ġefuki-rovorovoato dagarana,

au na ma baraga-ġenoġoiani,

ema bavaġa-ruġavaisi-ġenoġoiani.

¹⁷ Korana tu tarimarima kotari maki mabarari na,

ema au aragu ġeġabi-rakaoani tarimari irau bese tarimari mabarari na,

au, Vereġauka, beġene vetaugu ġana.

¹⁸ Vereġauka na maiġeri dagara mabarari bevaġa-ġorarini.

Ma irau laġani ai veġata maiġeri veġa evaġa-foforirito.’

¹⁹ Moġa lorinai au atuġamaġini, irau bese tarimari ġevetuġamaġi-kureni Barau ġenai nai tu, ġeri ai asi bitana vaġa-gwaġiġia.

²⁰ Senaġi fefa ta bitana torea, bitana kirari, kwaivakuku ġevarevarevinirini ġaniġaniri tu asi beġene ġaniri, korana mo tu ġofaġofa barauri ġevinirini dagarari; mata-boraġa veġari asi beġene veiri, ema ġaiġori na ġebito-maserini bureġari asi beġene ġaniri e rara asi beġene ġani.

²¹ Korana Mose ġena taravatu tu kai-veġata vanuġa baregori mabarari ai ġeġobata-iaġirini ema Sabadi ġarori mabarari ai Iuda tarimari ġeri rubu ai ġeivirini.”

Irau bese veġabidadama tarimari ġeri fefa

²² Benamo apostolo e ekalesia ġeġori-kauato-ġoi tarimari ema ekalesia mabarari ġeurato, ġia fakari na tau kotari beġene ġabi-viriġiri, benamo Paulo e Banabas ġesi Antioka ġana beġene tuġu-iaġori. Ġia na Iudas, arana

ta tu Barasaba ġetato-ġoi, e Silas ġeġabi-viriġirito. Ġia tu tarikaka na ġegubakau-baregorito-ġoi tarimari.

²³ Mai fefa tu ġia ġesi ġetuġu-iaġoato:

“Ġai ġomi tarikakami veġabidadama nuġanai, apostolo tarimama e ekalesia ġeġita-taġoani tarimama na ġema vevaġa-namo ġatuġu-iaġosiani, ġomi tarikaka veġabidadama nuġanai irau bese tarimami, Antioka ai, Siria ai, e Kilikia ai ġotanuni tarimami mabarami ġemi ai.

²⁴ Ġai baġama seġaġi, mainana tau kotari ġeiaġosito, benamo ġeri guruġa na ġemi tuġamaġi ġevaġa-veġonurito e ġevaġa-daradaramito. Korana tu ġekiramito, tauġanimi kefiru boġono lama-vaġiri ema taravatu boġono korana-iaġia. Senaġi mani tu dia ġai ġemana ġeġabito guruġari.

²⁵ Moġa lorinai, ġema vegogo ai ġai mabarama na ġavaġa-moġoniato, tau kotari baġana ġabi-hidiri, be baġana tuġu-iaġosiri, ġema tuġamaġikau tarimari Banabas e Paulo ġesi beġene iaġosi.

²⁶ Ġia tu ġeri maġuri gwairi asi ġeġabirito, ġetore-taririto, ġera Vereġauka Iesu Keriso arana dainai.

²⁷ Moġa lorinai, Iudas e Silas baġa tuġuri, kara baġa toreri dagarari ġia tauġeri mururi na guruġai ġomi ġemi ai beġene vaġa-moġoniri ġana.

²⁸ Iauka Veaġa e ġai ġakirato, namona tu ġomi iatami ai meto ta asi baġana tore-kaua. Senaġina maġesi veġari moġo boġono korana-iaġiri:

²⁹ Ġofaġofa barauri o kwaivakuku ġevinirini ġaniġaniri asi boġono ġani; rara asi boġono ġani; ġaiġori na ġebito-maserini bureġari asi boġono ġaniri; e mata-boraġa veġari asi boġono veiri. Mo dagara ġerina boġo raka-veġitani nai, ġomi tu boġo iaġo-ġinikauni. Boġono gena.”

³⁰ Ġeviriġirito tarimari ġetuġurito, benamo Antioka ġana ġeveriġoto. Monai veġabidadama tarimari mabarari ġevaġa-vegogorito vau, ġeri fefa ġevinirito.

³¹ Ġia na mo fefa ġeiaviato nai, ġeiaku-rakavato, korana vevaġa-kava guruġana ġeseġaġiato nai.

³² Iudas e Silas, ġia tauġeri tu peroveta tarimari. Ġia tauri ruarua na tarikaka ġeri guruġa ġutuma ġekiraġirito, ġelaunaġirito e ġevaġa-gwaġiġirito.

³³ Ġaro kotari monai ġetanuto murinai, ma mainori ġesi tarikaka na ġetuġu-ġenoġoirito, ġetuġurito tarimari ġeri ai. [³⁴ Senaġi Silas tu eurato Antiokai roġo bene tanu.]

³⁵ Paulo e Banabas tu Antiokai ġetanu-maukato, ma tarima ġutuma ġesi Vereġauka ġena guruġa ġevevaġa-riba iaġiato-ġoi, e ġeġobata-iaġiato-ġoi.

Paulo e Banabas ġeveraġa-kwaneto

³⁶ Ġaro kotari ġevanaġito murinai, Paulo na Banabas evaġa-guruġaiato, ekirato, “Taura ruarua ma siġenoġoi-iaġo, Vereġauka ġena guruġa taġobata-iaġiato-ġoi vanuġari mabarari ġari, tarikakara bitana ġitari, ġeri veġabidadama maġurina tu aiġesina.”

³⁷ Banabas ġena ura tu Ioane Mareko maki neġori-kaua, be ġia ġesi beġene iaġo.

³⁸ Senaġi Paulo asi ġena ura ġia beġene ġori-kaua, korana ġia na Pamfilia ai tu eraga-kwanerito, ema ġia ġesi asi ġeġauveito mo ġeri ġauvei magona.

³⁹ Moġa ġaramanai ġia tauri ruarua veġareveġare baregona ġeveiato. Benamo tauri ruarua ġeveraġa-kwaneto. Banabas na Mareko eġoriato, bouti ai ġeraġeto, benamo Saipras ġana ġeiaġoto.

⁴⁰ A Paulo na tu Silas eġabi-viriġiato. Tarikaka na Vereġauka ġena varevare-bara vevaġa-namona ġevinirito murinai ġerakato.

41 Siria e Kilikia tanori na ġeraka-vanaġito, benamo ekalesia doġorori monai ġevaġa-gwaġiġirito-ġoi.

16

Timoteo tu Paulo e Silas ġesi ġeiaġoto

1 Paulo monana evanaġi-iaġoto Derebe ai ea votuto, ma monana tu eiaġoto Listera ai ea raġasito. Listerai tu Iesu ekorana-iaġiato-ġoi tarimana ta etanuto-ġoi, arana tu Timoteo. Timoteo sinana tu Iuda vavinena, ġia maki eveġabi-dadamato-ġoi vavinena, senaġi tamana tu Grik tarimana.

2 Tarikaka mabarari Listerai e Ikoniai na Timoteo tu tarima namonai ġekiraġiato-ġoi.

3 Paulo eurato Timoteo tu bene ġori-kaua, be ġia ġesi beġene iaġo, moġa lorinai, ġia tauġanina kefina elama-vaġiato. Moġesi ġeveiato, korana monai ġetanuto-ġoi Iuda tarimari mabarari ribari, Timoteo tamana tu Grik tarimana.

4 Vanuġa loriri na ġevanaġi-iaġoto-ġoi nai tu, Ierusalemaj ġetanuni apostolori e ekalesia ġorikauri tarimari na ġevaġa-moġonirito guruġari veġabidadama tarimari ġeri ġekiraġito-ġoi, ġia na beġene korana-iaġiri ġana.

5 Benamo ekalesia tarimari ġeri veġabidadama ġevaġa-kokorerito, e ġaro mabarari ai ekalesia ġeġutumato-ġoi.

Troas ai - Paulo ġena mata-vanaġi

6 Paulo ma karonna ġesi Frigia e Galatia tanori nuġari na ġeraka-vanaġito moġo, korana Iauka Veaġa na ekira-ġoirito, Asia tanori ai Barau ġena guruġa asi beġene vari-fiua.

7 Misia tano vetoġanai ġeraġasito, benamo Bitinia tanonai ġeraka-toġa ġetato, senaġi Iesu laukana asi eurato ġia mo ġana beġene iaġo.

8 Moġa lorinai Misia na ġevanaġito, Troas vanuġanai ġea votuto.

9 Mo boġi Paulo emata-vanaġito. Ġia na Makedonia tarimana ta ruġataġo eġitaiato, ġia enoġiato-ġoi, ekirato, "Makedonia ġana noiaġoma, noma vaġa-kavama."

10 Paulo na mo mata-vanaġi eġitaiato murinai, ġaraga-ġabikavito, Makedonia ġana baġana iaġo ġana. Korana ġaribato, mo tu Barau na ekeamato, mo tarimarima ġeri ai Vari Namona baġana fiua ġana.

Filipi ai - Lidia ġena vetuġamaġi-kure

11 Moġa lorinai Troas ai bouti ai ġaraġeto, benamo maoromaoro Samotrake motumotu ġana ġaiaġoto. Monai ġagenato, elaġanito vau Neapoli ġana ġaiaġoto.

12 Monana gunika ġana ġaiaġoto mo, Filipi ai ġaraġasito. Filipi tu Makedonia tanonai vanuġa baregona eruġa-guineto vanuġana, e Roma ġeri gabu. Monai ġaro kotari ġatanuto.

13 Sabadi ai, vanuġa maġuna ġatama bokana na ġaraka-rosito, ġaruka rekena ġana ġaiaġoto, ġai ġatuġamaġito, Iuda tarimari ġeri ġauġau gabuna ta tu monai. Ġai ġatanu-tarito, benamo mo ġaruka rikinai ġevegogoto vavineri ġavaġa-guruġarito.

14 Monai eseġaġimato-ġoi vavinena ta arana Lidia, Taiatira vavinena. Ġia tu voiri barego dabuġari evoivoi-iaġirito-ġoi. Ġia tu Barau etoma-rakarigo viniato-ġoi vavinena. Ġia Vereġauka na nuġana ekeoato, benamo Paulo na kara ekiraġiato-ġoi eseġaġiato ma eġabi-raġeato.

15 Ġia ma ġena numa tarimari ġesi babatiso ġeġabiato murinai, ġia na enoġimato, ekirato, "Bema ġovetuġamaġini au tu Vereġauka ġenai moġoni

aveġabidadamani nai tu, si-iaġo, be au ġegu numai bitana tanu.” Benamo ġia na nuġama eġanirito, benamo ġia ġesi ġaiaġoto.

Filipi dibura numanai

¹⁶ Ġaro ta ġauġau gabuna ġana ġaiaġoto-ġoi nuġanai, vetuġunaġi ġuiatona ta na edoġarimato. Ġia tu iauka rakavana ta na eboroġiato, ma ġoirai kara beġe ġorani dagarari ekiraġi-foforirito-ġoi. Ġoirai beġe ġorani dagarari ekiraġi-foforirito-ġoi nai tu, ġitaġauna tarimari ġeri moni ġutuma evaġa-ġorarito-ġoi.

¹⁷ Mo ġuiato na Paulo e ġai mabarama murima na eiaġomato, ekoġoto-ġoi, maiġesi ekirato-ġoi, “Maiġeri tarima tu Iaru-korokoro Barauna ġena vetuġunaġi tarimari! Vevaġa-maġuri kamasi boġo ġabiani dabarana varina ġefuani.”

¹⁸ Ġaro vovoka moġesi eveito-ġoi, eiaġoto mo, Paulo ebaruto, benamo eruġa-kureto, mo iauka rakavana ekiraiato, ekirato, “Iesu Keriso aranai au na akiramuni, mani kekeni ġenana noraka-vaġi!” Benamo mo horai moġo iauka rakavana mo ġuiato ġenana eraka-vaġito.

¹⁹ Mo ġuiato ġitaġauna tarimari ġeribato, ġia ġeri moni doġari dabarana ekorito, benamo ġia na Paulo e Silas ġeġabi-taririto, taravatu tauri ġeri ai maketi gabuna ġana ġeinu-iaġorito.

²⁰ Kota ġeseġaġini tarimari ġoirari ai ġevaġa-ruġarito vau ġekirato, “Mai tu Iuda tarimari. Ġia na ġita ġera vanuġa baregonai rakava ġevaġa-ġoraiani.

²¹ Ema ġia na ġevevaġa-riba iaġirini veġari ġita ġera taravatu na tu asi eġabi-raġerini. Ġita tu Roma tarimara, ġia ġeri veġa tu asi bita ġabi-raġerini e asi bita veirini riba.”

²² Tarimarima ġutuma-bara ġia ġesi ġekauto, Paulo e Silas ġeguru-vinirito. Benamo Kota ġeseġaġini tarimari na Paulo e Silas ġeri dabuġa ġedarerito, benamo mo ġutuma-bara ġekirarito, beġene kwariri.

²³ Gekwari-biruġa biruġarito murinai, dibura numai ġefiu-toġarito, ema dibura numa ġitaġauna tarimana ġekiraiato, bene ġitaġau-ginikauri.

²⁴ Ġia na mo vevaġa-naġi guruġana eseġaġiato, benamo dibura numana nuġana buroburonai efiu-toġarito. Kwakuri tu ġau duduri baregori ma metori vekaravari ai ebaru-taririto.

²⁵ Boġi nuġanai Paulo e Silas tu ġeġuriġurito-ġoi e Barau vaġa-raġena mariri ġeġabirito-ġoi, ma dibura numa tarimari kotari na tu ġeseġaġi-taġorito-ġoi.

²⁶ Asikauna tano-iaga baregona eraġasito, dibura numana korana duġuri maki eġareva-ġareva vinubato. Vaġa-sebo ġatama-boka mabarari ġevekeoto, e dibura tarimari ġebarurito seiniri mabarari ġeketoketo-vaġito.

²⁷ Dibura numana ġitaġauna tarimana etataġato, mo ġatama-boka mabarari eġitarito tu vekeo. Ġena tuġamaġi dibura tarimari mabarari tu ġeraga-lemato etato, benamo ġena vetari baġana einu-vaġiato, ma tauġena nevevaġi-mase etato.

²⁸ Senaġi Paulo na eġaba-viniato, ekirato, “Tauġemu asi novevaġa-rakava! Ġai mabarama tu maiġema!”

²⁹ Dibura numa ġitaġauna tarimana kere keari eveito, eraga-toġato, benamo ma ġoġo-ġoġona ġesi Paulo e Silas kwakuri korari ai ea keto-tarito.

³⁰ Benamo monana eġori-rosirito ma edanaġirito, ekirato, “Vere tarimami, au tu kamasi baveini vau maġuri badoġariani?”

³¹ Ġia na ġevaġa-veseato, ġekirato, “Iesu Vereġauka bono ġabidadamina, benamo maġuri boġabiani, ġoi e ġemu numa tarimari mabarari.”

³² Benamo ġia na Vereġauka ġena guruġa, ġia ma ġena numa tarimari mabarari ġesi, ġeri ġekiraġito.

³³ Mo boġi horanai moġo, dibura numa ġitaġauna tarimana na tauri ruarua eġori-iaġorito, manuġari ea ġurigiġirito, ema ġia ma ġena numa tarimari mabarari ġesi mo boġi sebonai ġebabatorito.

³⁴ Moġa murinai ġia na Paulo e Silas ġena numa nuġanai eġori-toġarito, benamo ġaniġani evinirito, ġeġanito. Ma ġia ma ġena numa tarimari ġesi tu iaku na ġevonuto, korana ġia toma tu Barau ġenai ġeveġabidadamani.

³⁵ Boġiboġi, Kota ġeseġaġini tarimari na vetuġunaġi-iaġovini tarimari ġetuġurito, ġekirato, “Mani dibura numai tarimari ruarua ġoa tuġu-vaġiri.”

³⁶ Benamo dibura numa ġitaġauna tauna na Paulo ekira-varaiato, ekirato, “Kota ġeseġaġini tarimari na guruġa beġe tuġua, ġoi e Silas tu baġana tuġu-rosimi beġesi. Moġa lorinai ġoraka-rosi ma mainomi ġesi.”

³⁷ Senaġi Paulo na vetuġunaġi-iaġovini tarimari ekirarito, ekirato, “Ġai tu Roma tarimama, senaġi ġia na tarimarima ġutuma-bara ġoirari ai ġai ġekwari-kavamato moġo, a ġema rakava tu asi ġevetauato, senaġi dibura numai ġefiu-toġamato. Ma inıtoma tu vekuretoġai ma ġetuġu-rosima ġetoni? Asigina ġinavaġi! Ġia tauġeri maiġana beġene iaġoma, benamo ġai beġenema ġori-rosima.”

³⁸ Benamo vetuġunaġi-iaġovini tarimari na mo guruġa Kota ġeseġaġini tarimari ġekira-vararito. Ġia ġeseġaġito Paulo e Silas tu Roma tarimari ai ġeiaġoto nai tu ġegarito.

³⁹ Benamo ġeiaġoto, Paulo e Silas ġenoġirito, ġeri rakava beġene tuġamaġi-fitoġari. Benamo ġia tauri ruarua dibura numa na ġetuġu-rosirito, e ġenoġirito, mo vanuġa barana beġene raga-kwaneana.

⁴⁰ Paulo e Silas na dibura numana ġeraga-kwaneato, Lidia ġena numa ġana ġeiaġoto. Monai tarikaka ġesi ġevedoġarito, benamo vevaġa-gwaġiġi guruġari na ġevaġa-kokorerito, benamo ġerakato.

17

Tesalonika ai

¹ Paulo e Silas na Amfipoli e Apolonia ġeraka-vanaġiato, ġeiaġoto mo Tesalonikai ġeraġasito. Iuda tarimari ġeri rubu ta tu monai.

² Paulo tu eveito-ġoi kavana rubu ai eraka-toġato. Ema Sabadi ġarori toitoi nuġari ai, ġia tu tarimarima ġesi Buka Veġa guruġari ġeguruġa-guruġa-iaġirito.

³ Ġia ġeri ekiraġi-ginikauto-ġoi, e evaġa-moġoniato-ġoi, Keriso tu bemidigu-midiguni e mase na ma bevariġisi-ġenoġoini. Ema ekirato, “Mai Iesu, varina ġomi ġemi afiuani tarimana, tu Keriso, (Barau na ekiraġi-toreato vevaġa-maġuri tauna).”

⁴ Iuda tarimari kotari na mo guruġa ġevaġa-moġoniato, benamo Paulo e Silas ġesi ġesebonato. Ema Barau ġetoma-rakariġo viniato-ġoi Grik tarimari ġutuma lelevaġi e vanuġai ġeri dagi barego vavineri ġutuma maki ġia ġesi ġesebonato.

⁵ Senaġi Iuda tarimari tu ġemamato, benamo voivoi gabunai seġafore lelevaġi tarimari kotari ġeġabi-vegogorito, seġafore doġorona ta ġesinaıato. Benamo ġia na gururaġe e vevaġi baregona vanuġa barana nuġanai ġeveıato. Ma Iason ġena numa ġeraġeato, Paulo e Silas beġene doġariri, be tarimarima ġoirari ai beġene ġori-rosiri ġana.

⁶ Senaġi asi ġedoġaririto, benamo Iason e tarikaka kotari ġeinu-iaġorito, vanuġa ġitaġauna tauri ġoirari ġana, ma koġori ġesi ġekirato, “Tanobara

mabarari ai mai tarima na rakava ġevaġa-ġoraiani, ma toma tu mai ġana beġe iaġoma,

⁷ benamo Iason na ġena numai eġita-ġaurini. Ġia na Kaisara ġena taravatu ġekiraġi-fitoġaiani, korana tu ġekirani, vere barana ta ma ġetoni. Ġekirani, mo vere arana tu Iesu.”

⁸ Vanuġa tarimari e ġitataġona tarimari na mo guruġa ġeseġaġiato nai, ġeri daradara ebaregato.

⁹ Benamo ġia na Iason ma karona ġesi ġevaġa-fainirito moġo, benamo ġetuġu-rakarito.

Berea ai

¹⁰ Eboġito nai tu asikauna tarikaka na Paulo e Silas Berea ġana ġeraga-tuġu-rakarito. Bereai ġea raġasito nai tu ġeiaġoto, Iuda tarimari ġeri rubu ġana.

¹¹ Bereai tarimarima tu tarima namori, dia Tesalonika tarimari kavari. Ġia na Barau ġena guruġa ġeseġaġiato-ġoi nai, ġeura-iaġi baregoato-ġoi. Ema ġaro mabarari ai Buka Veaġa nuġanai kara Paulo na ekiraġiato-ġoi ġevetauato-ġoi. Korana tu ġeurato-ġoi beġene riba, Paulo na kara ekiraġiato-ġoi guruġari tu moġoni ba, beġene vaġa-moġoniri ġana.

¹² Iuda tarimari ġutuma Iesu Keriso ġevaġa-moġoniato; ema Grik vavineri barego-baregori kotari na e Grik tauri ġutuma maki Iesu Keriso ġevaġa-moġoniato.

¹³ Senaġi Iuda tarimari Tesalonikai ġeseġaġito, Paulo tu Bereai Barau ġena guruġa eġobata-iaġiato-ġoi. Benamo ġeiaġoto, vanuġa tarimari nuġari ġea ġanirito e ġekira-vaishi vaisirito.

¹⁴ Benamo Paulo tu asikauna tarikaka na kone ġana ġetuġu-rakaiato; a Silas ema Timoteo tu Bereai ġetanuto.

¹⁵ Paulo ġekava-iaġoato tauri na ġeġori-iaġoato mo Atena. Monana ma ġeġenoġoito Berea ġana. Ġia ġeġenoġoito nai tu, Paulo ġena keakau guruġana ta maki ġeġwaiato, ekirato, Silas e Timoteo ġia ġenai beġene iaġo-ġarimoġi etato.

Atena ai

¹⁶ Atenai, Paulo na Silas e Timoteo evaġa-nogarito-ġoi nuġanai, mo vanuġa baregona eġitaiato tu kwaivakuku na ġevaġa-vonuato. Benamo ġia nuġana emeto-rakavato.

¹⁷ Moġa lorinai eiaġoto Iuda tarimari ġeri rubu ġana, Iuda tarimari e irau bese tarimari Barau ġetoma-rakarġo viniato-ġoi tarimari ġesi ġeguruġa-guruġato. Ema ġaro mabarari ai maketi ai ġeraka-refoto-ġoi tarimari evaġa-guruġarito-ġoi.

¹⁸ Vevaġa-riba tauri irauri, ġeri orea ġekiraġirito-ġoi tu Epikurea ema Stoiki, na Paulo ġeġoitaġoato, benamo ġevaġa-veġare veġareato. Ġia kotari ġevedanaġito, ġekirato, “Mai muru-babo tu kara ekiraġiani?” Ma kotari ġevaġa-veseto, ġekirato, “Ġia mai tu noġa moġo barau irauri ekiraġirini.” Ġia moġesi ġekirato, korana Paulo tu Iesu e ġena variġisi-ġenoġoi varina eġobata-iaġiato-ġoi.

¹⁹ Benamo ġia na Paulo ġeġabiato, Areopago ġorona ġana ġeġori-iaġoato, kanisoro ġevegogoto-ġoi gabuna ġana. Benamo monai ġekiraiato, ġekirato, “Ġai ġaurani tu ġariba, mai vevaġa-riba variġuna oveiani tu kara okiraġiani?”

²⁰ Ġoi na guruġa tari okiraġirini tu ġai na asi ġaseġaġirini dagarari, naima ġai ġaurani tu aniri baġana ribari.”

21 Korana Atena tarimari mabarari e irau gabu tarimari monai ġetanuni tu, ġauvei ta asi ġeveiato-ġoi, senaġi ġia ġeri veiġa sebona tu ġaro mabarari ai mo guruġa variġuri moġo ġekiraġi-taġorito-ġoi e ġeseġaġi-taġorito-ġoi.

22 Benamo Paulo tu Areopago vegogona nuġana na eruġa-vaisito, benamo ekirato, “Atena tarimami! Au na ġomi aġitamini, ġomi tu ġemi barau ġeri ai ġovetuġamaġikau-barego korikorini.

23 Korana ġemi vanuġai arakaorakaoni e ġemi toma-rakariġo gaburi aġitarito nai tu, au na fata veaġana ta aġitaiato, iatanai tu mai guruġa ġetoreato, ‘ASI RIBAMA BARAUNA ĠENA.’ Moġa lorinai mo asi ribami Barauna, ġomi na ġotoma-rakariġo viniani tu, toma au na akira-varamini.

24 Tanobara e tanobara nuġanai ġetanuni dagarari mabarari eveirito Barauna tu guba e tanobara verena. Ġia tu tarimarima ġimari na ġeragarito rubu veaġari ai tu asi etanuni.

25 Ġia tu dagara tai asi erabuto, be tarimarima ġimari na ġia ġena tu asi beġe veiani riba. Ġia tauġena na tarimarima mabarari maġuri evinirini, iaġari ema dagara mabarari evinirini.

26 Tarima sebona ġenana ġia na tarimarima beseri mabarari evaġa-ġorarito, ema tanobara mabarana beġene tanu-iaġia etato. Ġia tauġena na ġeri maġuri laġaniri ema ġeri tanu gaburi korikori eboioġa-guinerito.

27 Barau na moġesi eveiato, korana ġia beġene ġita-vetaua ġana; ema beġene vetau-kokore kokorea, benamo beġene doġaria. Oba, Barau e ġita tata vefakara tu asi manaġa.

28 ‘Korana ġita tu, ġia koranai tamaġurini, taġareva-ġarevani e roġo tamaġuri-taġoni.’ Ġemi mari ġegarani e ġesisiba-iaġirini tauri na ġekiraġiato kavana, ġekirato, ‘Ġita maki ġia natuna.’

29 Ġita tu Barau natuna lorinai, asi bitana tuġamaġi, Barau tu golo, silva, o fore, tarimarima ġena boioġai ema ribai ekororito dagarari kavana.

30 Guinenai tarimarima tu asi ġeri ribamaoro nai, Barau na moġeri tu eġita-ragakwanerito. Senaġi toma tu, ġia na tarimarima mabarari gabu mabarari ai ekirarini, beġene vetuġamaġi-kure.

31 Korana ġia na ġaro ta ekiraġi-toreato, mo ġaro ai ġena ġabiviriġi tarimana na tanobarai vevaġa-maoro beveiani ma iobukaiobukana ġesi. Barau na mo tau evaġa-moġoniato tarimarima mabarari ġoirari ai, vetoġana tu mase na evaġa-variġisi ġenoġoiato.”

32 Mase na variġisi-ġenoġoina guruġana ġeseġaġito nai, kotari na tu Paulo ġerikiriki-iaġiato. Ma kotari tu ġekirato, “Ġai ġaurani tu, mo vari ġema ma nokiraġi-ġenoġoia.”

33 Benamo Paulo na mo vegogo eraga-kwaneato.

34 Senaġi tau lakouna tu ġia ġesi ġerakakauto e Barau ġenai ġeveġabidadamato. Ġia fakari ai tu Dionisio, ġia tu Areopago ġoro ai ġevegogoto-ġoi tarimana ta, e vavine ta arana Damari, ema tarima kotari maki.

18

Korinto ai

1 Moġa murinai Paulo na Atena eraga-kwaneato, Korinto ġana eiaġoto.

2 Monai ġia na Iuda tarimana arana Akwila eġoitaġoato. Akwila tu Ponto ai emaġurito. Ġia tu ġaraġona Priskila ġesi Itali na vau ġeraġasito. Ġia Itali na ġeiaġomato, korana tu Klaudio na Iuda tarimari mabarari ekirarito, Roma beġene raga-kwaneata. Paulo eiaġoto ġia ġeri ai, ea ġitarito.

³ Ĝia maki Akwila ma ĝaraĝona ĝesi kavana farai numari eturito-ĝoi. Moĝa lorinai Paulo monai tu ĝia tauri ruarua ĝesi etanuto-ĝoi ema ĝeĝauvei-vegogoto-ĝoi.

⁴ Sabadi mabarari ai tu Iuda tarimari ĝeri rubu ai eĝobatato-ĝoi, Iuda e Grik tarimari nuĝari neĝabiri uranai.

Silas e Timoteo ĝeraĝasito

⁵ Silas e Timoteo Makedonia na ĝeraĝasito nai, Paulo tu Barau ĝena guruĝa eĝobata-iaĝiato-ĝoi ĝaro mabaranoi, Iuda tarimari ĝeri ai ekiraĝi-foforiato-ĝoi, Iesu tu moĝoni Keriso, (Barau na ekiraĝi-toreato vevaĝa-maĝuri tauna).

⁶ Senaĝi Iuda tarimari na Paulo ĝena guruĝa ĝevaĝa-ĝenoĝoiato, e guruĝa asi namori ĝenai ĝekira-veĝare veĝareato nai, Paulo na ĝena dabuĝa ekorakoraiato ĝia ĝoirari ai vauro evaĝa-guruĝa gwaĝiĝi-vinirito, ekirato, “Ĝomi rarami verebana tu tauĝemi iatami ai! Au ĝegu ai vereba ta asiĝina. Toma au tu aiĝoni irau bese tarimari ĝeri ai.”

⁷ Benamo mo rubu na eraka-rosito, eiaĝoto, irau bese tarimana arana Titio Iusto ĝena numa ĝana. Titio tu Barau etoma-rakariĝo viniato-ĝoi tarimana, ma ĝena numa tu rubu sebinai moĝo.

⁸ Krispo, rubu ĝorikauna tarimana e ĝena numa tarimari mabarari ĝesi tu Vereĝauka ĝeĝabidadama-viniato-ĝoi. Ema Korinto tarimari ĝutuma na maki vari ĝeseĝaĝiato, benamo ĝevaĝa-moĝoniato ema babatiso ĝeĝabito.

⁹ Boĝi tai Vereĝauka na Paulo mata-vanaĝi ai evaĝa-guruĝaiato, ekirato, “Asi bono gari, murumu asi bene kafu, bono guruĝa!”

¹⁰ Korana au tu ĝoi ĝesi bene; ta na asi beiaĝo-vinimuni e asi bevaĝa-rakavamuni riba, korana au ĝegu tarimarima tu ĝutuma mai vanuĝa baregonai.”

¹¹ Moĝa lorinai Paulo monai etanuto laĝani ta e ĝue imaima sebona (6); Barau ĝena guruĝa tarimarima evaĝa-riba iaĝirito-ĝoi.

¹² Galio tu Akaia tanona ĝeri gavana ĝauveina eveito-ĝoi nuĝanai, Iuda tarimari ĝeĝaru-vegogoto, Paulo ĝeĝabi-tariato, Kota gabuna ĝana ĝeĝori-iaĝoato.

¹³ Ĝekirato, “Mai tarima na tarimarima nuĝari eĝanirini, ma taravatu na asi ekiraĝiani maĝurinai Barau beĝene toma-rakariĝo vinia etoni.”

¹⁴ Paulo neguruĝa etato nuĝanai, Galio na Iuda tarimari ekirarito, ekirato, “Ĝomi Iuda tarimami, bema veĝa rakavana tai o kerere baregona tai boĝoro samani nai tu, bara seĝaĝi-vinimi riba.

¹⁵ Senaĝi mani veĝareveĝare tu vevaĝa-riba, e ara, ema tauĝemi ĝemi taravatu veĝareveĝareri, naima tauĝemi na boĝono vei-roroĝotori. Au na maniĝesina dagarari Kotai tu asi baseĝaĝirini!”

¹⁶ Benamo ĝia na Kota gabuna na elai-rosirito.

¹⁷ Ĝia mabarari na rubu ĝorikauna tarimana, Sostene, ĝeĝabi-tariato, Kota gabuna ĝoiranai benamo ĝekwari-korukoruato. Ma Galio tu eĝitarito senaĝi eboĝe-ĝuiragiato moĝo.

Paulo Antioka ĝana eĝenoĝoito

¹⁸ Paulo Korinto ai tarikaka veĝabidadama nuĝanai tarimari ĝesi tu ĝaro kota vovoka roĝo ma ĝetanuto. Moĝa murinai eraga-kwanerito, benamo Priskila e Akwila ĝesi bouti ta Siria ĝana ĝeiaĝoto. Kenkrea na roĝosi beĝere raka nuĝanai, ĝia tu debana ĝeraroato, korana ĝena kiraĝitore gwaĝiĝina ta Barau ĝenai eveiato nai.

¹⁹ Efeso ai ġeraġasito, benamo Paulo na Priskila e Akwila monai eraga-kwanerito. Ġia tu Iuda tarimari ġeri rubu ai eraka-toġato benamo Iuda tarimari ġesi ġea guruġa-guruġato.

²⁰ Ġia na ġenoġiato, monai Iuda tarimari ġesi roġo bene tanu, senaġi ġeri noġinoġi asi eġabi-raġeato.

²¹ Senaġi ġena rakai tu iniġesi evaġa-guruġarito, ekirato, “Bema Barau beurani nai, ġomi ġemi ai ma baġenoġoi-iaġomani.” Benamo bouti ai ea raġekauto, ma Efeso eraga-kwaneato.

²² Kaisareai eraġasito nai, kwakuna na Ierusalemna ġana evaraġeto, ekalesia ġesi ġea veġoitaġoto vauro, Antioka ġana evariġo-iaġoto.

²³ Ġaro kotari monai etanuto murinai, Galatia e Frigia tanori ġana eiaġoto, Iesu ġekorana-iaġiato-ġoi tarimari mabarari gabu tatai ġetanuto-ġoi tarimari ea vaġa-kokorerito.

²⁴ Mo horai Iuda tarimana ta arana Apolos, Alesandria ai emaġurito tarimana, Efeso ġana eiaġoto. Ġia ġena riba tu varaġe lelevaġi, guruġai namo vedaurea e Buka Veaġa maki eriba-ginikau-raġeato.

²⁵ Ġia tu Vereġauka ġena dabara ġevaġa-ribaiato, benamo nuġana mabarana ġesi Iesu varina efiuato, e evaġa-riba-iaġi ginikauato. Dagara sebona, ġia tu Ioane ġena babatiso moġo eribaiato.

²⁶ Rubu nuġanai eġobatato-ġoi ma kokorena ġesi. Monai Priskila e Akwila na ġeseġaġiato, benamo ġeġori-kauato, ġia ġetanuni numana ġana ġeġori-iaġoato, monai vauro Barau ġena dabara moġonina ġevaġa-riba ginikauato.

²⁷ Benamo Apolos eurato, Akaia ġana bene iaġo. Moġa lorinai tarikaka Efeso ai ġetanuni na ġevaġa-kavaiato, e fefa ta ġetoreato Akaiai Iesu ġekorana-iaġiato-ġoi tarimari ġeri, ġenoġirito, Apolos eiaġoni nai beġene ġabi-raġea. Apolos ea raġasito nai tu, Barau ġena varevare-bara ġenana Barau ġevaġa-moġoniato tarimari tu vevaġa-kava barego Apolos ġenana ġedoġariato.

²⁸ Korana ġena guruġa kokoreri ġerina Iuda tarimari evaġa-ketorito tari-marima ġutuma ġoirari ai, Apolos na Buka Veaġa na ġeri evaġa-moġoniato-ġoi Iesu tu Keriso, (Barau na ekiraġi-toreato vevaġa-maġuri tauna).

19

Paulo Efeso ai

¹ Apolos tu Korinto ai etanuto-ġoi nai, Paulo gunika rekena na eiaġoto mo Efeso ai ea raġasito. Monai Iesu ġekorana-iaġiato-ġoi tarimari tari edoġaririto,

² benamo edanaġirito, ekirato, “Iesu ġenai ġoveġabidadamato nai, Iauka Veaġa ġoġabiato ba?” Ġia ġevaġa-veseto, ġekirato, “Asiġina, ġai tu Iauka Veaġa maki etanuni guruġana ta tu roġosi maki baġana seġaġia.”

³ Benamo Paulo na ma edanaġirito, ekirato, “Be ġomi na tu kamara babatiso ġoġabiato?” Ġia ġevaġa-veseto, ġekirato, “Ioane ġena babatiso.”

⁴ Benamo Paulo ekirato, “Ioane tu rakava ġerina ġevetuġamaġi-kureto tarimari ebatisorito, ema Isaraela tarimari ekirarito, ġia murina na beiaġomani tarimana beġene ġabidadama-vinia, mo tu Iesu.”

⁵ Mo guruġa ġeseġaiato nai, Vereġauka Iesu aranai babatiso ġeġabiato.

⁶ Paulo ġimana ġia iatari ai etore-kaurito nai tu, Iauka Veaġa emariġoto ġia iatari ai. Benamo garo irauirau ai ġeguruġato, e Barau na ġia ġeri ai evaġa-foforirito guruġari ġevari-fiurito.

⁷ Tauri mabarari tu gabanana ruarua (12) kavana.

⁸ Paulo monai ġue toitoi etanuto. Ma vanaġivanaġi rubu ai eraka-toġato-ġoi, Barau ġena Basileia, (ġena veġitaġau seġukana evaġa-ruġaiani maiġa), eġobata-iaġiato-ġoi ma kokorena ġesi, ema tarimarima ġesi ġeguruġa-iaġiato-ġoi e nuġari eġanirito-ġoi.

⁹ Senaġi tari nuġari tu bubu, be asi ġeseġaġi-viniato, ema tarimarima ġutuma ġoirari ai Vereġauka ġena dabara iatanai guruġa tu rakavari ġekiraġito. Moġa lorinai Paulo na eraga-kwanerito, Iesu ġekorana-iaġiato-ġoi tarimari moġo eġori-kaurito, benamo ġaro mabarari ai Tirano ġena vevaġa-riba numanai evaġa-ribarito-ġoi.

¹⁰ Laġani ruarua moġesina eveito, moġesina naima Asia tanonai ġetanuto-ġoi Iuda tarimari e Grik tarimari mabarari na Barau ġena guruġa ġeseġaġiato.

Skeva natuna

¹¹ Barau na Paulo ġenana veġa boruri irauri eveirito.

¹² Ġia na eġauvei-iaġirito-ġoi mukori e eriġorito-ġoi dabuġari keve tarimari ġeri ai ġeġabi-iaġorito-ġoi nai tu, ġeri keve ġenamoto-ġoi, e iauka rakavari ġia ġerina ġeraka-vaġito-ġoi.

¹³ Iuda tarimari kotari monai ġerakaoto-ġoi ma iauka rakavari ġelai-vaġirito-ġoi tauri na maki Vereġauka Iesu arana ġevatoato iauka rakavari na ġeboroġirito tarimari iatari ai. Iauka rakavari ġekirarito, ġekirato-ġoi, “Paulo na eġobata-iaġiani tarimana Iesu aranai akiramini, ġoraka-vaġi.”

¹⁴ Skeva, Iuda ġeri Rubu Veaġa verena baregona ta, natuna merori imaima ruarua (7) tu moġesina ġeveito-ġoi.

¹⁵ Benamo ġaro ta iauka rakavana na ekirarito, ekirato, “Iesu tu au ribagu, ema Paulo maki ma ribagu, a ġomi tu deikara?”

¹⁶ Benamo iauka rakavana na eboroġiato tarimana na tauri imaima ruarua (7) na eguru-vinirito, ebota-korukorurito. Evaġa-vevaġi rakavarito, be mo numa na ġema raga-rosito tu kefiru kori e ma rarari.

¹⁷ Efeso ai ġetanuto-ġoi tarimari, Iuda e Grik tarimari mabarari, na mo vari ġeseġaġiato nai, ġegari-rakava rakavato, ema Iesu Vereġauka arana ġevaġa-raġe baregoato.

¹⁸ Iesu ġevaġa-moġoniato tarimari vovoka ġeiaġomato, benamo ġutuma ġoirari ai ġeri veġa rakavari ġekiraġi-foforirito.

¹⁹ Meġameġa tarimari ġutuma ġeri meġa bukari ġeġwa-vegogorito, benamo tarimarima mabarari ġoirari ai ġegaburito. Mo buka voiri ġevaġa-vegogorito tu silva moniri 50,000.

²⁰ Mai veġa seġukari ġeġorato ġerina Vereġauka ġena guruġa eraga-rovorovoto, e ebaregoto ma seġukana ġesi.

Efeso ai gururaġe baregona eġorato

²¹ Moġeri muriri ai Paulo nuġanai etuġamaġito, Makedonia e Akaia tanori na bene vanaġi-iaġo Ierusalemata ġana. Ekirato, “Mo ġana bana iaġo murinai, Roma maki bana ġitaia.”

²² Benamo Timoteo e Erasto, ġia ġevaġa-kavaiato-ġoi tarimari ruarua, Makedonia ġana etuġu-iaġorito, a ġia tu Asia tanonai kota roġo etanumaukato.

²³ Mo ġaro sebonai Efeso ai gururaġe baregona eġorato, korana Vereġauka ġena Dabara dainai.

²⁴ Monai silva eġauvei-iaġirito-ġoi tarimana ta arana Demetrio, ġia na barau vavinena arana Diana ġena rubu baregona ġitaġitana ilailanai rubu

misimisiri silva na eveirito-ḡoi. Monana ḡena ḡauvei tarimari moni boruri barego vedaurea ḡedoḡarito.

²⁵ Benamo Demetrio na ḡia mabarari, e ḡia ḡeri ḡauvei kavana tarimari ekea-vegogorito, ma ekirarito, ekirato, “Tau, ḡomi tau mabarami ribami ḡita ḡera moni tu mai ḡauvei na eiaḡomani.

²⁶ Toma ḡomi tauḡemi na ḡoḡitaiani e ḡoseḡaḡiani, mai tarima Paulo na kara eveiani. Ḡia ekirani, tarimarima ḡimari na ḡeveirini barauri tu dia barau, ema ḡia na tarimarima ḡutuma-bara nuḡari eḡanirini, e eḡori-veḡitarini, dia Efeso ai moḡo, senaḡi Asia tanona mabarana maki.

²⁷ Mai tu dia ḡita ḡera ḡauvei namona arana moḡo evaḡa-rakavaiani, senaḡi barau vavinena baregona, Diana, ḡena rubu maki asi aninai beḡe vaḡa-iaḡoani, e Diana iaru-korokorona asi ma beḡe vevato-iaḡiani; aba, mai barau vavinena tu Asia tarimari mabarari e tanobara mabarana na ḡetomarakarariḡo viniani.”

²⁸ Mo guruḡa ḡeseḡaḡiato nai, ḡebaru-rakava rakavato, e ḡekoḡoto, ḡekirato, “Efeso barauna Diana tu iaru-korokoro!”

²⁹ Benamo mo guru baregona eraḡeto na mo vanuḡa barana mabarana tu iauvoiauvo e daradara na eḡauato. Ma Paulo ḡesi ḡerakao-vegogoto-ḡoi Makedonia tarimari ruarua, Gaius e Aristako, tu ḡeḡabi-taririto, benamo marere gabuna ḡana ḡeḡori-ragaraga-iaḡorito.

³⁰ Paulo ḡena ura tu tarimarima ḡutuma-bara ḡoirari ai bene raka-rosi, senaḡi Iesu ḡekorana-iaḡiato-ḡoi tarimari asi ḡeurato, ma ḡeruḡa-ḡauato.

³¹ Asia vereri kotari Paulo ḡatana. Ḡia na maki ḡena guruḡa ḡetuḡuto, ḡenoḡiato, marere gabunai asi bene fofori.

³² Mo vegogo nuḡanai daradara asikeikeina eḡorato, korana tarimarima mabarari irau ḡabaḡabana keakeana ḡeiaḡoto. Ḡeḡabato-ḡoi e ḡekeato-ḡoi nai, tari tu guruḡa ta ḡekiraḡiato-ḡoi, ma kotari tu guruḡa boruri tari ḡekiraḡirito-ḡoi, korana tarima ḡutuma tu asi ribari kara dainai ḡea ḡaru-vegogoto.

³³ Iuda tarimari na Alesanda mo ḡutuma-bara nuḡana na ḡetuḡu-rosiato, tarimarima ḡoirari ai ea ruḡato, Iuda tarimari iatari ai bene guruḡa ḡana. Benamo Alesanda ḡimana na tarimarima elau-taririto asi beḡene gururaḡe ḡana.

³⁴ Senaḡi ḡeḡita-leaiato, ḡia tu Iuda tarimana nai, mabarari vaḡa-sebo mai guruḡa sebona moḡo ḡekoḡo-iaḡi ḡenoḡoi-ḡenoḡoiato-ḡoi, ḡekirato-ḡoi, “Efeso barauna, Diana, tu iaru-korokoro!”

³⁵ Vanuḡa ḡena toretore tauna o klak mo tarimarima ḡutuma evaḡa-magorito, benamo ekirato, “Efeso tarimami, tarimarima mabarari ma ribari, Efeso tu Diana barau vavinena baregona ḡena rubu ḡitaḡauna vanuḡana, e guba na fore veaḡana Diana ilailanai dagarana eketo-firiḡoto ḡitaḡauna vanuḡana maki.

³⁶ Tarima ta na maiḡeri dagara asi bekira-ḡuniḡaurini riba. Moḡa lorinai asi ḡoguru-raḡe, asi ḡovei-taḡuitaḡui.

³⁷ Mai tarimarima na rubu dagarana ta tu asi beḡe lemaia, e ḡera barau vavinena ḡenai maki guruḡa rakavana ta asi beḡe kiraḡi, senaḡi ḡomi na maiḡana boḡo ḡori-iaḡoma-kavari.

³⁸ Bema Demetrio ma ḡena ḡauvei tauri ḡesi ma ḡeri baru tarima ta ḡenai nai tu, ḡita tu ma ḡera gavana, ḡera Kota ḡarori tu vekeo. Monai vauro beḡene vei-roroḡotori.

³⁹ Bema ḡourani dagara ta ma boḡono kiraḡia nai tu, taravatu na evaḡa-moḡoniato vegogonai vauro beḡene guruḡa-iaḡia.

⁴⁰ Toma kara beğora korana beğe danağirani nai, ġita tu bita kerereni. Korana mai gururağe baregona bita veia tu asi tauna ta, e ġera ġaru-vegogo kava anina tu asi bita kirağiani riba.”

⁴¹ Eguruğa-ğosito murinai, ġevevogoto tarimari etuğū-rovorovorito.

20

Paulo tu Makedonia e Grik ġana eiağoto

¹ Mo daradara nuğanai ġekoğoto-ğoi, ġeğabato-ğoi, moğa emeğomeğotarito murinai, Paulo na Iesu ġekorana-iağiato-ğoi tarimari ekea-vegogorito; benamo elaunağirito murinai, eğabi-tuğurito. Benamo ġia tu ma erakato Makedonia ġana.

² Mo gabu nuğari na eraka-vanağito-ğoi nai, guruğa ġutuma ekirağito, tarimarima evağa-kokorerito-ğoi. Monana eiağoto mo, Grik ai evotuto.

³ Monai ġue toitoi etanuto. Bouti na Siria ġana bene iağo ġana eğabikavito-ğoi nuğanai tu esegagito, Iuda tarimari na tu ġia beğene vağia boioğana ġetogaiato-ğoi. Moğa lorinai Makedonia na dabarai bene ġenoğoi-vanaği etato.

⁴ Tarima kotari na ġia ġekavaiato, tarimari tu mağeri: Sopata Piro, Berea tarimana; Aristako e Sekundo, Tesalonika tauri; Gaius, Derebe tarimana; Tikiko e Trofimo, Asia tauri; e Timoteo. Moğeri na ġekavaiato, Asia ġana ġeiağoto.

⁵ ġia tu ġeraka-guineto, Troas ai vau ġai ġea vağa-nogamato.

⁶ Senaği ġai tu Asi Etubuni Faraona Verekona ekorito murinai vau, Filipi ġaraga-kwaneato. Ģaro imaima (5) ġekorito vau, ġia ġeri ai Troas ai ġavotuto, ġavedoğarito. Monai tu ġaro imaima ruarua (7) ġatanuto.

Paulo ġena iağoiago magona Troas ai

⁷ Fura sebona ġena ġaro giniguenenai o Sandei ai ġaraka-vegogoto anibou bağana ġani ġana. Benamo Paulo na mo lavilavi tu tarimarima eğobata-vinirito, eiağoto mo, boği nuğana, korana belağanini ġia tu berakani nai.

⁸ Mo numa tuğuna daiğutunai ġai ġavevogoto, moğa lamefa na tu asisebo ġevağa-ğararito.

⁹ Mero futuana ta arana Eutiko tu windoa nuğanai etanuto. Paulo ġena guruğa emauka-iağoto-ğoi nuğanai, Eutiko matana tu egenagenato-ğoi mo ea gena-vetuğa-rekwato. Benamo mo numa tuğuna na stori vağa-toitoina (o third story) na ea keto-firiğoto mo tano ai. Ģea ġabi-vaisiato nai tu mase.

¹⁰ Senaği Paulo eraka-riğoto, Eutiko iatanai evefiukauto, eregoato, benamo ekirato, “Nuğami asi ġerağe, ġia tu mağuri!”

¹¹ Moğa murinai numa tuğuna ġana ma evarağeto, ma farao ebuki-ğutuato, ġeğanito. Ģena guruğa ma esiriğuatedo, eiağoto mo elağanito, benamo erakato.

¹² Vegogo tarimari na mo futua ġeğoriato, benamo ma verereri ġesi ġerakato.

Paulo Troas na eiağoto mo Mileto

¹³ Ģai tu bouti na Aso ġana ġaiago-guineto, a Paulo tu monai vau ma bağa ġura-kauani. Paulo na tu moğesina ekiramato, korana ġia tu kwakuna na beraka-vanağini etato.

¹⁴ Aso ai ema doğarimato, benamo ġağura-kauato, Mitilene ġana ġaiago.

¹⁵ Monana bouti na ma ġaiago mo elağanito vau, Kioso iata-rağenai ġadarokauto. Mo ġaro murinai tu Samo ai ma ġavotuto, ma ġaro ta ma evanağiato vauro, Mileto ai ġarağasito.

16 Paulo eurato, Efeso tu beĝene raga-vanaĝia, Asia tanonai ĝaro kotari beĝe vaĝa-koririni garina, korana ĝia nuĝana eĝariĝarito-ĝoi. Ĝena ura bema ma dabarana nai tu, Ierusalemaj beĝene votu vauro, Pentekoste ĝarona bene raĝasi, mo tu Pasova ĝaro gabana imaima (50) murinai.

Paulo ĝena veĝabituĝu guruĝari Efeso ekalesiana ĝorikauna tauri ĝeri ai

17 Paulo tu Mileto vanuĝana na Efeso ekalesia ĝorikauna tauri ĝeri guruĝa etuĝu-iaĝoto, ekirarito, beĝene iaĝoma, ĝia ĝesi beĝenema vedoĝari.

18 Ĝia ĝema votuto nai, evaĝa-guruĝarito, ekirato, “Ĝomi ma ribami au ĝaro mabarari ai ĝomi ĝesi tatanuto-ĝoi nai, aiĝesina atanuto, ĝaro tovotovona na Asia tanonai ama raĝasito veĝata.

19 Ĝaro vovoka Iuda tarimari ĝeurato-ĝoi au beĝene kougu, veiĝa rakavari ĝutuma au ĝegu ai ĝeveirito-ĝoi. Senaĝi nuĝagu ma maranana ĝesi moĝo e ma taĝigu ĝesi Vereĝauka vetuĝunaĝina aiaĝo-vinito-ĝoi.

20 Ĝomi ribami, vaĝa-kava-iaĝimi guruĝari mabarari avaĝa-ribamito, ta asi akure-toĝaiato, ĝemi numai e ĝutuma ĝoirari ai avevaĝa-ribato-ĝoi nai.

21 Iuda tarimari e Grik tarimari ĝoirari ai aguruĝa-foforito-ĝoi, ĝeri rakava ĝerina beĝene vetuĝamaĝi-kure, Barau ĝenai beĝene ĝenoĝoi, ema ĝera Vereĝauka Iesu Keriso beĝene ĝabidadama-vinia.

22 Au toma tu Ieruselema ĝana aiaĝoni, korana Iauka Veaĝa na evaĝa-naĝiguni nai, ma asi ribagu monai tu kara ĝegu ai beĝorani.

23 Dagara sebona moĝo au ribagu tu Iauka Veaĝa na vanuĝa baregori mabarari ai evaĝa-ribaguni, au ĝoiragu ai tu dibura numa e midigumidigu evaĝa-noga taĝoguni.

24 Senaĝi au ĝegu ai, au ĝegu maĝuri tu asi atuĝamaĝi-baregoani, kara ĝana atoni, ĝegu ura sebona tu ĝegu raga-iruiru moĝo bana vaĝa-ĝuĝuru, ema mo ĝauvei Vereĝauka Iesu na eviniguto, bana veia etato ĝauveina, bana vaĝa-koria. Mo ĝauvei tu: Barau ĝena varevare-bara Varina Namona bana kiraĝi-foforia.

25 Au tu ĝomi mabarami fakami ai arakao-rakaoto, Barau ĝena Basileia, (ĝena veĝitaĝau seĝukana evaĝa-ruĝaiani maiĝa), ĝemi aĝobata-iaĝiato. A toma au ribagu, ta na asi ma boĝita-ĝenoĝoiguni.

26 Moĝa lorinai toma ĝaro ĝomi ĝoirami ai au aguruĝa-foforini, bema ĝomi ta Barau ĝenana beraka-rekwarekwani nai, verebana tu dia au ĝegu ai.

27 Korana Barau ĝena ura mabarana avaĝa-ribamito, misina ta maki asi akira-ĝuniĝauato.

28 Tauĝemi lorimi boĝono vetore, ema mamoe serina lorina boĝono toreri. Mani mamoe serina tu Iauka Veaĝa na evinimito boĝono ĝitaĝauri ĝana. Barau ĝena ekalesia boĝono ĝita-ĝaua e boĝono ĝori-kaua. Mani tu ĝia Natuna rarana na evoiato.

29 Au ribagu, au barakani murigu ai tu boĝa kwaivari rakavari ĝomi fakami ai beĝe raka-toĝani, benamo mani mamoe serina beĝe vaĝa-rakavaiani.

30 Ĝomi tauĝemi fakami na maki tau kotari beĝe variĝisini, benamo ĝofaĝofa guruĝari beĝe kiraĝini, Iesu ĝekorana-iaĝiani tarimari ĝia na beĝene ĝori-ĝerevaĝiri ĝana.

31 Moĝa lorinai lorimi boĝono vetore! Boĝono vetuĝamaĝi-taĝo, au na tu laĝani toitoi veĝata matagu ma taĝina ĝesi, ĝomi asisiba-vini boĝimito-ĝoi e asisiba-vini laĝanimito-ĝoi.

32 Toma Barau ĝimanai e ĝena varevare-bara guruĝana nuĝanai atoremuni, ĝia na tu bevaĝa-ruĝa-iobukamini ilaila, ema voimi bevinimini evaĝa-veaĝarito tarimari mabarari ĝesi.

³³ Au na ta ġena silva, o golo, o dabuġa urana asi aveito.

³⁴ Ġomi tauġemi ma ribami, au ġegu rabu e karogu ġeri rabu dagarari mabarari tu, mai ġimagu ruarua ġeri ġauvei ġerina aġabito-ġoi.

³⁵ Dagara mabarari nuġari ai au na avaġa-ġita iaġimito-ġoi, au moġesi ġauvei kokorekokore ġerina vauro moira-moira tarimari bitana vaġa-kavari. Iesu Vereġauka ġena guruġa boġono tuġamaġi-taġoa, ekirato, 'Varevare iakuna tu barego, a ġevinirani nai taġoitagioni iakuna tu kei.' "

³⁶ Paulo eguruġa-ġosito vau, ġia ġesi ġevetui-tarito, benamo mabarari ġesi ġeġuriġurito.

³⁷ Ġia mabarari ġetaġi-rakavato, ġevafaġato, ma ġeverauato.

³⁸ Ġia nuġari ġevewaraġi-rakavato tu maiġesina evaġa-guruġarito nai, ekirato, ġia na ġoirana asi ma beġe ġita-ġenoġoiani. Benamo bouti ġana ġeġori-iaġoato.

21

Paulo Ierusalemia ġana eiaġoto

¹ Ġia ġesi ġaveġabi-tuġuto, benamo ġarakato. Davara na ġaiiaġoto, maoromaoro mo Koso ai ġavotuto; ma elaġanito vau Rodes ġana ġaiiaġoto, monana ma ġaiiaġoto Patara.

² Foenikia ġana beiaġoni boutina monai ġadoġariato, ma ġaraġeto, benamo ġaraġato.

³ Ġaboġe-iaġoto Saipras ġaġitaiato, benamo gabina (o south) rekena na ġavanaġito, ġaiiaġoto mo Siria ai ġaraġasito. Taia vafuna na vau ġaraka-riġoto, korana mo bouti farefarena tu monai beġe tore-riġorini nai.

⁴ Iesu ġekorana-iaġiato-ġoi tarimari kotari monai ġadoġaririto, ġia ġesi fura o wiki sebona ġatanuto. Iauka seġukana ġenana ġia na Paulo ġekiraiato, Ierusalemia ġana asi bene iaġo.

⁵ Senaġi ġema raka ġarona eġabiato, benamo ġarakato. Ġia mabarari ma ġaraġori e ma naturi ġesi vanuġa baregona na ġeġori-rosimato kone ai. Benamo ġai mabarama ġavetuitui-tarito, ġaġuriġurito.

⁶ Ġia tata ġesi ġaveġabi-tuġuto, benamo ġai tu bouti baregonai ġaraġeto, a ġia tu monana ġeġenoġoito ġeri numa ġari.

⁷ Taia na ġaiiaġoto Tolemais. Ġema davara iaġoiaġona dokona moġa. Monai tarikaka tari ġesi ġavedoġarito, ma ġavaġa-namorito, ġia ġesi ġaro sebna ġatanuto.

⁸ Elaġanito, benamo kwakuma na ġarakato, ġaiiaġoto, Kaisarea ai ġaraġasito. Monai evanelia tarimana arana Filipino ġena numa ġana ġaiiaġoto, ġia ġesi ġatanuto. Ġia tu Ierusalemia tarima imaima ruarua (7) ġeġabi-viriġirito tarimana ta.

⁹ Ġia natuna ġuiatori vasivasi tu Barau na peroveta varevarena evinirito.

¹⁰ Ġaro vovoka monai ġatanuto murinai, peroveta tarimana ta arana Agabo, Iudea na ema raġasito.

¹¹ Ġia tu ġai ġemai eiaġomato, ma Paulo ġena gabaġau eġabi-vaisiato, benamo ġia tauġena kwakuna e ġimana ebarubarurito, benamo ekirato, "Iauka Veġa tu maiġesi ekirani, 'Mai gabaġau tarimana tu Iuda tarimari na Ierusalemia maiġesina beġe barubaruani, benamo irau bese tarimari ġimari ai beġe tore-kauani.' "

¹² Mai guruġa ġaseġaġiato nai, ġai ema monai tarima kotari ġesi Paulo ġanoġiato, Ierusalemia ġana asi bene iaġo.

13 Senaġi ġia evaġa-veseto, ekirato, “Kara taġina ġoveini e au nuġagu ġovaġa-moiraiiani? Au tu rovinatore, dia Ierusalemaj beġe barubaruguni moġo, senaġi Vereġauka Iesu arana bakunai bamaseni maki.”

14 Ġai tu asi ilaila ġia nuġana baġa ġaniani nai, ma ġia noġinoġina ġavaġa-dokoato, benamo ġakirato, “Vereġauka ġena ura moġo bene vetore.”

15 Ġaro kotari ġekorito murinai, ġema farefare ġaġabi-kavirito, benamo Ierusalemaj ġana ġaiagoto.

16 Kaisarea ai ġetanuto-ġoi Iesu ġekorana-iaġiato-ġoi tarimari kotari maki ġai ġesi ġaiagoto. Ġia na ġeġori-iaġomato, Nason, Saipras tarimana, ġena numa ġana. Nason tu kai-veġata na Iesu ekorana-iaġiato-ġoi tarimana.

Paulo na Iakobo (o Iames) eraka-ġitaiato

17 Ierusalemaj ġaraġasito nai tu, tarikaka na ma iakuri ġesi ġeġabi-raġemato.

18 Elaġanito, benamo Paulo tu ġai ġesi ġaiagoto Iakobo ġitaġitana; ma rubu ġorikauna tarimari mabarari tu monai vegogotaġo.

19 Paulo na evaġa-namorito murinai, ġia ġena ġauvei ġenana Barau na irau bese tarimari kamasi eveirito-ġoi variri mabarari ġeri ekiraġito.

20 Ġia na ġeseġaġiato nai, mabarari na Barau ġevaġa-raġeato. Benamo ġia na Paulo ġekiraiato, ġekirato, “Tarikakama, oġitaiani Iuda tarimari vira-tausen varau Iesu ġeġabidadama-viniani, ema taravatu maki ġekorana-iaġi gigitariani.

21 Ġoi varimu tu ġia ġekira-vararito. Ġekirarito, ġoi na irau tano ai ġetanuni Iuda tarimari mabarari ovaġa-ribarini, okirani, Mose ġena taravatu beġene raga-kwanea, naturi merori tauġaniri kefiru asi beġene lama-vaġiri, ema Iuda seneri ġeri veġa asi beġene korana-iaġiri.

22 Be, ġai tu kamasi toma ġaveini? Ġoi boma raġasi varina tu beġe seġaġiani veġata.

23 Moġa lorinai kara baġa kiravara-vinimuni veġana bono veia. Tauri vasivasi (4) maiġeri, ġia tu kiraġitore gwaġiġina ta ġeveiato Barau ġenai.

24 Ġia ġesi boġono iaġo, e ġoi maki ġia ġesi boġono veiareva, ema beġe ġwa-iaġoni dagarari voiri bono vei, be ġia debari beġe rarorini. Maiġesi boveini vau, tarimarima mabarari beġe ribani, ġoi iatamu ai ġekiraġirito-ġoi guruġari mabarari tu asi moġoni, a ġoi tauġemu maki Mose ġena taravatu ilailanai otanuni.

25 Irau bese ġeveġabidadamani tarimari tu ġeri fefa varau ġatuġuto, ġakirarito, kwaivakuku ġevinirito ġaniġaniri tu asi beġene ġaniri, rara e ġaiġori na ġebora-maserini bureġari viriġori tu asi beġene ġani, ema asi beġene mata-boraġa.”

26 Benamo Paulo na mo tarima vasivasi evaġa-ġabirito, benamo elaġanito nai, mabarari veiareva ġauveina ġea veiato. Moġa murinai Rubu Veaġai eraka-toġato, ma aitoma veiareva bemagoni ġarona, ema aitoma varevare dagarari ġia tata arari ai betoreni ekiraġi-foforirito.

Iuda tarimari na Paulo Rubu Veaġai ġeġabi-tariato

27 Ġeri veiareva ġauveina tu ġaro imaima ruarua (7); dori ġekorito nuġanai, Iuda tarimari kotari Asia tanona na ġeiaġomato, ġia na Paulo Rubu Veaġai ġeġitaiato. Ġia na tarimarima mabarari nuġari ġeġanirito, benamo Paulo ġeġabi-tariato,

28 ġekoġoto, ġekirato, “Isaraela taumi, ġai ġovaġa-kavama! Mai tarima maiġa tu gabu mabarari ġari eiaġoni, tarimarima mabarari evaġa-ribarini; Isaraela tarimari, e Mose ġena taravatu, ema mai Rubu Veaġa asi beġene

korana-iaġia etoni. Toma maki, ġia na Grik tarimari mai Rubu Veaġa nuġanai beġori-toġari, mai gabu veaġana bevaġa-rakavaia.”

²⁹ Moġesina ġekirato, korana ġia na Efeso tarimana arana Trofimo, Paulo ġesi mo vanuġa baregonai ġeġitarito, ema ġetuġamaġito, ġia tu Paulo na Rubu Veaġai eġori-toġaiato.

³⁰ Vanuġa mabarana iauvoiauvo e daradara na eġabiato, ema tarimarima mabarari monai ġema ġaru-vegogoto, benamo Paulo ġeġabi-tariato, Rubu Veaġa na ġeinu-rosiato. Asikauna Rubu Veaġa ġatama-bokari ġebiririto.

³¹ Ġia na Paulo ġevaġi-masea ġetato-ġoi nuġanai, tarima ta eraga-varaġeto, Roma vetari verena baregona ea kira-varaiato, Ierusalem mabarana tu gururaġe baregona ġeveiani.

³² Ġia tu asikauna ġena vetari ġitaġauna tarimari e vetari tarimari eġoririto, benamo ġeraga-riġoto mo ġutuma-bara ġeri ai. Tarimarima na vetari verena baregona ma ġena vetari tauri o soldia ġesi ġeġitarito nai, ġia na Paulo kwarikwarina ġevaġa-dokoato.

³³ Benamo vetari verena baregona Paulo ġenai eiaġoto, eġabiato, ġena mero ekirarito, seini ruarua na beġene baru-taria. Benamo evedanaġito, ekirato, “Mai tu kamara tau, e ġia tu kara beveia?”

³⁴ Mo ġutuma-bara nuġanai tari ġefararato-ġoi; guruġa ta ġekiraġiato-ġoi, ma kotari na tu guruġa ta, be vetari verena baregona na maki guruġa roroġotona ta asi eġabiato. Moġa lorinai ġena mero ekirarito, Paulo tu vetari tarimari ġeri gabu ġana beġene ġori-iaġoa.

³⁵ Raġekau ai ġeġori-votuato nai tu, vetari tarimari na ġefaġa-vaisiato, ġeġwa-raġeato, korana mo tarimarima mabarari tu ġeniara-lelevaġito nai.

³⁶ Mo tarimarima mabarari ġia murina na ġeraka-iaġoto tu, ġefararato-ġoi, ġekirato, “Ġovaġi-masea!”

Paulo tauġena evelauġau-tovoto

³⁷ Dori moġo vetari tarimari ġeri numai ġeġori-toġaiato nuġanai, Paulo na vetari verena baregona evaġa-guruġaiato, ekirato, “Bavaġa-guruġamuni lorinai ba?” Ġia na evaġa-veaseato, ekirato, “Ġoi Grik ġeri garo ma ribamu?”

³⁸ Be ġoi tu dia mo Aigupito tarimana, ġaro kotari varau beġe iaġo, ġia na gavamani vevaġi-vinina esinaiato, ema vaġideba tarimari daġara vasivasi (4,000), ma ġeri vevaġi farefareri ġesi, tano fakana ġana eġori-iaġorito tarimamu?”

³⁹ Paulo na evaġa-veaseato, ekirato, “Au tu Iuda tarimagu, amaġurito vanuġana baregona arana tu Taso, ma arana vanuġana, ġia Kilikia tanonai. Anoġimuni, mani ġemu veiġa, mai tarimarima navaġa-guruġari.”

⁴⁰ Vetari verena baregona na maoro eviniato, benamo Paulo raġekau ai eruġato, ġimana na tarimarima elau-taririto. Gururaġe emagoto, benamo Paulo na Heberu garo ai evaġa-guruġarito.

22

¹ “Tarikakagu e tamagu mabarami, ġoirami ai navekiraġi-faka, be boġono seġaġi.”

² Ġia ġeseġaġiato, Heberu garo ai evaġa-guruġarito nai, asi gurugururi ai ġeiaġoto, mabarari ġeseġaġi-magomagoto; benamo Paulo ekirato:

³ “Au tu Iuda tarimagu, Taso vanuġanai Kilikia tanona nuġanai amaġurito, senaġi mai Ierusalem vanuġa baranai abaregato. Gamaliel ġena vevaġa-riba nuġanai atanuto-ġoi, ġia na ġita senera ġeri taravatu veiġari gwaġiġiri evaġa-ribaguto-ġoi, ema Barau ġena ġauvei aveiato-ġoi ma kokoregu ġesi, toma ġomi na ġokokore-iaġiani ilailanai.

⁴ Au na mai dabara ġekorana-iaġiato-ġoi tarimari tu аваġa-midigu midigurito-ġoi mo ġea maseto-ġoi. Tau e vavine aġabirito-ġoi, dibura numari ai abubu-toġarito-ġoi.

⁵ Rubu Veaġa verena baregona e kanisoro tarimari mabarari na maki beġe vaġa-moġoniguni, au tu moġoni akirani. Au tu ġia na maki fefa ġeviniguto, tarikaka Iuda tarimari Damaseko ai ġeri bana viniri ġana. Benamo au mo ġana aiaġoto, mai tarimarima bana ġabiri, seini na bana barubaruri ma Ierusalem a ġana bana ġori-iaġori, ġeri rakava voiri beġene ġabiri ġana.”

Paulo ġena vetuġamaġi-kure ekiraġiato

⁶ “Au roġo dabara na aiaġoto-ġoi, ma Damaseko akavinaġiato, ġaro tu tubuagu ai mama baregona ta guba na emariġoto, asikauna ema nanagi-tariguto.

⁷ Au tano ai aketo-tarito, ema ġaro ta aseġaġiato, au evaġa-guruġaguto, ekirato, ‘Saulo! Saulo! Karase nai au ovaġa-rakavaguni?’

⁸ Benamo au avedanaġito, akirato, ‘Vereġauka, ġoi tu deikara?’ Ġia evaġa-veseto, ekirato, ‘Au tu Iesu, Nasareta tarimagu, ġoi na ovaġa-rakavaguni tarimagu.’

⁹ Au karogu maki na mama ġeġitaiato, benamo ġegarito, senaġi au eguruġa-viniguto garona tu asi ġeseġaġiato.

¹⁰ Benamo avedanaġito, akirato, ‘Vereġauka, au tu kara toma aveiani?’ Vereġauka evaġa-veseto, ekirato, ‘Novariġisi, Damaseko ai noa raka-toġa, monai vau ta na bevaġa-ribamuni, ġoi tu kara boveini.’

¹¹ Mo mama baregona na matagu evei-bubuato, benamo karogu na ġimagu ai ġeġabito, Damaseko ġana ġeġori-iaġoguto.

¹² Monai tau ta arana Anania, ġia tu Barau garina eveito-ġoi e taravatu ekorana-iaġiato-ġoi tarimana, ema Iuda tarimari mabarari Damaseko ai ġetanuto-ġoi na ġegubakau-baregoato-ġoi.

¹³ Ġia eiaġomato sevigu ai ema ruġa-tarito, benamo ekirato, ‘Saulo tarikakagu, matamu ma nefafa.’ Asikauna moġo matagu ġefafato, ġia aġitaiato.

¹⁴ Moġa murinai Anania na ekiraguto, ekirato, ‘Ġita senera ġeri Barau na varau beġabi-viriġimu, ġia ġena ura kara bono veia, bono ribaia. Ema vei iobukaiobuka tarimana bono ġitaia, e ġia tauġena muruna na beguruġani garona bono seġaġia.

¹⁵ Korana ġoi tu ġia bovaġa-moġoniani tarimamu, kara boġita e boseġaġi maiġeri, tarima mabarari bokira-vararini.

¹⁶ Kara ma ovaġa-nogaiani? Novariġisi, babatiso noġabia. Ġia arana nokea-raġea, benamo ġemu rakava neġuriġi-vaġiri.’”

Paulo ġena kea irau bese tarimari bene ġobata-viniri ġana

¹⁷ “Monana Ierusalem a ġana aġenoġoito, benamo Rubu Veaġai aġuriġurito-ġoi nuġanai, amata-vanaġito.

¹⁸ Monai au na Vereġauka aġitaiato, au evaġa-guruġaguto, ekirato, ‘Noraga-vei, Ierusalem a noragakwane-ġarimoġia, korana mainai au varigu bokiraġiani, senaġi mai tarimarima na asi beġe vaġa-moġonimuni.’

¹⁹ Au na аваġa-veseato, akirato, ‘Vereġauka, ġia tu ma ribari ginikau, au rubu mabarari ġana aiaġoto-ġoi, ġevaġa-moġonimuni tarimari aġabirito-ġoi, dibura numanai abiri-ġaurito-ġoi e akwaririto-ġoi.

²⁰ Ema ġoi evaġa-moġonimuto-ġoi tarimana Stefano rarana ġevaġa-riġoato ġaronai au tu monai, ġevaġi-maseato avaġa-moġoniato, ema ġevaġiato-ġoi tarimari ġeri dabuġa anaririto.'

²¹ Senaġi Vereġauka na ekiraguto, ekirato, 'Noiaġo, korana au na batuġumuni, irau bese tarimari gabu manaġai ġetanuni tarimari ġeri ai.' "

²² Tarimarima na Paulo ġeseġaġi-taġoato-ġoi, eiaġoto mo, ġia moġesi eguruġato. Benamo ġefararato, ġekirato, "Ġoġabi-fitoġaia! Ġovaġi-masea! Ġia tu asi ġena namo ta emaġuri-taġoni mai tanobarai."

²³ Ġeġabato-ġoi, ġeri dabuġa ġeiave-iaverito-ġoi, e forara ġefiu-vaisito-ġoi.

²⁴ Roma ġeri vetari verena baregona na ġena mero ekirarito, Paulo beġene ġori-iaġoa, vetari tarimari ġeri tanu gabuna ġana. Ema ekirarito beġene kwaria, e beġene danaġia kara ġaramanai ġia moġesi ġeġabaġaba-viniani, bene kira-varari.

²⁵ Senaġi ġebarubaruato-ġoi beġene kwaria ġana nuġanai Paulo na vetari ġitaġauna tarimana ekiraiato, ekirato, "Mai moġoni taravatu nuġanai eki-raġiani, ġoi na Roma tarimana bokwari-guinea; a ġia na kara bevei-leaia Kota na tu roġosi bere kira-varaia, senaġi?"

²⁶ Mo vetari ġitaġauna tarimana na mo guruġa eseġagiato, benamo eraga-iaġoto vetari verena baregona ġenai, ekiraiato, ekirato, "Ġoi tu kara toma oveiani? Mo tarima tu Roma tarimana!"

²⁷ Moġa lorinai vetari verena baregona eiaġoto Paulo ġenai, benamo ea danaġiato, ekirato, "Nokira-varagu, ġoi tu Roma tarimamu ba?" Paulo evaġa-veseto, ekirato, "Oi."

²⁸ Benamo vetari verena baregona ekirato, "Au Roma tarimagu ai aiaġoto tu moni baregona gavamani avinirito." Paulo evaġa-veseto, ekirato, "Senaġi au tu Roma beseri ġerina aġorato Roma tarimagu."

²⁹ Asikauna Paulo beġe danaġiani tarimari ġeruġa-ġenoġoito, ema vetari verena baregona maki egarito, korana eriba-maoroto, Paulo tu Roma tarimana, ġia na ebarubaruato ġekwaria ġana.

Paulo kanisoro ġoiranai

³⁰ Ma elaġanito, vetari verena baregona ġena ura bene riba-maoro, kara dainai Iuda tarimari na Paulo ġevaġa-daġaiato. Moġa lorinai ġia na Paulo ġebaruato varori ġeruġarito, benamo Rubu Veaġa vereri baregori e kanisoro mabarana ekirarito beġene vegogo. Benamo ġia na Paulo eġori-iaġoato, ġia ġoirari ai ea vaġa-ruġaiato.

Paulo Iuda ġeri kanisoro tarimari ġoirari ai

23

¹ Paulo na kanisoro tarimari eġita-karakararito, benamo ekirato, "Tarikakagu mabarami! Au tu ma nuġa iobukaiobukagu ġesi Barau ġoiranai atanuni, beiaġoma mo initoma."

² Paulo moġesina eguruġato nai tu, Rubu Veaġa verena baregona Anania na Paulo sevinai ġeruġa-taġoto-ġoi tauri ekirarito, Paulo bokana beġene foro-ġaua.

³ Benamo Paulo na ekiraiato, ekirato, "Ġoi tu Barau na beforomuni, ġoi kobe ġevaġa-kurokuroato kavana, rakava asi beġene ġitaia ġana, ġofaġofa tarimamu! Ġoi maninai botanu tu taravatu ilailanai au okota-viniguni, senaġi ġoi tauġemu na taravatu boleiaia, tarima bokirari, au ġeforogu bos!"

⁴ Paulo sevinai tauri na ġekiraiato, ġekirato, "Ġoi tu Barau ġena Rubu Veaġa verena baregona ġenai guruġa rakavari okiraġini!"

⁵ Paulo evaĝa-veseto, ekirato, “Tarikakagu, au tu asi bariba-maoro ĝia tu Rubu Veaĝa verena baregona. Korana ribagu Buka Veaĝai tu ekirani, ‘Ĝomi ĝemi vere tu asi boĝono guruĝa-rakava vinia.’ ”

⁶ Paulo na ĝia tari eĝitarito tu Sadukea tarimari, ma kotari tu Farisea tarimari, benamo kanisoro ĝoiranai ekoĝoto, ekirato, “Tari-kakagu, Isaraela tarimami, au tu Farisea tarimagu, Farisea tarimana natuna. Au tu vevaĝa-kota gabunai maiĝegu, korana au ĝegu tuĝamaĝikau, mase tarimari tu ma beĝe variĝisi-ĝenoĝoini!”

⁷ Moĝesi ekirato, benamo Farisea tarimari ema Sadukea tarimari ĝeveĝare-veĝareto, ema ĝeri vegogo maki evetavi-kirato.

⁸ Korana Sadukea tarimari ĝekirani, tarimarima mase na tu asi ma beĝe variĝisi-ĝenoĝoini, ema aneru e iauka tu asi ĝetanuni; a Farisea tarimari na moĝeri mabarari tu ĝevaĝa-moĝonirini.

⁹ Moĝesina naima fararafarara guruna ebaregoto-ĝoi, nuĝanai taravatu ĝevevaĝa-riba iaĝiato-ĝoi Farisea tarimari ĝeruĝa-vaisito, ma kokoreri ĝesi ĝeguruĝato, ĝekirato, “Mai tarima ĝenai rakava ta tu asi bita doĝaria! Bema ĝia tu iauka na o aneru ta na moĝoni bevaĝa-guruĝaia nai tu, Barau asi sivaĝa-vevaĝia!”

¹⁰ Veĝareveĝare eseĝuka-ĝaraĝarato nai, vetari ĝitaĝauna tarimana baregona egarito, Paulo beĝe inu-vedare vedareani garina. Moĝa lorinai ĝena vetari tauri ekirarito, beĝene rakariĝo-iaĝo, Paulo beĝene ĝabi-veĝitaia Iuda tarimari fakari na, benamo vetari tauri ĝeri numa ĝana beĝene ĝori-iaĝoa.

¹¹ Ma elaĝanito boĝinai, Vereĝauka Paulo sevinai ema ruĝa-tarito, benamo ekirato, “Ĝoi na mai Ierusalemaj au okiraĝi-foforiguto ilailanai, Romaj maki moĝesi bonoa kiraĝi-foforigu.”

Paulo vaĝivaĝina boioĝana ĝetogato

¹² Ma elaĝanito boĝiboĝinai, Iuda tarimari kotari ĝevevogoto, ma boioĝa ta ĝetogaiato. Ĝia na kiraĝitore guruĝana gwaĝiĝina ĝekiraĝiato, ĝekirato kara ta asi beĝe ĝaniani e asi beĝe niuani, beiaĝoni mo, Paulo beĝe vaĝiani.

¹³ Mo boioĝa ĝetoga-vegogoto tauri mabarari tu gabana vasivasi (40) maki evanaĝiato.

¹⁴ Benamo ĝeiaĝoto Rubu Veaĝa vereri baregori e Iuda vereri ĝeri ai, ma ĝea kirato, ĝekirato “Ĝai tu kiraĝitore guruĝana gwaĝiĝina baĝa kiraĝia, asi baĝa ĝaniĝanini, beiaĝoni mo, Paulo baĝa vaĝi-maseani.

¹⁵ Maitoma ĝoi ma kanisoro ĝesi noĝinoĝi guruĝana ĝotuĝu-iaĝoa, Roma ĝeri vetari verena baregona ĝenai, be Paulo ĝomi ĝemi ai bene tuĝu-mariĝoa, boĝono ĝofa-ĝaua, boĝono kira, ĝomi na Paulo ĝoura-viniani, korana ĝia ĝenana guruĝa iobukana boĝono ĝabia ĝana. Senaĝi ĝai tu baĝa vaĝa-noga-taĝoni, mainai roĝosi berema raĝasi, a ĝai na tu baĝa vaĝi-maseani.”

¹⁶ Senaĝi Paulo tobana natuna merona na mo boioĝa eseĝaĝi-kauato, benamo eiaĝoto, vetari tauri ĝeri numai eraka-toĝato, ma Paulo ekiravaraiato.

¹⁷ Benamo Paulo na vetari ĝorikauna tarimana ta ekeaiato, benamo ekiraiato, ekirato, “Mai mero variĝuna vetari verena baregona ĝenai noĝori-iaĝoa. Korana ĝia na ĝena guruĝa ta beĝwa-iaĝomaia, bene kira-varaia.”

¹⁸ Ma vetari ĝorikauna tarimana na eĝori-iaĝoato vetari verena baregona ĝenai, ekirato, “Dibura numanai tarimana, Paulo na bekeagu e benoĝigu, mai mero variĝuna ĝoi ĝemu ai bana ĝori-iaĝomaia, korana ĝia na ĝemu guruĝa ta beĝwa-iaĝomaia, bene kira-varamu ĝana.”

¹⁹ Vetari verena baregona na ĝimanai eĝabito, eĝori-ĝerevaĝiato vauro, edanaĝiato, ekirato, “Kara ourani ĝegu nokiraĝia?”

²⁰ Ĝia ekirato, “Iuda tarimari na guruĝa ta beĝe vaĝa-moĝonia, boinani beĝene vei-ĝofakau, benamo ĝoi beĝene noĝimu, be Paulo bono tuĝu-variĝoa kanisoro ĝoirana ĝana. Ĝeri veĝofaĝau guruĝana ĝoi beĝene kiramu tu, ĝia ĝeri ura Paulo varina korikori kotari ma beĝene ĝabi.

²¹ Senaĝi asi bono seĝaĝi-viniri, korana tau mabarari gabana vasivasi (40) bevanaĝia tu beĝe gumuni, ĝia beĝe vaĝa-nogaiani. Ĝia tu kiraĝitore guruĝana gwaĝiĝina ĝekiraĝiato, asi beĝe ĝaniĝanini e dagara ta asi beĝe niuani, beiaĝoni mo, Paulo beĝe vaĝi-maseani. Mo veĝa beĝene veia ĝana, ĝia toma tu beĝe veikavi, ĝoi ĝemu vaĝa-vese moĝo ĝevaĝa-noga taĝoani.”

²² Vetari verena baregona na ekiraiato, ekirato, “Au ĝegu bokiraĝi guruĝana maiĝa, tarima ta asi ma bonoa kira-varaia.” Benamo ĝia na mero variĝuna etuĝu-rakaiato.

Paulo Gavana Feliki ĝenai etuĝu-iaĝoato

²³ Benamo vetari verena baregona na ĝena vetari ĝorikauna tauri ruarua ma ekearito, benamo ekirarito, ekirato, “Vetari tauri sinau ruarua (200), e hosi ai raĝe tarimari gabana imaima ma gabana ruarua (70), ema auri fiu tauri sinau ruarua (200) boĝono ĝabi-toreri, toma boĝi horaĝauna 9 koloko Kaisarea ĝana boĝono iaĝo ĝana.

²⁴ Paulo bene raĝe hosiri tari maki boĝono rovina-toreri, be Gavana Feliki ĝenai maĝuri boĝono ĝori-iaĝoa ĝana.”

²⁵ Benamo vetari verena baregona na fefa ta maiĝesina etoreato:

²⁶ “Au Klaudia Lisia na ĝoi Feliki, gavana tarimamu namo vedaureamu, atore-vinimuni: Avaĝa-namomuni!

²⁷ Iuda tarimari na mai tau ĝeĝabiato, ma dori moĝo ĝevaĝi-maseato. Senaĝi au aribato, ĝia tu Roma tarimana naima ĝegu vetari tauri ĝesi ĝaiaĝoto, ĝavaĝa-maĝuriato.

²⁸ Au aurato tu bana riba, kara koranai ĝevaĝa-daĝaiato-ĝoi, moĝa lorinai aĝori-variĝoato, ĝeri kanisoro ĝoirana ĝana.

²⁹ Au na adoĝariato tu ĝia ĝeri taravatu ĝaramanai ĝevaĝa-daĝaiani, senaĝi ĝia beĝene vaĝi-masea o dibura numanai beĝene torea korana ta tu asi adoĝariato.

³⁰ Iuda tauri na beĝene vaĝi-masea ĝana, boioĝana ĝetogato varina ĝegu ĝekiraĝito nai, atuĝamaĝito, ĝoi ĝemu ai bana tuĝu-iaĝosia. Ĝia ĝevaĝa-daĝaiani tarimari maki akirarito, ĝoi ĝoiramu ai ĝeri vevaĝa-daĝa guruĝari beĝene kiraĝiri.”

³¹ Vetari tauri na ĝekirarito veĝana ĝeveiato. Mo boĝi, ĝia na Paulo ĝeĝabi-iaĝoato mo Antipatri.

³² Elaĝanito vau, vetari tauri kwakuri na ĝerakani tauri ĝeri tanu gabuna ĝana ĝeĝenoĝoito. Hosi tauri moĝo Paulo ĝesi ĝeiaĝoto.

³³ Kaisareai ĝea raĝasito, benamo fefa ĝeĝabiato, gavana ĝeviniato, ema Paulo maki ĝevini-vanaĝiato.

³⁴ Gavana na fefa eiaviato, benamo Paulo edanaĝiato, ĝia tu kamara gabu tarimana. Ĝia eribato Paulo tu Kilikia tarimana nai,

³⁵ ekirato, “Ĝevaĝa-daĝamuni tarimari beĝema raĝasini vauro, kara oveileiato guruĝana au na baseĝaĝimuni.” Benamo gavana ekirato, Paulo beĝene ĝabi-iaĝoa, Kota numanai beĝenea ĝita-ĝaau. Mo Kota numana tu Heroda na maĝurinai eragaiato.

24

Iuda tarimari na Paulo ĝevaĝa-daĝaiato

¹ Ĝaro imaima ĝekorito murinai, Rubu Veaĝa verena baregona, Anania, Kaisarea ĝana evariĝoto, Iuda vereri kotari e taravatu ma ribana tarimana ta arana Teretulo ĝesi. Mabarari ĝevariĝoto, Gavana Feliki ĝoiranai vauro Paulo ĝevaĝa-daĝaiato guruĝana ĝea kiraĝiatio.

² Paulo ekea-toĝaiato, benamo Teretulo na Paulo ĝevaĝa-daĝaiato guruĝana ĝoiranai ekiraĝirito, ekirato, “Namo vedaurea veremu Feliki! Ĝoi ĝemu veĝitaĝau gaburenai tu maino ai baĝa tanu-mauka kenene, e ĝema bese bene namo ĝana, dagara namori vovoka bovaĝa-variĝu ĝenoĝoiri.

³ Mai tu gabu mabarari ai e ĝaro mabarari ai ĝai na ĝaĝabi-raĝeani, moĝa lorinai ĝoi tu ĝavaĝa-namo baregomuni.

⁴ Au asi aurani, ĝoi ĝemu taimi bana vaĝa-kori-kavaia, senaĝi anoĝimuni, novetuĝa-ĝwama, asi bono baru, be ĝema guruĝa kubina tu noseĝaĝia.

⁵ Ĝai na mai tau ĝadoĝariato tu, rakava vaĝa-ĝorana tarimana, ĝia na gururaĝe barego evaĝa-ĝorarini, Iuda tarimari tano mabarari ai ĝetanuni fakari ai. Ĝia tu Nasareta doĝorona ĝeri veĝorikau tarimana ta.

⁶ Ĝia na tu Rubu Veaĝa maki nevaĝa-rakavaia etato, senaĝi ĝai na ĝaĝabi-tariato, [ĝema taravatu ilailanai baĝana vaĝa-kotaia ĝatato.

⁷ Senaĝi vetari verena baregona, Lisia, ema raka-toĝato, benamo ma ĝaramana ĝesi Paulo ĝai ĝimama na ema ĝabi-veĝitaiato.

⁸ Benamo Lisia ĝena guruĝa ilailanai, ĝia vaĝa-daĝana tarimari tu ĝoi ĝoiramu ĝana beĝe iaĝoma.] Ĝoi tauĝemu na ĝia bodanaĝi-ginikauani vauro, ĝia ĝavaĝa-daĝaiani dagarari mabarari tauĝena na bekira-varamuni.”

⁹ Iuda tarimari maki ĝia ĝesi ĝekauto, ĝekirato mai bekiraĝiri dagarari mabarari tu moĝoni.

Paulo ĝena vetoreĝau guruĝana Feliki ĝoiranai

¹⁰ Gavana na Paulo vetoĝa ta evei-viniato Paulo ma bene guruĝa ĝana, benamo Paulo eguruĝato, ekirato, “Au ribagu, laĝani ĝutuma varau beĝe iaĝo, ĝoi tu mai bese tarimari ĝeri Kota ĝitaĝauna ĝauveina oveiani. Moĝa lorinai au tu ma iakugu ĝesi ĝegu vetoreĝau guruĝana ĝoi ĝoiramu ai akiraĝiani.

¹¹ Ĝoi tauĝemu na maki asikauna boraga-doĝariani, ĝaro gabanana ruarua (12) maki roĝosi bene vanaĝia nuĝanai, au tu Ierusalemata ĝana toma-rakariĝo avaraĝeto.

¹² Ma mai au ĝevaĝa-daĝaguni tarimari na ta ĝesi Rubu Veaĝai ĝaveĝare-veĝareto-ĝoi nuĝanai asi ĝedoĝariguto, ema asi ĝedoĝariguto tarimarima avaĝa-vegogorito rubu nuĝanai o gabu tai vanuĝa baregona nuĝanai.

¹³ Ema mai ĝevaĝa-daĝaguni dagarari maki ĝoi ĝoiramu ai asi beĝe vaĝa-moĝonirini riba.

¹⁴ A mai tu moĝoni akirani, au na tu ĝai senema ĝeri Barau atoma-rakariĝo viniani e mo Dabara Variĝuna akorana-iaĝiani, ma mai dabara ĝia tauĝeri na tu dabara ĝofaĝofana ĝetoni. Mose ĝena taravatu ema peroveta tarimari na ĝetorerito guruĝari mabarari tu avaĝa-moĝonirini.

¹⁵ Au ĝegu tuĝamaĝikau Barau ĝenai e mai tau ĝeri tuĝamaĝikau tu sebona moĝo, moĝa tu maĝesi: Vei-iobukaiobuka tarimari e vei-rakava tarimari mabarari mase na ma beĝe variĝisi-ĝenoĝoini.

¹⁶ Moĝa lorinai au tu vanaĝivanagi nuĝagu bene iobukaiobuka vededeg-wana aveini Barau ĝoiranai e tarimarima ĝoirari ai.

¹⁷ Laĝani kota vovoka varau ĝeiaĝoto, au na Ierusalemata araga-kwaneato. Moĝa murinai au ma baĝenoĝoi-iaĝo ĝegu tarimarima ĝeri ai, asi ĝeri-ĝari tarimari ĝeri moni baĝabi-iaĝo e varevare dagarari Barau bana vinia ĝana.

18 Ma au tu taravatu na ekiraġiani ilailanai veiareva veigana avaġa-koriato nuġanai, Asia tanona na ġeiaġomato Iuda tauri kotari na Rubu Veaġa nuġanai ġedoġariguto. Moġa nuġanai au sevigu ai tu ġutuma-barana ta asiġi, e ta ġesi maki asi aveġare-veġareto-ġoi.

19 Moġeri Iuda tarimari Asia tanona na ġeiaġomato beġere iaġoma, be ġoi ġoiramu ai au beġerema vaġa-daġagu, beġere kira-varamu, au na tu kamara rakava aveiato.

20 A mai tarima maiġeri na ġekiraġi-foforia, au kanisoro ġoiranai aruġato ġaronai, au ġegu ai tu kamara rakava ġedoġariato.

21 Senaġi dagara sebona moġo tu, ġia ġoirari ai aruġato, afararato, akirato, ‘Mase tarimari ma beġe variġisi-ġenoġoini atoni naima, ġomi na au toma ġovaġa-kotagu ġotoni.’”

22 Mo Dabara, (mai tu Iesu Keriso ġabidadama-vinina dabarana), Feliki tu ma eriba-ginikauato. Ġia na Kota ma etuġu-naġiato, ekirato, “Vetari verena baregona, Lisia, beraġasini vau, au na ġomi ġemi guruġa bavei-roroġotoani.”

23 Benamo ġia na vetari ġitaġauna tarimana ekiraiato, Paulo dibura numanai beġene ġita-ġaua, senaġi ġitaġauna asi beġene vei-gwaġiġia. Ġatana kotari na ġevaġa-kavaia beġe toni nai tu beġene ġabi-raġeri.

Paulo Feliki e Drusila ġoirari ai

24 Ġaro kotari ġeiaġoto muriri ai, Feliki ma ġaraġona Drusila ġesi ġeraġasito. Drusila tu Iuda vavinena. Feliki na Paulo vetuġuna eveito, benamo Paulo eiaġomato, Iesu Keriso ġabidadama-vinina guruġari ekiraġirito eseġaġiato.

25 Senaġi Paulo ġena sisibai tu vei-iobukaiobuka e vevaġa-gwaġiġi ema Barau ġena Kota baregona beiaġomani guruġari ekiraġirito nai, Feliki egarito, benamo ekirato, “Benamo, toma tu noraka roġo, ġaro namona tai vauro ma bana kea-iaġomamu.”

26 Feliki ġena tuġamaġi ta maki, Paulo na moni kota bene vinia. Moġa lorinai ma ekea-ġenoġoi ġenoġoiato-ġoi, ġia ġesi beġene guruġa-guruġa ġana.

27 Laġani ruarua murinai, Porokio Festo na Feliki ġena gavana ġauveina gabuna eġabiato. Senaġi Iuda tarimari na beġene ura-vinia ġana, Paulo tu dibura numanai eraga-kwaneato.

25

Paulo Festo ġoiranai

1 Festo beveġitaġauni tanonai eraġasito, ma ġaro toitoi ġekorito murinai, Kaisarea na Ierusalemata ġana evaraġeto.

2 Monai Rubu Veaġa vereri baregori e Iuda ġitaġauna tauri na Paulo ġevaġa-daġaiato guruġari ġea kiraġirito, ma Festo ġenoġiato,

3 ġia bene vaġa-kavari, be Paulo Ierusalemata ġana bene tuġu-iaġoa. Korana Paulo dabara tumanai beġene gana-torea ma beġene vaġi-masea boioġana tu varau ġetogaiato-ġoi.

4 A Festo evaġa-veseto, ekirato, “Paulo tu Kaisareai moġea, dibura numanai ġeġita-ġauani, ma au tu mo ġana dori ma aġenoġoi-iaġoni.

5 Be ġemi veġitaġau tarimari neġi au ġesi Kaisarea ġana baġana iaġo, be monai kara evei-leaiato beġene kiraġia, bema ġia na rakava ta eveiato nai tu.”

6 Festo ġaro imaima toitoi (8) o gabanana (10) ġia ġesi monai ġetanuto vauro, Kaisarea ġana ma evariġoto. Elaġanito vau Kota gabunai ea tanu-tarito, benamo evetuġuto, Paulo ġoirana ġana beġene ġori-iaġomaia ġana.

7 Paulo ema raḡasito nai tu, Ierusalemema na ḡeiaḡomato Iuda tarimari na ḡeruḡa-ḡeḡeraḡiato, benamo ḡevaḡa-daḡaiato guruḡari gwaḡiḡiri ḡutuma ḡekiraḡirito, senaḡina ḡeri guruḡa tu asi vaḡa-moḡoniri gaburi.

8 Benamo Paulo ma evaḡa-veseto, ekirato, “Iuda tarimari ḡeri taravatu, e Rubu Veaḡa, ema Roma verena vaḡa-rakavari ḡana, veḡa rakavana ta asi aveiato.”

9 Senaḡi Festo na Iuda tarimari bene vaḡa-iakuri ḡana Paulo edanaḡiato, ekirato, “Goi ourani Ierusalemema ḡana bono varaḡe, be mai ḡevaḡa-daḡamuni guruḡari tu monai vau bana seḡaḡiri ba?”

10 Paulo evaḡa-veseto, ekirato, “Au tu Kaisara, Roma ḡeri vere, ḡena Kota gabuna ḡoiranai aruḡani, be mainai Kota na vevaḡa-iobuka veḡana au ḡegu ai bene veia. Au na Iuda tarimari vaḡa-rakavari veḡana ta tu asi aveiato, ḡoi tauḡemu maki ribamu ginikau.

11 Bema taravatu asi akorana-iaḡiato o mase veḡana rakavana ta aveiato, voina tu bana mase neganai, au tu asi akira-sirivaḡini bana mase ḡana tuna. Senaḡi bema mai Iuda tarimari ḡeri vevaḡa-daḡa guruḡari au iatagu ai ḡekiraḡirini tu asi moḡoni nai, tarima ta asi ḡena seḡuka au bevini-vanaḡiguni ḡia ḡeri ai. Au aurani tu Kaisara na bene seḡaḡigu!”

12 Benamo Festo ma ḡena kanisoro ḡesi ḡeguruḡa-guruḡato murinai, Paulo evaḡa-veseato, ekirato, “Kaisara ḡenai bonoḡinoḡi lorinai, Kaisara ḡenai boiaḡoni!”

Paulo Agripa e Berenike ḡoirari ai

13 Ḳaro kotari ḡevanaḡito murinai, vere Agripa e tobana Berenike, Festo rakaḡitana e beḡene vaḡa-namoa ḡana, Kaisarea ai ḡeraḡasito.

14 Monai ḡaro kota vovoka ḡetanuto murinai, Festo na Paulo guruḡana vere ḡena ekiraḡi-ginikauto, ekirato, “Tarima ta tu mainai maiḡa. Ḳia tu Feliki na dibura numai eraga-kwaneato.

15 Au Ierusalemema ḡana aiaḡoto nai tu, Iuda ḡeri Rubu Veaḡa vereri baregori e Iuda vereri na Paulo ḡevaḡa-daḡaiato guruḡari ḡegu ai ḡeḡwa-iaḡorito, e au ḡenoḡiguto, ḡekirato, ḡia ḡenai vevaḡa-iobuka veḡana bana veia.

16 Senaḡi au na avaga-veserito, akirato, ‘Ḳita Roma tarimara ḡera maḡuri nuḡanai ḡevaḡa-daḡaiani tarimana tu asi roḡo bita vaḡi-mase guineani. Ḳia tu ḡevaḡa-daḡaiani tauri ḡesi beḡe raka-vegogoni, ema ḡevaḡa-daḡaiani tarimari ḡoirari ai ḡevaḡa-daḡaiani guruḡari bevaḡa-veve guinerini roḡo.’

17 Moḡa lorinai ḡia ema au mainai ḡaraḡasito nai tu, au tu asi ma avaga-nogato. Senaḡi elaḡanito nai, Kota gabunai atanu-tarito, benamo akirato, Paulo ḡeḡori-iaḡomaia atato.

18 Vevaḡa-daḡa tauri ḡeruḡa-vaisito nai, au mataboru atuḡamaḡito tu, veḡa rakavari vevaḡa-daḡari beḡe veini atato, senaḡi asiḡina.

19 Ḳia ḡeri ḡuruḡa mabarari tu, tauḡeri ḡeri toma-rakariḡo dabarari veḡare-veḡareri kotari, ema tarima ta arana Iesu guruḡana moḡo. Iesu tu emaseto, senaḡi Paulo ekirani, ḡia tu maḡuri.

20 Mo dagara dabarari vetauvetauri au ḡegu ai tu egwaḡiḡito. Moḡa lorinai au na Paulo adanaḡiato, eurani Ierusalemema ḡana bene iaḡo ba, monai vau ḡia ḡevaḡa-daḡaiani guruḡari bana vaḡa-iobuka iobukari.

21 Senaḡi Paulo enoḡinoḡito, dibura numanai moḡo beḡene ḡita-ḡaua, bene iaḡo mo, Kaisara na vauro bene seḡaḡia. Moḡa lorinai akirarito, dibura numanai beḡene ḡita-ḡaua, bene iaḡo mo, Kaisara ḡenai bana tuḡu-iaḡoa.”

²² Benamo Agripa na Festo ekiraiato, ekirato, “Au aurani mai tarima tauḡegu na bana seḡaḡia.” Festo evaḡa-veseto, ekirato, “Boinani vau boseḡaḡiani.”

²³ Elaḡanito, benamo Agripa e Berenike tu ḡeveḡabi-raḡeto, dabuḡa marevari maki barego lelevaḡiri ḡeveirito, benamo ma marevari ḡesi Kota numanai ḡema raka-toḡato, vetari ḡorikauna tarimari baregori e vanuḡa barana tarima baregori ḡesi. Festo eguruḡato, benamo Paulo ḡema ḡoritoḡaiato.

²⁴ Benamo Festo ekirato, “Kini Agripa e ḡai ḡesi boḡoma fofori tarimami mabarami! Mai tau maiḡa ḡoḡitaiani. Ḡia tu Iuda tarimari Ierusalemmai e mainai Kaisareai maiḡeri na ḡevaḡa-daḡaiato guruḡana au ḡegu ai ḡeḡwa-iaḡoato. Ḡia ḡekoḡoto, ḡekirato, ḡia tu asi ma bene maḡuri-iaḡo.

²⁵ Senaḡi ḡia ḡenai veḡa ta asi adoḡariato bene mase ḡana. Ma ḡia tauḡena, Kaisara aranai enoḡinoḡito. Moḡa lorinai, ḡia tu Kaisara ḡenai bana tuḡu-iaḡoa atato.

²⁶ Senaḡi au tu asi ariba-ginikauni, ḡita ḡera vere barana ḡenai fefa tu kamasi batoreani. Moḡa lorinai ḡomi ḡoirami ḡana baḡori-iaḡomaia, e namo barana tu, ḡoi ḡoiramu ḡana, Kini Agripa. Be mainai sidanaḡi-ginikaua, be mai vetauvetauna kara bitana doḡaria guruḡana tu Kaisara ḡena bana tore-iaḡoa.

²⁷ Korana au atuḡamaḡini tu asi roroḡoto, mai dibura tarimana au na batuḡu-iaḡoani, a vaḡa-daḡana guruḡana tauna korikori tu asi batuḡu-kauani.”

26

Paulo tauḡena vetoreḡau guruḡari ekiraḡirito Agripa ḡoiranai

¹ Agripa na Paulo ekiraiato, ekirato, “Maoro avinimuni, tauḡemu nove-varifiu.” Benamo Paulo ḡimana eḡabi-vaisiato, benamo ḡena vetoreḡau guruḡari esinaiato, ekirato:

² “Kini Agripa! Au tu aiakuni, korana Iuda tarimari na ḡevaḡa-daḡaguni dagarari mabarari tu, toma ḡoi ḡoiramu ai avaḡa-veserini.

³ Korana tu Iuda seneri na veḡata ḡeri veḡa e veḡareveḡare mabarari ḡoi tu ma ribamu ginikau. Moḡa lorinai anoḡimuni, bono vevaḡa-gwaḡiḡi, be ḡegu guruḡa bono seḡaḡiri.

⁴ Au aiḡesi atanuto, misigu na veḡata eiaḡomato mo toma, ḡegu tanobarai e Ierusalemmai, Iuda tarimari mabarari tu ma ribari.

⁵ Au tu tovotovona na veḡata ḡeribaguto, ḡeguruḡa-fofori bema ḡeurani nai tu. Ḡegu maḡuri evesinato na veḡata au tu Farisea doḡorona tarimagu. Toma-rakariḡo korana-iaḡina ḡevaḡa-gwaḡiḡiani doḡorona.

⁶ Ma toma au Kota gabunai bama ruḡa, korana tu Barau na ḡai senema ekira-torerito guruḡana atuḡamaḡi-kauani nai.

⁷ Ḡai ḡema doḡoro gabanana ruarua (12) na mo guruḡa-tore ḡevaḡa-moḡoniani, ma ḡenari-taḡoani bemoḡonini naima, ḡia na Barau ḡetoma-rakariḡoani boḡi-laḡani ma kokoreri ḡesi. Vere o, au tu mo tuḡamaḡikau ḡaramanai Iuda tarimari na ḡevaḡa-daḡaguni.

⁸ Karase nai ḡomi Iuda tarimami tari tu ḡokirani, Barau na mase tarimana tu asi ilaila ma bevaḡa-variḡisiani?

⁹ Au maki atuḡamaḡito, dagara ḡutuma gorogoro bana veiri, Iesu Nasareta tarimana arana bana lau-ḡaua ḡana.

¹⁰ Ierusalemmai au tu moḡesi aveito-ḡoi. Rubu Veḡa vereri baregori na seḡuka ḡeviniguto, benamo Barau ḡena tarimarima veaḡari ḡutuma dibura

numanai atorerito-ḡoi, ema beḡene vaḡi-maseri ḡetato-ḡoi nai tu, au maki beḡene mase guruḡana avaḡa-moḡoniato-ḡoi.

¹¹ Ġaro vovoka Iuda tarimari ḡeri rubu tatai araka-toḡato-ḡoi, benamo akwari-korukorurito-ḡoi, ema Iesu beḡene kiraḡi-rakavaia ḡana avaḡa-urarito-ḡoi. Au na abaruvini-rakava rakavarito-ḡoi, naima vanuḡa baregori boruri ḡari maki aiaḡoto-ḡoi, bana vaḡa-midigu midiguri e bana lausilausiri ḡana.”

Paulo evetuḡamaḡi-kureto varina

¹² “Mo veḡa uranai Rubu Veḡa vereri baregori na maoro ḡeviniguto ema ḡetuḡuguto, Damaseko ḡana aiaḡoto.

¹³ Benamo, Verebara, au tu dabara na roḡo aiaḡoto-ḡoi, a ḡaro tu tubuai, benamo ḡaro mamana maki evanaḡiato mamana, guba na emariḡoto, aḡitaiato, ma au ḡesi ḡaiḡoto tarimari e au enanagi-tarimato.

¹⁴ Ġai mabarama tano ai ḡaketo-tarito. Benamo au na garo ta aseḡaḡiato, Heberu garo ai au evaḡa-guruḡaguto, ekirato, ‘Saulo, Saulo! Karase nai au ovaḡa-rakavaguni. Mani ḡoi na tu ḡau masakona matana ofudiani, naima ḡemu ai tu gwaḡiḡi ema tauḡemu ovevaḡa-rakavani.’

¹⁵ Benamo au akirato, ‘Vereḡauka, ḡoi tu deikara?’ Vereḡauka evaḡa-veseto, ekirato, ‘Au tu Iesu, ḡoi na ovaḡa-rakavaguni tarimagu.

¹⁶ Senaḡi novariḡisi, ema noruḡa-tari. Au ḡoi ḡemu ai bafofori korana tu navaḡa-ruḡamu, be au ḡegu vetuḡunaḡi tarimamu ai bono iaḡo ḡana. Ema toma kara boḡita dagarari e ḡoirai kara bavaḡa-ḡitamuni dagarari maki tarima tari ḡeri bonoa kiraḡi-foforiri ḡana.

¹⁷ Au na Isaraela tarimari e irau bese tarimari ḡerina bavaḡa-maḡurimuni. Ḡoi tu au na atuḡumuni,

¹⁸ matari bono vaḡa-fafari, ema mukuna na bono ḡori-kureri, be mamai beḡene ruḡa, ema Satani ḡena seḡuka na bono ḡabi-vaḡiri, be Barau rekenai beḡene ruḡa. Benamo Barau na ḡeri rakava bene tuḡamaḡi-fitoḡari ema Barau na eḡabi-viriḡirito ma evaḡa-veaḡarito tarimari ḡesi gabu beḡene ḡauna, korana au ḡegu ai ḡeveḡabidadamani nai.’

Paulo na ḡena ḡauvei ekiraḡiani

¹⁹ Moḡa lorinai, Kini Agripa, au tu mo mata-vanaḡi guba na ema foforito dagarana ḡenai tu asi akira-sirivaḡito.

²⁰ Guine tu Damaseko ai e Ierusalem ai aḡobatato, moḡa murinai Iudea tanona mabarana e irau bese fakari ai maki. Au aḡobatato-ḡoi nai tu, akirarito-ḡoi, ḡeri rakava ḡerina beḡene vetuḡamaḡi-kure, Barau ḡenai beḡene iaḡo. Benamo ḡeri vetuḡamaḡi-kure tu ḡeri veḡa na beḡene vaḡa-moḡoniri.

²¹ Mo tu moḡa ḡaramanai Iuda tarimari na Rubu Veḡa nuḡanai ḡeḡabitariḡuto, ḡevaḡi-masegu ḡetato.

²² Senaḡi mo ḡaro na beiaḡoma mo maitoma, au tu Barau na evaḡa-kavaguni. Moḡa lorinai mai bama ruḡa-tari, tarima mabarari misina na beiaḡo baregona ḡoirari ai ama guruḡa-foforini. Au na kara boruna ta tu asi akiraḡiani, senaḡina peroveta tarimari na e Mose na kara ḡekiraḡiato beḡorani dagarana moḡo.

²³ Dagarana maiḡa, Keriso tu bene midigumidigu, ma tau giniguinena mase na ma bene variḡisi-ḡenoḡoi, benamo Barau ḡena mama varina Iuda tarimari e irau bese tarimari ḡeri ai bene vari-fiua.”

²⁴ Paulo moḡesi evetoreḡauto nuḡanai tu, Festo na efarara-viniato, ekirato, “Paulo, ḡoi tu bobabo! Ḡemu riba baregona na evaḡa-babomuni.”

²⁵ Paulo evaḡa-veseto, ekirato, “Verebara Festo, au tu asi bababo. Au na kara akiraḡirini guruḡari tu moḡoni e maḡata.

²⁶ Kini Agripa! Au tu ma kokoregu ema asi garigu ḡesi ḡoi bavaḡa-guruḡamuni, korana mai dagara maḡeri mabarari ḡoi tu ma ribamu. Au ribagu, mai bakiraḡiri dagarari mabarari ḡoi ḡemu ai ta tu asi bevekuretoḡa, korana maḡeri dagara tu vekuretoḡa gabunai ta asi eḡorato.

²⁷ Kini Agripa, ḡoi na mai peroveta tarimari ḡeri guruḡa ovaḡa-moḡonirini ba? Au ribagu ḡoi na ovaḡa-moḡonirini.”

²⁸ Agripa na Paulo ekiraiato, ekirato, “Mai horaḡauna kotunai, dori moḡo nuḡagu bovaḡa-moiraiia, benamo dori moḡo Keriso bavaḡa-moḡonia.”

²⁹ Paulo evaḡa-veseto, ekirato, “Horaḡauna kubinai ba maukanai, senaḡi au na Barau anoḡiani, ḡoi e initoma au ḡeseḡaḡi-taḡoguni tarimami mabarami au kavana boḡoro vei, senaḡina mai ḡebarubaruguto kavana moḡo asiḡi.”

³⁰ Paulo moḡesina eguruḡa-ḡosito, benamo kini, e gavana, e Berenike, ema ḡia ḡesi ḡetanuto tarimari mabarari ḡevariḡisito.

³¹ ḡeraka-rosito murika ḡana, benamo ḡeguruḡa-guruḡato nai tu ḡekirato, “Mai tau tu veiḡa rakavana ta voina tu bere mase o dibura numai bere tanu veiḡana ta tu asi eveiato.”

³² Benamo Agripa na Festo ekiraiato, ekirato, “Bema asi bere kira, Kaisara na ḡena guruḡa benea seḡaḡia asi beresi nai, mai tau tu tara ruḡa-vaḡia.”

27

Paulo Roma ḡana eiaḡoto

¹ Itali ḡana baḡana iaḡo guruḡana emoḡonito nai tu, Paulo e dibura tarimari kotari tu vetari ḡitaḡauna tarimana arana Iulio ḡimanai ḡetorerito. ḡia tu Kaisara ḡena vetari doḡorona nuḡanai.

² ḡai tu Adramitio boutina tai ḡaraḡeto. Mo bouti tu Asia tanona koneri ḡari beiḡoni boutinai. Benamo mo bouti na ḡadauto. Makedonia tarimana ta arana Aristako maki ḡai ḡesi ḡaiḡoto. ḡia tu Tesalonika na eiaḡomato.

³ Ma elaḡanito vau Sidono ai ḡaraḡasito. Iulio na Paulo evetuḡa-ḡwaiato, benamo maoro eviniato, karonā ḡeri ai bene iaḡo, be ḡena ura dagarari beḡene vinia.

⁴ Mo gabu ḡaraga-kwaneato nai, Saipras motumotu ravaravana rekena na ḡaiḡoto, korana iavara tu ḡoirama na eiaḡomato-ḡoi.

⁵ Kilikia e Pamfilia iatari na ḡaraga-vanaḡito, ḡaiḡoto, Mira ai ḡadaro-kauto. Mira tu Likia tanonai.

⁶ Monai vetari ḡitaḡauna tarimana na Alesandria boutina, Itali ḡana beiḡoni boutina, edoḡariato, benamo monai evaḡa-raḡe vanaḡimato.

⁷ Garo vovoka tuḡama tuḡama moḡo ḡadau-iaḡoto-ḡoi, e ma vekwaraḡima ḡesi Kenido sevinai ḡaraḡasito. Monai iavara na eraga-ḡaumato lorinai, Krete motumotu ravaravana rekena na ḡaiḡoto. Mo tu Salmone duduna reke ta kefona na.

⁸ Ma vekwaraḡima ḡesi fenu rikiri na ḡaiḡoto mo, gabu ta arana Darokau Gaburi Namori ai ḡaraḡasito. Mo gabu e Lasea vanuḡana vefakari tu asi manaḡa.

⁹⁻¹⁰ Garo vovoka monai varau ḡekorito, e bouti na monana rei-iaḡo tu gwaḡiḡi e ma garina, korana ḡaniveaḡa ḡarona maki varau ekorito. Moḡa lorinai Paulo na ekira-toreḡaurito, ekirato, “Tau mabarami, au aribani ḡita ḡera iaḡoiaḡo tu berakavani. ḡera farefare mabarari beḡe rekwarekwani

ema bouti maki berakava-moĝovaĝini. Dia maĝeri dagara moĝo, senaĝi ĝita ĝera maĝuri maki bita fitoĝarini.”

¹¹ Senaĝi vetari ĝitaĝauna tarimana na tu bouti taritarina tarimana baregona e bouti tarimana garori eseĝaĝirito, a Paulo ĝena guruĝa tu asi eĝabi-raĝeato.

¹² Mo darokau gabuna faraka e iavara ĝueri ai tu asi namo. Moĝa lorinai ĝutuma na tu ĝeurato baĝana dau-tovo, be Foeniki ai vau faraka e iavara ĝueri baĝana ĝabiri. Foeniki tu Krete ai darokau gabuna ta. Reke ta tu iavaraĝere (o south-west) eĝoiraiani, o reke ta tu buibara (o north-west) eĝoiraiani.

Iavara na davara evaĝa-rakavaiato

¹³ Iavaraĝere evesinato, tuĝana moĝo eĝauto-ĝoi nai, ĝia ĝetuĝa-maĝito tu ĝeri ĝaro namona beĝe doĝaria. Moĝa lorinai dogo ĝeinu-raĝeato, benamo Krete fenu rikiri na moĝo ĝedau-iaĝoto.

¹⁴ Asikauna tu iavara baregona arana koiviru, motumotu iatarāĝena na emariĝoto.

¹⁵ Bouti ai ema kwari-kauato, benamo ĝai tu asi ĝema daunaĝi dabarana. Ĝoira ĝana iaĝo uradikana asi ĝaveito, senaĝi iavara ĝena urai moĝo ĝadauto.

¹⁶ Motumotu misina arana Kauda gabigabina rekenai ĝadau-toĝato vau, ravaravana na ĝadau-iaĝoto. Monai vauro bouti misina ĝobina ĝatorea ĝatato, vaĝa-maĝurina uranai ĝavekwarāĝi-rakavato.

¹⁷ Ĝia na bouti misina ĝeinu-raĝeato bouti tuĝuna ĝana, benamo bouti ĝesi ĝebaru-kafaiato bene ĝabi-taria ĝana. Ema ĝegarito, be bouti faraina maki ĝeinu-riĝoato, benamo ĝareito moĝo. Ĝia ĝeri gari korana tu iavara na bouti beĝwa-iaĝoani mo Sirtis ai Afrika rekenai davara sefana mirina tai bea tanukauni garina.

¹⁸ Mo iavara baregona ema ureure baregori ĝesebonato nai, bouti maki dori moĝo ĝevei-buruato-ĝoi. Moĝa lorinai elaĝanito nai tu, bouti ai ĝeĝurarito farefareri mabarari davarai ĝebubu-reirito, bouti bene meraĝa ĝana.

¹⁹ Ĝaro vaĝa-toitoinai tauĝeri ĝimari na bouti farefarena ma ĝefiu-riĝorito.

²⁰ Ĝaro ĝutuma varau ĝeiaĝoto, ma ĝaro e visiĝu asi ĝefofoforito, ema iavara maki ebarego-sirivaĝito. Benamo ĝema tuĝamaĝikau mabarari ĝekorito, korana ĝatuĝamaĝito, ĝai tu asi ĝema maĝuri dabarana.

²¹ Ĝaro ĝutuma asi ĝeĝaniĝanito murinai, Paulo ĝoirari ai eruĝato, benamo ekirato, “Ĝomi tau, ĝomi tu au garogu ĝoro seĝaĝia, be Krete na asi tara daurosi; be mai farefare maiĝesi asi tara bubu-fitoĝari.

²² Senaĝi toma au na alaunaĝimini, akirani, boĝono kokore! Korana tu ta asi bomaseni. Senaĝi bouti ĝereĝana moĝo moĝoni berakava-moĝovaĝini.

²³ Au tu Barau ĝena tarima ta ema au tu ĝia vetuĝunaĝina aiāĝo-vinini. Ĝoraĝani boĝi, ĝia ĝena aneru ta sevigu ai ema ruĝa-tarito,

²⁴ benamo ekirato, ‘Paulo, asi bono gari. Ĝoi tu Kaisara ĝoiranai roĝo boa ruĝani, ema Barau ĝena namo ĝoi ĝemu ai ĝenana, ĝoi ĝesi boĝo iaĝoma tarimari mabarari maĝuri beĝe doĝariani.’

²⁵ Moĝa lorinai, ĝomi tau, au na akiramini, boĝono kokore. Korana au na Barau tu avāĝa-moĝoniani, kara aneru na bekira-varagu tu bekiraĝiri ilailanai beĝe ĝorani.

²⁶ Senaĝi ĝita tu iavara na motumotu tai bea kwari-kaurani.”

27 Boġi vaġa-gabanana vasivasi (14) ġai tu Adria Davaranai iavara na ekwari-rakao rakaomato-ġoi. Boġi nuġanai bouti ġwaragana tauri ġevemami-raġito, ġai tu tano varau ġakavinagiato.

28 Moġa lorinai varo dudunai dagara metona ta ġebaru-kauato, benamo davarai ġefiu-reiato. Moġa nuġanai ġeribato, davara ġena variġo tu 37 mita kavana. Asi luana ma ġeġitaiato, monai davara ġena variġo tu 27 mita moġo.

29 Bouti fore ġeri ai beverarakauni garinai, bouti murina rekenai dogo vasivasi ġefiu-reirito. Benamo ġeġauġauto bene raga-laġani ġana.

30 Bouti ġwaragana tauri ġeri ura tu beġene raga-lema. Moġesina naima ġia na bouti misina dobu ai ġetore-reiato, ġevei-ġofakauto bouti ġoiranai dogo kotari moġeri ġeiaġoto, ġea tore-riġori ġetato.

31 Senaġi Paulo na vetari ġitaġauna tarimana e vetari tauri ekirarito, ekirato, “Bema bouti ġwaragana tauri bouti ai asi beġe tanuni nai tu, ġomi maki asi boġo maġurini.”

32 Moġa lorinai vetari tauri na bouti misina varori ġekari-ġuturito, benamo ġevaġa-rei kwareġaiato.

33 Dori elaġanito-ġoi nai, Paulo na ġia mabarari enoġirito, ġaniġani kota beġene ġani. Ġia ekirato, “Ġomi tu ġaro gabanana vasivasi (14) boġo vaġa-noga-iaġia, kara ta roġosi ġoro ġania.

34 Moġa lorinai boġono kokore e maġuri tuġamaġinai anoġimini, ġaniġani kota ġoġani. Korana ġomi debami ġuiri tu sebona ta maki asi berekwarekwani bene.

35 Moġesi ekirato murinai, ġia na beredi ta eġabiato, benamo ġia mabarari ġoirari ai Barau evaġa-namoato, ma edudu-ġutuato, benamo eġaniato.

36 Ġia mabarari maki nuġari ġevaġa-gwaġiġirito, benamo ġeġaniġanito.

37 Bouti nuġanai ġai mabarama tu 276.

38 Ġia mabarari ġeġani-maseto, benamo bouti bene meraġa uranai, widi tu davarai ġefiu-reirito.

Geta o ureure na bouti ebota-kirakiraiato

39 Elaġanito nai, bouti ġwaragana tauri na tanobara vetoġana tu asi ġeġita-ġinikauato. Senaġi ġaruka tanobara na davara ġana eraka-rosini, ma fenuna koutoġana ġesi moġo ġeġita-iaġoato. Benamo ġetuġamaġito, bema ma dabara nai tu, monai bouti beġere vaġa-raga-raġea ġetato.

40 Benamo dogo varori ġekari-ġuturito, davarai ġeraga-kwanerito. Mo hora sebonai leva o bara ġebaru-taririto varori maki ġeruġarito. Benamo ġoira rekenai farai ġediuato, iavara na ġoira fenuna ġana bene kwari-iaġori uranai.

41 Senaġi bouti tu semure ġenai everarato, benamo etanukauto. Bouti ġoirana tu evedaġi-nunuto, a murina rekena tu ureure na ebota-kirakiraiato, e eveduki-rovorovoto.

42 Vetari tauri ġeboioġato, dibura tarimari tu beġene vaġi-maseri, korana beġe nau-rakani, benamo beġe raga-lemanġi garina.

43 Senaġi vetari ġitaġauna tarimana ġena ura tu Paulo bene vaġa-maġuria, moġa lorinai ġia na ekira-ġoirito, mo veġa asi beġene veia. Benamo ma nau ribari tauri ekirarito, davarai ġeburi-rei, benamo beġene nau-guine-iaġo fenu ġana.

44 A tarima mabarari tu ġau tubiri o bouti taviri tari beġene ġabiri vau, ġia muriri na beġene rei-iaġo. Mo dabarai mabarari tanobara ġea doġariato, ta asi erekwarekwato.

28

Malta motumotunai

¹ Ta davarai kamasi ta asi eveito, mabarama namo moĝo kone ai ĝaraĝekauto. Benamo monai vauro ĝaribato, mo motumotu arana tu Malta.

² Mo motumotu tarimari na ĝai ĝemai tu veiĝa namo vedaureana ĝeveiato. Korana mo ĝura e nagure nuĝanai ĝema karava bara ta ĝegasiato ĝai bene tunu-seĝuseĝuma ĝana.

³ Paulo eiagoto lako degona ta ea ĝabiato, benamo karavai ema tore-raĝeato. Mota ta mo lako degonai karava gugurana na eĝabiato, benamo ema nene-rosito, ma Paulo ĝimanai ekafukauto.

⁴ Mo motumotu tauri na mo mota Paulo ĝimanai ĝerokautaĝo ĝeĝitaiato, benamo tauĝeri ĝevemugu-vinito, ĝekirato, “Asi ĝofaĝofa, mai tarima tu vevaĝideba tarimana. Korana davara na tu benau-maĝuri, senaĝina godio vavinena Dike tu asi veĝata eurani ĝia bene maĝuri.”

⁵ Senaĝi Paulo na mo mota tu karavai ekora-fiuraĝeato, ma Paulo tu rakava ta asi eĝoitaĝoato.

⁶ Tarima ĝetuĝamaĝito, Paulo tauĝanina tu toma egoba-vaisi-raĝeni, ba toma eketo-tarini, benamo emaseni. Ĝevaĝa-noga manaĝato, senaĝi Paulo ĝenai kara rakavana ta tu asi eĝorato. Benamo ĝia ma ĝevetuĝamaĝi-kureto, benamo ĝekirato, “Ĝia maki barau ta!”

⁷ Mo gabu e motumotu tauna baregona arana Publio. Ĝia ĝena gabu tu asi manaĝa. Ĝia na eĝabi-raĝemato, e ĝaro toitoi veĝata ĝia ĝena varivari tarimamai evaĝa-iaĝomato.

⁸ Publio tamana tu keve e efurito-ĝoi, be genagenai egena-taĝoto-ĝoi. Paulo ĝenai eraka-toĝato, ma eĝuriĝurito, ema ĝimana iatanai etore-kaurito, benamo ĝena keve enamoto.

⁹ Mo veiĝa eĝorato, benamo mo motumotu ai keve tarimari mabarari Paulo ĝenai ĝeiaĝoto, benamo ĝia na ĝeri keve ĝerina evaĝa-namorito.

¹⁰ Ĝeri varevare dagarari vovoka ĝevinimato. Ma ĝadau ĝana bakunai tu ĝema iaĝoiaĝo ai baĝa ura-vinirini dagarari ma ĝevinimato.

Romai ĝaraĝasito

¹¹ Gue toitoi murinai Alesandria boutina tai ĝaraĝeto. Mo bouti ai tu barau arana Dios natuna kafa merori ruarua vetoĝari o fikisari ĝeberarito. Mo bouti maki faraka e iavara ĝueri tu mo motumotu ai edoĝaririto.

¹² Ĝaragato mo Sirakuse ai ĝaraĝasito. Monai ĝaro toitoi ĝatanuto.

¹³ Monana ĝadau-ĝeĝeraĝi-iaĝoto mo Regio. Ĝaro ta evanaĝiato murinai, gabina iavarana etoĝato, ma ĝaro vaĝa-ruaruanai vauro Puteoli ai ĝaraĝasito.

¹⁴ Monai tarikaka kotari ĝadoĝaririto. Ma ĝaro imaima ruarua (7) tu ĝia na monai ĝeĝabi-tarimato. Monana vau ĝaraka-iaĝoto Romai ĝaraĝasito.

¹⁵ Monai tarikaka kotari varima ĝeseĝaĝiato, benamo ĝai ĝemai ĝeiaĝomato mo, vanuĝa keiri arari Apia-Foru e Taven-Toi ĝana. Paulo na eĝitarito, benamo Barau evaĝa-namoato, e tauna egwaĝiĝito.

Roma nuĝanai

¹⁶ Romai ĝaraĝasito nai, Paulo tu maoro ĝeviniato, ĝereĝana bene tanu. Senaĝi vetari tauna ta na moĝo bene ĝita-ĝaua.

¹⁷ Ĝaro toitoi ĝevanaĝirito murinai, Paulo na Iuda ĝedebaiato-ĝoi tauri ekea-vegogorito. Ĝema raka-vegogoto, benamo ĝia na evaĝa-guruĝarito, ekirato, “Tarikakagu, au na ĝera tarima ta asi avaĝa-rakavaiato, ema senera ĝeri veiĝa maki asi avaĝa-rakavarito. Senaĝi au tu Ierusalemaj ĝeĝabiguto

dibura tarimana ta noġa, benamo Roma ġeri gavamani ġimari ai ġetore-kauguto.

¹⁸ Ġia na ġedanaġiguto, ma ġegu guruġa ġeseġaġiato nuġanai tu ġeriba-maoroto, au tu asi ġegu vei-rakava ema beġene vaġi-masegu korana ta maki asi ġedoġariato. Moġa lorinai ġeurato beġene tuġu-vaġigu.

¹⁹ Senaġi Iuda tarimari na mo ura tu asi ġeġabi-raġeato. Moġa lorinai au tu asi ġegu dabara ta, naima anoġi-noġito Kaisara na ġegu guruġa bene seġaġia. Dia au tu ġegu tarimarima navevaġa-maoro-viniri ġana atato. Asiġi.

²⁰ Moġa lorinai bakea-iaġomami, au ġesi sima guruġaguruġa ġana. Korana Isaraela ġena tuġamaġikau lorinai au maiġesi ġebarubaruguto.”

²¹ Ġia na ġevaġa-veseato, ġekirato, “Ġoi guruġamu fefana ta Iudea na asi ġadoġariato. Tarikakara monana ġeiaġomato tauri na maki varimu rakavana ta asi ġekiraġiato, be asi ġaseġaġiato.

²² Senaġi ġai ġaurani tu ġoi ġemu tuġamaġi guruġana baġana seġaġia. Korana gabu mabarari ai tarimarima na ġoi na mai doġoro tu ġerori-toreani.”

²³ Moġa lorinai ġia na ġaro ta ġeġabi-viriġiato. Mo ġaro ai tarima-rima ġutuma-bara Paulo ġena tanu gabuna ġana ġeiaġoto. Boġiboġi na veġata evesinato eiaġoto mo lavilavi, Paulo na Barau ġena Basileia eġobata-iaġiato. Ema Mose ġena taravatu na e peroveta tauri ġeri buka na Iesu varina ġia ġeri ekiraġi-ginikauto, Iesu beġene vaġa-moġonia uranai.

²⁴ Tarima kotari na tu ġena guruġa ġeġabi-raġeato, a kotari na tu asi ġevaġa-moġoniato.

²⁵ Ġia nuġari tu dia sebona, moġa lorinai ġeraka-rovorovoto. Senaġi roġosi roġo beġene raka nuġanai, Paulo na guruġa ta ekiraġiato, maiġesi ekirato, “Iauka Veġa peroveta tarimana Isaia ġenana ġomi senemi tu guruġa moġonina ekira-vararito.

²⁶ Korana iniġesi ekirato,
 ‘Noiaġo maiġeri tarima ġeri ai,
 benamo bono kira:
 Seġaġi tu boġo seġaġini,
 senaġi asi boġo riba-maoroni.
 Ġita tu boġo ġitani,
 senaġi asi boġo ġita-fakani.

²⁷ Korana maiġeri tarima
 nuġari tu mukuna,
 seġari tu vekodobeġau,
 ema matari maki bubu.
 Irau matari na beġe ġitani
 e seġari na beġe seġaġini
 e beġe tuġamaġi-fakani,
 benamo beġe vetuġamaġi-kureni
 ema bavaġa-namorini garina.

(Barau tu moġesi ekirani).’

²⁸ Moġa lorinai au aurani ġomi boġono riba, Barau ġena vevaġa-maġuri varina tu irau bese tarimari ġeri ai etuġu-iaġoato, be ġia na beġe seġaġiani!”
 [²⁹ Paulo moġesi eguruġato murinai, Iuda tarimari ġerakato, ma tauġeri fakari ai moġo veġareveġare baregona ta ġeveiato.]

³⁰ Laġani ruarua tauġena na edavaiato-ġoi numanai etanuto. Ma ġia ġenai ġeiaġomato-ġoi tarimari mabarari eġabi-raġerito-ġoi.

³¹ Barau ġena Basileia, (ġena veġitaġau seġukana evaġa-ruġaiani maiġa), guruġana eġobata-iaġi vinirito-ġoi, ema Vereġauka Iesu Keriso varina evaġa-ribarito-ġoi ma kokorena ġesi. Ma tarima ta na tu asi ma ekiraġoiato-ġoi.

PAULO ĜENA TORETORE ROMA EKALESIARI GERI

Roma vaĝa-foforina guruĝari

Paulo na mai fefa Roma ekalesiari ĝeri tu laĝani 56 ema 57 fakari nuĝari ta etoreato, mo tu Korinto ekalesiari vaĝa-toitoina ma evarivaririto nuĝanai etore-vinirito; mai tu Iesu emaseto murinai etoreato.

Paulo ĝena ura baregona Roma ĝana bene iaĝo, senaĝi Ierusalemema ĝana eiaĝoto roĝo (Apostolo 19:21). Monai Iuda tarimari tari na ĝeĝabi-tariato, ma ĝevaĝia ĝetato. Senaĝina Barau na enari-ĝauato, ma Roma ĝana bene iaĝo dabarana ekeoato. Moĝa lorinai Paulo tu Roma ĝana eiaĝoto laĝani 59 nuĝanai kavana.

Paulo Roma ĝana tu roĝosi bere iaĝo nuĝanai, mai fefa etore-vinirito. Paulo ĝena ura baregona tu, Barau ĝena Vari Namona ĝeri bene vaĝa-fofori ginikaua, ema Roma ekalesiari bene vaĝa-kokoreri ĝana (Roma 1:1 ema 11).

Roma bukana nuĝanai siri baregori tu karoa 1:16-17.

Mai fefa nuĝanai Paulo na Roma ekalesiari ĝeri dagara tari ekiraĝi-ginikaurito tu maĝeri: 1) Iuda tarimari ema irau bese tarimari tu Keriso ĝena Vari Namona ĝenana vauro Barau ĝoiranai vei-iobukaiobuka tarimari beĝe ruĝa-tarini, a dia taravatu ĝenana. 2) Tanobara tarimari mabarari, Iuda tarimari ema irau bese tarimari, tu vei-rakava nuĝanai ĝetanuni (karoa 1-3). 3) Karoa 3-8 nuĝanai tu vevaĝa-roroĝoto varina e vevaĝa-veaĝa varina, ema Barau marevana mamana baregona befoforini varina. 4) Karoa 9-11 tu ĝabiviriĝi varina; Barau na Iuda tarimari asi beĝabi-raĝeri, Keriso asi ĝevaĝa-moĝoniani nai; ema Iuda tarimari Barau na ma beĝabiraĝe-ĝenoĝoirini, korana Keriso ĝenai ma beĝe veĝabidadamani. 5) Karoa 12-16 tu ekalesia doĝorona kamasĝi beĝene tanu Barau ĝoiranai.

Paulo na apostolo ĝauveina eveiato, korana Barau na ekeaiato nai

¹ Au Paulo, Keriso Iesu ĝena vetuĝunaĝi taugu; ĝeguna mai fefa eiaĝosini. Au tu ekeaguto, ĝena apostolo tarimagu ai aiaĝoto, ema eviriĝiguto, Barau ĝena Vari Namona bana vari-fiua ĝana.

² Mai Vari Namona tu guinenai Barau na peroveta tarimari mururi na ekiraĝi-toreato, benamo Buka Veaĝa nuĝanai ĝetoreato.

³ Mai tu Barau Natuna, ĝita ĝera Vereĝauka Iesu Keriso, varina. Ĝia tu tanobarai ema maĝurito, ema Kini Davida garakana.

⁴ Ĝia mase ĝenana evariĝisi-ĝenoĝoito, monana Iauka Veaĝa na ma seĝukana ĝesi ĝita ĝerai evaĝa-foforiato ĝia tu Barau tuĝutuĝu Natuna.

⁵ Iesu ĝenana ema ĝia arana bakunai, ĝai varevare-bara e apostolo dagina ĝaĝabiato, bese irauirau tarimari baĝana vetauri, Barau beĝene vaĝa-moĝonia e beĝene seĝaĝi-vinia.

⁶ Ma ĝomi maki, Roma nuĝanai ĝotanuni tarimami, ĝia ĝesi Barau na ekeasebonamito, Iesu Keriso ĝena tarimarimai boĝono iaĝo ĝana.

⁷ Ĝomi Roma nuĝanai ĝotanuni tarimami mabarami, Barau na eura-vinimini e ekeamito, ĝena veaĝa tarimari ai ĝoiaĝoto, ĝomi avaĝa-namomini: Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

Paulo ĝena ura baregona Romai bene varivari

⁸ Ĝegu guruĝa giniguinena, au ĝegu Barau atanikiu-viniani Iesu Keriso aranai ĝomi mabarami iatami ai, korana ĝemi veĝabidadama variri tanobara mabarana nuĝanai ĝekiraĝi-foforirini.

⁹ Natuna Varina Namona aĝobata-iaĝiani, ma iaukagu mabarana ĝesi vetuĝunaĝina aiaĝo-vinini Barauna ĝoiranai, ĝomi tu ĝegu ĝuriĝuri mabarari nuĝari ai asi atuĝa-rekwamini.

¹⁰ Ema maki ĝegu ĝuriĝuri nuĝari ai anoĝinoĝi-bukani, akirani, bema initoma Barau eurani nai, ĝegu dabara ta bene vei-roroĝotoa, be ĝemi ai bana iaĝosi.

¹¹ Korana au ĝegu ura baregona tu bara ĝitami, be Iauka Veaĝa varevareri kotari ma bara vinimi, boĝono kokore ĝana.

¹² Mo tu ĝomi e au tara velaunaĝi-vevini ĝera veĝabidadama nuĝanai.

¹³ Tarikakagu mabarami, boĝono riba-maoro, nega ĝutuma aurato ĝomi ĝemi ai bana iaĝosi atato, senaĝi ĝegu iaĝosi lairi tu ĝevetoutou-kauni beiaĝoma mo toma. Ĝegu ura, irau bese tari na ĝegu ĝauvei ĝenana vevaĝa-kava ĝeĝoitaĝoato ema Iesu Keriso ĝena doĝoro tarimari ai ĝeiaĝoto kavana, ĝomi maki fakami ai bana vevaĝa-kava.

¹⁴ Barau na ĝauvei eviniguto, Grik tarimari e asi Grik tarimari, iaunega tarimari e vei-babobabo tarimari bana vaĝa-kavari ĝana.

¹⁵ Moĝa lorinai au ĝegu ura baregona tu, mai Vari Namona ĝomi Romai ĝotanuni tarimami mabarami ĝemi ai maki bana ĝobata-iaĝia.

Vari Namona tu ma ĝena seĝuka

¹⁶ Barau ĝena Vari Namona maiakana asi aveini, korana mai Vari Namona nuĝanai Barau seĝukana eĝauveini, ĝia ĝevaĝa-moĝoniani tarimari vaĝa-maĝuriri ĝana: Iuda tarimari ĝeri ai guine, gabi ai vau bese irauirau tarimari.

¹⁷ Korana Vari Namona nuĝanai tu Barau na tarimarima kamasi vei-iobukaiobuka tarimari bekiraĝirini efoforini. Vei-iobukaiobuka tu veĝabidadama nuĝanai moĝo korana na beiaĝo mo magona, Buka Veaĝai ekirani kavana: “Barau beĝabidadama-viniani tarimana tu Barau na vei-iobukaiobuka tarimanai bekiraĝiani, benamo bemaĝurini.”

Barau ĝena baru tarimarima ĝeri ai

¹⁸ Barau ĝena baru guba na efoforini, korana tarimarima na Barau asi ĝekorana-iaĝiani e veiĝa iobukaiobukari asi ĝeveirini. Ma ĝeri veiĝa rakavari ĝerina guruĝa moĝonina ĝelaulau-ĝauani.

¹⁹ Barau beĝe ribaiani maĝuriri mabarari ĝia ĝeri ai tu fofori, Barau tauĝena na evaĝa-fofori ginikaurito.

²⁰ Barau asi taĝitaiani, senaĝi guba e tanobara eveirito, monana beiaĝoma mo toma, Barau vetoĝana vekuretoĝana tu taĝita-ginikaurini. Ĝia tu moĝoni Barau tuĝutuĝu ema ĝena tanu-vanaĝivanaĝi seĝukana tu ĝimana ĝauveiri dagarari na maki ĝevaĝa-foforiani, be taribaiani. Moĝa lorinai tarimarima tu asi ĝena vetoreĝau laina.

²¹ Oba, ĝia moĝoni ma ribari Barau, be ĝere vaĝa-raĝea, senaĝi asi ĝevaĝa-raĝeani ema asi maki ĝetanikiu-viniani. A ĝeri tuĝamaĝi tu vei-taĝuitaĝui na moĝo ĝevaĝa-vonurini. Moĝa lorinai ĝeri tuĝamaĝi babobabori na nuĝari ĝevaĝa-mukunarini.

²² Ĝia tauĝeri ĝekirani, ĝia tu ma iaunegari ĝetoni, senaĝi ĝia tu ĝebaboto.

²³ Be maĝuri vanaĝivanaĝi Barauna beĝere vaĝa-raĝea, senaĝi ĝima veivei dagarari vaĝa-ilailana ma beĝe maseni tarimari iouiouri o laulauri, e boĝa bairi, manu, ema tano ai ĝedarani dagarari iouiouri ĝevaĝa-moĝonirini.

²⁴ Moġa lorinai Barau na veiġa mirori beġene vei ġana etao-fitoġarito, be beġene mata-boraġa nuġari ai ġeverere-iaġirini ilailanai, e tauġeri fakari ai vevaġa-maiaka veiġari irauirauri na tauġaniri beġene vaġa-rakavari.

²⁵ Ġia na Barau ġena guruġa moġoniri gaburi ai tu ġofaġofa veiġari ġeveirini, ema Barau na eveirito dagarari ġetoma-rakariġo vinirini e vetuġunaġiri ġeiaġo-vinini, a moġeri eveirito Barauna tu asiġi. Ġia moġo ġereġana sivevato-iaġia, asi dokona, asi magona. Amen.

²⁶ Tarimarima moġesi ġeveito nai, Barau na etao-fitoġarito, maiaka veiġari beġene uravini-lelevaġiri ġana. Ġeri vavine maki veġaraġo maġuriri roroġotori ġeiaġuirini, ma karori ġesi ġevekima-vevinini.

²⁷ Tauri maki ġia kavana, vavine ġesi kima maġuriri korikori tu ġeiaġuirini, ma tau karori ġemata-ġaniġani-iaġirini. Mo tu tau tauġeri karori ġesi moġo boru ġeravani. Maiġeri veiġa rakavari voiri metori tu ġia tauġeri na ġeġabirini.

²⁸ Ma iatanai, ġia tu asi ġeurato, Barau beġene riba-ginikaua e tuġamaġi-faka ġia nuġari iaġasiri ai beġene tanu, naima etao-fitoġarito ġeri tuġamaġi babobabori ġeri ai, be asi beġere veiri veiġari beġene veiri ġana.

²⁹ Ġia tu rakava mabarari na ġevonuvonu-raġeto, veiġa rakavari, mata-ġaniġani, tuġamaġi barubaru, mama, vaġideba, veġareveġare, veribaġani e tarimarima vaġa-ketori veiġari, veroritore,

³⁰ guruġa vemuriġoi, Barau ġeiau-rakavaiani, seġafore rakavarakava, kira-sirivaġi, e veiavi; vekiraġi-varaġevaraġe, rakava vei dabarari variġuri ġevaġa-reforini, sina-tama garori asi ġeseġaġirini;

³¹ asi ġetuġamaġi-fakani, asi tuġamaġi-kauri tarimari, veuravini asi ribari tarimari, vevetuġaġwa asi ribari tarimari.

³² Oba, ġia tu ma ribari, Barau ġena veġausina o sisiba tu ekirani, vei rakava tarimari tu beġe maseni. Senaġi ġia na tu ġeveirini, ma dia ġia na moġo ġeveini, senaġi tarimarima kotari na ġeveirini maki ġeiau-namorini e ġeġabi-raġerini.

2

Barau ġena vevaġa-maoro

¹ A ġoi tarima tari ovaġa-maororini ma kerereri ai oragani tarimamu, ġoi tu asi ġemu vekira-ġuniġau laina. Ġoi na tarima ta ovaġa-maoroani, ma ġena veiġa rakavari okiraġirini nai tu, ġoi tauġemu moġo ovevaġa-metoni e ovevaġa-kotani. Korana tu tarima ta ġena veiġa rakavari okiraġirini veiġari tu, ġoi tauġemu na maki oveirini.

² Ġita tu ribara, Barau na moġesi veiġa rakavari ġeveirini tarimari bevaġa-maoro vinirini, ma meto bevinirini tu roroġoto.

³ Kamasi ġotuġamaġini, ġomi, tarimarima kika moġo, na tarimarima kotari ġovevaġa-maoro vinirini, ma nuġanai tu ġomi tauġemi na maki mo veiġa rakavari tu ġoveirini. Ġomi ġotuġamaġini Barau ġena vevaġa-maoro ġenana tu boġo raga-maġurini?

⁴ Ba Barau ġena namo baregona, e nuġana eġabi-tariani, e vevaġa-gwaġiġi iatari ai tu asi tauri ġotoni? Ba asi ġoribani Barau ġena namo baregona anina tu, ġomi boġono vetuġamaġi-kure ma boġono raka-kure ġana?

⁵ Senaġina ġomi nuġami tu ġovaġa-gwaġiġirini, ma asi ġovetuġamaġi-kurenini. Maiġesi ġoveini tu tauġemi iatami ai ġemi meto iatai-iatai ġolabulabu-kaurini. Ma Barau ġena Kota baranai ġena vevaġa-maoro roroġotona

beveiani mo ġaro ai vau ġena baru bevaġa-foforiani, benamo ġemi veiġa metori boġo ġabirini.

⁶ Barau na “tata karakara ġoveito ilailari ai tauri ma bevinimini.”

⁷ Tarima kotari tu ġobiri ġevetoreni veiġa namori ġeveini, Barau marevana, e ġabiraġena, ema asi bedokoni maġurina ġevetauani. Barau na ġia tu maġuri vanaġivanaġi bevinirini.

⁸ A tarima kotari tu tauġeri ġeri namo moġo ġevetaurini, ema guruġa e maġuri moġonina tu ġeruġarini, ma rakava veiġari ġekorana-iaġirini. Ġia tu Barau na beiau-rakavarini ma baruna ġesi.

⁹ Beġe vei-rakavani tarimari mabarari tu rakava metona baregona ema midigumidigu baregona beġe ġabiani. Mo tu Iuda tarimarima ġeri ai beġe ġora-guineni, ma murinai tu irau bese tarimari ġeri ai maki beġe ġorani.

¹⁰ Senaġi veiġa namori beġe veini tarimari mabarari ġeri tu, Barau na mareva baregona e vemataurai barana ema maino bevinirini: Iuda tarimari ġeri ai guine, ma murinai tu irau bese tarimari ġeri ai maki.

¹¹ Korana Barau na tarimarima mabarari maġuri sebonai moġo eġabiraġerini, ġeri veiġa loriri ai voiri evinirini.

Barau na Iuda tarimari e irau bese tarimari bevevaġa-maoro vinirini

¹² Irau bese tarimari tu Mose ġena taravatu asi ribari, nuġanai ġevei-rakavani, moġeri mabarari beġe mase-buġani, (Barau na bekota-vinirini), taravatu murikanai enabe asi ribari; ema Iuda tarimari tu taravatu ma ribari, senaġina ġevei-rakavani tarimari mabarari tu taravatu na bevaġa-maoro vinirini.

¹³ Korana taravatu ġeseġaġiani moġo tarimari, Barau ġoiranai tu dia vei-iobukaiobuka tarimari, senaġi taravatu ġekorana-iaġiani tarimari vau, Barau na ekiraġirini vei-iobukaiobuka tarimari.

¹⁴ Oba, irau bese tarimari tu asi ġeri taravatu, senaġi ġeri maġuri nuġari ai taravatu na ekiraġirini veiġari tu ġeveirini. Moġeri mabarari tu ġeri taravatu ai ġeiaġoni, a ġia tu asi ġeri taravatu senaġi.

¹⁵ Ġia ġeri veiġa na evaġa-foforiani, Barau ġena taravatu na eura-vinirini veiġari tu ġia loruri ġuturi ai etorerito. Maġa tu nuġari iaġasiri na maki evaġa-moġonirini, korana tu ġaro tari ai ġeri tuġamaġi na evaġa-daġa-raġerini, ma ġaro tari ai tu gogobari eragani.

¹⁶ Au na Vari Namona aġobata-iaġiani tu, Barau na tarimarima ġena veiġa e tuġamaġi vekuretoġari Iesu Keriso ġenana bevevaġa-maoro vinirini ġaronai vau beġe foforini.

Iuda tarimari e taravatu

¹⁷ A ġoi Iuda tarimamu tu kamasi otuġamaġini? Oba, ġoi tu ovekiraġini Iuda tarimamu. Ma ġoi tu taravatu ġenai ovetabekauni, e oveiavini, okirani, ġoi tu Barau ġena bese tarimamu.

¹⁸ Ma okirani, Barau tu ma ribamu e ġena ura veiġa namo vedaureari e rakavari oġita-learini, korana taravatu na evaġa-ribamuni nai.

¹⁹ Ġoi okirani, moġoni ġoi na mata-bubu tarimari boġori-kaurini, ema ġoi tu mukunai ġetanuni tarimari ġeri kere mamana;

²⁰ ema vei-babobabo tarimari kira-rogori tarimamu, e mero keikeiri ġeri vevaġa-riba tarimamu, korana tu taravatu nuġanai iaunega ema guruġa moġoniri ġetanuni dagarari tu ma ribamu.

²¹ Ġoi na karomu tu ovaġa-ribarini, a ġoi tauġemu tu asi ovevaġa-ribani. Tarimarima oġobata-vinirini nai tu okirani, “Asi boġono lema,” otoni, a ġoi tu olemani.

²² Tarimarima asi beġene veġura-vanaġi otorini, ma ġoi tu oveġura-vanaġini. Kwaivakuku oiau-rakava-vinirini, senaġi ġeri rubu nuġari farefareri tu olemarini.

²³ Taravatu ovaġa-raġe lelevaġirini nuġanai tu, Barau ġoi na tu asi ogubakauani, ġena taravatu tu oseġafore-vinirini.

²⁴ Buka Veaġai tu iniġesi ekirani, “Barau arana irau bese tarimari na vekaravari ai ġekira-fitoġaiani, korana tu ġomi ġemi kira-sirivaġi lorinai.”

²⁵ Mero tauġani kefiru lamavaġi veġana tu ma tauna, bema taravatu bokorana-iaġirini nai. Senaġi bema taravatu okira-sirivaġi vinirini nai, ġemu kefi-lamavaġi veġana tu asi taunai beiaġoni, ema ġoi tu kefina asi ġelamavaġiato tarimana kavanai.

²⁶ Iräu bese tarimari tu kefiru asi ġelama-vaġito. Senaġi bema taravatu maġuriru korikori ġeveini nai tu, Barau ġoiranai ġia tu kefiru ġelama-vaġirito tarimari kavana, ene?

²⁷ Oba, taravatu bukana tu ġemu ai, ema kefiru tu ġelama-vaġiato. Senaġina bema ġoi na taravatu okira-sirivaġiani nai tu, taravatu ekorana-iaġiani tarimana, mai tu iräu bese tarimana, Kota seanai betanuni, benamo ġoi bevaġa-kotamuni. Aba, tauġani rekenai tu kefina asi ġelama-vaġiato, senaġi.

²⁸ Bema tarima ta tu arana korina moġo Iuda tarimana ema kefi-lamavaġi maki murika ema tauġani kefina vetoġana korina moġo nai tu, ġia tu dia Iuda tarimana korikori.

²⁹ Asiġina ġinavaġi. Iuda tarimana o Barau ġena bese tarimana korikorina tu deikara nuġana iaġasina na ema ġena tuġamaġi na evaġa-foforiani, ġia tu Iuda tarimana. Ema kefi-lamavaġi veġana maki tarimarima loruna ġutunai bene fofori. ġia tu dia taravatu guruġari ġetorerito moġeri korana-iaġiri ai beġorani. Asiġina. Ġia tu Barau Iaukana na tarimarima nuġana iaġasinai beveiani dagarana. Mo tarima moġa tu dia tarimarima na bevaġa-raġeani, senaġi Barau na bevaġa-raġeani.

3

¹ Iuda tarimari na iräu bese tarimari ġevanaġirito? Mero tauġaniru kefiru ġelama-vaġirini ġenana tu kara namona ġedoġariato?

² Aba, dagara namori ġutuma ġedoġaririto! Tovotovonai tu Barau na ġia muruna guruġari korikori evaġa-ġauna-iaġirito.

³ Ma bema Iuda tarimari kotari Barau ġenana ġeraka-veġitato, asi ġeri veġabidadama nai tu aiġesi? Moġoni, Iuda tarimari kotari tu asi ġeri veġabidadama; senaġi ġia asi ġeri veġabidadama lorinai, Barau ġena kiraġitore maki asi taunai beiaġoni ba?

⁴ Asiġina ġinavaġi! Barau tu moġoni veġata, ġena kiraġitore asi eketoni, ma tarimarima tu ġeġofaġofani. Buka Veaġai ekirani kavana, “Barau, ġoi boguruġani nai tu, beġe vaġa-moġonimuni, ema Kotai beġe ġofaġofa-iaġimuni nai maki bovaġa-darererini.”

⁵ Tarima kotari na ġeri vefafauġau guruġari beġe kiraġirini, beġe kirani: Bema ġita ġera veġa asi roroġotori na tu Barau ġena vei-iobukaiobuka etore-fofori ginikauani nai, ġita tu kara bita toni? Bita kirani, Barau na ġena baru veġari ġita iatarai ema-torerini nai tu maoro ba?

⁶ Asiġina, Barau ma ġena maoro. Bema Barau tu asi roroġoto nai tu, ġia na tanobara mabarana tu kamasi bevevaġa-maoro viniani?

⁷ Tarima ta ma bevefau-ġauni, bekirani, “Bema au ġegu ġofaġofa na Barau ġena guruġa moġoniru evaġa-fofori ginikaurini ema ġia marevana

evaḡa-baregoani nai tu, kara dainai au tu roḡo mo evaḡa-daḡaguni rakava tarimagu etoni?”

⁸ Mo guruḡa tu babo, noḡa moḡo ini guruḡa kavana, “Rakava sivei, be namo bene fofori.” Tarima kotari na ḡai ḡevaḡa-rakavamani, ḡeḡofaḡofa-iaḡimani, ḡekirani, ḡai tu maḡesi ḡakirani ḡetoni. Maḡesi ḡai ḡeḡofaḡofa-iaḡimani tarimari Barau na voiri metona bevinirini tu asi vetoukauna, korana ḡeri ḡofaḡofa lorinai.

Tarima ta asi iobukaiobuka

⁹ Benamo kara ma bita toni? Ḡita Iuda tarimara moḡo namo, a irau bese tarimari tu asiḡi? Asiḡina ḡinavaḡi! Varau bita kiraḡia, Iuda tarimari e irau bese tarimari vekaravari ai ta tu asi ḡena rakava asi bita toni.

¹⁰ Buka Veaḡai tu maḡesi ḡetoreato:

“Tarima ta asi iobukaiobuka,
sebona kwarikwari ta maki asiḡina;

¹¹ tarima ta asi etuḡamaḡi-roroḡotoni,
ta na maki Barau asi evetauani.

¹² Mabarari ḡeraka-doḡe-muriḡito,
ḡia mabarari veiḡa iobukaiobukana tu asi ḡeveiani,
mabarari asi ḡevei-roroḡotoni,
ta veiḡa namo asi ribana,
sebona kwarikwari ta maki asiḡi.

¹³ Ḡia godokari mase guriri kouḡari kavana;
meari na ḡofaḡofa rakavari ḡekiraḡirini.

Ḡeri guruḡa na mase ḡevaḡa-ḡorarini,
noḡa moḡo mota foisiniri
ḡia bibiḡari ai ḡetanuni.

¹⁴ Mururi ai tu vevane e vekira-barubaru na ḡevonu-fokafokato.

¹⁵ Ḡia tu ḡeḡarimoḡi-rakavani vevaḡi ema vevaḡideba veiḡari ai;

¹⁶ ḡeri iaḡoiaḡo gaburi ai tu vei-rovorovo e rakava ḡeiaḡuini.

¹⁷ Maino maḡuriri tu asi ribari.

¹⁸ Asi ḡeri vegubakau ta Barau ḡenai.”

¹⁹ Ḡita ribara, maḡeri taravatu guruḡari na kara dagara ḡekiraḡiani tu, mo deikara taravatu gaburenai ḡetanuni tarimari ekirarini. Moḡa tauna tu, taravatu gaburenai ḡetanuni tarimari ema tarimarima mabarari maki mururi na kara ta asi beḡene kiraḡia, ema mai tanobarai tarimarima mabarari Barau ḡoiranai beḡene ruḡa-tari ma ḡeri vei-rakava.

²⁰ Moḡa lorinai taravatu korana-iaḡina maḡurinai tarima ta asiḡina ḡinavaḡi Barau ḡoiranai Barau na bekiraḡi-foforiani, ḡia tu vei-iobukaiobuka tarimana. Asiḡina, taravatu ḡenana ḡita na vei-rakava taribaiani.

Vei-iobukaiobuka tu veḡabidadama ḡenana eiaḡomani

²¹ Senaḡi initoma kamara dabarai Barau na tarimarima ekiraḡirini vei-iobukaiobuka tarimari etoni dabarana tu bema fofori-ginikau. Mo tu dia taravatu korana-iaḡina maḡurinai. Asiḡina. Mai tu Mose ḡena taravatu na ema peroveta tarimari ḡeri guruḡa-fofori ai ḡekiraḡiato dabarana na.

²² Mai vei-iobukaiobuka Barau ḡenana eiaḡomani tu Iesu Keriso beḡe ḡabidadama-viniani tarimari mabarari na beḡe ḡabiani. Ta tu asi irau.

²³ Korana tarimarima mabarara tu rakava tarimara moḡo, be mabarara Barau marevana namona ḡenana taveḡitato.

²⁴ Senaḡi Barau ḡena varevare-bara nuḡanai asi ḡera kerere etorani, korana Keriso Iesu ḡenana ḡera rakava ḡerina evaḡa-maḡurirato.

²⁵ Barau na Iesu tu ginitaḡo varevarenai evaḡa-iaḡoato, korana tari-marima ḡia ḡenana bene ḡabi-raḡeri ḡana. Moḡa maḡurina tu iniḡesi: Deikara ḡia raranai beveḡabi-dadamani tu, Barau na ḡena rakava be-tuḡamaḡi-fitoḡarini. Barau na mo maḡuri eveiato anina tu, ḡia ḡena iobukaiobuka bene vaḡa-foforia ḡana. Guinenai rakava ḡeveito-ḡoi nai tu, eḡita-daḡaseḡirito-ḡoi, rakava voire asi eveito-ḡoi.

²⁶ Ma maitoma Iesu tu ginitaḡo varevarenai evaḡa-iaḡoato korana ḡena vei-iobukaiobuka bene vevaḡa-ḡita-iaḡiri initoma ḡana, be ḡia ḡena iobukaiobuka bene fofori, e ḡia na Iesu Keriso ḡeḡabidadama-viniani tari-mari maorori bene kiraḡiri.

²⁷ Be ḡita tu kara bita veiavi-iaḡiani? Vekokoroku tu asi ḡena gabu ta. Kara dainai? Taravatu takorana-iaḡiani nai? Asiḡi, maḡuri tu veḡabidadama maḡurina moḡo bita doḡarini.

²⁸ Korana bitana riba-maoro, tarimarima tu veḡabidadama lorina Barau na eḡabi-raḡerani, a dia taravatu bita korana-iaḡiani nai.

²⁹ Be Barau tu Iuda tarimari moḡo ḡeri? Ḗia tu dia irau bese tarimari maki ḡeri Barau? Aba, ḡia tu irau bese tarimari maki ḡeri Barau,

³⁰ korana Barau tu sebona moḡo. Ḗia na tauḡaniri kefirī ḡelama-vaḡito tarimari veḡabidadamai maorori bekiraḡini, ema kefirī asi ḡelama-vaḡirito tarimari maki maorori bekiraḡini mo veḡabidadama sebona na.

³¹ Moḡa nuḡanai veḡabidadama na taravatu seḡukana tavaḡiani? Asiḡina ḡinavaḡi! Senaḡi taravatu tavaḡa-ruḡa gigitariani.

4

Aberahamo ḡena veḡabidadama

¹ Ḗita tu kara ma bita kiraḡiani, senera Aberahamo na mai maḡuri maḡa ema ḡoitaḡoato iatanai?

² Bere moḡoni, Aberahamo ḡena ḡauvei e veiḡa bakunai Barau ḡoiranai vei-iobukaiobuka tarimanai bere iaḡo tu, tauḡena bere vekiraḡi, ḡia tu kwalimukoru na bere vekiraḡi. Senaḡi ḡia Barau ḡoiranai tu asi ḡena vekokoroku gabuna ta.

³ Buka Veḡa nuḡanai tu kara etoni? Buka Veḡa nuḡanai tu ekirani, “Aberahamo na Barau ḡena guruḡa evaḡa-moḡoniatō nai, Barau ekirato, ḡia tu vei-iobukaiobuka tarimana etato.”

⁴ Tarima ta eḡauveini, benamo voina beḡabiani. Ḗia mo eḡauveini nai, voina eḡabiani moḡa tu, ḡevarevare-viniani dagarana asi bita toni. Asiḡina ḡinavaḡi. Mo tu ḡia ḡena ḡauvei voina veḡata.

⁵ Senaḡi tarima ta, ḡia tu ḡauvei o veiḡa ta asi eveiani, senaḡi ḡia tu Barau, rakava tarimari vei-iobukaiobuka tarimari ai evaḡa-iaḡorini Barauna, ḡenai eveḡabidadamani. Mai tarima maḡa tu ḡena veḡabidadama lorina, Barau na ekiraḡiani, ḡia tu vei-iobukaiobuka tarimana etoni.

⁶ Davida na maki mo guruḡa sebona ekiraḡiato. Maiḡesi tarimari tu ekirarito, beḡe iakuni etato. Mo tu ḡauvei o veiḡa tari asi ḡeveirini, senaḡi Barau, rakava tarimari asi ḡeri vei-rakava etorini Barauna, na ḡia tu ekirarini, vei-iobukaiobuka tarimari etorini. Davida ekirato,

⁷ “Ḗeri kira-sirivaḡi etuḡamaḡi-fitoḡarini, e ḡeri rakava eḡabi-vaḡirito tarimari tu beḡe iakuni.

⁸ Vereḡauka na ḡena rakava iatanai asi ma beiavi-kaurini tarimana tu beiakuni.”

⁹ Vevaḡa-namo ema iaku maiḡesiri tu tauḡaniri kefirī ḡelama-vaḡirito tauri moḡo ḡeri, ba tauḡaniri kefirī asi ḡelama-vaḡirito tauri maki ḡeri? Varau bita

kira, Aberahamo tu ġena veġabidadama lorinai, Barau ekirato, ġia tu vei-iobukaiobuka tarimana etato.

¹⁰ Aitoma ġia vei-iobukaiobuka tarimanai eiaġoto? Tauġanina kefina ġelama-vaġiato murinai, ba tauġanina kefina roġosi roġo beġene lama-vaġia nuġanai. Ġia tu dia tauġanina kefina ġelama-vaġiato murinai vauro Barau ekirato, ġia tu vei-iobukaiobuka tarimana etato. Asiġina. Ġia tu tauġanina kefina roġosi roġo beġene lama-vaġia nuġanai, vei-iobukaiobuka tarimanai eiaġoto.

¹¹ Ġia tauġanina kefina tu gabi vauro ġelama-vaġiato. Mo tauġanina vauro ma ġelama-vaġiato moġa tu, ġia tauġanina roġosi roġo beġere lama-vaġia nuġanai vei-iobukaiobuka tarimanai eiaġoto, moġa vetoġana moġo ma evaġa-moġoniato. Monana Aberahamo tu Barau ġevaġa-moġoniani tarimari tamari ai eiaġoto, enabe tauġaniri kefiri asi ġelama-vaġirito senaġi. Korana Barau ġevaġa-moġoniani tarimari tu, Barau na eġabi-raġerini vei-iobukaiobuka tarimari.

¹² Ema ġia tu tauġaniri kefiri ġelama-vaġirito tarimari maki tamari. Au na dia tauġaniri kefiri ġelama-vaġi-kavarito tarimari akiraġirini. Asiġina. Senaġi tamara Aberahamo tauġanina kefina roġosi beġere lama-vaġia nuġanai, Barau eġabidadama-viniato kavana, ġia na maki Barau moġesina ġeġabi-dadama-viniani tarimari akiraġirini.

Taravatu e veġabidadama

¹³ Barau na Aberahamo ekira-toreato, ekirato, ġia ma garakana ġesi na mai tanobara beġe ġaunaiani. Mai kiraġitore guruġana Barau na ekiraġiato tu, dia Aberahamo na taravatu ekorana-iaġiato nai, senaġi Barau eġabidadama-viniato nai, benamo vei-iobukaiobuka tarimanai eiaġoto.

¹⁴ Bema taravatu ġekorana-iaġiani tarimari na tanobara beġere ġaunaia nai, veġabidadama tu asi ġena namo ta, ema kiraġitore guruġana maki guruġa korina moġo.

¹⁵ Aba, taravatu na tu Barau ġena baru baregona evaġa-ġoraiani. Senaġi bema taravatu asiġina tu, tarima ta na taravatu ta asi beleaiani.

¹⁶ Moġa lorinai, guruġatore tu veġabidadama ġenana eiaġomani, be Barau ġena namo e varevare-bara nuġanai guruġatore tauri moġoniri Aberahamo ma garakana ġesi ġeri ai beġe ġorani. A dia taravatu gaburenai ġetanuni tarimari moġo ġeri ai, senaġi Aberahamo ġena veġabidadama nuġanai ġetanuni tauri maki ġeri. Aberahamo tu ġita mabarara tamara.

¹⁷ Buka Veaġai evetoreto kavana: “Au na ġoi tu tanobara ġutuma tamari ai avaġa-iaġomuto.” Mai Aberahamo na evaġa-moġoniato Barauna ġoiranai Aberahamo tu ġita tamara. Mai Barau na mase tarimari ma evaġa-maġuri ġenoġoirini ema tanobarai asi ġeġorato dagarari evaġa-ġorarini.

¹⁸ Aberahamo ġena tuġamaġikau noġa asi vaġa-tubukauna dagarana ta, senaġi Barau ġena guruġai evetuġa-maġi-kauto, ma evaġa-moġoniato lorinai, tanobara ġutuma tamari ai eiaġoto. Barau na ekira-toreato ilailanai: “Ġoi garakamu tu beġe vovokani visiġu kavana.”

¹⁹ Aberahamo mo negai ġena laġani tu dori sinau sebna (100), ma tauġanina maki emoirato, ma mase tauġaniri ilailari ai varau eiaġoto, e Sara maki asi ilaila ġia mero ta beġabiani riba. Ġia na maiġeri tu eġitarito, senaġi maiġeri na ġia ġena veġabidadama asi veġata ġevaġa-moiraiato.

²⁰ Moġa nuġanai ġia asi etuġamaġi-iauvoiauvoto, asi edaradarato, ema asi eġareva-ġarevato maki Barau ġena guruġatore iatanai. A ġia tu ġena veġabidadama moġo evaġa-gwaġiġiato, benamo Barau moġo evaġa-raġeato.

²¹ Korana ġia tu nuġana mabarana ġesi eribato, Barau ma seġukana, kara ekiraġi-toreato dagarana tu bevaġa-ġoraiani.

²² Moġesina naima Barau na ekiraiato, “Ġia tu vei-iobukaiobuka tari-mana,” etato.

²³ Mai guruġa maġeri, “Ġia tu vei-iobukaiobuka tarimana,” tu dia Aberahamo ġereġana ġena moġo ekiraġiato,

²⁴ senaġi ġita ġerai maki ekiraġiato. Ġita ġera Vereġauka Iesu Keriso mase na evaġa-variġisi ġenoġoiato Barauna tavaġa-moġoniani tarimara maki Barau na bekirarani, vei-iobukaiobuka tarimara, betoni.

²⁵ Barau na Iesu etuġu-iaġomaiato, tanobarai emaseto, ġita ġera rakava benema voi-vaġiri ġana. Ma ġita Barau na vei-iobukaiobuka tarimarai bene kiraġira ġana uranai, mase na ma evaġa-variġisi ġenoġoiato.

5

Barau na ġita vei-iobukaiobuka tarimara etato

¹ Moġa lorinai ġita tu ġera veġabidadama lorinai, Barau ekirato, ġita tu vei-iobukaiobuka tarimara etato, ma ġera Vereġauka Iesu Keriso ġenana Barau ġesi maino taġabiato.

² Ġita tu Iesu Keriso bakunai veġabidadama ġenana Barau ġena namo e varevare-bara nuġanai bita bere-toġa, benamo nuġanai taruġa-taġoni. Ema taiakuni, korana tavetuġamaġikauni, Barau na vau ġia marevana baregona bevinirani.

³ Dia moġa moġo, senaġi ġera midigumidigu ai maki bitana verere, korana ma ribara, midigumidigu na vevaġa-gwaġiġi evaġa-ġoraiani

⁴ Vevaġa-gwaġiġi na veribaġani bita vaġa-darererini, ma veribaġani bita vaġa-darererini tu, Barau marevana baregona bita tuġamaġi-kauani.

⁵ Mai tuġamaġikau na tu asi bevaġa-dabara dokorani, korana tu Barau na Iauka Veaġa evinirato, maiġa ġenana ġita lorura ġuturi ai Barau na ġena veuravini ebubu-ġuraiato.

⁶ Ġoseġaġi, ġita tu roġo asi kokorera nuġanai, Barau na eġabi-toreato ġaronai varau Keriso emaseto, ġita, Barau tatuġamaġi-fitoġaiani tarimara, bene voi-ġenoġoira ġana.

⁷ Tarima namona uranai ta bemaseni ba? Gwaġiġi! Senaġi tarima namo vedaureana uranai tu, betaġu ta bevetuġamaġi-kwalimuni, benamo bemaseni riba.

⁸ Senaġi toma mainai tu Barau ġena veuravini ema vaġa-foforiani: Ġita roġo rakava tarimara nuġanai, Iesu tu varau emaseto ġita dairai.

⁹ Ribara, Iesu rarana na bema iarevara, benamo asi ġera rakava besi. Moġa lorinai ġia bakunai, Barau ġena baru baregona bevaġa-foforiani ġaronai bevaġa-maġurirani.

¹⁰ Ġita roġo Barau tavetari-viniato-ġoi nuġanai, Barau Natuna ġena mase na Barau ġesi ma evaġa-veġata ġenoġoirato. Toma ġita tu Barau ġatanai ma taiāġo-ġenoġoito, moġa lorinai Iesu emaġuri-ġenoġoito ġenana, vevaġa-maġuri maki bita ġoitaġoani.

¹¹ Dia moġa moġo, senaġi ġera Vereġauka Iesu Keriso bakunai Barau ġenai bitana verere, korana Iesu Keriso ġenana ġita Barau ġesi maino bitama ġabia ema bitama veġata.

Adamu tu mase evaġa-ġoraiato, Keriso na tu maġuri evaġa-ġoraiato

¹² Ġita ribara, tarima sebna evei-rakavato, benamo ġia ġenana rakava tanobarai ema bere-toġato. Ma rakava na mase eġabi-iaġomaiato. Moġesina

naima mase na tarimarima mabarari eguguvirito, korana tarimarima mabarari ġevei-rakavato.

¹³ Moġa anina tu, vei-rakava tanobarai tu eġora-guineto, a Mose ġenana taravatu tu gabi vauro eiaġomato. Senaġi bema taravatu asiġina nai, Barau na vei-rakava, o sikira taravatu ġedaġa-seġiani rakavana, tarima ta ġenai asi bekiraġiani.

¹⁴ Senaġi ribara, Adamu ġena nega na beiaġoma mo Mose ġena negai, tarimarima tu mase ġena seġuka gaburenai ġetanuto-ġoi. Oba, Barau ġena vevaġa-naġi guruġana ta tu asi ġekira-sirivaġi viniato Adamu na eveiato kavana, senaġina ġia mabarari maki mase ġena seġuka gaburenai ġetanuto-ġoi.

Adamu na ġoirai vau beiaġomani tarimana moġo ema vaġa-foforiato. (Mo tu Keriso).

¹⁵ Senaġi mai varevare dagarana asi voina maiġa tu irau, dia mo Adamu ġena vei-rakava ġesi ilaila. Mai tarima sebna ġena vei-rakava dainai, tarima ġutuma ġemaseto. Senaġi Barau ġena namo e varevare-bara ema varevare dagarana mo vei-rakava ġena seġuka evanaġiato: Barau ġena mai namo baregona ema varevare dagarana tu tarima sebna, Iesu Keriso, ġenana eiaġomato, ma tarimarima ġutuma ġeri ai evebubu-riġoto.

¹⁶ Barau ġena varevare dagarana tu irau, dia mo tarima sebna, Adamu, ġena vei-rakava kavana: Vei-rakava sebna moġo eġorato ġenana, Barau na tarimarima e tanobara mabarana ekota-viniato, ma rakava voina metona baregona iatarai etoreato. Senaġi Barau ġena varevare dagarana rakava vovoka muriri na ema bere-rosito, monana tarimarima tu vei-iobukaiobuka tarimari ai evaġa-iaġorito.

¹⁷ Moġoni, mo tarima sebna na mo vei-rakava eveiato, monana tanobara mabarana mase ġena seġuka gaburenai etanuni. Mase tu mai vei-rakava eveiato tarimana ġenana eiaġomato tanobara ġana. Senaġina tarima sebna, Iesu Keriso, ġia na eveiato dagarana na mo vei-rakava eveiato tarimana ġena veġa seġukana na evanaġiato. Tarimarima mabarari, Barau ġena namo ma varevare-bara barego lelevaġina ema vei-iobukaiobuka varevarena beġe ġabiani tarimari tu, Iesu Keriso ġenana maġuri beġe ġabiani, benamo kini kavana beġe vereni.

¹⁸ Mo Adamu ġena vei-rakava sebna dainai, Barau ekirato, tarimarima mabarari tu vei-rakava tarimari ema rakava voina beġe ġabiani etato. A Keriso ġena veġa iobukaiobukana sebna ġenana, tarimarima mabarari vei-iobukaiobuka tarimari ai beġe iaġoni ma maġuri beġe ġabiani riba.

¹⁹ Ema tau sebna ġena kira-sirivaġi na tarimarima vovoka vei-rakava tarimari ai ġeiaġoto. Moġa ilailana, tau sebna ġena seġaġi na tarima ġutuma iobukaiobuka tarimari ai bevaġa-iaġorini.

²⁰ Betaġu taravatu etore-kauato tu rakava bene barego ġana. (O sikira, taravatu ġenana tarimarima ġeri rakava mabarari beġene fofori-ginikau). Senaġi vei-rakava ebaregoni gabunai tu, Barau ġena namo e varevare-bara maki ebarego-lelevaġini.

²¹ Guinena tarimarima tu vei-rakava ġena veġitaġau seġukana gaburenai ġetanuto, monana mase eġorato. Moġesina kavana, Barau ġena namo e varevare-bara na tu vei-iobukaiobuka evaġa-foforiani, ma maġuri vanaġivanaġi ġera Vereġauka Iesu Keriso ġenana eġabi-iaġomaiani ġita ġerai.

6

Rakava ġenai tamaseto, Keriso ġena maġuri nuġanai ġita tu maġuri

¹ Be kara bita toni? Ba sikira, rakava veigari sivei-genoogoi genoogoiri, be Barau na gena namo e varevare-bara gerai bene vaqa-fofori barego-lelevagiri?

² Asigina ginavaqi! Gita vegebidadama tarimara tu varau tamaseto rakava genai, (mai tu rakava magurina genana tavegitato); ma kamara dabarai tu rakava magurina nuhanai rogo ma bita tanuni?

³ Gita babatise tagabiato anina tu maiga: Gita na mo babatise tagabiato tu Keriso Iesu gena maguri nuhanai tabere-toгато, ma mo babatise tagabiato nuhanai, gita tu gia gesi tamase-sebonato. Ba gomi maiga tu asi ribami?

⁴ Babatise tagabiato anina tu, gita maki Keriso gesi tamase-vegogoto, ma Barau na Keriso gesi eguri-sebonarato. Benamo Tamara marevana ema segekana baregona na Keriso mase na ma evaga-variigisi genoogoiato kavana, gita maki maguri variqu gerageranai bitana tanu.

⁵ Bema gita Keriso gesi tasebonato, benamo gia emaseto kavana gita maki tamaseto nai, moqoni, gia Barau na mase na evaga-maguri genoogoiato kavana, gita maki moqesi Barau na bevaqa-maguri genoogoirani vegata.

⁶ Korana gita ribara, gita gerai tarima guinena moqa tu Keriso gesi vaqa-sebo satauro ai geraqeto. Mo veiga eqorato tauna tu, rakava eveito-qoi tauqanina ma gena ura rakavari gita qerana bene koki-fitoqa moqovaqia, be gita veiga rakavari qeri tuqu-rakaorakao tarimarai asi ma bitana iaqo gana.

⁷ Korana mase tarimana na veiga rakavana ta asigina ginavaqi ma bevei-genoogoi.

⁸ Bema gita Keriso gesi tamase-vegogoto nai, moqoni vegata taribani, Keriso gesi maki bita tanu-vegogoni.

⁹ Korana ma ribara, Keriso mase na tu varau evariigisi-genoogoiato, be asi ma bemase-genoogoini; mase asi segekana gia genai.

¹⁰ Keriso mo emaseto nai tu, rakava gena segeka evaga-keto-moqovaqiatu. A toma mai maguri gia na etanu-iaqiani maiga tu, Barau gena moqo etanuni.

¹¹ Mo dabara sebonai gomi maki tauqemi iniqesi boqono vekiraqi: Gomi tu veiga rakavari qeri ai tu varau qomaseto, ma Keriso Iesu gena maguri nuhanai gomi tu maguri gotanuni Barau gena.

¹² Moqa lorinai rakava na mani ma berakavani tauqanina maniqa genana qomi asigina ginavaqi bene qori-kaumi. Korana bema mani ma berakavani tauqanina maniqa rakava na beqori-kauani nai, qomi tu gia gena ura rakavari boqo korana-iaqirini.

¹³ Tauqaniami legana ta rakava asi boqono vinia, be veiga rakavari veiveiri farefarenai asi bene vaqa-iaqoa. A qomi tu mase na ma evaga-maguri genoogoiato lorinai, tauqaniami mabarari Barau boqono vinia. Tauqaniami legari mabarari maki Barau boqono vinia, veiga maorori beqene vei gana.

¹⁴ Be rakava na qomi asi ma bene qori-kaumi, korana qomi tu dia taravatu gena segeka gaburenai gotanuni. Asigina. Gomi tu Barau gena namo ema varevare-bara nuhanai gotanuni.

Ve-iobukaiobuka gena vetuqunaqi tarimara

¹⁵ Be kara maia? Veiga rakavari rogo bitana vei, korana gita tu dia taravatu gaburenai tatanuni, ne Barau gena namo e varevare-bara nuhanai tatanuni, be bisini vei-rakava ba? Asigina ginavaqi!

¹⁶ Gomi asi ribami, bema tauqemu tarima ta gena tuqu-rakaorakao tarimamu ai ovevaqa-iaqoni, garona bono seqaqia otoni nai, qoi tu mo tarima gena tuqu-rakaorakao tarimamu ai varau oiaqoni. Mo tu rakava gena vetuqunaqi tarimamu ai boiaqoni, benamo dokonai tu boa maseni. O

Barau ġena guruġa bokorana-iaġiani, benamo vei-iobukaiobuka tarimamu ai boiaġoni.

¹⁷ Barau sitanikiu-vinia, korana ġomi tovotovonai tu rakava ġena tuġu-rakaorakao tarimami, senaġi toma tu Barau ġena guruġa moġonina ma nuġami mabarari ġesi ġokorana-iaġiani, ġevaġa-ribamito-ġoi ilailanai.

¹⁸ Benamo Barau na rakava ġenana eruġa-vaġimito, ma vei-iobukaiobuka ġena vetuġunaġi tarimami ai ġoiaġoto.

¹⁹ Au na mai maġuri maiġeri tu tuġu-rakaorakao tarimari ġeri maġuri ai ama kiraġirini boġono tuġamaġi-fakari ġana, korana ġomi tauġani rekenai tu roġo asi kokoremi. Ġomi guinenai mani tauġanimi legari maniġeri tu veiġa mirori ema veiġa rakava kwaikwairi ġeri tuġu-rakao-rakao dagarari ai ġovaġa-iaġorito. A inıtoma mani tauġanimi taviri maniġeri tu guinenai rakava ġenai ġoveirito ilailanai, vei-iobukaiobuka ġena vetuġunaġi dagarari ai boġono vaġa-iaġori, be beġene veaġa-tanu.

²⁰ Ġomi rakava ġena tuġu-rakaorakao tarimami ai roġo ġotanuto-ġoi neganai, vei-iobukaiobuka tu asi ġena gabu ta ġomi ġemi maġuri nuġanai.

²¹ Ġomi mo veiġa ġoveirito moġeri ġerina tu kara namona ġoġoitaġoato, ei? Moġeri veiġa toma ġotuġamaġi-ġenoġoirini nai, ġemaiakamini. Moġeri veiġa magonai tu mase boġo ġoitaġoani.

²² Senaġi ġomi toma tu rakava nuġana na eġabi-vaġimito, ma Barau ġena tuġu-rakaorakao tarimami ai ġoiaġoto. Barau ġena tuġu-rakaorakao tarimami ai boġo iaġoni, monana namo boġo doġariani dagarana na tu veaġa-bara tarimami ai boġo iaġoni. Benamo monana ġomi maġuri vanagivanagı boġo ġabiani.

²³ Korana rakava voina tu mase, a Barau ġena varevare ġera Vereġauka Keriso Iesu ġenana bita ġabiani dagarana tu maġuri vanaġivanaġi.

7

Ġita tu dia taravatu ġena seġuka gaburenai tatanuni

¹ Tarikaka-ġore, ġomi tu moġoni asi ġoriba-maoroni? Ġomi tu taravatu ma ribami tarimami au na avaġa-guruġamini. Ribami, tarima roġo maġuri etanuni nai, ġia tu taravatu ġena seġuka gaburenai etanuni, a emaseni nai, taravatu tu asi ġena seġuka ġia ġenai.

² Vaġa-ilailana, veġaraġo vavinena, bema ġaraġona roġo maġuri etanuni nai, ġia tu veġaraġo taravatuna gaburenai roġo betanuni. A ġaraġona bemaseni murinai, mo veġaraġo taravatuna moġa, seġukana gaburenai asi ma betanuni, befakani.

³ Bema ġia ġaraġona roġo maġuri nuġanai, ma bere veġaraġo-sirivaġi nai, ġia tu veġura-vanaġi vavinenai bitara kiraġia. Senaġi bema ġaraġona bere mase, ġia veġaraġo taravatuna ġena seġuka na tu bere raka-vaġi lorinai, asi bere veġura-vanaġi. Aba, tau fakana ta ma bere ġaraġoa maki, mo tu asi bere veġura-vanaġi.

⁴ Tarikakagu, ġomi maki moġesina, Keriso tauġanina emaseto, monai tu ġomi maki taravatu ġenai ġomaseto, (mai tu, ġomi tu dia taravatu ġena seġuka gaburenai ġotanuni). Mo veiġa eġorato anina tu, ġomi Keriso ġena tarimarimai boġono iaġo ġana. Ġomi Keriso ġena tarimarimai ġoiaġoto korana tu, ġita mabarara ġwaġwara namori beġene vetore Barau ġenai ġana. Mai Keriso maiġa tu Barau na mase na ma evaġa-variġisi ġenoġoıato tarimana.

⁵ Ġita na tauġanira ġeri ura veiġari roġo takorana-iaġirito-ġoi neganai tu, taravatu na ura rakavari evaġa-bere rosirito-ġoi. Moġeri ura rakavari ġita

tauġanirai ġeġauveito-ġoi lorinai, ġita na mase beġe vaġa-ġorarini veiġari taveirito-ġoi.

⁶ Senaġi ġita toma taravatu ġenana eġabi-vaġirato, korana mo ebaru-barurato-ġoi dagarana ġenai varau tamaseto. Be ġita toma tu Iauka Veaġa ġena dabara variġunai Barau vetuġunaġina bita iaġo-vinini, a dia Buka Veaġa ġetorerito taravaturi koranaiaġi-gitariri dabaranai.

Taravatu ġenana tu kara namona bita ġabiani?

⁷ Ini tu kara ma bita toni? Taravatu tu rakava dagarana bita toni ba? Asiġina ġinavaġi! Moġoni, au vei-rakava tu asi bara ribaia, senaġi taravatu ġenana, naima aribaiato. Ilailana, au asi bara riba, tarima tari ġeri farefare mata-ġaniġaniri tu rakava veiġana, bere taravatu iniġesi asi bere kira, “Tarima tari ġeri farefare mata-ġaniġaniri asi bono vei.”

⁸ Senaġi vei-rakava na Barau ġena mo taravatu guruġana ġenai dabara ta eġita-doġariato, benamo mo dabara na eġauveito, benamo au nuġagu ai tarima tari ġeri farefare mata-ġaniġaniri tuġamaġiri e veiġari irauirauri ema vaġa-berebere rosirito. Korana bema taravatu asiġina nai, vei-rakava tu mase au ġegu ai, be asi ġena seġuka ta, (korana ġena seġuka nuġagu ai eġauveini moġa asi ribagu bene).

⁹ Taravatu roġosi roġo bara ribaia neganai, au tu maġuri atanuto-ġoi. Senaġi taravatu eiaġomato neganai, vei-rakava au ġegu ai eguru-variġisito, emaġurito.

¹⁰ Benamo au tu amaseto, korana vei-rakava ġegu ai maġuri bene. Monana au ama ribato, maġuri bere ġabi-iaġomaia taravatuna na tu mase moġo eġwa-iaġomaiato.

¹¹ Korana vei-rakava na taravatu guruġana ġenai dabara ta eġita-doġariato, benamo mo dabara na eġauveito, benamo au eġofa-darereguto. Be vei-rakava na au tu taravatu ġenana evaġi-maseguto.

¹² Moġa lorinai taravatu tu veaġa, taravatu guruġari maki veaġa, maoro ema namo.

¹³ Be, au tu mo dagara namona na ema vaġi-maseguto? Asiġina! Au tu vei-rakava na evaġi-maseguto. Mo dagara namona eiaġomato anina tu, vei-rakava vetoġana korikori nema vaġa-bererosia, be bitana riba, vei-rakava tu rakava kwaikwai. Senaġi vei-rakava tu mo dagara namona ġenana eġauveito, benamo au evaġa-maseguto. Be Barau ġena taravatu guruġana evaġa-foforiani, vei-rakava tu dagara rakava kwaikwaina.

Rakava na ġera maġuri eguine-iaġirini

¹⁴ Ġita ribara, taravatu tu Barau Iaukana ġenana eiaġomato dagarana, a au tu tarimarima moġo, tauġani ai atanuni. Ma au tu vei-rakava na evoiguto, benamo ġena tuġu-rakaorakao tarimagu ai evaġa-iaġoguto.

¹⁵ Au na kara aveiani tu asi maki atuġamaġi-fakaiani. Korana mo veiġa, aurani bana veiri veġata atoni veiġari, tu asi aveirini, senaġi asi aura-vinirini veiġari tu aveirini.

¹⁶ Bema asi aura-vinirini veiġari aveirini nai, taravatu tu ama vaġa-moġoniani, ġia tu moġoni namo.

¹⁷ Mo veiġa nuġanai, mo tu dia au tauġegu nuġagu sigai mo vei-rakava aveiani. Asiġina! Mo tu mo vei-rakava au ġegu ai etanuni monana eveiani.

¹⁸ Au ma ribagu, au ġegu ai mai tauġanina ma ġena veiġa e ura rakavari nuġanai namo ta asiġina-ġinavaġi etanuni. Moġoni, aura-baregoni namo veiġari bana veiri atoni, senaġi ġauvei-iaġiri ġegu ai tu asi ilaila.

¹⁹ Ğegu ura tu veĩga namori bana veiri veĩgata atoni, senaĩi asi akokoreni, veĩga rakavari moĩo aveirini. Moĩoni, asi veĩgata aurani veĩga rakavari bana veiri, senaĩina roĩo aveirini.

²⁰ Moĩa lorinai, bema au na kara aveiani tu asi veĩgata aurani bana veia atoni veĩgana aveiani nai, mo tu dia au tauĩgegu nuĩagu sigai aveiani. Asĩĩina! Mo tu vei-rakava au nuĩagu ai etanuni, monana eveiani.

²¹ Be au ġegu maĩuri ai dagara ta noĩa moĩo taravatu ta kavana na eguine-iaĩĩiguni, maĩĩesi eĩauveini ama ġoitaĩoani: Au namo veĩĩari navei atoni nai, rakava tu moĩa nuĩagu ai eĩauveini.

²² Au iaukagu ai Barau ġena taravatu tu aiaku-iaĩĩiani.

²³ Senaĩi au na taravatu o seĩuka ta maia ama ġitaiani au tauĩanigu legari tari nuĩari ai ġeĩauveini, au ġegu tuĩamaĩi na evaĩa-moĩoniani taravatuna ġevetari-viniani. Mai taravatu ta tu vei-rakava ġena taravatu o seĩuka, ġia au tauĩanigu legari ai eĩauveini, ma au eĩabĩguni, benamo vei-rakava ġena dibura tarimanai evaĩa-iaĩĩoguni.

²⁴ Au tu moĩoni rakava kwaikwai tarimagu! Deikara na au bevaĩa-maĩurĩguni mai mase tauĩanina nuĩana na?

²⁵ Barau sitanikiua, korana ġita ġera Vereĩauka Iesu Keriso ġenana evaĩa-maĩurĩguto.

Moĩa lorinai au tauĩgegu ġegu tuĩamaĩi na tu Barau ġena taravatu vetuĩunaĩina aveini, senaĩi tauĩanigu na tu vei-rakava ġena taravatu o seĩuka vetuĩunaĩina aiaĩo-vinini.

8

Barau Iaukana nuĩanai bitana maĩuri

¹ Tauna moĩa, initiba Keriso Iesu ġena maĩuri nuĩanai ġetanuni tarimari tu, Barau na vei-rakava tarimari asi bekiĩaĩĩirini ema asi bekota-vinirini.

² Korana au tu Keriso Iesu ġena maĩuri nuĩanai maĩuri Iaukana ġena taravatu seĩukana na vei-rakava ema mase ġeri taravatu seĩukari na varau eruĩa-vaĩĩiguto.

³ Taravatu tu tauĩani, ma ġena ura rakavari tauĩanina, na varau evaĩa-moĩraiato, be asi ġena seĩukai eiaĩoto, asi ilaila bevaĩa-kavarani. Moĩa lorinai taravatu na asi ilaila beveiani ġauveina tu Barau na eveiato. Mo tu Barau tauĩena na Natuna korikori vei-rakava tarimari ilailari ai etuĩu-iaĩĩomaiato, rakava benema vaĩa-darerea ġana. Benamo Keriso ġenana Barau na vei-rakava ġena seĩuka tauĩani ġenai ekiĩaĩĩi-foĩoĩaiato, kerere ma evaĩi-maseato.

⁴ Barau na mo veĩga eveiato anina tu, taravatu na vei-iobukaiobuka veĩgana, eura-viniani veĩgana, ġita ġerai beĩene fofori-ĩinikau ġana. Korana toma tu tauĩani ġena urai asi tarakani, ne Iauka Veaĩa ġena urai tarakani.

⁵ Tauĩani ġena ura lorinai ġetanuni tarimari tu, tauĩani na eura-vinirini dagarari moĩo ġetuĩamaĩi-taĩorini; a Iauka Veaĩa ġena ura lorini ai ġetanuni tarimari tu, Iauka Veaĩa na eura-vinirini dagarari moĩo ġetuĩamaĩi-taĩorini.

⁶ Tarima ta tauĩani ġena ura na eĩori-kauani tarimana ġena tuĩamaĩi tu mase evaĩa-ĩoraiani; a Iauka Veaĩa ġena ura na eĩori-kauani tarimana ġenai maĩuri e maino etanuni.

⁷ Tauĩani dagarari etuĩamaĩĩirini tarimana ġena tuĩamaĩi na tu Barau evetari-viniani. Korana ġia ġena mo tuĩamaĩi na tu Barau ġena taravatu asi eĩorana-iaĩĩiani, ema asĩĩina-ĩinavaĩi maki bea korana-iaĩĩiani riba.

⁸ Moġesina naima tauġani ġena urai ġerakani tarimari na, Barau tu asiġina-ġinavaġi beġe vaġa-iakuani.

⁹ Senaġi ġomi tu dia tauġanimi ġeri ura na ġeġori-kaumini tarimami. Ġomi tu Iauka Veaġa na ġemi maġuri eġori-kaurini, korana Barau Iaukana tu ġomi nuġami ai etanuni. Boġono riba, deikara ġenai Keriso Iaukana asi etanuni, ġia tu dia Keriso ġena tarima.

¹⁰ Bema Keriso ġomi tata nuġami ai etanuni nai tu, enabe tauġanimi beġe maseni vei-rakava dainai, senaġina iaukami tu maġuri ġetanuni, korana vei-iobukaiobuka tarimami ai varau ġoiaġoto bene.

¹¹ Iesu tu Barau Iaukana na mase na ma evaġa-variġisi ġenoġoiato. Ma bema Barau Iaukana ġomi nuġami ai etanuni nai, mani Iauka ġenana Barau na mani ma berakavani tauġanina, ġomi ġemi ai maniġa, maki maġuri beviniani.

¹² Moġa lorinai, tarikaka-ġore, ġita ġera ġauvei toma tu dia tauġani rekenai bitana tanu, ma tauġani ġena rakava veiġari ma bitana vei-tanu.

¹³ Korana bema tauġani ġena vei-rakava maġurinai boġo tanuni nai, boġo maseni; senaġi Iauka Veaġa ġena ura dabaranai boġo tanuni nai, tauġani ġena veiġa rakavari boġo vaġi-maserini, benamo ġomi tu boġo maġurini.

¹⁴ Barau Iaukana na eġori-kaurini tarimari tu Barau natuna.

¹⁵ Korana ġomi na Iauka Veaġa ġoġabiato, maninana tu dia tuġu-rakaorakao tarimami ai ma bevaġa-iaġomini, be ma boġo garini maia. Asiġina. Mani tu venatu-vanaġi Iaukana ġoġabiato. Ġita tu ġia ġenana tataġi-ġaba-raġeni, takirani, “Tama, Tamagai o,” tatonni.

¹⁶ Iauka Veaġa tauġena ġita iaukara ġesi ġeguruġa-vegogoni, ġekirani, ġita tu Barau natuna.

¹⁷ Bema ġita Barau natuna nai, ġita maki ma bakura, be Barau na ekiraġi-torerito dagarari bita ġaunarini. Mai tu Keriso na varau eġaunarito dagarari Keriso ġesi bita ġauna-sebonarini. Mo tu dabara sebonai moġo: Keriso emidigu-midiguto moġesi bita midigu-midiguni nai, ġia na marevana baregona eġabiato moġa, ġita na maki bita ġabiani.

Barau marevana baregona ġoirai bita ġabiani

¹⁸ Ġoirai Barau marevana baregona ġita ġerai bea foforini, monana, au atuġamaġini, initoma mai tamidigumidiguni maiġeri tu bea vanaġirini.

¹⁹ Barau ġimana veiveiri dagarari mabarari ġevenari-taġoni ma vetuġa-maġikauri ġesi, Barau na ġia natuna bevaġa-foforirini ema ġena mareva ma mamana baregona bevinirini ġarona ġetanu-vaġa-nogaiani.

²⁰ Korana tu Barau ġimana veiveiri dagarari mabarari tu benamo asi ġeri namo tai ġeiaġoto. Mai tu dia ġia tauġeri ġeurato asi ġeri namo ai beġene iaġo ġetato nai. Asiġina. Mai tu Barau tauġena ġena urai moġesina eveirito. Senaġina ġoirai dagara namona ġeri ai bevaġa-ġoraiani, moġa ma ġenari-taġoani.

²¹ Korana Barau na eveirito dagarari mabarari mase ema boraġa ġena dibura nuġanai ġetanuni roġo. Senaġi ġaro ta maiġeri dagara mabarari Barau na mo mase ema boraġa ġena dibura na bea ġabi-veġitarini, benamo Barau natuna ġeri gabu fakanai, ma mareva baregona gabunai, ma betorerini.

²² Ġita ma ribara, Barau ġimana veiveiri dagarari mabarari tu, vavine ġeġabi ġana nuġari ġemidiguni kavana, ġia midigu ġeġanini. Mabarari ġeloduni, ġeġabani, beiaġoma mo toma.

²³ Senaġi mai tu dia ġia moġo ġeloduni, ġeġabani. Asiġi. Ġita Iauka Veaġa ġwaġwana guinena taġabiato maiġera maki nuġarai taloduni, taġabani,

Barau na bene natu-vanaġira ġarona tanari-taġoani nuġanai. Mo tu ġita tauġanira bevaġa-maġuririni negana tanari-taġoani.

²⁴ Ġita tu mai tuġamaġikau bakunai Barau na ġita evaġa-maġurirato. Senaġi tatuġamaġi-kauani dagarana taġita-ġoitaġoani nai, asi ma bita tuġamaġi-kauani. Moġa lorinai kamara deikara na varau eġoitaġoato dagarana roġo etuġamaġi-kauani, ei?

²⁵ A bema roġosi roġo bitara ġabia dagarana tatuġamaġi-kauani nai tu, ma vevaġa-gwaġiġira ġesi bita nari vaġa-noga taġoani.

²⁶ Moġa nuġanai, Iauka Veaġa na maki ġita ġera moira gaburi ai evaġa-kavarani. Ma ġita asi ribara kara bita ġauġau-iaġirini, senaġi Iauka Veaġa tauġena ġita iatarai eġauġauni. Ġia eġuriġurini nai tu, etaġi-ġabaraġeni. Mo etaġi-ġabaraġeni guruġari tu tarimarima na asi ilaila beġe kiraġirini guruġari.

²⁷ Barau ma ribana ginikau ġita nuġara iaġasiri ai kara ġetanuni, ma Iauka Veaġa ġena tuġamaġi maki ġia tu ma ribana. Korana Iauka Veaġa tu Barau ġena ura loriri ai ġena doġoro tarimari veaġari iatari ai eġuriġurini.

²⁸ Ġita ribara, deikara Barau ġeura-viniani tarimari na ġeri ai karakara ġeġorani dagarari mabarari ġerina namo beġe ġoitaġorini. Korana moġeri tarima tu ġia na ġena ura lorinai ekearito, maġuri beġene ġabia ġana.

²⁹ Barau na deideiri eriba-guinerito ġia ġeura-viniani tarimari tu ġia na eviriġirito, ġia Natuna ilailanai bene vaġa-iaġori ġana. Korana mo dabarai ġia Natuna tu maġuri guine meronai beiaġoni tarikaka ġutuma vefakari ai.

³⁰ Mo eġabi-hidirito tarimari tu ġia na ekearito tarimari; ma mo ekearito tarimari tu ġia na vei-iobukaiobuka tarimari ai ekiraġirito; ma mai vei-maoromaoro tarimari ai ekiraġirito tarimari tu, ġia marevana baregona evinirito.

Barau ġena veuravini tu barego vedaurea

³¹ Be Barau na maġeri veġa eveirito iatari ai ġita tu kara bita kiraġiani? Bema Barau ġita ġesi, ġita evaġa-kavarani nai, dei na ġita beiaġoma-vinirani? Ta asiġina, korana

³² Natuna korikori maki gwaina asi eġabiato, senaġi etao-fitoġaiato ġita bitana maġuri ġana. Ma kamara dabarai tu Iesu Keriso ġesi dagara mabarari asi bevarevare-vini sebonarani?

³³ Be, Barau na eviriġirito tarimari tu deikara na bevaġa-daġarini Barau ġoiranai? Ta asiġina, korana Barau tauġena na maorori ekiraġirini!

³⁴ Ma deikara na rakava voina metona bevinirini, ei? Ta asiġina, korana Keriso Iesu tu emaseto, benamo Barau na ma evaġa-maġuri ġenoġoiato. Ġia toma tu Barau ġimana aroribanai etanu-taġoni, ma ġita iatarai eġuriġurini.

³⁵ Ġita tu deikara na Keriso ġena veuravini nuġana na beġabi-ġerevaġirani? Meto ġerai ġeraġasini moġerina ba? Maġuri gwaġiġiri ġerai ġeraġasini moġerina ba? Ġevaġa-midigu midigurani e ġelai-rovo-rovorani moġerina ba? Vito nanu mase taġoitaġorini moġerina ba? Asi kefiru dabuġari tatanuni moġerina ba? Vevaġa-gari dagarari taġoirarini moġerina ba? Vetari baġari na beġe vaġirani monana, ei? Asiġina veġata!

³⁶ Buka Veaġai ekirani kavana,
 “Ġai tu ġoi daimu ai vanaġivanagi ġevaġi-masema veġata ġetoni.
 Ġai tu beġene vaġi-maseri ġetoni mamoei kavana ġeveimani.”

³⁷ Senaġi euravini-baregorani Kerisona ġenana maġeri meto mabarari nuġari ai takokoreni veġata, be tavaġa-darererini.

³⁸ Korana au ama riba-maoroni, ġita tu dagara ta na asi ilaila veġata Barau ġena veuravini ġenana beġabi-ġerevaġirani: Mase o maġuri, aneru o iauka

rakavari, initoma taġitarini dagarari na o ġoirai vau mani beġe ġorani dagarari na, o seġuka kotari,

³⁹ guba tuġunai dagara ta o tanobara gaburenai mase gabuna dagarana ta, o Barau ġimana veiveiri dagarana ta na asiġina-ġinavaġi Barau ġena veuravini na beġabi-veġitarani, mo veuravini tu Barau na ġita evinirato, korana ġita tu ġera Vereġauka Keriso Iesu nuġanai tatanuni.

9

Isaraela, Barau na eġabi-hidiato besena

¹ Au tu Keriso ġena maġuri nuġanai atanuni, naima asi aġofaġofani, guruġa moġoniri akiraġirini, Iauka Veaġa na au nuġagu ai evaġa-fofori ginikauani, ma au nuġagu iaġasina na evaġa-moġoniani.

² Au tu nuġagu taġitaġi asikei, ma ġegu nuġa-vekwaraġi Isaraela tarimari iatari ai maki asi ekorini.

³ Gegu ura baregona tu maiġa moġo: Bere namo, au tarikakagu ema ġegu doġoro korikoriri maġuri beġene ġabia uranai tu, Barau na au moġo iatagu ai rakava meto lelevaġina bere tore-kaua, ema Keriso ġenana bere torefitoġagu, be rekwarekwa tarimagu ai bara iaġo, a ġia tu au gabugu ai maġuri beġere ġabia.

⁴ Mai tu Isaraela tarimari akiraġirini. Ġia tu Barau na enatu-vanaġirito e Barau na marevana e mamana baregona evaġa-fofori vinirito; ema ġena kiraġitore guruġari baregori evinirito, taravatu maki evinirito; e Barau beġene toma-rakariġoa maġuriri ekira-vararito, ema guruġa-tore tu ġia ġeri ai eveirito.

⁵ Aberahamo, Isako, Iakobo tu ġia seseri doġori, ema tauġani rekenai bita ġitaiani nai, Keriso tu ġia ġeri bese tauna. Keriso tu Barau, ma dagara mabarari debari tu ġia. Ġia tu vanaġivanaġi bitana vaġa-raġea. Amen.

⁶ Au asi akirani, Barau ġena guruġa (Isaraela tarimari ġeri ai) tu benamo asi tauri ai beġe iaġo atoni. Asiġina. Au akirani tu, (Barau ġena guruġa tu Isaraela besena mabarana ġeri senaġi) dia Isaraela besena mabarana tu Isaraela tarimari korikori.

⁷ Ema maiġesi maki asi bakirani: Ġia tu Aberahamo besena, be ġia mabarari Aberahamo natuna batoni. Asiġina. Korana Barau ekirato tu, “Goi besemu tu Isako ġenana moġo vau beġea maġurini.”

⁸ Moġa anina tu: Tauġani rekenai ġemaġurini tarimari tu dia Barau natuna. Asiġina. Ġia tu Barau ġena kiraġitore maġuriri korikoriri ai ġemaġurini tarimari moġo tu Aberahamo besena.

⁹ Korana Barau ġena kiraġitore guruġana tu iniġesi ekirani, “Au na baġabi-torea ġaronai ma baġenoġoi-iaġomani, benamo Sara na natumi merona ta beġabiani.”

¹⁰ Dia moġa moġo, senaġi boġono ġitaia, Rebeka natuna kafa ruarua maki tamari tu sebna moġo, mo tu ġita tamara Isako.

¹¹⁻¹² Senaġi kafa roġosi beġere maġuri e veġa namona ta o rakavana ta maki roġosi beġere vei-karaia nuġanai, Barau na Rebeka ekiraiato, ekirato, “Tau-guina na tau-muriseina ġena vetuġunaġi beiġo-vinini.” Tovotovonai veġata Barau moġesina eguruġato, korana ġia ġena boioġa ilailanai eġabi-hidiato merona tu gabunai betanuni veġata. Tarima Barau na tu dia ġeri ġauvei e veġa namori bakuri ai ekearini, senaġi Barau tauġena ġena ribai moġo ekearini.

¹³ Buka Veaġai etoreato kavana, ekirani, “Iakobo tu au na aura-viniani, senaġi Esau tu aiau-rakavaiani.”

¹⁴ Be kara bita toni? Sikira, Barau tu dia vei-iobukaiobuka Barauna sisi? Asiġina ġinavaġi veġata.

¹⁵ Korana Barau na Mose tu ekiraiato, ekirato, “Au na deikara bavetuġa-ġwaiiani tarimana, ġia tu bavetuġa-ġwaiiani, ema au na matari vetuġari baġwani tarimari tu, bavaġa-kavarini korana bavetuġa-ġwari kekei.”

¹⁶ Moġa lorinai, dagara baregona tu dia tarimarima ġeri ura o vekwaraġi, senaġi Barau ġena vevetuġaġwa.

¹⁷ Korana Buka Veaġai ekirani, Barau na Pharao, Aigupito ġeri vere, tu maiġesina ekiraiato, ekirato, “Au na ġoi kini ai atoremuto korana tu maiġa, ġoi ġemu kira-sirivaġi ai au ġegu seġuka bana vaġa-rakariosia, be au aragu tanobara mabaranaġi beġene kiraġi-foforia.”

¹⁸ Moġesina naima bema Barau eurani tarima ta nevetuġa-ġwaia etoni nai tu, evetuġa-ġwaiiani, ma eurani ta nuġana nevaġa-gwaġiġi foroforoa etoni nai, nuġana evaġa-gwaġiġi foroforoani, benamo Barau ekira-sirivaġi viniani.

¹⁹ Ma ta na au bokiraguni, bokirani, “O kara dainai ġita Barau na tu roġo evaġa-daġarani, ekirarani, ġita tu vei-rakava tarimara veġata etoni, ei? Be deikara tu ma kokorena Barau na neveia veġata betoni veiġana ġia na bekira-ġoiani, ei?”

²⁰ Ġoi tauġemu novetuġamaġi, ġoi tu deikara, be Barau garona ġoi na oġareani? Be, ġimana na ġeveiato dagarana ta na eveiato tarimana bekiraiani, ‘Ġoi tu kara dainai au maiġesina oveiguto,’ betoni ba?”

²¹ Ribara, ġuro eveini tarimana tu ma ġena maoro veġata, mo tano tavi baregona sebona eġabiani, monana ġuro ruarua beveirini. Ġuro ta tu namo vedaurea beveiani, mo tu vereko baregona ġana, ma ġuro ta tu beveikavaiani moġo, vanaġivanaġi daridari ġana. Mai ġuro vei tarimana maiġa tu moġoni ma ġena maoro ba asiġina mo veiġa beveiani nai tu, ei?”

²² Barau maki moġoni moġesina eveito. Ġia eurato, ġia ġena baru baregona nevaġa-foforia, ema ġena seġuka nevaġa-bererosia, be tarimarima na beġene ribaia etato. Senaġi ebaruvini-rakava rakavarito ma bene vaġi-ġosiġosiri etato tarimari ġeri ai, nuġana eġabi-tariato e evevaġa-gwaġiġito.

²³ Barau na mo veiġa eveiato korana tu ġia eurato, ġia marevana barego lelevaġina moġa beġene ribaia etato. Ġita tu ġia na evetuġa-ġwarato, ema ġita tu Barau na tovotovonai veġata erovina-torerato, ġia marevana baregona bitana ġabia ġana.

²⁴ Ġita tu ġia na ekearato tarimara. Barau na tu dia Iuda tarimama moġo ekeamato, asiġina, irau bese tarimami maki ekeamito.

²⁵ Hosea nuġanaġi eguruġato kavana, ekirato,
 “Ġia tu dia au ġegu tarimarima,
 senaġi ‘au ġegu tarimarimai’ bakiraġirini,
 ema asi aura-vinirini doġorona bakiraġirini, bakirani, ‘ġegu uravini
 doġorona’ batoni,

²⁶ ema,
 ‘Ġomi tu dia au ġegu tarimarima’ atato gabunai,
 mo gabu sebonai ġia bakiraġirini, ‘Maġuri Barauna natuna doġorori.’ ”

²⁷ Isaia na Isaraela tarimari ekiraġirini nai tu ekirato, “Mo tu moġoni, Isaraela tarimari asisebo kone-mirina noġa moġo, senaġi tarima viravira moġo beġe maġurini.

²⁸ Korana tu Vereġauka na tanobara tarimari ġeri rakava voiri tu beragavini-vaġirini, asi bekwaiboni.”

29 Mai tu Isaia tovtovonai eguruḡato kavana, “Bere seḡuka rakava-rakava Vereḡaukana na ḡita besera tari asi bere goru-tariri nai, ḡita tu Sodoma e Gomora kavari bitara vei.”

Isaraela tarimari asi ḡeri veḡabidadama

30 Be ḡita tu kara ma bita toni? Iniḡesina sikira: Irau bese tarimari tu vei-iobukaiobuka tarimari ai beḡene iaḡo vekwaraḡina tu asi ḡeveito (Isaraela tarimari kavana), senaḡi ḡeri veḡabidadama Iesu Keriso ḡenai ḡetoreani ḡenana, vei-iobukaiobuka tarimari ai ḡeiaḡoto.

31 A Isaraela tarimari na tu taravatu ḡekorana-iaḡi ginikauato Barau na vei-iobukaiobuka tarimari bene kiraḡiri ḡana nuḡanai tu, vei-iobukaiobuka tarimari ai asi ḡeiaḡoto.

32 Kara dainai? Korana ḡia tu dia veḡabidadama ḡenana vei-iobukaiobuka tarimari ai beḡe iaḡoni ḡetato. Asiḡina. Ḡia ḡekirato tu, ḡeri ḡauvei e veiḡa ḡerina vauro vei-iobukaiobuka tarimari ai beḡe iaḡoni ḡetato. Moḡa lorinai Keriso tu ḡia ḡeri vedaḡaraḡe forenai eiaḡoto, benamo ḡeketo-tarito.

33 Buka Veaḡai etoreato ekirani kavana,

“Ḡoḡitaia, au na Sionai

(o Ierusalem) fore ta atoreato,

tarima bene vaḡa-vedaḡa-raḡeri ḡana,

ema mo fore barana atoreato,

bene vei-ketori uranai.

Senaḡi ḡia bevaḡa-moḡoniani tarimana tu, asiḡina-ḡinavaḡi moḡo bemaia-
iani.”

10

1 Tarikakagu mabarami, au nuḡagu ḡena ura baregona korikori, ma ḡegu noḡinoḡi Barau ḡenai aveiani tu, Isaraela tarimari Barau na bene vaḡa-maḡuriri.

2 Korana au na maki ḡia avaḡa-moḡonirini, ḡia na Barau ḡena ura veiḡari beḡene korana-iaḡi ginikauri veḡata, senaḡi dagara sebona tu, Barau uravinina maḡurina korikori ḡia tu asi ribari.

3 Korana Barau ḡenana vei-iobukaiobuka eiaḡomani, moḡa ḡia tu asi ribari, be ḡia tauḡeri na ḡeri vei-iobukaiobuka veiḡari boruri ma ḡevaḡa-ruḡarini. Moḡesina naima Barau na tarimarima etore-roroḡotorini lairi korikori ḡia na tu asi ḡeḡabi-raḡerini.

4 Taravatu tu eiaḡomato mo Keriso ḡenai ema magoto. Toma tu Keriso beḡe vaḡa-moḡoniani tarimari mabarari tu vei-iobukaiobuka tarimari ai beḡe iaḡoni.

5 Mose na taravatu korana-iaḡina ḡenana vau Barau ḡoiranai vei-iobukaiobuka tarimari ai beḡe iaḡoni lairi ekirarito nai, maiḡesina ekirato, “Mai taravatu maiḡeri beḡe korana-iaḡirini tarimari tu mai taravatu ḡenana maḡuri beḡe ḡabiani.”

6 Senaḡi veḡabidadama ḡenana vei-iobukaiobuka taḡoitaḡoani guruḡana Buka Veaḡai tu maiḡesina ekirani, “Nuḡamu ai asi bono kira, ‘Guba ḡana deikara bevaraḡeni?’ ” Be Keriso guba na bene ḡori-mariḡoa ḡana.

7 “Ema asi bono kira maki, ‘Deikara tano gaburena ḡana bevariḡoni?’ ” Be Keriso mase na bene ḡori-maraḡea ḡana.

8 A mai guruḡa korana korikori tu maiḡesi ekirani, “Guruḡa tu ḡoi sevisevimu ai maniḡa; ḡoi murumu ai ma ḡoi lorumu ḡutunai etanuni.” Ḡai na veḡabi-dadama guruḡana ḡomi ḡemi ai tu maiḡa ḡakiraḡiani.

⁹ Mo tu bema murumu na boguruḡa-foforini, bokirani, “Iesu tu Vereḡauka,” botoni, ma lorumu ḡutuna bovaḡa-moḡoniani, ḡia tu Barau na mase na ma evaḡa-variḡisi ḡenoḡoiato nai, Barau na bevaḡa-maḡurimuni.

¹⁰ Korana loruna ḡutuna na evaḡa-moḡoniani tarimana tu, Barau ḡoiranai vei-iobukaiobuka tarimanai eiaḡoni; ema muruna na eguruḡa-iaḡi foforini tu, maḡuri edoḡariani.

¹¹ Korana Buka Veaḡai maiḡesina ekirani, “Ḡia evaḡa-moḡoniani tarimana tu asi bemaikaiani.”

¹² Anina tu, Iuda tarimari e irau bese tarimari fakari ai vetoḡa boruna ta asi betanuni, korana tu ḡita mabarara ḡera Vereḡauka tu sebona kwariḡutu, Barau ḡereḡana moḡo, ma ḡia ḡenai ḡekea-raḡeni tarimarimari mabarari tu ḡena vevaḡa-namo barego vedaureana evinirini.

¹³ Korana, “Barau arana beḡe vatoani tarimari mabarari tu Barau na bevaḡa-maḡuririni.”

¹⁴ Senaḡina, kamara dabarai Barau asi ḡevaḡa-moḡoniani tarimari ḡia ḡenai beḡe kea-raḡeni? Ema kamara lai ai Barau varina asi ḡeseḡaḡiatio tauri na ḡia beḡe vaḡa-moḡoniani? Ema kamara dabarai ḡia varina beḡe seḡaḡiani, bema ta na asi beḡobata-vinirini nai?

¹⁵ E deikara na beḡobata-vinirini, bema Barau na ta asi betuḡuani nai? Buka Veaḡai ekirani kavana, “Vari Namona eḡwa-iaḡomaiani tarimana kwakuna tu namo vedaureana veḡata, (korana namo baregona evaḡa-foforiani).”

¹⁶ Senaḡi dia tarimarima mabarari na Vari Namona ḡeḡabi-raḡeani, nai Isaia maiḡesi ekirani, “Vereḡauka, deikara na ḡaina guruḡa evaḡa-moḡoniani?”

¹⁷ Ḡita ribara, veḡabidadama tu Vari Namona ḡeḡobata-iaḡiani taseḡaḡiani, monana eiaḡomani; ema taseḡaḡiani varina tu Keriso ḡena guruḡa.

¹⁸ Senaḡi Isaraela tarimari tu kamasi? Barau ḡena guruḡa moḡoni ḡia na asi ḡeseḡaḡiatio? Asiḡina, ḡeseḡaḡiatio. Korana Buka Veaḡai ekirani, “Tarima kotari na tanobara mabaranai ḡea vari-fiuato, ema ḡeri guruḡa maki tanobara dokona-dokona ḡea ḡoitaḡoato.”

¹⁹ Avedanaḡini: Isaraela tarimari na mo guruḡa tauna asi ḡedoḡariatio? Asiḡina, ḡia ma ribari. Korana Mose varau maiḡesi ekirato, “Au na ḡomi tu asi arana besena ta ḡerina ḡomi bavaḡa-maiakamini.

Ema au na ḡomi tu asi ḡetuḡamaḡi-fakani besena ḡenana bavaḡa-barumini.”

²⁰ Ema Isaia maki asi eguruḡa-garito, ekirato,

“Au tu asi ḡevetauguto tarimari na ḡeḡoitaḡoguto, ema asi ḡevedanaḡi-vetauguto tarimari ḡeri ai avevaḡa-foforito.”

²¹ Senaḡi Isaraela tarimari tu ekirarito, ekirato,

“Boḡiboḡi na eiaḡoni mo ea lavini, au ḡimagu tu seḡafore ema kira-sirivaḡi tarimari ḡeri ai atuḡu-rosiani.”

11

Isaraela besena lakouna Barau na evetuḡarito

¹ Moḡa lorinai ma avedanaḡini: Barau na ḡena Isaraela tarimari tu eruḡa-doḡe-muriḡirito ba? Asiḡina ḡinavaḡi! Au maki Isaraela tarimagu, Aberahamo besena, Beniamina ḡena doḡoro taugu.

² Barau na ḡena tarimarima, tovotovona na veḡata eḡabi-hidirito tarimari, kamasi beruḡa-doḡe-muriḡirini? Ḡomi Buka Veaḡai Elia varina ḡetoreato tu moḡoni veḡata asi ribami? Ḡia Isaraela tarimari na beḡe vaḡi-maseani ḡetato nai, Barau ḡenai eḡauḡauto, maiḡesi ekirato:

³ Veregauka, gemu peroveta tarimari tu bege vaġi-ġosiri, ma ġoi ġevarevare-vinimuni dagarari ġetore-kaurini e ġegaburini fata veaġari maki bege rovoru. Mai tu au moġo ġereġagu roġo maiġegu nuġanai, au maki ġevaġi-masegu ġetoni.

⁴ Ma Barau na ġia tu kamasi evaġa-veſeato, ei? Barau ekirato, “Au ġegu tarimarima mabarari daġara imaima ruarua (7,000) atore-ġerevaġirito, roġo maġuri maniġeri. Ġia na ġofaġofa barauna Bal asi ġetoma-rakariġo viniato.”

⁵ Maitoma maki, Barau na ġena namo e varevare-barai Isaraela tarimari lakouna eġabi-viriġirito.

⁶ Bema ġena vevetuġaġwa e varevare-barai eveġabi-hidito nai, dia kara ta ġeveiato bakunai eġabi-viriġirito. Korana bema ġeri ġauvei ta dainai Barau na bere ġabi-hidiri nai, ġena ġabihidi veiġana tu dia ġena vevetuġaġwa e varevare-bara dainai, vevetuġaġwa maki asi anina.

⁷ Be kara bita kiragiiani? Isaraela tarimari na beġene ġabia ġana ġevetau-gwadagwadaiato dagarana tu ġia na asi ġeġabiato, senaġi Barau na eġabi-hidirito tarimari kotari na moġo ġeġabiato. A mabarari na tu Barau ġena keakea asi ġeseġaġi-viniato.

⁸ Buka Veaġai ekirani kavana,
 “Barau na ġia nuġari e ġeri tuġamaġi tu evei-veġonurito,
 be tovotovona na veġata mo inıtoma ġia tu asi ġeboġe-fakani,
 ema garo maki asi ġeseġaġini.”

⁹ Davida ġena guruġa maki maiġesi ekirani,
 “Bere namo ġari ġaniġani fatana maki ġeri konagi e ġeri ganai bene iaġo,
 e ġeri vekakenaġi dagaranai bene iaġo,
 ema ġeri vei-rakava voina ġabiġabina gabunai bene iaġo.

¹⁰ Bere namo matari bene vei-mukunari,
 be asi beġene boġeboġe, ma doġeri beġene ġeġeva,
 be beġene raka-dorudoru vanaġivanagi.”

Barau na boġa oliveri legari vamoka oliveri legari ġeri ai ekafa-kaurito

¹¹ Ma avedanagiini, Isaraela tarimari ġevakakenaġito nai tu, beġene keto-moġovaġi ġana ba? Asiġina, dia moġesina! Senaġi ġeri kira-sirivaġi dainai, vevaġa-maġuri tu irau bese tarimari ġeri ai evotuto, korana Isaraela tarimari beġene launaġiri, Barau ġena vevaġa-maġuri beġene vetaua ġana.

¹² Situġamaġia, Isaraela ġeri kira-sirivaġi na vevaġa-namo barego tano-barai ema raka-toġato, ema iauka maġuriri ai ġerabu-iaġirini gaburi ai irau bese tarimari ġeri ai namo-bara ema foforini, a Isaraela tarimari mabarari beġe ġenoġoini Barau ġenai nai tu, Barau ġena vevaġa-namo tu ma barego lelevaġina bebubu-riġoani.

¹³ Mai tu ġomi irau bese tarimami, avaġa-guruġamini, korana au tu ġomi irau bese tarimami ġemi apostolo taugu. Au ġegu iaku tu barego mai ġauvei aveiani nai.

¹⁴ Korana au aurani ġegu tarimarima korikori bana vaġa-vevuġamaġi daradarari, be kotari na maġuri beġene doġariri.

¹⁵ Korana Iuda tarimari Barau na eruġarito nai tu, tanobara boruri tarimari eġabi-kavirito, a Barau na Isaraela tarimari ma beġabi-raġerini tu, kamasi beġea vetoreni? Namu baregona beġorani! Mo tu mase na maġuri-ġenoġoi bevaġa-ġoraiiani kavana.

¹⁶ Bema ġebaki-guineani beredina Barau ġeviniani nai tu, mo beredi mabarana tu ġia ġena, ema bema ġau ġokana Barau ġeviniani nai, legana maki ġia ġena.

¹⁷ Isaraela tu noĝa moĝo olive ĝauna namona ta. Barau na mo olive legana tari etau-korurito, ma ĝomi, boĝa olivena legari, eĝabimito, mo etau-korurito moĝeri gaburi ai evaĝa-kafakafa-kaumito, benamo toma tu mo olive namona ĝokana na ĝaniĝani namori ĝevaraĝeni, moĝeri ĝoĝanirini.

¹⁸ Moĝa lorinai asi boĝono veiavi ĝia vekaravari ai. Bema boĝo veiavini nai, boĝono riba: Dia ĝomi na ĝau ĝokana ĝovaĝa-kavaiani, asiĝina, ĝau ĝokana na ĝomi evaĝa-kavamini.

¹⁹ Betaĝu boĝo kirani, “Olive legari tu etau-korurito, au ĝia gaburi ai bene vaĝa-kafakaugu ĝana.”

²⁰ Oba, mani tu moĝoni. Senaĝi ĝia tu asi ĝeri veĝabidadama naima etau-korurito, ma ĝomi tu ĝemi veĝabidadama lorinai, ĝia gaburi ai ĝoruĝani. Moĝesina naima asi boĝono vetuĝamaĝi-varaĝe varaĝe, senaĝi boĝono gari moĝo.

²¹ Korana bema Barau na olive legana korikoriri maki gwairi asi eĝabirito senaĝi etau-korurito nai, ĝomi maki gwaimi asi beĝabirini.

²² Moĝeri na Barau ĝena veiau-namo veĝana namona ma ĝena veiau-rakava veĝana metona boĝono ĝitaia. Barau ĝabidadamanai ĝeketoni tarimari tu eiau-rakavarini, ma ĝeri ai veĝa metona eveirini. Senaĝi ĝomi tu eiau-namomini. Barau na roĝo beiau-namo-iaĝomini, bema ĝia ĝena veiau-namo nuĝanai moĝo boĝo tanu-iaĝoni nai. Asiĝina nai tu, ĝomi maki bebasi-ĝutumini.

²³ Iuda tarimari maki, bema Barau asi ĝevaĝa-moĝoniani veĝari beĝe iaĝuirini, benamo Barau beĝe vaĝa-moĝoniani nai tu, Barau na ma bekafakau-ĝenoĝoirini. Korana Barau na ma bekafakau-ĝenoĝoirini riba.

²⁴ Ĝomi tu boĝa olivena ĝauna legana, a dia varovaro olivena, senaĝi eĝabimito, ma vamoka olivena ĝaunai ekafa-kaumito. Bema ĝomi boĝa olivena legari moĝesina eveimito nai, vamoka olivena legana etau-koruato, moĝea maki etau-koruato olivena ĝaunai ma bekafa-kauani riba.

Isaraela tarimari mabarari Barau na bevaĝa-maĝuririni

²⁵ Tarikakagu mabarami, au aurani mai guruĝa vekuretoĝana maiĝa boĝono ribaia, korana tauĝemi boĝo vekiraĝi-varaĝe varaĝeni garina: Isaraela tarimari nuĝari tu moĝesi gwaĝiĝi moĝo asi beĝe tanu-iaĝoni. Asiĝina. Ĝia nuĝari e ĝeri tuĝamaĝi moĝesi beĝe tanu-iaĝoni, beiaĝoni mo, irau bese tarimari mabarari, (Barau na eĝabi-hidirito tarimari), beĝema bere-toĝani Barau ĝena maĝuri nuĝanai.

²⁶ Moĝa murinai vau Isaraela besena mabarari Barau na bevaĝa-maĝuririni. Buka Veaĝai etoreato ilailanai, ekirato, “Siona (o Ierusalema) na vevaĝa-maĝuri tauna beiaĝomani, ĝia na Iakobo besena ĝenana Barau asi ĝetoma-rakariĝoani maĝurina betore-veĝitaiani.

²⁷ Benamo au na ĝia ĝeri rakava baĝabi-veĝitaiani nai, au na ĝia ĝeri ai mai kiraĝitore gwaĝiĝina baveiani.”

²⁸ Iuda tarimari ĝutuma na Vari Namona ĝekira-fitoĝaiani nai, Barau ĝena vetari tarimari ai ĝeiaĝoto. Senaĝi moĝesi ĝeveito dainai, ĝemi maĝuri dabarana evekeoto. A ĝia tu Barau na eĝabi-hidirito besena lorinai, seneri (Aberahamo, Isako, Iakobo) bakuri ai Barau na eura-vinirini.

²⁹ Korana Barau ĝena varevare ema ĝena keakea tarimarima ĝeri ai tu beĝe tanu-vanaĝi vanaĝini, asi ma beĝe vekoki-fitoĝani dagarari.

³⁰ Vaḡa-ilailana ḡomi tovotovonai tu Barau ḡokira-sirivaḡi viniato-ḡoi, senaḡi toma tu Barau ḡena vevetuḡaḡwa boḡo ḡoitaḡoa. Ḡomi tu Isaraela tarimari ḡeri kira-sirivaḡi dainai, Barau ḡena vevetuḡaḡwa boḡo ḡabia.

³¹ Isaraela maki toma tu ḡekira-sirivaḡini, korana Barau na ḡomi evetuḡa-ḡwamini dainai, ḡia maki ma bene vetuḡa-ḡwari ḡana.

³² Korana Barau na tarimarima mabarari kira-sirivaḡi maḡurinai etoretogarito, korana ḡia ḡena vevetuḡaḡwa ḡia mabarari na beḡene ḡabia.

Barau bitana vaḡa-raḡea

³³ Barau ḡena iaunega ema riba tu barego, ma barego lelevaḡi veḡata! Ḡia ḡena vevaḡa-maoro dabarana maki vetau-kavana beḡorani! Ḡena dabara maki deikara na betuḡamaḡi-doḡariani?

³⁴ Buka Veaḡa ekirani kavana,
“Vereḡauka ḡena tuḡamaḡi tu dei na beribaiani?
O deikara na ḡia besisiba-viniani?

³⁵ Dei na Barau evini-farefareato, be Barau na ḡia ma bevini vaḡa-voiani?”

³⁶ Korana dagara mabarari korari tu ḡia, ema ḡia ḡenana ḡeḡorato e ḡefoforito, ema ḡia ḡena moḡo. Ḡia moḡo bitana vaḡa-raḡea mo vanaḡivanaḡi. Amen.

12

Tauḡanimu Barau ḡena

¹ Tarikakagu mabarami, Barau ḡena vevetuḡaḡwa tu barego aḡitaiani ḡita iatarai. Tauna moḡa au na ḡomi alaunaḡimini, akirani, tauḡanimi mabarari varevare dagarari maḡuriri e veaḡari ai boḡono vaḡa-iaḡori, ema Barau na beiaku-iaḡi-baregorini tauḡaniri Barau boḡono vini-raḡea, ginitaḡo varevareri kavana. Moḡesina boḡo veini tu, Barau boḡo toma-rakariḡo vini-korikoriani.

² Mai tanobara ḡena maḡuri ema veḡa irauirauri asi boḡono ḡabi-raḡeri ema asi boḡono veiri. A ḡomi tu ḡemi tuḡamaḡi boḡono vaḡa-variḡuri, be ḡemi maḡuri beḡene vekurevo. Monana vau Barau ḡena ura korikori boḡo riba-ginikaurini. Boḡo ribani maki, aiḡa tu namo vedaurea, Barau na eiaku-iaḡiani dagarana.

³ Barau na ḡena namo e varevare-bara lorinai ekeaguto, ḡena apostolo ḡauveina eviniguto nai, au na ḡomi mabarami avaḡa-guruḡamini: Tauḡemi asi boḡono vetuḡamaḡi, ḡomi ḡemi riba ema veḡa tu varaḡe lelevaḡi. Asiḡina. Namona tu boḡono vetuḡa-maḡi-ginikau, Barau na veḡabidadama aiḡa baregona evinimito, moḡa ilailanai moḡo boḡono tuḡamaḡi e guruḡa.

⁴ Vaḡa-ilailana ḡita tauḡanira tu sebona moḡo, a legana tu ḡutuma gorogoro, ma mai tauḡanira legari ḡeri ḡauvei tu dia sebona.

⁵ Ḡita ekalesia maki moḡesi, ḡita asisebo, senaḡi Keriso ḡena maḡuri nuḡanai ḡita tu tauḡani sebonai taiagoto. Ma ḡita tata tu karora tata ḡeri, (dia mabarara tata ḡera-ura ḡera-urai bita rakani).

⁶ Barau ḡena namo ema varevare-barai evinirato ilailanai, varevare dagarari irauirau ḡerai ḡetanuni. Bema ta peroveta varevarena o seḡukana eviniato nai, bene peroveta ḡena veḡabidadama ilailanai.

⁷ Bema ekalesia vetuḡunaḡi iaḡoviniri eviniato nai, bene vaḡa-kavari. Bema vevaḡa-riba varevarena eviniato nai, bene vevaḡa-riba.

⁸ Bema kotari ḡeri veḡabidadama vaḡa-kokoreri varevarena eviniato nai, bene vaḡa-kokoreri; bema rabu tarimari vaḡa-kavari varevarena eviniato nai, bene vini-ginikauri; bema tarimarima ḡorikauri varevarena eviniato

nai, ma nuġana mabarana ġesi bene veġorikau; bema tarimarima vetuġaġwari varevarena eviniato nai, bene vetuġaġwari e bene vaġa-kavari ma iakuna ġesi.

Veuravini

⁹ Nuġami mabarari ema ma moġoniri ġesi boġono veuravini. Rakava veiġari asi boġono ura-viniri, a veiġa namori boġono ġabi-gigitariri.

¹⁰ Vetarikaka veuravinina boġono korana-iaġi gwadaia, karomi tata ġesi boġono vegubakau, a dia tata tauġemi arami boġono tore-varaġe varaġeri.

¹¹ Boġono ġauvei-kokore kokore, asi beġene ġubulefimi; Iauka Veaġa na nuġami bene vaġa-variġisiri, Vereġauka vetuġunaġina boġono iaġo-vini.

¹² Ġotuġamaġi-kauani dagarana bakunai boġono iaku; meto ġoġoitaġorini nuġari ai boġono vevaġa-gwaġiġi; ġauġau asi boġono vaġa-moiriaia.

¹³ Barau ġena tarimarima ġeri rabu ma vetau-vetau gaburi ai boġono vaġa-kavari. Tarimarima boruri ġemi ai beġe iaġosini nai, boġono ġabi-raġeri, ema boġono nari-ginikaure.

¹⁴ Ġevaġa-rakavamini tarimari boġono vaġa-namori, iatari ai boġono ġauġau, asi boġono vaġa-rakavari, asi boġono tovoġari.

¹⁵ Ġeverereni tarimari ġesi boġono verere-vegogo, ma ġemidigu-midiguni tarimari ġesi maki boġono midigu-midigu sebona.

¹⁶ Karomi ġesi nuġa sebonai boġono tanu, asi boġono vekokoroku, ne ma nuġami mabarari ġesi gaburemi tarimari ġesi boġono vetore-sebona. Tauġemi asi boġono vetore-varaġe varaġe, asi boġono kira, ġomi moġo ma iaunegami.

¹⁷ Veiġa rakavari evei-vinimini tarimana ġena veiġa rakavari voina tu veiġa rakavari na asi ma boġono vaġa-voia. Boġono ġauvei-ġitaġita, be tarimarima mabarari ġoirari ai veiġa iobukaiobukari moġo boġono veiri.

¹⁸ Maino tanutanuna tu ġomi mabarami ġimami ai moġo manġea, be ma dabarana nai tu, tarimarima mabarari ġesi maino ai boġono tanu.

¹⁹ Garagaragu namomi, ġevaġa-rakavamini tarimari ġeri vei-rakava voiri asi boġono vei-viniri, a Barau faka boġono vinia, be ġena baru vauro iatari ai bene vaġa-foforia. Korana Buka Veaġai tu maġesina ekirani, "Vereġauka ekirani, 'Au na vauro bavaġa-voirini.' "

²⁰ Senaġi, "Bema ebaru-vinimuni tarimana evitoani nai, bono ġubua; bema bokana ekokeni nai, nanu bono vinia bene niu. Maġesina boveini nai tu, karava memegari ġia debanai bolabu-kaurini," bemaiaikaiani.

²¹ Rakava na ġoi asi bene vaġa-dareremu, ne ġoi na rakava veiġa namori na bono vaġa-darereri.

13

Taravatu tauri garori bitana seġaġiri

¹ Tarimarima mabarari gavamani ġeri veġorikau maorona gaburenai beġene tanu ema beġene seġaġi-viniri. Korana gavamani boruna ta tu asi etanuni, senaġi Barau na evaġa-ruġarito ema maoro baregona evinirito gavamaniri moġo ġetanuni.

² Moġesina naima gavamani ġeri guruġa eġarerini ma ekira-fitoġarini tarimana na tu Barau na evaġa-ruġarini tarimari eġarerini ma ekira-fitoġarini. Ma mo veiġa beveiani tarimana tu tauġena moġo vei-rakava tarimanai evevaġa-iaġoni, ma evevaġa-metoni.

³ Veġitaġau o gavamani tarimari na vei-iobukaiobuka tarimari tu asi ġevaġa-garirini, ne ġia tu veiġa ġeleaiani tarimari ġevaġa-garirini. Bema

gomi ghourani, boḡono tanu-rekoreko moḡo, gavamani tarimari gariri asi boḡono vei ḡotoni nai, veiḡa iobukaiobukari moḡo boḡono vei. Moḡesi boḡo veirini tu, ḡia na bevaḡa-raḡemini.

⁴ Gavamani tarimari tu Barau ḡena vetuḡunaḡi ḡeiaḡo-vinini, ḡomi namo boḡono ḡoitaḡo ḡana ḡeḡauveini. Senaḡi bema ḡomi na veiḡa boḡo leaiani nai tu, boḡono gari korana ma ribami, gavamani ḡimanai tu vevaḡa-maoro baḡana eḡabi-taḡoani. Barau na asi evini-kavaiato, senaḡi ḡia vetuḡunaḡina eiaḡo-vinini, kerere tarimari ḡeri rakava voiri bene viniri ḡana.

⁵ Moḡa lorinai gavamani ḡeri veḡitaḡau gaburenai bitana tanu ema garori bitana seḡaḡiri. Dia kerere voiri beḡe vinirani moḡo gariri ai, senaḡi nuḡarai maki taribani, veiḡa namori bitana veiri.

⁶ Ḳomi tu moḡesina naima ḡotakesini. Gavamani takesi ḡoviniani, korana gavamani tu Barau ḡena vetuḡunaḡi ḡeiaḡo-vinini tarimari. Ḳia ḡeri taimi mabarana tu veḡitaḡau ḡauveina ḡeveiani.

⁷ Ma ḡemi ḡabitore nai, voiri boḡono vei. Bema takesi roḡosi boḡono vini nai, boḡono vini, ma moni kotari roḡosi boḡono vini nai, boḡono vini; vegubakau nai, boḡono vegubakau; vemataurai nai, boḡono vemataurai.

Boḡono veuravini, korana ḡaro bevotu

⁸ Karomi ta ḡenai ḡemi ḡabitore ta asi bene tanu, senaḡi ḡabitore sebona moḡo bene tanu tu maiḡa: Karomi boḡono uravini-vanaḡi vanaḡiri. Korana karona eura-viniani tarimana na Barau ḡena taravatu mabarana ekorana-iaḡiani veiḡana eveiani.

⁹ Mai taravatu maiḡeri: Asi bono veḡura-vanaḡi; asi bono vevaḡi-deba; asi bono lema; tarima tari ḡeri dagara mata-ḡaniḡaniri asi bono vei; ma taravatu kotari maki, moḡeri mabarari tu mai taravatu sebona na eḡabi-vegogoani: “Sevimu tarimana bono ura-vinia, ḡoi tauḡemu oveura-vinini kavana.”

¹⁰ Veuravini na sevina tarimana asi evaḡa-rakavaiani. Moḡa lorinai dagara barego vedaureana Barau ḡena taravatu nuḡanai tu veuravini, korana taveura-vinini nai, taravatu mabarana takorana-iaḡiani.

¹¹ Mai veiḡa boḡono veia, korana mai nega vetoḡana tu ma ribami. Nega varau beraḡasi, be ḡotataḡa gena na. Korana ḡita vaḡa-maḡurira ḡarona tu varau bekavinaḡi-rakava, dia mo guinenai, Keriso taḡabi-raḡeato ḡarona gabunai kavana.

¹² Boḡi tu dori ekorini, ḡaro tu ḡena raḡe bakunai. Moḡa lorinai mukuna veiḡari sitore-tariri, ma mama dabuḡari siriḡo-kauri, vetari tarimari na vetari dabuḡari ḡeriḡo-kaurini kavana.

¹³ Veiḡa namori moḡo sivei, laḡani erakani tarimana kavana. A asi sivereko-lauvaḡi lauvaḡi e niuniu moḡo asi sivaḡa-kokorea, kima mata-ḡaniḡaniri asi sivei e asi simata-boraḡa, asi sivevaḡi-vevaḡi ema asi simama.

¹⁴ Senaḡi ḡita tu Vereḡauka Iesu Keriso moḡo siriḡoa, dabuḡa tariḡo-kaurini ilailanai. Ma tauḡani ḡena ura veiḡari rakavari veiveiri tuḡamaḡiri tu asi siḡabi-raḡeri.

14

Moiramoira ema kokore

¹ Veḡabidadamai emoiramoirani tarimana boḡono ḡabi-raḡea, enabe ḡena tuḡamaḡi tari ḡomi ḡemi tuḡamaḡi ḡesi asi ilaila, senaḡi asi boḡono vaḡa-veḡareveḡarea e asi boḡono ḡau-fitoḡaia.

² Tarima ta ḡena veḡabidadama kokore nai, eḡani-taḡuitaḡuini, ma ta tu ḡena veḡabidadama moira lorinai, ḡaniḡani koriri, asi bureḡari, moḡo eḡanini.

³ Eġani-taġuitaġuini tarimana na vamoka ġaniġaniri moġo eġanini tarimana asi bene kira-fitoġaia, ema vamoka ġaniġaniri moġo eġanini tarimana na maki dagara mabarari eġani-taġuitaġuirini tarimana asi bene vaġa-rakavaia, korana ġia tu Barau na varau eġabi-raġeato.

⁴ Goi tu dei, be tarima ta ġena vetuġunaġi tauna bono vevaġa-maoro vinia? Ġia ġena veġabidadamai eruġa-gigitarini o eketoni moġa tu ġena baregona na vauro bekiraġiani. Senaġi ġia tu beruġa-gigitarini, korana Vereġauka na kokore beviniani bene.

⁵ Tarima ta na tu ġaro tari evaġa-veaġa baregorini, ma ta na tu ġaro mabarari ilaila moġo etoni. Namona tu, ġia tata nuġari e ġeri tuġamaġi ai beġene riba ġeri tuġamaġi tu maoro.

⁶ Tarima ta na ġaro ta eġabi-hidiani, benamo ekirani, mai tu ġaro veaġana etoni nai, mo tarima na mo veġa tu Vereġauka ġenai eveiani. Eġani-taġuitaġuini tarimana maki Vereġauka etuġamaġiani vauro eġaniġanini, korana ġia na Barau etanikiu-viniani. Ema asi ebureġani tarimana maki Vereġauka etuġamaġiani vauro eġani-ġanini. Ġia maki Barau etanikiuani.

⁷ Korana ġita tamaġurini nuġanai dia tauġera ġera maġuri moġo, ma bita maseni maki dia ġita tauġera ġereġara ġera bita maseni moġo. Asiġina ġinavaġi.

⁸ Maġuri tatanuni nai, Vereġauka ġena tamaġurini, ema bita maseni maki, Vereġauka ġena moġo bita maseni. Moġa lorinai, tamaġurini o bita maseni, ġita tu Vereġauka ġena veġata.

⁹ Keriso emaseto ma emaġuri-ġenoġoito korana tu, mase tarimari ema ġemaġurini tarimari ġeri Vere ai bene iaġo ġana.

¹⁰ Moġa lorinai karase ġoi tarikakamu ovevaġa-maoro viniani? Ma kara dainai tarikakamu okira-fitoġaiani? Bono tuġamaġi, ġita mabarabarara tu Barau ġena vevaġa-maoro seana ġoiranai bita ruġa-tarini, vevaġa-maoro bita ġabini.

¹¹ Isaia na etoreato kavana, ekirani,
 “Vereġauka ekirani,
 ‘Moġoni veġata, amaġuri-taġoni dainai,
 tui mabarabarari au ġoiragu ai beġe vetuitui-tarini,
 mea mabarabarari na Barau beġe kiraġi-foforiani.’ ”

¹² Moġesi naima ġita tata ġera maġuri Barau ġoiranai bita kiraġi-foforirini.

Tarikakamu ġena veġabidadama asi bono vaġa-rakavaia

¹³ Moġa lorinai karora ġesi tauġera asi bitana vevaġa-maoro vevini. A namona ġita tu ġera tuġamaġi sivaġa-maorori, be tarikakara ġoirari asi sifatafata-ġauri, ġeri veġabidadama na beġe ketoni garina.

¹⁴ Iesu Vereġauka nuġanai amaġurini nai, ma nuġagu mabarana ġesi ariba-maoroni, ġaniġani dagarana ta tu asi rakava o ma mirona Barau ġoiranai. Senaġi bema tarima ta na ġaniġani dagarana ta etuġamaġi-rakavaiani nai, mo ġaniġani dagarana tu ġia ġereġana ġenai moġo moġoni rakava o ma mirona.

¹⁵ Bema tarikakamu asi eiakuni, ġoi na ġoiranai kara oġaniani eġitaiani nai, bono riba, mo tu dia veuravini veġana ġoi na oveiani. Ġemu ġaniġani na tarikakamu ġena maġuri asi bono vaġa-rakavaia. Keriso tu ġia maki uranai emaseto.

¹⁶ Moġa lorinai ġemi veġa ġobiri boġono toreri, tarimarima maoro asi boġono viniri, ġemi veġabidadama namori rakavari beġene kiraġiri.

¹⁷ Korana dagara baregona tu Barau ġena Basileia, a dia ġaniġani o niuniu dagarari, senaġina vei-iobukaiobuka, maino, ema iaku-verere Iauka Veaġa ġena maġuri nuġanai.

¹⁸ Deikara maġeri veiġa nuġari ai Keriso vetuġunaġina beiaġo-vinini tarimana tu, Barau na beiaku-iaġiani, ema tarimarima na maki beġe vaġa-moġoniani.

¹⁹ Moġa lorinai mabarara sikokore, maino vaġa-ġorana ema ġera veġabidadama vaġa-tubuna ġauveiri siveiri.

²⁰ Ġaniġani ġaramari ai Barau ġena ġauvei asi boġono vaġa-rakavaia. Moġoni, ġaniġani mabarari tu namo ema veiareva Barau ġoiranai, senaġi bema ġoi na ġaniġani ta oġaniani nai, tarima ta nuġana ovaġa-metoani, benamo ġena veġabidadama na beketoni, moġa neġi asi namo.

²¹ Moġa lorinai namona tu, asi bono bureġa, e vine nanuna asi bono niu, ema tarikakamu vaġa-daġaraġena veiġana ta tu asi bono veia. Korana tarikakamu ta bovaġa-daġaraġeani, benamo bevei-rakavani garina.

²² Kara dagara ovaġa-moġoniani, maniġa tu ġoi ema Barau fakami ai moġo bene tanu. (Senaġi tarikaka tari asi bono launaġiri, ġoi na kara ovaġa-moġoniani dagarana beġene ġabi-raġea, korana) nuġanai kara eġabi-raġeani dagarana na nuġana asi evaġa-meto ġenoġoiani tarimana tu beiakuni.

²³ Bema tarima ta tu mo kara eġabi-raġeani dagarana ma daradarana ġesi beġaniani nai, ġia tu tauġena bevevaġa-metoni, korana ġia tu asi veġabidadamana ġesi eġaniani. Ema asi veġabidadama ġenana ġeiaġomani dagarari mabarari tu vei-rakava dagarari moġo.

15

Keriso ġena maġuri bitana tovotovo

¹ Ġita ma kokorera tarimara na moira tarimari ġeri keto ai bisini vaġa-kavari, a dia tauġera ġereġara moġo lorira bitana toreri.

² Ġita tata karora loriri bisini toreri, be namo beġene ġabia, ema ġeri veġabidadama bitana vaġa-tuburi.

³ Korana Keriso maki tauġena lorina asi etoreato, senaġi Buka Veaġai etoreato ilailanai, ekirani, “Vanevane guruġari metori ġoi, Barau, iatamu ai ġekiraġirito tu, au iatagu ai beġema ketokau.”

⁴ Guinena guruġa mabarari Barau ġena Bukai ġetorerito moġeri tu, ġita beġene vaġa-riba-iaġira ġana ġetorerito. Korana ġita mo ġetorerito guruġari ġerina vevaġa-gwaġiġi ema vevaġa-naġi bisini ġabia, benamo ġoirarai Barau ġena Basileia moġa bisini tuġamaġi-kaua.

⁵ Vevaġa-gwaġiġi ema velaunaġi tu Barau evinini. Ġia na ġomi vekaravami ai nuġa-sebona bene vaġa-ġoraia Keriso Iesu ġotovotovoani nuġanai.

⁶ Be nuġa-sebonai ema garo sebonai ġera Vereġauka Iesu Keriso Tamana Barau boġono vevato-iaġia.

⁷ Tata karomi ġesi boġono veiau-namo ema boġono veġabi-raġe, Keriso na eiau-namomito ema eġabi-raġemito kavana. Moġesina boġo veini tu, Barau boġo vaġa-raġe ġitakauani.

⁸ Boġono tuġamaġi: Keriso tu Iuda tarimari ġeri vetuġunaġi taunai eiaġoto, Barau ġena vetuġamaġikau vaġa-moġonina, ema Barau ġena kiraġitore guruġari, senera (Aberahamo, Isako, ema Iakobo) eguruġa-tore vinirito guruġari vaġa-taunari ġana.

⁹ Ema irau bese tarimari na maki Barau beġene vaġa-raġea ġena vevetuġaġwa bakunai. Buka Veaġa etoreato ilailanai, “Moġa lorinai irau bese tarimari vekaravari ai au na ġoi bavaġa-raġemuni;

guriḡuri mariri baḡabini,
ḡoi aramu bavaḡa-namoani.”

¹⁰ Ma ekirani,

“Irau bese tarimami o, ḡia ḡena bese tarimari ḡesi ḡoiaku-vegogo.”

¹¹ Ma ekirani,

“Ḣomi irau bese tarimami,
Vereḡauka ḡovaḡa-raḡea,
ema ḡomi tarimarima mabarabarami,
mari ai ḡia ḡovaḡa-raḡea.”

¹² Ema Isaia ma ekirani,

“Iese natuna ta betubu-vaisini,
ḡena bese tarimana ta bevaisi-raḡeni,
tanobara mabarana beḡita-ḡauani;
irau bese tarimari ḡia ḡenai beḡe vetuḡamaḡikauni.”

¹³ Vetuḡamaḡikau tu Barau ḡenana eiaḡomani. Ḣia na iaku verere ema maino na bene vaḡa-vonuvonu raḡemi ḡenai ḡoveḡabidadamani nuḡanai. Be monana Iauka Veaḡa ḡena seḡuka na ḡemi vetuḡamaḡikau bene vaḡa-barego lelevaḡia.

Paulo, irau bese tarimari ḡeri haroro tauna

¹⁴ Tarikakagu mabarami, au bama riba-maoro, ḡomi manigemi tu namo na ḡovonuvonu-raḡeto, ḡoriba-ginikauto, ema karomi tata ḡesi boḡo vevaḡa-riba-vevinini maki ilaila.

¹⁵ Senaḡi guruḡa matari tari ḡomi batore-vinimi nai, kota bakiraḡi-metori, mo tu ḡomi noḡa ma bakiravara-ḡenoḡoimi maia. Moḡesi aveini, korana Barau na ḡena namo e varevare-bara dabaranai mai ḡauvei eviniguto.

¹⁶ Ekeaguto, Keriso Iesu ḡena vetuḡunaḡi tarimanai bana iaḡo, ma irau bese tarimari vekaravari ai Rubu Veaḡa vereri ḡeri ḡauvei bana veia, Barau ḡena Vari Namona bana ḡobata-iaḡia. Benamo monana irau bese tarimari maki Barau na beḡabi-raḡerini varevare dagarari ai beḡene iaḡo. Ema Iauka Veaḡa na bene vaḡa-veaḡari.

¹⁷ Moḡa lorinai Keriso Iesu ḡena maḡuri nuḡanai aveiavini, Barau ḡena vetuḡunaḡi aiḡo-vinini nuḡanai.

¹⁸ Kara boruna ta guruḡana au asi haveini, senaḡi kara au na akiraḡiato ema aveiato ḡerina, kara Keriso na au ḡeguna eveiato, benamo irau bese tarimari na Barau ḡema-seḡaḡi-viniato, moḡa moḡo bakiraḡiani.

¹⁹ Ḣegu ḡobata ema ḡauvei tu Iauka Veaḡa ḡena seḡuka na vetoḡa boruri ema nuḡa-farevaḡi veiḡari na evaḡa-foforirito-ḡoi. Moḡesina nai Ierusema na aḡeḡeraḡito, aiḡoto mo Iirikiko tanona, Keriso ḡena Vari Namona mabarana akiraḡi-fofori ginikauato.

²⁰ Au ḡegu ura baregona vanaḡivanaḡi tu, Keriso roḡosi roḡo beḡere ribaia gaburi ḡana bana iaḡo, Vari Namona bana ḡobata-iaḡia. Korana asi aurato, tarima ta na ḡauvei evaḡa-ruḡaiato gabunai ma bana ḡauvei-iaḡo.

²¹ Senaḡi ḡegu ura tu, Buka Veaḡai etoreato kavana bana vei, ekirani, “Ḣia varina asi ḡekira-vararito tarimari na beḡene ḡitaia, ema varina asi ḡeseḡaḡiato tarimari na beḡene ribaia.”

²² Moḡesi nai nega ḡutuma naiḡosi atoni, senaḡi ama vedaḡa-raḡeni.

Paulo na Roma benea ḡitaia boioḡana etogato

²³ Senaḡi toma mainai au tu asi ḡegu ḡauvei gabuna ta maia, ema laḡani ḡutuma varau beḡe iaḡo nuḡari ai, au ḡegu ura baregona tu banasi rakaḡitami,

²⁴ nai atuḡamaḡini, Spein ḡana baiaḡoni nai tu, basi ḡitamini roḡo. Maninana bavanaḡini nai, atuḡamaḡini, basi raka-ḡitamini, ma ḡomi ḡesi bita tanu-kotunani roḡo. Moḡa murinai aurani, ḡomi na boḡono vaḡa-kavagu ḡegu iaḡoiaḡo bana iaḡo-vinia ḡana.

²⁵ Initoma tu roḡo Ierusalemā ḡana aiaḡoni, Barau ḡena tarimarima veaḡari navaḡa-kavari ḡana.

²⁶ Korana Makedonia ema Akaia tanori ai tu nuḡari ma verereri ḡesi Ierusalemā asi ḡeri-ḡari tarimari Barau ḡena tarimarima veaḡari vekaravari ai ḡetanuni moḡeri ḡeri moni ḡevaḡa-vegogoto.

²⁷ Ġia tu ma iakuri ḡesi ḡeri moni ḡevaḡa-vegogoto, ma mo tu Iuda tarimari ḡeri ḡabitore ḡia ḡeri ai ḡevaḡa-voiani. Korana bema irau bese tarimari Iuda tarimari ḡeri namo iauka rekenai dagarari ḡeḡabirini nai tu, ḡia tauḡaniri rekenai farefarena maki Iuda tarimari ḡesi beḡe varebarabararini. Korana ma ḡeri ḡabitore Iuda tarimari ḡeri ai dainai.

²⁸ Be mai ḡauvei maiḡa bavaḡa-koriani, ema bana riba-maoro mai moni tarimari korikori na beḡene ḡoitaḡoa murinai vau, Spein ḡana baiaḡoni, ema ḡomi maki basi raka-ḡitamini ḡegu iaḡoiaḡo nuḡanai.

²⁹ Au ma ribagu ḡomi ḡemi ai baiaḡosini nai, Keriso ḡena vevaḡa-namo barego lelevaḡina baḡabi-iaḡosiani ḡomi ḡemi ai.

³⁰ Tarikaka-ḡore, ḡera Vereḡauka Iesu Keriso aranai ema Iauka Veaḡa ḡena veuravini, ḡita iatarai etoreani veuravinina, bakunai, au ḡomi alaunaḡimini: Au ḡegu vekwaraḡi ai boḡono vaḡa-kavagu, iatagu ai Barau ḡenai boḡono ḡauḡau.

³¹ Boḡono ḡuriḡuri, be Barau na Iudea nuḡanai Keriso asi ḡevaḡa-moḡoniani tarimari ḡimari na bene vaḡa-maḡurigu, ema mo varevare dagarana Ierusalemā Barau ḡena tarimarima veaḡari na beḡene ḡabi-raḡea ma iakuri ḡesi.

³² Be Barau ḡena ura ilailanai ḡomi ḡemi ai ma iakugu ḡesi bana iaḡosi, ema mabarara bisini vevaḡa-kokore.

³³ Maino Barauna ḡomi mabarami sevimi ai bene tanu. Amen.

16

Paulo ḡena vevaḡa-namo guruḡari

¹ Avaḡa-ribamini, ḡita tobara Foiḡe tu beiaḡosini. Ġia tu ekalesia ḡena vetuḡunaḡi vavinena ta Kenkrea rubuna nuḡanai.

² Anoḡimini, Vereḡauka aranai boḡono ḡabi-raḡea, ekalesia o veaḡa tarimari ḡoḡabi-raḡerini dabarari korikoriri ai. Ema ma ḡena ura dagarari ḡomi ḡemi ai nai, boḡono vinia. Korana ḡia ḡena vevaḡa-kava maki barego lelevaḡi tarimarima ḡutuma ḡeri ai. Au maki evaḡa-kava barego-lelevaḡiguto.

³ Priskila ema Akwila au ḡegu vevaḡa-namo boḡono viniri. Ġia tauri ruarua tu au ḡesi ḡauvei sebona moḡo ḡaveiani Keriso Iesu ḡena ḡauvei nuḡanai.

⁴ Ġia tauri ruarua tu au uragu ai be dori ḡevaḡi-maserito. Au ema tanobara iraurau ai ḡetanuni ekalesiari ḡema iaku tu asikei ḡia tauri ruarua ḡeri ai.

⁵ Ġia ḡeri numai ḡeraka-vegogoni ekalesiana maki boḡono vaḡa-namori.

Au ḡatagu namona Epeneto au ḡegu vevaḡa-namo boḡono vinia. Ġia tu Keriso murinai eraka-guineto Asia tanobarana nuḡanai.

⁶ Maria au ḡegu vevaḡa-namo boḡono vinia. Ġia tu ḡomi urami ai evekwaraḡi-baregato.

⁷ Au garagaragu Androniko ema Iunia au ġegu vevaġa-namo boġono viniri. Ġia tu au ġesi dibura numai ġatanu-vegogoto. Apostolo mabarari vekaravari ai ġia tauri ruarua tu ġerevaġi, ema ġia tu Keriso ġena maġuri nuġanai ġeberetoġa-guinetto, muriri ai vau au ama bere-toġato.

⁸ Ampliato au ġegu vevaġa-namo boġono vinia. Vereġauka ġena maġuri nuġanai ġia tu au ġatagu korikori.

⁹ Urebano au ġegu vevaġa-namo boġono vinia. Ġia tu ġita ġesi taġauvei-vegogoni tarimana Keriso ġena maġuri nuġanai. Au ġatagu namona Stakis au ġegu vevaġa-namo boġono vinia.

¹⁰ Apele au ġegu vevaġa-namo boġono vinia. Ġia tu moġoni veġata Keriso ġena maġuri nuġanai eruġa-gwaġiġini.

Aristobulo ġena numa tarimari mabarari ġegu vevaġa-namo boġono viniri.

¹¹ Au garagaragu Herodion ġegu vevaġa-namo boġono vinia.

Narakiso ġena numa tarimari deidei Vereġauka ġena doġoro tarimari ġegu vevaġa-namo boġono viniri.

¹² Trifena ema Trifosa au ġegu vevaġa-namo boġono viniri. Maniġeri vavine Vereġauka ġena ġeġauvei-vekwaraġini.

Au tobagu namona Peresi ġegu vevaġa-namo boġono vinia. Mani vavine maki Vereġauka ġena eġauvei-vekwaraġini.

¹³ Rufo ma sinana ġesi au ġegu vevaġa-namo boġono viniri. Rufo tu Vereġauka na eġabi-viriġiato ġena vetuġunaġi taunai bene iaġo, ma sinana tu au sinagu ai eiaġoto.

¹⁴ Asinikrito, Flegon, Hemes, Patroba, Hemas ema tarikaka tari ġia ġesi ġetanuni maniġeri ġegu vevaġa-namo boġono viniri.

¹⁵ Filologo, Iulia, Nereus ma tobana, e Olimpas, ema Barau ġena tarima veaġari ġia ġesi ġetanuni mabarari ġegu vevaġa-namo boġono viniri.

¹⁶ Karomi tata vetarikaka verauna na boġono vaġa-namori

Keriso ġena ekalesia mabarabarari na ġemi vevaġa-namo beġe tuġu.

Velaunaġi tari

¹⁷ Tarikakagu mabarami, alau-naġimini, boġono boġe-ġotoġoto, vetavikirakira veiġari ġevirini tarimari ema ġomi ġemi veġabidadama ġefatafata-ġaurini, dia ġomi na ġoġabirito vevaġa-ribari na. Maniġeri tarima seviri ġana asi boġono raka-kavi.

¹⁸ Korana maniġeri tarima tu dia ġita ġera Vereġauka Keriso ġena vetuġunaġi ġeiaġo-viniani, a ġia tauġaniri ġeri ura veiġari ġevirini. Ġia tu ġeri guruġa meriġa-meriġari na ema ġeri guruġa ġinikau-ġinikau na asi iaunegari tarimari ġeri tuġamaġi ġeġofa-darererini.

¹⁹ Tarimarima ġutuma na ġomi ġemi seġaġi varina varau ġeseġaġiato. Moġa lorinai au ġegu verere asikei ġomi ġemi ai. Senaġi au aurani, veiġa namori boġono riba-ġinikauri, ma veiġa rakavari asiġina ġinavaġi boġono veiri.

²⁰ Maino Barauna na nega kotuna moġo benamo Satani ġomi kwakumi fanafana na gaburenai befana-fatafataiani.

Ġita ġera Vereġauka Iesu ġena namo ema varevare-bara ġomi iatami ai bene tanu.

²¹ Timoteo, au ġauvei karogu, ema au garagaragu Lukio, Iason ema Sosipata na ġemi vevaġa-namo guruġari beġe tuġu.

²² Au, Teretio, Paulo ġena guruġa mai fefai batorea taugu, na maki Vereġauka aranai ġegu vevaġa-namo atuġu-iaġosiani.

²³ Gaius na ġemi vevaġa-namo guruġari betuġu. Au tu ġia na ġena numai enariguni, ema ekalesia tarimari mabarari tu mainai ġeraka-vegogoni.

Erasto, mai siti ġena moni eġita-ġauani tarimana, ema ġita tarikakara Kwatas na ġemi vevaġa-namo beġe tuġu.

[²⁴ Ġita ġera Vereġauka Iesu Keriso ġena namo ema varevare-bara ġomi iatami ai bene tanu.]

Barau vaġa-raġena guruġari

²⁵ Barau sivaġa-namoa, korana ġia na ġomi ġemi veġabidadama bevaġa-kokore-iaġirini au ġegu Vari Namona, Iesu Keriso aġobata-iaġiani varina, ġenana. Mai vari tu guineri laġaniri na veġata vekuretoġa etanuto-ġoi dagarana bema fofori.

²⁶ Maitoma moġeri tu tanu-vanaġivanaġi Barauna ġena guruġa ilailanai peroveta tauri ġeri toretore na ġema vaġa-foforirini, ma tama ribarini. Mai veġa ema vetoreto anina tu, tanobara mabarari na ġia beġene vaġa-moġonia ema beġene seġaġi-vinia ġana.

²⁷ Iaunega Barauna sebona kwarikwari sivaġa-raġea Iesu Keriso bakunai. Ġia marevana baregona bene tanu vanaġivanaġi. Amen.

PAULO ĜENA TORETORE GINIGUINENA KORINTO EKALESIARI ĜERI

1 Korinto vaĝa-foforina guruĝari

Korinto ekalesiana doĝorona tu Paulo ĝenana eĝorato (Apostolo 18). Ma mai fefa giniguinena Paulo na etoreato korana tu, Korinto ekalesiari fakari ai tu meto kota ĝeĝorato-ĝoi. Ma ĝia na Paulo ĝetore-viniato, ĝedanaĝiato, kamasi beĝene vei ĝetato. Moĝesi naima Paulo na mai fefai ĝeri vedanaĝi evaĝa-veŝeato (7:1; 8:1; 12:1; 16:1), ema mo deideiri ĝevei-rakavato-ĝoi moĝeri evaĝa-guruĝa-gwĝiĝirito ema ekalesia maĝurina korikorina tu aiĝesina ekira-vararito.

Paulo na mai fefa tu Efeso vanuĝa na etore-vinirito, mo tu Efeso ekalesiari vaĝa-toitoina evarivaririto taiminai. Mai fefa tu laĝani 53 ma 55 fakari nuĝanai ta etoreato, mo tu Iesu emaseto murinai.

Mai fefai siri baregori tu karoa 1:30-31. Ma ĝena vevaĝa-riba guruĝari baregori ekiraĝirito tu maiĝeri: 1) Ekalesia doĝorona korikori vetoĝana boĝitaiani, ĝia tu Iesu Keriso ĝena vere o veĝitaĝau gaburenai ĝetanuni. 2) Barau ĝena ekalesia doĝorona korikori tu dia tarima o tanobara ĝena iaunegai ekalesia doĝorona beĝe ĝori-kauani, senaĝi Barau ĝena iaunegai ema seĝukai. 3) Ekalesia doĝorona korikori tu Barau na eboioĝaiato dabaranai moĝo beĝe tanuni. 4) Ekalesia doĝorona korikori tu Barau ĝena guruĝa beĝe korana-iaĝiani, ema Barau ĝena veuravini ai moĝo beĝe tanuni. Paulo na mai fefa tu maiĝesina eboioĝaiato:

1. Ekalesia nuĝanai vevare-kirakira eĝorato - karoa 1-4
2. Veĝa rakavari ekalesia nuĝanai - karoa 5-7
3. Kwaivakuku ĝevinirini bureĝari - karoa 8-10
4. Tomaraka-riĝo dabarana - karoa 11
5. Iauka Veaĝa ĝena varevare - karoa 12-14
6. Variĝisi-ĝenoĝoi - karoa 15
7. Guruĝa dokona - karoa 16

¹ Au Paulo, Barau ĝena urai ekeaguto, Keriso Iesu ĝena apostolo tarimagu ai bana iaĝo, ema ĝita tarikakara Sostene ĝesi tauma ruarua ĝemana mai fefa eiaĝosini,

² Barau ĝena ekalesia tarimami Korinto nuĝanai ĝotanuni ĝemi. Ĝomi tu Barau ĝena tarimarima, be Keriso Iesu nuĝanai varau evaĝa-veaĝamito, ma ĝomi Barau na ekeamito tu boĝono veaĝa uranai. Tarimarima mabarari gabu mabarari ai ĝetanuni ĝera Vereĝauka Iesu Keriso aranai ĝeĝauĝauni tarimari maki, Barau na ĝomi ĝesi ekea-sebonamito, boĝono veaĝa uranai. Iesu Vereĝauka tu ĝia e ĝita mabarara ĝera Vereĝauka.

³ Ĝita Tamara Barau ema Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau etanikiu-viniato

⁴ Au na ĝegu Barau vanaĝivanaĝi atanikiu-viniani ĝomi iatami ai, korana ĝia ĝena varevare-bara ĝomi Keriso Iesu nuĝanai ĝotanuni tarimami evinimito nai.

⁵ Iesu Keriso ĝesi ĝosebonani nai, Barau na ĝomi dagara mabarari ai varau bevaĝa-taĝami, guruĝa kiraĝikiraĝi iaunegari mabarana ema tuĝamaĝi-faka mabarana maki evinimito.

⁶ Keriso varina maki ġomi nuġami ai tu varau emoġonito e ġemi veġabidadamai ġoruġa-gwaġiġini.

⁷ Moġesina naima ġita ġera Vereġauka Iesu Keriso ġena iaġoma roġo ġovaġa-noga-taġoani nuġanai tu, Iauka Veaġa ġena varevare tai tu asi ġorabuni.

⁸ E Barau na ġomi bevaġa-ruġa gwaġiġimini beiaġoni mo magona. Be ġera Vereġauka Iesu Keriso ġena vevaġa-kota ġaronai ġomi tu asi ġemi vei-rakava bene doġarimi.

⁹ Barau tu ma ġena vetuġamaġikau. Ġia na ġomi ekeamito, ġia Natuna Iesu Keriso ġita ġera Vereġauka ġesi boġono sebona moġo ġana.

Ekalesia nuġanai vevare-kirakira eġorato

¹⁰ Tarikakagu mabarami, au na ġita ġera Vereġauka Iesu Keriso aranai anoġimini, aurani mabarabarami tu dagara sebona moġo boġono kiraġia, be tauġemi fakami ai asi boġono vevare-kirakira. Ġomi mabarami ġemi tuġamaġi ema ura sebonai moġo boġono tanu.

¹¹ Korana tarikakagu, ġomi varimi tu Kloe ġena numa tarimari na ġema-kiravaraguto, ġekirato, ġomi tu tauġemi moġo ġoveġare-veġareni fakami ai.

¹² Au na akiraġiani gabuna tu iniġa. Ta tu okirani, “Au tu Paulo murinai arakani.” Ta tu okirani, “Au tu Apolos murinai arakani.” Ma ta ma okirani, “Au tu Kefas, (mai tu Petero), murinai arakani.” Ma ta maki ma okirani, “Au tu Keriso murinai arakani.”

¹³ Keriso tu bevevare-kirakira, be doġoro ġutumai beiaġo ba? Mo tu Paulo ġomi urami ai ġevaġa-satauroato ba? O Paulo aranai ġomi ġebabatisomito?

¹⁴ Au na Barau atanikiu-viniani, korana au na ġomi ta asi ababatisomito, a Krispo ema Gaius moġo ababatisorito.

¹⁵ Asi namo ġomi ta bokirani, “Ġai tu Paulo na ebatisomato nai ġena mero ai ġaiaġoto,” botoni.

¹⁶ Moġoni, Stefanas ma ġena numa tarimari ġesi maki au na ababatisorito. Ma asi aribani, au na tarima kotari maki ma ababatisorito ba asiġina.

¹⁷ Au Keriso na etuġuguto tu, dia bana babatiso ġana, senaġi Vari Namona bana ġobata-iaġia ġana. Ma dia iaunega lelevaġi tarimari ġeri guruġa maġurinai bana ġobata-iaġia, korana Keriso ġena satauro asi seġukanai beiaġoni garina.

Satauro Varina

¹⁸ Moġoni, satauro varina mase dabaranai ġerakani tarimari na tu asi ġevaġa-moġoniani, ġekirani tu vari babona ġetoni. Senaġi maġuri dabaranai tarakani tarimara ġerai tu Barau ġena seġuka satauro varina nuġanai efoforini.

¹⁹ Buka Veaġa nuġanai Barau tu maiġesi ekirani, “Au na iaunega lelevaġi tarimari ġeri iaunega tu asi tauri ai bavaġa-iaġorini, ema ġeriba-vanaġito tarimari ġeri riba lelevaġina bavaġa-rakavarini.”

²⁰ Be iaunega lelevaġi tarimari tu ainai? Vevaġa-riba e toretore tarimari tu ainai? Ribavanaġi tarimari guruġa ġevaġa-vevaġirini tauri tu ainai? Barau na evaġa-foforiato, mai tanobara ġena iaunega tu babo veġata.

²¹ Moġoni, Barau ġena iaunega tu fofori, korana Barau na guba ema tanobara eveirito mabarari na ġena iaunega tu ġevaġa-foforiani, senaġina tarimarima tauġeri ġeri iaunega na Barau asi ġeribaiato. Moġesina nai Barau ekirato, namona tu, satauro varina, tarimarima na ġekira-baboani varina, ġevaġa-moġoniani tarimari Barau na bene vaġa-maġuriri.

²² Iuda tarimari ġeri ura baregona tu vetoġa boruri beġene ġita, a Grik tarimari tu iaunega ġeġita-vetauni.

²³ Senaġi ġai na tu Keriso, ġevaġa-satauroato tarimana, ġaġobata-iaġiani, ġia tu vevaġa-maġuri tauna. Ma mai vari Iuda tarimari ġeri ai tu guruġa rakavana e Grik tarimari ġeri ai tu vari babona.

²⁴ Senaġi Barau na ekearito tarimari, Iuda tarimari e Grik tarimari, ġita mabarara ġerai Keriso tu Barau ġena seġuka ema Barau ġena iaunega.

²⁵ Barau ġena veġa tarimarima na ġekira-babobaborini, moġeri veġa na tarima ġeri iaunega evanaġirini. Ema Barau ġena veġa tarimarima na moira-moirai ġekiraġirini, moġeri na tarima ġeri kokore evanaġirini.

²⁶ Tarikakagu mabarami, ġovetuġamaġi-ġenoġoi, ġomi tu aiġesi tarimami Barau na ekeamito. Ġomi tanobara iaunegana ġesi bita vaġa-vetovomini nai, ġomi viravira moġo ma iaunegami, e ġomi viravira moġo ġoseġukato, ema ġomi viravira moġo ġemi bese tu vere.

²⁷ Senaġi Barau na tu mai tanobarai babo tarimari eviriġirito, benamo ġia ġerina mai tanobara ġena iaunega tarimari evaġa-maiakarito. Ema Barau na mai tanobarai moira tarimari eviriġirito, benamo ġia ġerina tanobarai kwalimu tarimari evaġa-maiakarito.

²⁸ Ema Barau na mai tanobarai tarima tari, asi ġeiavirini, ġeġita-fitoġarini e ġekirani, namo ta asi beġe vaġa-ġoraiani ġetoni tarimari, eviriġirito, benamo ġia ġerina tanobarai ġevaġa-raġerini tarimari asi tauri ai evaġa-iaġorito.

²⁹ Mo veġa eveiato korana tu, tarima ta ġia ġoiranai asi bene vetore-varaġevaraġe ġana.

³⁰ Gomi ġemi maġuri tu Barau na Keriso Iesu ġesi evaġa-sebonaiato. Keriso Iesu tu Barau na eġabiato ġita ġera iaunegai evaġa-iaġoato. Keriso ġenana ġita tu Barau ġena vei-iobukaiobuka tarimara e Barau ġena veaġa tarimara, ema Barau na rakava nuġana na evoi-vaġirato, ma rakava toma tu asi seġukana ġita ġerai.

³¹ Moġa lorinai Buka Veaġai ekirani ilailana bitana tanu, ekirani, “Tarima ta eurani bene veiavi nai tu, Vereġauka na kara ġita iatarai eveiato veiavina moġo bene veiavi-iaġia.”

2

¹ Tarikakagu mabarami, au ġomi ġemi ai aiāġosito, Barau ġena guruġa vekuretoġana ġemi aġobata-iaġiato tu, dia guruġa gwaġiġiri ai e ġegu iaunegai ġomi avaġa-guruġamito.

² Au ġomi ġesi roġo tatanuto-ġoi nai, au ġegu ura baregona aveiato tu, dagara ta tu asi bana kiraġia, senaġi Iesu Keriso moġo, o sikira, Iesu Keriso, ġevaġa-satauroato tarimana moġo bana ġobata-iaġia.

³ Au ġomi ġesi tatanuto-ġoi tu asi kokoreġu, ma garigu ġesi, ema tauġanigu maki eġoġo-ġoġoato-ġoi.

⁴ Ema au ġegu guruġa e ġobata maki dia tarimarima ġeri iaunega guruġari na, senaġi au ġegu guruġa ema ġobata tu Iauka Veaġa seġukana avaġa-foforiato-ġoi.

⁵ Moġesi naima ġomi ġemi veġabidadama tu tarimarima ġeri iaunegai asi boġono vaġa-ruġari, senaġi Barau ġena seġukai boġono vaġa-ruġari.

Iauka ġenana eiaġomani iaunegana

⁶ Moġoni, Iauka rekenai ġefakirato tarimari tu, guruġa iaunegari avinirini. A maiġeri guruġa iaunegari tu dia mai tanobara ġena iaunegai o mai tanobara ġorikauri tarimari ġeri iaunegai; ġia ġeri iaunega tu mai ekorini.

⁷ Au na akiraġiani iaunegana tu Barau ġena iaunega vekuretoġana. Tarimarima ġerina tu ekure-toġaiato, senaġi ġia na mai tanobara roġosi roġo bere veia nuġanai, eġabi-toreato, ġita na mareva baregona bitana ġabia uranai.

⁸ Mai iaunega vekuretoġana tanobara ġeġori-kauani tarimari na ta maki asi ġeribaiato. Korana bema beġere ribaia nai tu, mareva baregona Vereġaukana tu asi ġere vaġa-satauroa.

⁹ Senaġi Buka Veaġai ekirani ilailanai,

“Ta matana na asi eġitaiato,

ta seġana na asi eseġaġiato,

ta ġena tuġamaġi asi etuġamaġi-fakaiato,

moġa tu Barau na erovina-toreato,

ġia beġe ura-viniani tarimari ġeri.”

¹⁰ Mai tu vekuretoġa dagarari, senaġi Barau na ġita ġerai tu evaġa-foforirito ġia Iaukana ġenana. Iauka tu dagara mabarari eragaġirini, Barau ġenai dagara dobu-masemaseri maki eragaġirini.

¹¹ Vaġa-ilailana tarima ta na tarima boruna ġena tuġamaġi asi eribaiani. Asiġina. Mo tarima tauġena iaukana na vau ġia nuġanai tuġamaġi vekuretoġari eribarini. Barau maki moġesina, tarima ta na ġia ġena tuġamaġi asi eribaiani, senaġi Barau Iaukana na moġo eribaiani.

¹² Ġita na tu dia mai tanobara iaukana taġabiato. Asiġina. Ġita tu Barau na etuġuato Iaukana taġabiato, Barau na varevare evini-kavarato, dagarari bitana riba-maorori ġana.

¹³ Maiġeri dagara tu dia tarimarima ġeri iaunegai ġevaġa-ribamani guruġari loriri ai ġakiraġirini. Senaġi mai tu Iauka Veaġa na evaġa-ribamani guruġari ilailari ai ġaguruġani. Iauka rekenai dagarari o guruġari tu Iauka Veaġa na evaġa-ribamani ilailanai ġakiraġirini.

¹⁴ Tanobara tarimana na Barau Iaukana ġenana dagara ta tu asi bedoġariani, korana ġia tanobara tarimana ġenai mo tu babo dagarari, ema asi maki beribarini, korana moġeri dagara mo tu Iauka Veaġa nuġanai ġetanuni tarimari na vau beġe ribarini.

¹⁵ Iauka Veaġa ġia nuġanai etanuni tarimana na, dagara mabarari beġita-ginikaurini e betuġamaġi-fakarini, senaġi ġia tauġena tu ta na asi beġita-ginikauani e asi beriba-maoroani.

¹⁶ Korana Buka Veaġa nuġanai maiġesi ekirani,

“Deikara na Vereġauka nuġana eribaiani?

Deikara na ġia besisiba-viniani?

A Keriso ġena tuġamaġi tu ġita ġerai etanuni.”

3

Barau ġena vetuġunaġi tarimari

¹ Tarikakagu mabarami, au na ġomi avaġa-guruġamito-ġoi tu dia Iauka Veaġa na eguine-iaġirini tarimari kavana. Senaġi au na ġomi tu tanobara maġurinai ġetanuni tarimari kavana avaġa-guruġamito-ġoi. Mo negai ġomi Keriso ġena veġa e maġuri nuġanai tu roġo raraka-raraka.

² Moġesi naima au na ġomi tu lata gorari ai aġubumito, a dia ġaniġani gwaġiġiri ai. Korana mo negai ġomi iauka ġaniġaniri gwaġiġiri ġaniġaniri ġana tu roġosi roġo boġoro barego-ginikau. Aba, inıtoma maki ġomi tu roġosi roġo boġoro barego-ginikau, roġo raraka-raraka iaukai;

³ korana ġomi tu roġo tauġanimi ġeri ura rakavari na ġeguine-iaġimini. Ġomi fakami ai mama e vevane tu roġo ġetanuni, mainana moġo evaġa-moġoniani ġomi tu mai tanobara tarimari ġeri maġuri ai roġo ġotanuni.

⁴ Ġomi tu roġo tanobara maġurinai ġotanuni, korana ġomi ta okirani, “Au tu Paulo ġena,” ma ta tu ma okirani, “Au tu Apolos ġena.”

⁵ Be Apolos tu dei? Ema Paulo tu dei? Ġia tauri ruarua tu vetuġunaġi tarimari koriri moġo, ġia ġerina ġomi Iesu ġovaġa-moġoniato. Ġai tauma ruarua tu Vereġauka na ġauvei tata evinimato.

⁶ Au tu avaroto, a Apolos na tu nanu na edairiato, senaġi Barau na tu evaġa-garaiato.

⁷ Moġesi naima evaroto tarimana e nanu na edairirito tarimana tauri ruarua tu asi arari, senaġi Barau ġereġana moġo, korana ġia na dagara evaġa-gararini.

⁸ Evaroni tarimana ema nanu na edairini tarimana tu ilaila moġo. Ġia tata ġeri ġauvei ilailari ai Barau na voiri bevinirini.

⁹ Ġai tu Barau ġesi ġaġauvei-sebonani tarimama, a ġomi tu Barau ġena vamoka; ġomi maki Barau ġena numa.

Barau ġena ġauvei tu numa ragaragana kavana

¹⁰ Barau na ġena namo e varevare-bara eviniguto ilailanai, au tu numa raga tarimagu namonai aiaġoto. Numa vaġa-ruġavaisina duġuna forena aragaiato (o kwakuri avaġa-ruġa ginikaurito), ma ta na tu iatanai numa eragaiani. Senaġi numa beġe ragaiani tarimari tata tu beġene venari, kamasi numa beġe ragaiani tu.

¹¹ Barau na Iesu Keriso tu numa vaġa-ruġavaisina duġuna forenai evaġa-iaġoato. Ma ta na numa vaġa-ruġavaisina duġuna boruna ta tu asi ma beragaiani veġata.

¹² Tarima tari na mai numa vaġa-ruġavaisina duġuna forena (o numa kwakuri) iatanai tu golo, silva o galasi foreri beġe ġauvei-iaġirini numa beġe ragani nai, a tarima tari na ġau, reġi o biri beġe ġauvei-iaġirini.

¹³ Ġia tata ġeri ġauvei vetoġari tu Vereġauka ġena Kota baregona ġaronai vau bevaġa-foforirini. Korana mo ġauvei tu karava na bevaġa-foforiani ema karava na tarima tata ġeri ġauvei betovo-naġirini, moġeri ġauvei tu namori ba rakavari.

¹⁴ Bema tarima ta na mo numa vaġa-ruġavaisina duġuna forenai eragaiato numana tu karava na asi beġaraiani nai, ġia tu voina namona beġabiani.

¹⁵ Bema ġena numa karava na beġaraiani tarimana tu, ġena ġauvei mabarari tu beġe rekwa-rekwani, ġia ġereġana moġo bemaġurini. Senaġi ġia tu noġa moġo karava na beraga-maġurini.

Ġomi tu Barau ġena Rubu Veaġa

¹⁶ Ġomi asi ribami, ġomi tu Barau ġena Rubu Veaġa ema Barau Iaukana tu ġomi nuġami ai etanuni, ei?

¹⁷ Bema tarima ta na Barau ġena Rubu Veaġa bevaġa-rakavaiani nai, ġia maki Barau na bevaġa-rakava kwaikwaiiani, korana Barau ġena Rubu tu veaġa, ema ġomi tu ġia ġena Rubu Veaġa.

Tarimarima asi boġono vaġa-veiaviri

¹⁸ Tarima ta ġena tuġamaġi na asi bene ġofaia. Bema tarima ta ġomi fakami ai etuġamaġini, ġia tu ma iaunegana mai tanobarai, ġia tu babo tarimanai bene iaġo, be bene iaunega.

¹⁹ Korana mai tanobara iaunegana Barau ġoiranai tu iaunega babona. Buka Veaġai ekirani kavana, ekirani, “Barau na iaunega tarimari tauġeri ġeri iaunega rakavari nuġari ai eġabi-taririni.”

²⁰ Ema Buka Veaġai maki ma ekirani, “Vereġauka ribana, iaunega tarimari ġeri tuġamaġi tu asi tauri, koriri moġo.”

²¹ Moġesi naima, tarima ta na tarimarima tu asi bene vaġa-veiaviri. Korana dagara mabarari tu ġomi ġemi.

²² Paulo e Apolos ema Petero; mai tanobara mabarana tu ġomi ġemi, maġuri e mase, maitoma ġefoforini dagarari ema ġoirai vau beġe iaġomani dagarari; mabarari tu ġomi ġemi.

²³ A ġomi tu Keriso ġena, ema Keriso tu Barau ġena.

Vereġauka tauġena na ġena vetuġunaġi tarimari ġeri maġuri evetau-ginikaurini

4

¹ Moġesi naima ġomi na ġai boġono tuġamaġima, ġai tu Keriso ġena vetuġunaġi-iaġovinina tarimama, ema Barau ġena vekuretoġa dagarari ġitaġauri tarimama.

² Farefare ġeviniani bene ġita-ġauri ġetoni tarimana ġena biaguna ġena ura baregona, ġia tu ma vetuġa-maġikauna ġesi farefare bene nariri.

³ Au tu kamasi ġotoni? Au tu asi atuġamaġini, ġomi na au boġo vetau-ginikauguni o tarimarima ġeri Kota maġurinai beġe vetau-ginikauguni ba asiġina. Au tu tauġegu maki asi avevaġa-maoroni.

⁴ Au tauġegu avetuġamaġini, ġegu rakava ta asi atuġamaġi-doġariani. Senaġi asi akirani, au tu asi ġegu vei-rakava. Vereġauka na moġo au eġita-ginikauguni.

⁵ Moġesina naima Vereġauka roġosi bene iaġoma e ġena vevaġa-kota ġarona roġosi bene ġabia nuġanai, maitoma tu tarima ta asi boġono vetau-vinia. Vereġauka na mukuna furufuru ai vekuretoġa dagarari mabarari mamai betore-rosirini, ema tarimarima ġeri tuġamaġi loruri ġutunai ġetanu-vekuretoġani maki bevaġa-foforirini. Mo ġaro ai Barau na tata bevaġa-raġerini ġeri veiġa loriri ai.

⁶ Tarikakagu mabarami, maiġeri guruġa au tauġegu ema Apolos ġema bavaġa-vetovori, korana tu ġomi namo boġono doġari uranai. Be, ġai ġemana maiġa boġono ribaia, “Buka Veaġai ġetoreato guruġana asi boġono vanaġia.” Monana tarima sebna ta moġo asi boġo vaġa-veiaviani e ta asi boġo kira-fitogaiani.

⁷ A ġoi tu deikara na tarima baregomu ai etoremuto tarimarima mabarari fakari ai? Ġoi ġemu dagara mabarari tu dia Barau na evinimuto? Bema ġoi na Barau ġenana odoġaririto nai tu, kara dainai ovekokorokuni, noġa dia Barau ġenana oġoitaġoato dagarana oveini?

⁸ Ġomi tu ġoura-vinirini dagarari na varau boġo vonuvonu-raġe. Ġomi tu varau boġo taġa-ġosi. Ġai tu ġomi na boġo vanaġima, korana ġomi tu varau boġo kini, be ġoveġitaġauni. (Ġomi tu noġa moġo Keriso varau bere iaġoma-ġenoġoi kavana ġoveini). Au ġegu ura barana sebna, ġomi tu moġoni boġoro kini, be ġai maki ġomi ġesi bitara kini-sebna. (Korana boġono riba, Keriso ma beġenoġoi-iaġomani nai, ġai maki ġomi ġesi bita kinini).

⁹ Senaġi au atuġamaġini tu maiġesi: Barau na ġai apostolo tu gabi tarimamai etoremato, mai tanobarai asi beġene ġita-leama e asi beġene iavima gabunai etoremato. Ġai tu noġa tarima kotari, Kota na evaġa-moġonirini beġene vaġi-maseri etoni, benamo ġeġabirini, ġutuma-bara ġoirari

ai ġevaġa-ruġa-rosirini, beġene ġitari vau beġene vaġiri ġetoni kavana. Ġai maki Barau na mai tanobara mabarana nuġanai etore-rosimato, aneru e tarimarima ġoirari ai.

¹⁰ Ġai tu babo Keriso ġaramanai bene, a Keriso nuġanai ġomi tu iaunega. Ġai tu asi kokorema, a ġomi tu ma kokoremi. Ġomi tu ġeguba-kaumini, a ġai tu asi ġegubakaumani.

¹¹ Ġai ġatanu-iaġomani mo toma tu ġavito-maseni e ġananu-maseni; dabuġa rakavari na ġavedabuġani; ġekwarimani; ema asi ġema tanutaġo numari.

¹² Ġai tu tauġema ġimama na ġaġauveini. Tarima na ġekira-fitoġamani nai, ġai na tu ġavaġa-namorini; ġevaġa-midigu midigumani e ġelai-lausilausimani, senaġi ġaruġa-gwaġiġini moġo, voiri asi ġaveirini.

¹³ Ġai arama tu ġevaġa-rakavarini, a ġai na tu ġavaġa-guruġa ginikaurini. Ġai tu tanobara ġena momo ai ġaiġoto, e tanobara na eruġamani asi eġabi-raġemani beiaġoma mo toma.

¹⁴ Au na maiġeri mabarari atorerini tu, dia ġomi navaġa-maiakami ġana, senaġi ġomi tu au natugu, aura-vinimini tarimami, naima akiravara-toreġaumini.

¹⁵ Aba, Keriso nuġanai ġevaġa-ribamini e ġeġori-kaumini tarimari tu betaġu 10,000, senaġi tama tu asi vovoka ġomi fakami ai, sebona moġo. Korana Vari Namona ġenana au tu ġomi tamam ai aiaġoto Keriso Iesu nuġanai.

¹⁶ Moġesi naima au na ġomi alaunaġimini, au boġono tovoovogu.

¹⁷ Moġa lorinai maki au na Timoteo ġomi ġemi ai atuġu-iaġosiato. Ġia Vereġauka nuġanai tu au natugu e auravini-rakavaiani, ema ġia tu Vereġauka ġena ġauvei evei-ġitakauani ma vetuġamaġikauna ġesi. Ġia na au Keriso Iesu nuġanai aiġesi atanuni maġurina ma bekira-varamini, gabu e rubu mabarari ai avevaġa-riba iaġirini ilailari ai.

¹⁸ Ġomi tari tu ġovekokorokuni, noġa moġo au ġomi ġemi ai tu asi baiaġosini noġa ġoveini. Ġomi garimi aveini ġotoni.

¹⁹ Senaġi bema Vereġauka ġena ura nai tu, ġemi ai baiaġosi-ġarimoġini. Benamo au baiaġosini vauro, maniġeri tarima ġeri vekokoroku guruġari ema ġeri seġuka basi ribarini.

²⁰ Korana ainai Barau na ġena Basileia o veġitaġau evaġa-ruġaiiani, monai tu dia guruġa korina ġesi moġo efoforini. Asigġi. Barau ġena veġitaġau tu ma seġukana ġesi efoforini.

²¹ Ġomi na tu aiġa ġoura-viniani? Au ġomi ġemi ai tu ma kwarigu ġesi bana iaġosi, ba veuravini ai ema manau ai, ei?

5

Veġa rakavari Korinto ai

¹ Ma aseġaġini, ġekirani, ġomi fakami ai mata-boraġa maġurina eġorani. Mai mata-boraġa maġurina ġomi fakami ai eġorani tu Barau asi ribari beseri fakari ai maki asi eġorani veġana. Au ġekiraguni, tau ta na sinana raġetaġona eġabiani, benamo ġaraġonai evaġa-iaġoani, eġena-viniani.

² Ma nuġanai ġomi tu ġovekokorokuni. Ġomi tu nuġami taġi na beġere vonu, be moġesi eveini tarimana tu ġomi fakami na boġoro tuġu-veġitaia.

³ Aba, au tauġanigu ġomi vekaravami ai tu asiġina, senaġi iaukai au tu ġomi vekaravami ai maniġegu. Be mai veġa eveiani tarimana tu au na varau bavaġa-maoroa, au tauġani ai ġomi ġesi maninai mani ġegu bara vaġa-maoroa ilailanai.

4 Ĝomi ĝera Vereĝauka Iesu Keriso aranai ĝoraka-vegogoni, ema au iaukagu maki ĝomi vekaravami ai nuĝanai, ĝera Vereĝauka Iesu Keriso ĝena seĝukai,

5 ĝomi na maniĝesi eveini tarimana tu Satani boĝono vinia, tauĝanina bene vaĝa-rakavaia uranai bene. Moĝesina boĝono veia, be Iesu Vereĝauka ĝena ĝenoĝoi ĝaronai ĝia iaukana tu bene maĝuri.

6 Ĝomi ĝoveiavini tu asi namo. Ĝomi asi ribami farao evaĝa-tubuani muramurana misina na farao mabarana evaĝa-tubuani?

7 Moĝesina naima farao evaĝa-tubuani muramurana guinena mabarana ĝemina boĝono tore-veĝitaia, be ĝomi tu beredi variĝuna asi farao evaĝa-tubuani muramurana beredinai boĝono iaĝo. Au ribagu, ĝomi tu moĝoni beredi variĝuna, dia farao evaĝa-tubuani muramurana ĝesi ĝevei-sebonamito beredina. Korana Keriso tu moĝoni ĝita ĝera mamoe natuna ginitaĝo ĝana. Ĝia tu ĝita urarai ginitaĝo ĝana ĝevaĝiato.

8 Moĝa lorinai Rubu Veaĝa verekona bitana ĝabi-gwaĝiĝia, senaĝi dia farao evaĝa-tubuani muramurana guinena ĝesi. Mai veĝa tari ilailana tarima vaĝa-rakavari tuĝamaĝiri e veĝa rakavari tu farao evaĝa-tubuani muramurana kavana, be maĝeri maki bitana tore-veĝitari Rubu Veaĝa verekona bita ĝabi-gwaĝiĝiani nai. Ĝita na Rubu Veaĝa verekona bita ĝabi-gwaĝiĝiani nai tu, dia farao evaĝa-tubuani muramurana ĝesi ĝevei-sebonaiani beredina ĝesi. Moĝa tauna tu, ma moĝonira ĝesi ema moĝoni ai bitana ĝabia.

9 Fefa tai au na ĝomi atore-vinimito nuĝanai akiramito, mata-boraĝa tarimari ĝesi tu asi boĝono vekako.

10 Moĝesi atore-vinimito nai, au na tu dia ekalesia murikanai ĝetanuni tarimari akiraĝirito, au iniĝesi tu asi akirato, ĝekima-rakaoni, o ĝemata-ĝaniĝanini, o ĝofaĝofa veĝari ai ĝeverarini, o kwaivakuku ĝetoma-rakariĝo vinirini tarimari ĝerina tu boĝono rakaveĝita-moĝovaĝi. Korana bema maĝeri tarima ĝerina ĝoveĝita-moĝovaĝi boĝo toni nai tu, mai tanobara boĝo iaĝuiani.

11 Senaĝi toma au na atore-vinimini tu, akirani, deikara ekirani, ĝia tu tarikaka veĝabidadama nuĝanai, senaĝi ĝia tu ekimani o emata-ĝaniĝanini, o babarau etoma-rakariĝo vinirini, o tarimarima ĝeri maĝuri ekiraĝi-rakava rakavarini, o niuniu tarimana, o ĝofaĝofa veĝari eveirini tarimana ĝesi asi boĝono vekako. Maiĝesi tarimari ĝesi tu asi maki boĝono ĝani-vegogo.

12-13 Au tu asi ĝegu ĝauvei ta ekalesia murikanai ĝetanuni tarimari au na bavaĝa-maororini. Barau na vau bekota-vinirini. Senaĝi ĝomi tu ma ĝemi maoro ekalesia nuĝanai ĝetanuni tarimari boĝo vaĝa-maororini. Buka Veaĝa ekirani ilailanai, "Vei-rakava tarimana ĝomi fakami na boĝono tore-veĝitaia!"

6

Vekotavini ekalesia karomi ĝesi

1 Bema ĝomi ta ekalesia karomu ta ĝesi ĝoveĝare-veĝareni nai, kara dainai tu Barau asi ĝekorana-iaĝiani Kota seĝaĝi tarimari ĝeri ai oa samaniani, ĝia beĝene vevaĝa-maoro ĝana, a Barau ĝena tarimarima veaĝari ĝeri ai mo meto tu asi ĝoĝabi-iaĝoani vei-maorona, ei?

2 Ĝomi asi ribami, tanobara maĝurinai ĝetanuni tarimari tu Barau ĝena tarimarima na beĝe vaĝa-maororini? Karase nai ĝomi na mai dagara misiri tu asi ilaila tauĝemi na ĝemi vegogo ai boĝo vaĝa-maororini?

³ Ĝomi asi ribami, ĝita na tu aneru bita kota-vinirini? Bema moĝesi bita veini nai tu, atuĝamaĝini, mai vanaĝivanaĝi tatanu-iaĝiani maĝurina dagarari maki bita vetau-ginikaurini riba.

⁴ Ĝoĝitaiani, bema mai vanaĝivanaĝi tatanu-iaĝiani maĝurina dagarari ĝita na bita vetau-ginikaurini, karase nai tu Barau asi ĝekorana-iaĝiani Kota tarimari ĝeri ai ĝoiaĝoni, ĝemi beĝene vevaĝa-maoro ĝotoni.

⁵ Maiĝesi akirani tu ĝomi beĝene maiakami ĝana. Moĝoni korikori, ĝomi fakami ai iaunega tarimana sebona ta maki asiĝina ĝinavaĝi moĝo, be ĝia na tarikakana vekaravari ai mani meto misina asi bevaĝa-maoroani, ei?

⁶ A ĝomi tu ekalesia karona ta na karona ta eĝori-kotaiani, ma tauri ruarua tu ĝeiaĝoni, Iesu asi ĝevaĝa-moĝoniani tarimari ĝoirari ai ĝea ruĝa-tarini, ĝekota ĝana.

⁷ Moĝoni, ĝomi tauĝemi moĝo vekaravami ai ĝoveĝori-kotani tauna korikori tu, ĝomi ĝemi veĝabidadama maĝurina na tu moĝoni boĝo ketokorikori. Karase nai tarikakami tari na ĝevaĝa-rakavamini nai tu, asi moĝo ĝoĝabi-raĝerini? Kara dainai ĝofaĝofai ĝemi farefare ĝeverarimi ĝetoni nai tu, asi moĝo ĝoĝabi-ragerini, ei?

⁸ A ĝomi tu tarikakami ĝesi tauĝemi moĝo ĝofaĝofai ĝoveverarini e ĝovevaĝa-rakavani.

⁹ Ĝomi asi ribami, veiĝa iobukaiobukari asi ĝeveini tarimari na Barau ĝena Basileia tu asi beĝe ĝaunaiani. Tauĝemi nuĝami na asi beĝene ĝofami. Korana tu ĝekimani tarimari, kwaivakuku ĝetoma-rakarigorini tarimari, veĝura-vanaĝi tarimari, tau tu tau karori ĝesi ĝekimani, ema ĝeĝiĝiraĝeni tauĝeri karori ĝesi maiaka veiĝari beĝene vei ĝetoni tarimari,

¹⁰ ĝelemani tarimari, ĝemata-ĝaniĝanini tarimari, niuniu tarimari, ĝofaĝofa veiĝari ai ĝeveverarini tarimari, ema tarimarima ĝeri maĝuri ĝekiraĝi-rakava rakavarini tarimari na Barau ĝena Basileia tu asi beĝe ĝaunaiani.

¹¹ Ma ĝomi kotari guinenai tu moĝesi ĝoveito-ĝoi tarimami. Senaĝi ĝomi tu ĝita ĝera Barau Iaukana na Iesu Vereĝauka aranai varau eĝuriĝimito, evaĝaveaĝamito, ema asi ĝemi vei-rakava etato.

Ĝita tauĝanira tu Iauka Veaĝa ĝena tanu numana

¹² Ta bekirani, “Dagara mabarari au ĝegu ai tu asi taravatu,” betoni. Ĝomaoroni, senaĝi dia mo dagara mabarari ĝerina ĝomi namo boĝo doĝarini. Dagara mabarari au ĝegu ai tu asi taravatu, senaĝi asi namo au dagara ta na beĝori-kauguni, benamo ĝena tuĝu-rakaorakao tarimanai baiaĝoni.

¹³ Ma ta bekirani, “Ĝaniĝani tu sinaĝe ai bene tanu ĝana e sinaĝe tu ĝaniĝani ĝana.” Mai tu moĝoni! Senaĝi ĝaniĝani e sinaĝe tu Barau na tauri ruarua bevaĝa-rakavarini. Ĝita tauĝanira Barau na eveiato tu dia tarimarima na bitana kima-iaĝia ĝana. Asiĝina. Barau na tauĝani tu Vereĝauka ĝena eveiato, ma Vereĝauka maki tauĝani ĝena Vere.

¹⁴ Barau na Vereĝauka mase na evaĝa-variĝisi ĝenoĝoiato, ema ĝita maki mase na bevaĝa-variĝisi ĝenoĝoirani, Barau tauĝena ĝena seĝuka na.

¹⁵ Ĝomi asi ribami, tata tauĝanimi tu Keriso tauĝanina koturikoturi, ei? Ma Keriso tauĝanina koturikoturi moĝeri tu naĝabiri, be mata-boraĝa tarimari tauĝaniri ai navaĝa-iaĝori? Asiĝina ĝinavaĝi!

¹⁶ Ba ĝomi tu asi ribami, mata-boraĝa vavinena ĝesi evekafani tarimana tu mo mata-boraĝa vavinena ĝesi sebonai ĝeiaĝoni? Korana Buka Veaĝa nuĝanai Barau ekirato, “Mo tarima ruarua tu tauĝani sebonai moĝo beĝe iaĝoni.”

¹⁷ Senaġi Vereġauka ġenai bekafakauni tarimana tu Vereġauka ġesi iauka sebonai beġe iaġoni.

¹⁸ Mata-boraġa maġurina ġenana boġono raka-veġita. Veġa rakava mabarari tarimarima na ġeveirini tu tauġani murikana moġo rakavana, senaġi ekimani tarimana tu tauġena tauġanina nuġanai evei-rakava viniani.

¹⁹ Ba ġomi tu asi ribami, ġomi tauġanimi tu Iauka Veaġa ġena Rubu Veaġa, ma Iauka Veaġa tu ġomi tauġanimi nuġanai etanuni, ei? Mani Iauka Veaġa tu Barau na evinimito, moġa lorinai ġomi tu dia tauġemi ġemi, senaġi ġomi tu Barau ġena.

²⁰ Ġomi tu Barau na voimi varau eveirito, evoi-ġenoġoimito, be tauġanimi tu Barau ġena. Moġa lorinai tauġanimi na Barau boġono vaġa-raġea.

7

Veġaraġo guruġari

¹ Maitoma tu ġemi fefai au ġotore-viniguto guruġari ma navaġa-voiri. Tau ta asi eveġaraġoni tu namo.

² Senaġi kima veġana eġorani lorinai, namona tu tau tata tauġeri ġaraġori sebori sebori beġene ġaraġo, e vavine tata maki tauġeri ġaraġori sebori sebori beġene ġaraġo.

³ Tau tauġanina tu ġaraġona ġena, be tauġanina ġaraġona ġenai asi bene koua, a ġaraġona ġena ura bene veiri. Vavine maki moġesi, tauġanina tu ġaraġona ġena, be tauġanina ġaraġona ġenai tu asi bene kou-ġaua, a ġaraġona ġena ura bene veiri.

⁴ Veġaraġo vavinena tu asi ġena maoro ġia tauġena tauġanina ġenai, a ġaraġona tauna moġo ma ġena maoro ġia tauġanina ġenai. Veġaraġo tauna maki moġesina, ġia tu asi ġena maoro ġia tauġena tauġanina ġenai, a ġaraġona vavinena moġo ma ġena maoro ġia tauġanina ġenai.

⁵ Ġoveġaraġoto tarimami tu ġaraġomi ġeri ai tauġanimi asi boġono kouri. Senaġi taumi ruarua nuġa sebonai boġo kirani, ġoġaniveaġa e ġoġauġau boġo toni, moġa uranai vauro mo negai boġono tanu-faka. Senaġi moġa bekorini murinai tu, ma boġono gena-vegogo maia. Moġesi boġono vei, be Satani na asi ġovevaġa-gwaġiġi-iaġiani gabunai asi bene riba-ġanimi.

⁶ Maiġesi aguruġani tu, ġomi navaġa-kavami ġana moġo, dia taravatu atoreani, akirani, boġono veia veġata atoni.

⁷ Korana au ġegu ura baregona ġomi tau mabarami tu au kavana boġoro vei, asi boġoro veġaraġo. Senaġi Barau na tau tata varevare eviniato, tau ta ġena varevare tu bene veġaraġo, ma ta ġena tu asi bene veġaraġo.

⁸ Au na asi ġaraġori tarimari ema ġaraġori ġemaseto tarimari tu akirarini: Ġia tu gora, asi beġene veġaraġo, beġene tanu moġo au kavana.

⁹ Senaġi bema ġia asi ilaila beġe vevaġa-gwaġiġini nai tu, benamo beġene veġaraġo. Korana beġe veġaraġoni tu namo, a asi namo kima veiġari nuġari ai karava noġa beġene ġara.

¹⁰ A Veġaraġo tarimami tu mai taravatu avinimini. Senaġi mai tu asi au ġegu taravatu. Asiġina. Mai tu Iesu Vereġauka ġena taravatu ġomi ġemi: Veġaraġo vavinena na ġaraġona asiġina ġinavaġi bene dobi-kwaneana.

¹¹ Senaġi irau ġaraġona bedobi-kwaneani nai tu, bene tanu-gora moġo, a asiġina tu, ġaraġona ġesi ma beġene veġaraġo-ġenoġoi. Ema veġaraġo tauna na maki ġaraġona asiġina ġinavaġi bene dobi-kwaneana.

¹² Tarima kotari ġeri ai tu nakira, -mai tu au moġo ġegu guruġa dia Vereġauka ġena guruġa, -bema veġabidadama nuġanai tarikaka ta ġaraġona vavinena tu Iesu asi evaġa-moġoniani vavinena, senaġi ġena ura ġaraġona

tauna ġesi beġene tanu-vegogo nai, mo tau na ġaraġona vavinena asi bene dobi-kwanea.

¹³ Ema bema vavine ta ġaraġona na Iesu tu asi evaġa-moġoniani, senaġi eurani ġaraġona vavinena ġesi beġene tanu-vegogo, mo vavine na ġaraġona asi bene dobi-kwanea.

¹⁴ Korana Iesu asi evaġa-moġoniani tauna tu ġaraġona vavinena ġenana moġo veiareva etanuni, ema Iesu asi evaġa-moġoniani vavinena tu ġaraġona tauna ġenana moġo veiareva etanuni. Bema asiġina nai tu, toma ġomi natumi Barau ġoiranai tu asi veiareva, senaġi ġia toma tu veaġa.

¹⁵ Senaġi bema Iesu asi evaġa-moġoniani tauna o vavinena ġaraġona ġenana bedobini nai tu, namo bene dobi, bene raka. Mo Iesu evaġa-moġoniani tauna o vavinena mai dabarai tu befakani, meto ta asi beġwaiani. Barau na ġomi ekeamito maino ai boġono tanu.

¹⁶ Ġoi veġabidadama vavinemu tu kamasi ġoi oribani, ġoi na ġaraġomu vei-rakava nuġana na bovaġa-maġuriani? O ġoi veġabidadama taumu tu kamasi ġoi oribani, ġoi na ġaraġomu vei-rakava nuġana na bovaġa-maġuriani?

Barau na ekeamito ilailanai boġono tanu

¹⁷ Ġomi tata Iesu Vereġauka na evinimito ilailari ai ema Barau na tata ekeamito ilailari ai moġo boġono tanu. Au na tu mai taravatau misina ekalesia mabarari avaġa-ribarini.

¹⁸ Bema tau ta tauġanina kefina ġelama-vaġiato murinai vau, Barau na ekeaiato nai tu, kefina asi ma bene inu-ġaua, benamo ġelamaiato fauna bene kure-toġaia. Ema bema tau tauġanina kefina roġosi beġene lama-vaġia nuġanai, Barau na ekeaiani nai tu, kefina asi beġene lama-vaġia maia.

¹⁹ Korana tu kefi-lamavaġi tu asi anina ta, ema kefi asi lamavaġi maki asi anina ta. Dagara baregona tu Barau ġena taravatau guruġari boġabi-gigitaririni.

²⁰ Tarimarima mabarari aiġesina ġetanuto-ġoi nuġanai, Barau na ekear-ito, moġesi moġo beġene tanu.

²¹ Ġoi Barau na ekeamuto neganai, ġoi tu tuġu-rakaorakao tarimamu asi voimu otanuto-ġoi, ei? Asi ġena rakava, namo moġo. Moġa tuġamaġi vekwaraġina asi bono vei, senaġi mani tuġu-rakaorakao maġurina beġe tuġu-vaġimuni nai tu, bono ġabi-raġea.

²² Korana tarima ta roġo tuġu-rakaorakao tarimana nuġanai, Barau na ekeaiato Vereġauka ġesi beġene sebona, ġia tu varau fakai etanuni, korana ġia tu Vereġauka ġena tarima. Aba, tauġani ai ġia tu roġo tuġu-rakaorakao tarimana senaġi. Moġa ilailanai, asi tuġu-rakaorakao tarimana o fakai etanuni tarimana Barau na ekeaiani tu Vereġauka ġena tuġu-rakaorakao tarimana.

²³ Ġomi tu Barau na voimi varau eveito, evoi-ġenoġoimito. Be tarimarima ġeri tuġu-rakaorakao tarimami ai asi boġono iaġo.

²⁴ Tarikakagu mabarami, ġita tata aiġesi tatanuto-ġoi nuġanai, Barau na ekearato, bena moġesi moġo Barau ġesi bitana tanu.

Sisiba guruġari gora ema vabu ġeri ai

²⁵ Ma roġosi beġene veġaraġo ġuiatori e futuari ġeri taravatu ta Vereġauka na au tu asi eviniguto. Senaġi au ġegu tuġamaġi ai aġitaiani guruġana nakiraġia, korana au tu Vereġauka ġena vevetuġaġwai moġo etoreguto, guruġa moġoniri moġo bana kiraġiri ġana.

²⁶ Mai nega rakavari maiġeri meto baregori ġeġorani dainai, au atuġamaġini, tau tu toma ġotanuni kavana moġo boġono tanu-iaġo.

²⁷ Ĝoi oveĝaraĝoto taumu tu, ĝaraĝomu dobi-kwanena tuĝamaĝina asi bono vei. A asi ĝaraĝomu meromu tu, ĝuiato asi bono vetau, ta noĝaraĝoa uranai.

²⁸ Senaĝi bema ĝoi boa veĝaraĝoni maki namo, ĝoi na vei-rakava ta asi boveiani. Ma ĝuiato beveĝaraĝoni maki namo, ĝia na vei-rakava ta asi beveiani. Senaĝi beĝe veĝaraĝoni tarimari tu ĝeri maĝuri nuĝanai meto vovoka beĝe doĝaririni. Ma au na tu mo meto ĝerina navaĝa-maĝurimi atoni.

²⁹ Tarikakagu mabarami, au na kara akiraĝiani tauna tu iniĝa: Nega tu bekubi-rakava. Be, maitoma na besinaia beiaĝoni tu, veĝaraĝo tauri tu asi ĝaraĝori noĝa beĝene tanu.

³⁰ Ema ĝetaĝini tarimari noĝa moĝo asi ĝetaĝini tarimari kavana beĝene tanu, e ĝeverereni tarimari noĝa moĝo asi ĝeverereni tarimari, e farefare ĝevoini tarimari tu farefare ta asi ĝeĝaunaiani tarimari noĝa moĝo,

³¹ ema tarima na mai tanobara dagarari ĝeĝauvei-iaĝirini nai, moĝeri dagara tu asi beĝene ĝabiri dagara baregori ĝia ĝeri maĝuri nuĝari ai. Korana mai tanobara vetoĝana korikori tu varau ekori-iaĝoni.

³² Au asi aurani, mai tanobara dagarari na ĝemi tuĝamaĝi beĝene vaĝa-vonuri. Asi eveĝaraĝoto tarimana tu Vereĝauka ĝena dagara etuĝamaĝi-ĝutumarini, aiĝesi Vereĝauka iauna bevaĝa-namoani etoni.

³³ Veĝaraĝo tauna tu mai tanobara dagarari etuĝamaĝi-ĝutumarini, aiĝesi ĝaraĝona iauna bevaĝa-iakuani etoni.

³⁴ Moĝesina naima ĝia tu egabi-daĝadaĝani, tavi ta tavi ta na ĝeinuani. Veĝaraĝo vavinena ema asi kota maki ekima-karato ĝuiatona tu ma ĝeri irau. Asi ĝaraĝona vavinena tu Vereĝauka ĝena dagara betuĝamaĝi-ĝutumarini. Ĝia ĝena ura tu tauĝanina ema iaukana beĝene veaĝa Vereĝauka ĝena. Senaĝi veĝaraĝo vavinena tu tanobara dagarari betuĝamaĝi-ĝutumarini, aiĝesi ĝaraĝona iauna bevaĝa-iakuani etoni.

³⁵ Mai tu ĝomi bana vaĝa-kavami ĝana maĝeri akiraĝirini, dia ĝomi akirakira-ĝaumini. Senaĝi mai tu au ĝegu ura ĝomi boĝono tanu-ginikau moĝo, e kara ta na asi bene koukou-ĝaumi Vereĝauka vetuĝunaĝina boĝo iaĝo-vinini nai.

³⁶ Bema tau ta etuĝamaĝini, kirakauna ĝuiatona, asi kota maki ekima-karato ĝuiatona, ĝenai ĝena veiĝa tu asi roroĝoto, ema ĝena ura kirakauna ĝenai ebarego-lelevaĝini, ma eĝitaiani asi ilaila bevevaĝa-gwaĝiĝini nai tu, tauri ruarua beĝene veĝaraĝo ĝena ura lorinai. Mo tu vei-rakava asi beveini.

³⁷ Senaĝi bema tarima ta nuĝana evaĝa-gwaĝiĝiani, ma dagara ta na nuĝana asi maki evaĝa-ĝariĝariani, e tauĝena tauĝanina ĝena ura etuĝamaĝi-fitoĝaiani, e tauĝena nuĝanai ekirato kirakauna, asi kota maki ekimato ĝuiatona, tu asi beĝaraĝoani, tarimana maki namo. Ĝia na maki veiĝa namona beveiani.

³⁸ Moĝesina naima tarima ta na kirakauna, asi kota maki ekima-karato ĝuiatona, beĝaraĝoani tu, veiĝa namona beveiani; senaĝi kirakauna asi beĝaraĝoani tarimana na tu, veiĝa namo lelevaĝina beveiani.

³⁹ Veĝaraĝo vavinena ĝaraĝona roĝo maĝuri etanuni nai, ĝia tu veĝaraĝo taravatuna na eĝabiani, be ĝaraĝona ĝesi moĝo beĝene tanu-vanaĝi vanaĝi. Ĝia tu ĝaraĝona bemaseni, monai vauro ĝia befakani. Be ĝia beurani, tau ta ĝesi ma ĝeveĝaraĝo betoni nai, beĝene veĝaraĝo asi taravatuna. Senaĝi Vereĝauka evaĝa-moĝoniani tauna moĝo bene ĝaraĝoa.

⁴⁰ Senaĝi au ĝegu tuĝamaĝi ai aĝitaiani, ĝia moĝesi gora moĝo betanuni asi ĝaraĝona nai tu beiaku-lelevaĝini. Ema au aribani, au na maki Barau Iaukana aĝabiato.

8

Kwaivakuku ġevarevare-vinirini bureġari bitana ġaniri ba asiġina?

¹ Mai tu kwaivakuku ġevarevare-vinirini bureġari guruġari ma aveini. Ġomi kotari ġokirani, “Ġita mabarara tu ma ġera riba.” Oba, mai tu moġoni. Senaġi ġita ġera riba na tu vekokoroku evaġa-ġoraiani, a veuravini na tu tarimarima evaġa-kokoreani.

² Bema tarima ta etuġamaġini, ġia na dagara ta eribaiato, mai tarima na kara bere ribaia dagarana korikorina tu roġosi roġo bere ribaia.

³ Senaġi Barau eura-viniani tarimana tu, Barau ma ribana ġia.

⁴ Moġa lorinai kwaivakuku ġevarevare-vinirini bureġari ġeri ai, au ġegu guruġa tu maiġa: Ġita ribara, mai tanobara nuġanai kwaivakuku tu asi dagara ta e asi aniri. Ema Barau tu sebona kwariġutu moġo, ma ta tu asiġina maia.

⁵ Aba, mai ġekira-baraurini dagarari ġetanuni gubai o mai tanobarai, korana initoma maiġeri barau e vere tu asisebo,

⁶ senaġi ġita ġerai tu, Tamara Barau tu sebona kwariġutu moġo, dagara mabarari tu ġia na evaġa-ġorarito, ema ġita maki ġia ġena tatanuni. Ema Vereġauka Iesu Keriso maki sebona kwariġutu moġo, ġia ġenana dagara mabarari ġeġorato, ema ġita maki ġia na maġuri evinirani nai, tamaġuri-tanuni.

⁷ Senaġi tarimarima mabarari maiġa tu asi ġeribaiani. Korana tarima kotari tu kwaivakuku ġemarana-iaġirito, be maitoma maki bureġa ġeġanirini nai, ġia tu roġo ġetuġa-maġini, mo bureġa tu kwaivakuku ġevarevare-vinirito bureġari. Moġa lorinai moġesi bureġari ġeġanirini nai, ġenuġa-vekwaraġini, ġetuġamaġini, veiġa rakavana ġeveiani.

⁸ Ġita dia ġaniġani na Barau sevina ġana beġabi-kavirani. Bema asi bita ġaniani nai tu, Barau ġoiranai rakava kwaikwai tarimara? Asiġina! O bema bita ġaniani nai tu, Barau ġoiranai tarimarima namora? Asiġina!

⁹ Senaġi boġono ġita-ġinikaua, mo veiġa ġomi na maki boġo veiani riba, maninana ġeri veġabidadama moiramaira tarimari boġo vaġa-vedaġa-raġerini.

¹⁰ Korana bema nuġa moira tarimana na ġoi ma ġemu riba mai gabu ai beġitamuni, kwaivakuku rubunai oġaniġanini nai, ġia tu bolaunaġiani noġa, be beiaġoni, kwaivakuku ġevarevare-vinirito bureġari bea ġanirini.

¹¹ Benamo mo veġabidadama moiramaira tarimana, mo tu ġoi tarikakamu veġabidadama nuġanai, ema Keriso tu ġia maki uranai emaseto, senaġi ġoi ġemu riba dainai mo tarima tu berekwa-rekwani.

¹² Moġesina naima, mai maġuri ai tarikakamu bovei-rakava viniani, benamo ġia nuġa moira moġa bovaġa-rakavaiani nai, ġoi tu Keriso bovei-rakava viniani.

¹³ Moġa lorinai, bema au na kwaivakuku ġevarevare-vinirini bureġana ta baġaniani nuġanai, au tarikakagu ta rakava beveini tu, au bureġa asi ma baġani-ġenoġoini. Moġesi aveini anina tu, tarikakagu ta bavaġa-vedaġa-raġeani, benamo rakava beveini ġesi.

9

Apostolo tarimari ġeri ġauvei voina ema ġeri maoro

¹ Au tu fakai atanuni tarimagu, dagara ta na asi ebarubaruguni. Au tu apostolo, ema ġita ġera Vereġauka Iesu maki aġitaiato. Ġomi tu au ġegu ġauvei Vereġauka nuġanai ġwaġwari.

² Bema tarima boruri ġoirari ai au tu dia apostolo tarimagu, moġa tu asi kara ta, korana ġomi ma ribami, au tu apostolo. Ema ġomi mani ġemi tu vetoġa ta, au ġegu apostolo ġauveina vaġa-moġonina ġana, korana Vereġauka ġoġabi-raġeato nai.

³ Au ġeriba-korikorigu ġetoni, ġedanaġiguni nai, au na tu maiġesi avaġa-veserini:

⁴ Ba ġai apostolo tu asi ġema maoro, ġama ġaniġani e niuniu dagarari baġa doġarini, ei?

⁵ Ba ġai apostolo tu asi ġema maoro, ekalesia vavineri baġa ġaraġorini, benamo baġa ġori-rakao rakaorini ġema iaġoiāġo ai, apostolo kotari, e Vereġauka tarina merori, e Kefas, (mai tu Petero), ġeveini kavana, ei?

⁶ Ba mai tu au ema Banabas moġo tauma ruarua tauġema ġema ġauvei ġenana ġema-ġama baġana ġoitaġo?

⁷ Kamara vetari tarimana tu tauġena ġena kokore ai eveġubuto-ġoi vetari ġauveina eveiato-ġoi nuġanai tu, ei? Ma deikara na vine tavoġana tu eveiato moġo, ma vine ġeġwato nai tu, ġwaġwari asi eġanirito, ei? Ma dei tu mamoe serina enarito moġo, a ġia ġerina lata tu asi eġabito, eniuto, ei?

⁸ Ġomi ġotuġamaġini, mai tu tarimarima moġo ġeri tuġamaġi guruġari akiraġirini, a Barau ġena taravatu maiġesi tu asi ekirani ġotoni, ei?

⁹ Mose ġena taravatu nuġanai tu iniġesi ekirani, “Boromakau muruna dagara ta na asi bono kou-ġaua, widi momori nekokiri uranai efanafanataririni neganai.” Ġomi ġotuġamaġini, Barau na boromakau tu etuġamaġi-baregorini naima moġesi eguruġato? Asiġina!

¹⁰ Barau na mai tu ġita etuġamaġirato nai maiġesi eguruġato. Moġoni, Barau na mai guruġa tu ġita urarai ekiraġiato. Korana Barau eurato tu, tano efokaiani tarimana e widi tauri ekwari-vaġirini tarimana, tauri ruarua ġeġauvei-iaġiani dagarana ġenana eiaġomani ġaniġanina ġia maki beġene ġani.

¹¹ Ġomi fakami ai iauka dagarari namori ġavaroto. Ma ġomi ġemina, ġai tauġanima vaġa-kavari ġana, farefare tu asi veġata baġana ġabi, ei?

¹² Bema ġomi na apostolo kotari ġovaġa-kavarini tauġanina vaġa-kavari farefareri e moniri ai, au atuġamaġini, ġai ma ġema maoro ġomi ġemi na farefare e moni barego lelevaġi baġara doġari.

Senāġi ġai mo maoro moġa tu asi ġaġauvei-iaġiato. A ġai tu ġavito-maseto e ġananu-maseto moġo, korana asi ġaurato, Keriso varina namona bene raga-rovorovo dabarana baġana koukou-ġaua.

¹³ Ġomi asi ribami, Rubu Veāġai veāġa dagarari ġeġauvei-iaġirini tarimari tu Rubu Veāġa na ġari ġaniġani ġeġabirini? Ema fata veāġanai ġeġauveini tarimari tu, fata veāġanai varevare dagarari ġeġauvei-iaġirini kwari ġari ġeġabirini.

¹⁴ Moġa ilailanai, Vereġauka na taravatu etoreato, ekirato, deikara Vari Namona beġe ġobata-iaġiani tarimari tu, Vari Namona ġevari-fiuanai voina beġene ġabia veġata.

¹⁵ Senāġi au Vereġauka na mai maoro eviniguto, maiġa tu asi aġauvei-iaġiani. Ema au na maiġeri guruġa atore-vinimini tu akirani, maiġeri veiġa au ġegu ai boġono veiri atoni? Asiġina! Initoma maki au tu maiġesi moġo bana tanu mo bana mase tu namo vedaurea, ġegu ġauvei voina ġomi ġemi ai asiġina ġinavaġi bana vetau. Maiġesi atanuni tu aiakuni e avekokorokuni, ma asi aurani au ġegu vekokoroku tu guruġa koriri moġo benesi.

¹⁶ A Vari Namona baġobata-iaġiani nai, au tu asi havekokorokuni, korana Vereġauka ekirato, bana vari-fiua veġata etato. Bema Vari Namona asi bavari-fiuidi nai, au tu vetuġagu kekei, asi ġegu namo ta moġo.

¹⁷ Bema au nuġagu siga moġo baurani, mai ġauvei naveia veġata batoni nai tu, ma voigu. Senaġi bema dia au ġegu urai aveiani, moġa anina tu, Barau na eviniguto ġauveina, naima aġauvei-iaġiani.

¹⁸ Be, moġesina nai, au voigu tu kara baġabiani? Maiġa moġo: Mo tu Vari Namona avari-fiuidi nai tu, bavarifiu-kavaiani asi voina. Au tu ma ġegu maoro ġegu-ġagu bana ġabia, senaġi ġegu maoro tu asi aġauvei-iaġiani.

Paulo tu tarimarima mabarari ġeri vetuġunaġi tarimanai eiaġoto

¹⁹ Aba, au fakai atanuni tarimagu, dia tarima ta ġena tuġu-rakaorakao tarimagu, senaġi au tauġegu moġo tarima mabarari ġeri vetuġunaġi tarimagu ai avevaġa-iaġoto. Korana mai maġuri ai tu tarima ġutuma baġabi-iaġomarini Keriso ġenai.

²⁰ Iuda tarimari ġesi ġatanuni tu, Iuda tarimagu ai aiaġoni, korana Iuda tarimari bana ġabi-iaġori Keriso ġenai uranai. Au tauġegu tu dia Mose ġena taravatu gaburenai atanuni, senaġi taravatu gaburenai ġetanuni tarimari ġesi ġatanuni tu, au maki taravatu gaburenai atanuni, korana taravatu gaburenai ġetanuni tarimari bana ġabi-iaġori Keriso ġenai uranai.

²¹ A asi ġeri taravatu tarimari ġesi ġatanuni tu, ġia kavana dia taravatu gaburenai atanuni. Moġa anina tu, au Barau ġena taravatu ġenana aveġitato? Asiġina! Au monai tu Keriso ġena taravatau gaburenai atanuni. Moġesi aveini korana tu, asi ġeri taravatu tarimari Keriso ġenai bana ġabi-iaġori uranai.

²² Veġabidadamai moiramaira tarimari ġesi ġatanuni tu, ġia kavana atanuni. Veġabidadamai moiramaira atanuni korana tu, veġabidadamai moiramaira tarimari Keriso ġenai bana ġori-iaġori uranai. Au tu tarimarima mabarari ġeri maġuri irauirauri atovotovorini, bena ġia ġesi ġatanu-sebona sebonani. Korana aurani, dabara irauirauri mabarari bana ġauvei-iaġiri, be moġeri na tarima kotari bana vaġa-maġuriri.

²³ Au maiġesi aveini tu, Vari Namona bene raga-rovorovo ġana. Korana aurani, Vari Namona ġena namo ġomi ġesi bana ġabi-vegogoa ġana.

Raga-iruiru ai bono kokore

²⁴ Ġomi asi ribami, raga-iruiru ai tu raga-iruiru ai beġe ruġani tarimari mabarari beġe raga-vaġa-seboni, senaġi tarima sebona na moġo kokore voina beġabiani? Ġomi maki moġesi boġono raga-gwada, be kokore voina boġono ġabia.

²⁵ Ġere nuġanai ġeraka-toġani tarimari mabarari tu tauġeri ġerovina-ginikauni tereinini ai. Ġia moġesina ġeveini tu, dia betanu-vanaġi vanaġini koronana beġene ġabia uranai. Senaġi ġita betanu-vanaġi vanaġini koronana bitana ġabia uranai taraga-iruiruni.

²⁶ Moġesi naima, au tu eraga-taġuitaġuini tarimana kavana asi aragani. Senaġi au tu voigu bana ġabia uranai araga-gwadani. Ema au vefaisi ai evefaisi-ginikauni tarimana kavana aveini, ġegu faisai iavara korinai moġo asi etubuni.

²⁷ Asiġina, au tauġanigu tu afaisiani, au ġegu tuġu-rakaorakao dagananai avaġa-iaġoani, ġena ura rakavari asi aveini. Korana asi namo, tarima kotari aġobata-vinirini, senaġi au tauġegu na voigu ġoirai asi baġabiani.

10

Isaraela ġerina bisini matakani

¹ Tarikakagu mabarami, au aurani, ġita tubura ġeri ai kara eġorato moġa asi boġono tuġarekwaia. Ġita tubura tu, Barau na magube etuġuato dabara bene kira-varari ġana, moġa gaburenai ġerakato, ema ġia tu Davara Kakakakana nuġana na ġeraka-vanaġito.

² Ġia mabarari tu magube ai ema daġaru-bara nuġanai Barau na ebatatorito, ma Mose ġena tarimarimai ġeiaġoto.

³ Ġia mabarari iauka ġaniġanina sebona ġeġaniato.

⁴ Ema mabarari iauka nanuna sebona ġeniuato. Korana ġia tu iauka forena, ġia muriri na erakato forena, ġenana nanu ġeniuto. Mo fore moġa tu Keriso.

⁵ Senaġi Barau nuġana tu asi eiakuto ġutuma ġeri ai, moġesi nai tano fakanai tauġaniri ġemase-fitari fitarito.

⁶ Maiġeri dagara ġeġorato tu, ġita matara vaġa-kaniri ġana. Be ġita na moġeri bisini ġitari, benamo ġita dagara rakavari asi bitana mata-ġaniġani iaġiri, ġia ġemata-ġaniġanito kavana.

⁷ Ema kwaivakuku asi bisini toma-rakariġo viniri, ġia kotari ġeveito kavana. Buka Veaġai ekirani kavana, “Tarimarima ġetanu-tarito, ma ġeġani-verekoto, moġa murinai tu ġevariġisito, ġeġereto e ġebarato, (mata-boraġai ġedau-toġato).”

⁸ Ema ġita maki asi bisini kima e mataboraġa-taġuitaġui, korana ġia kotari tano fakanai ġekimato e ġemata-boraġato nai tu, tarimarima mabarari 23,000 veġata ġemaseto.

⁹ Vereġauka ġita na asi bisini tovo-naġia, korana ġia kotari na ġetovonaġiato tarimari tu, mota na ġekafurito, benamo ġemaseto.

¹⁰ Asi bisini guruġa-vemuriġoi, korana ġia kotari ġeguruġa-vemuriġoito nai tu, mase aneruna na evaġi-mase maserito.

¹¹ Maiġeri veiġa ġeġorato anina tu, ġita na bisini ġitari, benamo matara beġene kani uranai, ġita maitoma tatanuni tarimara ġerai. Korana ini horai mai tanobara tu magonai varau beraġasi.

¹² Moġesi naima, bema ġomi ġotuġamaġini, ġemi veġabidadamai ġoruġa-gigitarini ġotoni nai tu, lorimi boġono vetore, boġo ketoni ġesi.

¹³ Mani veribaġani ġoġoitaġorini tu, dia veribaġani boruri. Asiġi. Mani tu tarima tata ġeri ai vanaġivanaġi eġorani dagarari. Barau tu vetuġamaġikau Barauna, be beġitamuni, asi bovaġa-darereani veribaġanina tu ġemu ai asi bevaġa-foforiani. A ġoi veribaġani boraka-ġoitaġoni nai, Barau na tu ġemu raga-maġuri dabarana ta maki betore-rosiani, korana mo veribaġani nuġanai bono ruġa-gwaġiġi ġana.

Barau e iauka rakavari asi boġono korana-iaġi sebonari

¹⁴ Moġa lorinai, tarikakagu, kwaivakuku toma-rakariġo viniri ġerina boġono veġita-moġovaġi.

¹⁵ Au na tu iaunega tarimami avaġa-guruġamini, be tauġemi na au kara akiraġirini maiġeri boġono tuġamaġi-ginikauri.

¹⁶ Anibou taġaniani neganai, vevaġa-namo kapusina taġabiani, ma Barau tavaġa-namoani, benamo taniuani. Mo tu Keriso rarana mabarara na taniu-sebonaiani, Keriso rarana ġesi ġia ema ġita tasebonani, ene? Ema beredi tatavi-kiraiani nai maki, mabarara Keriso tauġanina taġani-vegogoani, Keriso tauġanina ġesi ġia ema ġita tasebonani, ene?

¹⁷ Ĝita tu vovoka, senaĝi mabarara beredi sebonai ema tauĝani sebonai taiagōni. Tauna korikori, ĝita tu mo beredi sebona moĝo taĝani-vegogoani.

¹⁸ Isaraela tarimari situĝamaĝi-iaĝori. Ginitaĝo dagarari fata veaĝanai ĝegaburito-ĝoi, kwari ĝeganirito-ĝoi tu, mo fata veaĝana ĝesi sebonai ĝeiaĝoto-ĝoi.

¹⁹ Au na mai guruĝa akiraĝirini tauri tu kara? Au akirani, kwaivakuku ĝevarevare-vinirini dagarari tu ma aniri atoni ba? O kwaivakuku tu dagara korikorina atoni ba?

²⁰ Asiĝi. Au tu iniĝesi akirani: Barau asi ribari beseri ginitaĝo dagarari ĝevinini tu, iauka rakavari ĝevarevare-vinirini, a dia Barau ĝevarevare-viniani. Moĝesi nai au tu asi aurani, ĝomi iauka rakavari ĝesi sebonai boĝono iaĝo.

²¹ Ĝomi asiĝina ĝinavaĝi Barau ĝena kapusi e iauka rakavari ĝeri kapusi boĝo ĝabi-vegogorini, benamo Barau ĝena kapusi ai boĝo niuni ema iauka rakavari ĝeri kapusi ai maki boĝo niuni. Asiĝina. Ĝomi asiĝina ĝinavaĝi Barau ĝena teibolo boĝo ĝaniĝanini e vaĝa-sebo iauka rakavari ĝeri teibolo maki boĝo ĝaniĝanini.

²² Ĝita tu maiĝesi sivei, be Barau sivaĝa-uraia tatoni, ei? Be ĝita ĝera kokore tu Barau ĝena kokore evanaĝiato ba?

Vanaĝivanaĝi Barau bisini vaĝa-raĝea

²³ Dagara mabarari tu asi taravaturi, senaĝi dia dagara mabarari ĝerina namo bita doĝarini. Dagara mabarari tu asi taravaturi, senaĝi dia dagara mabarari ĝerina vevaĝa-kava bita doĝarini.

²⁴ Tarima ta tauĝena ĝereĝana ĝena namo moĝo asi bene vetaua, senaĝi tarima tari ĝeri namo beĝene ĝabia uranai bene ĝauvei e bene tanu.

²⁵ Bureĝa ĝeivoivoi-iaĝirini gabunai bureĝa ĝetorerini, moĝeri tu boĝono ĝaniri, mo tu asi taravaturi. Asi boĝono vedanaĝi-rakaorakao, nuĝami boĝo tore-metorini garina.

²⁶ Korana, Buka Veaĝai ekirani kavana, “Tanobara tu Barau ĝena, ema tanobara nuĝanai ĝetanuni dagarari mabarari maki Barau ĝena.”

²⁷ Bema Iesu asi evaĝa-moĝoniani tarimana na ta beĝori-iaĝomuni ĝena numai ĝaniĝani, benamo ĝoi bourani noiaĝo botoni nai, kara ĝoiramu ai etore-taririni tu bono ĝaniri moĝo. Asi bono vedanaĝi, nuĝamu botore-metoani garina.

²⁸ Senaĝi bema tarima ta na bekiramuni, bekirani, “Mai tu kwaivakuku ĝevarevare-viniato bureĝana,” betoni, moĝa vauro asi bono ĝania. Korana mo bekira-varamu tarimana uranai e nuĝana bevekwaragini garina.

²⁹ Au na nuĝa mainai akiraĝirini tu, dia ĝoi nuĝamu akiraĝiani, senaĝi mo bekira-varamuni tarimana nuĝana akiraĝiani.

Betaĝu ta ekirani: Kara dainai au, maĝuri fakanai e namonai atanuni tarimagu, tarima ta na nuĝanai au bekota-viniguni.

³⁰ Bema au na Barau atanikiu-viniani vau aĝaniĝanini, kara dainai Barau batanikiuani ĝaniĝanina aĝaniani nai tu, guruĝa rakavari ĝegu ai ekiraĝini?

³¹ Moĝesi naima, ĝoĝaniĝanini o ĝoniuniuni o kara ĝoveiani nai, dagara mabarari ai Barau boĝono vaĝa-raĝea.

³² Tarima ta asi boĝono vaĝa-vedaĝa-raĝea. Iuda tarimana o irau bese tarimana o Barau ĝena ekalesia asi boĝono vaĝa-daĝa-raĝeri, beĝe ketoni garina.

³³ Au maki avededegwani, tarimarima mabarari nuĝari navaĝa-namori ĝana. A dia au tauĝegu ĝegu namo avetauani, senaĝi tarima vovoka ĝeri namo avetaurini, Barau na bene vaĝa-maĝuriri ĝana.

11

¹ Au ġegu maġuri boġono tovtovoa, korana au Keriso ġena maġuri atovotovoani bene.

Deba kumuġauna veiġana

² Au na ġomi tu avaġa-raġemini, korana dagara mabarari ai au ġotuġamaġiguni, ema vevaġa-riba guruġari aġabirito, ġemi avaġa-riba-iaġirito, moġeri ġokorana-iaġirini.

³ Senaġi au aurani toma ġomi boġono riba, tau mabarari ġeri deba tu Keriso, ema vavine ġeri deba tu tau; ema Keriso ġena deba tu Barau.

⁴ A tau mabarari debari beġe kumu-ġaurini vauro, beġe ġauġauni o beġe perovetani nai tu, ġeri deba tauna Keriso asi beġe gubakauani.

⁵ Ema vavine mabarari debari asi kumuġau beġe ġauġauni o beġe perovetani nai tu, ġeri deba, (mo tu ġia ġaraġori), asi beġe mataurairini. Korana moġa tu noġa debari ġerarorini kavana.

⁶ Bema vavine ta debana asi ekumu-ġauani nai tu, debana ġwina beġene fakosi-vaġiri, (mata-boraġa vavineri kavana). Ma bema vavine ta ġwina fakosi-vaġina o raro-vaġina bemaikaiani nai tu, debana bene kumu-ġaua.

⁷ A tau tu debana asi bene kumu-ġaua, korana ġia tu Barau ġitaġitana kavana, ema ġia na tu Barau marevana baregona evaġa-foforiani. A vavine tu tau marevana.

⁸ Korana dia tau o Adamu tu vavine ġenana eiaġomato, senaġi vavine o Eva tu tau ġenana eiaġomato.

⁹ Ema Barau na tau eveiato tu dia vavine ġena, senaġi vavine ġia tu tau ġena eveiato.

¹⁰ Moġesi naima vavine na debari beġene kumu-ġauri, korana mo vetoġa na ġia bevaġa-foforiani, ġia tu ma ġeri maoro Barau ġena ġauvei beġe veiani, ema aneru na beġene ġita-vetoġari ġana.

¹¹ Senaġi Vereġauka ġena maġuri dabaranai tau tu dia ġereġari moġo ġetanuni, ma vavine maki dia ġereġari moġo ġetanuni. Asiġina. Vavine tu tau ġesi beġe sebonani, ma tau tu vavine ġesi beġe sebonani.

¹² Korana tu vavine tau ġenana eiaġomato kavana, tau maki vavine ġerina ġeġorani. Senaġi dagara mabarari tu Barau ġenana ġeiaġomani.

¹³ Ġomi tauġemi na ġotuġamaġi-ginikaua. Vavine ta debana asi kumuġauna neganai, Barau ġenai beġuriġurini tu namo ba?

¹⁴ Mai tanobara mabarana nuġanai tau e vavine vetoġara marevari na evaġa-foforiani, tau ta ġwina bevaġa-gara maukaiani tu maiaka veiġana beveiiani tauġena ġenai.

¹⁵ Senaġi bema vavine ġwina bevaġa-gara maukaiani nai, mo tu ġia marevana bevaġa-baregoani. Korana Barau na vavine ġwina eviniato tu debana bene kumu-ġaua ġana.

¹⁶ Bema tarima ta beurani, mai guruġa neġarea betoni nai, au tu asi ġegu guruġa ta maia. Senaġi ġegu guruġa sebna tu maiġa: Ġai ġemai ema Barau ġena ekalesia mabarabarari nuġari ai veiġa boruna ta tu asiġina maia.

Vereġauka ġena anibou

¹⁷ Mai tu veiġa tari ġomi na boġono korana-iaġiri veiġari ma nakira-varami. Senaġi au na ġomi tu asi avaġa-raġemini, ġomi ġemi raka-vegogo nuġari ai tu vevaġa-rakava tu barego ġoveiani, a namo ta tu asi ġovaġa-ġoraiani.

18 Tovotovonai tu iniġesi nakirami. Au aseġaġini, ġomi ġemi ekalesia raka-vegogori nuġari ai tu dia nuġa sebonai ġoġabini, a ġomi tu ġovevare-kirakirani, benamo tauġemi ġoveġare-veġareni. Au na mai guruġa maiġa tu kota avaġa-moġoniani.

19 Aba, ġomi vefakami ai vevare-kirakira tu bene vetore veġata, be Barau na deidei evaġa-moġonimito tarimami tu boġono fofori.

20 Ġomi ġoraka-vegogoni nai tu, dia Vereġauka ġena lavi ġaniġanina dokona o anibou ġoġani-vegogoani. Asiġina.

21 Ġomi ġoġaniġanini nai, dei eguineni, dei egabini ġotoni, ġoveraġa-veraġaiani, a karomi asi ġovaġa-nogarini. Ta tu vito etanuni, ma ta tu eniubabobaboni.

22 Ġomi tu asi ġemi numa, be ġemi numai asi boġo ġanini e boġo niuni ġotoni, ei? Ma Barau ġena rubu tu dagara misina ġotoni, ġoġita-ġuiraiġiani, ema asi ġeri-ġari tarimari ġovaġa-maiakarini, ei? Au ġomi ġemi ai tu kara nakiraġia, navaġa-raġemi ba? Asiġina ġinavaġi, au na ġomi tu asi bavaġa-raġemini.

23 Ġomi mai avinimini guruġana maiġa tu Vereġauka ġenana aġabiato guruġana: Iesu Vereġauka ġerevaiato boġinai beredi eġabi-vaisiato,

24 benamo Barau evaġa-namoato murinai, etavi-kiraiato, benamo ekirato, “Ġoġabia, ġoġania, mai tu au tauġanigu, ġomi urami ai ginitaġo dagaranai eiaġoto. Mai veġa boġono veia-ġoi, au tuġamaġi-iaġigu ġana.”

25 Mo lavi ġaniġanina o anibou murinai, Iesu na beredi eveiato ilailanai kapusi ma eġabi-vaisiato, benamo ekirato, “Mai kapusi tu Barau ġena Ginitaġo Variġuna, au raragu na bevaġa-moġoniani. Mai kapusi ai boġo niuani nai, au tuġamaġi-iaġigu ġana boġono niu.”

26 Korana mai beredi boġo ġaniani e mai kapusi ai vine nanuna boġo niuani nai tu, vanaġivanaġi Vereġauka ġena mase boġo vari-fiuani mo, ġia ma beġenoġoini.

27 Moġesina naima deikara na Vereġauka asi begubakauani vau, mai beredi beġaniani e Vereġauka ġena kapusi ai beniuni nai, mo tarima na Vereġauka tauġanina ema Vereġauka rarana ġenai vei-rakava beveini.

28 Tarima ta ġia nuġana bene ragaġi-guinea vauro, mo beredi bene ġania, ema mo kapusi vine nanuna bene niua.

29 Korana deikara na Vereġauka asi begubakauani vau beġanini ema beniuni nai, mo beredi beġaniani e mo kapusi ai vine nanuna beniuni nuġanai tu, ġia tauġena moġo bevekota-vinini e rakava metona ġenai betorekauani. Korana ġia na Iesu tauġanina tu asi etuġamaġi-doġariani.

30 Moġesi naima ġomi fakami ai ġutuma tu tauġanimi ġemoirani e ġokeveni, kotari maki varau ġemaseto.

31 A bema ġita tauġera nuġara bita vetau-guinerini nai tu, Barau na ġita asi bekota-vinirani.

32 Senaġi Vereġauka na ġita ġera kerere bekiraġirini nai tu, ġia na bevaġa-matakanirani. Vereġauka ġita moġesina beveirani tarimara tu, tanobara maġurinai ġetanuni tarimari ġesi asi bene vaġa-rakava sebonara ġana.

33 Moġesi naima, tarikakagu, anibou uranai boġo raka-vegogoni nai, asi boġono veġari-veġari, karomi tari maki boġono vaġa-nogari.

34 Bema ta bevitoani nai tu, ġena numai bene ġaniġani. Asi namo ġemi raka-vegogo na tu ġomi kota-vinimi dabarana maki bevaġa-ġoraiiani. Guruġa kotari tu roġo bana iaġosi vauro, ma bana kira-varami.

12

Iauka Veāga ġena varevare

¹ Tarikakagu mabarami, toma tu aurani, Iauka Veāga na ġomi tata evinimini varevareri nakira-varami. Korana au aurani maġeri varevare ġomi na boġono ribari.

² Ġomi ma ribami, Barau roġosi roġo boġoro ribaia neganai, dagara kotari na asi ġeguruġani babauri ġeri ai ġeġori-iaġomito-ġoi e ġeġori-taġuitaġuimito-ġoi.

³ Moġesi naima avaġa-ribamini, Barau Iaukana na eġori-kauani tarimana tu asi bekirani, “Iesu iatanai rakava barana bene tanu.” Ema tarima ta maki maġesi asi bekira-kavani, “Iesu tu Vereġauka,” senaġi Iauka Veāga na beboroġiani tarimana tu moġa.

⁴ Iauka ġena varevare tu irauirauri, senaġi Iauka sebona moġo ġenana ġeiaġomani.

⁵ Vetuġunaġi-iaġovini dabarari tu irauirau, senaġi Vereġauka tu sebona moġo ġenana ġeiaġomani.

⁶ Ġauvei veiveiri seġukari maki irauirau, senaġi Barau tu sebona na moġo ġena tarimarima mabarari nuġari ai evaġa-ġorarini.

⁷ Iauka Veāga tu tarima tata ġeri ai efoforini, korana ekalesia mabarana vevaġa-kava beġene doġari uranai.

⁸ Tarima ta tu Iauka Veāga na guruġa iaunegari eviniani, ma tarima ta tu mo Iauka Veāga sebona na Barau ġena guruġa tauna korikori evaġa-ribaiani.

⁹ Ma mo Iauka Veāga sebona na tarima ta tu veġabidadama eviniani, ma mo Iauka sebona na tarima ta tu keve tarimari vaġa-namori varevarena o seġukana eviniani.

¹⁰ Ma tarima ta tu nuġa-farevaġi veġari boruri bene veiri varevarena o seġukana eviniani, ma tarima ta tu bene peroveta ġana seġuka eviniani, ma tarima ta tu Barau Iaukana o iauka rakavari boruri bene ribari varevarena o ribana eviniani, ma tarima ta tu garo irauirauri ai bene guruġa varevarena o ribana eviniani, ema tarima ta tu garo irauirauri ai beġe guruġani nai, guruġa aniri bene vaġa-vanaġiri varevarena o ribana eviniani.

¹¹ Maġeri mabarari tu Iauka Veāga sebona kwariġutu moġo ġena ġauvei. Ema mai Iauka Veāga na ġena ura ilailanai varevare tarima tata evinirini.

Tauġani tu sebona, ma legana ġutuma gorogoro

¹² Tarima tauġanina tu sebona moġo, senaġi legana tu ġutuma gorogoro; ma mo tauġani legana tu asisebo, senaġi ġia mabarari na tu tauġani sebona kwariġutu ai moġo ġeiaġoto. Keriso maki moġesina.

¹³ Ġita kotari tu Iuda tarimara e tari tu irau bese tarimara, kotari tu tuġu-rakaorakao tarimara e tari tu fakai tatanuni tarimara, senaġi ġita mabarara tu Iauka Veāga sebona na ebatisorato, benamo tauġani sebonai taiāġoto. Ema Barau na ġita mabarara ġerai Iauka Veāga sebona evinirato, ġia na bene vaġa-vonura ġana.

¹⁴ Tauġani maki dia legana sebona na moġo eveiato, senaġi lega ġutuma gorogoro na.

¹⁵ Bema kwaku bere kira, “Au tu dia ġima, be au tu dia tauġani legana ta.” Asiġina, ġia tu roġo tauġani legana ta veġata.

¹⁶ Ma seġa ma bere kira, “Au tu dia mata, be au tu dia tauġani legana ta.” Asiġina, ġia tu tauġani legana ta veġata.

¹⁷ Bema tauḡani mabarana tu bere mata moḡo nai tu, kamasi vau bere seḡaḡi. Ma bema tauḡani mabarana bere seḡa moḡo nai, dagara bonari tu kamasi vau bere noḡori.

¹⁸ Senaḡi Barau na lega tata tauḡani ai etorerito. Barau na ḡena ura gaburi tatai etorerito.

¹⁹ Bema tavi sebona moḡo tauḡani ai bere iaḡo nai tu, tauḡani mabarana tu kamasi?

²⁰ Senaḡi tauḡani moḡesina tu asiḡina. Tauḡani legana tu ḡutuma, senaḡi tauḡani tu sebona moḡo.

²¹ Moḡesi naima mata na ḡima maiḡesi asi bekiraiani, “Au na ḡoi asi aura-vinimuni,” o deba na kwaku asi bekiraiani, “Au na ḡoi asi aura-vinimuni.”

²² Ma tavi ta reke ai bita ḡitaiani tu, mo tauḡani legari tari taḡitarini asi kokoreri tatoni, senaḡi bema moḡeri lega asiḡina nai tu, tauḡani asi bere ḡauvei-ginikau.

²³ Ema tauḡani legari tari tatuḡamaḡi-keirini, takirani, moḡeri lega gubakauri tu kei tatoni, senaḡi moḡeri ḡeri ai ḡita ḡera vegubakau tu barego tatoreani. Ma tauḡani legari kotari ḡitaḡitari tu asi marevari, senaḡi moḡeri ḡita na tu nuḡara mabarari ḡesi tanari-ginikaurini.

²⁴ Ma tauḡani legari kotari ma marevari dagarari tu asi tatuḡamaḡi-baregorini. Senaḡi Barau na tu tauḡani legari irauirauri mabarari etore-sebonarito, benamo ḡia na asi ḡegubakaurini legari tu vegubakau barego iatari ai etore-kauato.

²⁵ Barau na moḡesi eveiato korana tauḡani legari kotari moḡo asi bisini vaḡa-namori ḡana. Senaḡi tauḡani legari mabarari bisini ḡitaḡau-ilailari ḡana.

²⁶ Bema lega sebona ta bemidigu-midiguni nai, lega mabarari ḡia ḡesi beḡe midigumidigu sebonani. Ema lega ta beḡe matauraiani nai tu, lega mabarari mo lega ḡesi beḡe iaku-vegogoni.

²⁷ Ḡomi tata maniḡemi tu Keriso tauḡanina legari tata ḡia tauḡanina nuḡanai. Ma ḡomi mabarami tu Keriso tauḡanina sebonai ḡoiaḡoto.

²⁸ Benamo ekalesia nuḡanai Barau na mabarari ḡeri ḡauvei tata evinirito. Eto-re-guinerito tarimari tu apostolo tarimari, ḡia muriri ai vaḡa-ruaruana tu peroveta tarimari etorerito, ma ḡia muriri ai vaḡa-toitoina tu vevaḡa-riba tarimari etorerito. Ma muriri ai tu nuḡa-farevaḡi veiḡari beḡene vei tarimari, ma muriri ai tu keve tarimari beḡene vaḡa-namori varevarena o seḡukana ḡeḡabiato tarimari, e beḡene vevaḡa-kava tarimari, e ḡauvei tari beḡene ḡori-kauri tarimari, ema garo irauirau ai beḡene guruḡa tarimari.

²⁹ Tarimarima mabarari tu apostolo tarimari moḡo ba? Tarimarima mabarari tu peroveta tarimari moḡo ba? Tarimarima mabarari tu vevaḡa-riba tarimari moḡo ba? Tarimarima mabarari tu nuḡa-farevaḡi veiḡari ḡeveirini tarimari moḡo ba?

³⁰ Tarimarima mabarari keve tarimari ḡevaḡa-namorini varevarena o seḡukana ḡeḡabiato tarimari ba? Tarimarima mabarari garo irauirau ai ḡeguruḡani ba? Tarimarima mabarari garo irauirau ai ḡeguruḡani guruḡari tauri ḡekiraḡi-foforirini tarimari ba?

³¹ Varevare baregona korikori boḡono ura-dikadika-iaḡia.

Veuravini

Maitoma dabara namo vedaureana au na ḡomi ḡemi avaḡa-foforiani.

13

¹ Bema au tarimarima ġeri garo irauirauri ai bara guruġa ema aneru garori ai maki bara guruġa, senaġi au asi ġegu veuravini, au ġegu guruġa tu auri ġekwariani o funu ruarua ġevaġa-vesekerini gururi ġeraġeni kavana.

² Bema peroveta varevarena o seġukana ġegu ai bere tanu, ema riba mabarari e vekuretoġa dagarari mabarari bara ribari. Ema ġegu veġabidadama barego bere tanu, be ġoro baregori maki bara vaġa-veraġa-raġeri, ma gabu boruri ai ma beġerea ruġa. Senaġi au asi ġegu veuravini nai, au tu asi ġegu namo ta.

³ Ema ġegu farefare mabarari asi ġeri-ġari tarimari bara viniri, e tauġanigu tarimarima ġimari ai bara tore-kaua, benamo beġere gabua, senaġi au asi ġegu veuravini nai, au na dagara namona ta asi bara doġaria.

⁴ Ma ġena veuravini tarimana tu evevaġa-gwaġiġini. Veuravini tu vevetuġaġwa e vevaġa-kava na evonuto. Veuravini nuġanai mama asi etanuni. Veuravini nuġanai veiavi e vekiraġi-varaġevaraġe asi etanuni.

⁵ Veuravini na tarimarima vaġa-rakavari veiġari asi eveirini, tauġena ġena namo moġo asi evetauani, asi ebaru-ġariġarini, ta ġena rakava asi etuġamaġi-taġorini.

⁶ Vei-rakava asi eiaku-iaġirini, senaġi Barau ġena guruġa ema maġuri moġoniri moġo eiaku-iaġirini.

⁷ Veuravini tu ma manauna ġesi dagara mabarari nuġari ai eruġa-tarini, dagara mabarari nuġari ai Barau tu bevaġa-moġoniani, ema ġena vetuġamaġikau maki Barau ġenai roġo betoreani, meto mabarari ai bekokoreni.

⁸ Veuravini tu asi veġata ekorini, beruġa-taġo vanaġi-vanaġini. Peroveta guruġari mabarari neġi beġea korini, garo irauirau mabarari maki beġea magoni, riba mabarari beġea korini.

⁹ Korana ġita ġera riba tu koturi moġo e ġera peroveta maki koturi koturi moġo.

¹⁰ Senaġi mo dagara namo vedaureana beiaġomani nai, mo kotuna moġo namo taribarito dagarari tu beġe rekwa-rekwani.

¹¹ Au roġo mero misigu ai tu, mero misiri ġeri guruġa na aiaġoto-ġoi, mero misiri ġeri tuġamaġi na aiaġoto-ġoi, ema mero misiri ġeri tuġamaġi na atuġamaġito-ġoi. Senaġi au ama tau-doġadoġato nai tu, mero misimisiri ġeri tuġamaġi mabarari atore-veġitarito.

¹² Toma Barau ġena dagara tu veġia ai noġa taġita-vaguna vagunarini. A Barau ġoirana ema ġita ġoirara bita veġita-veġita karakarani, monai vauro Barau ġena dagara vetoġari korikoriri bita ġita-ginikaurini. Toma au na tu koturi moġo aribarini. Senaġi mo ġaro ai vau bariba-ginikaurini, au Barau na eriba-ginikauguto kavana.

¹³ Mai dagara toitoi tu beġe tanu-vanaġi vanaġini: Veġabidadama, vetuġamaġikau, ema veuravini. Senaġi mai dagara toitoi vekaravari ai tu veuravini moġo barego lelevaġi.

14

Iauka Veaġa ġena varevare dagarari tari ġauvei-iaġiri

¹ Veuravini maġurina boġono vetau-guinea! Ema Iauka Veaġa ġena varevare boġono uravini barego-iaġiri; a Iauka Veaġa ġena peroveta varevarena o seġukana tu boġono uravini barego-lelevaġia.

² Korana garo boruri ai eguruġani tarimana tu dia tarimarima evaġa-guruġaiani, senaġi ġia tu Barau moġo evaġa-guruġaiani. Moġoni, tarimarima

na ġia kara bekiraġiani tu asi beġe tuġamaġi-doġariani, korana ġia tu Barau Iaukana na vekuretoġa dagarari ekiraġirini.

³ A eperovetani tarimana tu tarimarima evaġa-guruġarini. Ma ġia ġena peroveta guruġari na tu tarimarima evaġa-kokorerini, elaunaġirini, ema tarimarima nuġari evaġa-gwaġiġirini.

⁴ Garo boruri ai eguruġani tarimana tu tauġena ġena veġabidadama moġo evaġa-tubuani, a eperovetani tarimana na tu ekalesia mabarari ġeri veġabidadama evaġa-kokorerini.

⁵ Au ġegu ura tu ġomi mabarami garo boruri ai boġono guruġa. Senaġi au aura-baregoni ġomi tu Barau ġenana ġeiaġomani guruġari boġono peroveta-iaġiri. Korana Barau ġenana ġeiaġomani guruġari eperoveta-iaġirini tarimana na garo irauri ai eguruġani tarimana evanaġiani; senaġi garo irauri ai beguruġani tarimana beguruġani guruġari ma beġe vaġa-vanaġirini e beġe kiraġi-fakarini tu lorinai. Korana beġe vaġa-vanaġirini e beġe kiraġi-foforirini nai tu, ekalesia ġeri veġabidadamai kokore beġe ġabini.

⁶ Tarikakagu mabarami, bema au baiaġosini ġomi ġemi ai ġaronai tu, garo boruri ai basi vaġa-guruġamini, senaġi guruġa tauri tu asi bakiraġi-foforirini; monana au ġeguna namo ta boġo ġabiani ba? Asiġina! Moġoni, Barau na au evaġa-ribaguni guruġari ġomi ġemi ai bakiraġi-foforirini o riba bavanimini, o baperovetani, o Barau ġena guruġa ġemi ai havevaġa-riba iaġiani, monai vauro au ġeguna namo boġo ġoitaġoni.

⁷ Miusiki vaġa-ġereri dagarari boġono tuġamaġiri, ilailana ivirikou o hap (gita kavana). Bema gururi asi beġe raġe-ġinikauni nai tu, kamasi tarima na kamara mari ġeġere-iaġiani bita seġaġi-leaiani? Ġia tu mo ivirikou o hap gururi beġe raġe-ġinikauni vauro, kamara mari ġeġere-iaġiani bita ribaiani.

⁸ Ema bema vetari kibina asi beġe fururu-ġinikauni nai tu, ta na tuari uranai asi berovina-toreni.

⁹ Ġomi maki moġesina kavana, bema garo boruri ai boġo guruġani nai, tarimarima tu kamara dabarai ġomi na kara ġokiraġiani beġe tuġamaġi-doġariani? Ġomi ġemi guruġa mo tu tano korinai boġo kiraġirini noġa iavara boġo vaġa-guruġaiani.

¹⁰ Mai tanobarai garo irauri tu asisebo, ma ġia mabarari ma tauri moġo.

¹¹ Senaġi bema garo ta anina asi ribagu, moġa tauna tu, au tu dia mo garo borunai eguruġani tarimana ġena vanuġa tarimagu, ema ġia maki moġesina, ġia tu dia au ġegu vanuġa tarimana.

¹² Ġomi ġemi ai maki moġesina. Ġomi tu Iauka Veaġa ġena varevare ġouravini-barego iaġirini; ma toma tu ekalesia ġeri veġabidadama vaġa-kokorena varevarena ġabiġabina uranai boġono kokore, be mo varevare ai tu boġono tubu.

¹³ Moġesi naima, garo boruri ai eguruġani tarimana tu, ġauġau ai Barau bene noġia, be kara bekiraġirini guruġari maki bene vaġa-vanaġiri e bene kiraġi-foforiri.

¹⁴ Korana bema au garo boruri ai aguruġani tu, au iaukagu moġo eġuriġurini, a au ġegu tuġamaġi ai tu asi atuġamaġi-doġarini au tu kara akiraġirini.

¹⁵ Be kara toma aveiani? Au tu iaukagu ġenana bana ġauġau, ema batuġamaġi-fakaiani garonai maki bana ġuriġuri. Au iaukagu ġenana bana mari, ema batuġamaġi-fakaiani garonai maki bana mari.

¹⁶ Bema ġoi iaukamu na Barau mari ai ovaġa-raġeani nai tu, kamara dabarai mo garo asi ribana tarimana “Amen” betoni, ġoi Barau ovaġa-

namoani nuḡanai, ei? Ġia tu “Amen” asi bekiraḡiani, korana ḡia asi beribani ḡoi kara okiraḡiani.

¹⁷ Moḡoni, ḡoi na Barau tu otanikiu-ginikauani, senaḡi mo sevimu tarimari ḡeri veḡabidadama tu asi ovaḡa-kokorerini.

¹⁸ Au na Barau atanikiuani, korana au garo boruri ai tu aguruḡa-iakuni, ḡomi mabarami avanaḡimini.

¹⁹ Senaḡi ekalesia ḡuriḡuri ḡeraka-vegogoni nai, namona tu beḡe tuḡamaḡi-fakaiani garonai guruḡa imaima moḡo bana kiraḡiri, tarimarima tari bana vaḡa-ribari. Moḡesina tu namo, a garo boruri ai guruḡa 10,000 bakiraḡirini tu asi ḡena namo ta.

²⁰ Tarikakagu mabarami, mero misimisiri ḡeri tuḡamaḡi kavana asi boḡono tuḡamaḡi. A vei-rakava ḡeri reke ai tu mero raraka-rarakari ilailari ai boḡono iaḡo. Senaḡi tuḡamaḡi-fakai tu tau-doḡadoḡa kavana boḡono vei.

²¹ Buka Veaḡa nuḡanai tu maiḡesi etoreato,

“Vereḡauka ekirani,

“Tarima garori boruri na

ema gabu boru tarimari mururi na

au na maiḡeri tarima bavaḡa-guruḡarini.

Senaḡi moḡesi maki asi veḡata beḡe seḡaḡi-viniguni.’ ”

²² Moḡesi naima garo boruri ai ḡeguruḡani tu, Iesu asi ḡevaḡa-moḡoniani tarimari moḡo ḡeri ai tu vetoḡa ta, a dia Iesu ḡevaḡa-moḡoniani tarimari ḡeri vetoḡa. Senaḡi Barau ḡena guruḡa ḡeperoveta-iaḡirini tu, Iesu ḡevaḡa-moḡoniani tarimari moḡo ḡeri, a dia Iesu asi ḡevaḡa-moḡoniani tarimari ḡeri. (Mai tu, garo boruri ai ḡeguruḡani tu, Iesu asi ḡevaḡa-moḡoniani tarimari na vevaḡa-kava ta asi beḡe ḡoitaḡoani. Senaḡi Barau ḡena guruḡa ḡeperoveta-iaḡirini tu, Iesu asi ḡevaḡa-moḡoniani tarimari na vevaḡa-kava beḡe ḡoitaḡoani).

²³ Bema ekalesia mabarami gabu sebonai ḡoraka-vegogoni, benamo mabarabarami garo boruri boḡo guruḡani, ma nuḡanai tu ḡomi fakami ai asi ribana tarimana ta o Iesu asi evaḡa-moḡoniani tarimana ta bema raka-toḡani nai, bekirani, “Ġomi tu debami beḡe rakava, boḡo babo!” betoni.

²⁴ Senaḡi bema mabarami boḡo perovetani nuḡanai, ḡomi fakami ai Keriso asi evaḡa-moḡoniani tarimana ta o asi etuḡamaḡi-fakani tarimana ta bema raka-toḡani nai tu, ḡomi mabarami na Barau ḡena guruḡa ḡoperoveta-iaḡiani guruḡari na mai tarima loruna begwanuani, benamo beribani, ḡia tu vei-rakava tarimana, ema mabarami na boḡo ḡita-viriḡiani.

²⁵ Mo tarima ḡena tuḡamaḡi vekuretoḡari mabarari boḡo kiraḡi-foforirini, benamo bevetui-tarini, Barau betoma-rakariḡo viniani, bekirani, “Moḡoni, Barau tu ḡomi ḡesi etanuni.”

Toma-rakariḡo veiḡari roroḡotori

²⁶ Moḡesina naima, tarikakagu, ḡuriḡuri boḡo raka-vegogoni nai, ḡomi mabarami tata ma ḡemi ḡauvei. Tari tu mari beḡe ḡabini, tari tu beḡe vevaḡa-ribani, tari tu garo boruri ai beḡe guruḡani, tari tu Barau ḡena guruḡa beḡe vaḡa-foforirini tarimari, tari garo boruri ai beḡe guruḡani guruḡari beḡe vaḡa-vanaḡirini e beḡe kiraḡi-foforirini. Dagara mabarari tu ekalesia ḡeri veḡabidadama vaḡa-tubuna ḡana moḡo boḡono veiri.

²⁷ Bema tarima ta garo boruri ai eguruḡani nai, tarima ruarua o toitoi ma beḡene guruḡa. Namona tu tarima toitoi na beḡene guruḡa-karua, senaḡi tauri toitoi vaḡa-sebo asi beḡene guruḡa. Ta bene guruḡa-ḡosi murinai

vauro ta ma bene guruḡa, ma ta maia. Benamo garo boruri ai beḡe guruḡa-ḡosini murinai tu, ekalesia ta na moḡesi guruḡa bene vaḡa-vanaḡiri, bene kiraḡi-foforiri.

²⁸ Senaḡi bema vaḡa-vanaḡi tarimana ta asiḡina nai tu, mo garo boruri ai eguruḡani tarimana tu rubu nuḡanai asi bene guruḡa. Gereḡana tauḡena vau bene guruḡa-vevini, ema Barau bene vaḡa-guruḡaia.

²⁹ Barau ḡena guruḡa ḡeperoveta-iaḡirini tarimari ruarua o toitoi beḡene peroveta, ma kotari na tu moḡeri guruḡa beḡene vetau-ginikauri.

³⁰ Bema Barau ḡena guruḡai etanu-tarini tarimana ḡenai efoforini, bene kiraḡi-foforia ḡana nai, eguruḡa-guineni tarimana ḡena guruḡa tu bene vaḡa-maḡoa.

³¹ Namona tu ḡomi sebomi sebomi boḡono peroveta, be kara ḡokiraḡiani mabarari beḡene riba ema mabarari beḡene launaḡiri.

³² Barau ḡenana peroveta guruḡari edoḡaririni tarimana tu, moḡeri guruḡa ḡena urai vau bekiraḡirini.

³³ Barau tu dia vei-veḡonu veḡonu evaḡa-ḡoraiani Barauna, senaḡi ḡia na tu maino evaḡa-ḡoraiani Barauna.

Ekalesia doḡorori mabarari ḡeveini kavana,

³⁴ ḡomi ḡemi vavine maki ekalesia vegogori ai asi beḡene guruḡa, korana ḡia tu asi ḡeri maoro ḡia beḡe guruḡani. Senaḡi ḡia tu Mose ḡena taravatu na ekiraḡiani ilailanai beḡene tanu tau gabureri ai.

³⁵ Bema dagara tari ḡeribari beḡe toni nai tu, ḡaraḡori numai vauro beḡenea danaḡiri. Korana vavine ekalesia vegogori ai beḡe guruḡani tu ma maiakana.

³⁶ ḡomi na mai guruḡa asi ḡoḡabi-raḡeani? Barau ḡena guruḡa tu ḡomi ḡemina erefoto ba? Ba Barau ḡena guruḡa na tu ḡomi moḡo ema ḡoitaḡomito, ei?

³⁷ Bema tarima ta tauḡena evetuḡamaḡini ḡia tu peroveta ema ḡia tu Iauka Veaḡa na evonuvonu-raḡeto etoni tarimana tu, ḡomi mai atorevinimini guruḡari bene ḡabi-raḡeri, bene kira, mai tu moḡoni Vereḡauka ḡena taravatu guruḡari.

³⁸ Bema tarima ta maiḡeri guruḡa betuḡamaḡi-fitoḡarini, Barau na ḡia maki betuḡamaḡi-fitoḡaiani.

³⁹ Moḡesi naima, tarikakagu, peroveta uradikadikana tu boḡono vei, ma garo boruri ai guruḡa-iaḡiri ai tu asi boḡono vekiraḡoi.

⁴⁰ Senaḡi dagara mabarari boḡono ḡauvei-iaḡi ginikauri, ema dabara korikoriri ai boḡono veiri.

15

Iesu ḡena variḡisi-ḡenoḡoi

¹ Tarikakagu mabarami, au aurani, mo Vari Namona, ḡomi ḡemi aḡobata-iaḡiato moḡa, ḡemi tuḡamaḡi ai ma navaḡa-variḡu ḡenoḡoia. Mai Vari Namona ḡomi na tu ḡoḡabi-raḡeato, ema ḡomi tu mai Vari Namonai ḡoruḡa-gwaḡiḡini.

² Bema au na mo aḡobata-vinimito guruḡana moḡa roḡo boḡo ḡabi-gwaḡiḡiani nai, ḡomi tu mo Vari Namona ḡenana Barau na bevaḡa-maḡurimini. A bema asiḡina nai tu, ḡomi na ḡovaḡa-moḡoni-kavaiato.

³ Vereḡauka ḡenana au na kara adoḡariato guruḡana tu, ḡomi ma akira-varamito. Mo guruḡa moḡa tu guruḡa giniguinena e guruḡa baregona. Mo guruḡa tu Buka Veaḡai ḡetoreato guruḡana ilailanai, ekirani: Keriso ḡita ḡera rakava bene ḡabi-vaḡiri uranai emaseto;

⁴ ma ġeguriato, ma ġaro vaġa-toitoinai mase na ma evariġisi-ġenoġoito, Buka Veaġai ġetoreato ilailanai.

⁵ Benamo Petero ġenai evevaġa-foforito, ma murinai tu ġena mero gabanana ruarua (12) ġeri ai maki.

⁶ Moġa murinai tu veġabi-dadama nuġanai tarikaka mabarari sinau imaima (500) ġevegogoto nuġanai ġeri ai efoforito; tari varau ġemaseto, a ġutuma tu roġo maġuri.

⁷ Ma murinai tu Iakobo (o Iames) ġenai efoforito, ma murinai tu apostolo mabarari ġeri ai maki.

⁸ Ma magona korikorinai tu, au, noġa moġo amaġuri-rakavato tarimagu, ġegu ai ema foforito.

⁹ Korana au tu apostolo mabarari ġeri dokona korikori tarimagu, ma au tu asi ġegu namo ta moġo, tarimarima na au apostolo tarimagu ai beġe kiraġiguni. Korana au na Barau ġena ekalesia avaġa-midigu midigurito-ġoi, e alai-lausilausirito-ġoi.

¹⁰ Senaġi Barau ġena namo e varevare-barai, au tu mai ġegu apostolo tarimagu ai ama iaġoto. Ema Barau ġena namo e varevare-bara au ġegu ai tu asi etore-kavaiato. Moġoni, au na ġauvei tu barego lelevaġi aveiato, a apostolo kotari tu asiġina. Senaġi mo tu dia au tauġegu ġegu kokore ai moġeri ġauvei aveirito. Asiġina. Mo tu Barau ġena namo e varevare-barai kokore eviniguto, benamo mo ġauvei aveirito.

¹¹ Moġesina naima au aġobatato o apostolo tari ġeġobatato, asi ġena irau ta, korana vari tu sebna moġo ġaġobata-iaġiato, ma ġomi na maki mo vari sebna, moġa moġo ġovaġa-moġoniato.

Ġita ġera variġisi-ġenoġoi

¹² Senaġi bema Keriso ġaġobata-iaġiani nai, ġakirani, Keriso tu Barau na mase na ma evaġa-variġisi ġenoġoiato ġatoni, kamasi nai ġomi fakami ai ġomi kotari tu ġokirani, mase tarimari tu asi ma beġe variġisi-ġenoġoini?

¹³ Bema mase na variġisi-ġenoġoi tu asiġi, moġa tauna tu, Keriso mase na tu asi ma evariġisi-ġenoġoito.

¹⁴ Ema bema Keriso mase na asi evariġisi-ġenoġoito, moġa anina, ġai ġema ġobata tu asi tauri, ema ġomi ġemi veġabidadama maki asi tauri.

¹⁵ Moġesi tu ġai beġere ribama, Barau na asi eveiato dagnarana ġai na tu ġakiraġi-moġoni moġoni-kavaiani, ġaġofaġofani. Korana ġai na Barau varina ġafuani, ġakirani, Barau na Keriso mase na ma evaġa-variġisi ġenoġoiato ġatoni nuġanai, Barau na Keriso mase na tu asi evaġa-variġisi ġenoġoiato. Ma guruġa moġonina tu, mase tarimari mase na tu asi ma ġevariġisi-ġenoġoini.

¹⁶ Aba, bema mase tarimari mase na asi ma ġevariġisi-ġenoġoini, moġa anina tu Barau na Keriso tu mase na asi ma evaġa-variġisi ġenoġoiato.

¹⁷ Ema bema Barau na Keriso mase na tu asi ma evaġa-variġisi ġenoġoiato, ġomi ġemi veġabidadama tu asi aniri e ġomi tu roġo rakava nuġanai ġotanuni.

¹⁸ Ema mo deikara Keriso ġevaġa-moġoniato tarimari ġemaseto tu, rakava voina beġe ġabiani.

¹⁹ Ma bema mai tamaġuri-taġoni maġurina ġena namo moġo uranai Keriso ġenai tavetuġamaġikauni nai tu, tarimarima mabarabarari vefakari ai ġita kika vetuġara tu barego lelevaġi.

²⁰ Senaġi Keriso tu moġoni mase na evariġisi-ġenoġoito, ema ġia tu ġemaseto tarimari mabarari fakari ai ġia tu evariġisi-ġenoġoi ġuineto, ilailana ġau ġwaġwari ġeġora-ġuineni kavana.

²¹ Mase tu tarima sebona, Adamu, ġenana evesinato. Moġa ilailana i variġisi-ġenoġoi maki tarima sebona, Keriso, ġenana evesinani.

²² Vaġa-ilailana, tarimarima mabara-barari tu Adamu ġenana ġeiaġomani, moġa lorinai beġe maseni veġata; senaġi Iesu Keriso ġesi beġe sebonani neganai, Barau na ma bevaġa-maġuri ġenoġoirini.

²³ Senaġi ġita mabarara tata ġera ġaro korikori loriri ai bita variġisi-ġenoġoini: Ġiniguine tu Keriso, ġia tu evariġisi-ġenoġoi guineto. Ma ġia ma beiaġomani ġaronai tu, ġia ġena tarimarima mabarari ma beġe variġisi-ġenoġoini.

²⁴ Maiġa murinai Keriso na Barau ġevetari-viniani iaukari ġeri veġitaġau e maoro ema seġuka mabarari asi ġeri kokore ai bevaġa-iaġorini e bevaġa-rakavarini, benamo Barau ġena Basileia o veġitaġau seġukana Tamana Barau ġimanai betore-kauani. Benamo tanobara dokona beiaġomani.

²⁵ Korana Keriso tu roġo bevereni, ġena veġitaġau tu betanuni roġo, beiaġoni mo, ġia ġevetari-viniani iaukari e tarimari mabarari ġia kwakuna fanafana gaburenai befana-taririni.

²⁶ Keriso na evetari-viniani dagarana ta, magona korikori ai vauro bevaġa-keto-moġovaġiani, tu mase.

²⁷ Korana Buka Veaġai tu iniġesi ekirani, “Barau na dagara mabarari ġia kwakuna gaburenai etorerito, mai tu ġena veġitaġau gaburenai etorerito.” Senaġi ekirato, “dagara mabarari ġia kwakuna gaburenai etorerito,” etato nai, Barau tu asi eiavi-kauato, korana tu Barau na dagara mabarari Keriso kwakuna gaburenai etore-toġarito.

²⁸ Dagara mabarari Keriso ġena veġitaġau gaburenai Barau na betorerini, moġa murinai tu Barau Natuna tauġena maia Barau ġena veġitaġau gaburenai bevetore-toġani. Moġo tauna tu, Barau na dagara mabarabarari bedebarini.

²⁹ Bema variġisi-ġenoġoi asiġina, mai tarima kotari ġemase-guineto tarimari urari ai babatiso ġeġabini tu kamasi beġe veini, ei? Ġia tu kara dainai ġemase-guineto tarimari urari ai babatiso ġeġabini? Betaġu ġia na variġisi-ġenoġoi ġevaġa-moġoniani nai, mo veġa ġeveiani.

³⁰ Ema ġai maki, kara dainai tu hora mabarari ai dori moġo ġevaġi-masemani senaġi roġo ġaġiġiraġeni, bema variġisi-ġenoġoi asiġina nai tu?

³¹ Tarikakagu mabarami, moġoni, ġaro vanaġivanaġi au ġegu mase ġekiraġiani. Senaġi maiġa maki moġoni, ġomi na Iesu ġoġabi-raġeato nai, ġera Vereġauka Keriso Iesu ġoiranai au tu averere-baregoni.

³² Bema au vaġa-ilailana mai tarimarima ġeri tuġamaġi babobabori noġa moġo Efeso ai boġa bairi rakavari kavana bara vaġa-vevaġiri, au tu kara dagara namona ġegu ai bere ġora? Bema variġisi-ġenoġoi asiġina nai, au tu moġesi asi bara vei, asiġina ġinavaġi. Bema Barau na mase na asi ma bevaġa-variġisi ġenoġoirani nai tu, maiġesi tara kira, “Siġaniġani ema siniuniu, korana boinani tu bita maseni bene.”

³³ Tarima ta na asi bene ġofami! “Tarima rakavari bita kakorini nai tu, ġera maġuri namori beġe rakava-kwaikwaini.”

³⁴ Ġotataġa, veġa iobukaiobukari ġoveiri, vei-rakava ġovaġa-dokoa. Korana ġomi kotari Barau tu asi ribami roġo. Mai tu ġomi beġene maiakami ġana aguruġani.

Variġisi-ġenoġoi tauġanina tu irauna

³⁵ Senaġi kotari tu beġe vedanaġini, beġe kirani, “Mase tarimari tu kamasi ma beġe variġisi-ġenoġoini? Ma beġe variġisini nai, tauġaniri tu aiġesina?”

³⁶ Babo! Ĝoi na kara tano ai ovaroani tu, asi roĝo etubuni mo, ovaroani dagarana bemaseni vau.

³⁷ Widi o dagara ta novaroa otoni nai tu, dia tauĝani oĝabiani, benamo ovaroani. Asiĝina, ĝoi na mo widi o kara novaroa otoni dagarana tu ĝutuna ĝuena oĝabiani, ma ovaroani.

³⁸ Ma Barau tauĝena na ĝena ura ilailanai mo widi o kara ĝovaroani, moĝeri tata tauĝaniri korikori evinirini.

³⁹ Tauĝani mabarari viriĝori tu irauirau. Tarimarima viriĝori irau, kwakuri vasivasi ĝemaĝurini dagarari vaĝa-ilailana bai, boromakau, mamoe, e kotari viriĝori irau, maĝani-kone viriĝori irau ema manu maki viriĝori irau.

⁴⁰ Guba dagarari tauĝaniri tu ta, ma tanobara ĝetanuni tarimari e dagarari maki irau. Guba tauĝanina marevana ta ema mai tanobara tauĝanina marevana maki ta.

⁴¹ Ĝaro marevana ta ema ĝue marevana ta, ema visiĝu marevari maki irauri. Visiĝu tata maki marevari irauirau.

⁴² Mase na variĝisi-ĝenoĝoi maki moĝesi. Beĝe guriani tauĝanina tu beboragani, a Barau na ma bevaĝa-variĝisi ĝenoĝoiani tauĝanina tu asi ma beboragana-ĝenoĝoini.

⁴³ Beĝe guriani tauĝanina tu vetoĝana asi namo, ema tarimarima na asi beĝe urani ĝitaĝitana, a Barau na ma bevaĝa-variĝisi ĝenoĝoiani tauĝanina tu ma marevana. Beĝe guriani nai tu, moiramaira asi kokorena, a Barau na mo tauĝanina ma bevaĝa-variĝisi ĝenoĝoiani nai tu, ma seĝukana.

⁴⁴ Ĝeguriani nai tu, tanobara tauĝanina, a Barau na evaĝa-variĝisi ĝenoĝoiani nai tu, iauka tauĝanina. Tanobara tauĝanina tu ta etanuni, moĝa lorinai iauka tauĝanina maki ta etanuni.

⁴⁵ Buka Veĝa nuĝanai ekirani, “Tarima guinena, Adamu, Barau na eveiato tu maĝuri tarimanai evaĝa-iaĝoato.” A Adamu magona, Keriso, tu maĝuri bevinini laukanai evaĝa-iaĝoato.

⁴⁶ Tanobara tauĝanina tu eguineto, a dia iauka tauĝanina. Tanobara tauĝanina murina na vauro, iauka tauĝanina eiaĝomato.

⁴⁷ Tarima guinena, Adamu, tu tanobara ĝenana eiaĝomato, Barau na tano kauna na eveiato, a tarima vaĝa-ruaruana tu Keriso, guba na emariĝoto tarimana.

⁴⁸ Barau na tano kauna na eveirito tarimari tauĝaniri tu Adamu tauĝanina kavana, mo tu ma tano kauna na eveiato tarimana tauĝanina kavana, ema guba tauĝanina beĝe ĝabiani tarimari maki Keriso tauĝanina kavana, mo tu guba na eiaĝomato tarimana tauĝanina kavana.

⁴⁹ Initoma ĝita tu Barau na mo tano kauna na eveiato tarimana vetoĝana kavana. A gabi vau mai guba na eiaĝomato tarimana vetoĝana ilailanai bita iaĝoni.

⁵⁰ Tarikakagu mabarami, au na kara akiraĝiani tauna tu maĝa, tarimarima, mai tanobarai ĝetanuni kavana, ma tauĝaniri, ma viriĝori, ema ma rarari tu, Barau ĝena Basileia nuĝanai asi beĝe raka-toĝani. Ema ma beboragani dagarana tu tanu-vanaĝi vanaĝi Basileiana nuĝanai asi betanuni riba.

⁵¹ Ĝoseĝaĝi, vekuretoĝa guruĝana ta akira-varamini: Ĝita mabarara tu asi bita maseni, senaĝi ĝita mabarabarara tauĝanira tu Barau na bekurevorini.

⁵² Mo tu asikauna moĝo beĝorani, noĝa matara iaĝataĝo nunaĝa ta vaĝa-kafurina mo ma taraga-keorini kavana, asi kwaibona. Kibi dokona guruna beraĝeni, benamo ĝemaseto tarimari ma beĝe variĝisi-ĝenoĝoini, benamo

tauḡani asi ma beḡe rakava-ḡenoḡoini. Ma ḡita roḡosi bitana mase tarimara maki tauḡanira beḡe vekurevoni, mo tu tauḡani variḡuri bita ḡabirini.

⁵³ Korana mai ma beborāḡani tauḡanina tu bene vekurevo, benamo asi ma beborāḡani tauḡanina bene vetore-fofori, ema mai ma bemaseni tauḡanina tu bene vekurevo, benamo asi bemaseni tauḡanina ma bene vetore-rosi.

⁵⁴ Aba, mai ma beborāḡani tauḡanina tu bene vekurevo, benamo asi ma beborāḡani tauḡanina bene vetore-rosi, ema mai ma bemaseni tauḡanina tu bene vekurevo, ma asi ma bemaseni tauḡanina ma bene vetore-rosi. Mai dabarai Buka Veāḡai evetoreto guruḡana bemoḡonini,

“Mase tu Barau ḡena kokore na varau evaḡa-darereato.

⁵⁵ Mase o, ḡoi ḡemu kokore tu aiḡea?

Mase o, ḡoi na tarimarima ogwanurini garaḡotana tu ainai?”

⁵⁶ Mase egwanurini garaḡotana tu vei-rakava ema vei-rakava ḡena seḡuka tu taravatu ḡenana eiaḡomani.

⁵⁷ Senaḡi Barau tatanikiuani, korana ḡia na ḡita ḡera Vereḡauka Iesu Keriso ḡenana kokore evinirani.

⁵⁸ Moḡa lorinai, tarikakagu, au na aura-vinimini tarimami, ḡemi veḡabidadamai boḡono ruḡa-gigitari, tarima ta o dagara ta na asi bene vei-ḡareva ḡarevami, vanaḡivanaḡi Vereḡauka ḡena ḡauvei boḡono veia ma kokoremi ḡesi. Korana boḡono riba, ḡomi ḡemi ḡauvei Vereḡauka nuḡanai tu asi ḡovei-taḡuiani, senaḡi ma voimi.

16

Ierusalemā ekalesia tarimari vaḡa-kavari ḡana moni vaḡa-vegogo

¹ Maitoma tu Ierusalemā veaḡa o ekalesia tarimari vaḡa-kavari uranai moni boḡono vaḡa-vegogo guruḡari akiraḡini. Mai guruḡa tu Galatia ekalesia mabarari akirarito, beḡene veia atato guruḡana, ḡomi akira-varamini. Au aurani tu ḡomi maki mai veiḡa boḡono veia.

² Fura ḡarona giniguinenai o Sandei vanaḡivanaḡi ḡomi tata tu ḡemi doḡari ilailari ai moni ta boḡono tore-toḡaia. Moḡeri moni tu boḡono tore-vegogo vegogori, be au baiāḡosini ḡaronai tu, moni mabarana bene rovinatore, asi ma bisini vaḡa-vegogo.

³ Ema au basi votuni nai tu, ḡomi na boḡo vaḡa-moḡonirini tarimari bavimirini, benamo Ierusalemā ḡana beḡe ḡabi-iaḡorini. Beḡe iaḡoni nai tu, au na guruḡa-fofori fefana ta maki batoreani, be beḡe ḡwa-kauani.

⁴ Bema baḡitaiani au tauḡegu baiāḡoni tu namo nai tu, au ḡesi baḡa iaḡoni.

Paulo ḡena ura Korinto ḡana bene iaḡo

⁵ Au baiāḡosini basi-ḡitamini, Makedonia tanona na nuḡana na baraka-vanaḡini nai, korana au tu Makedonia tanona nuḡana na baraka-vanaḡini bene. (Makedonia ekalesiari bana raka-ḡitari, senaḡi monai asi batanuni, baraka-vanaḡini moḡo).

⁶ A au baiāḡosini nai tu, atuḡamaḡini, ḡomi ḡesi kota roḡo bita tanuni banaḡu. Betaḡu faraka e iavara ḡueri maki maninai bita ḡabiani ḡomi ḡesi. Bere namo, ḡegu iaḡoiaḡo ai baura-vinirini dagarari tu ḡomi na boḡono vaḡa-kavagu.

⁷ Au tu asi aurani taimi misina moḡo ḡomi ḡesi bana tanu, benamo ma bana iaḡuimi maia. Au ḡegu tuḡamaḡi ai tu aurani, ḡomi ḡesi bitana tanu-mauka, senaḡi mo tu bema Barau na maoro beviniguni vauro.

⁸ A au tu Efeso ai batanuni mo Pentekoste ḡarona,

⁹ korana Barau ġena ġauvei bana veia dabarana tu varau bekeoa, be toma ġegu ġauvei tu barego lelevaġi. Senaġi tarimarima vovoka na maki ġekouguni, ġauvei asi bana veia ġetoni.

¹⁰ Bema Timoteo beiaġosini nai tu, boġono nari-ginikaua, be ġomi ġesi betanuni nai, asi bene tanu-garigari. Ġia maki au kavana Vereġauka ġena ġauvei eveiani.

¹¹ Moġa lorinai tarima ta na asi bene ġita-ġuiragġia. Senaġi boġono vaġa-kavaia e maino ai boġono tuġua, au ġegu ai ma bene ġenoġoi-iaġoma. Korana au tu tarikaka kotari ġesi ġia ġanariani.

¹² Ma tarikakara Apolos tu au na alaunaġiato, tarikakara tari ġesi be ġomi ġemi ai bene iaġosi atato. Senaġi ekirato, maitoma tu asi ilaila beiaġosini, a ġaro namona tai vauro beiaġosini.

Guruġa dokona

¹³ Tauġemi boġono venari-ginikau, ġemi veġabidadamai boġono ruġa-gwaġiġi, nuġami beġene gwaġiġi, boġono kokore.

¹⁴ Dagara mabarari boġo veirini nai tu, veuravini ai moġo boġono veiri.

¹⁵ Tarikakagu mabarami, ġomi Stefanas ġena numa tarimari mabarari tu ma ribami. Ġomi ma ribami, ġia na Iesu Keriso ġeġabi-raġeato nai tu, ta maki roġosi roġo bere ekalesia Akaia nuġanai. Ma ġia tu veaġa o ekalesia tarimari ġeri ġauvei ai ġevekiraġikauto, ġevaġa-kavarito. Moġa lorinai anoġimini,

¹⁶ ġomi maki moġesi tarimari garori boġono seġaġi-viniri, ema ġai ġesi ġeġauveini e ġevekwaraġini tarimari mabarari maki.

¹⁷ Aiakuni, korana Stefanas e Fotunato ema Akaiko au ġegu ai ġeiaġomato nai. Asi ilaila baiaġosini, ġomi ġesi bita tanuni nuġanai, mai tauri toitoi na ġomi gabumi ġeġabirito, moġesi nai au nuġagu eġena-tarito.

¹⁸ Ema ġia na au nuġagu ġevaġa-iaku ġenoġoiato, ema ġomi maki nuġami ġevaġa-iaku ġenoġoirito. Moġesi naima ġia tu boġono ġabi-raġeri.

¹⁹ Asia ruburi na ġomi ġemi vevaġa-namo ġetuġuni. Akwila e Priskila na ema ekalesia ġia ġeri numai ġetanuni mabarari na nuġari mabarari ġesi ġevaġa-namomini Vereġauka aranai.

²⁰ Tarikaka mabarari na ġevaġa-namomini. Ġomi maki karomi tata vetarikaka verauna na boġono vaġa-namori.

²¹ Au Paulo ġimagu na mai vevaġa-namo guruġari atorerini.

²² Bema tarima ta na Vereġauka asi eura-viniani tu, ġia iatanai rakava baregona bene tanu mo vanaġivanaġi. Ġera Vereġauka o, noiaġoma.

²³ Ġera Vereġauka Iesu Keriso ġena namo e varevare-bara ġomi ġemi ai bene tanu.

²⁴ Au ġegu veuravini ġomi ġesi bene tanu. Keriso Iesu ġenana ġita tu doġoro sebona tarimara.

PAULO ĜENA TORETORE VAĜA-RUARUANA KORINTO EKALESIARI ĜERI

2 Korinto vaĝa-foforina guruĝari

Mai fefa vaĝa-ruaruana tu vevaĝa-gwaĝiĝi fefana Paulo na etoreato. Paulo na mai fefa tu Makedonia na Korinto ekalesiari etore-vinirito. Mai fefa tu laĝani 55 ema 57 fakari ai etoreato, mo tu Iesu maki emaseto murinai vau.

Mai fefa nuĝanai siri baregori tu karoa 1:3-4 ema 5:18.

Paulo na mai fefa etoreato korana tari tu maiĝeri: 1) Ĝofaĝofa tarimari na ĝia ĝena apostolo ĝauveina ĝevaĝa-rakavaia ĝetato-ĝoi moĝeri guruĝari eveito. 2) Ierusalemaj Barau ĝena tarima veaĝari ĝetanuni moĝeri ĝeri moni tari beĝene tore-vegogo etato (9:1-5). 3) Mo ĝena fefa giniguinena monai mo vei-rakava tarimana ma beĝene ĝabi-raĝea e beĝene ura-vinia etato (2:5-11). Paulo na mai fefa tu maiĝesina eboioĝaiato:

1. Ma veĝabi-sebona ĝenoĝoi guruĝari - karoa 1-7

2. Ieruselema ekalesiari varevare viniri guruĝari - karoa 8-9

3. Korinto nuĝanai apostolo tarimari ĝofaĝofari na Paulo ĝena apostolo ĝauveina ĝekira-rakavaiato nai, Paulo tauĝena evekiraĝi-maĝatato guruĝari - karoa 10-13

¹ Au Paulo, Barau ĝena ura lorinai Keriso Iesu ĝena apostolo ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi ĝemana mai fefa eiaĝosini.

Ĝomi Barau ĝena ekalesia Korinto nuĝanai, ema veaĝa tarimami mabarabarami, Akaia tanona mabarana nuĝanai ĝotanuni tarimami, ĝemi atore-vinimini.

² Barau ĝita Tamara ema Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau etanikiuato

³ Barau sivaĝa-namoa, ĝia tu ĝita ĝera Vereĝauka Iesu Keriso Tamana. Ĝia tu vevetuĝaĝwa Tamana e vevaĝa-kava Barauna korikori.

⁴ Barau na ĝai ĝema midigumidigu e dabara doko nuĝari ai evaĝa-kavamani. Moĝesi naima ĝai na maki tarima kotari ĝeri meto ai baĝa vaĝa-kavarini riba, Barau na ĝai evaĝa-kavamani ilailanai.

⁵ Moĝoni, Keriso na eĝabiato midiguna ĝai ĝemai tu barego-lelevaĝi; ma ĝai ĝema vevaĝa-kava Keriso ĝenana maki barego lelevaĝi.

⁶ Ĝai baĝa midigu-midiguni tu ĝomi vevaĝa-kava ema vevaĝa-maĝuri boĝono ĝabia ĝana. Ĝai Barau na evaĝa-kavamani tu ĝomi vevaĝa-kava boĝono ĝabi ĝana. Ma mai vevaĝa-kava boĝo ĝabiani mainana ĝomi nuĝami bevaĝa-gwaĝiĝirini, benamo ĝai ĝamidigu-midiguni kavana midigumidiguri boĝo ĝabirini nai tu, boĝo kokoreni.

⁷ Ĝai ĝema vetuĝamaĝikau ĝomi ĝemi ai tu barego ĝatoreani, korana tu ĝaribani, ĝomi tu ĝai ĝesi tamidigumidigu-sebonani, ema vevaĝa-kava maki ĝai ĝesi taĝabi-sebonaiani.

⁸ Tarikaka mabarami, ĝai Asia tanonai aiĝesi meto ĝaĝoitaĝoto maki ĝaurani baĝana vaĝa-ribami. Ĝai Asia ai tu meto barego lelevaĝi ĝadoĝariato, ĝema gwada e riba mabarari maki ĝekorito, be ĝema tuĝamaĝi tu benamo, asi baĝa maĝurini, baĝa maseni.

⁹ Moĝoni, ĝai ĝema vemamiraĝi tu, ĝai beĝene vaĝi-masema dabarana tu varau ĝevaĝa-moĝoniato. Senaĝi asiĝina. Ĝai ĝemai moĝeri veĝa ĝeĝorato

tauna tu, ǵai tauǵema ǵema kokore ai asi baǵana veǵabidadama, senaǵi mase na maki evaǵa-vaisi-raǵerini Barauna ǵenai moǵo baǵana veǵabidadama.

10 Ǵia na mase nuǵari na evaǵa-maǵurimato, ma roǵo ma bevaǵa-maǵurimani. Ǵai ǵema vetuǵamaǵikau tu Barau ǵenai ǵatore-kauani, ǵoirai maki ǵia na ma bene vaǵa-maǵurima ǵana.

11 Mo tu ǵomi na maki ǵauǵau ai roǵo boǵo vaǵa-kavamani nai. Benamo Barau na tarimarima vovoka ǵemi ǵauǵau dainai, ǵai bevaǵa-kavamani. Mo vevaǵa-kava tarimarima vovoka na beǵe ǵitaiani, benamo ǵai na mo namo ǵadoǵariani bakunai, mabarari na Barau beǵe tanikiuani.

Paulo ǵena boioǵa ekefoato

12 Ǵai ǵema vekokoroku anina tu maiǵa: Ǵai nuǵamai ǵamamiraǵiani, ǵai ǵema maǵuri e veǵa mai tanobarai, o sikira, ǵema vegaragara ǵomi ǵesi tu dabara veaǵanai ema moǵoninai. Maiǵeri veǵa veaǵari ema moǵoniri tu Barau ǵena varevare-bara ǵenana ǵeiaǵomani, a dia tanobara tarimari ǵeri iauneganai ǵeveirito-ǵoi.

13 Ǵai na ǵomi fefa ǵatore-vinimini tu dia fefa gwaǵiǵiri ǵatore-vinimini. Asigina. Ǵai ǵema fefai kara ǵakiraǵirini guruǵari tu ǵomi na boǵo iavirini ema fefa tauri maki boǵo tuǵamaǵi-doǵaririni fefari moǵo.

14 Moǵoni, kotuna varau ǵotuǵamaǵi-doǵarimato. Ema atuǵa-maǵini, gabi vau boǵo tuǵamaǵi-doǵari korikorimani. Benamo Iesu Vereǵauka beǵenoǵoini ǵaronai, ǵomi na ǵai boǵo vaǵa-raǵemani, ǵai na ǵomi baǵa vaǵa-raǵemini kavana.

15 Au ariba-maoroto, ǵai boǵo riba-ginikaumani ema ǵemai boǵo tuǵamaǵikauni naima, au na boioǵa aveiato tu banasi rakaǵita-guinemi, be vaǵa-ruarua ǵomi bana vaǵa-kavami.

16 Au ǵegu boioǵa guinena tu Makedonia ǵana baiaǵoni nai, banasi rakaǵitami ema Makedonia na ma baǵenoǵoini nuǵanai maki, ma banasi rakaǵitami atato. Ma manina na vau Iudea ǵana baiaǵoni nai, au ǵegu iaǵoiaǵo ai beǵene vaǵa-kavagu farefareri tari boǵono vinigu vauro boǵono tuǵugu.

17 Ǵomi ǵotuǵa-maǵini, au tu dia nuǵagu mabarana ǵesi maiǵesi aboioǵato ei? Ba ǵomi ǵotuǵamaǵini, au tu mai tanobara maǵurinai roǵo ǵetanuni tarimari ǵeri veǵa na aiaǵoni, be murugu na tu, “Oi, oi” atato, a nuǵagu gabigabinai tu “Asigina, asi baiaǵoni,” atato.

18 Barau guruǵa moǵoninai moǵo etanuni kavana, ǵai maki moǵesina; ǵomi ǵemi ai vari ǵaǵobata-iaǵiani nai, dia murumai tu “Oi” ǵatoni, ma nuǵamai tu “Asigi” ǵatoni.

19 Korana Barau Natuna, Iesu Keriso, ǵomi fakami ai au, e Silas, ema Timoteo, na ǵaǵobata-iaǵiato-ǵoi tu dia muruma na moǵo ǵakirato-ǵoi, “Iesu varina tu Oi, moǵoni,” ma nuǵama gabigabiri na tu “Asigi, ǵofaǵofa” ǵatato-ǵoi. Asigina. Ǵia ǵena maǵuri nuǵanai tu “Oi, moǵoni” moǵo etanuni vanaǵivanaǵi.

20 Barau ǵena kiraǵitore mabarari eveirito tu “Oi moǵoni” moǵo, Keriso ǵena maǵuri nuǵanai ǵemoǵonito. Moǵesi nai ǵai na Keriso ǵenana Barau ǵavaǵa-raǵe-baregoani, ǵakirani, “Oi, mo tu moǵoni” ǵatoni.

21 Ǵomi ema ǵai tu Barau tauǵena na evaǵa-kokorerani e evaǵa-ruǵa gwaǵiǵirani Keriso ǵena maǵuri nuǵanai. Ǵia na eǵabirato, evaǵa-veaǵarato,

22 ema evaǵa-moǵonirato, ǵita tu ǵia ǵena tarimarima, ǵena vetoǵa o maka maki ǵita ǵerai etoreato, ema ǵita lorura ǵutunai ǵia Iaukana etoretogaiato, mo Iauka ǵenana ǵita evaǵa-riba ginikaurato, ǵia ǵena vevaǵa-namo mabarana maki vauro bita ǵabiani veǵata.

²³ Barau ma ribana mai kara akiraḡirini tu mabarari moḡoni, e au nuḡagu o lorugu ḡutuna maki ḡia ma ribana; au mo Korinto ḡana asi aiāḡosito tauna korikori tu maiḡa: Au asi aurato, ḡomi ḡemi vei-rakava banasi kiraḡi-fofori foforiri, benamo monana ḡomi nuḡami bana vaḡa-metori.

²⁴ Au tu dia ḡomi ḡemi vere, be ḡomi ḡemi mani veḡabidadama nuḡanai tu ḡai na kara baḡa kiraḡirini veiḡari moḡo boḡono veiri. Asiḡina. Mai tu ḡomi ema ḡai taḡauvei-sebonani, ḡomi boḡono iaku tuḡamaḡinai. Korana ḡomi mani tu tauḡemi ḡemi veḡabidadamai lorinai ḡoruḡa-gigitarini.

2

¹ Moḡesi naima nuḡagu aroriatu akirato, asi ma banasi raka-ḡitami, korana bavaḡa-guruḡa gwaḡiḡimini, benamo nuḡami beḡe metoni garina.

² Korana bema au ḡegu guruḡa na ḡomi nuḡami beḡere vaḡa-metori nai, au tu dei na ma beḡere vaḡa-iakugu? Korana au boḡoro vaḡa-iakugu tarimami tu varau nuḡami bavaḡa-metori.

³ Moḡesi naima au na mo fefa gwaḡiḡina moḡa atore-vinimito. Au asi aurato, au bana iaḡosi tu, boḡo vaḡa-iakuguni tarimami na au boḡono vaḡa-nuḡa midigumidigu, korana au ma ribagu au aiakuni gabunai tu ḡomi maki au ḡesi, be taiaku-sebonani.

⁴ Moḡoni, au nuḡagu tu ma metona ḡesi ema ḡegu vetuḡamaḡi maki ebarego-rakavato e ataḡito maki, mo fefa ḡomi ḡemi atoreato-ḡoi nai. Mo fefa gwaḡiḡina atore-vinimito tu dia ḡomi nuḡami bana vaḡa-metori ḡana. Asiḡina. Au na mo fefa moḡesina atore-vinimito anina tu, au aurato ḡomi boḡono riba, au na ḡomi tu auravini-rakavamini.

Vei-rakava tarimana ḡena rakava boḡono tuḡamaḡi-fitoḡaia

⁵ Bema ḡomi ta na nuḡa-midigumidigu evaḡa-ḡoraianni nai, au mo gabu ai tu asi ḡegu nuḡameto. Aba, gabu tari tu asi aiaku-iaḡirito, senaḡi ḡomi mabarami tu nuḡameto barego evinimito, o sikira, ḡomi ḡutuma, korana au asi aurani, ḡomi ḡemi ai mo veiḡa guruḡana bana kiraḡi-meto lelevaḡia.

⁶ Ḡomi ḡutuma na mani tarima na mo veiḡa eveiato voina metona baregona ḡoviniato, ma mo tu ḡenai ilaila be benamo, meto asi ma boḡono vini-lelevaḡia.

⁷ Ma toma tu ḡena rakava boḡono tuḡamaḡi-fitoḡaia ema boḡono launaḡia kekei. Asi namo tuḡamaḡi midigumidiguna na mai tarima bevaḡa-ketoani ḡena veḡabidadama ḡenana.

⁸ Moḡesina naima, au na ḡomi anoḡimini, mai tarima boḡono kiravara-ginikaua, ḡia tu moḡoni ḡoura-viniani.

⁹ Au na mo fefai atore-vinimito korana aurato, ḡomi bana riba-ginikaumi, moḡoni au na avaḡa-ribamito dagarari mabarari ḡokorana-iaḡi korikoririni ba?

¹⁰ Bema ḡomi na tarima ta ḡena rakava ḡotuḡamaḡi-fitoḡaiani tu, au na mo tarima ḡena vei-rakava maki atuḡamaḡi-fitoḡaiani. Ma bema rakava ta au na atuḡamaḡiato, mo rakava tu Keriso ḡoiranai au na varau atuḡamaḡi-fitoḡaiato ḡomi ḡemi namo uranai.

¹¹ Moḡesi aveito anina tu, Satani na ḡita beḡofarani, benamo mo meto misina bevaḡa-barego lelevaḡiani garina. Korana Satani eḡauveini dabarari ḡita tu ma ribara.

Paulo ḡena ura baregona Tito bene doḡaria

¹² Troas vanuĝana ĝana aiaĝoto, Keriso Varina Namona bana vari-fiua ĝana. Au Troas vanuĝanai aragāsito, benamo ariba-maoroto, Vereĝauka na mo vanuĝai Vari Namona bana fiua ĝatama-bokana tu ĝegu ekeoato.

¹³ Senaĝi au nuĝagu ai maino tu asi aĝabiato-ĝoi, nuĝagu evekwaragito-ĝoi, korana au tarigu Tito Troas ai tu asi adoĝariato. Moĝesi naima Troas tarimari aĝabi-tuĝurito moĝo, benamo Makedonia ĝana ma aiaĝoto.

Keriso ekokoreto lorinai ĝita takokoreni

¹⁴ Barau atanikiu-viniani, korana vanaĝivanaĝi ĝia na ĝena seĝuka kokorenai Iesu Keriso ĝena maĝuri nuĝanai ĝai eĝori-kaumani. Benamo ĝai ĝemana Keriso varina tu noĝamo muramura bonana namona na tanobara mabarana ĝeĝabiani, benamo ĝeribaiani.

¹⁵ Moĝoni, Barau ĝoiranai ĝai tu Keriso varina bonana namona, Barau na rakava ĝenana evaĝa-maĝuririto tarimari fakari na ema vei-rakava tarimari mase dabaranai ĝerakani tarimari fakari ai.

¹⁶ Mase dabaranai ĝerakani tarimari ĝeri, ĝai tu mase boraĝari bonari, mase bevaĝa-ĝoraiani dagarana. A Barau na evaĝa-maĝuririto tarimari ĝeri ai, ĝai tu maĝuri muramurana bonana namona, maĝuri evaĝa-ĝoraiani dagarana. Senaĝi dei na mai ĝauvei baregona beveiani riba?

¹⁷ Ĝai dia tarima tari kavana, be Barau ĝena guruĝa ĝeĝobata-iaĝiani tu moni beĝene doĝari ĝana; a ĝai tu dia Barau ĝena guruĝa ĝaĝobata-iaĝiani tu moni na beĝene voima ĝana. Asiĝina. Ĝai tu Barau na etuĝumato, mai ĝauvei baĝana veia etato. Ĝai tu Keriso ĝesi ĝasebonato, ma Barau ĝoiranai ĝai tu nuĝama maoro e moĝoni ai Barau ĝena guruĝa ĝakiraĝiani.

3

Taravatu e Iauka

¹ Ĝai mai guruĝa ĝakiraĝirini tu, ĝai tauĝema moĝo ma ĝavevaĝa-raĝe ĝenoĝoini, ĝakirani, “Ĝai tu moĝoni vei-iobukaiobuka tarimama korikori,” ĝatoni ba? Ba tarima kotari ĝeveini kavana ĝaurani tarimarima na ĝema vevaĝa-moĝoni fefana ta ĝomi ĝemi beĝene torea, beĝene kira, “Ĝai tu tarima namoma, be boĝono ĝabi-raĝema.” O ĝomi na ĝai boĝono ĝabi-raĝema uranai ĝema vevaĝa-moĝoni fefana ta boĝono torea ĝatoni?

² Ĝomi maniĝemi tu ĝai ĝema fefa, ĝai vaĝa-moĝonima fefami, ĝai lorumai Keriso na eberarito, ma tarimarima mabarari na ĝeribamini ema ĝeivimini.

³ Ĝomi ĝemi maĝuri na evaĝa-fofori ginikauani, ĝomi tu Keriso ĝena fefa, ĝai ĝema ĝauvei ĝenana eberamini o etoremmini, (ma tarimarima na ĝeiviani). Ĝomi tu Keriso ĝena fefa, dia bairo na eberamito fefami, senaĝi maĝuri vanaĝivanaĝi Barauna Iaukana na eberamito fefami. Ma ĝomi Keriso na tu dia fore lefalefari iatari ai ebera-kaumito, senaĝi ĝomi tu tarimarima loruri ai ebera-toĝaiato.

⁴ Ĝai na maiĝeri guruĝa ĝakiraĝirini, korana ĝai tu Keriso ĝenana ma ĝema tuĝamaĝikau Barau ĝenai. (Korana ĝia na evaĝa-kavamani ĝena ĝauvei veiveinai).

⁵ Aba, ĝai tauĝema ĝereĝama na maiĝeri veiĝa tu asi ilaila baĝa veirini. Moĝesi naima ĝai na dagara ta ĝavaĝa-ĝoraiato tu asi ĝatoni. Asiĝina. Ĝai tu Barau na ĝereĝana na moĝo kokore ema riba ĝai evinimani nai mai ĝauvei ĝaveirini.

⁶ Barau na kokore ema riba evinimani nai, ĝia ĝena kiraĝitore o ginitaĝo variĝuna ĝavarifiuani. Mo tu dia taravatu bukanai ĝetorerito dagarari ĝavari-fiurini, asiĝina, ĝai tu Iauka Veaĝa na tarimarima ĝeri maĝuri ai

kara eveiani ġavari-fiuni. Korana taravatu bukanai etorerito vevaġa-naġiri na tu tarima ġevaġi-maserini, bema asi ġekorana-iaġiani nai; senaġi Barau Iaukana na tu tarimarima maġuri evinirini.

Barau ġena ginitaġo variġuna marevana baregona

⁷ Ġoseġaġi, Mose na Barau ġena taravatu tu Isaraela tarimari evaġa-ribarito-ġoi, moġeri na tu mase maki ġevaġa-ġoraiato-ġoi. Mo taravatu moġeri tu Barau na fore iatanai eberarito, ma marevari mamari tu barego rakava. Moġeri taravatu Barau na fore ai eberarito dagarari Mose na eġabi-iaġomarito-ġoi nai, Mose tu ġoirana maki emamoto-ġoi, be Isaraela tarimari Mose ġoiranai maki asi ġeboġekau-maukato-ġoi, korana mo mareva mamana na matari efai-fitoġarito-ġoi nai. Senaġina mo taravatu mamari marevana baregona moġa tu asikauna ma erekwarekwato-ġoi.

⁸ Bema taravatu mamana marevana baregona tu moġesi neganai, Barau Iaukana ġena ġauvei mamana marevana ema seġukana tu barego lelevaġi.

⁹ Bema mase maki evaġa-ġoraiani ġauveina mamana marevana tu barego, vei-iobukaiobuka evaġa-ġoraiani ġauveina mamana marevana ema seġukana tu barego lelevaġi.

¹⁰ Toma taravatu mamana marevana baregona moġa tu asi marevana, korana Barau Iaukana mamana marevana ema seġukana tu barego lelevaġi.

¹¹ Ma bema Mose na mo asi betanu-maukani taravatuna moġa eġabi-iaġomaiato, mamana marevana tu barego nai tu, betanu-vanaġi vanaġini dabarana mamana marevana ema seġukana tu barego lelevaġi veġata.

¹² Ġai tu mai dabara variġuna o ginitaġo variġuna ġenai ġavetuġa-maġikauni, naima asi ġagarini, ma kokorema ġesi ġakiraġiani.

¹³ Ġai tu dia Mose kavana, be ġoirama ġakou-ġaurini. Mose tu ġoira kouġau dabuġana na ġoirana ekou-ġauato, korana Isaraela tarimari na ġia ġoirana na mo mama marevana erekwa-rekwato-ġoi moġa asi beġene ġeġitaia ġana.

¹⁴ Senaġi Isaraela tarimari nuġari e ġeri tuġamaġi Barau na evaġa-mukunarito. Korana tu mo ġaro na beiaġoma mo maitoma, mo kouġau dabuġana ġia nuġari e ġeri tuġamaġi evaġa-mukunarito dabuġana tu roġo etanuni, be ginitaġo guinena bukana ġeiaviani nai, asi ġetuġamaġi-doġariani. Mo ġia nuġari ema ġeri tuġamaġi ekou-ġaurini dabuġana tu Keriso ġesi beġe sebonani vauro bevekeo-fakani.

¹⁵ Toma maki Mose ġena taravatu guruġari ġeiavirini nai, ġia nuġari tu kouġau dabuġana na ekou-ġauani.

¹⁶ Senaġi tarima ta betuġamaġi-kureni, benamo Vereġauka ġenai ma beiaġoni tarimana ġenana mo kouġau dabuġana tu bekoki-fitoġaiani.

¹⁷ Ma mai Vereġauka tu Iauka Veaġa ekiraġiani. Be Vereġauka Iaukana ainai eġauveini gabuna, ġeġabi-raġeani tarimari tu dagara ta na asi ebarubarurini. Asiġina, ġia tu fakai ġetanuni.

¹⁸ Ma ġita ġoirara tu kouġau dabuġana na asi kouġau, be Vereġauka mamana e marevana baregona ġita ġerana veġiana noġa eforini, tarimarima na ġeġitaiani. Vereġauka tu Iauka Veaġa, ma ġia ġenai mo mama e marevana baregona eiaġomani. Monana esenisirani Vereġauka kavanai taiāgoni, ema ġia mamana e marevana barego lelevaġina ġita maki evini-vanaġi vanaġirani.

4

Iauka farefarena gwaġutu nuġanai

¹ Barau ġena vevetuġaġwai moġo mai ġauvei ġai evinimato. Moġa lorinai ġai tu asi ġatuġamaġi-moirani mai ġauvei veiveinai.

² Ġai tu maiaka veiġari vekuretoġari, tarimarima na asi ġeġita-learini veiġari, tu ġaiġuirito. Ema ġai tu asi ġaġofaġofani e Barau ġena guruġa anina maki ġai na tu asi ġakefoani. Asiġina. Ġai na Barau ġena vari moġonina tu tauna korikori moġo ġakiraġi-fofori ġinikauani. Monana tarimarima beġene riba, ġai tu ma moġonima ġesi Barau ġena ġauvei ġaveiani ġia ġoiranai.

³ Senaġi bema ġai na mai Vari Namona ġavari-fuani maiġa vekuretoġa nai tu, mai vari maiġa tu mase koufanai ġerakani tarimari moġo ġeri ai vekuretoġa.

⁴ Maiġeri tarima, Keriso asi ġevaġa-moġoniani tarimari, tu mai tanobara barauna arana Satani na ġeri tuġamaġi evei-mukunarito, naima mai Vari Namona mamana emamani tu asi ġeġitaiani. Mai Vari Namona mamana maiġa tu Keriso mamana marevana baregona emamani. Ma mai Keriso maiġa tu Barau vetoġana korikori.

⁵ Ġai tu dia ġai tauġema varima ġafiurini. Asiġina. Ġai na tu Iesu Keriso ġaġobata-iaġiani, ġakirani, Keriso tu Vereġauka korikori. Ma ġai tu ġomi ġemi vetuġunaġi tarimamai ġavevaġa-iaġoni Iesu ġagubakauani lorinai.

⁶ Korana Barau tovtovonai ekirato, “Mukuna furufuru nuġana na nemama-rovorovo,” etato. Ma mo Barau sebona na ġai nuġamai ema vaġa-mama rovorovoato korana tu, Barau mamana baregona Iesu Keriso ġoiranai emamato moġa bene vaġa-foforia, benamo baġana ribaia e baġana tuġamaġi-fakaia ġana.

⁷ Senaġi mai farefare namo vedaureana tu ġai tauġanima nuġanai maiġea, mai tauġanima tu noġa tano na ġeveirini gwaġuturi, ma beġe korini, monana tarimarima mabarari na beġene ġitaia, ma beġene riba maki, mai seġuka barego lelevaġina ġai ġemai maiġa tu Barau ġenana eiaġomani, ma dia ġai ġemana.

⁸ Ġai tu reketa-reketa na ġeġaru-ġeġeraġimani, ġevaġa-midigu midigumani e meto maki barego ġevinimani, senaġi ġema kokore tu asi ekorini. Ġaro kotari tu ġadaradarani, asi ribama kara ma baġa veiani, korana maġuri tu gwaġiġi, senaġi ġema tuġamaġikau Barau ġenai tu asi emoirani veġata.

⁹ Tarimarima na asi ġeura-vinimani, ġevaġa-midigumidigu baregomani, senaġi Barau tu ġai sevisevimai moġo etanuni, asi eiaġuimani; semo na ġekwari-ketomani, senaġi asi ġamaseni.

¹⁰ Iesu emaseto, mo mase moġa tu vanaġivanaġi ġai tauġanimai ġaġwarakao-rakaoani. Ġaribani, ġai maki, Iesu ġevaġi-maseato kavana, beġe vaġi-masemani. Moġesi eġorani korana tu, Iesu ġena maġuri maki vanaġivanaġi ġai tauġanima na bene fofori, be tarimarima na beġene ġitaia.

¹¹ Ġai roġo maġuri ġatanuni apostoloma tu, vanaġivanaġi beġene vaġi-masema ġetoni, Iesu varina ġakiraġiani ġaramanai. Mai veiġa eġorani tauna korikori tu, Iesu ġena maġuri, (mo tu Iesu emaġuri-ġenoġoito mo maġuri moġa), seġukana ġai tauġanima na bene fofori, be tarimarima na beġene ġitaia ġana.

¹² Moġesi naima mase ġena ġauvei tu ġai (apostolo) ġemai eveiani, senaġi maġuri tu ġomi ġemi maġuri nuġanai eġauveini.

¹³ Buka Veaġai ekirani, “Au na Barau avaġa-moġoniato, moġesina naima aguruġato.” Ġai maki mo veġabidadama sebona moġa nuġanai naima ġakirani, Barau ġavaġa-moġoniani nai ġaguruġani.

¹⁴ Korana ġai ribama, Iesu Vereġauka mase na evaġa-variġisi ġenoġoiato Barauna na ġai maki ma bevaġa-variġisi ġenoġoimani Iesu kavana, benamo ġai ema ġomi, mabarara beġabi-iaġomarani ġia ġoiranai bea vaġa-ruġa-tarirani.

¹⁵ Ġai na midigumidigu e meto ġaġabirini tu, ġomi na namona boġono doġaria ġana, ema monana tarimarima ġutuma gorogoro na Barau ġena namo ema varevare-bara beġene doġaria. Benamo mai Barau ġena namo ema varevare-bara dainai, tarimarima ġutuma na Barau beġene tanikiu-vini-baregoa e ġia marevana e mamana baregona beġene vaġa-raġea.

Veġabidadamai moġo bitana tanu

¹⁶ Moġa lorinai ġai tu asi kota maki ġatuġamaġi-moirani. Aba, tauġanima tu eġaukani, bemoira-iaġoni, senaġi iaukama tu ġaro loriri ai evaġa-variġurini.

¹⁷ Ema maiġeri midigumidigu e meto misiri asikauna na beġe raga-korini dagarari voiri beġe foforini tu barego lelevaġi. Barau na maiġeri voiri tu marevana barego lelevaġina, betanu-vanaġi vanaġini dagarana, bevinimani.

¹⁸ Moġesi naima ġai matama na tu dia toma ġeġorani matara na taġitarini dagarari ġaġita-karakararini. Asiġina. Ġai matama na tu, toma matara na asi taġitarini dagarari, ġaġita-karakararini. Korana toma matara na taġitarini dagarari tu asikauna ma beġe korini, senaġi kara toma asi taġitaiani dagarana tu betanu-vanaġi vanaġini, asi bekorini dagarana.

5

Guba tauġanina e mai tanobarai tatanuni tauġanina

¹ Ġai ribama, mai tanobarai ġatanu-iaġiani foutana o tauġanina berakavani mase ai nai, gubai asi ġima veiveina numana ta Barau ġenana baġa ġabiani, tanu-vanaġivanaġi numana.

² Mai tanobara tauġani numanai ġatanuni tu ġataġitaġini ġaġabaġabani, korana midigumidigu e meto barego ġaġoitaġoni dainai. Be ġai ġema ura baregona tu, Barau na guba na beiaġomani tauġanina na nevaġa-dabuġama.

³ Korana guba tauġanina na bedabuġa-ġaumani tarimarima kavana nai, ġai tu dia iauka moġo baġa rakao-rakaoni ġia ġoiranai gubai, senaġi ġai iaukama tu kouġau inította kavana.

⁴ Korana ġai roġo mai tanobara tauġanina numanai ġatanuni tu, ġaġabaġabani e meto barego ġevinimani. Maiġa tauna tu, asi ġaurani mai tanobara tauġanina maiġa ġakoki-vaġia o ġamase ġatoni. Asiġina. Ġai ġema ura tu Barau na guba tauġanina numana variġuna na bene vaġa-dabuġa-ġauma, be maġuri tauġanina na ma beġe maseni tauġanima moġo gabuna bere boroġia ġatoni.

⁵ Barau tauġena na ġita tu mai maġuri variġuna maiġa bitana ġabia ġana erovina-torerato. Moġesi naima ġia na Iauka Veaġa tu evini-guinerato. Barau na mai Iauka Veaġa evini-guinerato anina tu, ġita bitana riba-ginikau, tauġani variġuri maki bevinirani.

⁶ Moġesi naima vanaġivanaġi ġai nuġama tu gwaġiġi, asi ġatuġamaġi-iauvoiauovoni. Ma ġai ribama, mai tanobara tauġanina numanai roġo ġatanuni nai tu, ġai Vereġauka ġesi vanuġa korikori gubai tu asi ġatanu-vegogoni.

⁷ Ġai veġabidadamai moġo ġatanuni, dia matama na ġaġitarini dagarari na ġeġori-kaumani.

⁸ Au mo bakira kavana, ġai tu asi ġagarini, ma tuġamaġikauma ġesi ġaurani, mai tauġani ġenana baġana veġita, benamo Vereġauka ġesi baġana tanu, Vereġauka etanuni vanuġanai.

⁹ Moġesi naima ġai ġema ura barego sebona moġo ġoiramai ġatoreani tu, ġia iauna moġo baġana vaġa-namoa. Mo tu mai tanobara tauġanina nuġanai baġa tanuni, o mai tanobara tauġanina numana na baġa raka-vaġini, benamo Vereġauka ġesi gubai baġa tanuni, ġai ġema ura tu, ġia iauna moġo baġana vaġa-namoa.

¹⁰ Korana ġita mabarara Keriso ġena Kota seana ġoiranai tu bita ruġa-rosini veġata. Monai ġita mabarara tata mai tanobara tauġaninai tatanuni nai, veiġa namori o rakavari taveirini, maiġeri voiri ilailari bita ġabirini.

Keriso na Barau ġatanai evaġa-iaġorato

¹¹ Ġai ma ribama, Vereġauka tu ma garina, korana tu ġoiranai bita ruġa-tarini. Moġesi naima ġai na tarimarima ġasisiba-vinirini, beġene tuġamaġi-vekefo ġana. Ġai nuġama e ġema tuġamaġi kamasi tu Barau ma ribana ginikau, ema au atuġamaġini, ġomi maki ġai nuġami ai ġoribamani.

¹² Maiġesi ġaguruġani tu, dia ġai tauġema ġomi ġoirami ai ġakirani, ġai tu moġoni vei-iobukaiobuka tarimama korikori. Asiġina. Maiġeri guruġa ġakira-varamini tauna korikori tu, ġai boġono veiavi-iaġima, be tanobara iaunegari e ribari ġevekokoroku-iaġirini tarimari boġono vaġa-veseri ġana. Maniġeri tarimarima tu matari na ġeġitarini dagarari ġevekokoroku-iaġirini, a tarimarima nuġari ai ġetanuni dagarari tu asi ġeġitarini.

¹³ Bema ġai tu ġababo-rakaoni ġotoni nai, mo tu Barau ġena ġauvei ġaveiani dainai; o bema ġema tuġamaġi maoro nai, mo tu ġomi namo boġono ġabia ġana.

¹⁴ Ġai tu Keriso ġena veuravini na elaunaġi-naġimani, ema ġai moġoni ġariba-ginikauni, Keriso tu tarimarima mabarara ġera vei-rakava dainai emaseto. Moġesi naima, tarimarima mabarara maki ġia ġena mase ai tamase-vegogoto.

¹⁵ Keriso tu ġita tarimarima mabarara ġera vei-rakava lorinai emaseto naima, ġita inıtoma tamaġuri-tanuni tarimara mabarara tu, dia ġita tata tauġera ġera ura loriri ai moġo bitana tanu. Asiġina. Ġita mabarara tu Keriso ġenai moġo bisini tanu, korana tu ġia ġita urarai emaseto, ma Barau na mase na ma evaġa-variġisi ġenoġoiato.

¹⁶ Moġesina naima ġai na maitoma tarimarima tu dia tauġanina rekenai ġena maġuri ġaġitaiani. Aba, tovotovonai tu Keriso maki tauġanina rekenai ġatuġamaġiato-ġoi, senaġi toma moġesi tu asi ġatuġamaġiani.

¹⁷ Moġesi naima bema tarima ta Keriso ġena maġuri nuġanai etanuni, mo tarima tu tarimarima variġu geragerana. Mo maġuri guinena etanu-iaġiato-ġoi moġa tu ekorito, ġia tu maġuri variġu geragerana eġabiato, ma mai maġuri variġunai etanuni.

¹⁸ Maiġeri dagara mabarari tu Barau na ġita ġera evinirani. Barau tavetari-viniato-ġoi, senaġi Keriso ġena mase ġenana ġia na ma eġabiraġe-ġenoġoirani. Ema ġai maki Barau na mai ġauvei evinimato, mo tu tarimarima baġana kira-varari, Barau na maino ġabiġabina dabarana tu varau eveiato, be ġia ema Barau maino beġe ġabiani riba.

¹⁹ Mai guruġa anina tu: Barau na Keriso tanobara ġana etuġu-iaġomaiato, benamo ema maseto. Keriso ġena mase ġenana Barau tu tanobara tarimari mabarari ġesi maino ġeġabiato: Tarimarima ġeri rakava asi ma etuġamaġi-taġorini, senaġi etuġamaġi-fitogarinini. Barau na mai ġauvei ġai evinimato, maino guruġana maiġa baġana ġobata-iaġia.

²⁰ Moġesi naima ġai tu Keriso ġaruġa-boroġiani mai tanobarai. Ma Keriso ġena vari ġavari-fiuani nai tu, noġa Barau tauġena ġai ġemana tarimarima eura-maġirini, ġia ġesi maino beġene ġabia. Ġai na Keriso aranai ġomi ġanoġimini, “Barau ġesi maino boġono ġabia.”

²¹ Korana Keriso tu enabe asi ġena rakava, senaġi ġita ġera vei-rakava lorinai, Barau na ġia noġa moġo vei-rakava tarimanai evaġa-iaġoato. Barau na mo veġa eveiato korana tu, Keriso ġesi bita sebonani ġenana, ġita mabarabarara tu vei-iobukaiobuka tarimari ai bitana iaġo ġana Barau ġoiranai.

6

¹ Ġai tu Barau ġesi ġaġauvei-vegogoni, moġesina naima ġalaunaġimini, Barau ġena namo e varevare baregona ġoġabi-raġeato maniġa tu boġono ġabi-gigitaria, asi boġono vaġa-rakavaia.

² Korana Barau tu maiġesi ekirani ġena bukai,
 “Au na baiu-namomini ma baġabi-raġemini ġarona beġabiani nai tu,
 ġemi noġinoġi baġabi-raġerini,
 ema vevaġa-maġuri ġaronai tu,
 au na bavaġa-kavamini.”

Au na avaġa-guruġamini, maitoma ġarona tu Barau na tarimarima beiau-namorini ema beġabi-raġerini. Ma maitoma ġarona tu Barau na tarimarima bevaġa-maġuririni ġarona!

³ Ġai tu asi ġaurani, tarima ta na ġai ġema ġauvei nuġanai kerere ta bene ġoitaġoa ma beġene vaġa-daġama, moġa lorinai ġai na tarima ta vaġa-vedaġa-raġena veġana ta asi ġaveiani.

⁴ Moġesi naima ġema veġa e guruġa mabarari ai ġavevaġa-foforini, ġai tu moġoni Barau ġena vetuġunaġi-iaġovinina tarimama. Meto nuġari ai ġavevaġa-gwaġiġini; tarimarima na ġevaġa-midigu midigumani; ġema ġauvei nuġanai maġuri gwaġiġiri ġadoġaririni; tarimarima na ġevaġa-dabara dokomani;

⁵ ġekwarimani, ġediburamani, ġutuma-bara na ġeġaru-ġeġeraġimani ġefarara-farara vinimani; ġauvei ai ġavekwaġi-rakavani, asi ġagenani, asi ġaġaniġanini.

⁶ Ġema maġuri e veġa tarimarima e Barau ġoirari ai ġenamo-vedaureani; Barau ġena maġuri e ġena vari ġaribaiani; maġuri metori ġaġoitaġorini, senaġi ġatuġamaġi-gwaġiġini; ġevaġa-rakavamani tarimari asi ġabaru-vinirini, senaġi ġaiu-namorini; Iauka Veġa na evaġa-kavamani dabara mabarari ai, ma nuġama mabarari ġesi tarimarima ġaura-vinirini.

⁷ Barau ġena guruġa moġonina moġo ġaġobata-iaġiani Barau ġena seġukai; vei-iobukaiobuka farefareri tu ġimama aroribamai ema ġimama kaurimai ġerina ġavetarini.

⁸ Ġai tu ġaruġa-gwaġiġini, tarimarima na ġevaġa-raġemani o ġevaġa-rakavamani nuġari ai, varima ġevaġa-rakavarini o ġevaġa-namorini nuġari ai; ġekiramani, ġai na tarimarima ġaġofa-taġui-taġuirini ġetoni, senaġi ġai tu guruġa moġoniri moġo ġakiraġirini.

⁹ Ġekirani, ġia tu asi ribari ġai ġetoni, senaġi ġai tu ġeġita-leamani, ġia ma ribari ginikau ġai tu dei. Ġevaġimani, be ġamaseni, senaġi roġo ma ġamaġurini. Ġebotamani, senaġi asi ġamaseni.

¹⁰ Ġevaġa-nuġa midigu-midigumani, senaġi vanaġivanaġi ġaiakuni ġaverereni. Asi ġema asi ġama, senaġi tarimarima vovoka ġavaġa-taġarini.

Dagara ta asi gāgwa-tanuani, senaḡi Barau na ḡena tarimarima evinirito dagarari mabarari tu ḡai ḡema.

¹¹ Korinto tarimami, ḡai ḡomi ḡemi ai tu ḡaguruḡa-fiu-iaḡoni moḡo, asi ḡagarini, ema nuḡama maki ḡakeorini, ḡaura-vinimini nai.

¹² Ḡai na ḡomi tu ḡaura-vinimini, senaḡi ḡomi na neḡi ḡai asi ḡoura-vinimani.

¹³ Au na ḡomi tu natugu kavana avaḡa-guruḡamini: Ḡomi nuḡami asi boḡono kouri, nuḡami boḡono keori, be ḡai na ḡomi ḡaura-vinimini kavana, ḡomi na maki ḡai moḡesi boḡono ura-vinima.

Keriso asi ḡevaḡa-moḡoniani tarimari ḡesi asi boḡono vekako

¹⁴ Keriso asi ḡevaḡa-moḡoniani tarimari ḡesi asiḡina ḡinavaḡi boḡono veḡata e asi boḡono vekako. Korana kamara dabarai vei-iobukaiobuka e vei-rakava veiḡari beḡe veḡatani ema beḡe sebonani, ei? Asi ilaila! Ema kamara dabarai mama ema mukuna furufuru beḡe veḡatani ema beḡe sebonani, ei? Asi ilaila!

¹⁵ Keriso ema Satani tu kamara dabarai beḡe nuḡa-sebonani, ei? Ema veḡabidadama tarimana ema asi eveḡabidadamani tarimana tu kamara dabarai ḡia tauri ruarua ḡeri tuḡamaḡi beḡe sebonani?

¹⁶ O Barau ḡena Rubu Veaḡa e babarau ḡeri rubu tu kamara dabarai Rubu Veaḡa sebonai moḡo beḡe iaḡoni, ma Barau sebona moḡo beḡe toma-rakarigoani? Ḡita mabarara tu Barau ḡena Rubu Veaḡa. Ma Barau ekirato, “Au tu ḡia nuḡari ai batanuni, ma ḡia vekaravari ai barakaorakaoni. Au tu ḡia ḡeri Barau ai baiaḡoni, ma ḡia tu au ḡegu tarimari ai beḡe iaḡoni.”

¹⁷ Moḡa lorinai Vereḡauka ma ekirato, “Vei-rakava tarimari vekaravari na ḡoma-rakarosi, ma ḡia seviru na ḡoraka-veḡita. Asi iareva dagarari asi boḡono ḡabi-karari, moḡesi tu baḡabi-raḡemini.”

¹⁸ Iaru-korokoro Vereḡaukana tu maiḡesi ekirani, “Au tu ḡomi Tamami ai baiaḡoni, ma ḡomi tu au natugu taumi ema vavinemi ai bavaḡa-iaḡomini.”

7

¹ Ḡatagu mabarami, ḡoseḡaḡi, Barau na mai guruḡatore maiḡeri tu ḡita ḡera ekiraḡirito. Moḡa lorinai tauḡanira ema iaureka ḡevaḡa-rakavarini dagarari mabarari ḡita ḡerana si-iareva-fitoḡari. Be Barau ḡenai ma veg-ubakaura ḡesi tatanuni nuḡanai, ḡera maḡuri tu namo ema veaḡa korikori.

Paulo ḡena iaku tu asikei, korana Korinto tarimari ḡevetuḡamaḡi-kureto

² Nuḡami ai ḡai ḡema faka kota boḡono veia. Ḡai tu tarima ta ḡenai veiḡa rakavana ta asi ḡaveiato. Ḡai na tarima ta ḡena maḡuri asi ḡavaḡa-rakavaiato. Ḡai na tarima ta ḡofaḡofa dabaranai ḡena dagara ta asi ḡaḡabiato.

³ Au maiḡesi akirani tu, dia ḡomi ḡemi ai meto atore-kauani. Asiḡina. Au varau baguruḡa-guine, ḡomi tu ḡai loruma ḡuturi ai ḡotanuni, ḡauravini-rakavamini. Be ḡomi ḡesi bita tanuni o bita maseni, ḡai ḡema veuravini ḡomi ḡemi ai tu asi bedokoni, roḡo betanuni.

⁴ Au ġegu tuġamaġikau tu barego lelevaġi etanuni ġomi ġemi ai, korana ġemi veġabidadamai ġoruġa-gwaġiġini. Moġesi naima au na ġomi avaġa-veiavimini tarimarima ġoirari ai, ma au maki ġolaunaġi-baregoguni. Meto baregori ġaġoitaġorini mabarari nuġari ai maki, au ġegu iaku tu roġo etanuni, asi kota edokoni o ekeini.

⁵ Makedonia tanobaranai ġaraka-toġato nai, ġai tauġanima tu asi kota maki ġeiaġaraġito meto e midigumidigu ġerina. Gabu mabarari ġana ġaiġoġo-ġoi tu, meto e midigumidigu ġaġoitaġoġo-ġoi, tarimarima na ġevaġa-veġare veġaremato-ġoi e ġekoumato-ġoi. Ema nuġama ġeraġeto-ġoi.

⁶ Senaġina Barau na tu meto e midigumidigu na nuġari ġevaġa-moirarini tarimari evaġa-kavarini. Ġia na nuġama evaġa-gwaġiġirito, Tito etuġu-iaġomaiato nai.

⁷ Ma ġai tu dia ġia eiaġomato nai moġo, nuġama ġegwaġiġito. Senaġi ġomi na aiġesi ġovaġa-kavaiato moġeri variri ġema ema kiraġito, moġeri na maki ġelaunaġi-baregomato. Evaġa-ribaguto, ġomi ġemi ura baregona au boġonoasi ġitagu. Ema ġemi nuġa-midigumidigu e au ġoura-viniguni e ġourani au gogobagu boġono raga, ema au ġegu guruġa ġokorana-iaġirini variri mabarari ema kiraġirito. Moġa lorinau au ġegu iaku ebarego-lelevaġito.

⁸ Ribagu, au na fefa atore-iaġoato, monana evaġa-nuġa midigumidigumito, senaġi au tu asi adaradarato. Aba, tovotovonai tu adaradarato, korana ariba-maoroto, au na fefa na nuġami evaġa-meteorito, senaġi mo tu ġemi nuġameto tu asi etanu-maukato.

⁹ Ma inította au tu averereni, dia ġomi nuġami avaġa-meteorito nai, senaġi mo ġemi nuġa-midigumidigu ġenana ġovetuġamaġi-kureto, benamo Barau ġenai ġoġenoġoito. Ġai na ġomi ġemi ai rakava metona ta asi ġaveiato, senaġi Barau ġena ura veġata ġomi boġono nuġa-midigumidigu, korana ġemi veiġa ġekerereto nai.

¹⁰ Barau ġenana eiaġomani nuġa-midigumidiguna tu asi tuġamaġi vevaġa-ġwana. Korana tu mo nuġa-midigumidigu ema vetuġamaġina tu vetuġamaġi-kure evaġa-ġoraiani. Mai dabarai vetuġamaġi-kure eġorani vau Barau na tarimarima evaġa-maġuririni. A mai tanobara maġurina ġenana eiaġomani nuġa-midigumidigu e vetuġamaġina na tu mase evaġa-ġoraiani.

¹¹ Mai Barau ġenana eiaġomani nuġa-midigumidigu e vetuġamaġina na kara ġomi ġemi ai bevaġa-ġorari ġotuġamaġi-ginikaua. Maniġa ġenana ġomi toma ġemi tuġamaġi beġe maoro, ma ġoura-rakavani veiġa namori moġo fakami ai boġono veiri. Ema ġemi ura baregona tauġemi boġono veiareva-faka meto tari ġerina. Ma mo kerere eveito tarimana ġenai asi ġoiakuto, ma au garigu ġoveito, ma ġemi ura baregona ġemi ai ma bana iaġosi, ma ġemi ura baregona maki mo kerere eveito tarimana ġena maġuri bene maoro veġata, ma ġemi ura ġia tu ġena veiġa rakavana voina metona bene ġabia veġata. Ġomi na maiġeri veiġa mabarari ġoveirini ġerina ġovevaġa-moġonini, ġomi tu mo veiġa rakavana ġenana boġo veġabi-vaġi, ma asi ġemi kerere ta.

¹² Au na mo fefa ġomi ġemi atoreato-ġoi nuġanai tu, dia mo kerere eveito tarimana ġena maġuri totomaorona tuġamaġina aveito-ġoi, o mai tarima na nuġari evaġa-meteorito tarimari atuġamaġirito-ġoi. Asiġina. Au na mo fefa atore-iaġosiato anina tu, Barau ġoiranai ġomi tauġemi boġono riba-maoro, ġomi na ġai tu moġoni nuġami mabarari ġesi ġai ġoġabi-raġemani e ġogubakaumani.

¹³ Ġai tu ġomi ġemi veiġa mai bakiraġiri veiġari na ġelaunaġi-baregomani. Senaġi mo ġemi veiġa na ġelaunaġimato, ma kokore barego ġaġabiato-ġoi, moġa iakunai tu ma ġaiaku-rakavato maia, korana Tito ekirato, maninai

gomi na ġia tu ġoġabiraġe-ġinikauato, ema nuġana egenagena-tarito.

¹⁴ Au na ġomi ġia ġoiranai tu аваġa-veiavimito, ma tauġemi ġemi veiġa na ġovevaġa-foforito ġoiranai, be eġitamito, moġesi naima aiakuni, korana asi ġovaġa-maiakaguto. Ema mo ġemi veiġa na ġovevaġa-foforito, ġai na Tito ġoiranai ġomi ġavaġa-veiavimito guruġari tu moġoni veġata, asi ġofaġofa.

¹⁵ Ma Tito na ġomi ġemi seġaġi etuġamaġirini, ema ġomi na ġia ma nuġa-raġemi e nuġa-ġoġoġoġomi ġesi ġoġabi-raġeato, moġeri ma etuġamaġi-iaġosirini nai, ġia ġena veuravini ġomi ġemi ai tu ebarego-lelevaġini moġo.

¹⁶ Au tu averereni, korana moġoni ama ribani asi adaradarani, ġomi na tu veiġa namori ema iobukaiobukari moġo ġoveirini bene.

8

Ekalesia na moni ġevaġa-vegogorito Ierusalemna ekalesiari ġeri

¹ Tarikaka mabarami, maitoma ġai ġema ura tu, Barau ġena namo e varevare-bara Makedonia ai ekalesia doġorori iatarai ai etoreato boġono ribaia.

² Ġia ġeri ai tu meto e midigumidigu barego eraġasito, senaġi ġia nuġari tu iaku e verere na ġevonuvonu-raġeto. Ġia tu moġoni ogoġami, asi ġeri-ġari, senaġi ġia ġeri varevare tu barego rakava ġeveiato.

³ Au na ġomi ġemi ai akiraġi-fofori korikoriani, ġia ġeri ġoitaġo tu kei, a ġeri vini tu barego-rakava tarikakari tari vaġa-kavari ai; ma ġia ġeri ai doġari-doġariri maki gwaġiġi, a farefareri e moniri maki benamo ġevini-fitoġarito moġo. Ma mo veiġa tauġeri ġeri urai moġo ġeveiato.

⁴ Ġia tauġeri na ġeri-ġari na ġai ġenoġi-ġinikaumato, ġeurato, ġia maki ġai beġene ruġa-karoma, be mai ġauvei mainai tarima veaġari beġene vaġa-kavari.

⁵ Ġai ġema tuġamaġi, ġia ġeri varevare monina tu misina moġo beġe vinini. Senaġi ġia ġeri vini ġaġitaiato tu barego vedaurea, ġai na kara tovoovonai ġatuġamaġiato, moġa maki ġevanaġiato. Ġia tovoovonai tu tauġeri roġo Vereġauka ġenai ġevevinito, ma moġa murinai tu Barau ġena ura ġekorana-iaġiato, be ġai ġemai maki tauġeri ġevevinito.

⁶ Moġesina naima ġai na Tito ġanoġiato, ġakirato, ġomi ġemi veuravini varevarena moniri egogorito kwari, moġeri tu tauġena na bene gogo-vaġiri. Korana tovoovonai maninai moni-gogo ġauveina tu ġia na esinaiato.

⁷ Ġomi Korinto ekalesiana dagara mabarari ai ġomi tu moġoni ġoiaruto: Ġemi veġabidadama e ġemi guruġai, ġemi riba iauka maġurinai, ġemi ura barego lelevaġina Barau ġena ġauvei nuġanai boġono vevaġa-kava, ema ġemi veuravini ġai ġemai tu barego lelevaġi. Ġai ġema velaunaġi ġomi ġemi ai tu, mai veuravini varevareri vini maki boġono vaġa-baregoa.

⁸ Mai veuravini varevareri boġono vini atoni maiġa tu, dia akirani, boġono veia veġata atoni. Senaġi maiġesi akiramini tauna tu maiġa: Tarikaka kotari tu ġeiġo-ġinikauni karori tari vaġa-kavari ai. Moġesi naima au na ġomi atovo-naġimini, ġomi ġemi veuravini tarikaka tari ġeri ai tu aiġesina naribaia atoni.

⁹ Ġita ġera Vereġauka Iesu Keriso ġena namo e varevare-bara ġomi tu ma ribami. Ġia tu taġa verena, senaġi ġomi urami ai asi ġena farefare tarimanai ema vevaġa-iaġoto. Iesu asi ġena farefare ai ema iaġoto anina tu, ġomi farefare vovoka tarimami ai boġono iaġo ġana.

¹⁰ Ġemi vini au na maki ġomi na boġono doġaria ġana, au ġegu vevaġa-gwada guruġana tu maiġa: Ġoraġani laġaninai ġomi na tu dia moni vaġa-vegogo moġo ġosinaiato, senaġi ġomi tu ġourato, mai veġa maki boġono veia veġata.

¹¹ Moġesi naima ġosinaiato ġauveina boġono vaġa-kori ginikaua. Moġesina tu mai boġono veia veġata ġotato ġauveina tu boġo vaġa-kori ginikauani, monana bevaġa-moġoni korikoriani. Boġo vinini nai tu, ġemi ai kara maniġeri ilailari ai moġo boġono vini.

¹² Bema nuġami mabarari ġesi ġemi ai kara ġetanuni maniġeri ilailari ai boġo vinini dagarari tu, Barau na beiaku-iaġirini e beġabi-raġerini. A ġemi ai asi ġetanuni dagarari asi boġo vinini, moġeri Barau na tu asi benuġameto-iaġirini, ema ġomi maki asi bebaru-vinimini.

¹³ Ġai asi ġaurani, tari ġovaġa-kavari uranai, ġomi tauġemi iatami ai meto baregona boġono tore-kaua, asi ġemi-ġami ai boġono vevaġa-iaġo. Asiġina. Ġai ġaurani tu, ġomi ema ġovaġa-kavarini tarimari boġono ilaila moni e farefare rekenai ġatoni.

¹⁴ Mai taimi ai tu ġomi na ġia ġeri ura dagarari boġo vinirini, korana ġomi ġemi-ġami tu vovoka tabutabu. Be ġomi na ġia ġeri rabu ai ġovinirini kavana, ġomi ġemi rabu ai maki ma beġe vinimini. Mo dabarai ta asi berabuni.

¹⁵ Buka Veaġai ekirani kavana,
“Ġutuma egogo-vegogoto tarimana ġana tu dia eġutuma-lelevaġito,
ma kotuna moġo egogo-vegogoato tarimana ġana tu dia misina korokoro,
senaġi taunai.”

Paulo na Tito Korinto ġana etuġuato

¹⁶ Au na Barau atanikiu-viniani, korana tu au ġegu nuġa-vekwarraġi ġomi ġemi ai etanuni, mai nuġa-vekwarraġi sebona maiġa tu Barau na Tito nuġanai maki etoreato.

¹⁷ Korana ġia tu dia ġai na ġanoġiato dainai moġo easi raka-ġitamini. Asiġina. Ġia tauġena maki nuġana mabarabarana eura-rakavani veġata bene iaġosi, ġomi bene raka-ġitami.

¹⁸ Ġai tarikakama ta maki Tito ġesi ġatuġu-iaġosiani. Mai tarikaka maiġa tu ekalesia doġorori mabarari na ġavaġa-raġeani, korana ġia na Vari Namona eġobata-iaġiani ma nuġana mabarana ġesi.

¹⁹ Ema mai tarikaka maiġa tu ekalesia doġorori mabarari na ġeġabi-viriġiato, ġai bene kavama mai varevare moniri baġa ġwa-iaġorini nai ġetato. Mai ġauvei ġaveiani korana tu, tarimarima mabarari na Vereġauka beġene vaġa-raġe baregoa ġana, ema ġai ġaurani tarimarima baġana vaġa-kavari ġatoni maġurina baġana vaġa-foforia ġana.

²⁰ Ġai asi ġaurani, tarima na ġai beġene rori-torema ma beġene vaġa-rakavama. Moġesina naima mai veuravini ai ġevinito monina maiġa tu dabara namonai ġaġauvei-iaġiani.

²¹ Korana ġai ġema ura baregona tu, veġa roroġotona baġana veia, dia Barau ġoiranai moġo, senaġi tarimarima maki ġoirari ai.

²² Ma ġita tarikakara ta maki ġia ġesi ġatuġu-iaġosiani, ġia bekavarini. Mai tarikaka maiġa tu ġai na ġaġitaiani, ġia tu moġoni eura-baregoni, Barau vetuġunaġina bene iaġo-vini etoni. Ema ġia tu moġoni ma ġena vetuġamaġikau ġomi ġemi ai maki.

²³ Tito maniġa maki apostolo au kavana, ma ġai tauma ruarua tu ġomi vekaravami ai ġaġauvei-vegogoni. A mani ġita tarikakara ruarua maniġeri tu ekalesia doġorori tata arari ai beġe iaġosi, ma ġia tauri ruarua tu ġeri ġauvei ema veġai Keriso ġevaġa-raġe baregoani.

²⁴ Moġesina naima, ġemi veuravini vetoġana korikori ema ġai na ġomi ġavaġa-raġemini tauna korikori, ġia ġoirari ai boġono vaġa-fofori korikoria, be ekalesia doġorori mabarari na beġene ġitaia ema beġene vaġa-moġonimi.

9

¹ Au na aġitaiani tu, asi korana ta moġo ġomi na Barau ġena tarima veaġari moni ġovarevare-vinirini guruġari au na ma bakiraġirini.

² Korana ġomi ġemi ura boġono vaġa-kavari veġata ġotato moġa tu ribagu, be moġa tu Makedonia tarimari ġoirari ai maki ġomi aveiavi-iaġimito. Au na ġia avaġa-guruġarito, akirato, ġomi Akaia ai ġotanuni tarimami tu, ġoraġani laġanina na veġata beiaġoma mo toma ġorovina-toreto boġono vini ġana. Ma ġomi na tarimarima boġono vaġa-kavari nuġa-vekwaraġina ġoveini guruġana mani ġeseġaġiato, benamo Makedonia tarimari kotari maki ġeura-dikadikato, ġia maki beġene vevaġa-kava veġata ġetato.

³ A au na mai tarikakara maiġeri atuġu-iaġosirini tauna korikori tu, beġene riba, ġai na ġavaġa-veiavimini guruġari tu dia guruġa koriri moġo. Be au aurani, ġomi ġemi varevare moniri tu boġono gogo-toreri vauro boġono venari-taġo, au na ġia akira-vararito ilailanai.

⁴ Asi namo Makedonia tarimari kotari au ġesi beġe rakakauni, benamo ġomi beġe ġitamini tu, dia ġai na ġaveiavi-iaġimini gabunai beġe ġoitaġomini, ġomi ġemi varevare moniri tu asi gogotore. Ġomi tu asi bakiraġimi, senaġi ġai tu beġe maiaka-korukorumani, korana ġai ġomi ġemi ai tu ġatuġamaġi-dadamaġi-baregoni nai.

⁵ Moġesina naima au batuġamaġi, mai tarikakara maiġeri namona tu nanoġiri, be beġene iaġosi-guine; be ġomi ġemi veuravini varevarena moniri, mo ġokiraġi-torerito moniri tu beġene kirami, ma boġono tore-vegogo guineri vauro, ġai boġono nari-taġoma. Benamo ġai baġana votu nai, ġemi veuravini varevarena moniri tu toretaġo. Monana bevaġa-foforiani ġomi ma ġemi veuravini ġesi ġia ġeri ġovinini, a dia nuġami asi iakuri ġesi ġovarevareni.

Vovoka bevaroni tarimana

⁶ Mai guruġa akiraġiani maiġa tu boġono tuġamaġi-taġoa: Ġaniġani ġueri asi vovoka bevaroni tarimana tu, kwakwai maki ġaniġani asi vovoka bedoġarini. A ġaniġani ġueri ġutuma gorogoro bevaroni tarimana tu, kwakwai maki ġaniġani ġutuma lelevaġi bedoġarini.

⁷ Tarima ta nuġanai evaġa-moġoniani ilailanai bene vini. A dia nuġana ma daradarana ġesi bene vini, o dia tarimarima ġekirani beġene tore veġata ġetoni naima beġene vini. Korana nuġana faka ema ma iakuna ġesi evinini tarimana tu Barau na eura-viniani.

⁸ Ma Barau ġena namo e varevare-bara lelevaġina ġomi iatami ai betorerini. Benamo monana ġaro mabarari ai ġemi ura dagarari mabarabarari boġo ġoitaġorini, ema dia ġoura-vinirini dagarari moġo, senaġi dagara kotari maki. Ema monana ġauvei namori maki barego lelevaġi boġo veirini.

⁹ Buka Veaġai ekirani kavana,
 “Barau na ġena varevare tu
 asi-ġeri e asi-ġari tarimari
 barego lelevaġi evinirini,
 ġena vei-iobukaiobuka tu
 betanu-vanaġi vanaġini.”

¹⁰ Barau na ġaniġani ġueri vamoka vei tarimari evinirini beġene varori ġana, ema tarimarima ġaniġani evinirini beġene ġaniri ġana. Mai Barau sebna mainana ġemi ġaniġani ġueri ġovarorito moġeri bevaġa-vovoka tabutaburini, ema ġemi veiġa namori ġwaġwari beġe ġutuma-gorogoroni.

¹¹ Ma dabara mabarari ai ġomi bevaġa-taġamini, ma monana nuġami sebonai e ma veuravinimi ġesi varevare mabarari boġo vinini. Benamo ġai ġemana boġo tuġurini varevareri tarimarima na beġe ġoitaġorini nai, mabarari na Barau ma beġe tanikiu-viniani.

¹² Korana mai ġauvei ġomi na ġoveiani maiġa tu, dia Barau ġena tarimarima veaġari na ġeura-vinirini dagarari moġo ġovinirini, senaġi mai ġomi ġemi varevare bakuri ai, tarimarima vovoka na Barau ġetanikiu-vini baregoani.

¹³ Korana mai tarimarima ġovaġa-kavarini ġauveiri, mainana ġomi ġemi veiġa namori bevaġa-fofori ginikaurini. Ma tarimarima beġe ribani, ġomi na Vari Namona tu dia murumi korina na moġo ġokiraġiani, senaġi ġokorana-iaġiani maki. Ema ġomi ġemi farefare e moni maki ma veuravinimi ġesi ġia e tarimarima mabarari ġesi ġovare-barabararini beġe ġitarini. Maiġeri veiġa namori loriri ai tarimarima na Barau beġe vonevone-raġeani.

¹⁴ Benamo ġia na ġomi beġe tuġamaġi-baregomini, ma iatami ai beġe ġauġauni. Moġesi beġe veini anina tu, Barau ġena namo e varevare barego lelevaġina ġomi iatami ai etanuni dainai.

¹⁵ Barau sitanikiu-vinia, korana ġia ġena varevare barego lelevaġina ġita evinirato bene.

10

Paulo na ġena ġauvei ġevaġa-rakavaia ġetato tarimari guruġari eveito

¹ Maitoma au Paulo tauġegu na nuġagu ma manauna e maranana ġesi ġomi anoġimini. Mai nuġa manau e marana tu Keriso ġenana ġeiaġomani dagarari. Ġomi fakami ai tarima kotari na tu maiġesina ġeġofaġofa-iaġiguni, ġekirani, au ġomi ġoirami ai tu manau e agarini, a ġomi sevimi na araka-ġerevaġini, irau ai atanuni, ġomi tu guruġa gwaġiġiri e metori atore-vinimini, ġetoni.

² Au na ġomi anoġimini, mani ġofaġofa guruġari asi boġono ġabi-raġeri, be ġomi asi bana vaġa-guruġa gwaġiġimi au baiaġosini nai. Korana au baiaġosini nai tu, au atuġamaġini, ġai ġeġofaġofa-iaġimani tarimari tu basi vaġa-guruġa gwaġiġi-vinirini. Maiġeri tarima na ġai ġeġofaġofa-iaġimani tu ġekirani, ġai tu roġo tanobara maġurinaġi ġatanuni tarimari ġeri veiġai ġaiġoni.

³ Oba, ġai tu moġoni roġo tanobarai ġatanuni, senaġi ġai tu dia mai tanobara tarimari ġevetarini kavana ġavetarini.

⁴ Ġai ġema vetari farefareri tu dia tarimarima ġimari na ġeveirini dagarari. Asiġina. Ġai ġema vetari farefareri tu kokore e seġuka baregori, Barau ġenana ġeiaġomani dagarari. Maiġeri na ġavetari-vinirini seġukari ema iaunegari baġa vaġa-rakavarini riba.

⁵ Ma maiġeri vetari farefareri na Barau ema ġena riba ġekoukou-ġaurini veġare-veġareri e veiġari mabarari ġavaġa-rakavarini. Ema tarimarima ġeri tuġamaġi irauirauri mabarari ġakira-fitoġarini. Ma tarimarima ġakirarini, ġeri tuġamaġi tu Keriso moġo beġene korana-iaġia.

⁶ Ma ġomi mabarami na Keriso moġoni boġo korana-iaġi korikoriani, moġa murinaġi vauro ġai na mani ġeseġafore-foreni tarimari ġeri rakava voiri metori baġa vinirini riba.

⁷ Ĝomi tarimarima tu tauĝanina vetoĝana ĝereĝana moĝo ĝoĝitaiani. Bema tarima ta tauĝena evekiraĝini, ĝia tu moĝoni Keriso ĝena tarima korikori nai tu, bene riba, ĝai maki Keriso ĝena tarimarima ĝia kavana.

⁸ Au tu Vereĝauka na maoro e seĝuka eviniguto, ĝomi ĝemi maĝuri e veĝabidadama bana vaĝa-ruĝa gwaĝigiri ĝana, a dia bana vaĝa-rakavari ĝana. Ma au mai ĝauvei aveiani nuĝanai, havekokorokuni tu asi bemaiaakaguni.

⁹ Au tu asi aurani ĝomi iniĝesi boĝono tuĝamaĝi, au na ĝomi tu vevaĝa-gari fefari moĝo atore-vinimini.

¹⁰ Au moĝesi akirani, korana tarima kotari ĝekirani, “Paulo na fefa etorerini nai, guruĝa tu baregori e ma seĝukari etorerini, senaĝi ĝia tauĝena ema foforini ĝita ĝerai, ĝia ĝitaĝitana tu asi garina e ĝena guruĝa maki asi guguraĝiri, ema asi mamiraĝiri maki.”

¹¹ Maniĝesina ĝeguruĝani tarimari tu beĝene riba-maoro, ĝai irau gabu na fefa kamasi ĝatore-iaĝosini vetoĝari ema mami-raĝiri aiĝesi, ĝai baĝasi foforini tauĝanima korikoriri ai, ĝema veiĝa o ĝauvei seĝukari ema guruĝari maki moĝesi moĝo ilaila, fefai ĝomami-raĝirini kavana.

¹² Ĝai mani tauĝeri moĝo ĝevevaĝa-raĝeni tarimari ĝesi tu asi baĝa vevaĝa-vetovoni, ema ĝai ĝema ĝauvei maki ĝia na kara ĝeveiani ĝauveina ĝesi asi ilaila ĝauvei sebonai baĝa kiraĝiani. Asiĝina ĝinavaĝi. Maniĝeri tarima tu tauĝeri moĝo ma ĝevevaĝa-vetovoni, karori tari ĝeri riba e veiĝa ĝesi. Ema ĝia tu tauĝeri moĝo ta evariĝisini, tauĝena ĝena veiĝa karona ta ĝenai evaĝa-ilailaiani. Ĝia maniĝesi ĝeveini tauna korikori, ĝia tu moĝoni asi iaunegari.

¹³ Senaĝi ĝai tu Barau na evinimato maorori e gaburi makari, moĝeri nuĝari ai moĝo baĝa vekokoroku-iaĝirini. Ma ĝomi mani ĝotanuni tanona maki Barau na ĝai evinimato tanona makana nuĝanai.

¹⁴ Barau na ĝai maoro evinimato, ĝomi mani ĝotanuni tanona maninai, Vari Namona baĝa vari-fiuanai e baĝa vevaĝa-riba-iaĝiani. Moĝesi naima maninai ĝaĝauveini vekokorokuna ĝaveini tu ĝamaoroni, korana ĝai tu ĝomi ĝemi ai ĝasi-raĝasito. Moĝa lorinai ĝomi mani ĝotanuni maniĝa tu, ĝai ĝema ĝauvei tanona nuĝanai, korana tu ĝai na Keriso ĝena Vari Namona maninai ĝasi-ĝwa-raĝasiato.

¹⁵ Ĝai tu Barau na evinimato tanori e maorori asi ĝavanaĝirini. Ema ĝai tu dia tarima boruri na ĝauvei ĝeveiato vekokorokuri ĝaveirini. Asiĝina. Ĝomi tu Keriso Varina Namona tu ĝai na ĝavaĝa-ribamito. Ma ĝai ĝema tuĝamaĝi baregona tu, ĝomi ĝemi veĝabidadama bebarego-iaĝoni, benamo ĝai ĝema ĝauvei ĝomi vekaravami ai maki bebarego-lelevaĝini.

¹⁶ Moĝa murinana tu mani gabu maninana, tanobara kotari ĝana ma baĝa iaĝoni, monai Vari Namona ma baĝa ĝobata-iaĝiani. Korana ĝai tu asi ĝaurani, tarima tari na varau ĝeĝauvei-iaĝirito gaburi, ĝai na baĝana vekokoroku-iaĝiri.

¹⁷ Buka Veaĝa ekirani, “Bema tarima ta eurani bene vekokoroku nai tu, Vereĝauka moĝo bene veiavi-iaĝia.”

¹⁸ Korana dia tauĝeri ĝevekiraĝi-varaĝe varaĝeni tarimari Barau na evaĝa-moĝoniani. Asiĝina. Vereĝauka na evaĝa-raĝeani tarimana moĝo, Barau na evaĝa-moĝoniani.

11

Paulo ema apostolo ĝofaĝofari

¹ Au ġegu ura sebona tu, au ġegu guruġa babori kota roġo boġoro seġaġiri e boġoro ġabi-raġeri. Mani ġemi veiġa ġoġabi-raġegu.

² Au ġegu ura barego vedaureana ġomi tu Keriso nuġanai moġo boġono tanu, ma Barau ġena ura baregona ġomi ġemi ai maki moġesi. Au tu moġa dainai ġomi ġemi ai amamani, mai tu Barau na eġabi-raġeani mamana. Au na ġomi tu tau sebona moġo ġana akira-kaumito, mo tu Keriso. Moġesi naima au na ġomi anari-ginikaumini. Korana au ġegu ura tu, Keriso ema ekalesia ġeri veġaraġo ġaronai, ġomi tu noġa ġuiato ta futua ta ġesi asi ekimakarato ġuiatona kavana, namo vedaurea e vinuba, ġaraġori Keriso ġoirana ġana bana tuġu-kavimi.

³ Senaġi au tu agarini, korana mota na ġena ġofaġofa iaunegari na Eva eġofaiato, benamo Barau ġena guruġa asi ekorana-iaġiato kavana, boġo veini garina. Ġomi maki ġofaġofa guruġari na ġemi tuġamaġi beġe vei-veġonurini, benamo Keriso ġokorana-iaġi korikoriani maġurina na boġo raka-veġitani.

⁴ Au na ġomi agari-vinimini anina tu maiġa, bema tarima ta eiaġosini, benamo ġomi ġemi ai Keriso boruna ta eġobata-iaġiani, dia ġai na ġaġobata-iaġiato Kerisona; o iauka boruna ta ma ġoġabia ġetomini, dia ġai na ġomi iatami ai ġimama ġatore-kaurito, benamo ġoġoitaġoato Iauka Veaġana; o Vari Namona boruna ġemi ġeġobata-iaġiani, dia ġai ġemana ġoseġaġiato ma ġoġabi-raġeato Vari Namona neganai, ġomi na moġeri tarima tu ġoseġaġirini, ma ġeri guruġai ġoġabi-raġerini moġo.

⁵ Senaġi au atuġamaġini, mani ġevекiraġini apostolo irauri veġata barego lelevaġiri ġetoni tarimari na, au tu asi ġevanaġiguto.

⁶ Aba, au guruġa-ġitaġita dabarana tu asi aribaiato, senaġi riba au ġegu ai tu etanuni. Ma maiġa tu dabara mabarari nuġari ai ġemi ai ġavaġa-fofori ginikaurito.

⁷ Ġomi ma ribami, au na ġomi ġemi ai Barau ġena Vari Namona aġobata-iaġiato tu asi voina, be mo ġauvei voina ġomi na tu asi ġoviniguto. Ma mo maġuri aveiato tu, au tauġegu avetore-variġoto, ġomi bana tore-varaġemi uranai. Ma ġomi ġotuġamaġini, mo veiġa au na aveiato tu avei-rakavato, ei?

⁸ Ġomi Vari Namona avaġa-ribamito-ġoi ġauveina voina tu, ekalesia doġorori tari na ġeviniguto-ġoi, noġa moġo alemarito-ġoi.

⁹ Ma au ġomi ġesi tatanuto-ġoi nuġanai, dagara kotari aurato-ġoi nai, au na ġomi tu asi avaġa-doġe ganiganimito-ġoi. Korana tu tarikaka tari, Makedonia na ġeiaġomato tarimari, ġia na aura-vinirini dagarari ġemaviniguto. Au tu ġomi vaġa-doġe-ganiganimi maġurina ta asi aveiato. Moġesi moġo bavei-iaġoni, asi bavaġa-doġe ganiganimini.

¹⁰ Keriso ġena guruġa moġonina tu aribaiato, ma nuġagu ai etanuni. Moġesi naima au baveiavini nai tu, mai Akaia tanona nuġanai etanuni tarimana ta asi bekira-ġoiguni riba.

¹¹ Au na mai veiġa aveiani tu, ġomi asi aura-vinimini nai ba? Moġoni, Barau ma ribana au na ġomi tu auravini-baregomini.

¹² Ma ġomi na au moni e farefare na asi boġono vaġa-kavagu atoni veiġana tu, roġo bavei-iaġoani-ġoi. Mai veiġa aveiani korana tu, mani apostolo ġofaġofari manġeri beġene fofori-ginikau ġana. Mai tu noġa ġia kwakuri ai ġeruġa-taġoni tanona gaburena akwaiiani, beġene fana-kafua, benamo beġene keto-ġura, ma monana ġomi boġono riba-korikori, ġia tu moġoni dia ġai ġesi ġauvei sebona ġaveiani. Korana ġia na kara ġeveiani tu ġeveiav-iaġiani, ġeri ura ġomi na boġono vaġa-moġoniri, boġono kira, ġia tu moġoni ġai ġesi ġauvei sebona moġo ġaveiani boġonosni ġana.

¹³ Maniġeri tarima tu apostolo ġofaġofari, ġauvei ġofaġofari ġeveirini. Ġia maniġeri tu tauġeri moġo ġevekiraġini, Keriso ġena apostolo ġetoni, senaġi mani tu ġeġofaġofani, ġia tu dia Keriso ġena apostolo korikoriri.

¹⁴ Mani veiġa maninana au nuġagu tu asi efarevaġini, korana Satani tauġena maki vetoġana ekefoani, noġa Barau ġena mama aneruna noġa moġo eveini, benamo tarimarima eġofarini.

¹⁵ Moġesina naima Satani ġena vetuġunaġi ġeiaġo-vinini tarimari maki tauġeri moġo tarimarima ġoirari ai beġe vekiraġini, ġia tu Barau ġena vetuġunaġi tarimari. Ġia tu Barau na vau ġeri veiġa voiri bevinirini.

Paulo na ġena apostolo ġauveina ġaramanai midigumidigu barego eġabiato-ġoi

¹⁶ Mo guruġa ma akiraġi-ġoiani. Tarima ta asi bene kira au tu babo. Senaġi bema ġomi na au boġo kira-baboguni nai tu, babo tarimari ġoġabi-raġerini e ġoseġaġi-vinirini kavana, au maki boġono ġabi-raġegu e boġono seġaġi-vinigu, be au maki kota bana vekokoroku.

¹⁷ Mai kara akiraġiani tu, dia Vereġauka na maoro eviniguni nai, maiġesi ġena guruġa na aiaġoni. Asiġina. Mai tu naveiavi uranai, babo tarimari ġeri veiġa na aiaġoni.

¹⁸ Korana tarima ġutuma tu tanobara maġurinai ġetanuni tarimari ġeri vekokoroku na ġeiaġoni. Moġesi naima au maki haveiavini.

¹⁹ Ġomi na mani babo tarimari ġeri vevaġa-riba ġoġabi-raġerini e ġoseġaġirini, korana ġomi tauġemi moġo ġoveġita-tarini, benamo ġokirani, "Ġomi tu moġoni ma iaunegami," ġotoni.

²⁰ Moġoni, ġomi tu tarima ta ġomi ġemi ai eiaġosini, benamo ġena tuġu-rakaorakao tarimami ai evaġa-iaġomini, o ġemi-ġami everari-verari vaġirini, o kara eura-vinirini dagarari tu ġomi ġemina eġabini moġo, e tauġena moġo evetore-varaġe varaġeni, ema ġoirami eforo-bubuġaurini, mo tu ġena veiġa na e guruġa na, tarimana tu ġoġabi-raġeani ema ġoseġaġiani maki.

²¹ Au tu nakira emaiakaguni, korana ġai nuġama tu asi gwaġiġi, be maiġeri veiġa ġomi ġemi ai tu asi ġaveirito-ġoi.

Bema tarima ta ġia na eveirito veiġari eveiavi-iaġiani nai tu, au maki au na aveirito veiġari havekokoroku-iaġiani riba. Au maiġesi aguruġani tu, babo ġeri guruġa na aiaġoni.

²² Ġia tu Heberu tarimari ġetoni, ei? Au maki Heberu tarimagu. Ġia Isaraela besena ġetoni, ei? Au maki Isaraela besena. Ġia Aberahamo tubuna ġatana ġetoni, ei? Au maki Aberahamo tubuna ġatana.

²³ Ġia Keriso ġena vetuġunaġi ġeiaġo-vinini tarimari ġetoni, ei? Au na Keriso vetuġunaġina tu nuġagu e tauġanigu mabarabarana ġesi Keriso vetuġunaġina aiaġo-viniani. Au tu ababoni, maiġeri guruġa akiraġirini, senaġi ġomi na roġo ġolaunaġi-naġiguni naima maiġesi aguruġani. Au tu avekwarāġi-lelevaġito, a ġia tu asiġi; ġaro vovoka ġediburaguto, ġekwari-rakava rakavaguto, ema ġaro ġutuma dori amaseto-ġoi.

²⁴ Iuda tarimari na vaġa-40 ġevewari-iaġiani varona na tauġanigu ai vaġa-39 veġata ġekwariato.

²⁵ Vaġa-toitoi oro kwarina na ġeribiguto, vaġa-sebona fore na ġetakiguto, vaġa-toitoi davara nuġanai au araġeto boutina eġwa-kirakiraiato, be dori amaseto, ma ġaro ta tu davarai boġi vinubana ta e ġaro vinubana ta arei-iaġiato tuba ta iatanai.

²⁶ Au tu gabu sebonai moġo asi atanuni, vanaġivanaġi gabu boruri na arakanaġi-rakanaġini, Keriso Varina Namona avari-fiuanai. Ġaro tari ai tu

garukai dori areini, ma ġaro tari ai tu seġafore tarimari na vefakari ai araka-ġurani, ma ġaro tari ai tu ġegu tanobara tarimari korikori na dori ġevaġiguni e ġevaġa-rakavaguni, ġaro tari irau bese tarimari na dori ġevaġiguni; ma ġaro tari vanuġa barari ai meto barego araka-ġoitaġorini, ma ġaro tari tu tano fakana nuġanai meto barego aġoitaġoni, ma ġaro tari tu davara nuġari ai dori amaseni; ma ġaro tari tu ġevetarikaka-ġofaġofani tarimari na ġevaġa-rakavagu ġetoni.

²⁷ Ġauvei metori aveini e avekwarāġi-rakavani, boġi ġutuma asi agenani; avito-maseni, ananu-maseni; ġaro vovoka tu ġaniġani aruġarini, korana aġani-veaġani bene, ma ġaro tari asi ġegu dabuġa, kefigu kori moġo, be enagureguni.

²⁸ Ma maiġeri dagara ġutuma ma bakiraġirini riba; senaġi iniġa moġo nakiraġia: Ġaro vanaġivanaġi rubu mabarari gabu tatai ġetanuni anuġa-vekwarāġi iaġi-baregorini.

²⁹ Ekalesia ta Iauka rekenai emoirani nai tu, au maki ġia ġesi amoira-sebonani. Ma ekalesia ta tarima ta na eġori-veġonuani, benamo rakava eveini nai, au tu abaru-rakavani.

³⁰ Bema au asi ġegu dabara ta, ma navekokoroku batoni nai, au tu ġegu moira ġevaġa-ġorarini gaburi moġeri moġo bavaġa-veiavirini.

³¹ Ġita ġera Vereġauka Iesu Keriso Tamana Barau ma ribana au tu asi aġofaġofani. Barau bitana vaġa-raġea mo vanaġivanaġi.

³² Damaseko ai atanuto-ġoi nai tu, Kini Areta ġena gavana na vetari tarimari ekirarito, vanuġa barana maġuna mabarana beġene nari-ġaua, au beġene ġabi-tarigu ġana.

³³ Senaġi au tu tarikaka tari na boseġa baregonai ġevaġa-tanu-ġuraguto, benamo vanuġa maġuna windoana na varoseina ġetuġu-riġoguto, benamo mo gavana ġimana na araga-maġurito.

12

Paulo ġena mata-vanaġi

¹ Vekokoroku ai tu kara namona ta asi badoġariani, senaġi baveiavini roġo. Mata-vanaġi ai Vereġauka na evaġa-foforirito dagarari aġitarito ema aseġaġirito guruġari roġo nakiraġiri.

² Au tarima ta Keriso nuġanai ma ribagu; ġia tu Barau na eġabi-varaġeato guba vaġa-toitoina ġana. Mo veiġa eġorato negana na beiaġoma mo initoma tu laġani gabanana vasivasi (14). Mo tau guba vaġa-toitoina ġana tu iaukana roġo tauġanina nuġanai, o iaukana tauġanina na eveġitato, ma iaukana ġereġana moġo eġabi-varaġeato, moġa tu au asi ribagu, a Barau ġereġana moġo ma ribana.

³ Mo tarima au tu ma ribagu. A mo tarima tu iaukana roġo tauġanina nuġanai o iaukana tauġanina na eraka-veġitato vau mo maġuri eġorato, moġa au tu asi ribagu, senaġi Barau ġereġana moġa ma ribana.

⁴ Mai tarima akiraġiani maiġa tu, paradaiso ġana eġabi-varaġeato. Benamo monai dagara tari ġita na asi ilaila bita kiraġi-fofori ginikaurini, ema dagara ta ġesi maki asi bita vaġa-vetovorini dagarari, Vereġauka na ekiraġirito, eseġaġirito. Moġeri dagara tu tarima ta na asi ilaila bekiraġi-foforirini dagarari.

⁵ Au na tu moġesina tarimana ġereġana moġo bavaġa-veiaviani. A au tauġegu tu asi bavekokorokuni, au tu ġegu moiramaira gaburi moġeri baveiavi-iaġirini, (korana tu moġeri dairi ai tarima na asi ġevaġa-raġeguni).

⁶ Au navekokoroku barasi maki, au tu dia babo ġeri veiġa na bara iaġo, korana au tu guruġa moġoniri moġo bara kiraġiri bene. Senaġi au tu asi veġata aurani moġeri bana kiraġi-rosiri, korana asi ġegu ura moġeri dairi ai, au tarimarima na beġene tuġamaġi-varaġe varaġegu. A au aurani tu, kara aveiani maiġa, tarimarima na beġene ġitaia vauro beġene riba-maoro, au tu tarima kamasigu.

⁷ Au tu Vereġauka na dagara iaru-korokorori evaġa-foforirito, benamo aġitarito e aseġaġirito, senaġi moġeri bakuri ai au tauġegu havekiraġi-varaġe varaġeni garinai tu, Barau na midigumidigu ta au tauġanigu ai etoretogaiato. Moġa tu noġa gini masakona ta au viriġogu nuġanai etanuni. Mo gini masakona moġa tu iauka rakavana ta. Ġia tu Satani ġena vetuġunaġi eiaġo-vinini iaukana, au bene vaġa-midigu midigugu, benamo au asi bana vekiraġi-varaġe varaġe ġana au ġegu ai etanuni.

⁸ Vereġauka tu vaġa-toitoina veġata anoġiato, mai Satani ġena vetuġunaġi-iaġovini iaukana au ġeguna bene koki-vaġia ġana.

⁹ Senaġina Vereġauka na maiġesina ekiraguto, “Au ġegu namo e varevare-barana ġereġana moġo dagara baregona ġoi na oura-viniani, korana au ġegu seġuka tu moiramoirar tarimana ġenana vauro efofori-korikorini.” Moġesina naima au na tu ġegu moiramoirar gaburi moġeri moġo haveiavi-iaġirini, Keriso ġena seġuka au ġegu ai bene tanu ġana.

¹⁰ Moġesi naima Keriso bakunai ġegu ġauvei nuġanai amoiramoirani, o tarima na guruġa e veiġa rakavari ġegu ai ġeveirini, o avekwaragini nai, o ġevaġa-midigu midiguguni nai, o ġegu dabara doko ġarori ai, au tu aiakuni averereni moġo, korana amoirani negari ai tu, kokore barego vedaureana ma aġoitagioni.

Paulo ġena ura sebna tu Korinto ekalesiana doġorona bene vaġa-kavaia

¹¹ Au tu tauġegu babo ai havevaġa-iaġo, maiġesi aguruġani, senaġi mai dia au tauġegu nuġaġu siga moġo maiġesi aveini, au ġomi na ġotuġunaġinaġiguni naima, babo ai avevaġa-iaġoni. Au tu ġomi na namogu boġoro kiraġi, senaġi ġomi na au tu ġokure-toġaguni. Aba, au tu moġoni asi aragu, senaġi mani ġemi “apostolo iaru-korokorori” na au tu asi beġe vanaġiguni.

¹² Apostolo korikoriri vetoġari tu vevaġa-gwaġiġi ai, vetoġa boruri ai, nuġa-farevaġi veiġari ai, ema seġuka veiġari boruri ai ġevaġa-foforirito ġomi ġoirami ai, be ġoġitarito maniġeri.

¹³ Ġomi tu kamara veiġai au na ġomi asi atuġamaġikau-baregomini, ekalesia doġorori kotari atuġamaġikau-baregorini kavana, ei? Asi veiġa tai. Asiġina. Au na ġomi tu moġoni, ġomi ġesi tatanuto-ġoi, monai moġo asi aurato-ġoi, au uragu ai boġono vekwaraġi. Benamo moġa moġo. Ma bema mai veiġa maiġa ġomi na ġoġitaiani asi namo nai tu, benamo anoġimini, ġegu mai vei-rakava boġono tuġamaġi-fitoġaia.

¹⁴ Au toma tu havei-kavi, naiagosi atoni. Mai ma baiagisini maiġa tu ġomi rakaġitami avaġa-toitoini maiġa. Mai ma baiagisini mainai maki, asi ma bavaġa-vekwaraġimini, korana au tu dia ġomi ġemi farefare e moni urari na baiagisini, asiġina, au tu ġomi moġo urami na baiagisini. Au na ġomi maiġesina aveimini tauna korikori tu maiġa, dia natu na tama sina ġeri farefare e moni etore-ġerevaġirini. Asiġina. Tama sina na naturi ġeri farefare e moni ġetore-ġerevaġirini.

¹⁵ Moġesina naima au baiagisini nai, ma iakugu ġesi, kara ġegu ai maiġeri mabarari ġomi baviniġini, ema au maki nuġaġu mabarana ġesi baviniġini, ġomi bana vaġa-kavami ġana. Bema au na ġomi tu auravini-baregomini, karase nai ġomi na au tu asi ġouravini-baregoguni?

¹⁶ Kotari na maki ġevaġa-moġoniguni, au ġomi tu asi аваġa-vekwariġimito-ġoi, senaġi maiġesi ma ġekiraguni. Au tu iaunega rakavarakava, be au na ġomi ġemi ai moni tu ġofaġofa dabarari tari na aġabirito-ġoi ġetoni.

¹⁷ Be mo tarima tari ġomi ġemi ai atuġu-iaġosirito, moġeri tu akirarito, ġomi ġemi ai au ġegu moni maki beġene gogo atato ba?

¹⁸ Au na Tito anoġiato, ġomi beneasi raka-ġitami atato nai tu, ġita tarikakara ta maki atuġuato, be Tito ekavaiato, ġeiaġosito. Ma Tito eiaġosito nai tu, ġomi ġemi moni easi ġofaġofa-iaġirito, ei? Tito ema au tu iauka sebona nuġanai moġo ġaġauveini, ema dabara sebona na moġo ġaraka-iaġoni.

¹⁹ Ba ġomi vanaġivanaġi ġotuġa-maġini, ġai tu bakuma ġabiġauri guruġari ġomi ġemi ai ġakiraġini ġotoni, ei? Moġoni, ġai tu Keriso nuġanai ema ġai kara ġakiraġirini tu Barau ġoiranai ġaguruġani. Au na aura-vinimini tarimami, ġoseġaġi, ġai na mai kara ġaveirini dagarari mabarari maiġeri tu ġomi boġono kokore uranai ġaveirini.

²⁰ Au tu agarini, korana au basi-raġasini nai, ġomi tu dia au na aura-vinirini veiġari ġovei-tanurini basi-ġoitaġomini, benamo ġomi na ġouraviniani veiġana au ġegu ai asi boġo doġariani garina. Au agarini, ġomi tu roġo ġovevaneni, ġomamani, ġovebaru-vini rakava-rakavani, ġomata-ġaniġanini, karomi guruġa asi namori ġovinirini, ġoverori-toreni, ġoveiavini, nuġami e ġemi tuġamaġi dia gabu sebonai, senaġi irauirau.

²¹ Ma au agarini, au basi-votuni nai tu, au ġegu Barau na au bevaġa-maiakaguni ġomi ġoirami ai, benamo matagu gorari beġe riġoni, korana ġevei-rakavato tarimari tu asi ġevetuġamaġi-kureto veiġa rakavari ġerina, kima maġurina na ema mata-boraġa veiġari na. Maiġeri veiġa ġerina ġia ġevemiro-fatafatani.

13

Vekira-toreġau magona

¹ Mai tu vaġa-toitoina au ġomi ġemi ai mai aiaġosini. Ma Buka Veaġai ekirani kavana, “Tarima ruarua o toitoi na beġe vaġa-moġonirini guruġari tu moġoni korikori.”

² Au vaġa-ruaruana ġomi asi-raka-ġitamito nai tu, ġevei-rakavani tarimari e tarima kotari maki au na akira-toreġaurito, au na kara baveiani au baiaġosini nai. Ma maitoma tu au manaġai roġo mai-ġegu nuġanai, ma аваġa-guruġamito kavana ma akira-toreġaurini. Bema au ma baiaġosi-ġenoġoini nai, deikara roġo rakava veiġari evei-tanuni tarimana tu, gwaina asi basi-ġabiani, ġena vei-rakava voina metona baviniani.

³ Korana ġomi ġemi ura tu boġono vaġa-moġonia veġata, Keriso tu moġoni au ġeguna eguruġani ba asiġina. Ġoseġaġi, Keriso ġomi ġemi ai tu asi emoirani, asiġi. Ġia kara ġomi fakami ai neveia betoni seġukana tu barego lelevaġi.

⁴ Aba, Keriso, mo tu tauġanina ġena moiramaira lorinai, satauro tuġunai ġeikoko-kauato, benamo emaseto, senaġi ġia initoma tu Barau ġena seġukai emaġuri-tanuni. Iesu Keriso nuġanai ġai maki tauġani ai tu moiramaira Iesu kavana, senaġi Barau ġena seġukai ġamaġuri-tanuni Keriso ġesi. Ema ġomi ġemi ai ġai na kara baġa veiani tu mai Barau ġena seġukai.

⁵ Ġomi tauġemi nuġami ema ġemi maġuri boġono ragaġi-ġinikauri, ġomi tu moġoni ġoveġabidadamani ba asiġina. Ġomi tauġemi ġemi maġuri na ema ġemi veiġa na boġono vevaġa-fofori korikori! Ba ġomi tauġemi tu asi ġoriba-maoroni, Keriso Iesu tu ġomi nuġami ai etanuni ba? Bema moġoni tauġemi

gōvetovo-naġini, benamo ġoribani, Keriso tu dia ġomi nuġami ai, monai vauro ġomi tu moġoni asi ġoveġabi-dadama-korikorini.

⁶ Au moġoni aribani, ġomi tauġemi na ġai boġo riba-maoromani, ġai tu moġoni Keriso vetuġunaġina ġaiago-vinini, a dia Barau na asi evaġa-moġonimato tarimama.

⁷ Ma ġai ġema ġauġau ai Barau ġanoġiani, ġakirani, ġomi bene vaġa-kavami, be veiġa rakavana ta asi boġono veia. Ġai tu dia ġaġuriġurini, ġakirani, tarimarima na ġai vetovo-naġi ai ġakokoreto, moġa beġene ġitaia ġatoni. Asiġina. Au ġegu ura ġomi tu vei-iobukaiobuka tarimami ai boġono iaġo. A tarima-rima beġe kirani, ġai tu ġaketoto beġe toni, moġa ġai na tu asi ġatuġa-maġiani.

⁸ Korana tu ġai na guruġa moġonina kouġauna veiġana ta tu asi ilaila baġa veiani, a ġai na tu guruġa moġonina moġo baġa vaġa-foforiani.

⁹ Ġai ġamoirani nuġanai, ġomi ġokokoreni tu, ġai ġema iaku ebaregoni. Ema ġai ġema ġauġau baregona ġaveiani tu, ġomi boġono kokore-korikori ġemi veġabidadamai.

¹⁰ Moġesina naima mai fefai maiġeri guruġa atore-vinimini, au mainai roġo maiġegu nuġanai. Korana au asi aurani, au banasi-raġasi nai tu, ġomi bana vaġa-guruġa gwaġiġimi. Korana Vereġauka na au mai maoro baregona eviniguto tu, ġomi ġemi veġabidadama bana vaġa-kokoreri, a dia bana vaġa-rakavari ġana.

Veġabituġu dokona

¹¹ Tarikakagu, ġegu guruġa magona tu maiġa, boġono gena. Tuġamaġi barana ġoirami ai boġono torea tu, boġono namo-vedaurea, ġegu guruġa mabarari boġono korana-iaġiri. Nuġami beġene gwaġiġi, mabarabarami tuġamaġi sebona moġo boġono ġabia, maino ai boġono tanu, ema veuravini e maino Barauna ġomi sevisevimi ai bene tanu.

¹² Karomi tata vetarikaka verauna na boġono vaġa-namori.

¹³ Veaġa o ekalesia tarimari mabarari na ġeri vevaġa-namo ġemi ai ġetuġu-iaġosiani.

¹⁴ Vereġauka Iesu Keriso ġena namo e varevare-bara ema Barau ġena veuravini ema Iauka Veaġa ġena vekako namona, ġomi mabara-barami iatami ai bene tanu.

PAULO ĜENA TORETORE GALATIA EKALESIARI ĜERI

Galatia vaĝa-foforina guruĝari

Paulo na mai fefa tu betaĝu Antioka, Efeso o Makedonia ai etanuto-ĝoi nuĝanai etoreato. Mai tu laĝani 48 ema 58 fakari ai ta etoreato. Mo tu Iesu maki emaseto murinai vau. Ĝia ĝena guruĝa baregori mai fefa nuĝanai tu karoa 2:19-21; 3:2-3; 3:11; 5:1 ekiraĝirito.

Paulo na mai fefa etoreato korana tu Iuda tarimari tari ĝe-ekalesiato moĝeri na Galatia ekalesiari vevaĝa-riba kerereri ĝevinirito-ĝoi naima. Ĝia ĝekirato-ĝoi, tarimarima tu Mose ĝena taravatu guruĝari beĝe korana-iaĝirini vauro vevaĝa-maĝuri korikori beĝe ĝoitaĝoani. Moĝesi naima evaĝa-guruĝa gwaĝiĝirito, ekirarito, maĝuri ema vei-iobukaiobuka tu veĝabidadama ĝereĝana ĝenana moĝo Barau ĝena namo ema varevare-bara nuĝanai bita ĝabiani, a dia ĝera ĝauvei e veiĝa ĝerina. Ema ekirarito, ĝita tu Keriso ĝena mase na taravatu ĝena seĝuka na eruĝa-vaĝirato, ema ĝita tu Iauka Veaĝa varau taĝabiato, be Iauka na bene ĝori-kaura.

Paulo na ĝena fefa tu maĝesi eboioĝaiato:

1. Paulo tauĝena na Vari Namona guruĝana ekiraĝiato - karoa 1-2
2. Vevaĝa-maĝuri tu taravatu ĝenana ba Barau ĝena namo e varevare-bara ĝenana eiaĝomani - karoa 3-4
3. Veiĝa rakavari ĝerina bitana raka-faka ba roĝo bitana veiri - karoa 5-6

¹ Au Paulo, apostolo tarimagu na mai fefa tu ĝomi Galatia nuĝanai ekalesia doĝoromi ĝemi atore-iaĝosiani. Au tu dia tarimarima ĝeri urai mai ĝauvei aveiani, e dia tarima ta na etuĝuguto, mai apostolo ĝauveina bana veia etato. Asiĝina. Au tu Iesu Keriso ema Tamara Barau na etuĝuguto nai, mai apostolo ĝauveina aveiani. Iesu Keriso tu Barau na mase na ma evaĝa-variĝisi ĝenoĝoiato.

² Ĝegu vevaĝa-namo tu tarikakara mabarari au ĝesi mainai ĝatanuni ĝesi, ĝomi Galatia nuĝanai ekalesia doĝoromi ĝemi ĝatuĝu-iaĝosiani.

³ Barau ĝita Tamara ema Vereĝauka Iesu Keriso ĝerina namo e varevare-bara ema maino ĝomi ĝemi ai bene tanu.

⁴ Iesu Keriso na ĝita ĝera Barau ema Tamara ĝena ura ekorana-iaĝirito, ĝia tauĝena ĝena maĝuri ĝita ĝera rakava dainai etore-tariato. Mo veiĝa eveiato anina tu, ĝita toma mai tanobarai etanuni rakavana ĝenana bene vaĝa-maĝurira uranai.

⁵ Tamara Barau arana bitana vaĝa-raĝea vanaĝivanaĝi! Amen.

Vari Namona tu sebona kwariĝutu moĝo

⁶ Ĝomi na mani maĝuri boĝo veia nai, au tu badaradara-rakava moĝo. Korana ĝomi tu Keriso ĝena namo e varevare-bara lorinai, Barau na ekeamito, ĝena tarimarimai boĝono iaĝo ĝana. Ma nuĝanai ĝomi tu asikauna ĝia ĝenana ma boĝo ragaraka-veĝita, benamo vari boruna ta ma boĝo ĝabi-raĝea.

⁷ Mani vau boĝo ĝabi-raĝea maniĝa tu dia Vari Namona. Asiĝina ĝinavaĝi moĝo. Ĝomi mani tu moĝoni, tarima kotari na ĝeĝofa-veĝonumini. Ĝia ĝeurani tu, Keriso Varina Namona beĝene vei-veĝonua veĝata ĝetoni.

⁸ Senaĝi ĝai na ĝomi tu Keriso Varina Namona moĝo ĝemi ĝaĝobata-iaĝiato, ma vari boruna ta tu asiĝina. Bema ĝai o guba aneruna ta vari boruna ta

ġemi ma baġa ġobata-iaġiani nai, dei moġesina beveini tarimana tu, rakava baregona ġenai betanu-vanaġi vanaġini.

⁹ Mai guruġa tu bita kiraġia, senaġi au na mai akiraġi-ġenoġoiani. Bema tarima ta na ġemi ai “Vari Namona” easi-ġobata iaġiani, senaġi ġia na eġobata-iaġiani varina tu mo ġoġabi-raġeato varina moġa ġesi asi ilaila nai tu, mo tarima ġenai rakava metona baregona bene tanu-vanaġi vanaġi.

¹⁰ Au maiġesina aguruġani tu, tarimarima na beġene ġabi-raġegu ġana, ba Barau na bene ġabi-raġegu? Ba mai tarimarima iauri navaġa-namori ġana aguruġani? Bema tarimarima iauri initoma maki roġo navaġa-namori barasi, au toma Keriso ġena vetuġunaġi ai tu asi bara iaġo.

Paulo apostolo tarimanai eiaġoto varina

¹¹ Tarikakagu mabarami, au na ġomi аваġa-guruġa korikorimini. Mo Vari Namona na ġomi ġemi ai aġobata-iaġiato, moġa tu dia tarima ta ġenana erefo-taġuito moġo varina.

¹² Mai Vari Namona maiġa, au na tu dia tarima ta ġenana aġbiato, ema dia tarima ta na evaġa-ribaguto. Asiġina ġinavaġi. Mai Vari Namona maiġa tu Iesu Keriso tauġena na ġegu ai evaġa-foforiato vau aribaiato.

¹³ Au guinenai Iuda ġeri doġoro nuġanai atanuto-ġoi nai, kara aveirito-ġoi variri tu ġoseġaġirito, be ġomi ma ribami. Barau ġena ekalesia doġorona aiġesi аваġa-midigu midigurito-ġoi e alai-lausilausirito-ġoi bana vaġa-rakavari veġata atato-ġoi variri tu ma ribami.

¹⁴ Au na Iuda seneri ġeri maġuri mabarabarari akorana-iaġi ginikaurito-ġoi. Ma au na mai maġuri aveiato-ġoi nuġanai tu, Iuda tarimari au ġuru karogu tauri mabarari au na aguine-iaġirito-ġoi.

¹⁵ Senaġi au tu roġo sinagu legana nuġanai, Barau na eġabi-viriġiguto, ema ġena namo e varevare-bara lorinai ekeaguto, ġia ġena ġauvei bana veia etato. Benamo Barau na eura-viniato ġaronai,

¹⁶ Natuna au ġegu ai evaġa-foforiato. Keriso au ġegu ai, Barau na evaġa-foforiato, anina tu, ġia eurato, au na Natuna Varina Namona irau bese tarimari ġeri ai bana ġobata-iaġia ġana. Barau na Natuna ġegu ai evaġa-foforiato nai tu, tarima ta ġenai asi ma avedanagito.

¹⁷ Ierusalemata ġana ġeapostolo-guinetu tarimari ġeri ai vedanaġi maki asi avaraġeto. A au mo veġa aġoitaġoato murinai tu, maoromaoro Arabia ġana aiaġoto. Ma monana ma aġenoġoi-iaġoto Damaseko ġana.

¹⁸ Monai, laġani toitoi (3) ġevanaġito murinai vau, Ierusalemata ġana avaraġeto, Petero ġesi baġana guruġa-ġuruġa uranai. Petero ġesi Ierusalemata ġaro gabanana imaima (15) ġatanuto.

¹⁹ Au mo negai apostolo boruna ta tu asi aġitaiato. Au tu Vereġauka tarina Iakobo (o Iames) moġo aġitaiato.

²⁰ Barau ġoiranai au na ġomi mai tu guruġa moġoniri atore-vinimini, asi aġofaġofani.

²¹ Ierusalemata araga-kwaneato tu, Siria ema Kilikia tanori ġana aiaġoto.

²² Keriso ġena tarimarima, Iudea tanonai ġetanuni ekalesiari, au ġitaġitagu ġia tu asi ribari.

²³ Senaġi ġia na au tu varigu korina moġo maiġesi eragato ġeseġaġiato-ġoi, ġekirato-ġoi, “Ġita guinenai evaġa-midigu midigurato-ġoi e elai-lausilausirato-ġoi tarimana, toma tu nevaġa-rakavaia etato-ġoi veġabidadamana ma eġobata-iaġiani.”

²⁴ Benamo Barau na kara au ġegu ai eveiato, moġa ġeseġaġiato nai tu, Barau ġevaġa-raġeato.

2

Apostolo tarimari na Paulo ġena ġauvei ġevaġa-moġoniato

¹ Laġani gabanana vasivasi (14) ġekorito murinai vau, Banabas ġesi Ierusalemema ġana ma ġaġenoġoi-iaġoto. Tito maki au na aġori-kauato, be ġia maki ġaiaġoto.

² Au tu Barau na ġegu ai evaġa-foforiato, naima aiaġoto Ierusalemema ġana. Ma monai Vari Namona, irau bese tarimari ġeri aġobataiato-ġoi varina, Ierusalemema ekalesia ġeri akiraġiato. Ma mo Vari Namona tu veġorikau tarimari baregori ġereġari ġeri ai maki akiraġiato, ġia na ġegu ġauvei beġene vaġa-moġonia ġana; korana agarito, akirato, asi namo au ġegu ġauvei ġuina moġa, o mai ġauvei variġuna aveirini maġa asi tauri ai beġe iaġoni gariri.

³ Tito tu Grik tarimana, ma au Ierusalemmai neganai, ġia tu au ġesi, senaġi ġia tauġanina kefina beġene lama-vaġia ġiġiraġena tu asi ġeveito.

⁴ Senaġi ekalesia o tarikaka ġofaġofari tari ġai fakamai ġerakatoġa-ġairito, ġeurato tu, Tito tauġanina kefina beġene lama-vaġia veġata ġetato. Ġia ġai fakamai ġema-rakatoġa-ġairito, korana ġeurato, ġai Keriso Iesu ġesi ġasebonato nai, ġai ġema maġuri namona e fakana maġa, beġene ġitalemaia uranai. Korana ġia ġeri ura tu, Iuda ġeri sene taravaturi na ġai ma beġene barubaruma maia.

⁵ Senaġi hora misina nuġanai ta maki ġia garori tu asiġina ġinavaġi veġata ġaseġaġirito. Ġai moġesina ġaveito tauna korikori tu, Vari Namona guruġana moġonina ġomi rekemi ai bene tanu-vesiriġu uranai.

⁶ Veġorikau tarimari baregori tu ma arari, a asi arari au ġegu ai, ġia tu ilaila moġo. Barau na tarimarima tu dia tauġanina murikana vetoġana eġitaiani. Maniġeri veġorikau tarimari na guruġa ta auna vari iatanai tu asi ġetorekauato.

⁷ Senaġi ġeġitaguto, Barau na au ġauvei eviniguto tu, mero tauġaniri kefiri asi ġelama-vaġirito tarimari ġeri, mo tu irau bese tarimari ġeri, Vari Namona bana ġobata-iaġia etato, ilailana Petero mero tauġaniri kefiri ġelama-vaġirito tarimari ġeri ai, mo tu Iuda tarimari ġeri ai, Vari Namona bene ġobata-iaġia etato kavana.

⁸ Korana Barau Iuda tarimari ġeri apostolo tarimana Petero ġena ġauvei nuġanai eġauveito-ġoi kavana tu, au irau bese tarimari ġeri apostolo tarimagu ġegu ġauvei nuġanai maki eġauveini.

⁹ Iakobo (o Iames), Petero ema Ioane tu rubu duġuna tarimari monai. Ġia na au ġegu ai Barau ġena namo e varevare-bara ġeġita-leaiato, benamo ġimari aroribari na au e Banabas ġeġabi-rukumato. Moġa anina tu, ġia ma nuġari mabarari ġesi ġekirato, Banabas ema au tu irau bese tarimari ġeri ai, ma ġia tu Iuda tarimari ġeri ai beġe iaġoni.

¹⁰ Guruġa sebona moġo ġai ġevinimato tu ġekirato, asi ġeri-ġari tarimari baġana tuġamaġiri e baġana vaġa-kavari ġetato. Senaġi mai veiġa tu au tauġegu na maki bana veia veġata atoni veiġana.

Paulo na Petero ekira-feiato, korana veiġa ġofaġofana eveiato nai

¹¹ Petero Antioka ġana eiaġomato neganai tu, au na ġoirana ġutu-ġutunai akira-matana matanaiato, korana ġia na veiġa eleaiato nai.

¹² Tovotovonai Iakobo na etuġurito tarimari Petero ġenai roġosi roġo beġere laġasi neganai, Petero tu irau bese tarimari ġesi ġeġaniġani vegogoto-ġoi. Senaġi Iakobo na etuġurito Iuda tarimari ġevotuto nai, ġia tu irau bese tarimari fakari na ma eraka-veġitato. Petero irau bese tarimari fakari na

eraka-veġitatu, korana mero tauġaniri ġelama-vaġirini veġana ġekorana-iaġiani tarimari, Iuda tarimari, gariri eveito nai.

¹³ Iuda tarimari kotari maki Petero ġesi ġesebonato, be Petero ġena mo veġa ġofaġofana ġeveiato. Ma Banabas maki ġia ġeri mai ġofaġofa maġurina na, be ġia maki ġeġofa-darereato.

¹⁴ Senaġi au ġegu ġitaġitai ġia tu Vari Namona maġurina korikorinai tu asi ġerakato-ġoi naima ġia mabarabarari matari ġutuġuturi ai au na Petero akira-matana matanaiato, akirato, “Ġoi tu Iuda tarimamu, senaġi Iuda tarimari ġeri sene maġurinai tu asi otanuni, a ġoi tu irau bese tarimari ġeri tanu-maġurinai otanuni. Ma kara dainai tu irau bese tarimari ovaġa-naġirini, Iuda tarimari seneri ġeri taravatu lorinai beġene tanu otoni, ei?”

Iesu bevaġa-moġoniani tarimana na moġo, Barau na vei-iobukaiobuka tarimanai bekiraġiani

¹⁵ Aba, ġita Iuda tarimara tu Iuda korikoriri ġerina taġorato. Ġita tu dia irau bese tarimari ġerina taġorato. Irau bese tarimari tu vei-rakava tarimari.

¹⁶ Ma ġita Iuda tarimara tu ribara, Barau na tarimarima tu dia taravatu na ekiraġirini veġari ġekorana-iaġi ginikaurini nai, ekirarini, asi ġeri vei-rakava etorini. Asiġina. Ġia tu Keriso ġenai ġeveġabidadamani naima ekirarini, asi ġeri vei-rakava etoni. Ġita maki moġesi. Keriso Iesu tavaġa-moġoniato naima Barau ekirato, asi ġera rakava etato. Dia taravatu na ekiraġirini veġari takorana-iaġi ginikaurini dainai. Asiġina. Keriso ġenai taveġabi-dadamato nai. Korana tu taravatu ekorana-iaġi ginikauani tarimana ta Barau na tu asiġina ġinavaġi beġabi-raġeani. Asiġina moġo.

¹⁷ Bema ġita Iuda tarimara tavekwaraġini, taurani, Keriso ġesi bitana sebona, be Barau na bene ġabi-raġera tatoni nai tu, ġita tauġera tavevaġa-foforini, ġita tu vei-rakava tarimara. Moġa anina tu, Keriso eiaġomato vei-rakava benema vaġa-baregoa ba? Asiġina ġinavaġi!

¹⁸ Bema au na mo taravatu, asi tauri ai avaġa-iaġorito dagarari, ma navaġa-ruġa ġenoġoiri atoni nai, au tu moġoni vei-rakava tarimagu, taravatu asi akorana-iaġiani.

¹⁹ Korana taravatu akorana-iaġirito-ġoi maġurinai au tu varau amaseto, be taravatu au na asi ma bakorana-iaġi ġenoġoiani. Taravatu akorana-iaġiato-ġoi maġurinai au tu amaseto anina tu, Barau ġena moġo bana tanu uranai.

²⁰ Au tu Keriso ġesi ġesatauro-sebonaguto; dagara sebona tu, roġo maġuri atanuni, senaġi mai tu dia au tauġegu ġegu maġuri. Asiġina. Mai tu Keriso au nuġagu ai maġuri etanuni. Au mai tauġani nuġanai mai maġuri atanu-iaġiani maiġa tu, Barau Natuna ġenai aveġabidadamani lorinai atanuni. Mai Barau Natuna na au eura-viniguto, ma au maġuri bana ġabia ġana, tauġena ġena maġuri evini-fitoġaiato.

²¹ Au na Barau ġena namo e varevare-bara tu asi atore-veġitaiani. Asiġina ġinavaġi. Korana bema tarima ta na taravatu bekorana-iaġiani nai, vei-iobukaiobuka tarimanai beiaġoni neganai, Keriso tu bere mase-kava, asi ġena namo ta.

3

Taravatu tana korana-iaġia, ba veġabidadamai moġo bisini tanu

¹ Ġomi Galatia tarimami babomi! Iesu Keriso satauro ai ġeikoko-kauato varina tu au ġegu ġobatai, be matami ġutuġutunai akiraġi-fofori ginikauato.

Ma ġomi mai tu kamara ġora tarimana na ġemi tuġamaġi bemeġa-veġonuri maia, ei?

² Au aurani, mai dagara sebona ġomi na ġokira-varagu: Ġomi na Iauka Veaġa tu taravatu ġokorana-iaġi ginikauato nai ġoġabiato, ba Keriso Varina Namona ġoseġaġiato, benamo ġovaġa-moġoniato nai ġoġabiato?

³ Ġomi tu moġoni boġo babo-korikori, ei? Ġomi maġuri variġuna dabaranai raka tu Iauka Veaġa ġena seġukai ġosinaiato, maitoma ġomi ġourani, magona tauġemi ġemi kokore ai boġono ġoitaġoa ġotoni?

⁴ Be, ġomi mo meto ma midigumidigu tu ġoġoitaġo-kavarito, asi ġeri namo ta? Senaġi mo meto ma midigumidigu, au ribagu tu, asi ġoġwa-kavarito.

⁵ Ma nadanaġimi atoni, Barau na ġomi Iauka Veaġa evinimini e fakami ai nuġa-farevaġi veġari boruri eveirini, korana ġomi na taravatu ġokorana-iaġi ginikauani nai ba? Ba Keriso Varina Namona ġoseġaġiani, benamo ġovaġa-moġoniani dainai?

⁶ Ġotuġamaġi-ġenoġoi, Aberahamo ġotuġamaġia: “Ġia tu Barau na ekiraġi-toreato guruġana evaġa-moġoniato naima, Barau ekirato, ġia tu vei-iobukaiobuka tarimana, etato.”

⁷ Moġesina naima boġono riba, Barau ġeġabidadama-viniani tarimari ġereġari moġo Aberahamo natuna.

⁸ Buka Veaġai etore-guineato guruġana na ekiraġiani, ekirani, ġoirai Barau na irau bese tarimari tu ġeri veġabidadama ġerina vau bekirarini, asi ġeri rakava betoni. Moġesina naima, Aberahamo ġenai Vari Namona tu ekiraġi-fofori guineato, ekirato, “Tanobara mabarabarari beseri tu, ġoi ġemuna vau vevaġa-namo beġe doġariani.”

⁹ Aberahamo na Barau eġabidadama-viniato, benamo Barau ġenana vevaġa-namo eġoitaġoato. Moġa ilailanai Barau ġenai ġeveġabi-dadamani tarimari mabarabarari tu, Barau ġena vevaġa-namo beġe ġabiani.

¹⁰ Taravatu ġekorana-iaġi ginikauani vau, Barau ġoiranai vei-iobukaiobuka tarimari ai beġe iaġoni ġetoni tarimari mabarari iatari ai tu rakava metona lelevaġina etanuni. Korana Buka Veaġai tu maiġesina ekirani, “Taravatu bukanai ġetorerito guruġari asi ġekorana-iaġi vanaġi-vanaġirini tarimari iatari ai tu rakava metona lelevaġina betanuni.”

¹¹ Buka Veaġa na bevaġa-fofori ginikaua, taravatu bekorana-iaġiani tarimana Barau ġoiranai tu dia vei-iobukaiobuka tarimana. Korana “Barau beġabidadama-viniani tarimana tu vei-iobukaiobuka tarimanai beiaġoni, be bemaġurini.”

¹² Taravatu tu irau veġata, ġia tu dia veġabidadama ġenana eiaġomani. Korana Buka Veaġa ekirani, “Taravatu ekorana-iaġi ginikauani tarimana tu taravatu ġenana moġo maġuri beġabiani.”

¹³ Senaġi ġita tu taravatu ġena rakava metona lelevaġina ġenana Keriso na varau evoi-vaġirato. Ġita tu ġia tauġena na eruġa-boroġirato, benamo mo rakava meto lelevaġina tu ġia na eġabiato. Korana Buka Veaġai etoreato, ekirani, “Ġau ai ġetou-kaurini, ġemaseni tarimari mabarabarari iatari ai tu Barau na rakava meto lelevaġina etore-kauani.”

¹⁴ Keriso na ġita taravatu ġena rakava meto lelevaġina ġenana evoi-vaġirato, tauna korikori tu, Barau na Aberahamo vevaġa-namo eviniato, mo vevaġa-namo moġa tu irau bese tarimari na maki Iesu Keriso ġenana beġene ġabia uranai. Korana mo dabarai tu, Barau na ekiraġi-toreato Iaukana tu Iesu Keriso beġe vaġa-moġoniani tarimari mabarari na maki beġe ġabiani.

Barau ġena taravatu na Barau ġena guruġatore guinena asi ilaila bekoki-fitoġaiani

¹⁵ Tarikakagu mabarami, tarimarima ġera tanu-maġurinai guruġa vaġa-ilailana ta nakiraġia. Vaġa-ilailana tarimarima ġera kiraġitore guruġana emoġonini, benamo tavaġa-ruġaiani nai tu, mo guruġatore moġa tarima ta na asi ma bekira-fitoġaiani o iatanai guruġa boruna ta asi ma betore-kauani.

¹⁶ Barau na mo guruġatore guruġari tu Aberahamo ema Aberahamo besena sebna moġo ġeri ai ekiraġirito. Buka Veaġai etoreato guruġana tu dia maiġesi ekirani, “Ġoi besemu ġutumari ġeri,” korana moġesi bere kira tu tarimarima ġutama bere kiraġiri; senaġi ġia tu ekirani, “Ġoi besemu sebna ġenai.” Mai tu tarima sebna kwariġutu moġo ekiraġiani, mo tu Keriso gereġana moġo ekiraġiani.

¹⁷ Au na kara akiraġiani tu iniġa: Barau ġena guruġatore guruġana Aberahamo tu evini-guineato; ma laġani sinau vasivasi ma gabana toitoi (430) evanaġiato murinai vau, Barau na taravatu evaġa-ruġaiato. Ma vau ema ruġato taravatuna na Barau ġena guruġatore guinena moġa tu asiġina ġinavaġi bekoki-fitoġaiani, benamo Barau ġena guruġatore moġa tu asi taunai bevaġa-iaġoani. Asiġina ġinavaġi veġata.

¹⁸ Bema Barau na evinirato dagarana tu taravatu bita korana-iaġi ginikauani vau bita ġabiani nai tu, mo bita doġariani dagarana moġa tu, ribara, dia ekiraġi-toreato maġurinai bita doġariani. Senaġi Barau tu ġena namo e varevare-barai eguruġa-toreto, ma Aberahamo eviniato.

¹⁹ Bema moġesi nai tu, kara dainai taravatu eiaġomato? Taravatu eiaġomato anina tu, tarimarima na Barau ġekira-sirivaġiato-ġoi maġurina, moġa tu taravatu na bene vaġa-fofori ginikaua. Ma Barau na mai taravatu tu dia betanu-vanaġi vanaġini etato. Asiġina. Mai taravatu tu betanu-iaġoni mo, Aberahamo natuna bemaġurini vau bea magoni. Korana Barau ġena mo guruġatore tu ġia ġenai eveiato. Mai taravatu tu Barau na aneru ta eviniato. Benamo mo aneru na tu Barau ma tarimarima vefakari ai eruġato tarimana eviniato. Ma mo vefakari ai eruġato tarimana na tu, ġita ġerai ekiraġi-foforiato, bitana korana-iaġia ġana.

²⁰ Bema tarima sebna moġo eġauveini nai tu, vefakai eruġani tarimana tu asi ġena ġauvei. Ma Barau mainai tu ġereġana moġo, e ġereġana moġo eguruġa-toreto.

Taravatu anina tu kara?

²¹ Be, moġa tauna tu, taravatu na Barau ġena guruġatore guruġana ekira-fitoġaiani? Asiġina ġinavaġi. Korana bere Barau na tarimarima taravatu ta bere viniri, benamo mo taravatu ġenana tarima maġuri beġere doġaria nai tu, moġoni, ġita tu taravatu korana-iaġi-ginikauna ġenana, vei-iobukaiobuka tarimarai bitara iaġo.

²² Senaġi Buka Veaġai etoreato guruġana na ekiraġi-foforiani, ekirani, “Mai tanobara mabarabarana tu vei-rakava ġena seġuka gaburenai etanuni.” Moġa lorinai kara Barau na ekiraġi-toreato dagarana, moġa tu Iesu Keriso ġenai bita veġabidadamani vau bita doġariani. Moġa tauna tu, Keriso bevaġa-moġoniani tarimana tu Barau na ekiraġi-toreato varevarena beviniani.

²³ Iesu ġenai veġabidadama maiġa roġosi roġo bere fofori nuġanai, tovo-tononai ġita tu taravatu ġena seġuka gaburenai tatanuto-ġoi, taravatu na ebiri-ġaurato mo, Iesu ġenai veġabidadama Barau na ma ema vaġa-foforiato.

²⁴ Be, taravatu na tu ġita eguine-iaġirato mo, Keriso eiaġomato, benamo ekorito. Moġa anina, ġita tu Iesu ġenai bita veġabidadamani vau, Barau bekirani, ġita tu asi ġera rakava betoni.

²⁵ Initoma tu veġabidadama ġena nega beraġasi, naima taravatu na ġita tu asi ma beġori-kaurani.

Veġabidadamai Barau natunai bita iaġoni

²⁶ Ġomi mabarabarami tu Barau natuna, korana tu Keriso Iesu ġenai ġoveġabidadamani bene.

²⁷ Ġomi babatiso ġoġabiato tarimami mabararami, Keriso ġesi ġosebonato, be Keriso nuġanai ġotanuni.

²⁸ Ġomi mabararami fakami ai ta tu asi ġemu irau ta. Ġoi tu Iuda tarimamu o irau bese tarimamu, tuġu-rakaorakao tarimamu o fakai otanuni tarimamu, vavine o tau, senaġi ġomi mabararami tu sebona moġo. Keriso Iesu ġesi ġosebonato nai, ġomi mabararami tu sebona kwariġutu moġo.

²⁹ Bema ġomi Keriso ġena tarimarima nai, ġomi tu Aberahamo besena, ema Barau na ekiraġi-toreato dagarana maki boġo ġabiani.

4

Vetuġunaġi tauna tu irau, ma natuna korikoriri maki irau

¹ Au tu iniġesi akirani: Mero misina ta, bema ġia roġo mero kei neganai, tamana na eviniato dagarari mabarabarari asi roġo beġaunarini. Aba, mo dagara mabarabarari tu ġia ġena farefare, senaġi ġia tu roġo mero kei, naima ġia na asi roġo beġaunarini. A ġia tu tuġu-rakaorakao tarimana kavana roġo betanuni.

² Mo mero misina benariani tarimari, ema mo ġena dagara beġe ġita-ġaurini tarimari ġeri veġitaġau gaburenai roġo betanuni, beiaġoni mo, tamana na ekiraġi-toreato ġarona bea ġabiani.

³ Ġita maki moġesina, roġo mero misira e kekenira misira negari ai tu, taravatu irauirau e tanobara barauri ġeri tuġu-rakaorakao merora e kekenirai taiġoto.

⁴ Senaġi Barau na eviriġiato ġarona evotuto nai, Barau na Natuna etuġu-iaġomaiato, vavine ta ġenana ema maġurito. Barau Natuna etuġu-iaġomaiato maiġa tu, taravatu ġena seġuka gaburenai ema maġurito.

⁵ Ġia taravatu ġena seġuka gaburenai ema maġurito korana tu, taravatu ġena seġuka gaburenai tatanuni tarimarimara benema voi-ġenoġoira, benamo Barau natunai bisini iaġo ġana.

⁶ Ġomi tu moġoni Barau natuna. Moġesi naima Barau na Natuna Iaukana etuġu-mariġoato, ġita tata lorurai o nuġarai eraka-toġato, ma etanuni. Mo Iauka moġa ġita lorura ġuturi na ekea-rosini, ekirani, "Tamagai, Tamagai!" etoni.

⁷ Moġesi naima ġomi toma tu dia taravatu ġena tuġu-rakaorakao tarimami. Asiġina. Ġomi toma tu Barau natuna. Ġomi tu moġoni Barau natuna lorinai, Barau na natuna bevinirini dagarari mabarabarari tu ġomi na maki boġo ġabirini.

Paulo na Galatia tarimari etuġamaġi-baregorito

⁸ Guinenai ġomi na Barau roġosi roġo boġoro ribaia neganai, ġomi tu ġofaġofa barauri ġotoma-rakariġo vinirito-ġoi, (ġia tu ġima veiveiri dagarari moġo), ġia ġeri tuġu-rakaorakao tarimari ai ġoiġoto.

⁹ Senaġi toma tu, Barau boġoma ribaia, ba nakira, Barau na ġomi bema ribami. Ma kamasi nai tu taravatu moiramoirari, asi tauri dagarari ma

ġokorana-iaġi ġenoġoiri ġotoni? Ġomi ġourani tu, maniġeri taravatu na ma beġene barubaru-tarimi ġotoni, ei?

¹⁰ Ġomi tu ġaro e ġue, vereko ġarori e laġani tari ġotuġamaġi-baregorini e ġokorana-iaġi baregorini.

¹¹ Au ġomi ġemi veiġa aġitarini tu, mai ama tuġamaġi-garini. Akirani, au ġomi ġemi ai tu, betaġu avekwarāġi-kavato banaġu atoni.

¹² Tarikakagu mabarami, anoġimini, au kavana boġono vei, korana au maki taravatu aiaġuiato nai, ġomi kavana aveito bene. Ġomi na au ġegu ai veiġa rakavana ta tu asi ġoveiato.

¹³ Ġomi maki ma ribami, au tovotovonai ġomi Vari Namona au na aġobata-vinimito tu, mo keve ta na eġabiguto, benamo maninai tatanuto-ġoi nai.

¹⁴ Aba, au ġegu ai mo keve moġa tu, ġomi ġemi ai vetovonaġi baregona ta, senaġi asi ġoġita-fitogaġuto, e asi ġoragakwane-moġovaġiguto. A ġomi na au tu Barau ġena aneru ta boġoro ġabi-raġea ilailanai ġoġabi-raġeguto. Ma au tu noġa moġo Keriso Iesu tauġanina korikorina noġa ġoveiguto.

¹⁵ Ġomi ġemi iaku e verere maki barego. A toma tu kamasi, mo iaku e verere tu aiġeri, ei? Mai tu moġoni aguruġani, mo negai bema boġoro ura, matami ġoġibo-vaġiri, benamo au ġovinigu boġoro si nai tu, ġoro ġibo-vaġiri, benamo boġoro vinigu.

¹⁶ Toma tu kamasi? Guruġa moġoniri akira-varamini nuġanai tu, ġemi vetari tarimanai ma boġo vaġa-iaġoġu?

¹⁷ Maniġeri ġofaġofa tarimari na ġomi ġemi ai ura tu barego lelevaġina ġetoreani, senaġi ġia ġeri tuġamaġi e ura tu asi roroġoto. Ġia ġeri ura baregona ġeveiani tu, ġomi ġai ġemana moġo boġono raka-veġita, benamo ġia ġeri ai beġene ġabi-vanaġimi ġetoni. Ma ġia na beġene ġabi-vanaġimi, be ġia boġono ura-viniri ġetoni.

¹⁸ Vanaġivanaġi tarimarima namo beġene ġabia uranai, bita uravini-baregorini tu namo vedaurea. Ma namo bene ġora ġana, tarimarima bouravini-baregorini maġurina tu, dia au ġoiragu ai moġo boġono veia. Asiġina.

¹⁹ Natugu, ġomi tu au na atuġamaġi-kaumini. Au tu ġomi urami ai, be noġa vavine ma baniri na mero ġeruġu-vaġirini ġetoni nai, midigu ġeġabirini kavana, au midigu aġanini. Mai midigumidigu tu baġabi-iaġoani mo, Keriso vetoġana korikori ġomi ġemi ai bevetoreni.

²⁰ Initoma au ġegu ura barana tu, ġomi sevimi ai barasi ruġa-tari, be garogu bara kefoa, bara vaġa-kava ġinikaumi. Korana au ġomi ġemi ai tu mai ama daradarani, asi aribani, kamasi bavaġa-kavamini.

Hagar ma Sara

²¹ Ġomi taravatu gaburenai tanu ura-dikana ġoveini tarimami na ġokira-varagu. Ġomi taravatu na kara ekiraġiani guruġana tu ġoseġaġi-ġinikauani ba?

²² Buka Veāġa tu maiġesi etoreato: Aberahamo natuna tu ruarua, ta tuġu-rakaorakao vavinena ġenana emaġurito, ma ta tu vavine fakana, dia tuġu-rakaorakao vavinena, ġenana.

²³ Tuġu-rakaorakao vavinena ġenana emaġurito merona tu, Aberahamo e Hagar ġegenavogoto, monana eġorato. Senaġi vavine fakana ġenana emaġurito merona tu, Barau ġena guruġatore lorinai emaġurito.

²⁴ Mai vetoġa maiġeri tu guruġa vaġa-ilailari veġari moġo. Mai vavine ruarua maiġeri tu, Barau ġena kiraġitore ruarua ġevaġa-foforirini. Hagar

tu Barau ġena kiraġitore ta Sinai Ġorona na eiaġomato dagarana ekiraġiani, ma ġia na eruġa-vaġirito tarimari tu tuġu-rakaorakao tarimari.

²⁵ Mai guruġa “Hagar” tu Arabia tarimari na Sinai Ġoronai ġekiraġiani. Ema Hagar maki toma etanuni Ierusalemata vetoġana kavana. Korana mai Ierusalemata sitina e Ierusalemata tarimari tu tuġu-rakaorakao tarimari.

²⁶ Senaġi gubai etanuni Ierusalemata tu faka. Ma ġia tu ġita sinara.

²⁷ Buka Veaġai tu maiġesina ekirani,

“Vavine gabanimu,

mero asi oġabini vavinemu,

e mero ġabi midiguna asi ribamu vavinemu,

noiaku e noverere!

Korana tu ġaraġona na eiaġuiato vavinena natuna tu ġutuma gorogoro,

ma ġaraġona na asi eiaġuiato vavinena natuna tu asi vovoka.”

²⁸ Tarikakagu mabarami, ġomi tu Isako kavana. Barau ġena guruġatore lorinai, Barau natunai ġoiaġoto.

²⁹ Mo negai Aberahamo e Hagar ġegenavogoto nai, eġorato merona na Iauka Veaġa ġena seġukai emaġurito merona evaġa-midigu midiguato, moġesi kavana maitoma maki mo veġa sebana eġorani.

³⁰ Senaġi Buka Veaġai etoreato guruġana tu kara etoni? Ġia tu ekirani, “Mani tuġu-rakaorakao vavinena ma natuna ġesi tu ġomi sevimi na boġono lai-veġitari. Korana vavine fakana natuna ġena farefare mani tuġu-rakaorakao vavinena natuna ġesi tu asi veġata beġe ġauna-vegogoani.”

³¹ Ma, tarikakagu, ġita tu dia tuġu-rakaorakao vavinena natuna. Asiġina. Ġita tu vavine fakana natuna.

5

Taravatu irauirauri ġeri tuġu-rakaorakao tarimari ai asi ma boġono iaġo

¹ Ġita tu bitana faka uranai, Keriso na taravatu misimisiri ġerina eruġa-vaġirato. Be boġono ruġa-gigitari. Ma tauġemi mani Iuda tarimari ġeri taravatu misimisiri e vereko irauirauri ġeri tuġu-rakaorakao tarimami ai asi ma boġono vevaġa-iaġo.

² Ġoseġaġi! Au Paulo na akiramini, bema ġomi tauġanimi kefiru beġe lama-vaġirini nai tu, Keriso na ġita bene ruġa-vaġira ġana, kara eveiato, moġa tu asi ġena seġuka ġomi ġemi ai.

³ Ema mani deidei tauġaniri kefiru beġe lama-vaġirini tarimami tu navaġa-guruġami, ġoseġaġi. Ġomi tu taravatu mabarari misikose boġono korana-iaġi ginikauri veġata.

⁴ Bema ġomi ġokirani, taravatu boġono korana-iaġi ginikaua, be Barau ġoiranai vei-iobukaiobuka tarimami ai boġono iaġo ġotoni tu, tauġemi moġo Keriso ġenana ġoveġabi-ġerevaġini. Ema ġomi tu Barau ġena namo e varevare-bara ġenana ġoveġitani.

⁵ Iauka Veaġa ġena seġukai Barau ġenai taveġabidadamani, ema tavaġa-nogani, Barau na vei-iobukaiobuka tarimara benesi ġana.

⁶ Keriso Iesu ġesi esebonato tarimana tu tauġanina kefiru ġelama-vaġiato ba asi ġelama-vaġiato tu asi ġeri irau ta; mai veġa ruarua ġerina namo ta asi beġorani. Dagara baregona korikori tu veġabidadama, mo veġabidadama na veuravini evaġa-foforiani.

⁷ Ġomi tu raga-iruiru ai ġoraga-ginikauto-ġoi. Ma kamara deikara na ġoirami easi-kouġauato, benamo toma tu guruġa moġonina asi ma ġokorana-iaġiani?

⁸ Mani vevaġa-ura veiġana maniġa tu dia ġomi ekeamito Barauna ġenana eiaġomani.

⁹ Boġono riba, farao evaġa-tuburini muramurana kotuna na farao evaġa-tubu baregoani.

¹⁰ Barau ġenai ġegu tuġamaġi tu atorekau-gwaġiġiani, korana ribagu, ġia na bevaġa-kavamini, benamo iaunega boruna ta asi ma boġo ġabi-raġeani. Mani ġomi evaġa-tuġamaġi daradaramini tarimana maniġa tu, ġena veiġa voina metona bedoġariani veġata.

¹¹ Tarikakagu mabarami, bema au na mero tauġaniri kefiru lamavaġi veiġana initiba roġo aġobata-iaġiani nai, au karase nai tu roġo ġevaġa-midigu midiguguni? Bema au na mero tauġaniri kefiru lamavaġi veiġana roġo bara ġobata-iaġia nai tu, Keriso ġevaġa-satauroato varina aġobata-iaġiani, mainana tarimarima nuġari tu asi bere vaġa-metori.

¹² Ġomi ġemi tuġamaġi ġevei-veġonu veġonurini tarimari maniġeri, namona tu tauġeri na seuri beġene farari.

¹³ Moġoni, tarikakagu, ġomi Barau na ekeamito tu, taravatu irauirau korana-iaġiri ġerina boġono raka-faka ġana. Ma ġomi tata tu dia taravatu gaburenai ġotanuni, senaġi fakai ġotanuni. Mani fakai ġotanuni dainai tu, tauġani ġena ura rakavari boġono korana-iaġiri ba? Asiġina ġinavaġi! Ġomi tu ma veuravinimi ġesi karomi ġesi boġono vevaġa-kava, e karomi ġeri vetuġunagi boġono iaġo-vini.

¹⁴ Taravatu mabarabarari tu taravatu guruġana sebonai moġo Barau na evaġa-iaġoato, ekirato, “Sevimu tarimana bono ura-vinia, ġoi tauġemu oveura-vinini ilailanai.”

¹⁵ Bema ġomi tauġemi karomi tata ġesi moġo boġo vekira-ġarama ġaramani e boġo vevaneni nai tu, boġono venari, korana karomi ġesi tauġemi moġo boġo vevaġa-rakavani, benamo veġabidadama na boġo ketoni garina.

Tauġani ġena veiġa e Iauka ġena veiġa

¹⁶ Au tu iniġesina akirani: Iauka Vevaġa na ġemi maġuri bene guine-iaġiri, be tauġani ġena ura rakavari asi boġono korana-iaġiri.

¹⁷ Ġita ribara, tauġani na euravini-baregorini veiġari, Iauka na tu asi euravirinini, ema Iauka na euravini-baregorini veiġari, tauġani na tu asi euravirinini. Ġia tauri ruarua tu ġevevaġini. Moġesina naima, ġoi na veiġa namori bono veiri otoni veiġari tu asi oveirinini.

¹⁸ A bema ġoi Iauka na eġori-kaumuni nai, ġoi tu dia taravatu gaburenai otanuni.

¹⁹ Tauġani na euravini-iaġirinini veiġari tu maiġeri: Mata-boraġa veiġari, veiġa mirori, kima veiġari,

²⁰ kwaivakuku toma-rakariġo, ġora e meġameġa, vebaruvini, vevane, mama, niaraniara, arana beġene vaġa-raġea etoni veiġari, veġareveġare, vevare-kirakira veiġari,

²¹ dagara mata-kifakifari o mata-ġaniġaniri, niuniu ema ġoreġore, ma veiġa irauirau maiġesi kavari. Guinenai akira-toreġaumito kavana, toma maki akira-toreġaumini, maiġesi veiġari beġe veini tarimari tu, asiġina ġinavaġi Barau ġena Basileia nuġanai beġea raka-toġani.

²² Senaġi Iauka ġwaġwana tu maiġeri: Veuravini, iaku, maino, vevaġa-gwaġiġi, veiau-namo, nuġa-namo, vetuġamaġikau,

²³ nuġa-ġavemuko o manau, ema nuġa-gwaġiġi. Maiġeri veiġa tu taravatu na asi ekourini, asi taravaturi.

²⁴ Keriso Iesu ġena tarimarima korikori vetoġana tu maiġesi: Ġia tu tauġani na eġabiraġe-baregorini dagarari e euravini-iaġirini dagarari mabarabarari eikoko-kaurito satauro tuġunai Keriso ġesi.

²⁵ Bema ġita Iauka Veaġa na ġera maġuri eguine-iaġirini nai tu, Iauka Veaġa ġena dabarai maki bisini raka.

²⁶ Ġita tauġera asi sivekiraġi-varaġevaraġe, e karora nuġari asi sivei-barubaruri, ema karora tata ġeri ai dagara tari moġeri asi simata-ġaniġani-iaġiri.

6

Ekalesia karomi ġesi boġono vevaġa-kava

¹ Tarikakagu mabarami, bema fakami ai tarima ta na veiġa eleaiani ġoġitaiani nai tu, Iauka Veaġa na ġemu maġuri eguine-iaġiani tarimamu na nuġamu ma manauna ġesi bono vaġa-kavaia, ġena maġuri bono toto-iobukaia maia. Senaġi ġoi tauġemu maki bono venari. Asi namo Satani na ġoi maki beriba-ġanimuni ġesi.

² Karomi tata ġesi boġono vevaġa-kava, ġemi meto boġono ġwa-barabarari, korana moġesi boġo veini tu, Keriso ġena taravatu boġo korana-iaġi ġitakauani.

³ Bema tarima ta tauġena bevetuġa-maġini, ġia tu tarima korikori betoni, a nuġanai ġia tu asi ġeiaviani tarimana. Ġia tu tauġena kekei moġo eveġofaġofa-iaġini kekei.

⁴ Tarimarima mabarari tu tata ġeri veiġa e maġuri beġene vetau-ġinikauri. Benamo moġa murinai vauro tata ġia tauġena ġena maġuri namona iakuna bene vei. A dia ġia ġena maġuri namona tarima ta ġena maġuri ġesi bene vaġa-vetovoa.

⁵ Korana tu tarima tata ġereġana na ġena maruna metona bene ġwaia.

⁶ Tarima ta deikara riba eġabini Barau ġena guruġai tarimana tu, ġia ġenai kara etanuni dagarari kota ġena vevaġa-riba tarimana bene varevare-vinia.

⁷ Tuġamaġi kerereri na asi beġene ġabimi. Barau tu asi boġo ġofaiani. Tarimarima tu kara ġuena evaroani, benamo moġa ġwaġwana ġereġana moġo eġabiani.

⁸ Tauġani ġena ura rakavari ekorana-iaġirini tarimana tu, tauġani ġena ura rakavari ġerina maġuri rakava kwaikwaina e mase bedoġaririni. A Iauka Veaġa ġena veiġa namori ekorana-iaġirini tarimana tu, Iauka Veaġa ġena veiġa namori ġerina maġuri vanaġivanagi beġabiani.

⁹ Moġesina naima veiġa namori veiveiri ai asi bitana gau. Korana veiġa namori veiveiri asi bita vaġa-ketoani nai tu, kwakwa negana korikorinai tu ġaniġani bita kwa-doġarini.

¹⁰ Moġa lorinai ġita ġera mai nega namonai tu tarimarima mabarabarari ġeri ai veiġa namori bisini veiri. Ma mai veiġa namori tu Keriso ġenai ġeveġabidadamani besena mabarabarari ġeri ai tu bisini veiri veġata.

Dia kefi lamavaġi ġenana maġuri boġoitaġoani

¹¹ Mai fefa tu au tauġegu na batorea ġomi ġemi. Ġoġitaiani, mai guruġa-matari baregori atorerini mai fefai.

¹² Ġoseġaġi, ġomi tauġanimi kefiru beġene lama-vaġiri guruġari ġevei-gwadarini tarimari, maniġeri tu tauġani murika na dagarari koriri ġevekokoroku-iaġirini tarimari. Mani tarimarima maniġeri tu Keriso ġena satauro dainai beġe vaġa-midigu midigurini garinai maniġesi ġeveini.

¹³ Tauḡaniri kefirī ḡelama-vaḡirini tarimari na taravatu tu asi ḡekorana-iaḡiani. A ḡia tu ḡeura-baregoni, ḡomi tauḡanimi kefirī beḡene lama-vaḡiri ḡetoni. ḡia ḡeura-dikani tauna korikori tu, ḡomi tauḡanimi kefirī beḡe lama-vaḡirini nai, beḡene veiavi ḡana.

¹⁴ Au dagara ta vekokorokuna tu asiḡina ḡinavaḡi baveini, a au tu ḡita ḡera Vereḡauka Iesu Keriso ḡena satauro moḡo bavekokoroku-iaḡiani. Korana mai satauro ḡenana tanobara dagarari au ḡegu ai tu ḡemaseto satauro tuḡunai, ema au maki tanobara dagarari ḡeri ai tu amaseto satauro tuḡunai.

¹⁵ Mero tauḡaniri kefirī ḡelama-vaḡirini nai, namo ta asi beḡorani, ema mero tauḡaniri kefirī asi beḡe lama-vaḡirini nai, maki namo ta asi beḡorani. Korana dagara baregona sebona Barau ḡenai tu, Barau na tarima variḡu geragerarai evaḡa-iaḡorani.

¹⁶ Mai maḡuri maiḡa beḡe tuḡamaḡiani e beḡe korana-iaḡiani tarimari tu Barau ḡena tarimarima o Isaraela tarimari korikori; ḡia iatari ai maino e vevetuḡaḡwa bene tanu.

¹⁷ Maitoma beiḡoni, tarima ta na au meto asi ma bene vinigu, korana Iesu ḡebaru-viniani tarimari na ḡekwariguto, be ḡegu giri tauḡanigu ai aḡwarakaorini, moḡeri na ḡevaḡa-foforinai, au tu Iesu Vereḡauka ḡena vetuḡunaḡi tarimana korikorina.

¹⁸ Tarikakagu mabarami, ḡita ḡera Vereḡauka Iesu Keriso ḡena namo ma varevare-bara ḡomi mabarami iaukami ḡesi bene tanu. Amen.

PAULO ĜENA TORETORE EFESO EKALESIARI GERI

Efeso vaĝa-foforina guruĝari

Paulo na mai fefa tu Romai dibura numanai etanuto-ĝoi nuĝanai etoreato (Apostolo 28). Mai fefa tu betaĝu laĝani 60 o 61 ai etoreato, mo tu Iesu maki emaseto murinai. Mai fefa anina baregona tu, “Ekalesia doĝorona tu Keriso Tauĝanina,” ema mai fefa ĝeĝori-kauani siriri tu karoa 4:1-4.

Paulo na mai fefa etoreato ĝena ura baregona tu, Efeso ema Asia Keina (o Asia Minor) mabarana nuĝanai maki Iesu Keriso ĝevaĝa-moĝoniani tarimari, 1) ĝeri veuravini ema veĝabidadama Keriso ĝenai ma beĝene toresirivaĝia ĝana; 2) bene launaĝiri, tarima guinena ma ĝena maĝuri rakavari ĝesi beĝene koki-fitoĝaia, ma tarima variĝu geragerana beĝene tore-kaua; 3) bene vaĝa-ribari, Keriso tauĝanina nuĝanai Iuda tarimari ema irau bese tarimari tu sebona moĝo, asi ĝeri irau ta; 4) Keriso ema ekalesia doĝorona nuĝari ai kara vekuretoĝana etanuni bene vaĝa-foforia ĝana.

Paulo na mai fefa tu maiĝesina eboioĝaiato:

1. Ĝita ĝera farefare ĝena barego Keriso ĝena maĝuri nuĝanai - karoa 1-3
2. Ĝita Keriso ĝena maĝuri nuĝanai tu aiĝesina bitana tanu - karoa 4-6

¹ Au Paulo, Barau ĝena ura lorinai Keriso Iesu ĝena apostolo tarimagu ai aiaĝoto. Mai fefa tu Efeso ai Barau ĝena veaĝa tarimami, Keriso Iesu ĝenai ma ĝemi vetuĝamaĝikau tarimami, atore-vinimini.

² Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

Keriso ĝena maĝuri nuĝanai Barau na namo iauka rekenai evinirani dagarari

³ Barau, ĝita ĝera Vereĝauka Iesu Keriso Tamana, sivaĝa-raĝea, korana Keriso ĝesi tasebonato maĝurina nuĝanai, ĝia na iauka rekenai gubai ĝetanuni dagarari namori moĝeri mabarari ĝita evinirato.

⁴ Tanobara roĝosi roĝo bere veia ĝaronai veĝata, Keriso na vevaĝa-maĝuri ĝauveina beveiani bakunai, Barau na ĝita ĝia ĝena eĝabi-viriĝirato. Ĝita eĝabi-hidirato tu, ĝia ĝoiranai bitana veaĝa e asi ĝera vei-rakava ta bitana tanu ĝana. Barau ĝena veuravini lorinai,

⁵ ĝia na mai maĝuri eboioĝa-guineato, ekirato, ĝita tu Keriso ĝenana ĝia natunai bevaĝa-iaĝorani. Mai tu ĝia tauĝena ĝena nuĝa-namo ai ĝena ura eveiato veĝana.

⁶ Barau ĝena namo e varevare baregona marevana namo vedaureana sivaĝa-raĝea. Korana mai namo e varevare-bara maĝa tu Barau na ĝita evini-kavarato moĝo, euravini-baregoani merona, Iesu Keriso, ĝena maĝuri nuĝanai.

⁷ Ĝita tu, Keriso emaseto nai, rarana na evoi-ĝenoĝoirato, e ĝera rakava maki etuĝamaĝi-fitoĝarito. Mai tu Barau ĝena namo e varevare-bara namo vedaureana veĝana,

⁸ ĝita ĝerai barego lelevaĝi evaĝa-foforiato, ema iaunega e tuĝamaĝi-faka evinirato.

⁹ Barau ĝena ura Keriso ĝenana beveiani veĝana tu vekuretoĝa, senaĝi tauĝena ĝena nuĝa-namo ai ĝita evaĝa-ribarato.

¹⁰ Mai Barau ĝena ura o boioĝa maĝa tu ekiraĝi-toreato ĝarona beĝabiani vauro bevaĝa-foforiani. Mo tu gubai ĝetanuni dagarari e tanobarai ĝetanuni

dagarari mabarari Keriso kwakuna koranai beḡabi-vegogorini. Benamo Keriso na moḡeri dagara mabarari beguine-iaḡirini.

¹¹ Ġita tu Keriso bakunai Barau na ḡena eḡabi-virigirato, tauḡena na tovotovonai veḡata eboioḡaiato ilailanai. Ma dagara mabarari maki ḡia tauḡena na eura-iaḡirni dabarari ai eḡauvei-iaḡirini.

¹² Moḡa lorinai ḡai Iuda tarimama, deiri Keriso ḡavaḡa-moḡoniato ma ḡenai ḡavetuḡa-maḡikau-guineto tarimama na Barau marevana baregona baḡana vaḡa-raḡea.

¹³ Ma ḡomi irau bese tarimami na maki mai guruḡa moḡonina tu ḡovaḡa-moḡoniato, mo tu Barau na ḡomi bevaḡa-maḡurimini Varina Namona guruḡana. Ġomi mai guruḡa ḡoseḡaḡiato nai tu, ḡovaḡa-moḡoniato, benamo Keriso ḡenai ḡovetuḡamaḡikauto. Moḡesina naima Barau na ḡomi maki ḡia ḡena tarimarimai evaḡa-iaḡomito. Barau na ḡomi eḡabi-raḡemito vetoḡana ḡemi ai eveiato tu, Iauka Veaḡa, ekiraḡi-toreato Iaukana, evinimito.

¹⁴ Ġita na Iauka Veaḡa tu varau taḡabiato, moḡesi naima ribara, Barau na ḡena tarimarima ḡeri ekiraḡi-toreato dagarana tu ḡita na maki bita ḡabiani. Initoma tu roḡo tavenarini, beiaḡoni mo, Barau na ḡena tarimarima beḡabi-iaḡorini ḡia sevina ḡana. Barau marevana baregona sivaḡa-raḡea.

Paulo ḡena ḡauḡau

¹⁵ Moḡesina naima, au tu Iesu Vereḡauka ḡoḡabidadama-viniani e Barau ḡena tarimarima veaḡari ḡoura-vinirini varina ama seḡaḡiato ḡarona na veḡata,

¹⁶ Barau tanikiu-vinina ḡomi bakumi ai tu asi avaḡa-magoani, e iatami ai aḡauḡauni.

¹⁷ Akirani, ḡera Vereḡauka Iesu Keriso ḡena Barau na iaunega ema vevaḡa-fofori Iaukana bene vinimi, be Barau boḡono riba-ginikaua. Barau tu Tamara, ma ḡia marevana ma mamana tu iaru-korokoro.

¹⁸ Ma Barau anoḡiani, akirani, ḡemi tuḡamaḡi mama bene vinimi, ḡena vevaḡa-namo irau vedaureana, voina baregona dagarana boḡono ḡabia uranai ekeamito ḡotuḡamaḡikauani, moḡa tu boḡono riba-ginikaua. Be Barau ḡena tarimarima veaḡari na dagara namo vedaureari beḡe ḡabirini, moḡeri tu boḡono ribari.

¹⁹ Ema Barau tavaḡa-moḡoniani tarimara nuḡarai Barau ḡena seḡuka iaru-korokorona eḡauveini maiḡa maki boḡono ribaia. Barau ḡena mai seḡuka maiḡa ḡena ḡauvei kokorena tu barego lelevaḡi.

²⁰ Ġia na tu mai seḡuka kokorena Keriso ḡenai evaḡa-foforiato nai, Keriso mase na evaḡa-variḡisi ḡenoḡoiato, e gubai ḡia ḡimana aroribanai evaḡa-tanuato.

²¹ Keriso tu monai tuḡunai etanuni e evereni. Ġia tu iauka rakavari mabarari, ḡeveḡitaḡauni iaukari, e ḡeri maoro barego lelevaḡi iaukari, e ma ḡeri seḡuka iaukari, ma seḡuka lelevaḡi aneruri, ema ara ḡekiraḡirini arari mabarari iata-raḡeri ai evereni. Mai tu dia mai tatanuni neganai moḡo, asiḡina, mai tu ḡoirai vau mani eiaḡomani neganai maki ḡia tu bevereni veḡata.

²² Barau na dagara mabarari Keriso kwakuna fanafanana gaburenai etorerito, e Barau na ḡia tu ekalesia mabarana bene debaia etato.

²³ Ekalesia tu Keriso tauḡanina. Ma mai tauḡanina maiḡa tu Keriso tauḡena ḡena maḡuri na evaḡa-vonu-raḡeato, ema dagara mabarari maki gabu mabarari ai evaḡa-vonurito.

2

Barau na Keriso ġesi ma bevaġa-maġurirani

¹ Guinenai ġomi iaukani tu mase ġotanuto-ġoi, korana ġemi kira-sirivaġi e veiġa rakavari ai bene.

² Mo negai ġomi na mai tanobara ġena veiġa rakavari ġoveirito-ġoi, ema iauka rakavari eġita-ġaurini iaukana ġokorana-iaġiato-ġoi. Mai veġitaġau iaukana maiġa ġena basileia o veġitaġau seġukana tu barego lelevaġi guba e tanobara fakari ai. Ma ġia toma tu Barau asi ġeseġaġi-viniani tarimari nuġari ai etanuni e eġauveini.

³ Guinenai ġita mabarara maki ġia kavana taveito-ġoi, tauġani ġena veiġa rakavari tavaġa-moġonirito-ġoi. Tauġanira e nuġara ġeri ura e tuġamaġi rakavari takorana-iaġirito-ġoi. Moġa lorinai ġita maki tarimarima kotari kavari Barau ġena baru baregona tu ġita iatarai etanuto-ġoi.

⁴⁻⁵ Moġoni, ġita iaukara tu mase ġera kira-sirivaġi lorinai, senaġi vevetuġaġwa-bara Barauna ġena veuravini barego vedaurea lorinai, Keriso ġesi ma evaġa-maġuri ġenoġoi-sebonarato. Boġono riba, ġita tu Barau ġena namo e varevare-bara moġo bakunai evaġa-maġurirato.

⁶ Keriso Iesu ġena maġuri nuġanai, ġita tu Barau na Keriso ġesi mase na evaġa-variġisi sebonarato, ma Keriso ġesi ġena vere seanai evaġa-tanu sebonarato guba vanuġanai.

⁷ Moġesi eveito korana tu, ġoirai ġia ġena veiau-namo vetoġana, ġena namo e varevare-bara barego lelevaġina ġerana bene vaġa-foforia uranai. Mai Barau ġena veiau-namo vetoġana, ġena namo e varevare-bara na efoforito maiġa tu, Keriso Iesu ġesi tasebonato nuġanai, ġita ġerai evaġa-foforiato.

⁸ Ġomi tu ġemi veġabidadama ġenana Barau na ġena namo e varevare-barai evaġa-maġurimito. Ġomi tu dia tauġemi ġemi kokore na ġovevaġa-maġurito. Asiġina, mai tu Barau ġena varevare ġita evinirato.

⁹ E dia ġomi ġemi ġauvei dairi ai voimi ġoġabiato dagarana, be moġa vejavina tarima ta asi bene vei.

¹⁰ Ġita tu Barau ġimana veiveina tarimara. Barau na Keriso Iesu ġenana tarima variġurai evaġa-iaġorato, ġauvei e veiġa namori bisini veiri ġana. Mai ġauvei e veiġa namori tu Barau na varau erovina-torerito, ġita na bisini veiri ġana.

Keriso na bese ruarua evaġa-sebonarito

¹¹ Ġomi boġono tuġamaġi, guinenai ġomi irau bese tarimami Iuda tarimari na ġekiraġimito-ġoi “kefimi asi lamavaġi tarimami”. Iuda tarimari tauġaniri kefiru tu lamavaġi. Ġia na mai mero tauġaniri kefiru lamavaġi veiġana tu tauġeri ġimari na ġeveiani veiġana.

¹² Boġono tuġamaġi, ġomi mo negai Keriso ġesi tu ma fakami, e Isaraela besena nuġanai maki ġomi tu vanuġa boru tarimami nai asi ġeġabi-raġemito, ema Barau ġena kiraġitore eveirito nuġanai, eguruġa-toreto dagarari maki ġomi na tu asi boġo doġaririni. Ema ġomi mai tanobara nuġanai tu asi ġemi Barau ema dagarana namona ta ġoirai asi ġotuġamaġi-kauani.

¹³ Ġomi guinenai tu manaġa rakava, senaġi toma Keriso Iesu ġesi ġosebonato nai, ġoma kavinaġito Barau ġenai. Ġomi Keriso rarana na ema ġabi-kavinaġimito.

¹⁴ Korana Keriso tauġena tu ġita ġera maino evaġa-ġoraiani tarimana. Ġia na ġita bese ruarua bese sebonai moġo evaġa-iaġorato. Korana ġai Iuda besena ema ġomi irau bese tarimami vekaravarai ġita evare-kirarani

kobena tu Keriso tauḡanina satauro ai emaseto nai evare-kiraiato, benamo evaḡa-rakava-ḡosigosiato.

¹⁵ Ġia na Mose ḡena taravatu nuḡanai velaunaḡi guruḡari ḡetanuni dagarari mabarari maki erovorito. Keriso na mo veiḡa eveiato anina tu, ḡia ḡena ura ḡita bese ruarua ḡerana ḡia tauḡena ḡesi bene vaḡa-sebonara, tarima variḡuna sebona moḡo bene veia ḡana; ema ḡita fakarai maki maino bene vaḡa-ḡoraia ḡana.

¹⁶ Ġia satauro ai emaseto korana tu, mai bese ruarua tauḡani sebonai moḡo bene vaḡa-sebonari, benamo Barau ḡenai ma bene ḡabi-ḡenoḡoiri ḡana. Ema ḡia fakari ai ḡeri veiau-rakava maki, satauro ai emaseto nai, evaḡa-koririto.

¹⁷ Keriso eiaḡomato tu, maino varina ema ḡobata-iaḡiato. Mai maino varina ḡomi irau bese, Barau ḡesi fakami manaḡa tarimami ḡemi, e Iuda tauri, Barau ḡesi fakari kavinaḡi tarimari ḡeri, ema vari-fiuato.

¹⁸ Ġita mabarara, irau bese tarimami e Iuda tarimama, tu Keriso ḡenana Iauka sebona nuḡanai moḡo Tamara ḡenai bita iaḡoni.

¹⁹ Tauna moḡa, ḡomi toma tu dia tanukau e vanuḡa boru tarimami. Asiḡina, toma ḡomi tu Barau ḡena tarimari ḡesi vanuḡa sebona e Barau ḡena numa tarimami.

²⁰ Ġomi tu numa, fore iatanai ḡeragarini kavana. Barau na ḡomi tu apostolo tarimari e peroveta tarimari iatari ai eraga-kaumito, ma Keriso Iesu tu ḡemi numa daigunina o duḡuna forena baregona.

²¹ Keriso ḡena maḡuri nuḡanai mo numa ḡauna mabarana evaḡa-tubutubukau ginikauato, ma ebaregoni Rubu Veaḡai eiaḡoni Vereḡauka ḡena maḡuri nuḡanai.

²² Keriso ḡesi ḡosebonato nai, ḡomi maki Barau na tarimarima tari ḡesi eḡabi-vegogomini, benamo Barau ḡena tanu numanai ḡoiaḡoni Iauka nuḡanai.

3

Paulo ḡena ekalesia ḡauveina irau bese tarimari fakari ai

¹ Tauna moḡa, au Paulo na Vari Namona ḡomi irau bese tarimami ḡemi aḡobata-iaḡiani ḡaramanai, dibura numai atanuni maiḡegu. Au tu Keriso Iesu ḡena dibura tarimanai aiaḡoto, ma ḡomi iatami ai Barau ḡenai aḡuriḡurini.

² Au atuḡamaḡini, ḡomi tu varau ḡoseḡaḡito, au Barau na ḡena namo lorinai mai ḡauvei eviniguto, Vari Namona, varevare-bara varina, ḡomi irau bese tarimami ḡemi bana ḡobata-iaḡia ḡana.

³ Mai vari vekuretoḡana, (mai tu ḡomi irau bese tarimami maki Barau ḡena tarimarimai ḡoiaḡoto varina), Barau na au ḡegu ai evaḡa-foforiato. Mai vari maiḡea tu kotuna varau batorea ini fefa nuḡanai.

⁴ Mai fefa maiḡa boḡo iavianai nai tu, boḡo riba-maoroni, au Keriso varina vekure-toḡana tu ma ribagu.

⁵ Barau na mai vari vekuretoḡana maiḡa guinenai ḡetanu-iaḡomato-ḡoi tarimari tu asi evaḡa-ribarito. Senaḡi toma tu Barau na Iauka Veaḡa ḡenana ḡena apostolo veaḡari e peroveta tarimari veaḡari ḡeri ai ema vaḡa-foforiato.

⁶ Mai vari vekuretoḡana Barau na ema vaḡa-foforiato varina tu maiḡa: Irau bese tarimari maki Vari Namona ḡenana Iuda tarimari ḡesi bese sebonai e tauḡani sebonai moḡo beḡe iaḡoni. Benamo mabarabarari na Barau na ekiraḡi-toreato dagarana Keriso Iesu ḡenana beḡe ḡabiani.

⁷ Barau ġena namo e varevare-bara lorinai, mai Vari Namona maiġa bana varifju-rakao rakaoa etato. Barau ġena mai namo e varevare-bara varevarena tu ġia ġena seġuka eġauveini ġenana au eviniguto.

⁸ Aba, au tu Barau ġena tarimarima mabarari ġeri dokodokona tarimagu, senaġi Barau na ġena namo lorinai mai ġauvei eviniguto, irau bese tarimari ġoirari ai Vari Namona bana ġobata-iaġia etato. Mai Vari Namona maiġa tu Keriso ġenai maġuri e dagara namo vedaureari tarimarima tauġera na asi bita ġoitaġorini dagarari ekiraġirini.

⁹ Ema tarimarima mabarari ġeri ai bana kiraġi-fofori ginikau, Barau ġena ura e boioġa tu, irau bese tarimari maki ġeri vevaġa-maġuri taunai bene iaġo. Mai boioġa o tuġamaġi maiġa tu tanobara evesinato monana veġata dagara mabarari eveirito Barauna ġenai vekuretoġa etanuni.

¹⁰ Barau ġena tuġamaġi tu, maitoma vauro ekalesia ġenana ġia ġena iaunega e tuġamaġi irauirauri, ġeveġitaġauni iaukari e ġeri maoro barego lelevaġi iaukari ġeri ai bene vaġa-foforiri etato. Mai iauka maiġeri tu guba fakanai ġetanuni iaukari.

¹¹ Mai tu Barau ġenai vanaġivanaġi etanuni boioġana. Barau na mai ġena boioġa maiġa tu ġita ġera Vereġauka Keriso Iesu ġenana vauro ema vaġa-foforiato.

¹² Ġita tu Keriso ġena maġuri nuġanai tatanuni, ema ġia ġenai taveġabidadamani lorinai, Barau sevina ġana tu asi garina ġesi e nuġara gwaġiġi bita raka-kavini.

¹³ Moġa lorinai au ġegu ura baregona tu asi boġono tuġamaġi-moiramoira, au amidigu-midiguni nai. Au midigu-midigu aġoitaġoni tu, ġomi namo boġono ġoitaġo ġana.

Paulo Efeso ekalesiari ġeri eġauġauto

¹⁴ Au na moġeri mabarari Tamara na eveirito dagarari atuġamaġirini nai, ġoiranai avetui-tarini ma aġuri-ġurini.

¹⁵ Ġia tu bese sebna tarimari gubai e tanobarai ġetanuni Tamari. Ma ġia na mai bese sebna arana eturaiato.

¹⁶ Barau mamana marevana tu irau veġata ma barego lelevaġi naima, au na anoġiani, akirani: Ġia ġena mama marevana asikeikeina na ġia tauġena Iaunkana ġenana seġuka bene vinimi, be nuġami e iaukami bene vaġa-kokoreri.

¹⁷ Korana mo dabarai tu Keriso maki ġemi veġabidadama lorinai, be ġomi nuġami ai betanuni. Ema Barau anoġiani, ġomi maki ġau ġokana e lamuna tano nuġana ġana ġevariġoni, benamo ġevelamulamu-tarini nai, ġau tano iatanai eruġa-gwaġiġini ilailanai, ġomi maki moġesina nuġami veuravini na bene vaġa-vonuri, be veuravini ai boġono ruġa-gigitari.

¹⁸ Be Barau ġena tarimarima veaġari mabarari ġesi Keriso ġena veuravini barego lelevaġina, rababana, e maukana, e varaġena, ema dodokuna boġono ribaia,

¹⁹ ema boġono riba, mai Keriso ġena veuravini tu riba mabarari maki evanaġirini. Mai veuravini boġono ribaia, be Barau tauġena ema ġena maġuri mabarana na ġomi bene vaġa-vonuvonu-raġemi.

²⁰ Barau ġena seġuka ġita ġerai eġauveini tu, dagara barego lelevaġiri eveirini; ġita na ġia tanoġiani dagarari ema ġita na tatuġamaġirini dagarari mabarari maki evanaġirini.

²¹ Moġa lorinai ġita ekalesia nuġanai tarimara e Keriso Iesu ġena maġuri nuġanai tarimarimara ġuruna ġuruna na mabarabarara na Barau moġo bitana vaġa-raġea vanaġivanaġi. Mai tu guruġa moġonina. Amen!

4

Ekalesia mabarara tu Keriso nuḡanai tauḡani sebona

¹ Au Paulo tu dibura numai atanuni, korana Vereḡauka vetuḡunaḡina aiaḡo-viniani nai. Au na ḡomi alaunaḡimini, Barau na ekeamito maḡurina moḡo boḡono tanu, boḡono tanu-namonamo moḡo.

² Karomi vekaravari ai ḡomi tu boḡono vetore-variḡo, ema manau ai boḡono tanu, boḡono vevaḡa-gwaḡiḡi. Ma karomi tari na veiḡa ḡelearini nai tu, veuravini ai nuḡami boḡono vaḡa-gwaḡiḡiri karomi ḡeri ai, be karomi tata ḡesi asi boḡono vebaru-vini, a boḡono veiau-namo moḡo.

³ Ḡita tu Iauka Veaḡa na eḡabi-vegogorato, be tasebonato, ma maino varona na ebaru-vegogorato, be maino ai tatanuni. Moḡa lorina mai tasebonato ma maino ai tatanuni maḡurina maiḡa tu boḡono kokore, be boḡono ḡabi-gigitaria.

⁴ Ḡita mabarara tu tauḡani sebona moḡo, ema Iauka maki sebona moḡo ḡerai etanuni. Ma Barau na ḡomi ekeamito maki dagara sebona moḡo uranai ekeamito, ma ḡita toma tu mo dagara sebona moḡo tatuḡamaḡi-kauani, (mo tu maḡuri vanaḡivanāḡi).

⁵ Vereḡauka sebona etanuni, veḡabidadama sebona etanuni, babatiso veḡana sebona moḡo etanuni.

⁶ Barau maki sebona etanuni, ma ḡia tu ḡita mabarabarara Tamara; e ḡia tu barego ma tarimarima mabarara iata-raḡerai etanuni, eḡita-ḡaurani, ema tarimarima mabarara fakarai eḡauveini, ma tarimarima mabarara nuḡarai etanuni.

⁷ Ma ḡita tata tu Keriso na varevare evinirato, ḡia ḡena namo e varevare-bara ilailari ai bene vinira etato kavana.

⁸ Moḡesina naima Buka Veāḡai Keriso varina maiḡesi ekirani,

“Ḡia guba ḡana ma evaraḡeto nai tu,

dibura tarimari ebarubarurito,

benamo ḡia murina evaḡa-rakarito, ma eḡori-kaurito,

benamo tarimarima varevare evinirito.”

⁹ Mai guruḡa, “Ḡia ma evaraḡeto,” anina tu kara? Mai guruḡa, “Ḡia ma evaraḡeto,” na ḡita evaḡa-ribarani, Keriso tu dia evaraḡeto moḡo. Asiḡina. Ḡia tovotovonai tu tanobara gabigabina ḡana roḡo evariḡoto.

¹⁰ Mo evariḡoto tarimana moḡa, ḡereḡana guba mabarari tu evanaḡirito, ḡia tu tuḡuna vanigerena ḡana evaraḡeto. Ḡia moḡesi evaraḡeto anina tu, guba e tanobara mabarana ḡia na tauḡena Iaukana na bene vaḡa-vonua ḡana.

¹¹ Ma ḡia tauḡena na kotari tu apostolo ḡauveina evinirito, (mai tu ekalesia vaḡa-ruḡana ḡauveina), tari tu peroveta ḡauveina evinirito, tari tu evanelia ḡauveina evinirito, tari tu ekalesia nari ḡauveina e Barau ḡena guruḡa vaḡa-riba-iaḡina ḡauveina evinirito.

¹² Moḡeri ḡauvei evinirito tauna korikori tu, Barau ḡena tarimarima veaḡari bene rovina-toreri, ḡena ḡauvei beḡene veiri, e Keriso tauḡanina beḡene vaḡa-tubu ginikaua,

¹³ bene iaḡo mo, ḡita ḡera veḡabidadama ema ḡera riba Barau Natuna ḡenai beḡea baregoni e bita sebona-korikorini, benamo bita barego-ginikauni, ema Keriso ḡena veḡa e maḡuri mabarana maki ḡita na bita ḡabiani.

¹⁴ Benamo mo dabarai ḡita tu dia mero raraka-rarakari kavari, be vevaḡa-riba irauirauri na e tarimarima ḡeri iaunega ḡofaḡofari na ema tuḡamaḡi rakavari na asi beḡene ḡofa-iaḡora e ḡofa-iaḡomara; noḡa moḡo ḡasi iavara ema ureure na ekwari-iaḡoani ekwari-iaḡomaiani kavana.

¹⁵ Senaġi ġita tu veuravini ai guruġa moġoniri bitana kiraġi, be Keriso ġena maġuri nuġanai dagara mabarari ai tu bitana barego. Keriso tu ġita edebarani.

¹⁶ Keriso tu tauġani debana, ma tauġani mabarana tu ġia ġena seġukai legana tata ġia na etorerito gaburi ai ġeġauveini. Ma ġia ġena seġukai komukomuri evaġa-tubukau gwaġiġirini varovarori na turiġa komukomuri evaġa-tubutubu-kaurini, ema evaġa-tubutubukau gigitaririni. Benamo monana tauġani legana irauirau tauġani nuġanai tata ġena ġauvei ġeveiani, benamo tauġani ebaregoni, ema ma veuravinina ġesi tauġena etubu-baregoni.

Barau ġena doġoro tarimari ġeri tanu dabarana

¹⁷ Tauna moġa, au aurani, mai guruġa ta nakira-varami Vereġauka aranai. Au ġegu ura baregona, ġomi tu roġo mukunai ġetanuni tarimari ġeri tanu maġurinai tu asi ma boġono tanu-ġenoġoi. Korana ġia ġeri tuġamaġi tu asi aniri dagarari ġeri ai ġetorerini.

¹⁸ Ġia ġeri tuġamaġi tu mukuna furufuru, be asi ġeri tuġamaġi-faka dabarari. Barau ġena maġuri ai maki ġia tu murikanai ġetanuni, korana ġia tu asi ribari ġeri nuġa-bubu ai bene.

¹⁹ Ġia tu veiġa namori mamiraġiri ema veiġa rakavari mamiraġiri maki asiġina ġinavaġi ġemami-raġirini. Ġia tu tauġeri ġevevini-fitoġato rakava ġena, vei-taġuitaġui dabarari ai ġerakani e mata-boraġa veiġari ġeuravini-baregorini.

²⁰ Senaġi ġomi na Keriso ġena maġuri tu dia moġesina ġoribaiato.

²¹ Ġomi na ġia varina tu moġoni ġoseġaġiato, ema Iesu ġena maġuri nuġanai guruġa moġonina Iesu ġenai etanuni tu ġevaġa-riba-iaġimito.

²² Ġevaġa-ribamito tarimari ġekirato: Ġemi maġuri guineri boġono koki-fitoġari, dabuġa guineri ġokoki-fitoġarini kavana. Mo tu tarima guinena ġekiraġiato. Ġia tu dagara tari na ġeġofaiani, ma moġeri mata-ġaniġaniri ai be erakava-kwaikwaini. Ġia tu boġono koki-fitoġaia.

²³ Be ġemi tuġamaġi mabarana ma bene veiareva-ġenoġoi.

²⁴ Ema tarima variġuna ma boġono riġo-kaua, dabuġa variġuna ġoriġo-kauani kavana. Mai tarima variġuna tu Barau ilailana iobuka-iobuka e veaġa eveiato.

²⁵ Moġa lorinai ġomi tata na veiġa ġofaġofari ġemina boġono tore-veġitari, benamo sevimi tarimari ġesi guruġa moġoniri moġo boġono kiraġi. Moġesi boġono vei, korana ġita mabarara tu tauġani sebona legana tata.

²⁶ Boġo baruni, senaġi vei-rakava tu asi boġono vei; e ġemi baru asi bene iaġo mo, ġaro benea keto-firiġo.

²⁷ Diabolo faka ta asi boġono vinia.

²⁸ Elemani tarimana asi ma bene lema-ġenoġoi, a bene iaġo, benea ġauvei. Ġia tauġena ġimana na ġauvei namori bene veiri, be bene ġoitaġori dagarari kotari tu asi ġeri-ġari tarimari bene vaġa-kava-iaġiri.

²⁹ Bokami na guruġa rakavari asi beġene raka-rosi. Senaġi vevaġa-kokore guruġari moġo boġono kiraġi, moira tarimari vaġa-kavari ġana, be beġe seġaġirini nai, kokore beġene ġabi.

³⁰ Ema Barau ġena Iauka Veaġa asi boġono vaġa-nuġa-metoe. Korana Iauka Veaġa tu Barau ġena vetoġa o maka ġomi ġemi ai etanuni. Moġa anina ġomi tu ġia ġena. Mani maka ġomi ġemi ai tu betanuni, beiaġoni mo, Barau na ġomi bevaġa-maġuri korikorimini ġarona.

³¹ Nuĝa ĝirimaĝirima, baru e baru-rakavarakava, vevane ema vevaĝi, e tarima vaĝa-rakavari tuĝamaĝiri, ema guruĝa rakavari mabarari boĝono tore-veĝitari ĝemina.

³² Karomi ĝesi boĝono veiau-namo ema boĝono veveura-vini. Tata karomi ĝeri ai veiĝa rakavari ĝoveirini moĝeri boĝono tuĝamaĝi-fitoĝari, Keriso ĝena maĝuri nuĝanai Barau na ĝemi rakava etuĝamaĝi-fitoĝarito kavana.

5

Mamai boĝono tanu

¹ Ĝomi tu Barau natuna, euravini-baregomini, moĝa lorinai ĝia boĝono tovotovoa.

² Veuravini ai boĝono tanu Keriso kavana. Ĝita eura-vinirato lorinai, tauĝena tauĝanina e ĝena maĝuri etore-tariato ĝita urarai. Ĝia na tauĝanina tu varevare dagarana bonana namo vedaureana dagaranai evaĝa-iaĝoato, ema Barau ĝena ginitaĝo mamoenai evaĝa-iaĝoato.

³ Ĝomi tu Barau ĝena tarima veaĝami ai ĝoiĝoto lorinai, kima ema mata-boraĝa guruĝari, veiĝa mirori guruĝari, e mata-ĝaniĝani guruĝari ĝomi fakami ai asi boĝono kiraĝiri.

⁴ Guruĝa mirori, guruĝa babori, ema vaseva rakavari maki asi boĝono kiraĝiri, korana maiĝeri tu asi namo, senaĝi ĝomi tu Barau moĝo boĝono tanikiu-vinia.

⁵ Korana dagara sebona boĝono riba: Ekimani tarimana, e veiĝa mirori eveini tarimana, e emata-ĝaniĝanini tarimana tu Keriso ema Barau ĝeri Basileiai ĝia tu asi voina e asi ĝena gabu. Mata-ĝaniĝani veiĝana tu noĝa moĝo kwaivakuku toma-rakariĝo-vinina veiĝana kavana.

⁶ Tarimarima ĝeri ĝofaĝofa guruĝari na asi bene ĝofami, korana Barau ĝena baru-baregona tu maniĝeri veiĝa ĝaramari ai ĝeseĝaforeni tarimari iatari ai bema vaĝa-foforiani.

⁷ Moĝa lorinai moĝesi ĝeveini tarimari ĝesi asi boĝono vekako.

⁸ Ĝomi guinenai maki mukuna furufuru tarimari, senaĝi toma ĝomi Vereĝauka ĝena maĝuri nuĝanai tu mama tarimari. Ĝomi tu mama natuna, be mama maĝurinai boĝono tanu ema boĝono raka.

⁹ Mama ĝwaĝwana tu veiĝa e tuĝamaĝi namori, veiĝa iobukaiobukari, ema guruĝa e maĝuri moĝoniri nuĝari ai etanuni.

¹⁰ Vereĝauka na kamara maĝuri ema veiĝa euravini-baregorini boĝono vetauri, be boĝono ribari.

¹¹ Mukuna veiĝari ema ĝauveiri tu asi ĝwaĝwari namori, be asi boĝono veiri ema asi boĝono ĝauvei-iaĝiri. A ĝomi na moĝeri veiĝa e ĝauvei tu boĝono vaĝa-foforiri, mo tu vei-rakava veiĝari.

¹² Korana mai seĝafore tarimari na kara ĝevei-vekuretoĝarini, moĝeri tu bokiraĝirini ai moĝo bemaikamuni.

¹³ Senaĝi mama na tu moĝeri dagara mabarari evaĝa-fofori ginikaurini, be mamai tu vetoĝari korikori ĝefoforini,

¹⁴ korana mama na vauro dagara vetoĝari korikori evaĝa-foforirini. Moĝesi naima ĝera guruĝa ta ekirani,

“Roĝo ogenani tarimamu notataĝa!

Mase na novariĝisi!

Be Keriso na bene mama-tarimu.”

¹⁵ Moĝa lorinai, ĝemi veiĝa loriri boĝono toreri, babo tarimari kavari asi boĝono vei, senaĝi iaunega tarimari boĝono tovotovori.

¹⁶ Ĝemi taimi mabarana boĝono ĝauvei-iaĝi ginikauri, a ta asi boĝono fitoĝa-kavaia, korana toma tu nega rakava-kwaikwaina.

¹⁷ Tauna moĝa, asi boĝono vei-babobabo, senaĝi Vereĝauka ĝena ura tu kara, moĝeri boĝono tuĝamaĝi-fakari, be boĝono ribari.

¹⁸ Wain asi boĝono niu-lelevaĝi, bevaĝa-babomini ĝesi. Mo veiĝa na ĝemi maĝuri bevaĝa-rakavaiani. A ĝomi tu Iauka Veaĝa na neĝi bene vaĝa-vonuvonu-raĝemi.

¹⁹ Karomi Salamo ai e Barau vaĝa-raĝena mariri ai ema Iauka Veaĝa na evinimini mariri ai boĝono vaĝa-guruĝari. Boĝono mari ema nuĝami mabarari ma iakumi ĝesi Vereĝauka boĝono vaĝa-raĝea.

²⁰ Vanaĝivanaĝi ĝera Vereĝauka Iesu Keriso aranai Tamara Barau boĝono tanikiu-vinia dagara mabarari dairi ai.

²¹ Karomi gabureri ai boĝono tanu, moĝesi boĝo veini tu Keriso boĝo gubakauani.

Veĝaraĝo vavineri ema tauri

²² Veĝaraĝo vavinemi, Vereĝauka ĝena veĝitaĝau gaburenai ĝotanuni kavana, ĝaraĝomi ĝeri veĝitaĝau gaburenai boĝono tanu.

²³ Korana tau tu ĝaraĝona vavinena ĝena deba tarimana, Keriso ekalesia ĝena deba tarimana kavana. Keriso tu ekalesia ĝena vevaĝa-maĝuri tarimana. Ekalesia tu Keriso tauĝanina.

²⁴ Vaĝa-ilailana ekalesia Keriso ĝena veĝitaĝau gaburenai etanuni kavana, vavine maki ĝaraĝori tauri ĝeri veĝitaĝau gabureri ai beĝene tanu dagara mabarari ai.

²⁵ Tau, ĝaraĝomi vavineri boĝono ura-viniri, Keriso na ekalesia eura-viniato ilailanai, benamo ĝia uranai Keriso tauĝena ĝena maĝuri etoretariato.

²⁶ Keriso moĝesina eveito tu, ekalesia bene vaĝa-veaĝaia, ĝena tarimari-mai beĝene iaĝo ĝana. Ĝia na ĝena guruĝa na e nanu na eĝurigiato, evaĝa-veaĝaia.

²⁷ Benamo Keriso tauĝena ĝoirana ekalesia marevana baregona na benema vaĝa-ruĝa-taria ĝana. Benamo ekalesia ĝia ĝoiranai bene ruĝa tu, ĝenai miro misina ta maki asiĝina, kefi ĝemakuku-makukuni kavari maki asiĝina, ema rakava misina ta maki asiĝina ĝinavaĝi. Senaĝi ekalesia Keriso ĝoiranai tu veaĝa ema vaĝa-dagaĝana kererena misina ta maki asiĝina ĝinavaĝi bene ruĝa-tari.

²⁸ Mai dabara sebonai tau na ĝaraĝori vavineri beĝene ura-viniri. Beĝene ura-viniri tauĝeri tauĝaniri ĝeura-vinirini ilailanai. Ĝaraĝona vavinena eura-viniani tarimana tu ĝia tauĝena maki eveura-vinini.

²⁹ Korana tau ta na ĝia tauĝena tauĝanina vaĝa-rakavana tu asi eurani, senaĝi eĝubuanai e eĝitaĝau-ginikauani, Keriso na ĝena ekalesia eveiani kavana.

³⁰ Korana ĝita tu ĝia tauĝanina legana.

³¹ (Tau e vavine tu tauĝanina sebona, Buka Veaĝai ekirani kavana, ekirani), “Moĝesi naima tau na tamana e sinana beraga-kwanerini, benamo ĝaraĝona vavinena ĝenai bema-kafakauni, benamo tauri ruarua tauĝani sebonai beĝe iaĝoni.”

³² Mai guruĝa ema maĝuri maiĝa tu vekure-toĝa, ma anina tu barego lelevaĝi. Au na Keriso ema ekalesia ĝeri veĝaraĝo akiraĝirini.

³³ Senaĝi ma nakira: Ĝomi tata na maki ĝaraĝomi vavineri boĝono ura-viniri, tauĝemi tauĝanimi ĝoura-vinirini kavana. Vavine na maki ĝaraĝomi tauri boĝono gubakauri.

6

Natu e tama sina

¹ Natu, tamami e sinami garori boḡono seḡaḡiri Vereḡauka ḡena maḡuri nuḡanai ḡotanuni nai, korana mo tu veiḡa maorona.

² “Tamamu e sinamu bono gubakauri,” korana mai tu taravatu ginigu- inena ma kiraḡi-torena ḡesi dagarana:

³ “Be ḡemu tanu maḡurina bene namo ema mai tanobarai ḡemu tanu- maḡuriri beḡene mauka.”

⁴ Ma tama na maki, natumi asi boḡono vaḡa-baruri, senaḡi Vereḡauka ḡena vevaḡa-riba guruḡari ema sisiba guruḡari boḡono viniri. Be moḡeri guruḡa e veiḡa beḡene korana-iaḡiri ḡeri tanu ḡarori mabarari ai.

Tuḡu-rakaorakao merori e ḡeri baregori

⁵ Tuḡu-rakaorakao meromi, ma vegubakaumi e ma garimi ḡesi mai tanobarai ḡeḡita-ḡaumini tarimari garori boḡono seḡaḡiri. Ḡomi ḡeḡita- ḡaumini tarimari manḡeri tu ma nuḡami mabarari ḡesi boḡono seḡaḡi-viniri, Keriso nuḡami mabarari ḡesi boḡoro seḡaḡi-vinia ilailanai boḡono seḡaḡi- viniri.

⁶ Tarima tari tu ḡeḡita-ḡaurini tarimari iauri ḡevaḡa-namori ḡana tu ḡoirari ai ḡeḡauvei-ginikauni, senaḡi ḡeḡita-ḡaurini tarimari ḡeraka-doḡe-muriḡini tu asi ḡeḡauvei-kokoreni. Ḡia ḡeri veiḡa na asi boḡono iaḡo. Ḡomi tu Keriso ḡena vetuḡunaḡi tarimami lorinai, ma nuḡami mabarari ḡesi Barau ḡena ura boḡono veia.

⁷ Nuḡami mabarari ma namori ḡesi vetuḡunaḡi boḡono iaḡo-vini, Vereḡauka ḡenai boḡoro veia kavana, a dia tarimarima ḡeri.

⁸ Korana ribami, Vereḡauka na ḡemi ḡauvei namori ḡoveirini voiri tata bevinimini. Enabe ḡomi tu tuḡu-rakaorakao tarimami o fakai e maḡuri namonai ḡotanuni tarimami, voimi tata bevinimini veḡata.

⁹ Ḡomi veḡitaḡau tarimami maki, ḡemi tuḡu-rakaorakao merori ḡeri ai veiḡa namori boḡono vei. Veiḡa metori e vaḡa-gariri veiḡari ḡeri ai asi boḡono vei, korana ḡomi ma ribami, ḡia ema ḡomi eḡita-ḡaumini Verena baregona tu gubai etanuni. Ema ma ribami maki, ḡia na tarimarima ḡeri vetoḡai tu asi eḡabi-raḡerini, ḡia ḡenai tarimarima tu mabarari ilaila moḡo.

Vetari dabuḡari

¹⁰ Ḡegu guruḡa magona tu maiḡa: Boḡono kokore Vereḡauka ḡena maḡuri nuḡanai, ema Vereḡauka ḡena seḡuka na bene vaḡa-kokoremi.

¹¹ Barau ḡena vetari dabuḡari mabarari boḡono veiri, be Diabolo ḡena iaunega boioḡari ḡofaḡofari eveirini nai, boḡono kokore, be boḡono tore- ḡauri.

¹² Korana ḡita tu dia tarimarima ḡesi tavetarini. Asigina. Ḡita tu ḡeveḡitaḡauni iaukari baregori, e ḡeri maoro barego iaukari, e mai tanobarai mukuna ḡeḡita-ḡauani iaukari, ema iauka rakavari asisebo guba gaburi ai ḡetanuni iaukari ḡesi tavevaḡini.

¹³ Moḡa lorinai Barau ḡena vetari dabuḡari mabarari na ḡovedabuḡa, be ḡaro rakava kwaikwaina bene iaḡoma nai, ḡomi tu boḡono ruḡa-gigitari, ema ḡauvei mabarari boḡo vei-ḡosirini murinai, ḡomi tu roḡo boḡono ritoḡo- gwaḡiḡi.

¹⁴ Be, boḡono ruḡa-gigitari, ma maiḡesi boḡono vedabuḡa: Gabakami ai guruḡa moḡonina boḡono toua, gabaḡau gabakami ai ḡotouani kavana. Vei-iobukaiobuka tu koba kouḡauna ḡana, funu dabuḡa kavana kobami ai boḡono kafa-kauri.

¹⁵ Ema kwakumi ai tu maino varina namona boĝono fiua veigana boĝono veia, tamaka ĝoveirini kavana.

¹⁶ Moĝeri muriri ai tu veĝabidadama ĝesina boĝono ĝabi-vaisia, monana Diabolo ĝena veigā rakavari na bedibamini dibari ma karava-karavari ĝesi boĝo kourini e boĝo lau-busebuserini riba.

¹⁷ Ema vevaĝa-maĝuri boĝono ĝabia, ĝemi kwaraĝau ai boĝono vaĝa-iaĝoa. Ema Barau ĝena guruĝa boĝono ĝabi-vaisia vetari baĝana kavana, Barau ĝena guruĝa tu Iauka Veaĝa ĝena vetari baĝana.

¹⁸ Iauka Veaĝa ĝena seĝuka nuĝanai boĝono ĝauĝau-vanaĝi vanaĝi. Ĝemi ĝauĝau ai tu ĝauĝau dabarari irauirauri ai boĝono ĝurigiuri ema ĝemi ura dagarari mabarari noĝinoĝiri boĝono vei. Tauĝemi lorimi maki boĝono vetore e rakava boĝono vaĝa-darereri, ema Barau ĝena tarima veaĝari mabarari iatari ai boĝono ĝauĝau-vanaĝivanaĝi.

¹⁹ Au maki iatagu ai boĝono ĝurigiuri. Be naguruĝa ĝana, bokagu bana keoa tu, Iauka Veaĝa na guruĝa bene vinigu, be mai Vari Namona vekuretoĝana tu asi garigu ĝesi tarimarima bana kira-varari.

²⁰ Au tu mai Vari Namona maiĝa bana fiua ĝana tarimagu. Ma au tu mai Vari Namona uranai dibura numai ma seinigu atanuni. Boĝono ĝauĝau, be Barau na bana kiraĝia etoni ilailanai, asi garigu ĝesi bana kiraĝi-foforia.

Guruĝa magona

²¹ Tikiko tu ĝita tarikakara namona ta ema ĝia tu ma ĝena vetuĝamaĝikau Vereĝauka ĝena maĝuri nuĝanai. Dagara mabarari, au aiĝesina atanuni e kara aveini variri mabarari tu boĝono ribari ĝana, be Tikiko na vauro beasi kira-varamini.

²² Au na ĝia tu moĝesina naima atuĝu-iaĝosiani. Bene iaĝosi, be ĝai ĝema tanu maĝurina mainai tu aiĝesina boĝonoasi ribari, ema beneasi vaĝa-gwaĝiĝimi.

²³ Maino tarikaka mabarami ĝesi bene tanu. Tamara Barau ema Vereĝauka Iesu Keriso ĝerina eiaĝomani veuravinina ma veĝabidadamana ĝesi maki tarikaka mabarari ĝesi bene tanu.

²⁴ Barau ĝena namo e varevare-bara tu, ĝera Vereĝauka Iesu Keriso asi ekorini veuravinina na ĝeuravini-vanaĝi vanaĝiani tarimari mabarari iatari ai bene tanu.

PAULO ĜENA TORETORE FILIPI EKALESIARI GERI

Filipi vaĝa-foforina guruĝari

Ekalesia doĝorona Filipi ai tu Paulo ema Silas ĝerina eĝorato, mo tu Paulo ĝena evanelia varivarina vaĝa-ruaruana eveiato taiminai (Apostolo 16).

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiāĝo 61 fakanai ta etoreato, mo tu Iesu emaseto murinai.

Mai buka anina baregona tu "Iaku ema verere", ema ĝena siri baregona tu karoa 4:4. Mai fefa nuĝanai "iaku" tu ĝutuma boiavi-ĝoitaĝorini: 1:4-6; 1:14-18; 1:25-26; 2:2; 2:14-16; 2:17-18; 2:25-29; 3:1-3; 4:4; 4:10-12; ema veĝabidadama, veuravini, nuĝa-sebona ema vetore-variĝo o vevaĝa-manau boĝo ĝitaiani tu iaku ĝenana etubu-raĝeni.

Mai fefa etoreato tu, 1) ekalesia doĝorona bene tanikiuri, ĝevarevareviniato lorinai, ema bene vaĝa-ribari bevarivaririni; 2) bene launaĝiri, Keriso ĝena tuĝamaĝi beĝene tovtovoa, ĝeri tuĝamaĝi sebonai moĝo beĝene torea; 3) bene launaĝiri, taimi namori ai o rakavari ai beĝene iaku moĝo ema ĝeri vetarikaka Iesu Keriso ĝesi tu bene tanu asi bene iagaiaga.

Paulo na mai fefa tu maiĝesina eboioĝaiato:

1. Keriso tu ĝita ĝera maĝuri - karoa 1
2. Keriso tu ĝita ĝera tuĝamaĝi ai bene tanu - karoa 2
3. Keriso ĝenai matara bene tubukau - karoa 3
4. Keriso tu ĝita ĝera kokore korana - karoa 4

¹ Au Paulo ema Timoteo, Keriso Iesu ĝena vetuĝunaĝi tauma, na ĝomi Filipi ai Barau ĝena tarimarima veaĝari ma ĝemi ekalesia guine-iaĝina tarimari ema vevaĝa-kava tarimari ĝesi atore-vinimini. Ĝomi tu Keriso Iesu ĝesi varau ĝosebonato.

² Barau ĝita Tamara ema ĝera Vereĝauka Iesu Keriso ĝerina varevare-bara ema maino ĝemi ai bene tanu.

Paulo na Barau evaĝa-namoato

³ Ĝomi atuĝamaĝimini negari mabarari ai, ĝegu Barau atanikiu-viniani.

⁴ Ĝegu ĝauĝau ai vanaĝivanaĝi ĝomi mabarami iatami ai aĝuriĝurini ma iakugu ĝesi,

⁵ korana ĝemi vevaĝa-kava dabarari namori na ĝovaĝa-kavaguto Vari Namona varifiunai, Vari Namona ĝoĝabi-raĝeato ĝarona na beiāĝoma mo initoma.

⁶ Ma ribagu maoro, Barau na mai ĝauvei namona, nuĝami ai evaĝa-foforiato ĝauveina tu, bevesiriĝuni, beiāĝoni mo, Keriso Iesu ĝena ĝenoĝoi ĝaronai vau bevaĝa-kori ginikauani.

⁷ Ĝomi mabarami ĝegu vemamiraĝi na evaĝa-moĝoniani, ĝomi tu au nuĝagu ai roĝo ĝotanuni. Aba, dibura numai atanuni nuĝanai, o Kota ĝeseĝaĝini tarimari ĝoirari ai Vari Namona akiraĝi-foforiani e gogobana aragani nuĝanai maki, ĝomi tu au nuĝagu ai veĝata. Korana ĝomi mabarami maki Barau na ĝena varevare-bara evinimito, au eviniguto kavana.

⁸ Barau ma ribana vedaurea, au ĝomi akiramini, au ĝegu veuravini ĝomi mabarami ĝemi ai tu barego vedaurea, Keriso Iesu na euravini-baregomini kavana.

⁹ Barau anoĝiani, ĝemi ai veuravini bene tubu-barego vedaurea, ma riba ema iaunega bene vinimi, be Barau ĝena ura boĝono riba-ginikauri.

¹⁰ Monana vauro boĝo ribani, dagara namori tu aiĝeri na ĝemi tanu beĝe vaĝa-namorini rakava mabarari ĝerina, benamo Iesu Keriso ma beĝenoĝoi-iaĝomani ĝaronai, ĝomi tu asi vetoukaumi e asi ĝemi kerere ta maki.

¹¹ Ema veiĝa namori e iobukaiobukari mabarari, Iesu Keriso ĝenana ĝeiaĝomani dagarari, ĝomi ĝemi ai beĝe tanuni, Barau vevato-iaĝina e vaĝa-raĝena ĝana.

Paulo tu dibura numai etanuni, senaĝi Vari Namona ebaregoni

¹² Tarikakagu, ĝegu ura boĝono riba, au beĝe diburagu o kara beĝe ĝora ĝegu ai dagarari na Vari Namona ĝena tubu tu asi beĝe vaĝa-rakavaia. Asiĝina. Moĝeri na tu Vari Namona ĝena tubu beĝe vaĝa-baregoa.

¹³ Mai maĝuri ĝenana Kaisara, Roma ĝeri vere, ĝena numa ĝeĝita-ĝauani tauri ema tarimarima mabarari maki beĝe riba, au tu Iesu Keriso ĝena vetuĝunaĝi ai aĝo-vinini ĝaramanai, dibura numai atanuni.

¹⁴ Ma ĝegu tanu dibura numai ĝenana maki au tarikakagu ĝutuma ĝeri veĝabidadama Vereĝauka ĝenai beĝe gwaĝiĝi naima, Barau ĝena guruĝa ma kokoreri ĝesi ĝeĝobata-iaĝiani.

¹⁵ Moĝoni, tarima kotari na ĝegu ĝauvei namo dainai, ĝemama-viniguni. Ĝeri ura tu au ĝevaĝa-rakavagu ĝetoni, naima Keriso ĝeĝobata-iaĝiani. Senaĝi kotari na tu nuĝa-namo ai ĝeĝobata-iaĝiani.

¹⁶ Maiĝeri tu veuravini ĝenana ĝeĝobatani, korana ribari, au diburai atanuni tu, Vari Namona gogobana bana raga ĝana Kota tarimari goirari ai.

¹⁷ A tarima kotari na Keriso ĝeĝobata-iaĝiani tu dia nuĝa-namo ai, senaĝi tauĝeri arari beĝene vaĝa-raĝeri ĝana. Ĝeri tuĝamaĝi tu, au dibura numanai roĝo atanuni nuĝanai, ĝegu meto ĝevaĝa-baregoa ĝetoni.

¹⁸ Bevaitovo, au ĝegu iaku tu ebaregoni. Korana nuĝa-namo ai Keriso ĝeĝobata-iaĝiani ba asiĝina, senaĝi dagara baregona tu Keriso varina bene fiu-rovorovo dabara mabarari ai. Ma ĝegu iaku maki bebarego-iaĝoni moĝo.

¹⁹ Korana ĝemi ĝauĝau ai Barau ĝonoĝiani ema Iesu Keriso Iaukana na evaĝa-kavaguni. Moĝa lorinai au ribagu, au tu maĝuri badoĝariani.

²⁰ Ĝegu ura baregona ema dabaragu mabarana ĝesi akirani, au tu asiĝina ĝinavaĝi bana moira ĝegu ĝauvei nuĝanai. Moĝesi nai initoma dibura numai vanaĝivanaĝi akokoreni kavana bana kokore, be au taugu mabarana ĝesi Iesu Keriso arana ma bana vaĝa-raĝea ĝegu maĝuri ĝenana o ĝegu mase ĝenana.

²¹ Be au ĝegu ai maĝuri tu kara? Iesu Keriso moĝo! Moĝa lorinai mase au ĝegu ai tu dagara namona.

²² Betaĝu bema roĝo bamaĝuri-taĝoni nai, ribagu Keriso ĝena ĝauvei roĝo baveiani, senaĝi asi aribani, aiĝa bara ĝabia, mase ba maĝuri?

²³ Au tu dagara ruarua auravini-baregorini: Ĝegu ura mai maĝuri bara raga-kwaneana, be Keriso sevinai bara tanu tu dagara namo vedaureana moĝo;

²⁴ senaĝi namona tu ĝomi bana vaĝa-kavami ĝana, be mai tauĝani nuĝanai roĝo bana tanu.

²⁵ Au tu ribagu, au roĝo maĝuri batanuni. Ĝomi ĝesi roĝo bita tanuni, korana ĝemi veĝabidadama vaĝa-tuburi ema ĝemi iaku vaĝa-baregori ĝana.

²⁶ Au ma baiaĝosini neganai, ĝomi tu boĝo iakuni au ĝegu ai, ema Keriso Iesu boĝo vaĝa-raĝeani.

Ĝemi tanu

²⁷ Dagara sebona tu Keriso ġena Vari Namona na ekiraġiani ilailanai boġono tanu. Baiaġosini ġitaġitami ba manaġa na moġo varimi baseġaġini, baribani, ġomi tu nuġa-namo ai ġoritoġo-gigitarini ema nuġa sebonai Vari Namona ġoveseġaġi-vevini-iaġiani ma kokoremi ġesi.

²⁸ Ġebaru-vinimini tarimari na asiġina ġinavaġi beġene vaġa-garimi. Monana ġeri ai vetoġa beveiani, ġia tu Barau na bevaġa-rakava kwaikwairini, a ġomi tu Barau na bevaġa-maġurimini.

²⁹ Ġomi tu dia Keriso ġena varevare-bara e namo lorinai Keriso ġovaġa-moġoniani tarimami ai ġoiaġoto moġo, senaġi ġomi tu Keriso ġena midigu-midigu ai maki boġono midigu ġana ġia aranai.

³⁰ Ġomi maki initoma au ġesi bisini vetari-vegogo. Mai vetari tu vetari guinena ġoġitaiato-ġoi vetarina ini roġo ma ġoseġaġiani vetarina roġo avetari-iaġiani.

2

Keriso ġena vevaġa-manau ema iaru-korokoro

¹ Ġemi maġuri Keriso nuġanai monana evaġa-kokoremini ba? Ema ġena veuravini na ġemi tuġamaġi evaġa-gwaġiġirini ba? Ġomi na Iauka Veaġa ġatami ai ġovaġa-iaġoato ma ġotanuvogogoni ba? Ma ġemi vevetuġaġwa ema vevaġa-kava ġatami tata ġeri ai ġoveirini ba?

² Moġa lorinai anoġimini, boġono vaġa-iaku korikorigu, ġemi tuġamaġi vegogo ai, veuravini sebonai ema nuġami e iaukami maki sebonai boġono tanu.

³ Dagara ta asi boġono veia vevaġa-raġe tuġamaġina maġurina ema veiavi maġuriri ai, senaġi ġomi tauġemi boġono vevaġa-variġo tata fakami ai, a karomi boġono ġabi-ġesitaġori.

⁴ Karomi ġeri namo maki boġono vetau, a dia ġomi tauġemi ġereġami ġemi namo moġo.

⁵ Ġemi veiġai Keriso Iesu kavana boġono vei, ġena tuġamaġi boġono ġabia:

⁶ Ġia tu dagara mabarari ai

Barau ġesi ilaila,

senaġi asi etuġamaġito,

mo maġuri moġa bene ġabi-taria.

⁷ Ġia tu tauġena evekiraġi-fitoġato,

benamo vetuġunaġi merona kavanai eiaġoto.

Ġia maki tarimarima kavana eġorato,

benamo ġita fakarai ema tanuto.

⁸ Ġia tu eveġwa-variġoto ema Barau eseġaġi-viniato-ġoi mo ġena mase, aba, satauro ai emaseto noġa moġo vei-rakava tarimana ta kavana.

⁹ Moġa lorinai Barau na eġabi-vaisiato guba tuġunai,

ma ara namo vedaureana eviniato.

Mo ara tu ara ta ġesi asi ilaila.

¹⁰ Iesu arana bakunai guba aneruri,

e tanobarai ġetanuni tarimari,

ema tanobara gaburenai o mase gabunai ġetanuni tarimari mabarari beġene vetuitui-tari ġia ġoiranai.

¹¹ Ema mea mabarari na Iesu Keriso beġene kiraġia “Vereġauka”,

Barau ġita Tamara vevato-iaġina ġana.

Bitana mama-rovorovo tanobara ġena mama

¹² Au ġatagu mabarami, vanaġivanaġi au ġoseġaġi-viniguto-ġoi ġera ġauvei vegogo ai kavana murigu ai maki boġono seġaġi-vinigu veġata. Boġono ġauvei ma garimi ema ma ġoġo-ġoġomi ġesi, maġuri boġono doġaria uranai.

¹³ Korana Barau tu ġomi nuġami ai eġauveini, ġomi elaunaġimini e kokore evinimini, ġena ura boġono veiri ġana.

¹⁴ Ġauvei mabarari asi mugumugumi ema asi vanevanemi ġesi boġono ġauvei-iaġiri.

¹⁵ Be ġomi tu Barau natuna asi vetoukaumi ema namo vedaureami ai boġono iaġo, mai tanobara rakava kwaikwai ema ġevei-rakava-moġovaġini tarimari fakari ai; be boġono mama-rovorovo, noġa moġo visiġu boġi ai ġemamani kavana.

¹⁶ Mo tu bema maġuri guruġana boġo korana-iaġiani e boġo vari-fiuani nai. Moġa boġo veiani nai, au tu ma ġegu maoro havekokorokuni ġomi ġemi ai Keriso ma beġenoġoi-iaġomani ġaronai. Korana mo ġaro ai au tu baribani, au ġegu vekwaraġi ema ġauvei ai tu asi avekwaraġi-kavato.

¹⁷ Bere au bara mase, ma raragu bere vebubu-rovorovo, noġa moġo ġomi ġemi veġabidadama varevarena Barau ġoviniani kavana. Irau moġesi nai, au tu aiakuni, ema ġegu verere maki ġomi ġesi tavei-sebonaiani.

¹⁸ Mai dabara sebonai ġomi maki boġono verere, be mabarara bitana verere-vegogo.

Timoteo batuġu-iaġosiani

¹⁹ Bema Iesu Vereġauka ġena ura nai tu, atuġamaġini, Timoteo tu batuġu-iaġosiani; be ġomi varimi banama seġaġia nai, au nuġagu benema gena-tari.

²⁰ Timoteo ġereġana na moġo au ġegu vemamiraġi eribaiani, ema ġomi ġobimi vetuġamaġina evei-baregoni.

²¹ Tarimarima mabarari tu tauġeri ġeri maġuri moġo loriri ġetorerini, a Iesu Keriso ġena ġauvei tu asi ġevetauani.

²² Ġomi tu ribami ginikau, ġia vetoġana ema ġena vetuġamaġikau, kamasi ġia e au, noġa tama ma natuna ġeġauvei-vegogoni kavana, Vari Namona ġaġobata-iaġiani.

²³ Moġa lorinai bana tuġu-iaġosi-ġarimoġia, maġuri mainai kamasi bevetoreni ġegu ai bana riba vau.

²⁴ A ġegu vetuġamaġikau Vereġauka ġenai atoreani, au maki vau mani ma baiaġosini ġemi ai.

Epafrodito ġena iaġosi

²⁵ Ġegu tuġamaġi ai akirani, namona tu tarikakara Epafrodito ma bana tuġu-ġenoġoi-iaġosia. Ġia maki au ġesi ġaġauveito e Keriso ġena vetari ai ġavetari-vegogoto tauna. Ġomi maki vetuġunaġimi eveito, au ġegu ai ġotuġuato nai, ġemi varevare dagarari na bene vaġa-kavagu ġana.

²⁶ Ġia maki eura-baregoni ġomi bene ġitami. Ema enuġa-vekwaraġini ġemi ai, korana ġena keve varina ġoseġaġiato nai.

²⁷ Moġoni veġata, ġia tu ekeve-rakavato, dori emaseto, senaġi Barau ġena vevetuġaġwa ġia iatanai, ema dia ġia iatanai moġo, senaġi au iatagu ai maki, korana ġegu nuġa-meto bebaregoni garina.

²⁸ Moġa lorinai ġegu ura baregona bana ragatuġu-iaġosia ġemi ai, be boġono ġitaia ma boġono iaku, benamo au ġegu nuġa-vekwaraġi bene meraġa kekei.

²⁹ Boġono ġabi-raġea ma iakumi ġesi ġera Vereġauka aranai, ema ġemi vegubakau marevana bene fofori tarima maġesiri ġeri ai.

³⁰ Korana ġena maġuri ġaramana asi eveito, ema dori emaseto, korana Keriso Varina Namona ġaramanai. Vetoġa maiġesina ġegu vevaġa-kava ġomi na ġoro vinigu kavana tu ġia na au ema vaġa-kavaguto.

3

Keriso evaġa-moġoniani tauna tu vei-iobukaiobuka tarimana

¹ Tarikakagu mabarami, ġegu guruġa magona nuġanai maiġesi nakira: Boġono iaku, korana Vereġauka ġesi ġokaro-vekafani nai. Asi bagauni, guruġa guineri batuġu-ġenoġoi ġenoġoini, korana ġomi ġobimi toretoreri ġana.

² Lorimi boġono vetore ekalesia vaġa-rakavana tauri gariri. Ġia tu kwaiva rakavari kavana, ġeri tuġamaġi tu ġita mabarara tauġanira kefiri bitana lama-vaġiri ġetoni, Isaraela besena ġeveini kavana.

³ Senaġi tauġani kefiri lamavaġi veiġana korikorina tu ġita na taġabiato, a ġia tu asiġi: Ġita tu Iauka Veaġa ġena seġukai Barau tatutuġu-tari viniani, ema Keriso Iesu ġenai tavetuġa-maġikauni, ema ġera veġabidadama tu dia tauġani ai vetoġa ġeveini moġeri ai tatoreani.

⁴ Bere tauġani ġena vetoġa ema ġera veiġa dagara baregori nai, ġegu veġabidadama tu tauġani ġena vetoġa dagarari ema ġegu veiġa ġeri ai bara torea riba. Bema ta ġena veġabidadama tauġanina ġena vetoġa dagarari ema ġena veiġa ġeri ai bene torea etoni nai, au tu ma ġegu maoro moġeri dagarai bara veġabidadama.

⁵ Amaġurito, ġaro vaġa-imaima toitoinei (8) tauġanigu kefina ġelama-vaġiatio. Au tu Isaraela tarimagu, Beniamina ġena doġoro tarimagu, Heberu rarari tarimagu korikori. Iuda tarimari ġeri taravatu akorana-iaġi ginikauato-ġoi, korana au tu Farisea tarimagu.

⁶ Barau ġena taravatu bana korana-iaġi ginikaua ġaramanai tu, ekalesia doġorona avaġa-midigu midigurito. Ema Iuda ġeri taravatu mabarabarari akorana-iaġi ginikau ginikaurito-ġoi, asi ġegu vei-rakava ta.

⁷ Moġeri dagara mabarari guinenai tu atuġamaġi-baregorito-ġoi; senaġi initoma Keriso ama ribaiato nai, mo dagara guineri mabarari aġitarini tu asi ġeri namo ta maki.

⁸ Moġoni veġata, dagara mabarari tu asi tauri dagarari, senaġi dagara baregona sebona moġo tu Keriso Iesu, ġegu Vereġauka, bana riba-ginikaua. Oba, dagara mabarari momo ai ġeiaġoto au ġegu ai, Keriso moġo bana ġabigigitaria ġana uranai.

⁹ Ġegu ura ġia ġesi bana sebona-korikori, korana ribagu, taravatu ekorana-iaġi gini-kauani tarimana Barau ġoiranai ġia tu dia vei-iobukaiobuka tarimana, senaġi Keriso evaġa-moġoniani tarimana moġo; korana Barau na vei-iobukaiobuka tarimarai bekiraġirani dabarana sebona tu veġabidadama ġenana moġo.

¹⁰ Ġegu ura baregona tu Keriso bana riba-ginikaua, ema mase na evaġa-vaishi-raġeato seġukana bana ġabia; ema emidiguto midiguna maki bana mami-tovoa, ma ġia ġena mase kavanai au maki bana mase.

¹¹ Mainana vau atuġamaġini, au maki mase na bavaisiraġe-ġenoġoini.

¹² Au asi akirani, moġeri mabarari varau aġabirito, o varau anamo-vedaureato, asiġina. Senaġi au tu avekwarraġi-rakavani, auna bana ġabia ġana, korana Keriso Iesu ġena kwalimu ai au maki eġabiguto ġia ġena.

¹³ Moġoni, tarikakagu, asi akirani varau akwalimuto atoni, asiġina. Dagara sebona moġo tu, maġuri guineri atuġarekwarito, ma ġoiragu dagarana bana ġoitaġoa kokorena moġo avetauani.

¹⁴ Initoma tu araga-maoromaoroni, kiraġitore makana aiaġo-viniani, mo kwalimu voina bana ġabia uranai, dagarana tu Barau ġena maġuri gubai. Korana Barau na Keriso Iesu ġenana ekeaguto, mo maġuri bana ġabia ġana.

¹⁵ Ġita ġera veġabidadamai taruġa-gwaġiġito taura tu maiġesi bisini tuġamaġi-vegogo. A ġomi betaġu dagara tari ai ġemi tuġamaġi tu irau nai, Barau na vau tuġamaġi-faka bene vinimi.

¹⁶ Dagara sebona, iauka maġuriri namori ġita na varau taġabirito moġeri bitana ġabi-gigitariri.

¹⁷ Tarikakagu mabarami, au boġono tovtovogu. Veiġa namo ġeveini tarimari boġono marereri e boġono tovtovori maki, vevaġa-ġita namori avaġa-ġitamini kavana.

¹⁸ Korana varau avaġa-guruġa ġenoġoi-ġenoġoimito-ġoi, senaġi ini tu ma avaġa-guruġamini ma taġigu ġesi: Ġutuma ġekirani, Keriso murinai ġerakani ġetoni, senaġi ġeġofaġofani, Iesu Keriso ġena satauro ġevetari-viniani.

¹⁹ Ġia varau rakava gabuna ġana ġeiaġoni, korana ġeri barau tu ġia tauġaniri na ġeiau-iaġirini dagarari. Ġeri veiġa rakavari, ġere maiaka-iaġiri veiġari, ġeveiavi-iaġirini. Ema mai tanobara dagarari moġo ġetuġamaġi-gigitaririni.

²⁰ A ġita tu Guba Basileia tarimara. Moġa lorinai ġera vevaġa-maġuri tauna, ġera Vereġauka Iesu Keriso ma iakura ġesi tanariani, guba tuġuna na beiaġomani.

²¹ Ġia na ġita mai tauġanira moiramoirari maiġeri bekurevorini, benamo ġia tauġanina namo vedaureana kavana beġe iaġoni. Korana ġia seġukana na dagara mabarari ġia ġena veġitaġau gaburenai beġe tanuni.

4

Sisiba guruġari tari

¹ Tauna moġa, tarikakagu, Vereġauka ġena maġuri nuġanai boġono ruġa-gwaġiġi. Au na auravini-baregomini ema bana ġitami veġata atoni, korana ġomi tu au ġegu verere korana e ġegu kwalimu vetoġana.

² Euodia ema Sintike, anoġimini, nuġami beġene sebona, korana ġomi tu Vereġauka ġena doġoro vavinemi.

³ Goi maki, Sisigo, au karogu namona, anoġimuni, mani vavine kika bono vaġa-kavari, ġia maki au ġesi ġaġauvei-vegogoto-ġoi Vari Namona fiufiunai, e Klement ema ġita karora tari maki. Ġia arari tu Barau ġena maġuri vanaġivanaġi bukanai varau etorerito.

⁴ Vereġauka ġena maġuri nuġanai ġaro mabarari ai boġono iaku. Ma nakira: Boġono iaku.

⁵ Ġemi manau e nuġa-marana boġono vevaġa-ġita-iaġiri tarimarima ġeri ai. Korana Vereġauka ġena iaġoma bekavinaġi-rakava.

⁶ Dagara ta tuġamaġi-vekwaraġina asi boġono vei, senaġi vanaġivanaġi ġemi rabu dagarari ġauġau ai Barau boġono noġia ma tanikiumi ġesi.

⁷ Benamo Barau na ġena maino, ġita mabarara ġera riba e tuġamaġi-faka evanaġiato mainona, bevinimini, ma mo maino na ġomi lorumu ema ġemi tuġamaġi mabarari benari-ginikaurini, Keriso Iesu ġena maġuri nuġanai ġotanuni dainai.

⁸ Tarikakagu mabarami, ġegu toretore magona rekenai nakira, vanaġivanaġi veiġa maiġesi kavari boġono tuġamaġi-iaġiri: Maġuri moġoniri, dagara marevana irau veġata, vei-iobukaiobuka, veiġa namo vedaureari, veuravini veiġari, ema vegubakau maġuriri. Dagara namori

ema tarimarima na ġevaġa-raġerini veġari mabarari boġono tuġamaġi-iaġiri.

⁹ Ġegu ġobata na ġoribarito guruġari ema ġegu veġa na ġodoġaririto veġari mabarari ġemi maġuri ai boġono ġauvei-iaġiri e boġono korana-iaġiri. Benamo maino evinirani Barauna ġomi ġemi ai bene tanu.

Filipi tarimari ġeri vevaġa-kava

¹⁰ Ġegu iaku tu asikei ema Vereġauka avaġa-namoani nuġagu mabarana ġesi, korana ġemi vevaġa-kava varevarena ma boġo tuġu-iaġomaia nai. Au ribagu, asi ġotuġarekwaguni, ġemi ura vanaġivanaġi boġono vaġa-kavagu, senaġi gabu manaġai atanuni nai, asi ġemi dabara ta au vaġa-kavagu.

¹¹ Au tu dia dagara tai akubini naima maiġesi aguruġani. Asiġina. Au tu ġegu-ġagu vovoka o asiġina, senaġi badukuani ilaila.

¹² Au tu akubini vetoġana ma ribagu, ema ġegu-ġagu ġevovokani vetoġana maki ma ribagu, be taimi tai gabu tai maiġeri maġuri baraga-ġoitaġorini nai, aiġesina badukurini tu ribagu. Mai riba vekuretoġana tu varau aribaiato. Moġesina nai au tu beġe ġubu-maseguni o bevitoguni, ġegu-ġagu vovoka o bakubini au ġegu ai tu ilaila moġo.

¹³ Maġuri aiġesina ġegu ai evetoreni, senaġina asi ġegu daradara, korana Keriso na ġena seġuka eviniguni nai.

¹⁴ Senaġi aiakuni, korana ġemi vevaġa-kava barego mai ġegu meto nuġanai bama doġaria.

¹⁵ Ġomi Filipi tarimami tu ribami: Makedonia aiaġuiato, tovtovonai Vari Namona aġobata-iaġiato-ġoi nai, ekalesia doġorona ta na asi evaġa-kavaguto-ġoi ġeri moni e farefare na, ġomi moġo ġereġami.

¹⁶ Ġomi na vevaġa-kava dagarari vovoka ġotuġu-tuġukauto-ġoi au Tesalonika vanuġanai atanuto-ġoi nuġanai.

¹⁷ Au asi atuġamaġini, au ġomi ġemina vevaġa-kava dagarari bana doġari, senaġi ġegu ura baregona tu, ġomi ġemi ai ġemi vini auna bene barego bana ġitaia.

¹⁸ Au ġegu ai ġomi ġemi varevare dagarari ġotuġu-iaġomarito tu mabarari maiġeri, be ġegu-ġagu tu vovoka ema ilaila. Ribagu, aura-vinirini dagarari mabarari maiġeri Epafrodito na eġwa-iaġomarito ġegu ai. Ġemi varevare dagarari bonari irau veġata Barau na eġabi-raġerini ginitaġo varevareri, Barau ġevaġa-iakuani dagarari.

¹⁹ Ġegu Barau na ġena farefare namori ema vovoka tabutaburi Keriso Iesu ġenana bevarevare-vini ginikaumini ġemi rabu ġarori ai.

²⁰ Tamara Barau bitana vaġa-raġea vanaġivanaġi, Amen.

Vevaġa-namo guruġari

²¹ Iesu Keriso ġena tarimarima mabarari ġeri vevaġa-namo ġeguna eiaġosini. Gita tarikakara au ġesi ġatanuni na ġemi vevaġa-namo beġe tuġu.

²² Barau ġena veaġa tarimari mabarari ġerina vevaġa-namo beġe tuġu ġemi, ema Kaisara, Roma ġeri vere, ġena numa tarimari na maki ġemi vevaġa-namo baregona beġe tuġua.

²³ Vereġauka Iesu Keriso ġena namo ema varevare-bara ġomi tata iatami ai bene tanu.

PAULO ĜENA TORETORE KOLOSE EKALESIARI ĜERI

Kolose vaĝa-foforina guruĝari

Paulo na mai fefa tu Romai ediburato-ĝoi nuĝanai etoreato. Mai fefa tu laĝani 60 beiaĝo 61 nuĝanai etoreato, mo tu Iesu emaseto murinai.

Mai fefa siri baregori tu karoa 2:9-10.

Paulo na mai fefa etoreato korana tu tarima tari na Kolose ai ekalesia doĝorori ĝeri veĝabidadama ĝevei-veĝonuato-ĝoi nai. Moĝesi naima Paulo na mai fefa etoreato tu Kolose ekalesiari evaĝa-guruĝa-toreĝaurito ema maiĝeri evaĝa-ribarito, 1) tarimarima ĝeri iaunega ema vevaĝa-riba ĝofaĝofari tu aiĝeri ema Keriso ĝena maĝuri korikorina tu aiĝa; 2) Keriso tu moĝoni ekalesia doĝorona debana veĝata; 3) tarima guinena ma ĝena maĝuri rakavari ĝesi beĝene koki-fitoĝaia, ma tarima variĝuna beĝene torekaua; 4) tarimarima ĝeri taravatu veĝari ema ĝeri ura asi beĝene ĝabi-raĝeri e asi beĝene korana-iaĝiri.

Paulo na mai fefa tu maiĝesina eboioĝaiato:

1. Deba, Keriso, ĝena mareva baregona - karoa 1:1-2:5

2. Tauĝani, ekalesia doĝorona, aiĝesina bene tanu ema bene ĝauvei - karoa 2:6-4:18

¹ Au Paulo, Barau ĝena ura lorinai Keriso Iesu ĝena apostolo tarimagu ai evaĝa-iaĝoguto, ema ĝita tarikakara veĝabidadama nuĝanai Timoteo ĝesi, ĝemana mai fefa eiaĝosini,

² ĝomi tarikakama Kolose nuĝanai ĝotanuni ĝemi. Keriso ĝena maĝuri nuĝanai ĝita tu tarikaka. Ĝomi tu Barau ĝena tarima veaĝami ema ma ĝemi vetuĝamaĝikau maki. Ĝita Tamara Barau ĝena varevare-bara ema maino ĝomi ĝemi ai bene tanu.

Kolose tarimari na Keriso ĝeĝabidadama-vini korikoriato

³ Ĝai vanaĝivanaĝi ĝomi iatami ai ĝaĝauĝauni nai, ĝera Vereĝauka Iesu Keriso Tamana, Barau, tu ĝatanikiu-viniani.

⁴⁻⁶ Korana tu, ĝai tauma ruarua na ĝomi varimi tu maiĝesi ĝaseĝaĝiato: Ĝomi na tovotovonai Vari Namona ĝenana eiaĝomato guruĝana, guruĝa moĝonina, ĝoseĝaĝiato nai tu, dagara namona Barau na gubai etore-taĝoani ĝemi, moĝa varina tu ĝovaĝa-moĝoni korikoriato. Ma ĝomi na tu moĝesina naima Keriso Iesu ĝoĝabidadama-vini korikoriani, ema Barau ĝena veaĝa o ekalesia tarimari mabarari maki ĝoura-vinirini. Mani Vari Namona ĝomi ĝemi ai eraĝasito, maniĝa tu tanobara mabaranai ĝevarifiu-rakao rakaoani, ma ĝwana namori maki ĝeĝorani, e tarimarima maki ĝutuma lelevaĝi na maki ĝeĝabi-raĝeani. Mai Vari Namona ĝwaĝwana namona evetoreni tanobara mabaranai, ilailana ĝomi na mani Vari Namona ĝoseĝaĝiato e Barau ĝena namo e varevare-bara korikorina ĝoribaiato ĝarona na veĝata ĝomi fakami ai evesinato, ma eiaĝomani, maniĝa kavana evetoreni.

⁷ Ĝomi tu Epafra na mai Vari Namona easi vaĝa-ribamito. Ĝia tu ĝai karoma namona, ema ĝai ĝesi Keriso ĝena vetuĝunaĝi ĝaiĝo-vinirini tarimana ta. Epafra tu Keriso ĝena ĝauvei tarimana namona, ma ĝena vetuĝamaĝikau, ma ĝomi maki evaĝa-kava ginikaumini.

⁸ Ĝomi ĝemi veuravini Iauka Veaĝa na evinimini, maniĝa maki Epafra na ema kira-varamato.

Paulo ġena ġauġau Kolose ekalesia tarimari iatari ai

⁹ Moġesi naima ġai tu ġomi varimi ġaseġaġiato ġarona na beiaġoma mo toma, ġomi iatami ai ġema ġuriġuri asi ġavaġa-ketoani. Vanaġivanaġi Barau ġanoġiani, ġakirani, ġia ġena ura mabarana bene vaġa-riba ġitakaumi, ema Iauka Veaġa ġenana eiaġomani iaunegana e tuġamaġi-fakana maki mabarana boġono ġabia.

¹⁰ Ġai maiġesina ġaġauġauni anina tu, Vereġauka na eura-viniani maġurinai boġono tanu ġana, ema ġemi veiġa e maġuri mabarabarari ai maki ġia boġono vaġa-vererea ġana. Aba, ġemi veiġa namori mabarari ġwaġwari beġene fofori, ema Barau maki boġono riba-ġinikaua.

¹¹ E ġema ġuriġuri tu, Barau ġena seġuka iaru-korokorona na seġuka bene vinimi, be boġono kokore-koru. Korana mo kokore na tu meto ġoġoitaġorini maiġeri nuġari ai boġo ruġa-ġwaġiġini e boġo vevaġa-ġwaġiġini. E ma iakumi ġesi

¹² Tamara Barau boġo tanikiu-viniani. Korana ġomi tu varau eġabi-raġemito, be ġia ġena tarima veaġari na ġena Basileia ma mamana baregona nuġanai kara beġe ġaunarini dagarari ġomi na maki boġo ġaunarini.

¹³ Ġita mabarara Barau na tu mukuna ġena seġuka barana nuġana na evaġa-maġurirato, ma Natuna ġena veġitaġau seġukana nuġanai etoretoġarato. Mo Natuna tu Barau na euravini-baregoani.

¹⁴ Ġita tu Barau Natuna na evoi-ġenoġoirato, ma Barau na ġia bakunai ġera rakava etuġamaġi-fitoġarito.

Keriso ġena ġauvei

¹⁵ Barau tu asi taġitaiani, senaġi Barau vetoġana korikorina tu Natuna ġenana eforrito. Ma mai Barau Natuna maiġa tu Barau ġimana veiveiri dagarari mabarari fakari ai ġia tu guine, emaġuri-guinetto merona kavana.

¹⁶ Korana Keriso ġenana Barau na gubai ġetanuni dagarari mabarari ema tanobarai ġetanuni dagarari mabarari eveirito. Taġitarini dagarari ema asi taġitarini dagarari eveirito. Seġuka lelevaġi iaukari mabarari, e seġuka lelevaġi aneruri, e veġorikau iaukari, ema ġeri seġuka e maoro barego lelevaġi iaukari eveirito. Dagara mabarabarari tu Barau na Keriso ġenana eveirito, ma Keriso ġena moġo eveirito.

¹⁷ Keriso tu maiġeri dagara mabarari roġosi beġere ġora nuġanai veġata etanuto-ġoi. Ma dagara mabarari maki ġia ġena seġuka na eġabi-taġorini.

¹⁸ Ekalesia doġorona debana tu Keriso, ema ekalesia doġorona tu ġia tauġanina. Ekalesia ġena maġuri korikori tu ġia ġenana eiaġomato, ema ġia tu mero guinena, mase tarimari mabarari fakari na Barau na mase seġukana na evaġa-maġuriato. Korana dagara mabarari ġia ġena veġitaġau gaburenai beġene tanu ġana.

¹⁹ Korana Barau ġena ura baregona, Keriso ġenai ġia ġena maġuri e mareva mabarana bene tanu.

²⁰ Ma Barau ġena ura dagarari mabarari Keriso ġenana ġia ġenai ma bene ġabi-ġenoġoiri etato, mai tu tanobarai ġetanuni dagarari mabarari ema gubai ġetanuni dagarari mabarari. Moġesina naima Keriso rarana satauro ai eriġoto, benamo Barau na maino eveiato dagara mabarari ġesi.

²¹ Ġomi guinenai Barau ġesi fakami tu manaġa rakava, e ġemi tuġamaġi ai maki Barau tu ġovetari-viniato-ġoi, korana ġomi tu veiġa rakavari ġoveirito-ġoi.

²² Senaġi toma tu Keriso tauġanina korikori ġevaġi-maseato, monana ġomi ġia ġenai ma eġabi-ġenoġoimito. Barau na Keriso ġena mase ġenana vau tauġena ġenai eġabi-kavamito, korana tu eurato, ġia ġoiranai tu veaġa

tarimari bene vaġa-ruġa-tarimi, e asi ġemi kerere misina ta maki, e tarima ta na maki asi bene vaġa-daġami.

²³ Senaġi ġomi tu ġemi veġabidadamai boġono kokore e boġono ruġa-gigitari, ema Vari Namona ġoseġaġiato nai, ġemi tuġamaġikau ġovaġa-ruġaiato, monana ta na asi bene ġori-ġerevaġimi. Ġomi na tu mai Vari Namona maiġa ġoseġaġiato. Ma tanobarai ġetanuni tarimarimari mabarari ġeri maki mai Vari Namona maiġa ġevvari-fiuato. Au Paulo maki mai Vari Namona vetuġunaġina aiaġo-viniani e aġobata-iaġiani.

Paulo ġena ġauvei ekalesia urari ai

²⁴ Maitoma au tu aiakuni, korana au tu ġomi urami ai amidigu-midiguto. Ekalesia tu Keriso tauġanina, ma Keriso tu mai tauġanina maiġa uranai emidigu-midiguto. Ma au toma mai tauġanigu ai mai midigumidigu aġwaiiani tu, Keriso ġena ekalesia navaġa-kavaia uranai. Au tauġanigu ai midigumidigu roġo aġwaiiani, korana tu Keriso ġena ekalesia uranai mo midigumidigu Keriso na eġwaiato moġa tu roġosi roġo bene kori nai.

²⁵ Au tu Barau na evaġa-ruġaguto, ekalesia ġena vetuġunaġi bana iaġo-vini etato. Barau na mai ġauvei eviniguto tu, ġomi ġemi ai Barau ġena guruġa mabarana bana vaġa-fofori korikoria ġana.

²⁶ Guinena na veġata ema ġuru mabarari ġerina veġata mai maġuri vekuretoġana maiġa tu vekuretoġa, beiaġoma mo, Barau ġena tarimarima veaġari ġeri ai vauro bema vaġa-foforia.

²⁷ Irau bese tarimari vekaravari ai, Barau eurato, ġena tarimarima veaġari ġeri ai mai maġuri vekuretoġana marevana barego lelevaġina bene vaġa-foforia etato. Mai maġuri vekuretoġana marevana barego lelevaġina bene vaġa-foforia etato maġurina tu maiġea: Keriso ġomi nuġami ai etanuni. Ġita na mareva baregona tatuġamaġi-dadamaġiani marevana tu maiġa.

²⁸ Ġai na tu mai Keriso maiġa ġaġobata-iaġiani. Ema iaunega irauirauri ġerina tarimarima mabarabarari ġakira-toreġaurini e ġavaġa-ribarini, korana ġaurani, tarimarima mabarari Keriso ġena maġuri nuġanai tu beġene namo-vedaurea vauro, Barau ġenai baġana ġori-iaġori.

²⁹ Moġa uranai avekwarraġi-rakavani. Keriso ġena kokore au nuġagu ai eġauveini seġukana tu barego lelevaġi. Moġesina naima au tu Keriso ġena kokore ai mai ġauvei aveiani.

2

¹ Au aurani, ġomi tu boġono riba, au tu avekwarraġi-rakavani, ġomi Kolose ekalesiami, e Laodikea ekalesiari, ema au ġoiragu roġosi roġo beġene ġitaia ekalesiari vovoka, mabarabarami navaġa-kavami uranai.

² Au ġegu ura baregona sebona tu, ġia nuġari beġene gwaġiġi, ema mabarari veuravini sebonai moġo beġene iaġo. Korana tu moġesi beġe veini vauro beġe tuġamaġi-faka ginikauni, benamo Barau ġena vekuretoġa dagarana beġe ribaiiani. Barau ġena vei-vekuretoġa dagarana tu Keriso.

³ Iaunega ema riba vonu-fokafokana mabarana tu Keriso ġenai vekuretoġa ġetanuni.

⁴ Maiġeri guruġa akira-varamini korana tu, irau tarima ta na nuġa-ġani guruġari namori na beġofa-veġonumini garina.

⁵ Au tu moġoni tauġanigu ġomi fakami ai tu asiġina. Senaġi iauka rekenai au tu ġomi sevimi ai, be ġauvei ġovei-ginikaurini ema Keriso ġenai ġemi veġabidadama tu roġo barego aġitaiani, moġa lorinai averere-rakavani.

Keriso ġesi bisini sebona, be maġuri bisini ġabia

⁶ Keriso Iesu tu ġomi na ġoġabi-raġeato, benamo ġemi Vereġaukai ġovaġa-iaġoato. Moġa lorinai ġomi tu ġia ġena maġuri nuġanai moġo boġono raka e boġono tanu.

⁷ Ġomi ġemi maġuri tu ġau ġokana tano nuġana ġana evariġo-korikorini kavana, Keriso ġenai beġene variġo. E numa fore iatanai ġeragaiani kavana, Keriso iatanai ġemi maġuri boġono vaġa-ruġakauri e boġono ragari. Ema ġevaġa-ribamito ilailanai ġemi veġabidadama beġene kokore-korikori, ma vanaġivanaġi Barau tu boġono tanikiu-vinia.

⁸ Lorimi boġono vetore, asi namo tarima ta na tarimarima ġeri iaunega ġofaġofari koriri na ġomi nuġami beġanirini, benamo beġori-dareremini garina. Mai tarimarima ġeri iaunega ġofaġofari tu tarimarima na ġevaġa-ruġarini maġuriri e veġari ġeri ai; senaġina moġeri tuġamaġi veġonuri tu tanobara barauri ġerina ġeiaġomani, a dia Keriso ġenana ġeiaġomani.

⁹ Korana Barau ġena maġuri e veġa mabarari tu Keriso tauġanina nuġanai ġetanuni.

¹⁰ Ma Keriso nuġanai mai maġuri ġomi na ġoġabiato. Keriso tu veġorikau iaukari e aneruri mabarari ema ġeri maoro barego lelevaġi iaukari mabarari fakari ai ġeri Vere.

¹¹ Ġomi Keriso ġesi ġosebonato nai tu, tauġanimi kefiru ġelama-vaġirito, senaġi mai tu dia tarimarima ġimari na ġeveiani veġana akiraġiani. Asiaġina. Mai tu Keriso ġena kefi-lamavaġi veġana. Moġa tauna tu, tauġani ġena veġa rakavari ġomi ġemi na ġokoki-fitoġarito.

¹² Korana babatiso ġoġabiato neganai, ġomi tu noġa Keriso ġesi ġeguri-sebonamito; ema Barau na Keriso ġesi evaġa-vaisirage ġenoġoimito, korana Barau ġena ġauvei seġukana ġovaġa-moġoniato nai. Mo seġuka na Barau na Keriso mase na ma evaġa-variġisi ġenoġoiato.

¹³ Guinenai ġomi iaukami tu mase, korana ġemi kira-sirivaġi e vei-rakava bene, ema tauġani ġena veġa rakavari maki ġomi tauġanimi ġerina roġosi beġere lama-fitoġari. Senaġi toma ġomi iaukami tu Keriso ġesi Barau na evaġa-maġuri ġenoġoirito. Ġita ġera rakava mabarari tu Barau na etuġamaġi-fitoġarito.

¹⁴ Taravatu guruġari ema taravatu asi takorana-iaġiato voiri metori ġita iatarai ġetanuni, moġeri tu mabarari Barau na asi tauri ai evaġa-iaġorito, be ekoki-fitoġarito. Barau na mo taravatu moġeri ġeri seġuka tu eġabi-vaġiato, benamo Keriso ġena satauro ai eikoko-kauato.

¹⁵ Ema Barau na veġorikau iaukari rakavari e ġeri maoro barego lelevaġi iaukari, ġeri kokore mabarari asi tauri ai evaġa-iaġorito e evaġa-rakavarito. Keriso ġena satauro seġukana na iauka rakavari Barau na evaġa-ketorito, ma tarimarima ġoirari ġutuġuturi ai evaġa-maiakarito, ma muriri ai evaġa-rakarito.

¹⁶ Moġesina naima ġaniġani e niuniu dagarari taravaturi irauirauri ġaramari ai tarima ta na asi bene ġau-fitoġami. Ema tarima ta na Barau tuġamaġi-iaġina verekona, o ġue variġuna verekona, o Sabadi ġarona ġaramanai maki asi bene ġau-fitoġami.

¹⁷ Mai dagara maiġeri tu ġoirai vau beġea ġorani dagarari laulauri moġo. A maġuri korikorina tu Keriso ġenana bita ġabiani.

¹⁸ Bema tarima ta ġoġitaiani, tauġena manau tarimanai evevaġa-iaġo ġofa-kauni e aneru etoma-rakariġo-vinirini, ema nuvi o mata-vanaġi ai asi eġitarini dagarari eguruġa-iaġirini nai tu, garona asi boġono seġaġia. Ġia mani ġena tuġamaġi maniġa tu eveġonu-fatafatato. Maniġesina tarimarima

na tu ġomi moġo beġe ġofa-dareremini, benamo voimi namona asi boġo ġabiani.

¹⁹ Keriso tu deba; ma mani tarima tu deba ġenana ġeraka-veġitato, be deba ġenai ġia tu asi ġetubukauni. Mai deba na tauġani mabarana ġaniġani eviniani, ema tauġani nuġanai turiġa evaġa-tubukau ġigitaririni, ema tauġani mabarana evaġa-tubu vegogoani, Barau ġena ura lorinai.

²⁰ Ġomi tu Keriso ġesi ġomase-sebonato, be ġomi na taravatu irauirau e tanobara barauri tu asi ma boġo korana-iaġirini. Ma kara dainai tu mai tanobara maġurinai ġotanuni tarimari noġa maiġeri taravatu ma ġokorana-iaġirini, ei?

²¹ Ġokirani, “Asi ġoġabi-karaia; asi ġomami-tovoa; ġimami na asi ġoġabi-tovoa,” ġotoni.

²² Senaġi mani dagara maniġeri tu boġono ġaniri e boġono ġauvei-iaġiri ġana. A maniġeri taravatu ema vevaġa-riba tu tarimarima ġerina moġo ġeiaġomani dagarari.

²³ Moġoni, maniġeri taravatu na tu ġita ġerai Barau toma-rakariġona tuġamaġina bevaġa-ġoraiani, e manau veiġana ġerai bevaġa-ġoraiani, tauġani vaġa-midigu-midiguna bevaġa-ġoraiani. Moġesi naima tarima kotari ġetuġamaġini, maiġeri taravatu tu iaunega tarimari ġerina ġeiaġomani. Senaġi maiġeri taravatu na tu ġita asi bevaġa-kavarani, ma tauġani ġena ura rakavari asi bevaġa-ketorini.

3

Keriso ġesi tasebonani nai tu, maġuri variġuna taġabiani

¹ Ġomi tu Barau na Keriso ġesi evaġa-maġuri ġenoġoimito, naima gubai ġetanuni dagarari boġono vetau-baregori, e nuġami maki monai boġono toreri. Keriso tu monai Barau ġimana aroribana rekenai etanu-taġoni teronai.

² Vanaġivanaġi ġemi tuġamaġi ai tu gubai ġetanuni dagarari boġono tuġamaġi-taġori, a tanobara dagarari tu asi boġono tuġamaġiri.

³ Korana ġomi tu varau ġomaseto tanobara maġurina ġenai, ma ġemi maġuri korikori tu vekuretoġai etanuni Keriso ġesi, Barau ġenai.

⁴ Keriso tu ġomi ġemi maġuri korikorina. Ġia ma befororini ġaronai, ġomi maki Keriso ġesi boġo fofori-sebonani, ema ġena mareva ma mamana baregona boġo ġabiani.

⁵ Moġa lorinai tauġanina ġena veiġa e maġuri rakavari ġemi ai roġo ġetanuni, maniġeri mabarari boġono vaġi-maseri. Tauġanina ġena veiġa e maġuri rakavari tu maiġeri: Mata-boraġa veiġari, veiġa mirori, kima veiġari, matabara e veiġa rakavari uravini-baregori maġurina, ema mata-ġaniġani maġuriri. Mata-ġaniġani maġurina tu babarau toma-rakariġori veiġana. Maiġeri mabarari ġerina boġono raka-veġita.

⁶ Korana mai veiġa maiġeri ġaramari ai Barau ġena baru o Kota baregona seġafore tarimari ġeri ai bema vaġa-foforiani.

⁷ Guinenai ġomi maki tanobara ġena veiġa e maġuri rakavari nuġari ai ġotanuto-ġoi nai tu, moġeri veiġa rakavari ġomi na maki ġoveirito-ġoi.

⁸ Senaġi toma mai veiġa maiġeri ġomi ġemina tu boġono tore-veġitari: Tuġamaġi-baru, baru rakavarakava, tarima vaġa-rakavari tuġamaġiri e veiġari, guruġa rakavari kiraġikiraġiri ema sivarai mirori kiraġikiraġiri.

⁹ Tauġemi fakami ai guruġa o veiġa ġofaġofari ai ta na ta asi bene ġofaia. Korana ġomi na ġemi maġuri guinena ma ġena veiġa rakavari ġesi tu dabuġa rakavana ġokoki-fitoġaiiani kavana ġokoki-fitoġarito,

¹⁰ ma tarima variġu geragerana ġoriġo-kauato, dabuġa variġu geragerana ġoriġo-kauani ilailanai. Ma ġia maiġa tu Barau na vanaġivanaġi evaġa-variġu ġenoġoiani, eveiato Barauna vetoġana korikori bene ġabia e bene riba-ginikaua ġana.

¹¹ Mai maġuri variġuna taġbiato mainai tarima ta asi irau. Be iniġesi asi bisini kira, ġai tu Iuda tarimama, a ġia tu irau bese tarimari; ġai tu mero tauġaniri kefiru ġalama-vaġini doġorona, a ġia tu mero tauġaniri kefiru asi ġelama-vaġini doġorona; asi bisini kira maki, ġia tu asi ġesikulito tarimari e maġuri mamana roġosi roġo beġene ġitaia tarimari; ġai tu asi tuġu-rakaorakao tarimama, a ġia tu tuġu-rakaorakao tarimari. Asiġina, maiġesi asi bitana guruġa. Korana Keriso ġereġana moġo barego ema ġita mabarara nuġarai etanuni.

¹² Ġomi tu Barau na varau eġabi-viriġimito tarimami, e ġena veaġa tarimami, ema Barau na euravini-rakavamini tarimami. Moġa lorinai vevetuġaġwa, veiau-namo, manau, marana, ema vevaġa-gwaġiġi maġuriri na boġono vedabuġa.

¹³ Meto o maġuri gwaġiġiri tari ġoġoitaġorini karomi tari ġerina nai tu, boġono vevaġa-gwaġiġi karomi ġeri ai. Bema tarima ta ġomi fakami ai karonna ta na evaġa-veġare veġareani nai tu, mo rakava moġa bene tuġamaġi-fitoġaia, Keriso na ġomi ġemi vei-rakava etuġamaġi-fitoġarito kavana.

¹⁴ Maiġeri mabarari iatari ai tu veuravini na boġono vedabuġa. Korana tu mai maġuri namori mabarari tu veuravini na vauro ebaru-sebona ginikaurini, benamo ġeġauvei-ġitakauni.

¹⁵ Keriso ġena maino na nuġami bene ġori-kauri. Korana Barau na ġomi ekea-vegogomito anina tu, tauġani sebonai boġono iaġo, benamo maino ai moġo boġono tanu. Ema Barau boġono tanikiu-vinia.

¹⁶ Keriso ġena guruġa tauri korikori e ġeri seġuka ġomi nuġami ai tu beġene vonuvonu-raġe. Monana karomi tata ġesi Keriso ġena guruġa iaunega korikorina na boġono vevaġa-riba e boġono vekira-toreġau. Ma nuġami ai Barau ġotanikiu-viniani nai tu, Salamo boġono mari, e Barau vaġa-raġena mariri boġono mariri, ema Iauka Veaġa na evinimini mariri boġono mariri.

¹⁷ Kamara ġauvei boġo veiani nai, guruġai boġo veiani o veiġai boġo veiani, mabara-barari Iesu Vereġauka aranai moġo boġono veiri. Ma ġia ġenana Tamara Barau boġono tanikiu-vinia.

Ekalesia tarimana ma ġaraġona e natuna ema ġena tuġu-rakaorakao tarimari ġesi ġeri tanu maġurina korikori

¹⁸ Veġaraġo vavinemi, ġomi tu ġaraġomi ġeri veġitaġau seġukana gaburenai boġono tanu. Korana mai maġuri maiġa Vereġauka ġoiranai tu maġuri namona.

¹⁹ Veġaraġo taumi, ġaraġomi boġono uravini-baregori, e ġaraġomi ġeri ai nuġami asi boġono vei-ġirimaġirimari.

²⁰ Natu, dagara mabarari ai tamam e sinami tu garori boġono seġaġi-viniri. Korana mai veiġa tu Vereġauka iauna evaġa-namoani.

²¹ Tama, natumi asi boġono vaġa-baruri, korana beġe tuġamaġi-moirani, asi beġe kokoreni garina.

²² Tuġu-rakaorakao tarimami, mai tanobarai ġeri vetuġunaġi ġoiaġo-vinini tarimari garori boġono seġaġiri. Ġia tu dagara mabarari ai garori boġono seġaġiri. Dia ġia ġoirari ai moġo, tarima iauri beġene vaġa-namori ġetoni nai ġevei-ġofakauni tarimari kavari. Asiġina. Ġomi tu Vereġauka gubakauna

mağurina nuğami ma rağeri ġesi ema nuğami mabarari ġesi boğono seğaği-viniri.

²³ Ma kamara ġauvei boğo veiani nai, boğono veia nuğami mabarari ġesi. Ġauvei tu asi tarimarima ġeri ġauvei ġoveiani noğa boğono veia. Asiğina. Ġomi na tu Vereğauka ġena ġauvei ġoveiani mağurina boğono veia.

²⁴ Gomi tu ma ribami, Vereğauka na vau voimi bevinimini, korana ġomi na tu Keriso Vereğauka ġena vetuğunaği ġoiago-viniani.

²⁵ A tarima ta na veiğa beleaiani nai, mo veiğa beleaiani voina tu beğabiani veğata. Korana Vereğauka ġoirana tarima mabarari tu ilaila moğo, dia ta tu egubakauani, ma ta tu asi egubakauani.

4

¹ Ġomi vetuğunaği veremi, mani ġemi tuğu-rakaorakao tarimari maniğeri ġeri-ğari tu, ġeura-vinirini ilailari ai boğono viniri. Ġia ma ġeri maoro kara ġomi ġemina beğere ġoitağori dagarari tu boğono viniri veğata, ema veiğa namori e moğoniri ġeri ai boğono veiri. Korana ġomi maki boğono riba, ġomi eğita-ğaumini Verena maki etanuni gubai.

Vevağa-riba guruğari kotari maia

² Ġauğau asi boğono vağa-ketoa. Vanağivanaği boğono ġuriğuri. Ġemi ġauğau ai boğono venari maki, e Barau boğono tanikiu-vinia.

³ Ma ġai ġema maki boğono ġuriğuri, be Vari Namona bağana vari-fiua ġana, Barau na ġatama-boka gabu tari ai bene keori. Be mo ġana bağana iağo, ma Keriso varina vekuretoğana monai bağana vari-fiua. Au tu mai Keriso varina vekuretoğana maiğa ġaramanai seini na ġebarubaruguto.

⁴ Boğono ġauğau, be au na mai vari vekuretoğana maiğa bana kiraği-fofori ġitakaua, Barau ekirato bana kiraği-fofori ginikaua etato ilailanai.

⁵ Keriso roğosi beğene ġabi-dadama-vinia, roğo murikai ġetanuni tarimari ġeri ai tu, veiğa iaunegari e namori boğono veiri. Ema ġia vefakari ai boğo raka-ğurani negari ai, moğeri mabarari tu asi boğono vağa-rakavari, korana ġia boğo vağa-kavarini negana tu kubi moğo bene.

⁶ Vanağivanaği boğo guruğani nai, boğono garo-namo. Ġemi guruğa maki ma damenari boğono kirağiri e boğono guruğa-ğitağita, be ġemi guruğa tarimarima na beğene ura-viniri e ġeseğaği-namori moğo beğene si. Moğesina boğo veini nai, tarima sebori sebori aiğesina boğo vağa-veserini dabarari boğo ribarini.

Veğabituğu guruğari

⁷ Au varigu mabarana tu tarikakara namona, Tikiko, na vauro beasi kira-varamini. Ġia Keriso ġena mağuri nuğanai tu ma vetuğamaği-kauna ġesi evevağa-kavani, ema ġia tu au ġesi Vereğauka ġena vetuğu-naği ġaiago-viniani.

⁸ Au na Tikiko ġomi ġemi ai atuğu-iağosiani tauna korikori tu, ġai mainai kamasi ġatanuni mağurina beneasi vağa-ribami ġana. Ġia na ġai ġema tanu mağurina bene kira-varami, be ġomi nuğami bene vağa-gwağigiri uranai.

⁹ Ġia tu Onesimo ġesi eiagosini. Onesimo tu ma ġena vetuğamağikau, ema ġia tu ġai tarikakama namona ta. Ġia maki ġomi ġemi tarima ta. Ġia tauri ruarua na mainai kara ġeğorani dagarari mabarabarari beğeasi vağa-ribamini.

¹⁰ Aristako na ġena vevağa-namo ġomi ġemi ai etuğu-iağosiani. Ġia tu au ġesi ġadiburato, be dibura numai ġatanuni mainai. Banabas tarikakana Mareko na maki ġemi vevağa-namo betuğu. Mareko ma Banabas tu

tarikaka, senaġi ġia sinari e tamari tu irau, dia sebona. Mareko ġomi ġemi ai beiaġosini nai, boġono ġabi-raġea ġana guruġari tu varau asi-kira-varamito.

¹¹ Ema Iesu, arana ta ġekiraġiani Iusto, na maki ġemi vevaġa-namo betuġu. A Iuda tarimari fakari ai au ġesi Barau ġena Basileia ġauveina ġaveiani tarimari tu maiġeri moġo. Ġia na au ġevaġa-kava ginikauguni.

¹² Ġomi karomi ta, Keriso Iesu ġena vetuġunaġi eiaġo-vinini tarimana, arana Epafra, na maki ġemi vevaġa-namo betuġua. Ġia tu vanaġivanāġi ġomi urami ai evekwarāġini ġauġau ai. Ġia ġena noġinoġi baregona Barau ġenai eveiani tu, Barau na ġomi ġia ġena urai bene vaġa-ruġatari korikorimi. Ema Barau ġena ura ġomi na nuġami mabarari ġesi boġono vaġa-moġonia, ema boġono korana-iaġi ginikaua.

¹³ Au aguruġa-fofori korikorini, moġoni, Epafra tu ġomi maniġemi, e Laodikea tarimari, e Hierapoli tarimari mabarami urami ai moġoni evekwarāġi-rakavato.

¹⁴ Ġita ġatara namona Luka, doketa tarimana, ema Dema, tauri ruarua na ġemi vevaġa-namo beġe tuġu. Luka tu doketa tarimana.

¹⁵ Au ġegu vevaġa-namo ġita tarikakara Laodikea ai ġetanuni tarimari boġono viniri. E ġegu vevaġa-namo Nimfa boġono vinia, e Nimfa na numai ekalesia doġorona ġeraka-vegogoni maniġeri maki boġono viniri.

¹⁶ Mai fefa ġomi ġemi ai boġo iavi-ġosiani murinai tu, boġono tuġu-iaġoa, ma Laodikea ekalesiari ġeri ma beġenea iavi-foforia. Ma Laodikea ekalesiari atore-vinirito fefana maki ġomi fakami ai boġono iavi-foforia.

¹⁷ Ma Arekipo maiġesi boġono kiraia, boġono kira, “Vereġauka ġena maġuri nuġanai ġauvei oġabiato maniġa tu bono ġauvei-iaġi ginikaua.”

¹⁸ Mai vevaġa-namo guruġari tu au Paulo tauġegu ġimagu na atorerini. Au boġono tuġamaġigu, au tu roġo ma seinigu diburai. Barau ġena namo e varevare-bara ġomi iatami ai bene tanu.

PAULO ĜENA TORETORE GINIGUINENA TESALONIKA EKALESIARI ĜERI

1 Tesalonika vaĝa-foforina guruĝari

Mai fefa ĝena tuĝamaĝi baregona tu Iesu ĝena ĝenoĝoi-iaĝoma vaĝa-ruaruana. Korana tu Iesu ĝena iaĝoma vaĝa-ruaruana mai fefai tu ekiraĝi-ĝutumaiato.

Paulo na mai fefa tu Korinto na etore-iaĝoato, mo tu ĝena evanelia varivarina vaĝa-ruaruana nuĝanai (Apostolo 17:1-14). Mai fefa Paulo na tu laĝani 50 ema 51 nuĝanai ta etoreato, mo tu Keriso maki emaseto murinai vau.

Mai fefai siri baregori tu karoa 4:15-18.

Paulo na mai fefa giniguinena etoreato korana eurato, Tesalonika ekalesiari 1) bene launaĝiri, Barau na ĝeri ai eveirito veigari tarimarima ĝoirari ai beĝene vaĝa-foforiri; 2) bene vaĝa-ribari, Iesu ma beiaĝomani; 3) bene launaĝiri, Barau korana-iaĝina maĝurina korikorinai beĝene tanu.

Paulo na mai fefa tu maiĝesi eboioĝaiato:

1. Ĝia aiĝesi vevaĝa-maĝuri ĝeĝoitaĝoto - karoa 1-3

2. Ĝia aiĝesina beĝene tanu mo maĝuri variĝunai - karoa 4-5

1 Ĝai tauma toitoi, Paulo, Silas, e Timoteo, na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

Varevare-bara ema maino ĝemi ai bene tanu.

Tesalonika tarimari ĝeri maĝuri

2 Ĝai tu ĝaro mabarari ai Barau ĝavaĝa-namoani ĝomi mabarami daimi ai, ema ĝema ĝurigiuri nuĝari ai ĝakiraĝimini.

3 Korana Barau, ĝita Tamara, ĝoiranai ĝavetuĝamaĝi-taĝoni, ĝomi ĝemi veĝabidadama kamasi ĝotovo-naĝirini, e ĝemi veuravini ai kamasi ĝoĝunaĝaveni, ema ĝemi vetuĝamaĝikau ĝita ĝera Vereĝauka Iesu Keriso ĝenai kamasi ĝovaĝa-gwaĝiĝirini.

4 Tarikakama mabarami, ĝai ribama ĝomi tu Barau na eura-vinimini ema ĝia na eviriĝimito ĝia ĝena.

5 Korana Vari Namona ĝai na ĝavinimito tu dia guruĝai moĝo, senaĝi Iauka Veaĝa ma seĝukana e ma moĝonina ĝesi. Ĝomi maki ma ribami, ĝomi ĝemi namo uranaĝi ĝai tu kamasi ĝatanuto ĝomi fakami ai.

6 Benamo ĝomi na maki ĝai ĝotovotovomato ema Vereĝauka ĝotovotovoato enabe ĝevaĝa-midigu midigumito, senaĝi Barau ĝena guruĝa ĝoĝabi-raĝeato ma vereremi ĝesi. Mo verere Iauka Veaĝa na evinimito.

7 Tauna moĝa ĝomi tu vevaĝa-ĝita namonai ĝoiaĝoto veĝabidadama tarimari mabarari Makedonia ema Akaia ĝeri.

8 Korana ĝomi ĝemina Vereĝauka ĝena guruĝa eraka-rosito tu dia Makedonia ema Akaia nuĝari ai moĝo, senaĝi ĝomi ĝemi veĝabidadama Barau ĝenai tu gabu mabaranaĝi beĝe ribaia. Moĝa lorinaĝi monai ĝai na guruĝa ta tu asi ma baĝa kiraĝiani.

9 Ĝia tauĝeri maki ĝevkiraĝito ĝai na ĝavarivarimito nai, ĝomi na ĝai kamasi ĝoĝabi-raĝemato, ema kamasi babarau ĝoiaĝuirito, Barau maĝurina ema moĝonina vetuĝunaĝina boĝono iaĝo-vini ĝana,

10 ema Natuna Iesu ĝonariani guba na ma beĝenoĝoi-iaĝomani. Ĝia tu Barau na mase na ma evaĝa-variĝisi ĝenoĝoiato, ema ĝena baru bevaĝa-foforiani o tarimarima bevaĝa-kotarini ĝaronai, Iesu na bevaĝa-maĝurirani.

2

Paulo ġena ġauvei Tesalonika ai

¹ Tarikakama mabarami, ġomi tauġemi ma ribami, ġemi ai ġaiagōsito nai, asi ġaġauvei-kavato.

² Ġomi ribami maki, ġai Tesalonika ġana roġosi roġo baġana iaġosi nai, Filipi ai ġevaġa-midigu midigumato e ġekira-fitoġamato. Moġoni, ġeiaġomavini baregomato, senaġina Barau na evaġa-kokoremato, ġena Vari Namona baġana kira-varami ġana.

³ Ġai ġema velaunaġi ġomi ġemi ai tu dia guruġa babobabo ai, dia tuġamaġi rakavari ai, e dia ta baġana ġofaia ġana.

⁴ Senaġi Barau na evaġa-moġonimato Vari Namona baġana fiua. Moġa lorinai ġakiraġiani, dia tarimarima baġana vaġa-iakuri ġana, senaġi Barau baġana vaġa-iakua ġana. Ġia na ġai nuġama evetaurini.

⁵ Ġomi ribami, e Barau maki ġoiranai, ġai ġaiagōsito nai tu, dia nuġa-ġani ai ġavaġa-raġe ġofakaumito-ġoi, e mata-ġaniġani ai ġaguruġa-ġofakauto-ġoi.

⁶ Ġai tu asi ġomi na boġono vaġa-raġema, o tarima tari na beġene vaġa-raġema ġatato.

⁷ Ġai tu Keriso ġena apostolo tarimama, be ma ġema maoro, ġema-ġama ġomi ġemi ai baġara kiraġi. Senaġi ġomi ġesi tatanuto-ġoi neganai, ġai tu marana, sina ta na natuna eġita-ġaurini kavana.

⁸ Ġauravini-rakavamito lorinai ġaurato, dia Barau ġena Vari Namona moġo ġemi baġana kiraġi, senaġi ġema maġuri maki ġatore-taririto, korana ġema veuravini ġemi ai tu barego lelevaġi.

⁹ Tarikakama mabarami, ġai kamasi ġaġauveito-ġoi ema ġavekwaraġito-ġoi roġo ġotuġamaġi-taġorini, ene? Barau ġena Vari Namona ġaġobatavinimito-ġoi nuġanai, boġi-laġani ġaġauveito-ġoi, ġema-ġama baġana doġari uranai, baġa vaġa-doġe-ganimini garina.

¹⁰ Ġomi na ġoġitamato ema Barau na maki eġitamato ġai kamasi ġaveaġato, ġavei-maoromaoroto ema asi ġema kerere ta ġomi vaġa-moġoni tarimami fakami ai.

¹¹ Ġomi ma ribami, ġai na ġomi tata ġaveimito-ġoi tu tama na natuna korikorina eveiani kavana.

¹² Ġai na ġavaġa-kokoremato-ġoi, ġemi tuġamaġi ġavaġa-gwaġiġirito-ġoi, ema ġalau-naġimito-ġoi Barau vaġa-iakuna veiġari boġono veiri ġana. Ġia na ekeamini, ġena Basileia ma marevana baregona bene vinimi ġana.

¹³ Ġai na Barau ġatanikiu-viniani ġaro mabarari ai, korana ta tu, ġena guruġa ġaġabi-iaġosiato neganai, ġomi na ġoseġaġiato ema ġoġabi-raġeato tu dia tarimarima ġeri guruġa, senaġi guruġa moġonina korikori, Barau ġena guruġa. Mo guruġa tu ġovaġa-moġoniani tarimami nuġami ai eġauveini.

¹⁴ Tarikakama mabarami, ġomi tu Barau ġena ekalesia Keriso Iesu nuġanai Iudea ġesi boġo ilaila, korana Iuda tarimari na ġia ġevaġa-midigu midigurito ilailanai, ġomi maki ġemi doġoro tarimari na ġevaġa-midigu midigumini.

¹⁵ Iuda tarimari na Iesu Vereġauka ema peroveta tarimari ġevaġirito, ema ġai maki ġelaimato. Barau tu asi ġevaġa-iakuani, ema tarimarima mabarari ġekira-sirivaġi vinirini.

¹⁶ Ġai maki ġekira-ġoimani irau bese tarimari ġeri ai Vari Namona asi baġana kiraġia, korana maġuri vanaġivanaġi beġe ġabiani garina. Moġesi ġeri rakava vanaġivanaġi ġevaġa-baregorini. Senaġi Barau ġena baru maki iatari ai tu varau bevotu.

Paulo ġena ura baregona Tesalonika tarimari ma bene ġitari

17 Tarikakama mabarami, nega kotari roĝo ĝai ĝomi sevimi na ĝeinu-veĝitamato, dia tuĝamaĝi ai, senaĝi tauĝani ai, asi ma ĝaĝitamini. Ĝema ura baregona ĝoirami baĝana ĝitari.

18 Ĝai ĝaurato tu ma baĝana iaĝosi ĝomi ĝemi ai. Moĝoni, au Paulo, vaĝa-vira akirato, senaĝi Satani na ĝema dabara ekouato.

19 Baĝana ĝenoĝoi veĝata, korana ĝomi tu ĝai ĝema tuĝamaĝikau, ĝema verere e ĝema kokore voĭna ĝera Vereĝauka Iesu ĝoiranai ĝia ma beiaĝomani ĝaronai.

20 Moĝoni, ĝai ĝema veiavi e verere korana tu ĝomi.

3

Paulo na Timoteo etuĝuato Tesalonika ĝana

1 Ĝai ĝema vevaĝa-gwaĝiĝi ĝekorito, benamo ĝakirato, namona tu ĝai tauma ruarua moĝo Atena ai baĝana tanu,

2 a ĝai tarikakama Timoteo tu baĝana tuĝua ĝomi ĝemi ai. Ĝia tu ĝai ĝesi Barau ĝena vetuĝunaĝi ĝaiĝo-viniani, Keriso ĝena Vari Namona ĝaĝobata-iaĝiani. Ĝia na bene vaĝa-kokoremi ema ĝemi tuĝamaĝi bene vaĝa-gwaĝiĝiri ĝemi veĝabidadama nuĝanai.

3 Be, ĝomi ta na ĝena veĝabidadama asi bene raga-kwanea mani midigu-midigu ĝoĝoitaĝorini nuĝanai. Ĝomi ribami, maniĝeri tu bita ĝoitaĝorini veĝata.

4 Ĝai roĝo ĝomi ĝesi tatanuto-ĝoi nai, ĝakiramito-ĝoi, ĝita tu beĝe vaĝa-midigu midigurani, benamo moĝeri ĝefoforito, be ĝoribarito.

5 Moĝa lorinai, ĝegu vevaĝa-gwaĝiĝi ekorito, benamo Timoteo atuĝu-iaĝosiato, ĝia ĝenana banama riba, ĝemi veĝabidadama tu kamasi ĝotoreani. Korana irau dabara tari ai veribaĝani tauna na beriba-ĝanimini, benamo ĝai ĝema vekwaraĝi asi taunai beiaĝoni garina.

Timoteo ĝena vevariflu

6 Toma Timoteo tu ĝomi ĝemina beĝenoĝoi, ĝomi ĝemi veĝabidadama e veuravini variri namona bema kiraĝiri. Bekirama, ĝomi na ĝai roĝo ĝotuĝamaĝi-taĝomani, ema ĝourani boĝono ĝitama, ĝai na ĝomi baĝana ĝitami ĝatoni kavana.

7 Moĝa lorinai, tarikakama, ĝema midigumidigu ema dabara doko mabarari nuĝari ai ĝemi veĝabidadama na ĝevaĝa-kokoremato.

8 Korana ĝomi Vereĝauka ĝenai boĝo ruĝa-gigitarini neganai, ĝai ĝema maĝuri toma tu moĝoni beĝe namoni.

9 Barau ĝomi daimi ai kamasi baĝa tanikiu-viniani, korana ĝai ĝema verere tu asikeikeina ĝomi ĝemi ai Barau ĝoiranai.

10 Boĝi-laĝani ma nuĝama mabarari ĝesi ĝaĝauĝauni, ĝomi ĝoirami ma baĝana ĝitari ema ĝemi veĝabidadamai ĝorabuni dagarari na baĝana vaĝa-kavami ĝana.

11 Bere namo ĝita Tamara Barau tauĝena na ema ĝera Vereĝauka Iesu na ĝema dabara beĝene veia, ĝomi ĝemi ai baĝana iaĝosi.

12 Ĝera Vereĝauka na maki ĝomi veuravini na bene vaĝa-vonuvonu-raĝemi, karomi tata ema tarimarima mabarari boĝono ura-viniri uranai, ĝai na ĝomi ĝaura-vinimini kavana.

13 Barau na nuĝami bene vaĝa-kokoreri, benamo asi ĝemi vei-rakava ta e ma veaĝami ĝesi Tamara Barau ĝoiranai boĝono ruĝa, ĝera Vereĝauka Iesu ma beiaĝomani ma ĝena veaĝa tarimarimari mabarari ĝesi ĝaronai. Amen.

4

Barau na eura-viniani maḡurina

¹ Tarikakama mabarami, ḡegu guruḡa vaḡa-magona tu maiḡa. Barau vaḡa-iakuna ḡana aiḡesi boḡono tanu tu ḡavaḡa-ribamito. Moḡoni, ḡomi tu moḡesi ḡomaḡurini. Iesu Vereḡauka aranai ḡanoḡimini e ḡalaunaḡimini, ma boḡono kokore-iaḡiri ḡana.

² Korana vevaḡa-riba guruḡari Iesu Vereḡauka ḡena maoro na ḡavinimito tu ḡomi ma ribami.

³ Barau ḡena ura tu boḡono veaḡa, mata-boraḡa e veḡura-vanaḡi veḡari ḡerina boḡono raka-veḡita.

⁴ Ḡomi tau tata maki ḡaraḡomi ḡesi boḡono tanu ma veaḡami e ma vegubakaumi ḡesi.

⁵ Dia mata-boraḡa na bene ḡori-kaumi noḡa Barau asi ribari beseri kavana.

⁶ Ema mo veḡa rekenai tau ta na tarikakana asi bene ḡofaḡofa-iaḡia ema ḡena ura bene veia. Ḡai na ma nuḡama mabarari ḡesi ḡakira-guinemito: Moḡesi eveini tarimana tu Vereḡauka na ḡena rakava voina beviniani.

⁷ Korana Barau na ekearato tu dia tana mata-boraḡa e tana veḡura-vanaḡi, senaḡi tana veaḡa ḡana.

⁸ Moḡa lorinai, dei na mo vevaḡa-riba ḡekira-fitoḡaiiani tu dia tarimarima ḡekira-fitoḡarini, senaḡi Iauka Veaḡa evinimini Barauna ekira-fitoḡaiiani.

⁹ Au na tarikaka uraviniri guruḡari tu toma asi batore-vinimini, korana Barau na evaḡa-ribamito, ḡomi tata boḡono veura-vevini.

¹⁰ Moḡoni, ḡomi na tu tarikaka mabarari Makedonia nuḡanai ḡouravinirini. Senaḡi tarikakama, ḡai na ma ḡavaḡa-naḡimini, mani veḡa boḡono vaḡa-baregoa.

¹¹ Dagara baregona ḡomi kamasi boḡono tanu tu maiḡesi: Asi boḡono guru-raḡe. Tauḡemi ḡemi ḡauvei boḡono vei, ema tauḡemi ḡimami na boḡono ḡauvei ḡemi-ḡami boḡono doḡari ḡana, ḡai na ḡakiramito ilailanai.

¹² Monana vau asi ekalesia tarimari na beḡe gubakaumini, ema ta ḡenai asi boḡo tuḡamaḡikauni, korana dagara tai asi boḡo rabuni.

Iesu ḡena ḡenoḡoi ḡarona

¹³ Tarikakama mabarami, ḡai ḡaurani boḡono riba, ḡemaseto tarimari tu kamasi. Be, asi boḡono tuḡamaḡi-meto, asi ḡeri tuḡamaḡi-dadamaḡi tarimari kavana.

¹⁴ Ḡita na tavaḡa-moḡoniani tu Iesu emaseto, murinai tu ma evariḡisi-ḡenoḡoito. Moḡesi nai ma tavaḡa-moḡoniani deikara Iesu ḡeḡabidadamaviniato-ḡoi nuḡanai ḡemaseto tarimari tu Barau na ma bevaḡa-variḡisi ḡenoḡoirini, Iesu ḡesi beḡabi-vegogorini.

¹⁵ Ḡai na kara ḡavaḡa-ribamini dagarari tu Vereḡauka ḡena guruḡa: Vereḡauka beḡenoḡoini ḡaronai, ḡita deidei roḡo maḡuri tatanuni tarimara na ḡemase-guineto tarimari asi bita raga-kwanerini, asi bita guineni Vereḡauka ḡesi veḡoitaḡo.

¹⁶ Barau beguruḡani ma seḡukana ḡesi, aneru baregona maki bekeakeani, ema Barau ḡena dudu befururuani ḡaronai, Vereḡauka tauḡena guba na bemaḡoni. Benamo deikarari ḡemaseto, Keriso ḡevaḡa-moḡoniato-ḡoi nuḡanai ḡemaseto tarimari, beḡe variḡisi-guineni.

¹⁷ Moḡa murinai, ḡita roḡo tamaḡurini ema roḡo tatanuni tarimara Barau na ḡia ḡeri ai ma bevaḡa-raka-kaurani magube nuḡari ai Vereḡauka ḡesi bitana vedoḡari ḡana, guba e tanobara fakari ai. Benamo Vereḡauka ḡesi bita tanu-vanaḡi vanaḡini.

18 Moġa lorinai maiġeri guruġa ġerina ġomi tata boġono vevaġa-kokore-vevini.

5

Boġono rovina-tore Vereġauka ma beiaġomani

1 Tarikakama mabarami, ġai na ġomi asi ma baġa tore-vinimini, aitoma mo nega e hora beġe foforini.

2 Korana ġomi tauġemi ma ribami ġitakau, Vereġauka ġena iaġoma ġaronai tu lema tarimana, boġi eiaġomani kavana, beiaġomani.

3 Tarimarima beġe kirani, “Maino ema dagara mabarari namo moġo.” Nuġanai tu asikauna kerere baregona na beġabirini, noġa vavine ma banina diana eguruni kavana. Tarima ta asi beraga-maġurini.

4 Senaġi tarikakama, ġomi tu dia mukuna nuġanai ġotanuni tarimami, be mo ġaro na nuġami tu asi bene vaġa-farevaġiri lema tarimana kavana.

5 Gomi mabarami tu mama e laġani tarimami. Ġita tu dia boġi e mukuna ġeri tarimarima.

6 Moġa lorinai ġita tu asi bitana gena, asi bitana tanu-kava, tarima tari ġeveini kavana, senaġi bitana tataġa, bitana boġeboġe, ema ġera tuġamaġi beġene maoro.

7 Ġegenani tarimari tu boġi ai ġegenani, ema ġeniuniuni tarimari maki boġi ai ġeniuniuni.

8 Senaġi ġita tu laġani ġena tarimarima dainai, ġera tuġamaġi beġene maoro. Ġita tu veġabidadama e veuravini ġesiri kobarai bitana toreri, ema vevaġa-maġuri vetuġamaġina debara kwaraġaunai tana vaġa-iaġoa.

9 Korana Barau na eġabi-virigirato tu dia ġia ġena baru na tana midigu-midigu ġana, senaġi vevaġa-maġuri bitana ġabia ġera Vereġauka Iesu Keriso ġenana.

10 Ġia ġita urarai emaseto tu, ġia ġesi bitana tanu-vanaġi vanaġi ġana, enabe ġita roġo maġuri o mase ġia ma beiaġomani ġaronai.

11 Moġa lorinai ġomi tata boġono vevaġa-kokore-vevini e boġono vevaġa-kava-vevini, maitoma ġoveini kavana.

Vevaġa-riba guruġari tari

12 Tarikakama mabarami, ġanoġimini, ġomi fakami ai ġeġauvei-kokoreni, Vereġauka aranai ġenarimini e dabara korikori ai ġevaġa-ribamini tarimari boġono gubakauri.

13 Ġeri ġauvei dainai boġono gubakau-baregori ema boġono ura-viniri. Ma mainomi ġesi boġono tanu.

14 Tarikakama mabarami, ġavaġa-naġimini, ġauvei asi ġeveini tarimari boġono sisiba-viniri, ġegarini tarimari boġono vaġa-kokoreri. Moira tarimari boġono vaġa-kavari, tarimarima mabarari ġeri ai boġono vevaġa-gwaġiġi.

15 Boġono boġeboġe, tarima ta na rakava na rakava voina asi bene veia, senaġi vanaġivanaġi ġomi tata ġemi ai ema tarimarima mabarari ġeri ai maki veġa namori moġo boġono veiri.

16 Ġaro mabarari ai boġono verere.

17 Ġaro vanaġivanaġi boġono ġauġau.

18 Barau boġono tanikiu-vinia dagara mabarari ġeri ai. Korana mani tu Barau ġena ura ġomi Keriso Iesu ġesi ġomaġurini nuġanai.

19 Iauka Veġa karavana asi boġono vei-busea.

20 Peroveta guruġari asi boġono kira-fitoġari.

²¹ Dagara mabarari boĝono riba-ginikauro; namori moĝo boĝono ĝabi-raĝeri.

²² Rakava dagarari mabarari ĝerina boĝono raka-veĝita.

Vevaĝa-namo guruĝari

²³ Maino Barauna na bene vaĝa-veaĝa ginikaumi. Iaukumi, e ĝemi maĝuri, ema tauĝanimi mabarari ĝia na bene nariri, kerere ta na maki asi bene ĝabimi, bene iaĝo mo, ĝera Vereĝauka Iesu Keriso ĝena iaĝoma ĝaronai.

²⁴ Ĝomi ekeamito Barauna ĝena guruĝa mabarari tu moĝoni, ĝia na beveirini.

²⁵ Tarikakama mabarami, ĝai maki iatamai boĝono ĝuriĝuri.

²⁶ Tarikaka mabarari vetarikaka verauna na boĝono vaĝa-namori.

²⁷ Alaunaĝimini Vereĝauka aranai mai fefa boĝono iavi-foforia tarikaka mabarari ĝoirari ai.

²⁸ Ĝera Vereĝauka Iesu Keriso ĝena varevare-bara ĝomi ĝemi ai bene tanu.

PAULO ĜENA TORETORE VAĜA-RUARUANA TESALONIKA EKALESIARI ĜERI

2 Tesalonika vaĝa-foforina guruĝari

Paulo na mai fefa vaĝa-ruaruana tu mo fefa giniguinena etoreato ma ĝue imaima sebona (6) evanaĝiato murinai ma etoreato. Mo tu ĝia roĝo Korinto ai etanuto-ĝoi nuĝanai etoreato.

Mai fefa nuĝanai siri baregona tu karaa 2:3.

Paulo na mai ĝena fefa vaĝa-ruaruana etoreato mainai tu Tesalonika ekalesiari 1) ĝevaĝa-midigu midigurito-ĝoi nuĝanai evaĝa-gwadarito; 2) Iesu ĝena ĝenoĝoi-iaĝoma vaĝa-ruaruana guruĝari kotari ma ekira-vararito; 3) evaĝa-naĝirito, ĝeri veĝabidadamai beĝene ruĝa-gwaĝiĝi bene iaĝo mo, Iesu Vereĝauka bene ĝenoĝoi, ema elaunaĝirito maki, asi beĝene ĝubulefi.

Paulo na ĝena fefa vaĝa-ruaruana tu maĝesi eboioĝaiato:

1. Nuĝari evaĝa-gwaĝiĝirito, ekirarito, Keriso tu ma beiaĝomani - karaa 1
2. Loriri beĝene vetore korana Keriso ĝofaĝofana tu beiaĝoma-guineni roĝo - karaa 2
3. Ekalesia aiĝesina beĝene tanu maĝurina - karaa 3

¹ Ĝai tauma toitoi, Paulo, Silas, e Timoteo na Tamara Barau ema Vereĝauka Iesu Keriso ĝena ekalesia Tesalonika nuĝanai ĝatore-vinimini.

² Barau ĝita Tamara ema Vereĝauka Iesu Keriso ĝerina varevare-bara e maino ĝemi ai bene tanu.

Keriso ma beiaĝomani ĝaronai, Barau na tarimarima ĝeri rakava voiri bevinirini

³ Tarikakama mabarami, ĝai na tu Barau baĝana tanikiu-vinia ĝaro mabarari ai ĝomi daimi ai. Moĝesi baĝa veini tu maoro, korana ĝemi veĝabidadama ebarego-rakavani, ema ĝemi veuravini karomi mabarari ĝeri ai maki ebaregoni.

⁴ Moĝa lorinai ĝomi ĝavaĝa-raĝemini Barau ĝena ekalesia nuĝari ai. Ĝavaĝa-raĝemini korana ĝomi tu enabe ĝelaimini e ĝevaĝa-midigu midigumini, senaĝi ĝemi veĝabidadama ĝoĝabi-gigitariani.

⁵ Mo veĝa mabarari na Barau ĝena vevaĝa-maoro vetoĝana namona ĝevaĝa-moĝoniani, moĝa anina ĝomi tu ilaila ĝia ĝena Basileia boĝo ĝabiani, korana mo Basileia dainai ĝomidigu-midiguni.

⁶ Barau tu maoro veĝari moĝo beveini: Ĝomi dei na ĝevaĝa-midigu midigumini tarimari ĝia na ma bevaĝa-midigu midigurini.

⁷ Ema ĝemi midigumidigu ĝerina bevaĝa-iaĝaraĝimini ema ĝai maki. Moĝesi beveirani Iesu Vereĝauka ma ĝena aneru ma seĝuka baregori ĝesi guba na beĝe mariĝoni ĝaronai.

⁸ Ma karava moremorena ĝesi beiaĝomani; Barau asi ĝekorana-iaĝiani tarimari ema ĝera Vereĝauka Iesu ĝena Vari Namona asi ĝeĝabi-raĝeani tarimari ĝeri rakava voiri bema vinirini.

⁹ Ĝeri rakava voiri tu maĝa: Ĝia tu Vereĝauka ĝenana e ĝena mama seĝukana ĝenana ma fakari beĝe tanuni, midigu vanaĝivanaĝi beĝe ĝabini.

¹⁰ Mo tu beĝorani Keriso ma beiaĝomani ĝaronai, ĝena tarimarima mabarari na beĝene vaĝa-raĝea, ema ĝevaĝa-moĝoniani tarimari na beĝene vaĝa-namoa ĝana. Ĝomi maki ĝia ĝesi, korana ĝaĝobata-vinimito, ĝoĝabi-raĝeato nai.

¹¹ Moġa lorinai vanaġivanaġi ġomi iatami ai ġaġuriġurini. Ġera Barau ġanoġiani, ġemi maġuri bene vaġa-namori, korana ġia na ekeamito tu boġono maġuri ġana. Ġia seġukana na ġemi ura namori mabarari ai bene vaġa-ġaunami, ema ġemi veġabidadama dainai ġoveirini ġauveiri e veġari bene vaġa-ġuġururi.

¹² Monana, Iesu Vereġauka arana beġene vaġa-raġea ġomi daimi ai, ema ġomi beġene vaġa-raġemi ġia bakunai. Ġita ġera Barau e Vereġauka Iesu Keriso na ġeri varevare-bara ġerina moġeri dagara mabarari beġene vaġa-ġorari.

2

Taravatu ekira-fitoġaiani tarimana

¹ Tarikakama mabarami, ġai na ġanoġimini, ġera Vereġauka Iesu Keriso ġena iaġoma rekenai ema ġera veġoitaġo e raka-vegogo ġia ġesi:

² Nuġami asi beġene veġonu-ġarimoġi, o beġe kirani Vereġauka ġena ġenoġoi ġarona tu bevotu beġe toni neganai, nuġami asi beġene meto. Mo guruġa asi boġono vaġa-moġonia, enabe beġe kirani, mo tu peroveta guruġana, o ġobatai ġekiraġiato guruġana, o ġai na fefa nuġanai ġatoreato guruġana.

³ Tarima ta na veġa irauri ai asi bene ġofami. Korana Vereġauka ġena ġaro tu asi roġo beraġasini, beiaġoni mo, tarimarima ġutuma ġeri veġabidadama beġe raga-kwanerini, ema taravatu ekira-fitoġaiani tarimana befoforini. Ġia tu Barau na karava gabunai bea toreani.

⁴ Tarimarima ġetoma-rakariġo vinirini e ġeguba-kaurini dagara veaġari mabarari mo tarima na bekira-fitoġarini, ema ġia tauġena bevetore-varaġeni. Ġia beiaġoni Barau ġena Rubu Veaġa nuġanai betanu-tarini, benamo bekirani, "Au tu Barau," betoni.

⁵ Au ġomi ġesi roġo tatanuto-ġoi nai, moġeri mabarari akira-varamito. Ġomi na asi ġotuġamaġi-taġorini?

⁶ Taravatu ekira-fitoġaiani tarimana tu toma bere fofori, senaġi dagara ta na elau-ġauani, ġomi tu ma ribami kara. Ġarona korikorinai vau mo taravatu ekira-fitoġaiani tarimana befoforini.

⁷ Taravatu ekira-fitoġaiani tarimana ġena veġa vekuretoġari inította kota ġefoforini, senaġi kara beġe ġorani dagarari tu asi roġo beġe ġorani, beiaġoni mo, eruġa-ġaurini tarimana na dabara bekeoani.

⁸ Monai vau taravatu ekira-fitoġaiani tarimana befoforini, senaġi Iesu Vereġauka ma beiaġomani ġaronai, muruna seġukana na bevaġiani, ema ekimore-kimoreni mamana ġesi beiaġomani, benamo bevaġa-rakavaiani.

⁹ Taravatu ekira-fitoġaiani tarimana tu Satani ġena seġukai beiaġomani, ġofaġofa veġa boruri e nuġa-farevaġi veġari mabarari beveirini.

¹⁰ Ema ġena veġa ġeġevari na mase dabaranai ġerakani tarimari beġofarini. Ġia tu beġe rekwa-rekwani, korana beġene maġuri ġana guruġa moġonina tu asi ġeġabi-raġeato e asi ġeura-viniato.

¹¹ Moġa lorinai Barau na tuġamaġi veġonuri ġia nuġari ai bevaġa-raka-toġarini, ġofaġofa beġene vaġa-moġoniri ġana.

¹² Moġa tauna tu, deikara na guruġa moġonina asi ġeġabi-raġeato, senaġi rakava ġeikaku-viniato tarimari mabarari tu, Barau na ġeri rakava voiri bevinirini.

Maġuri boġono ġabia ġana Barau na eġabi-viriġimito

¹³ Tarikakama mabarami, ġai na tu Barau baġana tanikiu-vinia ġaro mabarari ai, moġesi baġa veini tu maoro, korana ġia na eura-vinimini, ema tovotovonai eviriġimito bene vaġa-maġurimi ġana. Mo maġuri boġo doġariani, korana Iauka Veaġa ġena seġuka na evaġa-maġurimini, Barau ġena tarima veaġami ai evaġa-iaġomini, ema Vereġauka ġena guruġa moġonina ġovaġa-moġoniani.

¹⁴ Barau na ekeamito Vari Namona ġaġobata-vinimito ġenana. Ġomi ekeamito ġera Vereġauka Iesu Keriso ġena mareva baregona boġono ġabia ġana.

¹⁵ Moġa lorinai, tarikakama, boġono ruġa-gigitari, ġaġobata-vinimito ema fefai ġatore-vinimito vevaġa-riba guruġari mabarari boġono korana-iaġiri.

¹⁶ Ġera Vereġauka Iesu Keriso tauġena ema Barau ġita Tamara na ġeura-vinirani. Ema ġena varevare-bara ġenana ġita tata nuġara evaġa-kokorerini ema evaġa-kavarani ġera vetuġamaġikau ġia ġenai tatoreani nuġanai, toma bene iaġo vanaġivanai.

¹⁷ Ġia ġanoġiani, nuġami bene vaġa-kokoreri, ema bene vaġa-kavami guruġa e veiġa namori boġono veiri ġana.

3

Ġema boġono ġuriġuri

¹ Tarikakama mabarami, ġema guruġa magonai tu, ġema boġono ġauġau, benamo Vereġauka ġena guruġa bene raga-rovorovo, ema gabu mabarari ai tarimarima na beġene ġabi-raġea ma vaġa-namona ġesi Barau ġenai, ġomi ġemi ai eġorato kavana.

² Barau boġono noġia maki, ġia na rakava kwaikwai tarimari ġerina bene vaġa-maġurima. Korana dia tarimarima mabarari na Vereġauka ġena guruġa ġevaġa-moġoniani.

³ Senaġi Vereġauka tu ma ġena vetuġamaġikau ġomi ġemi ai. Ġia na bevaġa-kokoremini, ema Satani ġenana bevaġa-maġurimini.

⁴ Ġai ġema veġabidadama ġomi ġemi ai tu Barau na evinimato, e ġaribani, ġakiramito veiġari ġoveirini ema roġo boġo vei-vesiriġurini.

⁵ Vereġauka na ġemi tuġamaġi e ura mabarari bene ġori-kauri, be Barau ġena veuravini ema Iesu Keriso na evinimini vevaġa-gwaġiġina boġono riba-ġitakauri.

Ġauvei tu dagara baregona

⁶ Tarikakama mabarami, Vereġauka Iesu Keriso aranai ġakiramini, ekalesia tarimari ġubulefiri, ġavaġa-ribarito guruġari asi ġekorana-iaġirini tarimari, ġerina boġono raka-veġita.

⁷ Ġomi ribami ginikau, ġomi tu ġai ġaveito kavana boġono vei. Ġai tu asi ġavei-ġubulefito ġomi ġesi tatanuto-ġoi nai.

⁸ Tarima ta ġena-ġana asi ġaġabi-raġe kavarito-ġoi, senaġi ġavoirito-ġoi. Ġai tu boġi-laġani ġaġauveito-ġoi, ġavekwaragito-ġoi, korana ġomi ta baġa vaġa-doġe-ganimini garina.

⁹ Ġai ma ġema maoro, ġomi ġemi ai ġema-ġama baġa kiragini. Senaġi ġema ura tu vevaġa-ġita namonai baġana iaġo, ema ġai boġono tovotovoma uranai moġesi ġaveito-ġoi.

¹⁰ Ġai ġomi ġesi tatanuto-ġoi nai, vevaġa-riba guruġana ta ġavinimito tu maiġesi: "Bema tarima ta ġauvei asi euranai nai, ġaniġani ta maki asi boġono vinia."

¹¹ Moġesi ġakirani, korana ġaseġaġini tarima tari ġomi fakami ai tu ġubulefi ġetanuni, ġauvei asi ġeveini, senaġi tarima tari ġeri ġauvei ai ġevekougou-ġauni.

¹² Vereġauka Iesu Keriso arantai ġavaġa-guruġa gwaġiġirini e ġasisiba-vinirini, beġene tanu-ġitakau, asi beġene raka-taġuitaġui, senaġi tauġeri beġene ġauvei, ġeri-ġari beġene doġari ġana.

¹³ Senaġi ġomi, tarikakama, akiramini, asi boġono gau, veiġa namori veiveiri ai.

¹⁴ Bema tarima ta na mai fefai ġatore-iaġosirini guruġari asi eurani bene seġaġiri nai, nuġami ai bene tanu, ġia ġesi asi boġono vekako, be bene maiakaia.

¹⁵ Ġami vetari tarimanai asi boġono vaġa-iaġoa, senaġi tarikakami ġoveirini ilailanai boġono vaġa-ribaia.

Vevaġa-namo guruġari

¹⁶ Vereġauka, ġita ġera maino korana, ġia na ġaro vanaġivanaġi ġena maino bene vinimi ġemi maġuri tata nuġari ai. Vereġauka ġomi mabarami ġesi bene tanu.

¹⁷ Mai vevaġa-namo guruġana au, Paulo, tauġegu na atoreani. Ġegu fefa dokori ai vevaġa-namo guruġari maiġesi kavana ġimaġu na atorerini. Mo tu au ġegu fefa vaġa-moġoniri vetoġana.

¹⁸ Ġera Vereġauka Iesu Keriso ġena varevare-bara ġomi mabarami ġemi ai bene tanu.

PAULO ĜENA TORETORE GINIGUINENA TIMOTEO ĜENA

1 Timoteo vaĝa-foforina guruĝari

Paulo na mai fefa maiĝa tu dia ekalesia doĝorona ta ĝena etoreato, mai tu tarima sebona arana Timoteo moĝo ĝena etoreato. Timoteo tu betaĝu Paulo ĝena evanelia ĝauveina nuĝanai emaĝuri-ĝenoĝoito (Apostolo 14; 1 Timoteo 1:2).

Paulo na mai fefa Timoteo ĝena tu laĝani 61 ma 65 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 3:15; 4:12; 6:11-12.

Paulo na mai fefa etoreato tu, 1) Timoteo evaĝa-guruĝa toreĝauato, ve-vaĝa-riba tarimari ĝofaĝofari na beĝe ĝofaiani garina; 2) ekalesia doĝorona ĝorikaŭri tarimari ema diakono tu aiĝesina tarimari bene ĝabiri; 3) vevaĝa-riba moĝoniri bene vevaĝa-riba-iaĝi; 4) Timoteo elaunaĝiato, Vari Namona eribaiato moĝa ĝobina bene torea ema bene ĝobata-iaĝia.

Ĝena toretore tu maiĝesina eboioĝaiato:

1. Vevaĝa-riba guruĝari moĝoniri bene ĝabi-gigitariri - karoa 1
2. Ĝauĝau e toma-rakariĝo guruĝari - karoa 2
3. Veĝitaĝau tarimari baregori ema diakono tu kamasiri beĝene ruĝa - karoa 3
4. Vevaĝa-riba tarimari ĝofaĝofari - karoa 4
5. Vetuĝunaĝi-iaĝovini tarimana e ekalesia doĝorona aiĝesi beĝene tanu - karoa 5-6

¹ Au Paulo, Keriso Iesu ĝena apostolo tarimagu, ĝeguna mai fefa eiaĝosini. Mai apostolo ĝauveina aveiani tu ĝita ĝera vaĝa-maĝuri Barauna ema Keriso Iesu ĝeri guruĝa lorinai. Ĝita tu Keriso Iesu ĝenai moĝo tavetuĝamaĝikauni.

² Timoteo, ĝoi atore-vinimuni, natugu korikori veĝabidadama nuĝanai. Barau ĝita Tamara ema Keriso Iesu ĝita ĝera Vereĝauka ĝerina varevarebara, vevetuĝaĝwa, e maino ĝemu ai bene tanu.

Vevaĝa-riba ĝofaĝofa tarimari loriri bono toreri

³ Makedonia ĝana naiaĝo atato nai, ĝoi avaĝa-guruĝamuto, akirato, Efeso ai bono tanu. Korana tarima tari monai tu guruĝa ĝofaĝofari ĝevevaĝa-riba iaĝirini. Ĝoi na moĝeri tarima bonoa kirari, beĝene doko.

⁴ Bono kirari, sinasina e tuburi ĝatari arari tu asi beĝene vetauri, korana moĝeri na tu veĝareveĝare moĝo beĝe vaĝa-ĝorarini. Ema moĝeri maki ĝia ĝeri veĝabidadama asi beĝe vaĝa-kavarini, ema Barau na ĝita ĝerai kara neveia etoni dagarana asi beĝe ribaiani.

⁵ Au ĝegu mai guruĝa tauna korikori tu ĝegu ura veuravini bene fofori. Mo veuravini tu nuĝa namo vedaureana, tuĝamaĝi iobukaiobukana, ema veĝabidadama moĝonina ĝerina eiaĝomani.

⁶ Tarima tari tu moĝeri na ĝeraka-veĝitato, benamo guruĝa babori, asi tauri guruĝari ĝekiraĝirini.

⁷ Ĝia ĝeurani tu Barau ĝena taravatu vevaĝa-riba-iaĝiri tarimari ai beĝene iaĝo, senaĝina ĝia tauĝeri ĝeri guruĝa tu asi ĝetuĝamaĝi-fakarini, ĝeguruĝa-iaĝirini dagarari tauri korikori maki vekuretoĝa rakava, asi ribari.

⁸ Ĝita ribara, taravatu tu namo bema tarima na beĝauvei-iaĝi ginikauani nai.

⁹ Maiġa maki ma ribara: Taravatu ġeveirito tu dia vei-iobukaiobuka tarimari ġeri, senaġi taravatu asi ġekorana-iaġirini tarimari ġeri, ema kira-sirivaġi tarimari ġeri, Barau garina asi ġegarini e vei-rakava tarimari ġeri, asi veaġa tarimari ema Barau asi ġegubakauani tarimari, sinari e tamari ġevaġirini ema vaġivaġi tarimari.

¹⁰ Mata-boraġa e veġuravanaġi tarimari, tau o vavine karori ġesi ġekimani tarimari, tarimarima ġelemarini benamo ma ġevoivoi-iaġirini tarimari, ġofaġofa tarimari Kota nuġanai ġofaġofa guruġari ġekiraġini. Ema veiġa rakavari ġutuma ġeveini vevaġa-riba guruġari moġoniri ġesi asi ilaila. Taravatu tu moġeri tarimarima ġeri ġeveirito.

¹¹ Mo vevaġa-riba guruġari moġoniri tu Vari Namona nuġanai, Barau na au eviniguto bana kiraġi-foforiri ġana. Mo Vari Namona tu mareva namo Barauna ġena mama e seġuka varina.

Paulo na Keriso etanikiu-viniato

¹² Ġera Vereġauka Keriso Iesu na kokore eviniguto, ema etuġamaġiguto ma ġegu vetuġamaġikau ġena vetuġunaġi baiaġo-vinini. Moġesina naima etoreguto, ġena vetuġunaġi bana iaġo-vinia ġana. Moġa lorinai atanikiu-viniani.

¹³ Moġoni, guinenai au na Keriso tu aguruġa-rakava viniato-ġoi, alai-veġitaiato-ġoi ema avei-veġareveġare rakavaiato-ġoi. Senaġi Barau na evetuġa-ġwaguto, korana mo negai kara aveiato-ġoi tu au asi ribagu, ema Keriso asi avaġa-moġoniato-ġoi.

¹⁴ Ġera Vereġauka ġena varevare-bara barego lelevaġi au iatagu ai ebubukauato, veġabidadama e veuravini ġesi. Mo veġabidadama e veuravini tu Keriso Iesu ġesi bita sebonani vau bita ġabirini dagarari.

¹⁵ Mai guruġa tu moġoni, ema tarimarima mabarari na beġene ġabi-raġea e beġene vaġa-moġonia tu namo: Keriso Iesu tanobara ġana eiaġomato tu vei-rakava tarimari vaġa-maġuriri ġana. Vei-rakava tarimari mabarari fakari ai rakava kwaikwai tarimana tu au.

¹⁶ Senaġi Barau ġena vevetuġaġwa au, rakava kwaikwai tarimagu, ġegu ai etoreato, korana Keriso Iesu ġena vevaġa-gwaġiġi bene vaġa-foforia ġana. Vevaġa-ġita namonai bene vaġa-iaġogu, tarimarima na beġene vaġa-moġonia vau, ġia ġenai beġene veġabidadama, maġuri vanaġivanaġi beġene ġabia ġana.

¹⁷ Barau tu tanu-vanaġivanaġi Verena, ġia mase asi ribana, asi ġitaġitana, ġia ġereġana kwariġutu moġo Barau. Ġia moġo bitana gubakaua, bitana vaġa-raġea toma bene iaġo mo vanaġivanaġi. Amen.

Timoteo na vetari namona bene vetari-iaġia

¹⁸ Timoteo, natugu o, au mai vaġa-naġi ġoi avinimuni, peroveta tarimari na ġeperoveta-iaġimuto ilailanai, moġeri bono tuġamaġi-taġori. Mo peroveta guruġari bono korana-iaġiri, be Barau ġena vetari nuġanai vevaġi namona bono veia.

¹⁹ Ġemu veġabidadama bono ġabi-gigitaria, ema nuġamu iauna namo bene tanu. Tarima tari na nuġari garori asi ġeseġaġi-vinirito, benamo ġeri veġabidadama tu noġa bouti fore ai ġevaġa-daġi-kauani, benamo eġwakirakiraiani kavana.

²⁰ Moġesi ġeveito tarimari ta tu Himenaio ma ta tu Alesanda. Ġia tauri ruarua tu Satani ġimana nuġanai atorero. Korana ġia beġene riba, be Barau asi ma beġene vei-veġare veġarea ġana.

2

Rubu toma-rakariġo dabarana korikori

¹ Au ġegu sisiba giniguinena tu maiġa: Tarimarima mabarari urari ai Barau boġono noġi-vinia, boġono ġauġau, tarimarima urari ai Barau e tarima vekaravari ai boġono ruġa, Barau boġono noġia ema boġono tanikiu-vinia.

² Kini e gavamani mabarari ġeri maki boġono ġuriġuri, be bitana tanu-ginikau ma mainora ġesi, ema Barau bitana korana-iaġia ma moġonira ġesi.

³ Moġesi tu namo, ema Barau ġera vevaġa-maġuri tarimana bita vaġa-verereani.

⁴ Barau eurani tarimarima mabarari beġene maġuri ema guruġa moġonina beġene ribaia.

⁵ Korana Barau tu sebona kwariġutu moġo; ema Barau e tarimarima vefakari ai eruġani tarimana maki sebona moġo, Keriso Iesu.

⁶ Ġia tauġena ġena maġuri evinito, tarimarima mabarari bene voi-ġenoġoiri ġana. Barau ġena vevaġa-moġoni na tu mo ġaro eġabi-viriġiato, monai vau ema foforito.

⁷ Moġesina nai au etoreguto, apostolo e ġobata tarimagu. Mai tu moġoni, asi aġofamini. Au etoreguto tu, irau bese tarimari ġeri ai veġabidadama korikorina bana vevaġa-riba-iaġiri.

⁸ Au aurani gabu mabarari ai tau tu ġimari veaġari beġene ġabi-vaisiri ġauġau nuġanai. Senaġi ġauġau ai ġimari veaġari beġe ġabi-vaisirini nai tu, nuġari tu asi baruri ema asi daradarari ġesi.

⁹ Au aurani vavine maki beġene vedabuġa-ginikau, ma vegubakauri ġesi dabuġa beġene riġo. Ġuiri asi beġene fego-iraurauri, ema golo o aġeva ma marevari iraurau na asi beġene vera, ema voiri baregori dabuġari na maki asi beġene vedabuġa.

¹⁰ Senaġi veiġa namori ema roroġotori mabarari veravera noġa beġene veiri. Korana Barau ġegubakauani vavineri ġeri veiġa korikori tu moġesina.

¹¹ Vavine na Barau ġena guruġa beġene seġaġi-viniri ma nuġa ġave-mukori ġesi, asi beġene guru-raġe.

¹² Au asi aurani vavine vevaġa-riba ġauveina beġene vei, ema veġorikau maġurinai ġia na tau asi beġene guine-iaġiri, ema asi beġene guru-raġe.

¹³ Korana Barau na Adamu evei-guineato, murinai vauro Eva ma eveiato.

¹⁴ Ema Satani na tu dia Adamu eġofaiato, senaġi Eva eġofaiato, benamo evei-rakavato.

¹⁵ Senaġina vavine tu mero beġene ġabi. Korana monana vavine vevaġa-maġuri beġe ġabiani. Mo tu bema ġeri veġabidadama e veuravini beġe ġabi-taririni ema beġe veaġani e beġe tanu-ginikauni.

3

Veġorikau tarimari rubu nuġanai

¹ Mai guruġa tu moġoni: Bema tarima ta eura-rakavani, ekalesia ġorikauna dagina bene ġabia etoni, ġia tu ġauvei namo vedaureana eura-viniani.

² Ekalesia ġorikauna tarimana tu maiġesi bene tanu: Ġia tu vei-iobukaiobuka tarimana, rakava ta ġenai asi boġoitaġoani. Ġia tu ġaraġona vavine sebona moġo, vevaġa-gwaġiġi tarimana, ġena tuġamaġi e veiġa maki roroġoto. Tarima boruri eġabi-raġerini ġena numai ema vevaġa-riba ġauveiri ma ribana tarimana.

³ Asi niuniu rakava-rakava tarimana ema asi eniara-niarani tarimana, senaġi manau ema maino tarimana; moni asi emata-ġaniġanini tarimana.

⁴ Ġena numa tarimari eġitaġau-ginikaurini tarimana ema natuna keikeiri na garona ġeseġaġi-viniani ma vegubakauri ġesi tarimana.

⁵ Korana bema tarima ta na ġena numa tarimari korikori asi beġitaġau-ginikaurini nai tu, kamara dabarai Barau ġena ekalesia doġorona beġitaġauani?

⁶ Ekalesia variġuna na veġorikau dagina asi bene ġabia, korana beveiavini ġesi. Korana bevekokorokuni nai, Barau na vevaġa-maoro bevei-viniani Diabolo evei-viniato kavana.

⁷ Ġia tu asi ekalesia na maki ġegubakauani tarimana, ma tari na guruġa rakavari asi beġe kiraġini ġenai, ma Diabolo ġena rigirigi ai maki asi bea toġani.

Diakono tarimari

⁸ Diakono maki moġesi, tarimarima na ġeri veġa namori lorinai ġegubakaurini tarimari, ema dia dagara ta kiraġi-iaġinai tu tarima ta ġenai tu guruġa ta ġea kiraġiani, ma ta ġenai tu guruġa boruna ta ma ġea kiraġiani tarimari. Wain asi ġeniu-ġutumaiani, ema moni e farefare asi ġemata-ġaniġani-iaġirini, ema veġa ġofaġofari ġerina moni o farefare asi ġeġabini tarimari.

⁹ Ġia na guruġa moġoniri korikori vekuretoġari Barau na ġita taveġabidadamani tarimara ġerai ema vaġa-foforirito, moġeri ġeġabigitaririni nuġari ma iobukaiobukari ġesi.

¹⁰ Ġia tu boġono tovonāġi-guineri. Bema ġeri ai vetoukau ta asi boġo ġoitaġoani nai, diakono dagina beġene ġabi.

¹¹ Ġaraġori vavineri maki tarimarima na ġegubakaurini vavineri, asi ġeverori-toreni, ma vevaġa-gwaġiġi ribari e ma ġeri vetuġamaġikau dagara mabarari ġeri ai.

¹² Diakono tu ġaraġona vavine sebona moġo, natuna ema ġena numa tarimari ġitaġauri ma ribana.

¹³ Korana diakono ġauveina ġevei-ginikauani tarimari tu tarimarima na beġe gubakaurini, ema ġia tauġeri maki nuġari ma kokoreri ġesi Keriso Iesu ġenai ġeri veġabidadama beġe vaġa-ruġarini.

Guruġa vekuretoġa mabarana

¹⁴ Oba, au ġegu tuġamaġi tu bana raga-iaġosi, be banasi ġitamu, senaġina mai guruġa tu atore-vinimuni.

¹⁵ Bema bakwaiboni nai, mai guruġa na bene vaġa-ribamu, tarimarima Barau ġena bese nuġanai tu kamasi beġene tanu. Barau ġena bese tarimari tu maġuri Barauna ġena ekalesia, ema ġia tu guruġa moġonina duġuna baregona ema korana.

¹⁶ Moġoni, Barau korana-iaġina tu vekuretoġa ema dobu-masemase, Barau na evaġa-foforiato tu maiġa:

Ġia tu efoforito tarima tauġaninai,

Iauka Veġa na iobukaiobukana ekiraġiato,

aneru na ġeġitaiato.

Tanobara mabarari fakari ai ġeġobata-iaġiani,

tanobarai tarimarima na ġevaġa-moġoniani,

ġena mareva baregonai Barau na eġabi-varaġeato.

4

Vevaġa-riba ġofaġofa tarimari

¹ Iauka Veaġa na ekiraġi-foforiani, tarima tari ġoirara ġarori ai Keriso ġabidadama-vinina beġe raga-kwaneani, benamo ġofaġofa iaukari beġe seġaġi-vinirini, ema iauka rakavari ġeri vevaġa-riba beġe ġabi-raġerini.

² Mo vevaġa-riba tu guruġa ġofaġofa tarimari na beġe kiraġirini. Ġia ġeri tuġamaġi iobukaiobuka dabarana tu emaseto, noġa moġo auri seġuka lelevaġi na ġegabu-maserito kavana.

³ Mo tarima na tarimarima ġekira-ġoirini asi beġene veġaraġo, ema ġaniġani tari beġe kiraġirini tu asi beġene ġani. A mo ġaniġani tu Barau na eveirito dagarari. Keriso ġevaġa-moġoniani e guruġa moġonina ġeribaiato tarimari na beġene ġaniri vaġa-namo ġauġauna murinai.

⁴ Korana tu dagara mabarari Barau na eveirito tu namo moġo. Ma ġaniġani ta tu asi bitana ruġaia, bema Barau tatanikiu-viniani vau taġabi-raġerini nai.

⁵ Korana mo tu Barau ġena guruġa na ema ġuriġuri na ġevaġa-veaġarini Barau ġoiranai.

Keriso ġena vetuġunaġi tarimana namona

⁶ Bema ġoi na moġeri guruġa tarikakara bovaġa-ribarini nai, ġoi tu Keriso Iesu ġena vetuġunaġi tarimamu namomu ta. Ema Iesu ġabidadama-vinina guruġari moġoniri ema vevaġa-riba guruġari namori okorana-iaġirini, maniġeri tu iauka ġaniġaniri, ġoi ġegubu-iaġimuni.

⁷ Sinasina babori ġerina tu bono veġita ema bono raga-kwaneri. Barau korana-iaġi-korikorinai bono kokore.

⁸ Tauġanina vaġa-kokorena veġari ġeri namo tu misina moġo, senaġi Barau korana-iaġina ġena namo tu barego lelevaġi dabara mabarari ai tuna. Korana monana tu namo bita doġariani mai maġuri nuġanai ema ġoira maġurinai.

⁹ Mo tu guruġa moġonina, be bitana ġabiraġe-ginikaua.

¹⁰ Moġa uranai tavekwaraġini ema tamidigu-midiguni, korana tu maġuri Barauna ġenai ġera tuġamaġikau tatore-kauani. Ġia tu tarimarima mabarari ġeri vevaġa-maġuri Barauna, ma ġia tu ġevaġa-moġoniani tarimari ġeri vevaġa-maġuri Barauna korikorina.

¹¹ Mai guruġa maiġeri bono velaunaġi-iaġiri e bono vevaġa-riba-iaġiri.

¹² Ta na ġoi asi bene ġita-fitoġamu, korana ġoi tu maraġa variġu moġo, senaġi vevaġa-ġita-iaġi tarimamu namomu ai bono iaġo ġemu guruġai, veġai, veuravini ai, veġabidadamai, ema maġuri namo vedaureanai.

¹³ Buka Veaġa bono iavi-foforia tarimarima ġeri ai, bono ġobata-iaġia, bono vevaġa-riba-iaġia, bene iaġo mo, au bana iaġosi.

¹⁴ Barau na evinimuto varevarena ġauvei-iaġinai asi bono moira. Mo varevare o seġuka tu peroveta guruġari ġerina oġabiato dagarana, ekalesia ġorikauna tarimari ġimari ġoi debamu ai ġetore-kaurito ġaronai.

¹⁵ Moġeri dagara bono ġauvei-iaġi ġitakauri. Mai ġauvei bono kokore-iaġia nuġamu e tauġanimu mabarari ġesi, be ġemu kokore tarimarima mabarari na beġene ġitaia.

¹⁶ Ġemu maġuri ġobina bono torea, ema ġemu vevaġa-riba guruġari loriri bono toreri. Mai veġa maiġeri bono vei-vanaġi vanaġiri. Korana bema moġesi boveini nai, tauġemu bovevaġa-maġurini ema ġeseġaġi-vinimuni tarimari maki bovaġa-maġuririni.

5

Gauvei veḡabidadama tarimari rekeri ai

¹ Tarima baregona ta asi bono kira-feia; senaḡi bono vaḡa-guruḡa ḡaveḡavea tamamu kavana. Maraḡa variḡu tu bono vaḡa-guruḡari tarikakamu kavana.

² Vavine baregori sinamu kavana bono veiri, ema vavine variḡu tobamu kavana bono veiri, ma nuḡa namo vedaureana ḡesi.

³ Vabu ḡereḡari kwariḡutu moḡo nai tu bono gubakauri.

⁴ Senaḡina vabu ta bema ḡia tu ma natuna, o ma tubuna nai tu, ḡia guine tu Barau korana-iaḡina veiḡana ḡeri bese nuḡanai roḡo beḡene riba-iaḡia e beḡene vaḡa-foforia. Mo tu ḡeri bese ḡobiri beḡene toreri ema vaḡa-kavari. Moḡesina veiḡari ai tu tamari e sinari ma tuburi ḡaukari ḡeri vekwaraḡi ḡevaḡa-voi ḡenoḡoirini. Ma maiḡesi veiḡari na tu Barau ḡevaḡa-iakuani.

⁵ A vabu, ḡereḡana moḡo asi tau ḡitaḡauna, ḡena tuḡamaḡikau tu Barau ḡenai moḡo betoreani. Boḡi-laḡani beḡauḡauni, Barau benoḡiani bene vaḡa-kavaia ḡana.

⁶ Senaḡi tauḡanina vaḡa-vererena moḡo veiḡana eveiani vabuna tu varau emaseto, enabe roḡo maḡuri etanuni.

⁷ Mai guruḡa tu vabu mabarari bono viniri, be ta ḡenai rakava ta asi beḡene doḡaria.

⁸ Senaḡi bema tarima ta na garagarana, o sikira ḡena numa tarimari korikori, ḡeri-ḡari asi eḡwaḡwa-raḡasini e eḡuburini nai, ḡia ḡena veḡabidadama Keriso ḡenai tu ekure-toḡaiiani. Gia ḡena rakava na tu asi eveḡabidadamani tarimana ḡena rakava maki evanaḡiani.

⁹ Vabu ta arana asi bono torea roḡo, vabu mabarari arari otorerini bukanai. Senaḡina bema ḡia ḡena maḡuri laḡanina 60 evanaḡiato, ema tau sebona moḡo eḡaraḡoato.

¹⁰ Ema ḡena veiḡa namo lorinai tarimarima na ḡeribaiani, e natuna ḡobiri etore-ginikaurini, varivari tarimari eḡabi-raḡerini ḡena numai, veaḡa o ekalesia tarimari kwakuri eḡuriḡirini, (moḡa anina tu tauḡena evetore-riḡoni), ḡevaḡa-midigu midigurini tarimari evaḡa-kavarini, ema veiḡa namori ai ekokoreni vabuna moḡo arana bono torea.

¹¹ Senaḡi vabu variḡuri tu arari asi bono toreri, korana ḡeri tuḡamaḡi rakavari na beḡe ḡori-kaurini, benamo Keriso ḡenana beḡe raka-veḡitani, benamo ma beḡe veḡaraḡoni.

¹² Benamo metona tauḡeri na beḡe ḡabiani, korana ḡeri guruḡatore guinena Keriso ḡenai ḡefitoḡaiiani lorinai.

¹³ ḡubulefi beḡe ribaiani ema numa loriri ai beḡe raḡekau-raḡe-kauni. Dia ḡubulefi moḡo, senaḡina beḡe mugumuguni, raka-boḡeraḡe boḡeraḡe ema asi ḡere kiraḡiri guruḡari beḡe kiraḡirini.

¹⁴ Moḡa lorinai au aurani vabu variḡuri tu beḡene veḡaraḡo, be natuḡi beḡene vaḡa-ḡorari, ema ḡeri numa beḡene ḡita-ḡauri, benamo evetari-vinirani iaukana faka ta asi beḡene vinia ḡita bene ḡofaḡofa-iaḡira ḡana.

¹⁵ Korana vabu tari tu varau Iesu ḡena dabara na beḡe raka-veḡita, benamo Satani murinai ḡerakani.

¹⁶ Senaḡi bema Iesu evaḡa-moḡoniani vavinena ta ḡena numai vabu tari ḡetanuni, mo vavine na mo vabu bene ḡitaḡau-ginikauri, be ekalesia iatanai meto asi beḡene tore-kaua. Moḡesi tu vau ekalesia na tu ḡereḡari ḡetanuni vaburi moḡo beḡita-ḡaurini.

¹⁷ Ekalesia ḡeḡori-kauani tarimari, ekalesia ḡauveina ḡevei-ginikaurini tarimari, tu boḡono gubakau-baregori, ema voiri iatari ai boḡono torekau.

Mai tu Barau ġena guruġa ġeġobata-iaġirini e ġevevaġa-riba-iaġirini tarimari akiraġirini.

¹⁸ Korana Buka Veaġa tu maġesina ekirani, “Boromakau na widi efanafana-iaġirini nai tu, muruna asi bono barubarua.” Ma ekirani, “Ġauvei tarimana ġena ġauvei tu voina bene ġabia, moġesina tu maoro.”

¹⁹ Bema tarima ta na ekalesia eġori-kauani tarimana ekiraiani, ġia tu ekerereni nai tu, asi bono seġaġi-viniri, bene iaġo mo, tarima ruarua o toitoi na beġe vaġa-moġoniani vau.

²⁰ Ġevei-rakavani tarimari tu ekalesia tarimari ġoirari ai bono vaneri, be tarimarima maki beġene gari.

²¹ Barau e Keriso Iesu ema aneru veaġari ġoirari ai au ġoi avaġa-guruġamuni, mai vevaġa-naġi guruġari bono seġaġi-viniri nuġamu sebonai. Tarima baregori ema garagaramu moġo asi bono ġabi-raġeri.

²² Ġimamu tarima ta tubuanai asi bono torekau-ġarimoġia, tari ġeri veġa rakavai asi bono vei-rakava, tauġemu lorimu bono vetore, bono namo-vedaurea.

²³ Nanu korikori moġo asi bono niu, senaġi wain koturi kota maki bono niu, korana nuġamu bene iarevaia, okeve-kinikini ġutumani bene.

²⁴ Tarimarima tari ġeri rakava tu fofori-ginikau, ma moġeri rakava na ġia tu ġeraga-kwanerini, benamo ġeiaġo-guineni Barau ġena Kota gabuna ġana. Senaġi tari ġeri rakava tu vekuretoġa, gabivau muriri na ġerakanaġi-rakanaġini.

²⁵ Moġesina moġo veġa namori maki maġatai foforitaġo. Senaġina veġa namori tari asi ġefofori-ġariġarini dagarari tu vekuretoġa moġo asi beġe tanuni, senaġi beġea foforini.

6

¹ Tuġunaġi ġeiaġo-vinini tarimari na ġeri baregona tu beġene gubakaua ema ġena veġorikau gaburenai beġene tanu. Moġesina beġe veini nai tu, ġeri baregona na Barau arana ema ġita ġera vevaġa-riba iatari ai guruġa rakavari asi bekiraġini.

² Bema tuġunaġi ġeiaġo-vinini tarimari ġeri baregori tu Iesu ġevaġa-moġoniani tarimari nai tu, maġesi asi beġene tuġamaġi, “Mai tu au tarikakagu, be garona asi naseġaġia e asi nagubakaua.” Asiġina! Ġia tu maġesi neġi beġene vei, ġeri baregori ġeri vetuġunaġi misikose mabarari beġene iaġovini-ginikau. Korana ġia ġeri ġauvei ġena namo tu ġeri baregori, Iesu ġevaġa-moġoniani tarimari, na beġe ġabiani; moġeri tu ġia ġatari namori.

Vevaġa-riba ġofaġofa ema farefare moġoniri

Maiġeri dagara ġia bono vaġa-ribari ema bono launaġi-iaġiri.

³ Bema tarima ta vevaġa-riba gofaġofari bevevaġa-riba iaġirini, ema ġena vevaġa-riba ġita ġera Vereġauka Iesu Keriso ġena guruġa moġonina ġesi asi besebonani, ma Barau ġena maġuri asi bevaġa-ribarani,

⁴ ġia tu veiavi tarimana, ema dagara ta asi etuġa-maġi-fakaiani. Ġia tu vedanaġi irauirauri beveini, ema Barau ġena guruġa bevevane-iaġirini. Moġeri na tu mama, vevane, guruġa rakavari, tarimarima ġeri ai vevaġa-daġa tuġa-maġiri rakavari beġe vaġa-ġorarini,

⁵ ema vanaġivanaġi veġareveġare maki asi ġedokoni. Moġesina ġeveini tarimari ġeri tuġamaġi tu rakava kwaikwai, ema guruġa moġonina na ġeraka-veġitato; ġia matoru ġetuġamaġini, Barau korana-iaġina tu farefare ġutuma bodoġarini dabarana.

⁶ Moĝoni, Barau ĝekorana-iaĝiani, ema farefare voĝori na ma asi ĝeiaĝoni tarimari tu farefare ĝutuma lelevaĝiri beĝe ĝoitaĝoni.

⁷ Korana dagara ta tanobara ĝana asi taĝabi-iaĝomaiato, ema dagara ta maki tanobara na asi bita ĝabi-iaĝoani, asiĝina!

⁸ Moĝa lorinai, bema ĝita ma ĝara ĝaniĝani e ma ĝera dabuĝa nai tu, bitana kira, maĝeri tu ilaila ĝemai.

⁹ Tarimarima deikara ĝeurani farefare ĝutuma lelevaĝi beĝene doĝari ĝetoni tarimari tu veribaĝani na eĝabirini, ĝeri ura babori ema ura rakavari na evaĝa-daĝa-raĝerini, monana einu-riĝorini rakava ĝana ema karava gabuna ĝana.

¹⁰ Korana moni uravinina tu rakava mabarari lamuna. Tarimarima tari moni ĝeuravini-baregoani tu Iesu ĝabi-dadama-vinina na ĝeraka-veĝitato, ema nuĝa midigumidigu vovoka na nuĝari egwanurini.

Paulo ĝena vevaĝa-riba guruĝari Timoteo ĝenai

¹¹ Senaĝi ĝoi, Barau ĝena tarima, moĝeri dagara mabarari bono raga-kwaneri! Benamo veĝa iobukaiobukari, Barau korana-iaĝina, veĝabidadama, veuravini, vevaĝa-gwaĝiĝi, nuĝa manau bono vetauri ma kokoremu ĝesi.

¹² Veĝabidadama vetarinai bono kokore. Maĝuri vanaĝivanaĝi bono ĝabi-taria, korana mai maĝuri uranai tu Barau na ĝoi maki ekeamuto, tarimarima ĝutuma ĝoirari ai ĝemu veĝabidadama okiraĝi-foforiato ĝaronai.

¹³ Barau na dagara mabarari maĝuri evinirini, ema Keriso Iesu Pontio Pilato ĝoiranai evevarifiuto tu guruĝa namona ekiraĝiato. Mai Barau e Keriso Iesu ĝoirari ai ĝoi avaĝa-naĝimuni:

¹⁴ Mai taravatu guruĝari mabarari bono korana-iaĝiri nuĝamu asi vetoukauna ta ĝesi ema kerere ta ĝemu ai maki asiĝina, roroĝoto moĝo, bene iaĝo mo, ĝita ĝera Vereĝauka Iesu Keriso ĝena iaĝoma ĝarona.

¹⁵ Barau tauĝena ĝena ĝaro korikori beraĝasini ai vau, Iesu Keriso beforini. Barau ĝereĝana moĝo Vere namo vedaureana, Veĝitaĝau Tarimana sebona kwariĝutu tu, kini ĝeri Kini ema vere ĝeri Vere.

¹⁶ Ĝia moĝo ĝereĝana etanu-vanaĝi vanaĝini; ĝia tu mama barego lelevaĝina nuĝanai etanuni, moĝa lorinai ta na asi beraka-kavianai riba; ĝia tu ta na asi eĝitaĝato ema ta na asi beĝitaĝiani riba. Ĝia ĝenai vegubakau ema seĝuka bene tanu mo vanaĝivanaĝi. Amen.

¹⁷ Farefare ĝutuma tarimari mai tanobarai bono kirari, asi beĝene veiavi, tanobara farefareri ĝeri ai ĝeri tuĝamaĝi-dadamaĝi asi beĝene torea, korana moĝeri mabarari beĝe korini, senaĝi Barau ĝenai beĝene vetuĝamaĝikau; ĝia na dagara namori ĝutuma evinirani ĝera verere ĝari.

¹⁸ Bono kirari, veĝa namori beĝene vei, veĝa namori ĝeri farefare namori ai beĝene vaĝa-iaĝori. Veĝabiraĝe tarimari ai beĝene iaĝo ema ĝeri farefare tarima tari maki kota beĝene viniri ma verereri ĝesi.

¹⁹ Mo dabarai ĝia ĝeri farefare namori beĝe vaĝa-vegogo-torerini ĝoirari ĝarori ĝana, ema maĝuri korikori beĝe ĝabiani.

²⁰ Timoteo, Barau na evinimuto guruĝari bono ĝabi-tariri, guruĝa rakavari e guruĝa babori ema iaunega ĝofaĝofari vevaneri ai asi bono raka-toĝa. Tarima tari na mo iaunega ĝekiraĝirini, "Riba". Mo tu ĝeĝofaĝofani.

²¹ Tarimarima tari na mo "Riba" ĝetoni moĝa ĝeĝabi-raĝerito, benamo ĝeri veĝabidadama Iesu ĝenai ĝeiaĝuiato.

Barau ĝena namo e varevare-bara ĝomi ĝemi ai bene tanu.

PAULO ĜENA TORETORE VAĜA-RUARUANA TIMOTEO ĜENA

2 Timoteo vaĝa-foforina guruĝari

Paulo na Timoteo ĝena mai fefa vaĝa-ruaruana tu Paulo Romai ediburato taiminai etoreato. Etoreato laĝanina tu 66 ma 67 fakari ai ta etoreato, mo tu Iesu emaseto murinai.

Mai fefa nuĝanai siri baregori tu karoa 1:13-14; 2:15; 4:1-5.

Paulo na mai fefa vaĝa-ruaruana etoreato, ĝena ura tu, 1) Timoteo maĝuri moĝoni ai moĝo bene tanu; 2) meto baregori beĝoitaĝoni nuĝanai asi bene moira, senaĝi vetuĝunaĝi ĝauveina bene kokore-iaĝia.

Paulo na mai fefa tu maiĝesina eboioĝaiato:

1. Keriso varina moĝonina Timoteo na bene ĝabi-gigitaria - karoa 1
2. Keriso ĝena vetuĝunaĝi ĝauveina bene korana-iaĝia - karoa 2
3. Keriso ĝenana beĝe veĝitani tarimari guruĝari ekiraĝito - karoa 3
4. Keriso ĝena guruĝa ĝereĝana moĝo bene ĝobata-iaĝia - karoa 4:1-5
5. Paulo ĝena veĝabituĝu guruĝari etuĝuto - karoa 4:6-22

¹ Au Paulo, Keriso Iesu ĝena apostolo tarimagu, Barau ĝena ura lorinai; ĝeguna mai fefa eiāĝosini. Barau na etuĝuguto, ekiraĝi-toreato maĝurina Keriso Iesu ĝenana bita doĝariani maĝurina bana ĝobata-iaĝia ĝana.

² Timoteo, ĝoi atore-vinimuni, natugu, aura-vinimuni. Barau ĝita Tamara ema Keriso Iesu ĝita ĝera Vereĝauka ĝerina varevare-bara, vevetuĝaĝwa, e maino ĝemu ai bene tanu.

Paulo ĝena vevaĝa-namo e vevaĝa-kokore guruĝari

³ Boĝi e laĝani vanaĝivanaĝi ĝegu ĝuriĝuri nuĝari ai ĝoi atuĝamaĝimuni. Ĝegu ĝauĝau nuĝari ai tu Barau, ma nuĝagu iau-namona ĝesi vetuĝunaĝina aiaĝo-viniani Barauna, atanikiu-viniani. Barau tu au tubugu ĝatagu na maki vetuĝunaĝina ĝeiaĝo-viniato.

⁴ Otaĝito atuĝamaĝiani, ema ĝegu ura baregona ĝoi ma bana ĝitamu, ĝegu iaku bene barego ĝana.

⁵ Ĝoi ĝemu veĝabidadama moĝonina ma atuĝamaĝi-ĝenoĝoiani. Mani veĝabi-dadama maniĝa tu tovtovonai tubumu vavinena Lois e sinamu Eunike ĝeri ai maki etanuto-ĝoi. Au aribani, mo veĝabidadama sebona tu ĝoi ĝemu ai etanuni.

⁶ Moĝesina nai avaĝa-vetuĝamaĝi ĝenoĝoimuni, Barau na evinimuto varevarena, au ĝimagu iatamu ai atore-kauato nai, oĝabiato dagarana, bono ĝauvei-iaĝia.

⁷ Korana Barau na ĝita evinirato Iaukana na tu nuĝara asi bevaĝa-garirini Iaukana, senaĝi kokore, veuravini, e nuĝa-gwaĝiĝi evinirani Iaukana.

⁸ Ĝita ĝera Vereĝauka ĝena guruĝa kiraĝi-foforinai asi bene maiakamu, ema au Keriso ĝaramanai dibura numai atanuni nai maki, maiakagu na asi bene maiakamu. Senaĝi Barau ĝena kokore ai bono vevaĝa-gwaĝiĝi ema au ĝesi bono sebona, be Vari Namona ĝaramanai bitana midigumidigu.

⁹ Ĝia na evaĝa-maĝurirato ema ĝena keakea veaĝana na ekearato ĝena tarimarimai bitana iaĝo ĝana. Moĝesi eveito tu, dia ĝita ĝera veĝa e ĝauvei namo naima, senaĝi ĝia tauĝena ĝena ura e ĝena varevare-bara na moĝo. Mo varevare-bara tu tovtovonai veĝata, guba e tanobara roĝosi roĝo bere veia nuĝanai, Barau na Keriso Iesu ĝenana evinirato.

¹⁰ Senaġi maitoma tu ġita ġerai Vevaġa-maġuri Tarimana Keriso Iesu eiaġomato lorinai, mai varevare-bara ġita ġerai ema foforito. Keriso na mase ġena seġuka evaġa-koriato, ema Vari Namona ġenana maġuri e tanu-vanaġivanagi evaġa-foforiato.

¹¹ Barau na au etoreguto tu mai Vari Namona bana ġobata-iaġia, bana ġwa-rosia, ema bana vevaġa-riba-iaġia ġana.

¹² Mo ġauvei ġaramanai au maiġesi amidigu-midiguni. Senaġi au tu asi emaiakaguni, korana aġabi-dadama-viniani tarimana tu ribagu ginikau. Ema au maki ribagu ġitakau, mai ġauvei ġimagu ai etoreato maiġa tu beġitaġau-ginikauani beiaġoni mo Kota baregona ġarona beraġasini.

¹³ Guruġa moġoniri au ġeguna oseġaġirito guruġari bono ġabi-gigitariri e bono korana-iaġiri veġabi-dadamai e veuravini ai. Mo veġabidadama e veuravini tu Keriso Iesu ġenana ġeiaġomani.

¹⁴ Barau na evinimuto varevarena bono ġita-ġaua. Ġita nuġarai etanuni Iauka Veaġana na mo varevare ġitaġaunai bene vaġa-kavamu.

¹⁵ Ġoi ma ribamu Asia tanonai ġetanuni tarimari mabarari tu au ġeguna ġeraka-veġitato, Figelo e Hemogenes maki.

¹⁶ Onesiforo ma ġena numa tarimari ġesi tu Vereġauka na ġena vevetuġaġwa iatari ai bene torea, korana ġia na nega ġutuma au nuġagu evaġa-gwaġiġiato-ġoi. Ema au dibura numai atanuto maiakana na asi emaiakaiato.

¹⁷ Ġia Romai eraġasito ġaronai tu, au evetau-kokore kokoreguto mo edoġariguto.

¹⁸ Vereġauka na ġena vevetuġaġwa iatanai bene torea mo, Kota baregona ġaronai! Ema ġoi ma ribamu ginikau Efeso ai au vetuġunaġigu aiġesi eiaġo-viniato.

2

Keriso Iesu ġena vetari tarimana moġonina

¹ Moġa lorinai, natugu, ġoi tu Keriso Iesu ġena varevare-bara nuġanai bono kokore.

² Tarimarima vovoka ġoirari ai au ġeguna kara oseġaġirito dagarari vetuġamaġikau tarimari bono vaġa-ribari. Benamo moġeri na maki tarima tari ġeri ma beġenea kiraġi.

³ Keriso Iesu ġena vetari tarimana namonai bono iaġo, ema midigumidigu nuġanai bono vevaġa-gwaġiġi au aveini kavana.

⁴ Vetari tarimana ġena maġuri ma ribamu. Evetarini nuġanai, ġauvei tari asi beveirini riba. Senaġina ġia ġena ura tu eġabi-toġaiato vetari verena vaġa-iakuna veiġana moġo bene veia.

⁵ Raga-iruiru baranai eragani tarimana, asi bekokoreni riba o korona asi beġabiani riba, bema raga-iruiru taravatuna asi bekorana-iaġiani nai tu.

⁶ Vamoka vei tarimana beġauvei-kokoreni tu tauġena roġo voina bene ġabi-guinea kwakwa ġaronai.

⁷ Vereġauka na vau tuġamaġi-faka bevinimuni, benamo mo guruġa mabarari bakiraġiri boriba-ginikaurini.

⁸ Maiġa tu bono tuġamaġi-taġoa. Iesu Keriso tu Davida senena, mase na evariġisi-ġenoġoito. Au na tu maiġesina akiraġiani Vari Namona aġobata-iaġiani nai.

⁹ Moġesina naima ġevaġa-midigu midiguguni, dibura numai maki seini na ġebarubaruguni noġa vevaġideba o lema tarimagu. Senaġina Barau ġena guruġa tu asi barutari.

¹⁰ Moġa lorinai midigumidigu mabarari avevaġa-gwaġiġi-iaġirini Barau na eġabi-viriġirito tarimari dairi ai, be ġia maki Keriso Iesu ġenana eiaġomani vevaġa-maġurina, ema etanu-vanaġi vanaġini marevana baregona beġene ġabia uranai.

¹¹ Mai tu guruġa moġonina:

“Bema ġita Keriso ġesi tamaseto nai tu, ġia ġesi maki bita maġurini.

¹² Bema tavevaġa-gwaġiġini nai, ġia ġesi maki bita veġorikau-sebonani.

Bema ġia takira-ġuniġauani nai, ġia na maki ġita bekira-ġuniġaurani.

¹³ Bema ġita asi tavetuġamaġikauni, ġia tu roġo gabunai ma ġena vetuġamaġikau beruġa-taġoni; Korana ġia tauġena tu asi bevekira-ġuniġauni, (mai tu ġena kiraġitore guruġari ġia na asiġina ġinavaġi bekeforini).”

Ġauvei tarimana namona

¹⁴ Mo guruġa ma bono vaġa-riba ġenoġoiri, ema Barau ġoiranai bono kira-toreġauri, guruġa koriri veġare-veġareri asi beġene vevaġi. Korana monana namo ta asi bevaġa-ġoraiani, senaġi beġe seġaġini tarimari ġeri maġuri moġo bevaġa-rakavarini.

¹⁵ Bono ġauvei-ġunaġave, be Barau ġoiranai bono fofori nai, bene vaġa-moġonimu, ġauvei tarimana asi emaiakaiani tarimana kavana. Korana ġia na tu Barau ġena guruġa moġonina evevaġa-riba ginikauani.

¹⁶ Sisiba rakavari e babori asi bono kiraġi, ema ġerina bono veġita, korana mo sisiba ġekiraġirini tarimari tu Barau ġenana ġeraka-manaġani.

¹⁷ Guruġa moġesina ġekiraġirini tu noġa manuġa rakavari ġebakarini kavana. Himenaio e Fileto tu moġesina tarimari.

¹⁸ Ġia tauri ruarua na tu guruġa moġonina dabarana ġeraga-kwaneato. Ġekirani variġisi-ġenoġoi tu evetoreto, be ekorito. Moġesina ġeguruġani nai, tarima tari ġeri veġabidadama ġevaġa-rakavarini.

¹⁹ Senaġi Barau ġena guruġa korana tu eruġa-gwaġiġini fore baregona noġa, asi beġareva-ġarevani. Iatanai tu mai guruġa etoreato, “Vereġauka ma ribana deikara tu ġia ġena.” Ma ekirani, “Deikara ekirani ġia tu Vereġauka ġena etoni tarimana tu vei-rakava ġenana bene raka-veġita.”

²⁰ Numa baregona nuġanai tu mereki iraurauri moġeri, dia mabarari golo e silva na ġeveirito dagarari moġo, senaġi ġau e tano na ġeveirito dagarari maki moġeri. Tari tu ġaro baregori ai vau beġe ġauvei-iaġirini, a tari tu ġeġauvei-iaġi vanaġivanaġirini ġaniġani ġari o momo fitoġa dagarari.

²¹ Bema maiġeri veiġa rakavari ġerina tauġena eveiarevani tarimana tu, ġauvei namori ġauvei-iaġiri tarimanai Vereġauka na bevaġa-iaġoani ema bevaġa-veaġaiani. Ġia tu eġita-ġauani tarimana ġena ġauvei tarimana aroribanai beiaġoni ġauvei namori mabarari veiveiri ġana.

²² Ġuru variġu ġeri ura rakavari mabarari bono raga-kwaneri, ema maiġeri bono korana-iaġiri: Vei-iobukaiobuka, veġabidadama, veuravini, ema maino. Ma nuġari namo vedaureari Vereġauka ġenoġiani bene vaġa-kavari ġana tarimari ġesi bono sebona.

²³ Vedanaġi e veġareveġare babori ġerina bono raka-veġita, korana ġoi ribamu moġeri na tu vevane beġe vaġa-ġorarini.

²⁴ Vereġauka ġena vetuġunaġi tarimana tu asi bene vevane, senaġi tarimarima mabarari bene iaunamo-viniri, bene vevaġa-riba ginikau, asi bene baru.

²⁵ Ġekira-fitoġaiani tarimari bene kira-rogori ma manauna ġesi, betaġu Barau na bevaġa-vetuġamaġi kurerini, benamo guruġa moġonina beġe ribani.

²⁶ Benamo ġia ġeri tuġamaġi beġe roroġoto-ġenoġoini ema Diabolo ġena rigirigi na beġe raga-veġitani, korana ġia na roġo eġabi-taririni ġena ura beġene veiri ġana.

3

Ġaro magori ai

¹ Ema maġa maki bono ribaia: Ġaro dokori ai tu rakava ġutuma beġe ġorani.

² Tarima tu tauġeri moġo beġe veura-vevinini, moni beġe mata-ġaniġani iaġirini, beġe vekiraġi-varaġe varaġeni, beġe veiavini, ġeri guruġa beġe rakavani, tamari sinari beġe kira-sirivaġi vinirini, tanikiu maki asi beġe toni, ema asi beġe veaġani.

³ Asi beġe veura-vini, tarima ġeri rakava asi beġe tuġamaġi-fitoġarini, beġe verori-toreni, asi beġe vevaġa-gwaġiġini, beġe niara-niararini, beġe kira-sirivaġini.

⁴ Ġia tu beġe revani, ġeri tuġamaġi rakavari ilailari ai beġe vei-taġuitaġuini, nuġari veiavi na beġe vonuni, tanobara iakuri e verereri beġe ura-vinirini, a Barau tu asi beġe ura-viniani.

⁵ Barau korana-iaġina tu tauna korikori iouiouna murikana rekenai moġo ġetovotovoani, a ġia tauna korikori seġukana tu ġeruġaiani. Mo tarimarima ġerina tu bono raka-veġita.

⁶ Moġesina tarimari tu tarimarima ġeri numa nuġari ai ġeraka-toġani, benamo nuġari moira vavineri ġeġofarini. Mo nuġari moira vavineri tu ġeri veiġa rakavari metori na ġelaulau-taririni, ema ġeri ura rakavari na ġeġori-kaurini.

⁷ Moġeri vavineri tu vanaġivanaġi riba ġevetauni, senaġina guruġa moġonina tu asi ġedoġariani.

⁸ Iane e Iambre, Aigupito ġeri ġora tarimari, na Mose ġelaulau-ġauato kavana, mai vevaġa-riba ġofaġofa tarimari na guruġa moġonina ġelau-ġauani. Ġia ġeri tuġamaġi tu rakava kwaikwai, ema ġia tu ġeri veġabidadamai asi ġekokoreto, ġeketoto.

⁹ Senaġi asi beġe raga-kwareġani, korana tarimarima mabarari na ġeri babo beġe ġita-doġariani, Iane e Iambre ġeri ai eġorato kavana.

Vevaġa-naġi magori

¹⁰ Senaġi ġoi na tu au ġegu vevaġa-riba guruġari mabarari okorana-iaġirito, ġegu veiġa, ġegu ura tauri, ġegu veġabidadama, ġegu vevaġa-gwaġiġi, ġegu veuravini, ġegu ruġa-gwaġiġi otovovorito.

¹¹ Ġelai-veġitaguto, ġevaġa-midigu midiguguto, ġegu midigumidigu maġeri mabarari au ġegu ai ġeġorato Antioka, e Ikonia, ema Listera ai. Gevaġa-midigu midiguguto nuġanai avevaġa-gwaġiġito. Vereġauka na moġeri mabarari ġerina eġabi-maġuriguto.

¹² Moġoni, Keriso Iesu nuġanai Barau korana-iaġina beġe urani tarimari mabarari tu moġesina beġe vaġa-midigu midigurini.

¹³ Ma vei-rakava tarimari e ġofaġofa tarimari tu moġesi moġo beġe vei-iaġoni, rakava ġenana rakava lelevaġinai beġea raġasini, tarima tari beġe ġofarini, ema ġia maki Diabolo na beġofarini.

¹⁴ Senaġi ġoi tu kara oribaiato ema oġabi-raġeato maniġa moġo bono korana-iaġia. Korana ġevaġa-ribamuto tarimari ġoi tu ma ribamu,

¹⁵ ema keimu na beiaġoma maitoma Buka Veaġa guruġari ma ribamu; maiġeri Buka Veaġa guruġari na iaunega beġe vinimuni, benamo Keriso Iesu ġenai boveġabidadamani vevaġa-maġuri ġabiġabina ġana.

¹⁶ Buka Veaġa guruġari mabarari tu Barau nuġana na ġeraka-rosito, benamo tarimarima nuġari ai lauka Veaġa na evaġa-raka-toġarito. Ma ġia tu ma ġeri namo guruġa moġoniri vevaġa-riba-iaġiri ġana, rakava vaġa-foforiri, rakava vaġa-roroġotori ġana, ema dabara iobukaiobukana vevaġa-riba-iaġina ġana.

¹⁷ Mo guruġa ġerina Barau ġena tarimarima beġene riba-ginikau, benamo veiġa namori mabarari beġene veiri.

4

¹ Barau e Keriso Iesu ġoirari ai avaġa-guruġa gwaġiġimuni. Iesu beġenoġoini ġaronai tu, ġena veġitaġau gaburenai maġuri tarimari e mase tarimari viriġiviriġi bea vei-vinirini.

² Barau ġena guruġa bono ġobata-iaġia, ġaro namori ai e ġaro rakavari ai. Tarimarima ġeri veiġa rakavari na bono vaġa-roroġotori, bono kira-feiri, bono launaġiri, bono vaġa-ribari ma vevaġa-gwaġiġimu ġesi.

³ Korana ġaro ta beiaġomani, monai tarimarima na vevaġa-riba moġonina tu asi beġe seġaġi-viniani, a ġeri ura rakavari loriri ai vevaġa-riba tarimari ġutumari ma beġe ġabirini, ġia na ġeuravini-rakavarini guruġari beġene seġaġiri ġana.

⁴ Guruġa moġonina seġaġi-seġaġina ġenana beġe raka-veġitani, a ġia tu sinasina guruġari vau beġe ura-baregoni.

⁵ Senaġi ġoi tu bono veġitaġau dagara mabarari ġeri ai, midigumidigu nuġanai bono vevaġa-gwaġiġi, Vari Namona ġobata-iaġina ġauveina bono veia, Barau ġena vetuġunaġi ġauveina mabarana bono ġauvei-iaġi ġitakaua.

⁶ Korana au tu dori amaseni, ema au raragu tu bevebubuni noġa vine nanuna Barau ġevarevare-viniani nai ġebubuani kavana. Au ġegu rakaveġita ġarona tu beraġasi.

⁷ Vetari nuġanai avevaġi-ġitakauto, au ġegu raga-iruiuru tu varau bavaġa-koria, ġegu veġabidadama tu roġo aġabi-tariani.

⁸ Toma ġegu vei-iobukaiobuka korona evei-toreato, etanuni mo Kota baregona ġarona beraġasini nai, Vereġauka, Kota Tarimana Iobukaiobukana, na beviniguni. Dia au moġo, senaġi mo deikara-deikara ġia bema foforini ġaronai ġeura-viniani tarimari maki bevinirini.

Veġabituġu guruġari

⁹ Bono kokore, be au ġegu ai bono iaġoma-ġarimoġi.

¹⁰ Korana Dema na tu mai tanobara maġurina euravini-baregoani, benamo au eraga-kwaneguto, Tesalonika ġana eiaġoto. Kreske tu Galatia ġana eiaġoto, ema Tito tu Dalmatia ġana.

¹¹ Luka ġereġana moġo au ġesi. Mareko bono ġoria, ġoi ġesi boġono iaġoma, korana ġia tu ġunaġave e au ġegu ġauvei nuġanai bevaġa-kavaguni riba.

¹² Tikiko tu Efeso ġana atuġuato.

¹³ Ĝoi boiaĝomani nai tu, auna koudi bono ĝwa-kaua, Troas vanuĝanai Karpo ĝenai araga-kwaneato, ema ĝegu buka maki bono ĝwa-kauri, dagara baregona tu mamoe e nanigosi kefiru na ĝeveirito toretore ĝana dagarari, asi bono tuĝa-rekwari.

¹⁴ Alesanda, auri eĝauvei-iaĝirini tarimana, na au evaĝa-rakava baregoguto. Mo kara eveiato tu Vereĝauka na vau voina beviniani.

¹⁵ Ĝia ĝenai tu tauĝemu bono venari, korana ĝia tu ĝai ĝema vevaĝa-riba guruĝari ekira-fitoĝa rakavarito.

¹⁶ Tovotovonai Kota tarimari ĝoirari ai aruĝato nai tu, ta sevigu ai asi eruĝa-tarito, asi evaĝa-kavaguto, mabarari na ĝeraga-kwaneguto. Aĝau-ĝauni, Barau na moĝeri vei-rakava voiri asi bene viniri.

¹⁷ Senaĝina Vereĝauka tu au sevigu ai eruĝa-tarito, benamo kokore eviniguto. Moĝesina eveiguto korana tu, Vari Namona au na bana kiraĝi-foforia, benamo irau bese tarimari mabarari na beĝene seĝaĝia ĝana. Ema au tu Barau na laion bokana na evaĝa-maĝuriguto.

¹⁸ Vereĝauka na rakava mabarari ĝerina beĝabi-maĝuriguni, ema ĝena Guba Basileia ĝana beĝori-ginikauguni. Ĝia arana bitana vaĝa-raĝea bene iaĝo vanaĝivanaĝi, asi magona. Amen.

Vevaĝa-namo dokona

¹⁹ Au ĝegu vevaĝa-namo atuĝuani Priska (o Priskila) e Akwila ĝeri ai, ema Onesiforo ma ĝena numa tarimari ĝeri ai.

²⁰ Erasto tu Korinto ai betanu, ema Trofimo tu Mileto ai baraga-kwaneata, korana ekeveni nai.

²¹ Bono kokore, be bono iaĝoma-ĝarimoĝi, faraka e iavara ĝueri roĝosi bene ĝabia nuĝanai.

Eubulo, Pude, Lino, e Klaudia ĝeri vevaĝa-namo ĝetuĝuani, ema ekalesia tarikaka mabarari na maki.

²² Vereĝauka tu ĝoi iaŭkamu ĝesi bene tanu. Barau ĝena namo e varevarebara ĝomi ĝemi ai bene tanu.

PAULO ĜENA TORETTORE TITO ĜENA

Tito vaĝa-foforina guruĝari

Mai fefa tu Paulo na Tito ĝereĝana ĝena etoreato. Mai fefa Paulo tu Roma dibura numana na etoreato. Mai fefa etoreato laĝanina tu 64 ma 65 fakari nuĝanai ta, mo tu Iesu maki emaseto murinai vau.

Mai fefai siri baregori tu karoa 2:11-14; 3:8.

Paulo na mai fefa etoreato korana ĝena ura, 1) Tito bene kiraia, ekalesia doĝorori ĝorikaŭri tarimari tu kamasiri bene ĝabiri; 2) Tito bene vaĝa-ribaia, Barau ĝena namo ema varevare-bara nuĝanai Barau korana-iaĝina maĝurina tu aiĝesina bene tanu-iaĝia; 3) Tito bene launaĝia, vevaĝa-riba guruĝari moĝoniri bene vevaĝa-riba-iaĝiri.

Mai fefa Paulo na tu maiĝesina eboioĝaiato:

1. Barau korana-iaĝina maĝurina ekalesia doĝorona nuĝanai - karoa 1
2. Barau korana-iaĝina maĝurina numa tatai - karoa 2
3. Barau korana-iaĝina maĝurina tanobara mabaranai - karoa 3

¹ Au Paulo, Barau ĝena vetuĝu-naĝi tarimagu ema Iesu Keriso ĝena apostolo, ĝeguna mai fefa eiaĝosini. Au tu Barau na etuĝuguto, Barau na eĝabi-hidirito tarimari ĝeri veĝabidadamai bana vaĝa-kavari, e guruĝa ema maĝuri moĝonina bana vaĝa-ribari ĝana. Mai guruĝa ema maĝuri moĝonina beĝe ribaiani tu, Barau beĝe korana-iaĝi-korikoriani.

² Korana monana vauro maĝuri vanaĝivanaĝi beĝe tuĝamaĝi-dadamaĝiani e beĝe ĝabiani. Mai maĝuri vanaĝivanaĝi maĝurina maiĝa tu tanobara roĝosi bene vesina nuĝanai veĝata, Barau na ekiraĝi-toreato. Ĝia tu asi eĝofaĝofani Barauna.

³ Senaĝi maitoma vauro Barau tauĝena na eĝabi-toreato ĝaronai tauĝena na bema vaĝa-foforia. Mai Vari Namona maiĝa tu ĝita ĝera Vevaĝa-maĝuri Barauna ĝena guruĝa lorinai au ĝegu ĝobatai akiraĝi-foforiani.

⁴ Tito, mai fefa tu ĝoi ĝemu atore-iaĝosiani. Ĝoi tu au natugu korikori ĝita ĝera mai veĝabidadama sebona maiĝa nuĝanai:

Tamara Barau ema Keriso Iesu ĝita ĝera Vevaĝa-maĝuri Verena ĝerina varevare-bara ema maino ĝemu ai bene tanu.

Tito ĝena ĝauvei Krete motumotunai

⁵ Au na ĝoi Krete ai araga-kwanemuto korana tu, kara maninai roĝosi bana veiri dagarari bono veiri ĝana. Ema vanuĝa baregori mabarari ai ekalesia ĝorikaŭri tarimari tari bono vaĝa-ruĝari mo akiramuto kavana.

⁶ Ekalesia ĝorikauna tarimana tu veiĝa namori moĝo eveini, rakava ta ĝenai asi boĝoitaĝoani tarimana. Garaĝona tu sebona moĝo; natuna na Iesu Keriso ĝevaĝa-moĝoniani, asi ĝeniara-kava niara-kavani, e asi ĝeseĝaforeni, ema guruĝa veroro asi ĝeseĝaĝini merori.

⁷ Korana ekalesia eguine-iaĝirini tarimana tu Barau ĝena ĝauvei eĝita-ĝauani tarimana. Moĝesina naima ĝia tu veiĝa namori moĝo bene vei, a rakava ta ĝenai asi bene tanu, asi bene kira, ĝia tu tarima baregona, benamo tarimarima na tu ĝia ĝereĝana ĝena ura moĝo beĝene korana-iaĝia benesi, asiĝi. Asi bene baru-ĝarimoĝi, dia niuniu rakava-rakava tarimana, dia nuĝa-ĝirima-ĝirima tarimana, dia ĝofaĝofa veiĝari ai ĝena-ĝana eĝoitaĝoni tarimana.

⁸ Ĝia tu veĝabiraĝe tarimana, veiĝa namori eura-vinirini tarimana, vevaĝa-gwaĝiĝi tarimana, vei-iobukaiobuka e veaĝa tarimana, ema nuĝa-gwaĝiĝi tarimana.

⁹ Guruĝa moĝonina ĝevaĝa-ribaiato guruĝari bene ĝabi-gigitariri, be ĝia na moĝeri vevaĝa-riba moĝonina bene ĝabi-iaĝoa, benamo tarima kotari ma benea launaĝiri, e vevaĝa-riba moĝonina ĝekira-fitoĝaiani tarimari maki bene vaĝa-guruĝa gwaĝiĝiri, be ĝeri kerere gaburi beĝene ĝita-doĝariri.

Krete motumotunai tu vevaĝa-riba tarimari ĝofaĝofari vovoka moĝeri

¹⁰ Guruĝa moĝonina asi ĝekorana-iaĝiani, ĝekira-sirivaĝini tarimari, e guruĝa asi tauri ĝekiraĝirini tarimari, ema vevaĝa-riba babori na tarimarima ĝeĝofarini tarimari tu asisebo maniĝeri. Iuda tarimari fakari ai ekalesia nuĝanai ĝeraka-toĝato tarimari tu maniĝesina ĝeveini.

¹¹ Maniĝeri tarima tu boĝono kira-ĝoiri. Korana ĝia na tu bese mabarari ĝeri veĝabidadama ĝevaĝa-rakavarini. Ĝia tu asi ĝere vevaĝa-riba-iaĝiri dagarari ĝevevaĝa-riba-iaĝirini. Ema ĝia mani-ĝeri tu moni e farefare beĝene viniri uranai ĝevei-ĝofakauni.

¹² Ĝia fakari ai ĝeri peroveta tarimana ta tu maiĝesi ekirato, “Krete tarimari tu vanaĝivanaĝi ĝeĝofaĝofani, boĝa bairi rakava kwaikwairi, ĝubulefi ma boĝeka tarimari.”

¹³ Ĝia ekiraĝirito guruĝana maiĝa tu moĝoni. Moĝa lorinai bono kira-matana matanari, be nuĝari mabarari ĝesi e ma moĝoniri ai beĝene veĝabidadama.

¹⁴ Ema Iuda seneri ĝeri sinasina asi beĝene seĝaĝiri, ema Barau ĝena guruĝa moĝonina ĝenana ĝeraka-veĝitani tarimari ĝeri taravatu maki asi beĝene korana-iaĝiri.

¹⁵ Nuĝa namo vedaurea tarimari ĝeri ai dagara mabarari tu namo vedaurea e veiareva. Senaĝi nuĝa asi veiareva ema Keriso asi ĝevaĝa-moĝoniani tarimari ĝeri ai dagara ta tu veiareva asi betanuni. Asiĝina ĝinavaĝi. Korana ĝia tu ĝeri tuĝamaĝi e nuĝari tu rakava kwaikwai bene.

¹⁶ Moĝeri tarima ĝekirani, ĝia tu Barau ma ribari ĝetoni, senaĝi ĝeri veiĝa na evaĝa-foforiani, ĝia tu Barau asiĝina ĝinavaĝi ribari. Maiĝeri tarima tu vei-rakava ma kira-sirivaĝi tarimari, ema veiĝa namori veiveiri ĝia ĝeri ai tu gwaĝiĝi foroforo.

2

Vevaĝa-riba moĝonina e iobukaiobukana

¹ Senaĝi ĝoi na tu vevaĝa-riba moĝonina bono vaĝa-ribari.

² Tarima ĝaukari bono kirari, nuĝari beĝene ĝabi-tariri, beĝene tuĝamaĝi-roroĝoto e beĝene vevaĝa-gwaĝiĝi. Nuĝari mabarari e ma moĝoniri ĝesi beĝene veĝabidadama, e beĝene veura-vini, ema beĝene ruĝa-gwaĝiĝi.

³ Vavine ĝaukari maki mai vevaĝa-riba sebona moĝo bono viniri. Bono kirari, ĝia ĝeri maĝuri ema veiĝa beĝene veaĝa. Tarimarima arari asi beĝene vaĝa-rakava-kavari, e asi beĝene niu-babobabo. A ĝia tu veiĝa namori moĝo beĝene vevaĝa-riba-iaĝiri.

⁴ Benamo ĝia ĝeri mo vevaĝa-riba ĝerina vavine variĝuri na ĝaraĝori ema naturi beĝe ura-vinirini.

⁵ E beĝe vevaĝa-gwaĝiĝini, Barau ĝoiranai beĝe namo-vedaureani, ema ĝeri numa beĝe ĝita-ĝaurini, ema ĝauveiri maki beĝe vei-ginikaurini, ma

vavine namori ai beĝe iaĝoni e ĝaraĝori beĝe gubakaurini ema beĝe seĝaĝi-vinirini. Maĝesi veĝari beĝe veĝirini nai tu, Barau ĝena guruĝa tarimarima na asi beĝe kira-fitoĝaiani.

⁶ Tau maraĝa variĝuri maki mai velaunaĝi sebona moĝo bono viniri. Bono kirari, beĝene vevaĝa-gwaĝiĝi.

⁷ Dagara mabarari veiveiri ai tu ĝoi tauĝemu na vevaĝa-ĝita-iaĝi veĝari namori bono veiri, be beĝene ĝitari. Bovevaĝa-ribani nuĝanai maki ĝere ai asi bono guruĝa, senaĝi guruĝa moĝoniri, guruĝa korikoriri,

⁸ ema guruĝa iobukaiobukari bono kiraĝiri, be tarima ta na ĝemu guruĝa asi bene ĝaoa. Moĝesina boveini tu, ĝoi ĝekira-fitoĝamuni tarimari beĝe maiakarini, benamo ĝita iatarai guruĝa rakavana ta asi beĝe kiraĝiani.

⁹ Tuĝu-rakaorakao tarimari bono launaĝiri, ĝeri baregori garori beĝene seĝaĝiri ema beĝene vaĝa-verereri ĝeri vetuĝunaĝi mabarari ĝeiaĝo-vinirini nuĝari ai. A asi beĝene guruĝa-vaĝa-voiri bonosi.

¹⁰ E bono kirari, ĝeri baregori ĝeri farefare asi beĝene lemalema-vaĝiri. Senaĝi ĝeri veĝa namori moĝo beĝene vaĝa-foforiri. Ma mo veĝa namori na ĝeri baregori beĝene vaĝa-ĝitari, ĝia ĝeri ai asi beĝene daradara, senaĝi beĝene tuĝamaĝikau. Maĝesi beĝe veini tu, ĝita ĝera Vevaĝa-maĝuri Barauna ĝena vevaĝa-riba, tarimarima na tu beĝe vaĝa-raĝeani dabara mabarari nuĝari ai.

¹¹ Korana Barau ĝena namo e varevare-bara ĝenana vevaĝa-maĝuri eiaĝomato, mo vevaĝa-maĝuri tu tarimarima mabarari ĝeri ai ema foforito.

¹² Barau ĝena namo e varevare-bara na ĝita evaĝa-ribarani, Barau asi takorana-iaĝi korikoriani maĝurina tu bitana fitoĝari. A ĝita mai tanobarai tatanuni tu, vevaĝa-gwaĝiĝi maĝurinai bitana tanu, veĝa iobukaiobukari bitana vei ema Barau bitana korana-iaĝi korikoria,

¹³ ĝaro baregona e namona tanari-taĝoani nuĝanai tu. Ĝita initiba tu Iesu Keriso tanari-taĝoani; ĝia tu ĝita ĝera Barau baregona e ĝera Vevaĝa-maĝuri Tarimana; ĝena iaĝoma ma marevana asikeikeina ĝesi moĝo tanari-vegogo-taĝoani.

¹⁴ Iesu Keriso ĝita urarai tauĝena evevinito, ĝita veĝa rakava kwaikwairi nuĝari na bene voi-vaĝira ĝana uranai. Ema ĝita tu ĝia ĝereĝana ĝena moĝo bene vaĝa-namo vedaureara, benamo bene tore-ĝerevaĝira, ĝena tarimarima namori ai bisini iaĝo, ma ĝauvei namori moĝo veiveiri bisini uradika ĝana.

¹⁵ Ĝoi na tu maĝeri maĝuri e veĝa bono vevaĝa-riba-iaĝiri. Ĝemu maoro baregona maniĝa bono ĝauvei-iaĝia, tarimarima bono launaĝiri, ema ĝeseĝaforeni tarimari bono kira-feifeiri. Tarima ta na asi bene kira-fitoĝamu.

3

Aiĝesi ekalesia ĝere tanu

¹ Ĝemu tarimarima ma bono vaĝa-guruĝari, bono kirari, kini e gava-mani ĝeri veĝitaĝau gaburenai beĝene tanu e beĝene seĝaĝi-viniri. Ema vanaĝivanaĝi beĝene venari-taĝo, veĝa namori beĝene veiri ĝana.

² Tarima ta ĝenai guruĝa rakavana ta asi beĝene kiraĝia, ta ĝesi asi beĝene vekira o vevane. A ĝia tu manau ai moĝo beĝene tanu ema tarimarima mabarari veĝa namori moĝo beĝene vei-viniri.

³ Korana tu ĝita maĝera maki guinenai tu babo, Barau asi ribara, Barau taseĝafore-viniato-ĝoi, Satani na eĝofarato-ĝoi, be Barau ĝena dabarai asi

tarakato-ḡoi. Ġita moḡeri negari ai tu veiḡa rakavari irauirauri tauravini-ḡoi, e tauḡani korina vaḡa-vererena veiḡari irauirau ḡeri tuḡurakaorakao tarimari ai tavevaḡa-iaḡoto. Tarima vaḡa-midigumidiguri e vaḡa-vedaḡa-raḡeri tuḡamaḡiri taḡabito-ḡoi ema tarima ḡeri ai tamamato-ḡoi, baru na tavonuvonu-raḡeto-ḡoi e karora ḡesi taveiau-rakavato-ḡoi.

⁴ Senaḡi ḡita ḡera Vevaḡa-maḡuri Barauna ḡena veiau-namo ema ḡena veuravini ḡita tarimara ḡerai ema foforito nai tu,

⁵ ḡita ema vaḡa-maḡurirato. Ġita tu dia ḡera vei-iobukaiobuka dainai ema vaḡa-maḡurirato. Asiḡina. Ġia tauḡena ḡena vevetuḡaḡwai moḡo ema vaḡa-maḡurirato. Eḡuriḡi-matamatarato tamaḡuri-ḡenoḡoito ḡaronai, ema Iauka Vevaḡa na ḡera maḡuri ma evaḡa-variḡu ḡenoḡoirito.

⁶ Mai Iauka Vevaḡa tu Iesu Keriso ḡita ḡera Vevaḡa-maḡuri Tarimana ḡenana Barau na ḡita iatarai ebubu-kauato.

⁷ Keriso na mai maḡuri eveiato, korana ḡita tu ḡia ḡena namo e varevare-bara ḡenana moḡo vei-iobukaiobuka tarimarai evaḡa-iaḡorato Barau ḡoiranai. Ema maḡuri vanaḡivanaḡi tatuḡamaḡi-dadamaḡiani maḡurina maki Barau na bevinirani, benamo bita ḡabiani.

⁸ Mai velaunaḡi guruḡari maḡeri tu moḡoni korikori. Be au aurani, ḡoi na mai veiḡa namori maḡeri tarimarima ḡeri ai bono kiraḡi-baregori, be mani Barau ḡenai ḡeveḡabidadamani tarimari maḡeri tu ḡeri maḡuri beḡene nariri; ema ḡauvei namori ḡeveini maḡeri tu roḡo beḡene vei-iaḡori. Korana mani veiḡa maḡeri tu veiḡa namori ema maḡeri na tarimarima mabarari maki beḡe vaḡa-kavarini.

⁹ A vedanaḡi babori e tubu ḡata o sene ainana ḡeiaḡomato moḡeri kiraḡi-ginikau ginikauri e veḡareveḡare, ema Mose ḡena taravatu vevaneri mabarari ḡerina tu bono veḡita. Korana maḡeri na vevaḡa-kava namona ta tu asi bodoḡariani. Mani tu asi tauri dagarari.

¹⁰ Ekalesia doḡorona nuḡanai vetavi-kirakira veiḡana eveiani tarimana tu bono kira-toreḡaua, bono kiraia, mo veiḡa asi bene veia. Beseḡaforeni, benamo mo veiḡa roḡo beveiani nai, vaḡa-ruaruana ma bono kira-toreḡaua. Moḡa murinai roḡo eḡiḡiraḡeni nai tu, bono ḡita-fitoḡaia moḡo.

¹¹ Korana maḡesi vetavi-kirakira veiḡari eveirini tarimana tu bono riba, ḡia ḡena maḡuri tu rakava kwaikwai ema vei-rakava nuḡanai etanuni. Ġia tu tauḡena ḡena vei-rakava na evaḡa-moḡoniani, ḡia tu moḡoni rakava tarimana.

Vevaḡa-riba guruḡari maḡori

¹² Au na Atemas o Tikiko ḡoi ḡemu ai batuḡu-iaḡosiani nai tu, dabara ta bono vetaua, benamo au ḡegu ai bono iaḡoma Nikopoli ḡana. Korana au tu akirato, faraka e iavara ḡueri nuḡari ai tu monai baḡabiani atato bene.

¹³ Taravatu tarimana Senas e Apolos ḡeri dabara bono raga-vei, be bono ragatuḡu-iaḡomari. Botuḡu-iaḡomarini nai tu, ḡeri ura dagarari mabarari maki bono vini-ginikauri.

¹⁴ Ġita ḡera tarimarima mabarari ḡauvei namori veiveiri ai asi beḡene biga dabarari bono vaḡa-ribari, be beḡene ribari. Korana moḡeri dabara beḡe ribarini nai tu, ḡaro vanaḡivanaḡi ḡeri-ḡari tu tauḡeri beḡe ḡauveini, benamo beḡe ḡoitaḡoni, ema ḡeri ḡauvei maki ḡwaḡwari beḡe vetoreni.

¹⁵ Mainai au karogu mabarari na ḡemi vevaḡa-namo beḡe tuḡu. Ġema vevaḡa-namo maki veḡabidadama nuḡanai ḡai ḡeura-vinimani tarimari bono viniri.

Barau ḡena namo e varevare-bara ḡomi mabarami ḡemi ai bene tanu.

PAULO ĜENA TORETORE FILEMONA ĜENA

Filemona vaĝa-foforina guruĝari

Paulo na mai fefa tu Filemona ĝena Roma dibura gabuna na etoreato. Mai fefa tu laĝani 60 ma 61 fakari nuĝanai ta etoreato, mo tu Iesu emaseto murinai vau.

Mai fefa anina baregona tu “Veĝabi-raĝe ĝenoĝoi”. Ma siri baregori mai fefai tu siri 15 ema 16.

Paulo na Filemona mai fefa etore-viniato korana tu ĝena ura, 1) Filemona bene kiraia, Onesimo ma bene ĝabi-raĝea tarikaka maĝurinai; 2) Filemona bene kira-varaia, ĝia tu dibura na dori eraka-rosini, ma beraka-rosini ĝaronai tu Filemona bea raka-ĝitaiani.

Paulo na Filemona ĝena mai fefa tu maiĝesina eboioĝaiato:

1. Paulo na Filemona evaĝa-veiaviato - siri 1-7
2. Paulo na Onesimo iatanai Filemona enoĝiato - siri 8-21
3. Veĝabituĝu ĝuruĝari ekiraĝirito - siri 22-25

¹ Au Paulo, Keriso Iesu ĝaramanai diburai atanuni tarimagu, ema tarikakara Timoteo, ĝemana eiagōsini.

Ĝauvei sebona ĝaveiani tarimana e ĝatama namona Filemona ĝemu atore-vinimuni.

² Ema tobara Afia, ema ĝatara namona, Barau ĝena vetari nuĝanai iauka rekenai, Arekipo, ema ĝoina numai ĝevegogoni ekalesiari ĝeri atore-vinirini.

³ Tamara Barau ema Vereĝauka Iesu Keriso ĝerina maino ema varevarebara ĝemi ai bene tanu.

Filemona ĝena veuravini ema veĝabidadama

⁴ Filemona, ĝegu Barau atanikiu-viniani ema vanaĝivanagi ĝegu ĝauĝau ai akiraĝimuni,

⁵ korana ĝemu veĝabidadama Vereĝauka Iesu ĝenai ema ĝemu veuravini Barau ĝena veaĝa tarimari mabarari ĝeri ai aseĝaĝimuni nai.

⁶ Moĝa lorinai aĝuriĝurini ĝemu veĝabidadama bono vari-fiua tarima tari ĝeri ĝana, be dagara namori taĝaunarini Keriso ĝenai taveĝabidadamani lorinai, bono riba-ĝitakauri.

⁷ Moĝoni, tarikakagu, ĝemu veuravini na evaĝa-iaku rakavaguto ema elaunaĝi-rakavaguto, korana ĝoi na veaĝa tarimari nuĝari ovaĝa-kokorerito.

Paulo ĝena noĝinoĝi

⁸ Au tu nuĝagu gwaĝiĝi Keriso nuĝanai ĝoi bara kiramu kara boro vei,

⁹ senaĝi veuravini nuĝanai moĝo anoĝimuni ĝemu veuravini dainai. Mai tu au, Paulo, baĝauka ema Keriso Iesu ĝaramanai diburai maiĝegu.

¹⁰ Onesimo, au natugu, uranai anoĝimuni. Ĝia tu Keriso nuĝanai au natugu ai eiagoto, korana au roĝo dibura numana nuĝanai, iaukai ĝia tamanai aiaĝoto.

¹¹ Guinenai ĝia tu asi namo ĝoi ĝemu ai, senaĝina toma vetuĝunaĝi iaĝovininaĝi ĝia tu ilaila nai, ĝoi na oura-viniani ema au na maki aura-viniani.

¹² Ĝia tu au lorugu ĝutuna, mai atuĝu-iaĝosi ĝenoĝoiani, be bono ĝabi-raĝea.

¹³ Au ĝegu ura ĝia tu mainai bana ĝabi-taria au sevigu ai, be ĝoi gabumu bene ĝabia au bere vaĝa-kavagu, au Vari Namona ĝaramanai roĝo diburai nuĝanai.

¹⁴ Senaḡi ḡegu ura ḡoi na maoro boro vinigu vau bara ḡabi-taria, moḡesi naima asi aḡabi-tariato. Au asi aurani maki ḡoi bana kiramū kara bono veia. Au ḡegu tuḡamaḡi, bema veiḡa namori tari au durudurugu ḡana bourani veiveiri nai tu, nuḡamu sigai moḡo bono veiri.

¹⁵ Betaḡu ḡoi ḡemuna Onesimo eveḡitato ḡaro kotuna anina tu, ma boḡabi-ḡenoḡoiani nai tu, ḡoi ḡesi bene tanu-vanaḡi vanaḡi ḡana.

¹⁶ Dia ḡemu tuḡu-rakaorakao tarimana asi voina moḡo. Asiḡina. Moḡoni, ḡia tu ḡemu vetuḡunaḡi tarimana, senaḡi ḡia toma tu ḡoi tarikakamu moḡoninai beiaḡo, naima bono ura-vinia. Au na ḡia tu anari-ḡitakauani nuḡagu mabarana ḡesi, ema ḡoi na maki bouravini-lelevaḡiani nuḡamu mabarana ḡesi. ḡia boura-viniani ema boḡabi-raḡeani tarima ta ema Vereḡauka nuḡanai tarikaka ta.

¹⁷ Bema au oḡabi-raḡeguni ḡoi ḡatamu, Onesimo maki bono ḡabi-raḡea au boḡabi-raḡeguni ilailanai.

¹⁸ Bema kerere ta eveiato ḡoi ḡemu ai o ma ḡena ḡabitore ḡoi ḡemu ai nai tu, au aragu ai bono toreri.

¹⁹ Au Paulo ḡimagu na mai fefa atoreani. Mo ḡabitore tu voiri mabarari bavini-ḡenoḡoimuni. ḡoi maki ma ḡemu ḡabitore au ḡegu ai. ḡoi maḡuri tu au ḡeguna oḡoitaḡoato, senaḡi manḡeri tu asi bita kiraḡirini.

²⁰ Be, tarikakagu Vereḡauka nuḡanai, mani ḡemu veiḡa ḡegu noḡinoḡi bono ḡabi-raḡea. ḡita taura ruarua tu Keriso nuḡanai tatanuni, be bono vaḡa-iaḡugu.

²¹ ḡemu seḡaḡi ai avetuḡa-maḡikauni nai batore-vinimu. Au ribagu, dia anoḡimuni veiḡari moḡo boveirini, senaḡi veiḡa namori boruri maki boveini.

²² Dagara ta maia. ḡegu gena daiḡutuna ta bono ḡabi-torea, korana atuḡamaḡini, Barau na ḡemi ḡauḡau beḡabi-raḡeani, be beḡabi-iaḡosiguni ḡemi ai.

Vevaḡa-namo guruḡari

²³ Epafra, Keriso Iesu ḡaramanai au ḡesi dibura numanai ḡatanuni, ḡia na evaḡa-namomuni.

²⁴ Ema Mareko, Aristako, Dema ema Luka au ḡesi ḡaḡauvei-sebonani tarimari, ḡia na maki ḡeri vevaḡa-namo ḡevinimuni.

²⁵ Vereḡauka Iesu Keriso ḡena varevare-bara mabarami ḡemi ai bene tanu.

HEBERU

Heberu vaġa-foforina guruġari

Mai fefa toretorena tarimana ta tu asi ribana. Tari ġekirani tu Luka na etoreato, tari ġekirani tu Apolos, o Banabas, o Priskila, o Akwila, o Paulo na etoreato ġetoni. Ġutuma ġekirani tu Paulo ġetoni korana fefa tu Paulo ġena fefa tore maġurinai ġetoreato. Mai fefa tu laġani 60 ema 70 fakari nuġanai ta ġetoreato, mo tu Iesu emaseto murinai.

Mai fefai siri baregori tu karoa 1:3; 4:14-16.

Mai fefa etoreato tarimana ġena ura baregona tu, 1) Heberu ekalesiari bene kirari, ekalesia maġurina korikorinai beġene tanu, a Iuda ġeri sene taravaturi ema maġuriri ġerina tu beġene raka-veġita ma ġeri ai asi ma beġene ġenoġoi-iaġo, maġuri vanaġivanaġi asi beġe doġariani garina (2:1; 6:4-6; 10:26); 2) Iesu Keriso bene vaġa-foforia, ġia tu moġoni Barau vetoġana korikori ema foforito tanobarai; 3) Barau ġena Ginitaġo Variġuna Iesu ġenai emoġonito moġa bene vaġa-fofori ginikaua etato.

Mai fefa tu maiġesina eboioġaiato:

1. Vevaġa-riba-iaġi guruġari - karoa 1-10:18
2. Ekalesia tanutanuna maġuriri - karoa 10:19-13:25

Barau ġena guruġa Natuna ġenana

¹ Guinenai, ġaro vovoka e dabara ġutumai Barau na peroveta tarimari ġerina senera evaġa-guruġarito.

² Senaġi toma, mai ġaro dokori ai, tu Natuna ġenana ema vaġa-guruġarato. Barau na dagara mabarari tu Natuna eviniato bene ġaunari. Ema ġia ġenana maki Barau na guba e tanobara eveirito.

³ Ġia tu Barau marevana e mamana baregona evaġa-foforiani, ema ġia tu Barau tauġena kavana. Ġia ġena guruġa seġukana na dagara mabarari eġabi-taġorini. Ġia tauġena na ġera rakava ġuriġivaġiri dabarana evei-ġitakauato murinai, Barau Iaru-korokoro aroribanai ea tanu-tarito gubai.

Barau Natuna tu barego vedaurea, aneru maki evanaġirito

⁴ Barau na Natuna tu etore-varaġeato, aneru evanaġirito. Korana tu arana eviniato maki varaġe lelevaġina, aneru arari evanaġirito.

⁵ Korana Barau na aneru ta tu asi ekiraiato, ekirato,

“Ġoi tu au Natugu,
toma au tu ġoi Tamamu ai baiaġo.”

O maiġesi maki asi ma ekiraiato, ekirato,

“Au tu ġia Tamanai baiaġoni,
ema ġia maki au Natugu ai beiaġoni.”

⁶ Ema Barau na Natuna guinena tanobara ġana ma beġori-iaġomaiani nai tu bekirani,

“Barau ġena aneru mabarami na boġono toma-rakariġo vinia.”

⁷ Aneru ekiraġirito nai tu ekirato,

“Barau na ġena aneru eveirito iavara kavana,
ġena vetuġunaġi tarimari karava emoreni noġa.”

⁸ Senaġina Natuna ekiraġiani tu ekirani,

“Barau o, ġoi ġemu Vere dagina tu betanu-vanaġi vanaġini,
ġemu Basileia tu ma iobukaiobukamu ġesi oġori-kauani.

⁹ Vei-iobukaiobuka tu oura-vinirini,
ma veġa rakavari tu asi oura-vinirini.

Moġa lorinai, Barau o,
 ġemu Barau na maki karomu fakari ai ġoi eġabi-viriġimuto,
 debamu ai diġa esisiato,
 iaku na evaġa-vonumuto.”

¹⁰ Ema ma ekiraiato, ekirato,
 “Vere o, tovotovonai tu
 ġoi na tanobara oveiato,
 ema guba maki ġoi ġimamu veiveina.

¹¹ Ġia tu beġe korini,
 senaġi ġoi tu botanuni;
 mabarari dabuġa kavana beġe rakavani.

¹² Ġoi na koudi noġa boiokurini,
 dabuġa kavana vetoġari beġe irauni,
 senaġi ġoi vetoġamu tu asi beirauni,
 ema ġoi ġemu maġuri laġaniri maki
 asi beġe magoni.”

¹³ Barau na aneru ta maki asi ekiraiato,
 “Aroribagu ai noma tanu,
 bene iaġo mo, ġoi ġevetari-vinimuni tarimari ġoi kwakumu fanakauna
 dagaranai batore-taririni.”

¹⁴ Aneru mabarari tu vetuġunaġi iaukari moġo, Barau na etuġurito
 deikara vevaġa-maġuri beġe ġabiani tarimari vaġa-kavari ġana.

2

Vevaġa-maġuri baregona

¹ Moġa lorinai kara taseġaġirito guruġari tu tana ġabi-gigitariri, asi namo
 ġerana beġe rekwarekwani, benamo taiġo-viniani gabuna bita leiani.

² Korana aneru na ġita senera ġeri ġevari-fiurito guruġari tu moġoni
 veġata, ma mo guruġa moġeri ġekira-sirivaġi-iaġirito e asi ġekorana-iaġirito
 tarimari tu ġeri vei-rakava ilailari ai metona ġeġabiato,

³ a ġita tu kamasi bita raga-maġurini, bema mai vevaġa-maġuri baregona
 bita ġita-ġuiragiiani nai tu? Mai vevaġa-maġuri tu tovotovonai Vereġauka
 tauġena na evari-fiuato. Moġa murinai tu ġeseġaġiato tarimari na ġai ġema-
 kiravaramato mo tu moġoni.

⁴ Barau na maki evaġa-moġoniato vetoġa boruri ai, e nuġa-farevaġi veiġari
 ai, e seġuka veiġari boruri dabara irauirauri ai, ema Iauka Veaġa ġena
 varevare dagarari na. Mo Iauka Veaġa ġena varevare dagarari tu Barau
 ġena ura lorinai veġabidadama tarimari evinirito.

Iesu na vevaġa-maġuri gabuna ġana eġori-iaġorani

⁵ Mo tanobara beiaġomani ġai na ġakiraġiani tu Barau na dia aneru ġeri
 veġitaġau gaburenai etoreato.

⁶ Senaġina Buka Veaġa nuġanai gabu tai tarima ta evarifiuto, ekirato,
 “Barau o, tarimarima tu dei,
 be ġoi na otuġamaġi-gwaġiġiani?
 O Tarimarima Natuna tu dei,
 be ġoi na oraka-ġitaiani?”

⁷ Ġoi na kota otore-variġoato aneru gabureri ġana;
 murinai mareva baregona e vegubakau koronana ġenai otore-kauato,

⁸ ema dagara mabarari ġia kwakuna gaburenai otorerito.”
 Korana Barau na dagara mabarari tu ġia ġena veġitaġau gaburenai
 otorerito. Moġoni, Barau na dagara ta tu asi etore-ragakwaneato, ġia ġena

veġitaġau gabuna murikanai. Senaġina maitoma dagara mabarari tu dia ġia ġena veġitaġau gaburenai taġitarini.

⁹ Senaġi Iesu taġitaiani, ġia tu Barau na mo faka kotunai etore-variġoato aneru gabureri ġana, korana Barau ġena varevare-bara ġenana tarimarima mabarari urari ai bene mase. Toma Iesu tu taġitaiani, iatanai Barau na mareva e vegubakau baregona etore-kauato, korana tu midigumidigu ai emaseto.

¹⁰ Dagara mabarari eveirito e eġaunarito Barauna, ġena ura tu Iesu roġo midigumidigu ġenana asi vetoukaunai bene iaġo-guine. Moġa murinai vauro natuna ġutumari ma bene ġori-iaġomari, benamo ġia marevana e mamana baregona beġene ġabia. Barau ġenai dabara roroġotona sebona tu moġa moġo. Korana Iesu tu Barau natuna ġeri vevaġa-maġuri tarimana baregona.

¹¹ Tarimarima evaġa-veaġarini tauna, Iesu, ema Iesu na evaġa-veaġarito tarimari Tamari tu sebona. Moġa lorinai Iesu tu asi emaiakaiani mo evaġa-veaġarito tarimari ekiraġirini ġia tarikakana.

¹² Ġia na Barau ekiraiani, ekirani,
“Ġoi aramu tu au tarikakagu ġeri ai bakiraġi-foforiani;
ekalesia nuġanai ġoi mari ai bavonevone-raġemuni.”

¹³ Ma ekirato,
“Barau ġenai haveġabidadamani.”
Ema ma ekirato maki,
“Au tu maiġegu Barau na eviniguto doġorona natuna ġesi.”

¹⁴ Korana Barau natuna mabarari tu ma viriġori e ma rarari nai, ġia tauġena maki ġia ilailari ai eiaġoto. Moġesi eveito korana tu, ġena mase ġenana mase seġukana eġabi-taġoani tarimana, Diabolo, bene vaġa-rakavaia ġana.

¹⁵ Ema tarimarima deikara ġeri maġuri nuġanai mase garina na eġuġvirito bene vaġa-maġuriri ġana.

¹⁶ Moġoni, Iesu na tu dia aneru evaġa-kavarito, senaġi Aberahamo besena.

¹⁷ Moġa lorinai Barau na Iesu tu dabara mabarari ai tarina doġoro ilailari ai eveirito. Korana mo dabarai vau vevetuġaġwa e vetuġamaġikau Rubu Veaġa verena baregonai beiaġoni. Ema Barau vetuġunaġina beiaġo-vinini, tarimarima ġeri rakava na bene voi-vaġiri ġana.

¹⁸ Korana Iesu tauġena na veribaġani midigumidiguna mamina eġabiato, toma kamara deikara veribaġani beġoitaġoni nai tu bevaġa-kavaiani riba.

3

Iesu ġena seġuka na Mose ġena seġuka evanaġiato

¹ Moġa lorinai, tarikakagu veaġami, ġomi tu Barau na ekeamito guba na. Ġemi tuġamaġi boġono tore-gwaġiġia Iesu ġenai. Ġia tu Barau na etuġuato Rubu Veaġa verena barana. Ġita na tu ġia takiraġi-foforiani.

² Iesu tu Barau na evaġa-ruġaiato Rubu Veaġa verena. Ema ġia tu ma ġena vetuġamaġikau Barau ġenai, ilailana Mose ma ġena vetuġamaġikau Barau ġena numai kavana.

³ Numa eragaiani tarimana tu ġegubakau-baregoani, a eveiani numana tu ġegubakau-keiani. Moġesi kavana Barau na Iesu tu mareva baregona eviniato, Mose na eġabiato marevana evanaġiato.

⁴ Numa mabarari tu ma ragaragari tarimari, senaġina dagara mabarari veiveiri tu Barau ġereġana.

⁵ Mose tu vetuḡunaḡi-iaḡovini tarimana, ḡia ma ḡena vetuḡamaḡikau Barau ḡena numai. Ema ḡena ḡauvei tu ḡoirai Barau na kara bekiraḡirini guruḡari ekiraḡi-foforirito-ḡoi.

⁶ Senaḡina Keriso, Barau Natuna, tu Barau ḡena numa eḡita-ḡauani. Ḡita tu ḡia ḡena numa, bema ma kokorera e ma iakura ḡesi taveiavi-iaḡiani tuḡamaḡikaunai bita veḡabi-gwaḡiḡini beiaḡoni mo magona.

Barau ḡena tarimarima ḡeri iaḡaraḡi

⁷ Moḡa lorinai Iauka Veaḡa ekirani kavana vei, maiḡesi ekirani, “Toma bema Barau garona boḡo seḡaḡiani nai tu,

⁸ nuḡami asi boḡono vaḡa-gwaḡiḡi foroforori, senemi tanobara fakanai veribaḡani ḡaronai ḡeseḡaforeto kavana.

⁹ Oba, tamamai na laḡani gabana vasivasi (40) tanobara fakanai ḡegu ḡauvei ḡeḡitaiao,

senaḡina ḡeribaḡaniguto e ḡevaḡa-uraguto.

¹⁰ Moḡa lorinai mo bese abaru-vinirito,

benamo akirato, ‘Ḡia nuḡari tu vanaḡivanaḡi au ḡeguna ḡeveḡitani, ema au ḡegu veḡa maki asi ḡeribarini.’

¹¹ Moḡa lorinai ma baruḡu ḡesi aguruḡa-foforito,

‘Ḡia au ḡegu iaḡaraḡi ai tu asi beḡe raka-toḡani.’ ”

¹² Tarikakagu mabarami, boḡono venari. Asi namo tarikaka ta ḡomi fakami ai loruna ḡutunai vei-rakava betanuni, ema Barau ḡena guruḡa asi bevaḡa-moḡoniani, benamo maḡuri Barauna ḡenana beraka-veḡitani.

¹³ Toma mai ḡaro maiḡa Barau ekirani, “Tomaḡaro” etoni ḡiranai, karomi tata ḡesi boḡono velaunaḡi, be vei-rakava ḡena ḡofaḡofa na ta nuḡamu asi bene vaḡa-gwaḡiḡia.

¹⁴ Ḡita tu Keriso ḡesi tasebonato, bema tovotovonai taḡabi-raḡeato veḡabidadamana moḡa bita ḡabitari-gwaḡiḡiani beiaḡoni mo magona.

¹⁵ Buka Veaḡa ekirani kavana,

“Tomaḡaro ai bema garona

boḡo seḡaḡiani nai,

nuḡami asi boḡono vaḡa-gwaḡiḡiri,

guinenai ḡomi senemi seḡafore ai ḡeveito kavana.”

¹⁶ Dei na tu Barau garona ḡeseḡaḡiato, senaḡi ḡena guruḡa ḡekira-fitogaḡarito, benamo ḡevaḡa-baruato? Mo tu Mose na Aigupito na eḡori-rosirito tarimari mabarari, ene?

¹⁷ Ema deikarari tu Barau na mo laḡani gabana vasivasi (40) nuḡanai ebaru-vinirito? Tarimari tu moḡeri, rakava ḡeveito, benamo tano fakanai ḡeketoto, benamo ḡemaseto, ene?

¹⁸ Ema Barau na tu deikarari ekirarito, ekirato, “Au ḡegu iaḡaraḡi gabunai tu asi beḡe raka-toḡani.” Ḡeseḡaforeto tarimari ekirarito, ene?

¹⁹ Moḡa lorinai ḡita taribani, ḡia tu asi ḡeraka-toḡato, korana Barau asi ḡevaḡa-moḡoniato-ḡoi nai.

4

¹ Barau ḡena iaḡaraḡi ai bita raka-toḡani guruḡatorena tu roḡo eruḡa-taḡoni. Moḡa lorinai bitana venari, ḡita fakarai ta mo iaḡaraḡi ai asi beraka-toḡani garina.

² Korana mo Vari Namona ḡita ḡera ḡeḡobata-iaḡiato tu Isaraela tarimari ḡeri maki ḡeḡobata-iaḡiato. Senaḡi mo guruḡa ḡeseḡaḡirito ḡerina namo ta asi ḡeḡoitaḡoato, korana tu ḡeseḡaḡirito moḡo, ma asi ḡevaḡa-moḡonirito.

³ Senaĝi ĝita Barau tavaĝa-moĝoniani tarimara tu, mo iaĝaraĝi ai bita raka-toĝani ĝena guruĝa ilailanai, ekirato,

“Au ĝegu baru ai kiraĝitore guruĝana gwaĝiĝina akiraĝi-foforiato, akirato, ‘Au ĝegu iaĝaraĝi ai tu asi beĝe raka-toĝani.’”

Moĝoni, Barau tu moĝesi ekirato, senaĝina ĝia na tanobara eveiato nai, ĝena ĝauvei mabarari tu varau evaĝa-koririto.

⁴ Gabu tai Buka Veaĝa nuĝanai ĝaro vaĝa-imaima ruaruana (7) ekiraĝiato nai tu, maĝesina ekirani, “Ĝaro vaĝa-imaima ruaruana (7) Barau tu ĝena ĝauvei mabarari ĝerina eiaĝaraĝito.”

⁵ Ema mai vau bita kiraĝia gabunai maki ekirato, “Ĝia au ĝegu iaĝaraĝi ai tu asi beĝe raka-toĝani.”

⁶ Senaĝina tari mo iaĝaraĝi ai beĝe raka-toĝani guruĝatorena tu roĝo eruĝani gabunai. Ma Isaraela tarimari, Vari Namona ĝeseĝaĝi-guineato tarimari, tu mo iaĝaraĝi ai asi ĝeraka-toĝato, korana tu ĝeseĝaforeto nai.

⁷ Moĝa lorinai Barau na ĝaro ta ma eĝabi-viriĝiato, “Tomaĝaro” ekiraĝiato. Ma laĝani vovoka ĝekorito murinai, Barau, Davida ĝenana maĝesi eguruĝato, ekirato,

“Toma, bema Barau garona

boĝo seĝaĝiani nai,

nuĝami asi boĝono vaĝa-gwaĝiĝiri.”

⁸ Bema Iosua na iaĝaraĝi bere viniri, Barau na moĝa murinai iaĝaraĝi ĝarona ta tu asi ma bere kiraĝia.

⁹ Moĝa lorinai Barau ĝena tarimarima ĝeri iaĝaraĝi tu roĝo ĝoirai eruĝataĝoni.

¹⁰ Korana Barau ĝena iaĝaraĝi ai eraka-toĝani tarimana tu ĝena ĝauvei na eiaĝaraĝini, ilailana Barau ĝena ĝauvei na eiaĝaraĝito kavana.

¹¹ Moĝa lorinai sikokore, Barau ĝena iaĝaraĝi ai tana raka-toĝa uranai. Ma ĝita fakarai ta asi bene keto, guinenai ĝeseĝaforeto tarimari kavari.

¹² Barau ĝena guruĝa tu maĝuri e ma seĝukana. Matana maki raga-rakava, vetari baĝana ta matana ruarua maki evanaĝiato, erakatoĝa-korikorini maĝuri ma iauka vekaravarina, ema turiĝa komukomuri ruarua ĝeraga-sebonato vekaravarina. Tarima loruna ĝutuna ĝena ura e tuĝamaĝi maki eriba-viriĝiani.

¹³ Barau na eveirito dagarari mabarari tu ta asi vekuretoĝa ĝia matanai. Ema ĝia ĝoiranai ĝita mabarara ĝera maĝuri bita vari-fiurini.

Iesu Rubu Veaĝa verena barego vedaureana

¹⁴ Barau Natuna Iesu tu ĝita ĝera Rubu Veaĝa verena barego vedaureana; ĝia tu guba eraka-vanaĝirito. Moĝa lorinai ĝera veĝabidadamai tana veĝabi-gwaĝiĝi. Mo tu ĝita na takiraĝi-foforiani veĝabidadamana.

¹⁵ Ĝita ĝera Rubu Veaĝa verena baregona tu ĝita ĝera moiramaira ĝia na maki emami-raĝirini. Korana tu ĝia maki ĝenai veribaĝani irauirau mabarari ĝefoforito ĝita ĝerai kavana. Senaĝi ĝia tu asi evei-rakavato.

¹⁶ Moĝa lorinai ma kokorera ĝesi Barau ĝena namo e varevare-bara terona ĝana siraka-kavi-iaĝo. Monai Barau ĝena vevetuĝaĝwa bitana ĝabia, ema ĝena varevare-bara tana ĝoitaĝoa, be bita ura-viniani nai, bene vaĝa-kavara.

5

¹ Rubu Veaĝa vereri baregori mabarari tu tarimarima fakari na Barau na eĝabi-viriĝirito, benamo evaĝa-ruĝarito, tarimarima arari ai Barau ĝena

ġauvei beġene veia ġana. Ġia ġeri ġauvei tu tarimarima ġeri rakava voi-vaġiri ġana varevare dagarari Barau beġene vinia ema boromakau, mamoe, e manu beġene vaġiri, benamo beġene gaburi, Barau na bonari bene noġori ġana.

² Rubu Veaġa verena baregona tauġena maki ma ġena moira gaburi, naima ġia na asi ribari tarimari ema Barau ġena dabara na ġeraka-veġitani tarimari bevetuġa-ġwarini riba.

³ Ġia tauġena maki ma ġena moira lorinai, ġia na rakava voi-vaġiri varevareri tu ġia ġena evinini, ema tarimarima ġeri maki evinini.

⁴ Rubu Veaġa verena baregona dagina eġabini tarimana tu arana barego. Tarima ta na mai ginitaġo ġauveina tauġena na asi beġabi-kavaiani, senaġi ġia tu Barau na bene keaia vau, vaġa-ilailana Arona ekeaiato kavana.

⁵ Keriso maki moġesi, dia tauġena eveġabi-varaġeto Rubu Veaġa verena baregonai evetoreto, senaġina Barau na evaġa-ruġaiato, ekiraiato, ekirato, “Goi tu au Natugu, toma au tu ġoi Tamamu ai baiaġo.”

⁶ Gabu tai maki ekirani,
“Ġoi tu Rubu Veaġa verenai
botanu-vanaġi vanaġini
Melkisedek kavana.”

⁷ Iesu tanobarai etanuto-ġoi ġarori ai tu ma taġi-koġokoġona ema matana ma nanuri ġesi Barau ġenai eġuriġurito-ġoi, ema enoġi-raġeto-ġoi. Korana tu Barau na ġereġana na moġo mase ġenana bevaġa-maġuriani. Barau na eseġaġiato, korana tu ma vegubakauna ġesi Barau garina eveito-ġoi nai.

⁸ Ġia tu Barau Natuna, senaġi ġena midigumidigu na vau seġaġi dabarana eribaiato.

⁹ Enamo-vedaureato murinai vau, ġia beġe seġaġi-viniani tarimari mabarari ġeri maġuri vanaġivanaġi vaġa-ġorana tarimanai eiaġoto.

¹⁰ Ema Barau na evaġa-ruġaiato Rubu Veaġa verena baregona Melkisedek kavana.

Asi boġono mero-kaukau

¹¹ Ġia varina tu vovoka bita kiraġirini, senaġina moġeri kiraġi-viriġiviriġiri tu gwaġiġi, korana ġomi tu asi ġotuġamaġi-faka ġarimoġini.

¹² Mai nega mainai ġomi tu vevaġa-riba tarimami ai ġoro iaġo, be ġoro vevaġa-riba-ġoi. Senaġina ġomi tu roġo ġourani ta na Barau ġena guruġa moġoniri korari na ma bene vaġa-ribami ġotoni. Ġomi tu roġo lata ġourani, ġaniġani gwaġiġiri tu asiġina.

¹³ Deikara lata roġo eruruni tu roġo mero keina. Ġia tu veiġa iobukaiobukari ema veiġa asi roroġotori vetoġari tu roġo asi ribana.

¹⁴ A ġaniġani gwaġiġiri tu tarima baregori ġari. Ġia na tu ġeġauvei-iaġi vanaġivanaġirini. Ġeġauvei-iaġirini ġarori ai tu tauġeri maki ġevevaġa-ribani namo e rakava vetoġari beġene ġita-leari ġana.

6

¹ Moġa lorinai namona tu Keriso ġena vevaġa-riba guruġari tovtovonai riba ġuineri ġeġorani dagarari tu si-iaġuiri. Benamo ġia ġena vevaġa-riba baregori ġana si-iaġo. Tovtovonai riba ġuineri ġeġorani dagarari moġo asi bitana vevaġa-riba-iaġi ġenoġoi-ġenoġoiri. Mo tu vei-rakava ġerina tuġamaġi-kure ma raka-kure e Barau ġenai veġabidadama.

² Babatiso vevaġa-ribari e ġima tarima iatari ai torekau, mase na variġisi-ġenoġoi e vevaġa-roroġoto vanaġivanaġi.

³ Moġa tu bita veiani bema Barau na bevaġa-moġoniani nai.

⁴ Bema tarima ta ġena veġabidadama beraga-kwaneani tu, kamara dabarai ma bevetuġamaġi-kureni? Ġia nuġana tu evaġa-mamaiato, ema guba na eiaġomato varevarena emami-tovoato, ema Iauka Veaġa maki eġabiato.

⁵ Ema Barau ġena guruġa namona edoġariato e vau ma beiaġomani tanobarana seġukari maki emamirito.

⁶ Bema ġia veġabidadama na ma beketo-veġitani, ġia tu Barau Natuna ma evaġa-satauro ġenoġoiani, ema ġutuma barai ma etore-rosiani e evaġa-maiakaiani. Ġia ma novaġa-vetuġamaġi-kurea ġana tu asi dabarana ta.

⁷ Ġaro vovoka ġura eraguni, benamo tano na mo nanu erimaiani. Benamo bema mo tano iatanai ġevaroni tarimari ġari ġaniġani namori bevaġa-ġorarini nai tu, Barau na mo tano namo beviniani.

⁸ Senaġina ġau ma giniri ema ġauġa ma ġiniġiniri evaġa-ġararini tanona tu asi ġena namo; Barau na mo tano bekiraġiani tu tano rakavana, ema dokonai tu begabuani.

⁹ Ġatagu mabarami, moġoni, maiġesina ġavaġa-guruġa gwaġiġimini, senaġina ġatuġamaġi-gwaġiġini, ġomi tu namo baregona ema vevaġa-maġuri boġoa ġoitaġoani.

¹⁰ Barau ġena veġa tu asi ġeġeva. Barau ġemi ġauvei ema ġia arana ġoura-
viniani nai, ġena tarimarima ġovaġa-kavarito ema initoma roġo ġovaġa-
kavarini tu asi betuġa-
rekwarini.

¹¹ Ġai ġema ura baregona tu ġomi tata maniġesi moġo boġono ġauvei-
kokore-iaġo, ġemi tuġamaġikau beġenea moġoni bene iaġo mo dokonai.

¹² Be asi beġene ġubulefimi, senaġina mo tarimarima ġeri veġabidadama e
ġeri vevaġa-gwaġiġi ġerina mo kiraġitore ġeġabiani, boġono tovtovori.

Barau ġena kiraġitore

¹³ Barau ġena kiraġitore guruġana Aberahamo ġenai eveiato tu tauġena
aranai eguruġa-toreto, korana tu tarima ta ma asi varaġe ġia iatanai, aranai
beguruġa-toreni lorinai.

¹⁴ Ekirato, “Moġoni, ġoi tu bavaġa-namomuni ema besemu ġutuma bavin-
imuni.”

¹⁵ Benamo Aberahamo evevaġa-gwaġiġito, asi eġubulefito mo Barau na
ekiraġi-torerito dagarari ġenai ġefoforito.

¹⁶ Tarimarima guruġatore gwaġiġiri mabarari ġeveini nai tu, tarima
baregona ta ġia iataraġeri ai aranai ġeguruġa-toreni. Monana mo guruġa-
tore guruġana gwaġiġina evaġa-moġoniani, benamo veġareveġare guruġari
mabarari elauġaurini.

¹⁷ Guinenai Barau ġena kiraġitore tu guruġatore guruġana gwaġiġinai
eveiato. Korana ġia ġena ura ġia na kiraġitore beġe ġaunaiani tarimari
beġene riba-ginikau, ġia ġena kiraġitore tu asi bevekefoni.

¹⁸ Mo guruġatore ruarua tu beġe tanuni, asi beġe vekefoni. Ema mo
dagara ruarua ġerina ġita taribani, Barau tu asi beġofaġofani riba. Be
ġita deidei rakava ġenana taraga-veġitato, benamo Barau ġenai tiaiġomato
tarimara tana kokore-korikori, be mo tuġamaġikau ġoirarai eruġa-taġoni
tana ġabia.

¹⁹ Mo tuġamaġikau taġabiato tu ġita ġera maġuri eġabi-tariani dagarana.
Mai tuġamaġikau tu moġonina e asi eirauni. Ġia tu vekouġau dabuġana
na murina ġana eraka-toġani, eiaġoni mo, veaġa lelevaġi daiġutuna nuġana
ġana.

²⁰ Mo ġana tu Iesu eiaġo-ġuinetu ġita bene vaġa-maġurira uranai. Ġia tu Melkisedek ġena dabarai Rubu Veaġa verena baregonai betanu-vanaġi vanaġini.

7

Melkisedek tu Rubu Veaġa verena baregona

¹ Mai Melkisedek tu Salem vanuġa barana verena, ema ġia tu Iarukorokoro Barauna ġena Rubu Veaġa verena. Ġia na Aberahamo edoġariato, vanuġa barari ġeri vere baregori o kini tari vetari ai evaġirito, benamo eġenoġoito-ġoi nuġanai, Aberahamo evaġa-namoato.

² Ema Aberahamo na vetari ai eġabirito farefareri, karava gabanana (10) eveirito, benamo karava ta Melkisedek eviniato. Melkisedek arana anina ġiniguinena tu “Veiġa Iobukaiobuka Verena”, ma arana ta tu “Salem Verena”, moġa anina tu “Maino Verena”.

³ Ġia asi tamana, asi sinana, asi besena ta, ema ġena maġuri evesinato ġarona e ġena maġuri emagoto ġarona maki asiġina. Ġia tu Barau Natuna kavana etanuni, Rubu Veaġa verena vanaġivanagi.

⁴ Melkisedek ġoġitaia, ġia tu tarima arana barego lelevaġi, korana Aberahamo tu senera baregona na maki vetari ai eġabirito farefareri karava gabanana (10) ġerina ta ġia eviniato.

⁵ Taravatu ekirani, Levi besena Rubu Veaġa verena dagina beġe ġabiani tarimari tu karava gabanana ġerina ta beġene gogo Isaraela tarimari ġerina, mo tu tarikaka ġerina. Moġoni, tarikakari maki Aberahamo ġena bese tarimari, senaġina ġia ġerina beġene gogo.

⁶ Melkisedek senena tu dia Levi ġenana eiaġomato, senaġina Aberahamo ġenana karava ta eġabiato. Ma ġia na Barau ġena kiraġitore eġabiato tarimana evaġa-namoato.

⁷ Asi bita daradara-iaġiani, tarima baregona na tarima keina vevaġa-namo eviniani.

⁸ Levi senena, karava gabanana ġerina ta ġeġabiato doġorori, tu ma ġemaseto-ġoi. A Melkisedek na maki karava ta eġabiato, senaġi ġia tu Buka Veaġa na ekiraġiani asi emaseto.

⁹ Benamo maiġesi ma nakira, Levi maki karava gabanana ġerina ta ġeġabiato-ġoi tarimana. Ġia na Aberahamo ġenana Melkisedek karava ta ma evini-ġoiato.

¹⁰ Korana Melkisedek na Aberahamo eġoitaġoato ġaronai tu, Levi tu roġosi roġo bene maġuri, roġo ġatana Aberahamo tauġaninai.

Iesu tu Melkisedek kavana

¹¹ Ġuinenai Barau na Isaraela tarimari taravatu evinirito. Mo taravatu ekirani, Levi besena na ġinitaġo veaġa ġauveina beġene veia. Senaġi bema Levi besena ġeri Rubu Veaġa verena ġenana e ġeri ġauvei seġukana na mo namo vedaurea beġere ġabia nai tu, kara dainai Barau tu ma ekirato, Rubu Veaġa verena ta ma betuġuani Melkisedek ilailanai, ma dia Arona kavana?

¹² Korana bema ġinitaġo ġauveina ġeveiani tarimari ġeri doġoro ġesenisito nai tu, taravatu maki besenisini.

¹³ Korana Iesu mai takiraġiani tarimana tu irau doġoro. Ġia ġena doġoro tarimana ta fata veaġana iatanai ġinitaġo ġauveina asi eveito.

¹⁴ Korana ribara, ġita ġera Vereġauka tu Iuda besena na emaġurito. Ma Mose na Rubu Veaġa vereri ekiraġirito-ġoi nai tu, Iuda doġorona tu asi ekiraġiato.

¹⁵ Ema kara bita kiraġia toma tu bita ġitafaka-ginikauani, korana Rubu Veaġa verena ta ma befofori Melkisedek kavana.

¹⁶ Ġia tu dia senena kavari, taravatu seġukanai Rubu Veaġa verenai eiaġoto, senaġina maġuri vanaġivanaġi ġenana eiaġomani seġukana na Rubu Veaġa verenai eiaġoto.

¹⁷ Korana Barau na maiġesi ekiraiato, ekirato,
 “Ġoi tu Rubu Veaġa verenai
 botanu-vanaġi vanaġini
 Melkisedek kavana.”

¹⁸ Mo taravatu guinena tu etore-veġitaiato, korana ġia tu asi seġukana ema asi bevevaġa-maġurini riba.

¹⁹ Korana Mose ġena taravatu na dagara ta tu asi evaġa-namo vedaurea-iato. Moġesina naima Barau na tuġamaġikau lagilagina ta ma etore-rosiato, moġa ġenana ġita Barau sevina ġana bita raka-kavini.

²⁰ Barau na Iesu tu guruġatore guruġana gwaġiġina eveiato vau, Rubu Veaġa verenai etoreato! A Rubu Veaġa vereri mabarari ġeri ai tu guruġatore ta asi eveiato.

²¹ Senaġi Iesu Rubu Veaġa verenai eiaġoto tu Barau na guruġatore gwaġiġina eveiato vau. Barau na maiġesi ekiraiato,
 “Vereġauka tu eguruġa-foforito
 ma ġena tuġamaġi asi ma bekefoani:

‘Ġoi tu Rubu Veaġa verenai botanu-vanaġi vanaġini.’ ”

²² Mai guruġatore guruġa gwaġiġina lorinai, Iesu tu ginitaġo variġuna ma namona korikori vaġa-moġoninai eiaġoto.

²³ Guinenai Rubu Veaġa vereri tu vovoka, korana tu ġemaseto-ġoi, be ta Rubu Veaġa verenai asi etanu-rovaġito.

²⁴ A Iesu tu etanu-vanaġi vanaġini lorinai, ġia tu Rubu Veaġa verenai betanu-rovaġini.

²⁵ Moġa lorinai deikara ġia ġenana Barau ġenai beġe iaġoni tu bevaġa-maġuririni riba. Korana Iesu tu ġia urari ai Barau ġenai bene ġauġau ġana etanu-vanaġi vanaġini.

²⁶ Maiġesi Rubu Veaġa verena baregona na ġita ġera ura dagarari evinirani. Ġia tu veaġa, asi ġena vei-rakava, vetoukau ta ġenai asiġina, namo vedaurea; ġia tu vei-rakava tarimari kavana asiġi. Ma Barau na guba tuġuna korikorinai ea toreato.

²⁷ Ġia tu dia guinenai Rubu Veaġa vereri baregori kavana, ġaro korikoriri ai varevare dagarari bevinini. Guine tu ġia ġena vei-rakava Barau na bene tuġamaġi-fitoġari ġana evinito, ma moġa murinai tu tarimarima ġeri rakava Barau na bene tuġamaġi-fitoġari ġana. Ġia tu vaġa-sebona moġo tarimarima ġeri vei-rakava ġana ginitaġo varevarena eviniato. Moġa tu ġia tauġena ginitaġo varevarenai eiaġoto, benamo Barau ġenai evevini-raġeto.

²⁸ Mose ġena taravatu na tu ma ġeri moira tarimari Rubu Veaġa verena baregonai etorerito-ġoi. Senaġina Barau ġena guruġatore guruġana gwaġiġina, Mose ġena taravatu murinai ema foforito dagarana, na tu Barau Natuna evaġa-ruġaiato. Ġia tu Barau na evaġa-namo vedaureaiato, ma namo vedaurea betanu-vanaġi vanaġini.

8

Iesu tu ġita ġera Rubu Veaġa verena baregona

1 Ġai na kara ġakiraġiani tu maiġa. Ġita tu ma ġera Rubu Veaġa verena baregona. Ġia tu gubai Iaru-korokoro Barauna ġena terona aroribanai etanu-tarito.

2 Barau ġena veaġa gabuna nuġanai eġauveini. Mo tu farai rubuna korikori Vereġauka na eragaiato, dia tarimarima na ġeragaiato.

3 Rubu Veaġa vereri baregori mabarari tu ġevaġa-ruġarito, varevare dagarari ema boromakau, mamoe, manu beġene vini ġana. Moġa lorinai mai Rubu Veaġa verena baregona, Keriso, maki ma ġena dagara tari, bene vini ġana.

4 Bema ġia tanobarai bere tanu tu, Rubu Veaġa verenai asi bere iaġo, korana tu maiġa, Rubu Veaġa vereri tu varau ġetorerito maiġeri, varevare dagarari ġevini-tanuni, Iuda ġeri taravatu ekiraġiato ilailanai.

5 Ġia varevare dagarari mainai veaġa lelevaġi daiġutunai ġevinini tu, gubai mo veaġa lelevaġi daiġutuna kavana e vetoġana moġo. Moġesina nai Barau na Mose toma-rakariġo ġana farai rubuna bene ragaia ġana, naima ekira-toreġauato, ekirato, “Bono ġitaia, dagara mabarari boveirini nai tu, ġoro ai avaġa-ġitamuto ilailanai moġo bono veiri.”

6 Senaġina toma Iesu na ginitaġo varevareri vini-toreġau veiġana guinenai Rubu Veaġa vereri ġeri ġauvei evanaġiato. Korana Barau ġena kiraġitore variġunai Iesu tu Barau e tarimarima vekaravari ai eruġani, ginitaġo variġuna bene vaġa-seġukaia ġana, ma mai ginitaġo na mo ginitaġo guinena seġukana evanaġiani. Ema Barau ġena kiraġitore variġuna na mo ginitaġo guinena kiraġitorena maki evanaġiato.

7 Bema mo ginitaġo guinena asi ġena rakava tu, Barau na ginitaġo variġuna ta asi ma bere kiraġia.

8 Senaġina Barau na tarimarima ġeri ai rakava eġoitaġoto naima ekirato, “Vereġauka eguruġa-foforini, ‘Boġono seġaġi, ġaro ta mani eiaġomani, au na ginitaġo variġuna ta ma haveiani, Isaraela besena e Iuda besena ġeri.

9 1 Mai ginitaġo tu dia guinenai ġia seneri ġeri aveiato moġa kavana.

Dia mo ġaro ai ġimari ai aġabito, benamo Aigupito na aġori-rosirito ginitaġona kavana.

Korana ġia tu au ġegu ginitaġo ġenai

asi ġevetuġamaġikauni naima,

au na araga-kwanerito,’

Vereġauka tu moġesina eguruġani.

10 Vereġauka ma ekirani,

‘Ġoira ġarori ai au na mai ginitaġo Isaraela besena ġeri ma haveiani:

Au ġegu taravatu ġia debari ai batore-toġarini ema ġia nuġari ai batorerini.

Au tu ġia ġeri Barau ai baiaġoni ema ġia maki au ġegu tarimarimai beġe iaġoni.

11 Tarima ta na sevinai etanuni tarimana asi ma bevaġa-ribaiani,

ema tarima ta tarikakana asi bekiraiani,

‘Vereġauka noribaia!’

Korana mabarari na beġe ribaguni,

misina na beiaġoni mo baregona.

12 Ġeri kira-sirivaġi batuġamaġi-fitoġarini,

ema ġeri rakava mabarari asi ma batuġamaġirini.’ ”

¹³ Barau na mai ginitaḡo maiḡa ekiraḡiani, “ginitaḡo variḡuna” etoni nai tu, ḡia na mo ginitaḡo tovotovonai moḡa tu guinena na ekiraḡiani. Ma kara eguinenani e erakavani tu asikauna berekwarekwani.

9

¹ Ginitaḡo guinena tu ma ḡena taravatu misimisiri toma-rakariḡo ḡana, ema ma ḡena gabu veaḡana maki. Mo gabu veaḡana tu tanobarai etanuni dagarana.

² Barau toma-rakariḡona ḡana farai rubuna ta ḡeragaiaito. Mo farai rubuna nuḡanai daiḡutu giniguinena tu Veaḡa Gabuna ḡetato. ḡia nuḡanai tu lamefa torekauna dagarana, teibolo e Barau ḡeviniato berediri.

³ Kouḡau dabuḡana vaḡa-ruaruana murinai tu daiḡutu ta maia. Moḡa tu Veaḡa Lelevaḡi Gabuna ḡetato.

⁴ ḡia nuḡanai tu golo fatana, goḡu ma bonana iatanai beḡene vei ḡana, ema Kiraḡitore Mauḡana; ḡia murikana mabarana tu golo na ḡeveiato. Ma mauḡa nuḡanai tu golo ḡurona ta, nuḡana ma manana e Arona ḡena togoi, egarakauto dagarana, ema fore ruarua Barau na iatari ai taravatu etoreto foreri.

⁵ Mo mauḡa iatanai tu kerubi ruarua ḡevaḡa-ruḡa veḡoirarito. Mo kerubi tu ḡau garagarari, vetoḡari tu aneru kavari. Ta tavi ta dudu ai ḡevaḡa-ruḡaiato, ma ta maki tavi ta dudu ai, ma faneri ḡekeorito, benamo rakava voivaḡiri gabuna ḡegoru-tariato. Mo kerubi ruarua na tu Barau ḡena mareva baregona ḡekiraḡiani. Senaḡi maiḡeri dagara misikoseri mabarari tu toma asi baḡa kiraḡirini.

⁶ Dagara mabarari moḡesi ḡeveirito murinai, Rubu Veaḡa vereri ḡaro vanaḡivanaḡi daiḡutu giniguinena nuḡanai ḡeraka-toḡato-ḡoi, benamo ḡeri ḡauvei ḡeveirito-ḡoi.

⁷ Senaḡi rubu verena baregona ḡereḡana moḡo laḡani ta nuḡanai vaḡa-sebona daiḡutu vaḡa-ruaruana nuḡanai eraka-toḡato-ḡoi. ḡena rakatoḡa ḡarori mabarari ai tu rara maki eḡabi-taḡoato-ḡoi. Mo rara ḡia na tu rakava tuḡamaḡi-fitoḡari ḡana ginitaḡo dagarana evaḡa-iaḡoato-ḡoi. Guine tu ḡia ḡena rakava ḡana evinito-ḡoi ema murinai tu tarimarima ḡeri rakava ḡana. Mo rakava tu asi ribari nai ḡeveirito-ḡoi rakavari.

⁸ Iauka Veaḡa na maiḡeri veḡa mabarari ḡerina ḡita tu maiḡesina evaḡa-guruḡarani: Bema Barau toma-rakariḡona ḡana farai rubuna giniguinena roḡo eruḡa-taḡoni nai tu, Veaḡa Lelevaḡi Gabuna rakatoḡa dabarana tu roḡosi roḡo bene vekeo.

⁹ Mo farai rubuna tu toma mai negai kara beḡe ḡorani evaḡa-foforiani. Mai farai rubuna nuḡanai varevare dagarari e ginitaḡo dagarari vaḡa-ilailana boromakau, mamoe, manu Barau ḡeviniato-ḡoi dagarari mabarari na ḡetoma-rakariḡoto-ḡoi tarimari nuḡari asi ilaila beḡe iarevarini.

¹⁰ Korana mo Barau ḡeviniato-ḡoi dagarari tu ḡaniḡani e niuniu dagarari, ema tarima beḡene iareva ḡana veḡuriḡi maḡuriri irauirau. Mai tu mabarari tauḡani taravaturo moḡo. Barau na tarimarima evinirito beḡene korana-iaḡiri, bene iaḡo mo, ḡaro ta, dabara variḡuna bevaḡa-ruḡaiani.

Iesu rarana

¹¹ Senaḡi Keriso tu dagara namori ḡema-foforito ḡeri Rubu Veaḡa verena baregona. ḡia tu farai rubuna barana e namo vedaureana nuḡana na eraka-toḡato. Dia tarimarima na ḡeragaiaito farai rubuna, korana mo farai rubuna tu dia mai tanobara dagarana.

12 Keriso tu dia nanigosi o boromakau naturi rarari seḡukari ai mo rubu ai eraka-toḡato. Senaḡi ḡia tu ḡia rarana seḡukanai Veaḡa Lelevaḡi Gabuna nuḡanai vaḡa-sebona moḡo eraka-toḡato. Benamo ḡita eḡabivaḡi-moḡovaḡirato rakava ḡena seḡuka na.

13 Nanigosi ma boromakau rarari ema boromakau natuna variḡuna ḡegabuato kauna, Rubu Veaḡa vereri na vei-rakavai ḡemiroto-ḡoi tarimari iatari ai misimisiri ḡefiu-kaurito-ḡoi. Moḡesina ḡeveirito-ḡoi tu tarimarima tauḡaniri ḡevaḡa-veaḡarito-ḡoi Barau ḡoiranai.

14 Senaḡi Keriso rarana na moḡeri evanaḡirito. Korana ḡita nuḡara, mase ḡevaḡa-ḡoraiani ḡauveiri ḡerina, eiarevarato, maḡuri Barauna ḡena vetuḡunaḡi bitana iaḡo-vini ḡana. Keriso tu asi vetoukauna ta, tauḡena tanu-vanaḡivanaḡi laukana ḡenana evevinito Barau ḡenai.

15 Ginitaḡo variḡuna nuḡanai Keriso tu Barau e tarimarima fakari ai eruḡani. Korana tu Barau na ekearito tarimari mabarari na ekiraḡi-toreato maḡuri vanaḡivanaḡina beḡene ḡabia. Moḡesi nai Keriso emaseto, tovotovona ginitaḡona nuḡanai tarimarima ḡevei-rakavato ḡeri rakava na bene ruḡa-vaḡiri ḡana.

16 Tarima ta roḡosi bene mase nuḡanai, beurani bene guruḡa-fofori, bemaseni nai tu, natuna na ḡena farefare bene ḡabiri. Mo ura o guruḡa-fofori tu fefai betoreani ḡia ḡena kiraḡitore guruḡana. Natuna na mo farefare asi roḡo beḡabirini bene iaḡo mo, tamana ḡena mase tarimarima ḡoirari ai bevaḡa-moḡoniani vau.

17 Korana tu mo ura ḡetoreani fefana tu eguruḡa-foforini tarimana bemaseni vau ma ḡena seḡuka, a bema ḡia roḡo maḡuri tu, mo ura ḡetoreani fefana tu asi seḡukana.

18 Moḡesina nai ginitaḡo giniguinena maki rarana vau evaḡa-seḡukaiato-ḡoi.

19 Korana Mose na taravatu guruḡari mabarari tarimarima ḡeri evarifiu-ḡosiato-ḡoi murinai, boromakau naturi variḡuri e nanigosi rarari eḡabirito-ḡoi, benamo nanu ḡesi egiro-sebonarito-ḡoi. Moḡa murinai isopo legana vulu kakakakana na ḡebaruato dagarana mo rara ma nanunai efereiato-ḡoi. Benamo Mose na mo isopo legana ma vulunai rara tu taravatu bukana e tarimarima iatari ai efiu-kaurito-ḡoi.

20 Mose ekirato, “Mai rara tu ginitaḡo vaḡa-moḡonina dagarana Barau na ekiramito boḡono korana-iaḡia.”

21 Farai rubuna ema mo rubu nuḡanai toma-rakariḡo ai ḡeḡauvei-iaḡirito-ḡoi farefareri mabarari iatari ai veḡa sebona eveiato-ḡoi. Iatari ai rara misimisiri efiufluauto-ḡoi.

22 Moḡoni, taravatu ekirani ilailanai, dori dagara mabarari tu rara na beḡe iarevani. Korana rara asi beriḡoni nai tu, vei-rakava tuḡamaḡi-fitoḡari maki asiḡina.

23 Senaḡina maiḡeri mai tu guba dagarari iouiouri moḡo maiḡesi ḡeiarevarini. A gubai korikoriri ḡetanuni dagarari iareva-iarevari ḡana ginitaḡo varevarena tu namona lelevaḡi. Maiḡeri ginitaḡo varevareri evanaḡirini.

24 Korana Keriso tu dia tarimarima na ḡeveiato veaḡa lelevaḡi daiḡutuna nuḡanai eraka-toḡato. Iesu tu guba korikorinai eraka-toḡato. Ma maitoma tu ḡita urarai Barau ḡoiranai efoforini. Mo tarima na ḡeveiato moḡa tu gubai veaḡa lelevaḡi daiḡutuna moḡo ḡevaḡa-ilailaiato.

25 Rubu Veaḡa verena baregona tu laḡani tata nuḡari ai Veaḡa Lelevaḡi Gabunai rara eḡabi-toḡato-ḡoi. Keriso moḡesina tu asi eveini. Ḗia tu dia

gubai eraka-toġato murinai vau vanaġivanaġi tauġena ginitaġo varevarenai eiaġoni, benamo Barau ġenai evevinini.

²⁶ Moġesina tu tanobara evesinato na veġata bene midigumidigu. Senaġi mai tanobara magona eġabi-iaġoani, mainai vau vaġa-sebona moġo ema foforito. Mo tu ginitaġo varevarenai evevaġa-iaġoto rakava bene ġabi-veġitari ġana.

²⁷ Evetoreto, tarimarima mabarari tu vaġa-sebona moġo beġe maseni, ma murinai tu Barau na bevaġa-kotarini.

²⁸ Keriso kavana vaġa-sebona moġo ginitaġo dagaranai eiaġoto, tarimarima mabarari ġeri rakava bene ġabi-veġitari ġana. Senaġi ġia tu ma bema-fofori ġenoġoini. Mo tu dia rakava ma benema ġabi-vaġiri ġana, senaġina deikara ġia ġenari-taġoani tarimari vaġa-maġuriri ġana.

10

Ginitaġo guinena na rakava asi beġabi-veġitarini

¹ Mose ġena taravatu tu dagara namori vau beġe ġorani iouiouri moġo, dia dagara tauri korikori. Ġia na mo ginitaġo dagarari laġani laġani ġevinito-ġoi, senaġina mo ginitaġo dagarari na toma-rakariġo ġeiaġoto-ġoi tarimari asi evaġa-namo vedaurearito.

² Bema mo ginitaġo dagarari na ġetoma rakariġoto-ġoi tarimari beġere vaġa-namo vedaureari nai tu, asi ma beġere ginitaġo-ġenoġoi. Korana ġia tu ġere iareva-moġovaġi, ema ma ġeri vei-rakava guineri mamiraġiri asi ma ġere ġabi-ġenoġoiri.

³ Senaġi mo ginitaġo veiġari laġani tatai ġeveirito-ġoi veiġari na tu mo laġani tata nuġari ai ġevei-rakavato-ġoi, moġeri ġekira-vararito-ġoi.

⁴ Korana tu boromakau e nanigosì rarari na rakava tu asi ilaila beġabi-veġitarini.

⁵ Moġa lorinai Keriso tanobara ġana eiaġomato nai tu ekirato, “Ġoi tu ginitaġo dagarari vaġa-ilailana boromakau, mamoe, nanigosi ema varevare dagarari asi ourani, senaġi tauġani ta ovei-toreato au ġegu.

⁶ Karava na boromakau, mamoe, nanigosi eġararini, ema vei-rakava bono ġabi-vaġiri ġana ginitaġo varevareri ġeveini ġeri ai maki asi oiakuni.

⁷ Moġesi naima au akirato, ‘Barau o, au tu iniġegu, Buka Veaġai tu au ġekiraġiguto, au baiaġoma tu ġoi ġemu ura bana veia ġana.’ ”

⁸ Keriso ġena guruġa giniguinena tu maiġa, “Ġoi tu ginitaġo dagarari e varevare dagarari asi ourani. Karavai ġegaburini varevareri e vei-rakava bono ġabi-vaġiri ġana ginitaġo varevareri ġeveini maki asi oura-vinirini, ema ġeri ai asi oiakuni.” Maiġeri veiġa tu taravatu na ekiraġirini ilailanai, senaġi ġoi na tu asi oiaku-iaġirini.

⁹ Moġesi nai ma ekirato, “Barau o, au tu iniġegu, au baiaġoma tu ġoi ġemu ura veiġana bana veia ġana.” Benamo ginitaġo veiġana giniguinena etore-veġitaiato, benamo moġa gabunai tu ta ma evaġa-ruġaiato.

¹⁰ Benamo Barau ġena ura lorinai, Iesu Keriso tauġanina ginitaġo dagaranai evaġa-iaġoato vaġa-sebona moġo. Benamo monana ġita evaġa-veaġarato.

¹¹ Rubu Veaġa vereri mabarari ġaro vanaġivanaġi tata ġeruġa-tarito-ġoi, benamo mo ginitaġo ġauveiri ġeveirito-ġoi. Senaġi ġeri ginitaġo dagarari tu

dagara sebori moĝo ĝevinito-ĝoi vanaĝivanaĝi. Ema mo ginitaĝo dagarari na rakava tu asi ĝeĝabi-veĝitarito-ĝoi.

¹² Senaĝi Keriso na rakava ĝabivaĝiri ĝana tu ginitaĝo sebona moĝo eveiato ĝaro mabarari ĝana. Benamo moĝa murinai Barau ĝimana aroribanai ea tanu-tarito.

¹³ Mo negai beiaĝoma maitoma tu evenarini, beiaĝoni mo, ĝia ĝevetari-viniani tarimari mabarari Barau na ĝia kwakuna fanakauna dagaranaĝi betore-taririni.

¹⁴ Korana ginitaĝo dagarana sebona na moĝo evaĝa-veaĝarito tarimari evaĝa-namo vedaurearito. Ma ĝia tu namo vedaurea beĝe tanuni, vanaĝivanaĝi.

¹⁵ Iauka Veaĝa na maki evaĝa-ribarani. Guine tu ekirato,

¹⁶ “Vereĝauka ekirani,

‘Moĝeri ĝaro muriri ai,

au ĝia ĝeri tu mai ginitaĝo haveiani.

Au ĝegu taravatu ĝia nuĝari ai batore-toĝarini,

ema ĝia debari ai baberarini.’ ”

¹⁷ Ema ma ekirato,

“Ĝia ĝeri vei-rakava e veiĝa ĝeĝevaĝeĝevari asi ma batuĝamaĝi-ĝenoĝoirini.”

¹⁸ Maĝeri etuĝamaĝi-fitoĝarito nai tu, rakava ĝabi-veĝitari ĝana varevare dagarana ta tu asiĝina maia.

Barau sevina ĝana siraka-kavi ma tuĝamaĝi kokorera ĝesi

¹⁹ Moĝa lorinai, tarikakagu, ĝita tu nuĝara gwaĝigi Iesu rarana ĝenana Veaĝa Lelevaĝi Gabunai bita raka-toĝani.

²⁰ Mo vekouĝau dabuĝana o ketin evedare-kikimato, monana Keriso na ĝita ĝera maĝuri dabarana variĝuna ekeo-fakaiato. Mo vekouĝau dabuĝana tu Keriso tauĝanina.

²¹ Ĝita tu ma ĝera Rubu Veaĝa verena baregona, Barau ĝena numa eĝita-taĝoani.

²² Ĝita nuĝara tu eiarevarito rakava mamiraĝiri ĝerina, ema tauĝanira maki nanu namo vedaureana na eĝuriĝirito. Moĝesi naima Barau ĝenai siraka-kavinaĝi nuĝara ma moĝoniri ĝesi e ma ĝera veĝabidadama korikoriri ĝesi.

²³ Ĝera tuĝamaĝikau tavaĝa-moĝoniani dagarana ĝenai tana veĝabi-gigitari, asi tana ĝareva-ĝareva. Korana Barau na kara ekiraĝi-toreato tu beveiani.

²⁴ Ema karora bitana tuĝamaĝiri kamasi tata bita vaĝa-kavarini, benamo beĝe veura-vinini, ema ĝauvei namori beĝe veini.

²⁵ Ĝita ĝera raka-vegogo ai bitana fofori-ĝoi, asi bitana tanu, tari ĝeveini kavana. Senaĝi karora ĝesi velaunaĝi bitana vaĝa-baregoa. Korana tu tauĝemi na varau ĝoĝitaiani, Keriso ĝena iaĝoma ĝarona tu mai ekavinaĝi-rakavani.

²⁶ Bema guruĝa moĝonina taribaiani murinai, ma taĝiĝiraĝeni, benamo tavei-rakavani nai tu, bitana riba, rakava ĝabi-veĝitari ĝana, ginitaĝo dagarana ta tu asiĝina maia.

²⁷ Senaĝi ma garira ĝesi kara ĝoirai ĝerai beĝorani, moĝa moĝo bitana nari-taĝoa. Mo tu Barau ĝena Kota Baregona, ema Barau ĝevetari-viniani tarimari e iaukari beĝararini karavana.

²⁸ Tarima ta na Mose ĝena taravatu asi ekorana-iaĝiato-ĝoi, benamo ĝeĝita-kauato-ĝoi tarimari ruarua o toitoi na ĝekiraĝi-foforiato-ĝoi. Mo tarima tu ĝevaĝi-maseato-ĝoi, asi ĝevetuĝa-ĝwaiato-ĝoi.

²⁹ Ĝomi ĝotuĝamaĝini, Barau Natuna deikara na kwakuna fanakauna dagaranaĭ evaĝa-iaĝoani tarimana tu kamasi? Mai tarima tu rakava voina baregona beĝabiani. Ĝia na tu mo ginitaĝo rarana, ĝia evaĝa-veaĝaiato dagarana, asi veaĝa raranai evaĝa-iaĝoani. Ema varevare-bara Iaukana ĝenai maki veiĝa rakava kwaikwaina eveiani.

³⁰ Korana ĝita ma ribara Barau ekirato, “Rakava voina tu au na bavaĝa-voiani, au na bavini-ĝenoĝoiani.” Ema ma ekirato, “Vereĝauka na ĝena tarimarima beĝita-viriĝirini.”

³¹ Maĝuri Barauna ĝimanai boketo-raĝeni tu garina maki asikeikeina.

³² Ĝaro guineri ĝotuĝamaĝi-ĝenoĝoiri. Barau ĝena mama ĝoĝabiato murinai, midigumidigu barego ĝodoĝarito, senaĝi ĝoruĝa-gigitarito.

³³ Negatari ai tu ĝutuma bara ĝoirari ai ĝevaĝa-maiakamito-ĝoi, ma ĝevaĝa-midigu midigumito-ĝoi. Ema negatari ai tu ĝomi kavana ĝevaĝa-midigu midigurito-ĝoi tarimari seviri ai ĝoruĝa-tarito-ĝoi, ĝoruĝa-duku dukurito-ĝoi.

³⁴ Ĝediburarito tarimari ĝesi ĝomidigumidigu sebonato-ĝoi, ema ĝemi farefare ĝeverarimito-ĝoi maki ĝoiaku-iaĝirito-ĝoi moĝo. Korana ma ribami, ĝomi tu ma ĝemi farefare namori, beĝe tanu-vanaĝi vanaĝini dagarari.

³⁵ Moĝa lorinai ĝemi tuĝamaĝi kokore maniĝa asi boĝono fitoĝari. Korana maniĝa voina tu barego lelevaĝina boĝoa ĝabiani.

³⁶ Boĝono vevaĝa-gwaĝiĝi, korana Barau ĝena ura veiĝana boĝo vaĝa-koriani murinai tu, kara ekiraĝi-toreato mabarana boĝo ĝabiani.

³⁷ Korana Buka Veaĝa ekirani,

“Nega tu misina moĝo,

ma beiaĝomani etoni tarimana tu beiaĝomani, asi bekwaiboni.

³⁸ Au ĝegu vei-iobukaiobuka tarimana tu ĝena veĝabidadama lorinai be-maĝurini.

Senagi murina ĝana ma beraka-ĝenoĝoini nai,

au tu asi baiakuni ĝia ĝenai.”

³⁹ Senaĝi ĝita tu murira ĝana asi ma bita raka-ĝenoĝoini, benamo bita rekwarekwani. Asiĝina, ĝita tu ma ĝera veĝabidadama, be maĝuri bita ĝabiani.

11

Veĝabidadama tarimari

¹ Veĝabidadama anina tu mai-ĝesi. Tatuĝamaĝi-dadamaĝirini dagarari tavaĝa-moĝoni korikoririni. Matarai roĝosi bitana ĝitari, senaĝina tavaĝa-moĝoni korikoririni, moĝeri dagara tu moĝoni ema bita ĝabirini.

² Sene tarimari tu ĝeri veĝabidadama lorinai, Barau na eĝabi-raĝerito.

³ Taveĝabidadamani lorinai taribani, Barau eguruĝato, benamo guba e tanobara evetoreto. Moĝa lorinai mai taĝitarini dagarari tu Barau na asi taĝitarini dagarari ĝerina eveirito.

⁴ Abela tu ma ĝena veĝabidadama Barau ĝenai lorinai, Barau eviniato varevare dagarana na Kaino ĝena varevare dagarana evanaĝiato. E ma ĝena veĝabidadama lorinai, Barau na ĝena varevare dagarana ekiraĝiato varevare namona ema Barau na evaĝa-moĝoniato ĝia tu vei-iobukaiobuka tarimana. Ma Abela tu varau emaseto, senaĝina ĝena veĝabidadama lorinai roĝo eguruĝani.

Abela, Enoka, Noa

⁵ Enoka ma ġena veġabidadama lorinai, Barau na eġabi-varaġeato moġo, asi emaseto. Ma tarimarima na maki asi ġedoġariato, korana Barau na eġabi-vaġiato. Roġosi bene ġabi-veġitaia nuġanai, Barau ġena bukai ekirani, Enoka na Barau iauna evaġa-iaukuato.

⁶ Asi ġena veġabidadama tarimana na Barau tu asiġina ġinavaġi bevaġa-iaukuani. Korana deikara Barau ġenai eiaġomani tarimana tu bene vaġa-moġoni Barau tu maġuri etanuni. Ema Barau ġevetauani tarimari mabarari tu voiri namori Barau na bevinirini.

⁷ Noa ma ġena veġabidadama lorinai, Barau na ġoirai beġe ġorani dagarari ekira-toreġauato. Mo tu Noa na roġosi bene ġitari dagarari. Noa na Barau evaġa-moġoniato, benamo ma garina ġesi bouti ta eragaiato, ġaraġona e natuna bene vaġa-maġuriri ġana. Ġia ġena veġabidadama na tanobara tarimari ekiraġi-foforirini rakava tarimari. Ma ġia tu ġena veġabidadama lorinai Barau na ekiraiato vei-ġobukaiobuka tarimana. Mai vei-ġobukaiobuka tu veġabidadama ġenana eiaġomani dagarana.

Aberahamo

⁸ Aberahamo ma ġena veġabidadama lorinai, Barau na ekeaiato nai eseġaġiato. Barau na ekeaiato tu ġena vanuġa bene raga-kwaneana, ma Barau na tanobara ta ma beviniani, mo ġana bene iaġo. Benamo Aberahamo eraka-rosito moġo, asi ribana aiġana eiaġoni senaġi eiaġoto moġo.

⁹ Ma ġena veġabidadama lorinai, Barau na ekiraġi-toreato tanobaranai ea vanuġato. Ma monai tu noġa moġo tanukau tarimana ta tanobara borunai etanuni kavana. Isako e Iakobo kavana farai numari ai ġetanuto-ġoi. Maiġeri tarima toitoi tu Barau ġena kiraġitore ġeġabiato.

¹⁰ Korana Aberahamo tu vanuġa baregona evaġa-nogaiato-ġoi. Mo vanuġa tu fore baregona iatanai beruġakauni. Mo vanuġa tu Barau tauġena na beboiġaiiani e beragaiiani.

¹¹ Veġabidadama lorinai Sara na kokore eġabiato bene ġabi ġana, ema eġauka-rakavato, senaġi mero keina evaġa-maġuriato. Ġia ma ribana, Barau na kara ekiraġi-toreato dagarana tu beġorani.

¹² Benamo mai tarima sebona eġauka-rakavato, senaġi ġia ġenana senena ġemaġurito tu guba visiguri kavana vovoka tabutabu, ema kone mirina kavana asi iavi-iavina.

¹³ Maiġeri tarimarima mabarari tu veġabidadamai ġetanuto-ġoi nuġanai ġemaseto. Barau na ekiraġi-torerito dagarari ġia na tu asi ġeġabito, senaġi manaġai moġo ġeġita-quinerito, benamo ġeġabi-raġerito. Ema ġeguruġa-foforito ġia tu tanobara boruna tarimari. Ġia mai tanobarai tu ġetanukauni moġo.

¹⁴ Moġesina ġeguruġani tarimari tu ġeri guruġa na ġevaġa-foforirini, ġia tu ġeri tanobara korikorina ġevetauani.

¹⁵ Bema ġeraga-kwaneato tanobarana ġere tuġamaġi-ġenoġoia nai tu, ma dabara ġere ġenoġoi.

¹⁶ Senaġi ġia tu tanobara namo vedaureana ġeuravini-rakavaiato-ġoi. Mo tu gubai etanuni dagarana. Moġa lorinai Barau tu asi emaiakaiiani, ġia ġeri Barau ġetoni nai, korana Barau na ġeri vanuġa baregona ta eraga-toreato.

¹⁷ Aberahamo tu ma ġena veġabidadama. Moġesina nai Barau na etovonaġiato nai tu, natuna Isako ginitaġo dagarana evaġa-iaġoato, benamo Barau ma evarevare-viniato. Aberahamo ribana, Barau na kiraġitore tu ġia eviniato, senaġina ġia natuna sebona kwariġutu moġo tu ginitaġo dagarana ġana bene vaġia etato.

¹⁸ Barau na Aberahamo maki maigēsina ekiraiato, ekirato, “Isako ġenana moġo ġoi senemu beġe maġurini.”

¹⁹ Aberahamo etuġamaġito tu Barau na Isako ma bevaġa-maġuri ġenoġoiani riba. Moġesina naima inigēsina ma sikiraġia: Aberahamo na Isako mase na eġabi-ġenoġoiato.

Isako, Iakobo, Iosefa

²⁰ Isako ma ġena veġabidadama lorinai, Iakobo e Esau evaġa-namorito, ema ġeri ai vau beġea ġorani dagarari ekiraġirito.

²¹ Iakobo ma ġena veġabidadama lorinai, dori emaseto-ġoi nuġanai tu Iosefa natuna ruarua evaġa-namorito, ema ġena toġoi ġenai eveġabiritoġoto, benamo Barau etoma-rakariġo viniato.

²² Iosefa ma ġena veġabidadama lorinai, eġauka-dorudoruto, dori emaseto-ġoi nuġanai tu, Isaraela tarimari Aigupito na beġe raka-vaġini ekiraġiato, ema turiġana kamasi beġene veia guruġana evinirito.

Mose

²³ Mose tamana e sinana Barau ġenai tu ma ġeri veġabidadama. Moġa lorinai Mose emaġurito ġaronai ġeġitaiato mero keina namona korikori, benamo kini ġena guruġa garina tu asi ġeveito. Senaġi tamana e sinana na ġeġabiato, benamo numa nuġanai ġue toitoi ġetore-gumuato.

²⁴ Mose ma ġena veġabidadama lorinai, ebareġoto nai tu asi eurato beġene kira, ġia tu Pharao natuna ġuiatona natuna merona.

²⁵ Ġia tauġena eurato, Barau ġena tarimarima ġesi beġene vaġa-midigumidigu sebonaia. Ma asi eurato, vei-rakava nuġanai asi beġe tanu-maukani verereri ai bene tanu-namo.

²⁶ Ġia na etuġamaġiato tu, Keriso uranai beġe vaġa-maiakaiani voina tu barego lelevaġi, Aigupito ai farefare voiri bevanaġirini. Korana ġia tu ebogēguine-iaġoto, ġoirai voina eġita-iaġoato.

²⁷ Mose ma ġena veġabidadama lorinai, Aigupito na eraka-veġitato, Aigupito verena bebaruni garina asi eġarito. Ġia tu ekokoreto, korana tu asi taġitaiani Barauna ġia na tu matana na noġa moġo eġitaiato.

²⁸ Ma ġena veġabidadama lorinai, Rubu Veaġa verekona ekorana-iaġiato ema Isaraela tarimari ekirarito, rara ġeri ġatama-boka koberi murikari ai beġene dau. Benamo mase aneruna na naturi, ġemaġuri-guineto merori, asi bene vaġiri.

Isaraela tarimari na Barau ġeġabidadama-viniato

²⁹ Isaraela tarimari na Barau ġeġabidadama-viniato lorinai, Davara Kakakakana nuġana na tanobara kaukauna na noġa moġo ġeraka-vanaġito. Ma Aigupito tarimari maki ġevanaġi ġetato nai tu, davara na eġutu-ġaurito.

³⁰ Isaraela tarimari ma ġeri veġabidadama lorinai, Ieriko vanuġa maġuna ġaro vaġa-imaima ruarua (7) ġeraka-ġeġeraġiato murinai eketoto.

³¹ Mata-boraġa ġuiatona Rahaba Barau ġenai eveġabidadamato lorinai, Isaraela ġeri maramara tarimari eġabi-raġerito, benamo Barau ġeseġaforeviniato-ġoi tarimari ġesi asi ġevaġi-sebonaia.

³² Ma kara ma bakiraġiani? Asi ġegu taimi Gideona, Barak, Samson, Iefeta, Davida, Samuela ema peroveta tarimari variri bakiraġirini.

³³ Ġia tu ma ġeri veġabidadama lorinai, tanobara basileiari ġevetari-vinirito nai, ġekokoreto-ġoi. Veġa iobukaiobukari ġeveito-ġoi, ema kiraġitore dagarari ġeġabirito laion bokari ġekou-ġaurito.

³⁴ Karava seġuka rakava ema-moreni ġevei-buserito, ema vetari baġari matari na ġeraga-maġurito. Ġeri moiramoira nuġari ai ġekokoreto; vetari ai

tu guruḡari maki seḡuka rakava, ema ḡevetari-vinirito-ḡoi doḡorori ḡevaḡa-ketorito-ḡoi.

³⁵ Ḡemaseto-ḡoi tarimari ma ḡevaḡa-maḡuri ḡenoḡoirito-ḡoi, benamo sinari na ma ḡeḡabi-ḡenoḡoirito-ḡoi. Ma tari tu dibura numai tauḡaniri ḡekwari-rakava kwaikwairito-ḡoi ma dori ḡemaseto-ḡoi, senaḡi asi ḡeurato-ḡoi Barau beḡene kira-ḡuniḡaua, benamo dibura numana na beḡene ruḡa-vaḡiri. Korana ḡeri ura tu vaḡa-variḡisi ḡenoḡoi namona beḡene ḡabia.

³⁶ Ma tari tu ḡevaseva-vaseva iaḡirito-ḡoi, ḡekwaririto-ḡoi, ma tari tu seini na ḡebarurito-ḡoi, benamo dibura numanai ḡetorerito-ḡoi.

³⁷ Fore na ḡetakirito-ḡoi; ma tari tu ḡesoa-ḡuturito-ḡoi; ma tari tu vetari baḡari na ḡevaḡirito-ḡoi. Mamoe kefiru e nanigosi kefiru ḡevei-rakaoto-ḡoi, asi ḡeri-ḡari, ḡevaḡa-midigu midigurito-ḡoi, ema tarimarima na veḡa asi namori ḡeri ai ḡevei-vinirito-ḡoi.

³⁸ Tanobara ḡia ḡeri ai tu asi namo moḡo. Tanobara fakari na e ḡoro tuḡuri na, tano kouḡari na, ema guri na ḡetanu-rakaoto-ḡoi.

³⁹ Maiḡeri tarimarima mabarari ḡeri veḡabidadama loriri ai, Barau na evaḡa-maḡuririto. Senaḡina ta na Barau na ekiraḡi-toreato dagarana ta tu asi eḡabiatu.

⁴⁰ Korana Barau na dabara namona ta ḡita ḡera eboioḡaiatu. Ḡia ḡena ura ḡia maki ḡita ḡesi vaḡa-sebo vau bene vaḡa-namo vedaureara.

12

¹ Mo veḡabidadama tarimari, ḡita ḡeḡita-taḡorani tarimari, tu ḡutuma lelevaḡi, magube na noḡa moḡo beḡe ḡeḡeraḡira. Moḡa lorinai ḡita ḡekoukou-ḡaurani dagarari, ema vei-rakava ḡita ḡebarubarutari-dagarari mabarari sifitoḡari. Benamo ma kokorera ḡesi ḡoirarai Barau na etoreato raga-iruirunai siraga.

² Matara Iesu ḡenai sitore-kauri. Korana Iesu na ḡita ḡera veḡabidadama esinaiatu, ema bevaḡa-ḡuḡuruani. Ḡia na ḡoiranai mo iaku e verere etuḡamaḡiatu nai, satauro maiakana asi etuḡamaḡiatu. Benamo Barau ḡena terona aroribanai etanu-tarito.

³ Iesu situḡamaḡia. Ḡia tu vei-rakava tarimari na asi ḡeḡabi-raḡeato, ḡeseḡafore-viniatu, senaḡina ekokoreto. Moḡa lorinai asi boḡono tuḡamaḡi-moira, e asi boḡono ruḡa-ḡuiraga.

⁴ Ḡomi tu rakava ḡesi ḡovevaḡi-tanuni. Senaḡina ḡomi mani vevaḡi nuḡanai tu, ta raramu roḡosi roḡo bere riḡo.

⁵ Ema ḡomi tu Barau na ekeamitu ḡia natuna, senaḡi mai velaunaḡi guruḡana tu ḡotuḡarekwaiatu, ekirato,

“Natugu, Vereḡauka na vevaḡa-riba veḡari gwaḡiḡiri evinimuni nai,
asi bono ḡabi-meraḡari,
ema bekira-feimuni nai,
nuḡamu asi bono vaḡa-moiraia.

⁶ Korana Vereḡauka na eura-vinirini tarimari tu vevaḡa-riba gwaḡiḡiri evinirini,
ema ḡia natunai evaḡa-iaḡorini tarimari mabarari tu ekwaririni.”

⁷ Moḡa lorinai matakani veḡari ḡemi ai beḡe ḡorani nai tu boḡono kokore. Korana ḡomi tu Barau natuna naima moḡesina eveimini. Ma siḡitaia, kamara mero keina tu tamana na asi evaḡa-matakaniani?

⁸ Tama mabarari na naturi ḡevaḡa-matakanirini. Ma bema ḡomi Barau na asi evaḡa-matakanimini, moḡa anina ḡomi tu dia Barau natuna korikori, ḡomi tu gara meromi.

9 Vaġa-ilailana tauġani rekenai ġita tamara korikoriri na ġevaġa-matakanirani, benamo moġeri korari ai tamara tagubakaurini. Moġesina kavana namona tu ġita tata iaukara Tamari Barau maki tana gubakaua, benamo bitana maġuri.

10 Ġita tamara na tu ġaro kotunai moġo ġevaġa-matakanirani. Mo tu ġia tauġeri na ġetuġamaġiani namo ġetoni ġarori ai moġo. Senaġi Barau na evaġa-matakanirani tu ġita ġera namo ġana, ema ġia ġesi bitana veaġa-vegogo ġana.

11 Maitoma matakani veġari ġeiaġomani tu ma midigumidiguri, asi iakuri. Senaġina murinai vau mo matakani veġari ġerina beribani tarimana tu vei-iobukaiobuka ema maino tarimanai beiaġoni.

Nuġara bitana vaġa-kokoreri ema bitana ruġa-gigitari

12 Moġa lorinai ġimami beġe ġeroġero-riġo, ġoġabi-vaisiri, ema tuimi beġe moira ġeġoġo-ġoġorini, ġovaġa-kokoreri.

13 Benamo kwakumi na ġoraka-iaġirini fanari ġovei-roroġotori, be kwaku rakava tarimana kwakuna asi bene rakava-lelevaġi, senaġi bene namo.

14 Boġono kokore-korikori, tarimarima mabarari ġesi maino ai boġono tanu uranai. Be ġemi maġuri beġene veaġa e asi vetoukaunai beġene iaġo bene. Korana tu ma vetoukauna e asi veaġa tarimana na Vereġauka tu asi beġitaiani.

15 Boġono venari, be tarima ta Barau ġena varevare-bara ġenana asi bene raka-veġita, ma nuġa-ġirima ġokana nuġanai asi bene tubu-raġe. Korana nuġa-ġirima ġokana betubuni, ġokana mamakina na ġomi fakami ai rakava bevaġa-ġoraiiani, benamo tarimarima vovoka bevaġa-rakavarini Barau ġoiranai.

16 Boġono ġitaia, ta ġomi fakami ai mata-boraġa veġari asi bene veiri, ema Esau na Barau asi ekorana-iaġiato kavana asi bene vei. Esau na tu ġena maġuri guine seġukana ġaniġani diġu sebona moġo uranai evare-fitoġaiato.

17 Moġa murinai ġomi ma ribami, mo maġuri guine vevaġa-namona tamana ġenana neġabia etato tu tamana na asi eġabi-raġeato. Moġoni, tamana ma taġina ġesi enoġiato, senaġi tamana asi ma etuġamaġi-ġenoġoito.

18 Ġomi tu dia ġimami na boġo ġabi-karaiani ġorona ġana boġo iaġoma, Isaraela tarimari kavana. Ġia tu Sinai Ġorona sevina korikorinai ġeruġato, benamo karava emoreto ġeġitaato, ema mukuna dubara kiukiuna e iavara barego lelevaġina;

19 ema kibi guruna asikeikeina eraġeto e garo baregona eguruġato ġeseġaġirito. Isaraela tarimari na mo garo ġeseġaġiato nai tu, Mose ġenoġiato mo garo na asi ma bene vaġa-guruġari.

20 Korana Barau na taravatu guruġari evinirito nai tu, ġegari-rakavato, Barau tu ekirato, “Bema tarima ta na o boromakau ta o nanigosi ta na mo ġoro bea vei-karaiani nai tu, fore na boġono taki-masea.”

21 Moġeri vetoġa ġefoforito gariri tu asikeikeiri, benamo Mose ekirato, “Au tu eġoġo-ġoġoguni, agari-rakava rakavani.”

22 Senaġina ġomi tu Siona Ġorona ġana boġo iaġoma e guba Ierusalemna maġuri Barauna ġena vanuġa baregona ġana, ema aneru ġutuma gorogoro asi iavi-iaviri ġeri ai boġo iaġoma.

23 Ġomi tu vegogo baregona ġena e Barau natuna ġemaġuri-guineto ekalesiari ġeri ai boġo iaġoma. Ġia arari tu Barau na gubai etorerito. Ema

gomi tu tarimarima mabarari Kotai beġita-viriġirini Barauna ġenai e vei-iobukaiobuka tarimari iaukari, Barau na evaġa-namo vedaurearito iaukari, ġeri ai boġo iaġoma.

²⁴ Ema Iesu ġenai boġo iaġoma. Iesu ginitaġo variġunai tu Barau e tarimarima fakari ai eruġani. Ema ġia rarana ġenai boġo iaġoma. Iesu rarana tu gomi ġemi ai eketokauto. Ma Iesu rarana na ekiraġiani guruġana seġukana na Abela rarana ġena guruġa seġukana evanaġiani.

²⁵ Boġono venari, Barau na evaġa-guruġamini nai, garona asi boġono kira-sirivaġi-vinia. Korana tanobarai Barau na ekira-toreġaurito tarimari ġekira-sirivaġito nai tu, asi ġeraga-maġurito. Geri kira-sirivaġi voina ġeġabiato. Ġita tu kamasi bita raga-maġurini? Barau toma tu gubai etanuni, benamo monana ġita ekira-toreġaurani. Bema ġia ġenana bita raka-veġitani nai tu, kamasi bita raga-maġurini.

²⁶ Moġeri ġaro ai Barau garona na tanobara eruku-iagaiagaiato. Senaġina toma Barau tu eguruġa-toreto, ekirani, “Au na tanobara vaġa-sebona maia barukuani. Dia tanobara ġereġana moġo barukuani, senaġina guba maki barukuani.”

²⁷ Mai guruġa “vaġa-sebona maia” anina tu, guinenai Barau na eveirito dagarari beġe iagaiagani nai tu bekoki-veġitarini. Korana tu asi beġe iagaiagani dagarari moġo beġene tanu ġana.

²⁸ Ġita na taġabiani basileiana tu asi beġareva-ġarevani. Moġa lorinai Barau sitanikiu-vinia, ema Barau na eura-viniani maġurinai sitoma-rakariġo vinia ma vegubakaura e ma garira ġesi.

²⁹ Korana ġita ġera Barau tu karava ġaraġara.

13

Barau vaġa-ikuna veiġari

¹ Ġomi fakami ai tarikaka veuravinina bene tanu-vanaġi vanaġi.

² Tarima boruri ġabiraġeri asi boġono tuġa-rekwaia, korana tarima tari maniġesi ġeveito-ġoi nai tu, aneru ġeġabi-raġerito. Senaġi ġia tu asi ġeribamaoroto mo tu aneru ġeġabi-raġerini.

³ Dibura numanai ġetanuni tarimari boġono tuġamaġiri. Boġono tuġamaġi, gomi maki ġia ġesi dibura numanai ġoro tanu-vegogo. Ema ġevaġa-midigu midigurini tarimari boġono tuġamaġiri. Boġono tuġamaġi gomi maki ġere vaġa-midigu midigumi.

⁴ Tarimarima mabarari na veġaraġo beġene gubakaua, ema veġaraġo tarimari ġeri genagena gabuna bene namo-vedaurea. Korana ma ġaraġona, senaġina ekima-rakaoni, o ma eveġaraġo-sirivaġini tarimana, ema mata-boraġa veiġari ġeveini tarimari mabarari tu Barau na ġeri rakava voiri bevinirini.

⁵ Moni asi boġono uravini-lelevaġiri. Kara dagara ġemi ai maniġeri boġono ġabi-raġeri ma iakumi ġesi. Boġono kira, mai dagara ġemai maiġeri tu ġemai ilaila. Korana Barau tu ekirato, “Au na asiġina ġinavaġi baraga-kwanemini, ema ġereġami asiġina ġinavaġi baiaġuimini.”

⁶ Moġa lorinai nuġara ma kokoreri ġesi bitana kira, “Vereġauka na au bevaġa-kavaguni, be au asi bagarini.

Tarimarima na tu kara beġe veiani au ġegu ai?”

⁷ Ġotuġamaġi-ġenoġoi, ġeguine-iaġimito-ġoi tarimari ġotuġamaġiri. Ġia na Barau ġena guruġa ġemi ġekiraġito. Ġia ġeri maġuri na kara ġefoforito

eiaġoto mo ġea maseto boġono tuġamaġiri, ema ġia ġeri veġabidadama boġono tovotovori.

⁸ Iesu Keriso tu ġoraġani, toma, ema vanaġivanaġi asi beirauni.

⁹ Vevaġa-riba irauirauri na dabara moġonina na asi beġene ġori-veġitami. Namona tu Barau ġena varevare-bara na ġita iaukara bene vaġa-kokoreri. Ġaniġani taravaturi irauirauri na ġita iaukara tu asi beġe vaġa-kokorerini. Moġeri taravatu ġekorana-iaġirito-ġoi tarimari tu namo ta asi ġeġoitaġoato.

¹⁰ Ġita tu ma ġera fata vevaġana. Senaġina Barau toma-rakariġona ġana farai rubuna nuġanai ġinitaġo ġauveiri ġeveito-ġoi tarimari tu mai fatai asi beġe ġaniġanini.

¹¹ Rubu Vevaġa verena baregona na boromakau, nanigosi, mamoe evaġirito-ġoi nai, tauġaniri tu eġabi-rosirito-ġoi Isaraela tarimari ġeri totoġa gabuna na, benamo murikai vau ea gaburito-ġoi. Rarari moġo Vevaġa Lelevaġi Gabunai eġabi-toġarito-ġoi, rakava ġabiveġitari varevarena bene vei-iaġiri ġana.

¹² Moġesina naima Iesu maki rarana na tarimarima bene vaġa-veaġari ġana tu, Ierusalemna vanuġa barana maġuna murikanai emidigu-midiguto.

¹³ Moġa lorinai ġita maki Iesu ġenai totoġa murikana ġana siraka-rosi. Be, ġia na eġabiato maiakana ġita na maki bitana ġabia.

¹⁴ Korana mainai ġita tu asi ġera tanu-vanaġivanaġi vanuġana. A ġita tu vanuġa vau ma beiaġomani dagarana tavetauani.

¹⁵ Moġa lorinai vanaġivanaġi Barau vonevone-raġena varevareri Iesu ġenana bitana vini-raġea Barau ġenai. Barau arana vonevone-raġena tu ġita murura ġwaġwana.

¹⁶ Veġa namori veiveiri asi boġono tuġa-rekwari, ema ġemi ai guruġa moġoniri maniġeri karomi ġeri maki boġono kiraġi. Korana tu maniġesina veġari tu ġinitaġo dagarari namori Barau na eiaku-iaġirini.

¹⁷ Ġeguine-iaġimini tarimari garori boġono seġaġiri, ema ġeri veġorikau maorona gaburenai boġono tanu. Korana ġia na tu ġomi ġemi maġuri ġeġita-ġaurini, ema ġomi ġemi maġuri aiġesina Barau ġenai beġea kiraġirini. Garori boġono seġaġiri, be ma iakuri ġesi ġeri ġauvei beġene veia, a dia nuġari ma metori ġesi. Korana bema nuġari ma metori ġesi ġomi beġe narimini nai tu, ġomi na namo ta asi boġo doġariani.

¹⁸ Ġema boġono ġuriġuri. Ġai ribama ġai nuġama tu veiareva Barau ġoiranai, ema ġema ura barana tu vegubakau ai moġo baġana tanu.

¹⁹ Ġegu noġinoġi barego lelevaġina ġomi ġemi ai tu boġono ġauġau, be ġemi ai ma bana ġenoġoi-ġariġari.

²⁰ Maino Barauna na ġera Vereġauka Iesu tu betanu-vanaġi vanaġini ġinitaġo rarana ġenana ma evaġa-maġuri ġenoġoiato. Iesu tu mamoe nari tarimana baregona.

²¹ Mai maino Barauna na dagara namori mabarari bene vinimi, ġena ura boġono veia ġana. Ema kara ġia na eiaku-iaġirini dagarari Iesu Keriso ġenana ġita nuġarai bene ġauvei-iaġiri. Mareva baregona tu ġia ġena bene iaġo mo vanaġivanaġi. Amen.

²² Tarikakagu mabarami, anoġimini, ġegu vevaġa-naġi guruġari maiġeri boġono ġabi-raġeri ma nuġami namori ġesi; korana fefa tu kubina moġo batorea.

²³ Au aurani navaġa-ribami, ġita tarikakara Timoteo tu dibura numana na beġe tuġu-vaġia. Bema ġia bema raġasi-ġarimoġini tu, tauma ruarua baġa iaġosini ġitaġitami.

²⁴ Āema vevaġa-namo ġemi veġorikau tarimari ema Barau ġena tari-marima veaġari mabarari boġono viniri. Itali tarimari na maki ġemi vevaġa-namo beġe tuġu.

²⁵ Barau ġena namo e varevare-bara mabarami ġemi ai bene tanu.

IAKOBO (O IAMES) ĜENA TORETORE

Iakobo (o Iames) vaĝa-foforina guruĝari

Mai fefa tu Iakobo (o Iames), Iesu tarina, na etoreato. Ĝia tu Ierusalemekalesia ĝorikauna tarimana ta. Mai fefa etoreato laĝanina tu 45 ma 49 fakari nuĝanai ta, mo tu Iesu emaseto murinai.

Mai fefa etoreato korana tu, 1) Heberu ekalesiari veribaĝani ema meto baregori ĝeĝoitaĝoto-ĝoi nai, nuĝari bene vaĝa-gwaĝigiri etato; 2) Heberu ekalesiari vefakari ai tu veiĝa ema maĝuri asi roroĝotori tari ĝeĝorato-ĝoi, naima moĝeri bene vei-roroĝotori ĝana uranai; 3) Heberu ekalesiari bene kira-varari, veĝabidadama korikorina tu veiĝa namori na bevaĝa-foforiani. Iakobo na mai fefa tu maiĝesi eboioĝaiato:

1. Veĝabidadama veribaĝani na betovo-naĝiani ema bevaĝa-foforiani - karoa 1:1-18
2. Veĝabidadama ĝera ĝauvei e veiĝa na bevaĝa-foforiani - karoa 1:19-2:26
3. Veĝabidadama ĝera guruĝa na bevaĝa-foforiani - karoa 3
4. Veĝabidadama Barau korana-iaĝina maĝurina korikorina na bevaĝa-foforiani - karoa 4-5

¹ Au Iakobo (o Iames), Barau e Vereĝauka Iesu Keriso ĝeri vetuĝunaĝi tarimagu, ĝeguna mai fefa eiaĝosini, ĝomi Isaraela doĝoromi gabanana ruarua (12) tanobara boruri ai ĝotanu-lausilausini ĝemi ai. Avaĝa-namomini.

Veribaĝani ĝenana veĝabidadama bekokoreni

² Tarikakagu mabarami, veribaĝani irauirau boĝo ĝoitaĝorini nai, boĝono iaku-iaĝiri moĝo.

³ Korana ĝomi ribami, veribaĝani na ĝemi veĝabidadama etovo-naĝirini nai, kokore ema vevaĝa-gwaĝigi evaĝa-ĝorarini.

⁴ Benamo kokore ema vevaĝa-gwaĝigi ĝemi ai bene barego-korikori, be ĝemi ai maki kerere ta asi bene tanu e vetoukau ta maki asiĝina, ema dagara tai asi boĝono rabu.

⁵ Senaĝi bema ĝomi fakami ai ta asi iaunegana nai tu, Barau bene noĝia, ĝia na beviniani, korana Barau tu nuĝana mabarana ema nuĝana ma iakuna ĝesi ĝia ĝenoĝiani tarimari mabarari evinirini.

⁶ Senaĝi enoĝini nai tu veĝabidadamai moĝo bene noĝi, nuĝana asi bene daradara. Korana eiauvo-iauvoni tarimana tu davara ureurena iavara na ekwari-iaĝo kwari-iaĝomaiani kavana.

⁷ Moĝesi tarimana tu bene riba, ĝia Vereĝauka ĝenana dagara ta tu asi bedoĝariani.

⁸ Etuĝamaĝi-ruaruani tarimana tu ĝena ĝauvei mabarari ai asi eruĝa-gigitarini.

Asi ĝena-ĝana tarimana ema ma ĝena-ĝana tarimana

⁹ Tarikaka ta asi ĝena e asi ĝana tu bene iaku, korana Barau ĝenai ĝia tu barego.

¹⁰ Ema ma ĝena ma ĝana tarimana maki bene iaku, Barau na betore-variĝoani neganai. Korana berekwa-rekwani boĝa veraverari kavana.

¹¹ Ĝaro emaraĝeni nai, ekirini gugurana na ĝauĝa etunu-maraiani, benamo veraverana eketo-vaĝini, ĝitaĝitana marevana ekorini. Ĝena-ĝana vovoka tarimana maki moĝesina kavana berekwa-rekwani ĝena taĝa ĝauveiri iaĝoviniri nuĝanai.

Vetovonaġi ema veribaġani ainana eiaġomani

12 Veribaġani nuġari ai evevaġa-gwaġiġini tarimana tu bene iaku, korana mo vetovonaġi bekorini nai, roġo beruġa-taġoni tu maġuri koronana beġabiani. Mo maġuri tu Barau na ekiraġi-toreato ġia ġeura-viniani tarimari ġeri.

13 Bema tarima ta veribaġani edoġariani nai, asi bene kira, “Mai veribaġani tu Barau ġenana eiaġomani.” Korana Barau tu veiġa rakavari na asi beġe tovo-naġiani riba, ema ġia na tarima ta maki asi eriba-ġaniani.

14 Senaġi tarimarima veribaġani edoġariani tu bema ġia eveġwa-veġitani, benamo tuġamaġi rakavari na nuġana ġeġaniani, ġeġofaiani.

15 Ġena ura rakavari na nuġana ġevaġa-vonuani, benamo rakava ġevaġa-ġoraiani. Ema rakava etubu-baregoni nai tu mase evaġa-ġoraiani.

16 Tarikakagu namomi, ta na asi bene ġofami.

17 Vevaġa-ġauna dagarari namori mabarari ema varevare roroġotori dagarari mabarari tu tuġuna na ġeiaġomani, Mama Tamana, guba mamana eveiato Barauna, ġenana ġemariġoni. Guba mamana eirauni, senaġi ġia tu asi eirauni o mukuna na maki asi eġabiani.

18 Ġia tauġena ġena urai moġo ġena guruġa moġonina ġenana evaġa-maġurirato, korana tarimarima ema ġemaġurini dagarari tari ġimana na eveirito dagarari mabarari fakari ai bitana guine ġana.

Seġaġi e veiġa

19 Tarikakagu namomi, maiġa tu boġono ribaia: Ġomi tata guruġa seġaġi-seġaġiri ai boġono ġarimoġi, senaġi guruġai boġono veġabitari, ema asi boġono baru-ġariġari.

20 Korana tarimarima ġeri baru ġerina Barau ġena veiġa roroġotori asi beġe foforini.

21 Moġa lorinai maġuri rakavari ema veiġa mirori mabarari boġono fitoġari. Barau na nuġami ai evaroato guruġana boġono ġabi-raġea ma manaumi ġesi. Korana mani guruġa na bevaġa-maġurimini riba.

22 Ġena guruġa tu asi boġono seġaġiri moġo, senaġi ġoseġaġirini guruġari tu ġemi veiġai boġono vaġa-foforia, tauġemi boġo veġofani garina.

23 Deikara Barau ġena guruġa eseġaġiani moġo, senaġi veiġana tu asi eveiani tu veġia ai tauġena ġoirana eġitaiani kavana.

24 Tauġena veġiai eveġitani, benamo eraka-veġitani nai tu ma evetuġa-rekwani ġia vetoġana tu aiġesina.

25 Senaġi deikara taravatu namo vedaureana, tarimarima ġeri rakava eruġa-vaġirini taravatuna, eġita-ginikauani, eseġaġi-vanaġi vanaġiani ema asi eseġaġi-taġuini, senaġi ġena veiġai evaġa-foforiani, ġia tu Barau na ġena ġauvei mabarari nuġari ai bevaġa-namoani.

26 Bema tarima ta tauġena evekiraġini tu Barau ekorana-iaġiani etoni, senaġi meana tu asi enariani, mani tarima tu tauġena moġo eveġofaġofa-iaġini ema Barau korana-iaġina veiġana maki asi tauna.

27 Ġita Tamara Barau na ekalesia tarimana namo vedaureana e moġonina maiġesi etuġamaġiani: Gara e vabu ġeri taġitaġi ai eġita-ġaurini ema tauġena evenarini tanobara mirona na bevemironi garina.

2

Ekalesia mabarari tu ilaila moġo

¹ Tarikakagu mabarami, ġera Vereġauka Iesu Keriso mamana e seġukana tu barego, ġia ġovaġa-moġoniani tarimami, tarimarima mabarari boġono ġabiraġe-ilailari, dia ġeri vetoġai boġono ġabi-raġeri.

² Bema tarima ta, ġimana ma golo aġevana e ġena dabuġa maki irau moġo, bema raka-toġani ġemi vegogo nuġanai, ema asi ġena-ġana tarimana ta ġena dabuġa tu kitakata bema raka-ġurani.

³ Benamo ġomi na dabuġa ma marevana eveiani tarimana tu boġo gubakau-baregoani, benamo boġo vaġa-guruġaiani, boġo kirani, “Mai tanu-tanu namonai noma tanu,” a asi ġena-ġana tarimana tu boġo kiraiani, “Iomonai noa ruġa,” o, “Mai kurabo ai noma tanu au kwakugu koranai.”

⁴ Moġa ġenana ġomi tu tauġemi moġo ġovevaġa-irauni ema vevaġa-maoro maki ġoveiani ġemi tuġamaġi rakavari ġerina.

⁵ Ġoseġaġi, tarikakagu namomi, Barau na mai tanobarai asi ġeri asi ġari tarimari eġabi-viriġirito, veġabidadama na beġene vonuvonu-raġe, ema ġena Basileia beġene ġabia uranai. Mo Basileia tu Barau na ekiraġi-toreato, ġia ġeura-viniani tarimari moġo beġe raka-toġani.

⁶ Senaġi ġomi na asi ġeri ema asi ġari tarimari tu ġoġita-ġuiraiġirini. Dei na ġomi evaġa-rakavamini, ema einu-iaġomini Kota gabuna ġana? Ma ġeri-ġari tarimari maniġesi ġeveini, ene?

⁷ Ġia na mani ara namona, ġomi na ġovaġa-moġoniani tarimana arana Keriso, ġekiraġi-rakava rakavaiani.

⁸ Dagara namona tu maiġa: Barau ġena Basileia taravatuna boġono korana-iaġia, Buka Veaġai ġetoreato maiġesi ekirani, “Sevimu tarimana bono ura-vinia tauġemu oveura-vinini kavana.” Maniġa ġokorana-iaġi korikoriani nai tu maorona ġoveiani.

⁹ Senaġi bema ġomi na tarimarima ġeri vedabuġa o dagi ilailari ai moġo ġoġabi-raġerini nai, ġomi tu rakava ġoveiani, ema taravatu na maki ekiramini, ġomi tu taravatu ġokira-fitoġaiani tarimami.

¹⁰ Korana mo deikara na taravatu mabarana ekorana-iaġiani, senaġi sebona moġo eketoni, ġia na taravatu mabarana ekira-fitoġaiani.

¹¹ Korana mo Barau sebona ekirato, “Asi bono veġura-vanaġi,” ma ekirato, “Asi bono vaġivaġi.” Moġa lorinai bema ġoi asi boveġura-vanaġini, senaġi bovaġivaġini nai, ġoi tu taravatu okira-fitoġaiani tarimamu.

¹² Ġoguruġani ema veiġa ġoveirini nai, Barau ġena taravatu boġono tuġamaġia, korana mo tu ma seġukana tarimarima ġeri rakava ġerina beruġa-vaġirini. Moġa maki bea vevaġa-maoro vinimini.

¹³ Deikara tarimarima asi evetuġa-ġwarini tu, Barau na maki ġia asi bevetuġa-ġwaiani ġena Kota baregona ġaronai. Senaġi deikara ta na tarimarima evetuġa-ġwarini, Kota garina asi bene vei, korana vevetuġaġwa na vevaġa-maoro evanaġiani.

Veġabidadama ma veiġana

¹⁴ Tarikakagu mabarami, tarima ta bekirani, ġia tu ma ġena veġabidadama, senaġi bema ġena veiġa na asi evaġa-moġoniani nai, kara namona bevaġa-ġoraiani? Mo veġabidadama na bevaġa-maġuriani riba ba?

¹⁵ Vaġa-ilailana, bema tarikaka tauna ta o vavinena ta asi ġena dabuġa ema asi ġana ġaniġani.

¹⁶ Benamo ġomi ta na bokiraiani, bokirani, “Ma nuġa namomu ġesi noiaġo. Bono veseġo, be asi bene naguremu e bono ġanimase-ginikau!” Senaġi tauġanina eura-vinirini dagarari tu asi oviniani, ġena namo tu kara?

¹⁷ Veḡabidadama maki moḡesi, bema veḡabidadama ḡereḡana moḡo ema veḡana asi evaḡa-foforiani nai tu mase, asi tauna.

¹⁸ Senaḡi tarima ta ma bekirani, “Ḡoi tu ma ḡemu veḡabidadama, senaḡi veḡa tu au ḡegu ai.” Benamo au ḡegu vevaḡa-vese tu iniḡesi, “Ḡemu veḡabidadama naḡitaia. Kamara dabarai bovaḡa-ḡitaguni bema veḡa asi evaḡa-foforiani nai? Senaḡi au ḡegu veḡabidadama tu fofori, ḡegu veḡa na evaḡa-ḡitamuni.”

¹⁹ Ḡoi na ovaḡa-moḡoniani, Barau tu sebona moḡo. Namoi! Senaḡina iauka rakavari na maki ḡevaḡa-moḡoniani, benamo ḡeḡoḡo-ḡoḡorini korana ḡegarini.

²⁰ Ḡoi babo! Ḡoi ourani tauna korikori noḡitaia veḡabidadama veḡana asi evaḡa-foforiani tu asi tauna.

²¹ Ḡita senera Aberahamo tu kamasi nai Barau na evaḡa-moḡoniato ḡia tu veḡa iobukaiobuka tarimana? Ḡia tu ḡena veḡa na natuna Isako fata veaḡa iatanai Barau evarevare-viniato.

²² Be oḡitaiani, ḡia ḡena veḡabidadama ema ḡena veḡa tu ḡeḡauvei-vegogoto; ḡena veḡabidadama tu ḡena veḡa na ḡevaḡa-moḡoniato.

²³ Benamo Buka Veaḡai ḡetoreato guruḡana emoḡonito, maḡesi ekirani, “Aberahamo na Barau evaḡa-moḡoniato, benamo Barau na eḡabi-raḡeato ḡia tu vei-iobukaiobuka tarimana.” Ema Barau na maki ekiraiato, ekirato, “Au ḡatagu.”

²⁴ Ḡoḡitaiani, tarimarima tu ḡena veḡa na Barau na eḡabi-raḡeani, dia ḡena veḡabidadama ḡenana moḡo.

²⁵ Rahaba mata-boraḡa vavinena maki moḡesi. Ḡia tu ḡena veḡa ḡenana Barau na eḡabi-raḡeato. Isaraela rivirivi tarimari ḡena numai eḡabi-raḡerito ema dabara boruna ma etuḡu-rosirito.

²⁶ Vaḡa-ilailana tauḡani asi iaukana tu mase, veḡabidadama maki moḡesi, bema asi veḡana tu mase.

3

Murumi boḡono nariri

¹ Tarikakagu mabarami, ḡomi ḡutuma tu vevaḡa-riba tarimami ai asi boḡono iaḡo. Korana ma ribami, Barau ḡena Kota ḡaronai ḡia na ḡai, vevaḡa-riba tarimama, ḡema veḡa tu bevetau-ḡitakaurini, dia ekalesia tarimari tari kavana.

² Ḡita mabarara ḡaro ḡutuma kerere taveini. Senaḡi bema tarima ta kerere ta asi eveiani ḡena guruḡai nai, ḡia tu asi vetoukauna ema tauḡanina mabarana benariani riba.

³ Hosi bokanai taritari aurina tatore-toḡaiani, korana taurani bene seḡaḡira; moḡesi tauḡanina mabarana bita tariiani riba.

⁴ Lagatoi ḡotuḡamaḡia: Asikeikeina, iavara baregona na vau ekwari-ragaiani, senaḡi tarina tu misina korokoro. Mo tari misina korokoro na etariani tarimana ḡena ura gaburi mabarari ḡana etari-iaḡoani.

⁵ Moḡa ilailanai mea makina: Misina korokoro, senaḡi dagara baregori eveiavi-iaḡirini.

Boḡa maki aiḡa baregona, senaḡi karava misina na beḡara-ḡosiani.

⁶ Mea maki karava kavana. Tauḡanira mabarari fakari ai ḡia tu rakava gabuna tauḡanira mabarana evaḡa-miroani. Tauḡanira ema iaukara evaḡa-rakavarini. Ḡera tanu dabarari mabarari mea na bevaḡa-kerererini riba, korana ḡia tu karava kavana ḡita eḡararani. Mo karava tu eḡara-vanaḡi vanaḡini gabuna na eḡabini.

⁷ Tarimarima tu vevaḡa-marana ma ribana, ema ḡemaḡurini dagarari iraurau maki mabarari evaḡa-maranarini e evaḡa-maranarito-ḡoi ilailana manu, mota, davara dagarari, ema boḡa bairi maki.

⁸ Senaḡi tarima ta na mea tu roḡosi roḡo bene vaḡa-maranaia. Ġia tu rakava ema asi vaḡa-maranana, vevaḡa-mase nanuna rakavana na evonuvonu-raḡeto.

⁹ Ġita meara na ḡera Vereḡauka ema Tamara tavaḡa-namoani, ema meara na maki Barau na ḡia vetoḡana kavana eveirito tarimarimari tavaḡa-rakavarini.

¹⁰ Mo muru sebona na vevaḡa-namo guruḡari ema vevaḡa-rakava guruḡari ḡeraka-vaḡini. Tarikakagu mabarami, maniḡesi veḡa asi bene ḡora.

¹¹ Nanu gurina sebona na nanu ma mamina ema nanu mamakina asi beraka-vaḡini, ene?

¹² Tarikakagu, figi ḡaunai olive asi beḡwani ema olive ḡaunai maki figi asi beḡwani. Moḡa ilailanai damena nanuna na ḡaruka nanuna asi beraka-rosini riba.

Barau ḡenana eiaḡomani iaunegana

¹³ Deikara ḡomi fakami ai tu ma iaunegana ema etuḡamaḡi-fakani? Ġena maḡuri namori na bene vaḡa-moḡonia, ema ḡena veḡa namori bene veiri ma iaunegana e manauna ḡesi.

¹⁴ Senaḡi bema ḡomi nuḡami ai mama, baru, ema veiavi ḡetanuni nai, asi boḡono kira, “Ġai tu ma iaunegama!” Moḡesina ḡomi na guruḡa moḡonina ḡokure-toḡaiani.

¹⁵ Mani iaunega tu dia guba na o Barau ḡenana ḡemariḡoni, senaḡi ḡia tu tanobara ḡena, tarimarima nuḡari na ḡemaraḡeni ema iauka rakavari ḡerina ḡeiaḡomani.

¹⁶ Korana mama ema veiavi ḡetanuni gaburi tu daradara etanuni, ema veḡa rakavari mabarari maki ḡetanuni.

¹⁷ Senaḡi guba na eiaḡomani iaunegana tu asi mirona e asi vetoukauna ta. Beḡabi-raḡeani tarimana ḡena veḡa tu maiḡa: Maino, garo-namo, veḡata. Ġia tu ma ḡena vevetuḡaḡwa ema ḡwaḡwana maki namori. Veira-veira ema vei-ḡofakau asi ribana.

¹⁸ Maino ai ḡetanuni tarimari tu noḡa moḡo varovaro ḡueri ḡevaroni kavana. Maino na veḡa namori ḡutuma evaḡa-ḡorarini. Moḡeri veḡa namori tu tarimarima ḡeri maḡuri ai ḡefoforini noḡa kwakwa ḡaronai dagara namori ḡedoḡaririni kavana.

4

Tanobara veḡatana

¹ Vevaḡi e vevane ḡomi fakami ai tu kara na ḡevaḡa-ḡorarini? Mani tu ḡemi ura rakavari nuḡami ai tauḡeri tata ḡevevaḡini ḡerina ḡeiaḡomani.

² Dagara kota ḡourani, senaḡi asi ḡoḡabirini, benamo ḡovaḡi-vaḡini. Dagara kota ḡouravini-rakavarini, senaḡi asi ḡodoḡaririni, benamo ḡovevaneni e ḡovevaḡini. Ġoura-vinirini dagarari asi ḡodoḡaririni, korana Barau asi ḡonoḡiani nai.

³ Ema ḡonoḡinoḡini maki asi ḡoḡoitaḡoni, korana ḡemi tuḡamaḡi tu rakava; ḡourani kara ḡonoḡirini dagarari tu ḡereḡami na boḡono ḡaunari.

⁴ Ġomi veḡuravanaḡi tarimami, (Barau ḡenana ḡoveḡitato tarimami)! Ġomi asi ribami tanobara ḡesi boḡo veḡatani tu Barau asi boḡo ura-viniani?

Deikara eurani tanobara ġesi bene veġata etoni tarimana na tu Barau evetari-viniani.

⁵ Buka Veāġai guruġa ta tu maiġesi ekirani, “Barau na ġita nuġarai etoreato Iauka Veāġana eura-rakavani, ġia na bene guine-iaġira.” Ġomi ġotuġamaġini mo guruġa ġetore-kavaiato?

⁶ Senaġi Barau ġena varevare-bara tu barego ġita ġerai. Moġa lorinai ġena Buka Veāġai maiġesi ekirani, “Eveiavini tarimana tu Barau na etore-veġitaiani, a manau tarimana tu ġena varevare-bara eviniani.”

⁷ Moġa lorinai boġono vevaġa-manau, Barau gaburenai boġono tanu. Satani boġono kira-ġoia, benamo ġomi ġemi na beraga-kwareġani.

⁸ Barau ġenai boġono raka-kavi, benamo ġia maki ġomi ġemi ai berakavini. Ġimami boġono ġuriġiri, ġomi rakava tarimami! Nuġami boġono iarevari ġomi tuġamaġi ruarua tarimami!

⁹ Boġono dabara-doko, boġono nuġa-midigumidigu, ema boġono taġi. Ġemi riki tu nuġa midigumidigu ai bene iaġo, ema ġemi iaku tu nuġameto ai bene iaġo!

¹⁰ Vereġauka ġoiranai boġono tutuġu-tari, benamo ġia na bene ġabi-vaisimi.

Asi boġono vekira-rakava

¹¹ Tarikakagu mabarami, ġomi tata asi boġono vekira-rakava. Deikara na tarikakana ta ekira-rakavaiani o vevaġa-maoro evei-viniani tu Barau ġena taravatu ekira-rakavaiani ema vevaġa-maoro evei-viniani. Bema ġoi na taravatu vevaġa-maoro ovei-viniani nai, ġoi na tu asi okorana-iaġiani, senaġi vevaġa-maoro tarimanai oiaġoni.

¹² Barau ġereġana moġo tu taravatu evini-riġoni e vevaġa-maoro evinini tarimana. Ġia ġereġana moġo ma seġukana bevaġa-maġurini ema bevaġa-rakavani. Ġoi tu deikara, be sevimu tarimana vevaġa-maoro ovei-viniani?

Asi boġono veiavi o vekokoroku

¹³ Ġoseġaġi, ġomi deikara maiġesi ġokirani, “Toma o boinani ġita tu bita iaġoni mai taoni o iomo taoni ġana. Monai laġani sebona bita tanuni, benamo bisinesi bita ġwa-raġaiani, moni asi gadara bita doġarini.”

¹⁴ Ġomi asi ribami ġemi maġuri boinani tu kamasi bevetoreni. Ġomi ġemi maġuri tu kara? Ġomi tu goġu kavana, ebere-rosini negakotuna, benamo ma erekwarekwani.

¹⁵ Ġomi tu maiġesi boġoro kira, “Bema Vereġauka beuranai nai tu bita maġurini ema maiġesi o moġesi bita veini.”

¹⁶ Senaġi ġomi tu ġovevaġa-raġeni ema ġoveiavini; moġesi vevaġa-raġeri tu rakava.

¹⁷ Moġa lorinai, kamara tarima ma ribana, ġia na veiġa namona bere veia dagarana, senaġi asi eveiani nai, ġia tu veiġa rakava tarimana.

5

Farefare ġutuma tarimami lorimi boġono vetore

¹ Ma ġemi farefare ġutuma tarimami, ġoseġaġi! Boġono taġi, boġono taġi-koġokoġo, korana midigumidigu asikeikeina ġemi ai mani eiāġomani.

² Ġemi farefare mabarari tu beġe boraġa, ema ġemi dabuġa tu faro na beġe ġaniri.

³ Ġemi golo ema ġemi silva tu beġe lala-lala o rasta. Mo lala-lala na tu ġomi bekiraġi-rosimini, ema viriġomi beġanirini karava kavana. Mai ġaro dokori ġana ġemi taġa ġosenurito.

⁴ Ĝoseĝaĝi, ĝemi vamokai ĝeĝauveito tarimari ĝomi na voiri asi ĝovinirito. Ĝeri nuĝa-vekwaraĝi ĝoseĝaĝi! Mo ĝemi ĝaniĝani ĝevaĝa-vegogorito tarimari ĝeri taĝi tu varau Iaru-korokoro Vereĝaukana na bea seĝaĝia.

⁵ Ĝomi ĝemi maĝuri mai tanobarai tu taĝai e iaku verere nuĝanai, ema ĝoĝoreĝore-rakavani. Boĝo ĝanimase ema boĝo goba-rakava, vaĝivaĝimi ĝarona tu varau bevotu.

⁶ Ĝomi na asi ĝeri rakava tarimari ĝovaĝa-daĝa-kavarito ema ĝovaĝi-maserito, ĝia na asi ĝeĝabi-iaunaĝimito.

Vevaĝa-gwaĝiĝi ema ĝuriĝuri

⁷ Tarikakagu mabarami, boĝono vevaĝa-gwaĝiĝi bene iaĝo mo, Vereĝauka bene iaĝoma. Iaraĝa tarimana ĝoĝitaia, evaĝa-nogani, ĝena vamokai varovaro dagarari tauri namori enaririni, evevaĝa-gwaĝiĝini eiaĝoni mo, ĝura guinena e ĝura ma beragu-gabini ĝurana eraguni.

⁸ Ĝomi maki boĝono vevaĝa-gwaĝiĝi. Nuĝami beĝene kokore, korana Vereĝauka ĝena iaĝoma maki varau bekavinaĝi.

⁹ Tarikakagu mabarami, tauĝemi fakami ai asi boĝono verori-tore, Barau na vevaĝa-maoro bevinimini garina. Ĝoseĝaĝi, Kota eseĝaĝini tarimana tu varau ĝatama-bokai eruĝa-taĝoni.

¹⁰ Tarikakagu mabarami, Vereĝauka aranai ĝeguruĝato-ĝoi peroveta tarimari ĝotuĝamaĝiri. Ĝeri midigumidigu nuĝari ai ĝevevaĝa-gwaĝiĝito-ĝoi. Ĝomi maki moĝesi boĝono vevaĝa-gwaĝiĝi.

¹¹ Ĝoĝitaiani, ĝita na tavaĝa-raĝerini, korana ĝevevaĝa-gwaĝiĝito nai. Iobu ĝena vevaĝa-gwaĝiĝi varina tu ĝoseĝaĝiato, ema ĝomi ma ribami, Vereĝauka na kamasi dokonai voina namona eviniato, korana Vereĝauka ĝena veuravini ema ĝena vevetuĝaĝwa tu barego vedaurea.

¹² Tarikakagu mabarami, dagara barego vedaureana tu maiĝa: Guruĝa gwaĝiĝiri na asi boĝono kiraĝi-tore ĝemi guruĝa vaĝa-moĝoniri ĝana. Guba o tanobara o dagara boruna ta aranai asi boĝono kiraĝi-tore. Bema “Oi” ĝotoni nai tu, oi moĝo boĝono si, a “Asiĝina” ĝotoni nai maki, asiĝina moĝo boĝono si. Moĝesi tu Barau na asi bekiramini ĝomi tu kerere.

Ĝuriĝuri ma seĝukana

¹³ Ĝomi fakami ai ta emidigumidiguni ba? Bene ĝuriĝuri. Ta eiakuni ba? Barau vaĝa-raĝena mariri bene ĝabi.

¹⁴ Ta ekeveni ba? Ĝia tu ekalesia ĝeĝori-kauani tarimari vetuĝuri bene vei, beĝenema ĝuriĝuri ĝia iatanai ema diĝa na beĝenema daua Vereĝauka aranai.

¹⁵ Benamo ĝauĝau ma veĝabidadamari ĝesi nai tu, keve tarimana benamoni. Barau na ĝena keve bevaĝa-namoani, ema bema rakava eveito nai, ĝena rakava betuĝamaĝi-fitoĝarini.

¹⁶ Moĝa lorinai, ĝemi rakava karomi tata ĝeri ai boĝono kiraĝi-foforiri, ema tata ĝeri boĝono ĝuriĝuri, be ĝemi keve na boĝono namo. Barau ĝena ura eveirini tarimana ĝena ĝauĝau tu seĝuka rakava.

¹⁷ Elia tu tarimarima ĝita kavana. Ĝia eĝuriĝuri-gwadagwadato ĝura asi bene ragu ĝana, benamo tanobarai ĝura laĝani toitoi (3) ma ĝue imaima sebona (6) asi eraguto.

¹⁸ Ma eĝuriĝuri-ĝenoĝoito, benamo guba evekeo-fakato, ĝura ma eraguto; benamo tano na ĝaniĝani ma evaĝa-ĝoraiato.

¹⁹ Tarikakagu mabarami, bema ĝomi ta Barau ĝena guruĝa moĝonina ĝenana beraka-veĝitani, benamo ta na ma bea ĝori-ĝenoĝoiani nai tu, veiĝa namona beveiani.

²⁰ Boḡono riba, deikara na veig̃a rakava tarimana ḡena dabara ḡeḡevana na eḡori-ḡenoḡoiani nai tu, ḡia na mo veig̃a rakava tarimana iaukana mase ḡenana evaḡa-maḡuriani, ema rakava ḡutuma maki Barau na etuḡamaḡi-fitoḡarini.

PETERO ĜENA TORETORE GINIGUINENA

1 Petero vaĝa-foforina guruĝari

Petero tu kone ai maina tarimana, ma ĝia tu Iesu ĝena mo mero gabanana ruarua (12) nuĝanai maki. Mai fefa Petero na tu betaĝu Romai etoreato laĝani 62 ma 64 fakari nuĝanai ta. Mo tu Iesu maki emaseto murinai vau.

Siri baregori mai fefai tu karoa 1:7; 4:12-13.

Mai fefa etoreato nuĝanai ĝia ĝena ura tu Iuda ekalesiari ema irau bese ekalesiari 1) bene vaĝa-kokoreri, be tarimarima na ĝevaĝa-midigu midigurito-ĝoi nuĝanai beĝene ruĝa-gwaĝiĝi; 2) ĝoirai veribaĝani baregori beĝe raga-ĝoitaĝorini moĝeri ĝana erovina-torerito; 3) ĝoirai Barau ĝena mareva baregona ĝeĝoira-taĝoani moĝa ĝeri evaĝa-foforiato; 4) bene lau-naĝiri, be ekalesia ĝauveiri korikori beĝene veiri.

Petero na ĝena fefa tu maĝesina eboioĝaiato:

1. Barau ĝena vevaĝa-maĝuri ma ekiraĝi-variĝu-ĝoiato - karoa 1:1-2:10

2. Midigumidigu nuĝanai aiĝesina beĝene tanu - karoa 2:11-4:11

3. Midigumidigu nuĝanai ĝeri veĝa ĝobiri beĝene toreri - karoa 4:12-5:11

¹ Au Petero, Iesu Keriso ĝena apostolo taugu, na mai fefa atore-iaĝosiani. Gomi, Barau ĝena ĝabi-viriĝi tarimami, ĝemi gabu korikori ĝoraga-kwanerito, toma tu Ponto ai, Galatia ai, Kapadokia ai, Asia ai, ema Bitinia tano boruri ai ĝotanu-lautilausini tarimami ĝemi ai.

² Ĝomi tu Barau, ĝita Tamara, na eriba-guinemito ema eĝabi-hidimito, ĝena tarimarimai boĝo iaĝoni. E ĝia Iaukana na evaĝa-veaĝamito korana tu, Iesu Keriso boĝono seĝaĝi-vinia ema ĝia rarana na bene ĝuriĝimi ĝana, be veiareva boĝono tanu Barau ĝoiranai.

Barau ĝena varevare-bara ema maino na bene vaĝa-vonuvonu-raĝemi.

Maĝuri vanaĝivanaĝi

³ Barau, ĝita ĝera Vereĝauka Iesu Keriso Tamana, sivaĝa-namoa! Korana ĝena vevetuĝaĝwa barego vedaureana lorinai, maĝuri variĝuna ĝita evinirato, Iesu Keriso mase na evaĝa-variĝisi ĝenoĝoiato ĝenana. Mai veĝa ĝenana ĝita nuĝara tu maĝuri vanaĝivanaĝi tatuĝamaĝi-kauani dagarana na evaĝa-vonurini.

⁴ E Barau na ĝena tarimarima ĝeri etore-rogoani vevaĝa-namo baregona, bitana ĝabia dagarana, tu ĝoirai taĝita-iaĝoani. Barau na gubai etore-rogorini ĝomi ĝemi, korana monai tu asi beĝe boraĝani, asi beĝe rakavani, e asi beĝe verumuni.

⁵ Ĝomi tu ĝemi veĝabidadama dainai Barau seĝukana na eĝita-ĝaumini, beiaĝoni mo, ĝia na varau erovina-toreato vevaĝa-maĝurina nega magonai bevaĝa-foforiani, matami na boĝo ĝitaiani e boĝo ĝabiani.

⁶ Ĝomi toma kotunai tu midigumidigu barego ĝoĝanini, korana veribaĝani irauirauri ĝoĝoitaĝoni bene. Senaĝi ĝemi iaku tu bene barego-lelevaĝi, korana Barau ĝena vevaĝa-maĝuri boĝo ĝabiani bene.

⁷ Maĝeri veribaĝani irauirauri ĝeiaĝomani tu, Barau na ĝomi ĝemi veĝabidadama etoto-iobuka iobukarini, korana Iesu Keriso befoforini ĝaronai tu, Barau ĝenana vevaĝa-raĝe e mareva namona ema vegubakau boĝo doĝariani. Golo karava na evaĝa-namo vedaureaiani ma voina evaraĝe-lelevaĝini, senaĝi ĝomi ĝemi veĝabidadama voina tu ma varaĝe lelevaĝi.

⁸ Ĝomi na roĝosi roĝo maki ĝoro ĝitaia, senaĝi ĝoura-viniani. Initoma maki asi ĝoĝitaiani, senaĝi ĝoĝabidadama-viniani ema iaku na ĝovonu-vonu-raĝeni. Ĝemi iaku maki asi tau kirari vaĝa-namona ta.

⁹ Korana Keriso ĝenai ĝoveĝabidadamani voina tu, ĝomi vevaĝa-maĝuri ĝoĝoitaĝoni.

¹⁰ Mai vevaĝa-maĝuri maĝa tu peroveta tarimari na ĝevetau-ginikau ginikauato, ema ĝia na ĝekiraĝi-tore guineato, mai varevare dagarana tu Barau na ĝomi bevinimini, (Keriso beiaĝomani ĝaronai).

¹¹ Beiaĝomani ĝarona e kamasi beiaĝomani beĝene ribaia ĝana ĝetuĝamaĝi-vekwaraĝito-ĝoi. Mo negai Keriso Iaukana tu ĝia nuĝari ai eĝauveito-ĝoi ema ekira-vararito-ĝoi, Keriso tu ĝena midigumidigu bevevaĝa-gwaĝiĝi-iaĝiani, ma moĝa murinai vau ĝia marevana baregona beĝabiani.

¹² Barau na peroveta tarimari evaĝa-ribarito, ĝia na mo vari ĝeĝobata-iaĝiato-ĝoi tu dia ĝia tauĝeri ĝeri namo ĝana, senaĝi ĝomi ĝemi. Korana ĝia na mo dagara, ĝekiraĝirito dagarari, tu toma ĝena vetuĝunaĝi tarimari na Vari Namona ĝevari-fuani guba na etuĝu-mariĝoato Iauka Veaĝana seĝukanai, be ĝoseĝaĝini. Maiĝeri dagara tu aneru maki ĝeri ura baregona beĝene ribaia.

Boĝono veaĝa

¹³ Moĝa lorinai, nuĝami beĝene veiareva, boĝono vevaĝa-gwaĝiĝi. Iesu Keriso befoforini ĝaronai Barau na bevinimini varevarena ĝenai, nuĝami mabarana ĝesi boĝono torea.

¹⁴ Barau natunai ĝoiaĝoto nai, ĝia boĝono seĝaĝi-vinia. Barau asi ribami negari ai tauĝani ĝena ura rakavari na ĝeĝori-ĝeĝevamito-ĝoi veiĝari asi ma boĝono vei-ĝenoĝoiri.

¹⁵ Senaĝi ekeamito Barauna tu veaĝa, ilailanai ĝomi maki boĝono veaĝa ĝemi veiĝa mabarari nuĝari ai.

¹⁶ Korana Buka Veaĝa nuĝanai etoreato, Barau ekirato, “Boĝono veaĝa, korana au tu veaĝa.”

¹⁷ Ĝoĝauĝauni negari ai, Barau tu Tamami ai ĝokiraĝiani, ma ĝia na tarimarima mabarari tu dabara sebonai moĝo evaĝa-maoro vinirini, tata ĝeri veiĝa ilailari ai; moĝa lorinai mai tanobarai roĝo ĝotanukauni nuĝanai tu, Barau boĝono gubakaua e boĝono seĝaĝi-vinia.

¹⁸ Korana ma ribami, senemi ĝeri maĝuri rakavari ĝomaĝuri-iaĝirito-ĝoi ĝerina Barau na evaĝa-maĝurimito ginitaĝo dagarana tu asi berakavani dagarana. Dia silva o golo kavari.

¹⁹ Senaĝi evaĝa-maĝurimito ginitaĝo dagarana tu Keriso rarana, rara namo vedaureana, Barau ĝena mamoe natuna rarana asi mirona e kererena.

²⁰ Ĝia tu Barau na tanobara roĝosi bere veia neganai veĝata, eĝabiviriĝiato. Senaĝi ĝita vaĝa-maĝurira ĝana mai nega gabiri ai ema vaĝa-foforiato.

²¹ Ĝia bakunai Barau ĝoĝabidadama-viniani. Barau na mase ĝenana evaĝa-variĝisi-ĝenoĝoiato, e marevana baregona eviniato. Moĝa lorinai ĝomi na Barau ĝoĝabidadama-viniani, ema ĝemi tuĝamaĝikau ĝia ĝenai ĝotoreani.

²² Toma, ĝomi na guruĝa moĝonina ĝoseĝaĝi-viniato lorinai, tauĝemi ĝoveiarevato, ema karomi veĝabidadama tauri ĝesi moĝoni ai ĝoveura-vevinini. Moĝa lorinai boĝono veura-vevini ma nuĝami mabarari ĝesi.

²³ Korana ĝomi tu ĝomaĝuri-ĝenoĝoito, tarima variĝu geragerami ai ĝoiaĝoto, dia tama sina ĝerina, ĝia tu ĝemaseni, senaĝi Barau ĝena maĝuri gurugana, etanu-vanaĝi vanaĝini gurugana, ĝenana evaĝa-maĝuri ĝenoĝoimito.

²⁴ Buka Veāga ekirani kavana,
 “Tarimarima mabarari tu regi kavana,
 gia marevari tu regi gwaḡwana kavana.
 Regi tu gemaraini,
 ema veravera maki geketoni,
²⁵ senagi Vereḡauka gena guruḡa tu
 betanu-vanaḡi vanaḡini.”

Mai guruḡa tu Vari Namona gomi gēmi ai gēvari-fuato.

2

Vereḡauka tu maḡuri forena, fore namo vedaureana

¹ Moḡa lorinai, tuḡamaḡi rakavari mabarari, e ḡofaḡofa mabarari, e vemuriḡoi mabarari, e mama, ema guruḡa rakavari mabarari boḡono fitoḡa-kwareḡari.

² Vau gemaḡurini mero keiri kavari boḡono vei, vanaḡivanaḡi iauka ratana boka-kokena boḡono boka-koke, be moḡa niuniunai boḡono barego e vevaḡa-maḡuri boḡono ḡabia.

³ Korana gomi tauḡemi na ḡodoḡariato, Vereḡauka gena namo tu aiḡesina.

⁴ Vereḡauka genai ḡoiḡoma, gia tu maḡuri forena, tarimarima na ḡefitoḡaiato, korana asi gena namo ta ḡetato. Senagi Barau na eḡabi-viriḡiato, korana fore namo vedaureana gia ḡoiranai.

⁵ Maḡuri foreri kavana ḡoiḡoma, be gomi maki Barau Iaukana na Rubu Veāgai bene raga-iaḡimi. Monai Rubu Veāga vereri veāgami ai boḡono iaḡo, ma Barau na Iesu Keriso bakunai eḡabi-raḡerini iauka varevareri, gēmi maḡuri, boḡono vinia.

⁶ Korana Buka Veāga ekirani,
 “Au na fore namo vedaureana ta aviriḡiato,
 gia tu Sionai (o Ierusalem)
 duḡu forenai avaḡa-iaḡoato.
 Dei na gia bevaḡa-moḡoniani
 tarimana tu asi bemaikaini.”

⁷ Govaḡa-moḡoniani tarimami gēmi ai mai fore tu namo vedaurea, senagi asi ḡevaḡa-moḡoniani tarimari ḡeri ai tu,

“Numa ragaragana tarimari na
 asi ḡeura-viniato nai ḡefitoḡaiato,
 ḡekirato fore rakavana,
 dagarana tu fore mabarari fakari ai fore namo vedaureana,
 duḡu forenai eiḡoto.”

⁸ Ma toretore tai ekirani,
 “Mai fore na tarimarima bevaḡa-kake-naḡirini,
 e bevaḡa-ketorini forena.”

Barau gena guruḡa asi ḡeseḡaḡiato dainai, ḡevake-ḡaḡito, mo tu Barau na ekiraḡi-guineato, moḡesi beḡe veiani.

⁹ Senagi gomi tu ḡabi-viriḡi besena, Kini gena Rubu Veāga veremi, bese veāgana, Barau gena tarimarima. Eḡabi-viriḡimito, mukuna na ekearositito, benamo gena mama namo vedaureanai etoremito, korana tu gia gena veḡa namori boḡono kiraḡi-foforiri ḡana.

¹⁰ Guinenai gomi tu dia Barau gena tarimarima, senagi toma gomi tu gia gena tarimarima. Guinenai Barau gena vevetuḡaḡwa tu asi ribami, senagi toma gia gena vevetuḡaḡwa ḡodoḡariato.

Barau gena vetuḡunaḡi tarimari

11 Ĝatagu mabarami, anoĝi-gwaĝiĝimini, ĝomi tu tarima boru e tanukau tarimami mai tanobarai. Tauĝani ĝena ura rakavari asi boĝono veiri, maniĝeri na vanaĝivanaĝi ĝomi iaukami ĝevetari-vinirini.

12 Senaĝi Barau asi ribari tarimari ĝoirari ai ĝemi veiĝa beĝene namo. Beĝe rori-toremimi, rakava-vei tarimami ai beĝe kiraĝimini, senaĝi ĝemi veiĝa namori beĝe ĝitarini neganai, ĝia na Barau beĝe vaĝa-raĝeani, ĝia na tarimarima bekota-vinirini ĝaronai.

13 Vereĝauka ĝovaĝa-moĝoniani nai, gavamani ĝeri taravatu mabarari boĝono korana-iaĝiri: Kini boĝono seĝaĝi-vinia, korana ĝia tu varaĝe vedaurea.

14 E gavana tauri boĝono seĝaĝi-viniri. Ĝia na veiĝa rakava tarimari beĝene vaĝa-rakavari, ema veiĝa namo tarimari beĝene vaĝa-namori ĝana eĝabi-torerito.

15 Korana Barau ĝena ura tu, ĝomi ĝemi veiĝa namori na asi ribari tarimari ĝeri guruĝa babobabori boĝono lautariri.

16 Kokore ai boĝono tanu, be dagara ta na asi bene barubarumi, Keriso na eruĝa-vaĝirito tarimari kavana. Senaĝi asi boĝono kira, “Ĝai tu maĝuri namonai e fakanai ĝatanuni, be veiĝa rakavari baĝa veirini tu asi kara ta.” Asiĝina. Barau ĝena vetuĝunaĝi tarimami ai boĝono tanu.

17 Tarima mabarari boĝono gubakauri. Karomi veĝabidadama tarimari boĝono ura-viniri. Barau boĝono vaĝa-raĝea, e kini boĝono gubakaua.

Keriso kwakuna gabunai boĝono raka

18 Tuĝu-rakaorakao tarimami asi voimi, ĝitaĝaumi tauri boĝono seĝaĝi-viniri, moĝoni ai boĝono gubakauri, dia veiĝa-namo e garo-namo tarimari moĝo, senaĝi niara-niara tauri maki.

19 Korana Barau na eura-viniani veiĝana tu maiĝa: Barau ĝena ura ĝokorana-iaĝirini dainai, enabe asi ĝemi rakavai beĝe vaĝa-midigu midigumini, senaĝi boĝo vevaĝa-gwaĝiĝini.

20 Ĝemi rakava dairi ai beĝe kwarimini ma boĝo vevaĝa-gwaĝiĝini, moĝa ĝena namo ĝomi ĝemi ai tu kara? Senaĝi bema veiĝa namori ĝoveini nuĝanai beĝe vaĝa-midigu midigumini ma boĝo vevaĝa-gwaĝiĝini moĝo, Barau ĝoiranai tu namo eĝabi-raĝeani.

21 Gomi tu moĝesi boĝono vei ĝana, Barau na ekeamito. Korana ĝomi daimi ai Keriso tauĝena emidigu-midiguto, e ĝia na mai vevaĝa-ĝita ĝomi ĝemi ai eraga-kwaneato. Moĝa lorinai ĝomi tu ĝia kwakuna gabunai boĝono raka.

22 Ĝia na rakava ta asi eveiato, e ta na ĝia muruna na ĝofaĝofa guruĝana asi eseĝaĝiato.

23 Ĝeguruĝa-rakava-viniato, senaĝi guruĝa rakavari na asi evaĝa-voirito; ĝevaĝa-midigu midiguato neganai, vaĝa-voi guruĝari asi ekiraĝirito. Ĝia ribana, Barau tu vevaĝa-maoro tauna iobukaiobukana, naima ĝia ĝimanai etoreato.

24 Keriso tauĝena tauĝaninai ĝita ĝera rakava eĝwa-raĝerito satauro tuĝuna ĝana. Moĝesi eveito tu, vei-rakava ĝenai bitana mase, asi ma bitana vei-ĝenoĝoia, ema vei-iobukaiobuka ĝenai bitana maĝuri, Barau ĝena ura bitana korana-iaĝiri. Boĝono tuĝamaĝi: Ĝia manuĝana dainai, ĝoi onamoto.

25 Ĝomi tu rekwarekwa mamoeiri kavari ĝoraka-taĝui taĝuito-ĝoi. Senaĝi toma ĝomi tu iaukami nariĝauna e ĝitaĝauna tauna Keriso na ma beĝabi-ĝenoĝoimi.

3

Veĝaraĝo vavinemi ema taumi

¹ Ĝomi veĝaraĝo vavinemi maki moĝesi, ĝaraĝomi gabureri ai boĝono tanu. Moĝesi boĝo veini nai, tari ĝaraĝomi tu Barau ĝena guruĝa asi ĝevaĝa-moĝoniani tauri, senaĝi ĝemi veiĝa namori na moĝo nuĝari beĝabirini, benamo beĝe vetuĝamaĝi-kureni; a Barau ĝena guruĝa ta ĝeri tu asi boĝo kiraĝiani.

² Korana ĝemi veiĝa roroĝotori ema ĝemi vegubakau ĝia ĝeri ai beĝe ĝitarini tu namo.

³ Marevami ĝenamo-vedaurea urari ai tauĝaniami asi boĝono vaĝa-veraverari. Ilailana, ĝuimi ĝovei-iraurini, golo ĝotoreni e dabuĝa namori vedaureari ĝoriĝorini.

⁴ Asiĝina, ĝomi tu lorumi ĝuturi neĝi boĝono vaĝa-veraverari, asi beĝe rakavani veraverari na, manau e nuĝa-namo. Moĝeri tu Barau ĝoiranai dagara baregori.

⁵ Guinenai, ĝita tubura ĝatara ĝeri negai maki vavine veaĝari, Barau ĝenai ĝeveĝabidadamato-ĝoi vavineri, tu moĝesi ĝevevaĝa-marevato-ĝoi, e ĝaraĝori gabureri ai ĝetanuto-ĝoi.

⁶ Sara kavana, ĝaraĝona eseĝaĝi-viniato-ĝoi; ĝaraĝona tu “Ĝegu vereĝauka” etato-ĝoi. Ĝomi toma tu ĝia natuna, bema ĝemi veiĝa tu namo e kara ta garina asi ĝoveini.

⁷ Ĝomi tau maki ĝaraĝomi ĝesi ĝotanuni nai, boĝono riba-ginikauri. Boĝono riba, ĝia tu asi fakosiri. Ĝaraĝomi boĝono gubakauri, korana Barau na maĝuri vanaĝivanaĝi tu ĝia e ĝomi bevarevare-vinimini. Moĝesi boĝono vei, be dagara ta na ĝemi ĝauĝau-vegogo asi bene vaĝa-rakavari.

Veiĝa namori ai bitana midigu-midigu

⁸ Guruĝa vaĝa-magona maiĝa: Mabarami nuĝami boĝono vaĝa-sebonari, boĝono vevaĝa-kava-vevini, e boĝono veura-vevini tarikaka kavari. Boĝono vevetuĝaĝwa-vevini e boĝono marana.

⁹ Veiĝa rakavari e garo rakavari asi boĝono vevaĝa-voi-vevini, senaĝi ĝevaĝa-rakavamini tarimari boĝono vaĝa-namori. Korana Barau na ekeamito tu moĝesi boĝono vei, benamo ĝomi na maki ĝena vevaĝa-namo boĝono ĝabia.

¹⁰ Korana Buka Veaĝa ekirani,
 “Deikara maĝuri eurani e ĝaro namori bene ĝitari etoni tarimana tu meana bene naria,
 guruĝa rakavari asi bene kiraĝi,
 e muruna na ĝofaĝofa guruĝari asi bene kiraĝiri.

¹¹ Rakava bene raga-kwanea,
 veiĝa namori bene vei.

Maino bene vetaua nuĝana mabarana ĝesi.

¹² Korana Vereĝauka na tu vei-iobukaiobuka tarimari eĝita-ĝaurini,
 e ĝeri ĝauĝau eseĝaĝirini.

Seniĝi vei-rakava tarimari tu
 Vereĝauka na asi eura-vinirini.”

¹³ Veĝa namori bouravini-baregorini nai tu, dei na ĝoi bevaĝa-rakavamuni?

¹⁴ Seniĝi irau beĝe vaĝa-mididgu midigumini ĝemi vei-iobukaiobuka dairi ai nai tu boĝono iaku. Tarima ta garina asi boĝono vei, e asi boĝono daradara.

¹⁵ Seniĝi nuĝami ai Keriso boĝono korana-iaĝia, boĝono vaĝa-raĝea, ĝia tu ĝomi ĝemi Vereĝauka. E vanaĝivanaĝi boĝono venari-taĝo, bema ta na

bedanaġimini, “Kara dainai Keriso ġoġabidadama-viniani” betoni nai, ġena boġono kiraġi-ginikau.

¹⁶ Senaġi manau ai e vegubakau ai ġena boġono kiraġi-ginikau. Ġemi veiġa loriri boġono toreri, asi namo gabivau boġono riba ġomi tu asi maoro. Keriso murinai ġorakani ma veaġami ġesi dainai, ġemugumugu-iaġimini e rakavami ġekiraġini tarimari tu tauġeri roġo beġe maiakarini.

¹⁷ Barau ġena urai veiġa namori ġoveini dairi ai ġomidigu-midiguni nai tu namo. A asi namo ġemi veiġa rakavari dairi ai boġono midigu-midigu.

¹⁸ Keriso emaseto, ġera rakava bene voi-vaġiri ġana. Ġia tu nega sebona moġo emaseto, asi ma bemaseni. Ġia tu vei-iobukaiobuka tauna, ġita rakava tarimara bene kurevora, be Barau ġenai bene ġori-iaġora ġana. Tauġani maġurinai tu ġevaġi-maseato, senaġi iauka maġurinai ġia tu evariġisi-ġenoġoito.

¹⁹ E iaukai ġia eiaġoto mase gabuna o dibura ġana, monai ġetanuni tarimari iaukari ġeri ea ġobato.

²⁰ Ġia tu guinenai ġekira-sirivaġito tarimari, Noa na ġasi baregona eveiato neganai, benamo Barau na evaġa-nogarito ma vevaġa-gwaġiġina ġesi, (ġeri rakava ġerina beġene vetuġamaġi-kure ġana). Senaġi ġasi baregona nuġanai ġeraka-toġato tarimari tu asi ġutuma. Tauri mabarari tu imaima toitoi (8) moġo nanu na evaġa-maġuririto.

²¹ Mo nanu moġa tu babatiso vetoġana kavana, korana babatiso na toma ġomi evaġa-maġurimini, dia tauġani mirona ġuriġi-vaġina, senaġi Barau ġonoġiani nuġami bene iarevari ġana Barau ġoiranai. Iesu Keriso mase na evaġa-variġisi ġenoġoiato bakunai evaġa-maġurimini.

²² Ġia tu gubai eraka-toġato, Barau aroribana rekenai etanuni. Aneru, e ma ġeri maoro baregona iaukari, ema seġuka tauri mabarari tu ġia gaburenai ġetanuni.

4

Ekalesia maġurina

¹ Keriso tu tauġaninai emidigu-midiguto lorinai, ġomi maki ġemi tuġamaġi boġono vaġa-gwaġiġiri, ġia ġena tuġamaġi ġesi beġene ilaila; korana tauġaninai emidigu-midiguni tarimana na veiġa rakavari eraga-kwanerini.

² Tauna moġa, ġomi roġo mai tanobarai ġotanuni nuġanai tu, tauġanimi ġeri ura rakavari asi boġono korana-iaġiri, a Barau ġena ura neġi boġono korana-iaġia.

³ Ġomi tu kai-veġata Barau asi ribari tarimari ilailari ai ġotanuto-ġoi, mata-boraġa e veġura-vanaġi veġari ġoveito-ġoi, ġoniu-lelevaġito-ġoi, ġovei-taġuitaġuito-ġoi, ġoniu-vegogoto-ġoi, e barau ġofaġofari ġotoma-rakariġo vinirito-ġoi.

⁴ Toma, ġia tu ġeveiauni, korana ġia ġesi asi ġovekakoni, e asi ġovei-taġuitaġuini. Moġa lorinai rakavami ġekiraġini.

⁵ Senaġi ġia tu maġuri tarimari e mase tarimari vaġa-maoro-viniri Barauna ġoiranai beġe ritoġoni, ġeri veiġa moġeri beġe kiraġirini.

⁶ Moġa lorinai Iesu na Vari Namona tu ġemaseto tarimari iaukari ġeri maki evari-fiuato. Moġesi eveito korana tu, enabe Barau na tauġani ai evaġa-maoro vinirito tarimarima mabarari kavana, (mai tu ġemaseto), senaġi iaukai tu roġo beġe maġurini, Barau emaġurini kavana.

Barau ġena varevare dagarari ġitaġauri tarimari namori

⁷ Dagara mabarari magori tu bekavinaġi. Boġono venari-taġo e boġono vevaġa-gwaġiġi, be ġemi ġauġau asi boġono vaġa-ketoa.

⁸ Barego vedaureana tu, tata boġono veura-vevini ma nuġami mabarari ġesi, korana veura-vevini na rakava ġutuma elautaririni.

⁹ Karomi tata ġesi veġa namori boġono vei-vevini, boġono veġabiraġe-vevini, asi boġono vemugu-mugu e veroritore.

¹⁰ Ġomi tata mabarami tu, Barau na evaġa-ġaunamito varevare dagarari iraurau ġitaġauri tarimami namomi, moġa lorinai karomi dairi ai boġono ġauvei-iaġiri, kamara varevare dagarana Barau ġenana ġodoġariato ilailanai.

¹¹ Deikara eġobatani nai, ġia tu Barau ġena guruġa bene vari-fiua. Deikara evevaġa-kavani nai, ġia tu Barau ġena kokore na bene vevaġa-kava. Mo dabarai dagara mabarari nuġari ai Barau bita vaġa-raġeani, Iesu Keriso bakunai. Mareva namona e seġuka tu ġia ġena, bene iaġo mo vanaġivanaġi. Amen.

Ekalesia midigumidiguna

¹² Ġataġu mabarami, midigumidigu karava mamiri noġa ġoġabini nai tu, nuġami asi beġene farevaġi, asi boġono kira, dagara boruna ta ġemi ai eġorani. (Asiġina, mani tu ġomi tovonagimi dagarana moġo).

¹³ Senaġi Keriso emidigu-midiguto kavana ġomidigu-midiguni dainai, boġono iaku, gabivau ġia marevana baregona bevaġa-foforiani neganai vau ma boġo iaku-sirivaġini.

¹⁴ Keriso murinai ġorakani nai, rakavami beġe kiraġini neganai, boġono iaku, korana monana boġo ribani, Barau Iaukana, mareva-namo Iaukana, tu ġomi iatami ai etanuni.

¹⁵ Bema ġomi ta omidigu-midiguni nai, mani midigumidigu tu dia ovevaġi-debani, o olemani, o seġafore veġana rakavana ta oveiani, o tarima ta ġena ġauvei metona oveiani nai omidigu-midiguni.

¹⁶ Senaġi bema ġoi tu Keriso murinai orakani dainai omidigu-midiguni neganai, asi bene maiakamu, senaġi Barau bono vaġa-raġea, Keriso arana oġwa-rakaoani nai.

¹⁷ Barau ġena vevaġa-maoro negana tu varau beraġasi, e vevaġa-maoro tu Barau ġena tarimarima ġeri ai bevesinani. Bema ġita ġerai bevesinani neganai, Barau ġena Vari Namona asi ġevaġa-moġoniani tarimari ġeri ai tu kamasi bea ġorani?

¹⁸ Korana Buka Veaġa ekirani,
 “Maġuri ġabiġabina Barau ġeseġaġi-viniani tarimari ġeri ai tu gwaġiġi.
 O Barau asi ġevaġa-moġoniani
 e vei-rakava tarimari dabarari tu
 kamasi bevetoreni? (Ġia ġeri ai tu meto lelevaġi!)”

¹⁹ Tauna moġa, Barau ġena ura lorinai midigu ġeġanini tarimari tu veġa namori moġo beġene vei, ema ġeri maġuri tu eveirito Barauna ġimana nuġanai beġene toreri, korana ġia na etuġamaġi-kaurini.

5

Ekalesia ġorikauna tarimari

¹ Au na ġomi fakami ai ekalesia ġorikauna taumi avaġa-guruġamini. Au maki ekalesia ġori-kauna taugu. Keriso emidigu-midiguto-ġoi au tu matagu na aġitaiato, e ġia marevana baregona bevaġa-foforiani neganai, au tu ma augu. Moġa lorinai au na ġomi anoġi-gwaġiġimini:

² Barau ġena mamoe serina boġono ġitaġau-ginikaua. Ġia na ġomi evinimito tu, nuġami na eura-iaġiani lorinai boġono ġita-ġaua, ġia ġena ura ilailanai. Dia mugumugu ai, senaġi nuġami na eura-iaġiani lorinai. Dia moni o farefare boġono doġari ġana, senaġi nuġami ġeri urai.

³ Barau na ġomi ġemi veġitaġau gaburenai etoreato mamoe serina (o ekalesia doġorona) asi boġono dori-naġinaġia noġa moġo vere baregori ġeveini kavana. Senaġi ġomi marevami boġono vaġa-ġitari, be beġene tovotovomi.

⁴ Moġesi boġo veini nai, mamoe Ġitaġauri Tauna Baregona, Keriso, beġoira-refoni ġaronai, korona namo vedaureana, asi berakavani dagarana, boġo ġabiani, mo tu maġuri vanaġivanaġi.

⁵ Moġa ilailanai, ġomi tarima variġumi maki veġitaġau tauri boġono seġaġi-viniri, ma ġomi mabarami na manau dabuġana boġono vedabuġa-iaġia, boġono vevaġa-kava-vevini, korana Buka Veaġa ekirani, “Veiavi tarimari tu Barau na elautaririni, senaġi manau tarimari tu ġena namo e varevare-bara evinirini.”

⁶ Moġa lorinai, tauġemi boġono vevaġa-manau, Barau ġimana seġukana gaburenai, benamo ġarona bene raġasi neganai, ġia na bene ġabi-vaissimi.

⁷ Ġemi nuġa-vekwaraġi dagarari mabarari ġia ġimanai boġono toreri, korana ġia na eġita-ġaumini.

⁸ Boġono tuġamaġi-roroġoto, boġono venari! Korana vaġa-rakavami tauna, Diabolo, tu erakao-rakaoni, laion noġa emagarani, emaramarani, ta neġania uranai.

⁹ Ġemi veġabidadamai boġono ruġa-gigitari, benamo Diabolo boġono kora-ġoia. Korana boġono tuġamaġi, ġoġanini midiguri ilailari tu ġomi karomi tanobara mabaranai maki ġeġanini.

¹⁰ Senaġi Barau, namo e vare-vare-bara mabarari na evonuto Barauna, na Keriso bakunai ekeamito, nega kotunai moġo boġo midigu-midiguni murinai, ġena tanu-vanaġivanaġi marevana namona boġono ġabia ġana. Ġia na vau bevaġa-namo ginikaumini, bevaġa-ruġa gigitarimini, e bevaġa-kokoremimi.

¹¹ Seġuka tu ġia ġena, bene iaġo vanaġivanaġi! Amen.

Vevaġa-namo magona

¹² Siluano, (mai tu Silas), na bevaġa-kavagu, mai fefa kubina baġa tore-iaġosia ġomi ġemi. Ġia au na aġitaiani tu, ġita tarikakara ma ġena vetuġamaġikau ekalesia nuġanai. Mai fefa batorea korana tu ġegu ura bana vaġa-kokoremi e bana vaġa-ribami, Barau ġena namo e varevare-bara moġonina tu maiġa. Be mai namo e varevare-bara nuġanai boġono ruġa-gigitari.

¹³ Ġomi karomi ekalesia tarimari Babulona ai maiġeri, (mai tu ekalesia tarimari Romai ekiraġirini), ġia maki Barau na eġabi-viriġirito tarimari, na ġemi vevaġa-namo beġe tuġu, e natugu Mareko na maki ġemi vevaġa-namo betuġu.

¹⁴ Veuravini verauna na boġono vevaġa-namo-vevini.

Keriso nuġanai ġotanuni tarimami mabarami maino ġemi ai bene tanu.

PETERO ĜENA TORETORE VAĜA-RUARUANA

2 Petero vaĝa-foforina guruĝari

Petero na mai fefa vaĝa-ruaruana maki betaĝu Roma na etoreato. Eto-reato laĝanina tu 65 ma 67 fakari nuĝanai ta, mo tu Iesu emaseto murinai. Petero tu mai fefa etoreato murinai vauro ĝebaru-seiriĝoato, benamo ĝevaĝiato.

Mai fefa nuĝanai siri baregori tu karoa 3:17-18.

Petero na mai fefa etoreato tauna korikori tu, 1) Barau ĝena tarima veaĝari bene vaĝa-naĝiri, be Barau korana-iaĝina veiĝari korikori beĝene veiri ĝana; 2) vevaĝa-riba tarimari ĝofaĝofari na beĝe ĝofa-darererini garina ekira-toreĝaurito; 3) riba korikorina Barau ĝenana eiaĝomani tu aiĝesina ema Satani na riba ĝofaĝofana evaĝa-raka-rosiani ribana tu aiĝesina, moĝeri ekiraĝi-foforirito; 4) Vereĝauka ĝena ĝaro ai Kota baregona beveĝabini moĝa ekiraĝi-fofori ginikauato.

Petero na mai fefa tu maiĝesina eboioĝaiato:

1. Barau ĝenana eiaĝomani ribana korikorina tu kamasina - karoa 1
2. Riba moĝonina na boraka-veĝitani tu kara rakavana beĝorani - karoa 2
3. Barau ĝena kiraĝitore moĝoniri - karoa 3

¹ Au, Simona Petero, Iesu Keriso ĝena vetuĝunaĝi ema ĝena apostolo taugu; ĝeguna mai fefa eiaĝosini.

Gomi ĝai ĝesi ĝera veĝabidadama sebona taĝabiato tarimami atorevinimini. Ĝera Barau, ĝera Vevaĝa-maĝuri Tarimana Iesu Keriso, ĝena vei-iobukaiobuka e vetuĝamaĝikau lorinai, ĝomi maki mo veĝabidadama namo vedaureana sebona ĝoĝabiato ĝai apostolo kavana.

² Ĝemi riba e tuĝamaĝi-faka Barau ĝenai ema ĝera Vereĝauka Iesu Keriso ĝenai beĝene barego. Monana vau varevare-bara e maino maki ĝemi ai beĝene barego.

Barau na ekeamito ĝia ĝena

³ Ĝena seĝuka na Iesu Keriso na ĝera maĝuri vaĝa-kokoreri dagarari mabarari varau evinirato, Barau ĝena ura bitana korana-iaĝi korikoriri ĝana. Korana Keriso ĝenana Barau tama ribaiato, ĝena mareva baregona e namo ĝerina ekearato tarimana.

⁴ Ĝena mareva baregona e namo ĝerina ĝena kiraĝitore baregori e namo vedaureari varau evinirato vaĝa-ilailana: Mai tanobara ĝena ura rakavari ema mase ĝevaĝa-ĝorarini veiĝari ĝerina bene vaĝa-maĝurira, ma Barau maĝurina korikorina bitana ĝabia.

⁵ Moĝa lorinai boĝono kokore, ĝemi veĝabidadama ĝenai veiĝa namo boĝono torekau; veiĝa namo ĝenai tuĝamaĝi-maĝata boĝono torekau;

⁶ tuĝamaĝi-maĝata ĝenai nuĝa-gwaĝiĝi boĝono torekau; nuĝa-gwaĝiĝi ĝenai vevaĝa-gwaĝiĝi boĝono torekau; vevaĝa-gwaĝiĝi ĝenai Barau korana-iaĝina boĝono torekau.

⁷ Barau korana-iaĝina ĝenai tarikakami veuraviniri boĝono torekau; ema tarikakami veuraviniri ĝenai veuravini tarimarima mabarari ĝeri ai boĝono torekau.

⁸ Maiĝeri maĝuri tu ĝomi ĝemi ai beĝene tanu, ema beĝene barego, korana maiĝeri na ĝomi beĝe launaĝi-naĝimini ema beĝe vaĝa-kokoremini, benamo ĝemi riba Iesu Vereĝauka ĝenai tu asi beĝe tanu-kavani, senaĝi ĝwaĝwari namori vovoka beĝe vetoreni.

⁹ A bema maiġeri maġuri ai erabuni tarimana, ġia tu mata-bubu tarimana kavana, korana Barau na ġena veiġa rakavari guineri varau eġuriġi-fitoġarito evetuġarekwani.

¹⁰ Moġa lorinai, tarikakagu, boġono kokore, Barau na ekeamito e eviriġimito maniġa boġono vaġa-moġonia. Moġesi boġo veini nai tu, asi boġo ketoni.

¹¹ Moġesi boġo veini nai, Barau na beġabiraġe-ginikaumini, benamo ġera Vereġauka e Vevaġa-maġuri Tarimana Iesu Keriso ġena tanu-vanaġivanaġi Basileiana nuġanai boġo raka-toġani.

¹² Mo maġuri namona tu ġomi ġoirami ai enarimini, moġa lorinai au na ġomi vanaġivanaġi basisiba-vini ġenoġoi-ġenoġoimini. Moġoni, maiġeri dagara mabarari varau ġoribarito, ema Barau ġena guruġa moġonina ġoġabiato ema ġoġabi-gigitariani maki.

¹³ Senaġi au atuġamaġini, mai dabara namori ġomi tu ġemi vetuġamaġi-taġo ai bana vaġa-foforiri, au roġo amaġuri-taġoni nuġanai.

¹⁴ Korana au ribagu, au tauġanigu korina tu dori atore-tariani, ġita ġera Vereġauka Iesu Keriso na evaġa-guruġaguto ilailanai.

¹⁵ Moġesi naima ġegu ura mai dagara mabarari bana sisiba-vini ginikaumi. Benamo ġegu mase murinai, ġomi na boġono tuġamaġi-taġo vanaġi-vanaġiri ġana.

Iesu marevana baregona matama na ġaġitaiato

¹⁶ Ġai tu dia sinasina ġofaġofari na ġita ġera Vereġauka Iesu Keriso ġena seġuka ema ġena iaġoma-ġenoġoi ġomi ġavaġa-ribamito. Asiġina! Ġai tauġema matama na ġia marevana baregona ġaġitaiato.

¹⁷ Ġai matama ġutuġutunai Barau ġita Tamara na ġia ara baregona ema mama ma seġukana eviniato. Mo mama baregona nuġanai etanuni Barauna guba na ekea-riġoto Iesu ġenai, ekirato, “Mai tu au Natugu, aura-viniani; ema ġia ġenai aiaku-rakavani maki.”

¹⁸ Ġai tauġema na ġaseġaġiato, mai garo guba na emariġoto, ġia ġesi ġoro veaġanai ġatanuto-ġoi nai.

¹⁹ Moġa lorinai ġai tu peroveta tarimari na ġekiraġi-torerito guruġari ġaġabi-gigitarinini. Ġomi maki moġeri guruġa boġo korana-iaġirini tu namo, korana peroveta tarimari ġeri guruġa tu lamefa kavana, gabu mukunai emamani, beiaġoni mo nega beraġasini, Keriso, laġani visiġuna ġomi nuġami ai bemama-rovorovoni.

²⁰ Moġeri mabarari iatari ai ini guruġa asi boġono tuġarekwaia: Tarima ta ġia ġereġana ġena ribai peroveta guruġari tauri asi bekiraġirini.

²¹ Korana peroveta guruġari tu dia tarimarima ġeri ura na ġeiaġomato, senaġi Iauka Vevaġa na tarimarima evaġa-naġirito lorinai, ema guruġa evinirito ilailanai, Barau ġena guruġa ġeperoveta-iaġirito-ġoi.

2

Vevaġa-riba tarimari ġofaġofari

¹ Guinenai peroveta tarimari ġofaġofari tu Isaraela tarimari fakari ai ġefoforito-ġoi. Mo dabara sebonai vevaġa-riba tarimari ġofaġofari maki ġomi fakami ai beġe foforini. Ġia na vekuretoġai vevaġa-riba ġofaġofari beġe vaġa-ribamini, ġemi veġabidadama vaġa-rakavari uranai. Ema ġeri Vereġauka, evoirito tarimana, maki ġia na beġe ruġaiiani; moġesi beġe veini, ġia tauġeri na ġeri mase beġe vaġa-ġarimoġiani.

² Ĝutuma na maki ĝia ĝeri veiĝa rakavari e mata-boraĝa veigari beĝe tovo-tovorini, moĝeri urari ai kotari na dabara moĝonina tu dabara rakavanai beĝe kiraĝiani.

³ Ĝeri mata-ĝaniĝani ĝerina guruĝa ĝofaĝofari na nuĝami beĝe ĝanirini, beiaĝoni mo beĝea ĝabimini. Senaĝi ĝia tu kai-veĝata na vevaĝa-maoro-viniri tarimana tu enari-taĝoni, ema ĝia vaĝa-maseri tarimana tu eĝita-taĝorini.

⁴ Barau na ĝevei-rakavato aneruri maki asi evaĝa-maĝuririto, senaĝi rakava gabunai efiu-riĝorito. Monai seini na ebarubarurito mukuna furufuru nuĝanai, vevaĝa-maoro ĝarona ĝevaĝa-nogaiani.

⁵ Ema Barau na tanobara guinena maki asi evaĝa-maĝuriato, senaĝi ĝutuĝutu evaĝa-foforiato tu Barau asi ĝekorana-iaĝiato-ĝoi tarimari ĝeri ai; a Noa, vei-iobukaiobuka eĝobata-iaĝiato-ĝoi tarimana, ema tarima imaima ruarua (7) moĝo ĝia ĝesi evaĝa-maĝuririto.

⁶ Barau na Sodoma e Gomora maki evaĝa-maoro vinirito, karava na evaĝa-ĝara ĝosirito, kau ai ĝeiaĝoto. Mo veiĝa ĝenana Barau asi ĝekorana-iaĝiani tarimari matari bene vaĝa-kaniri ĝana.

⁷ A Lota moĝo eĝabi-maĝuriato, ĝia tu vei-iobukaiobuka tarimana, ĝia maki tarimarima ĝeri veiĝa rakavari e boraĝari tuĝamaĝiri ai egauto.

⁸ Mo tarima iobukaioubukana tu rakava tarimari fakari ai etanuto-ĝoi, ĝaro vanaĝivanagi enuĝa-midigu midiguto-ĝoi, korana ĝia na Barau ĝena taravatu kira-fitoĝari veigari eĝitarito-ĝoi ema eseĝaĝirito-ĝoi nai.

⁹ Boĝono tuĝamaĝi, Vereĝauka na tu ĝia ĝekorana-iaĝiani tarimari veribaĝani e vedaĝaraĝe nuĝari na beĝabi-maĝuririni riba, a vei-rakava tarimari bebiri-ĝaurini, beiaĝoni mo, Barau na bevaĝa-maoro vinirini ĝaronai.

¹⁰ Ma tarima kotari na rakava voina barego lelevaĝina beĝe doĝariani, mai tu tauĝanina ĝena ura boraĝari ĝeiaĝo-vinirini tarimari ema Barau ĝena guruĝa ĝekira-fitoĝaiani tarimari.

Mai vevaĝa-riba tarimari ĝofaĝofari tu veiavi e vekiraĝi-rakava rakava tarimari, iauka baregori asi ĝegubakaurini, ĝerikiriki-iaĝirini.

¹¹ Aneru tu kokore e seĝuka lelevaĝi, mai ĝofaĝofa tarimari ĝeri seĝuka ĝevanaĝirito, senaĝi aneru na iauka baregori tu asi ĝevaĝa-daĝarini e asi ĝevei-veĝare veĝarerini Vereĝauka ĝoiranai.

¹² A maiĝeri tarimarima tu asi ĝetuĝamaĝini, ĝeri vemamiraĝi na moĝo ĝeĝori-kaurini, noĝa moĝo boĝa bairi kavana, ĝemaĝurini tu beĝene vaĝiri moĝo ĝana kavari. Asi ĝeribarini dagarari ĝerikiriki-iaĝirini. Moĝa lorinai ĝia tu mo boĝa bairi kavari beĝe vaĝa-rakavarini e beĝe rekwarekwani.

¹³ Ĝeri veiĝa rakavari voiri beĝe ĝabirini. Tauĝaniri vaĝa-iakuri veigari laĝani matabarai ĝeveirini, asi ĝemaiakarini. Moĝeri tarima ĝomi ĝemi ĝanivegogo ĝoveirini nai, ĝia tu miro noĝa ĝomi fakami ai; korana ĝeri vevaĝa-riba ĝofaĝofari tu ĝemi ĝanivegogo ai maki ĝekiraĝirini.

¹⁴ Vavine ta ĝeĝitaiani nai, mata-boraĝa tuĝamaĝiri moĝo ĝeveini; rakava veiveiri ai asi ĝegauni. Veĝabidadamai roĝosi beĝene gwaĝigi tarimari ĝevaĝa-toĝarini. Ĝia nuĝari tu mata-ĝaniĝani ai ĝevaĝa-maranarito. Barau na ĝeri rakava voiri bevinirini veĝata.

¹⁵ Ĝia na dabara maorona beĝe raga-kwanea, ĝeraka-taĝuitaĝuini, Balam, Beoro natuna, eveito kavana. Ĝia tu moni uranai veiĝa rakavari eveirito-ĝoi.

¹⁶ Senaĝi ĝena veiĝa rakavari lorinai, doniki na evaĝa-guruĝaiato. Doniki tu asi guruĝa ribana, senaĝi tarimarima garori ai evaĝa-guruĝaiato, naima mo tarima ĝena veiĝa babori veiveiri evaĝa-dokoato.

¹⁷ Moġeri tarima tu nanu guriri kakorori kavana; ema magube iavara na ekwari-rakaorakaorini kavana. Barau na mukuna furufuru gabuna ġeri etoreato.

¹⁸ Geguruġa-kavani ema ġeveiavi-kavani, ma tarima kotari tu vau moġo dabara moġoninai asi ġerakani tarimari fakari na ġeraka-veġitani, senaġi ġia na tu tauġanina ġena ura rakavari e mata-boraġa veiġari na ma ġemagagare-ġaurini.

¹⁹ Tarima ġeġofarini, ġekirani, maġuri namona e fakana beġe doġariani ġetoni, senaġi ġia tauġeri tu ġeri ura rakavari vetuġunaġiri ġeiaġo-vinini. Korana tarimarima tu veiġa rakavana ta na eboroġiani nai, ġia tu mo veiġa rakavana ġena tuġu-rakaorakao tarimana.

²⁰ Moġoni, ġia na ġita ġera Vereġauka e Vevaġa-maġuri Tarimana Iesu Keriso ġema-ribaiato dainai, tanobara ġena miro e vei-rakava ġenana ġeraka-veġitato; senaġi moġa murinai bema rakavana nuġanai ma ġerakatoġani, benamo ġena seġuka gaburenai ma ġetanuni neganai, ġia ġeri maġuri tu berakava-kwaikwaini dokonai, dia tovtovonai kavana.

²¹ Ġia tu dabara roroġotona asi ġere riba-guinea tu namo, a asi namo, ġeribaiato murinai, taravatu veaġana, ġeġabiato dagarana, ma ġeruġa-doġemuriġiani.

²² Moġesi ġeveini nai, ġia na mai veġausina o sisiba guruġari ruarua maiġeri ġevaġa-moġonirini, ekirani, “Kwaiva na emumuta-vaġiani dagarana ma ea ġani-ġenoġoiani,” ema, “Ġevaġa-fouani baina tu ma eġenoġoini, ea vedokurani.”

3

Iesu Keriso ġena ġenoġoi

¹ Ġatagu mabarami, maitoma tu fefa vaġa-ruaruana mai atore-vinimini. Mai fefa ruarua ġerina, au na ġomi nuġami ai tuġamaġi roroġotori bana vaġa-variġu ġenoġoiri atoni.

² Au aurani peroveta veaġari na ġekiraġirito guruġari guineri laġaniri ai boġono tuġamaġi-taġori, ema apostolo tarimari na ġera Vereġauka e Vevaġa-maġuri Tarimana ġena vevaġa-naġi ġekira-varamito guruġari maki.

³ Guine tu, ġomi boġono riba-maoro: Ġaro dokori ai vei-ġareġare tarimari beġe foforini, ġeri ura rakavari na beġe guine-iaġirini. Ġia na beġe rikiriki-iaġimini,

⁴ beġe kirani, “Keriso eguruġa-toreto, ma beġenoġoi-iaġomani etato, nene? Be ġia tu ainai? Ġita tamara ġevaġa-noga-kavato, kai-veġata ġemaseto, senaġi dagara mabarari tu tanobara evesinato kavana roġo gaburi ai ġetanuni!”

⁵⁻⁶ Maiġeri tarima asi ġeurani mai guruġa maiġa beġene seġaġia: Barau na tanobara guinena ġutuġutu nanuna na evaġa-rakavaiato. A guba e tanobara tu tovtovonai veġata ġena guruġa ġenana eveirito, ma tanobara tu nanu nuġana na emaraġeto ema nanu na etanu-ġeġeraġiato.

⁷ Ma initoma guba e tanobara roġo ġetanuni tu, Barau ġena guruġa sebona na eġabi-taġorini, karava na vau bene vaġa-rakavaia tuġamaġinai. Barau asi ġekorana-iaġiani tarimari vaġa-roroġotori ema vaġa-mouri ġaronai vau bevaġa-rakava sebonarini.

⁸ Ġatagu mabarami, mai dagara sebona asi boġono tuġarekwaia: Vereġauka ġenai taimi tu irau, ġita ġerai tu irau, korana ġia ġenai ġaro sebona tu laġani 1,000 kavana, ema laġani 1,000 tu ġaro sebona kavana.

⁹ Veregauka na ekiraġi-torerito dagarari veiveiri ai tu asi ekwaiboni, tarima kotari ġetuġamaġini kavana. Asiġina, ġia ġomi ġemi ai tu evevaġa-gwaġiġini, korana ġia asi eurani tarima ta bene rekwarekwa, senaġi eurani mabarara ġera rakava ġerina bitana vetuġamaġi-kure ma bitana raka-kure.

Guba tanobara beġe rekwarekwani

¹⁰ Senaġi Veregauka ġena ġaro beraġasini tu lema tarimana ta eraġasini kavana. Mo ġaro ai guba beġe rekwa-rekwani ma gurugururi ġesi. Gubai ġetanuni dagarari mabarari karava na bevaġa-ġara ġosirini, ema tanobara ma iatanai ġetanuni dagarari mabarari beġe rekwa-rekwani.

¹¹ Boġono tuġamaġi, maiġeri dagara mabarari tu maiġesi dabaranai beġe rakavani, be ġomi tu kamasi boġono tanu ġotoni? Ġomi ġemi maġuri tu beġene veaġa ema Barau ġena ura boġono korana-iaġiri.

¹² Barau ġena ġaro boġono naria, ema ġena raġasi boġono vaġa-ġarimoġia. Mo ġaro ai guba beġe ġararini e beġe rakavani, ema gubai ġetanuni dagarari seġukana na bevaġa-veverini.

¹³ Senaġi ġita tu Barau na ekiraġi-toreato dagarana tavaġa-nogaiani, guba e tanobara variġuri, monai veiġa roroġotori beġe tanuni gabuna.

Velaunaġi e vevaġa-namo guruġari

¹⁴ Moġa lorinai, ġatagu mabarami, alaunaġimini, mo ġaro ġovaġa-nogaiani nuġanai, asi miromi e asi ġemi kerere ta boġono tanu Barau ġoiranai, ema ġia ġesi maino ai boġono tanu.

¹⁵ Ġera Veregauka ġena vevaġa-gwaġiġi boġono tuġamaġia, ġia tu ġomi evaġa-nogamini bene ġabi-maġurimi tuġamaġinai. Barau na ġita tarikakara namona Paulo iaunega eviniato, benamo ġia na moġesi ilailanai etorevinimito.

¹⁶ Ġia ġena fefa mabarari ai maki maniġa ekiraġiani. Dagara kotari ġena fefa nuġari ai tu gwaġiġi rakava, asi ribari tarimari ema ġeri veġabidadama asi gwaġiġi tarimari na ġevevaġa-riba-iaġi ġofaġofarini. Buka Veaġa nuġanai maki toretore mabarari moġesi ġeġofaġofa-iaġirini. Moġesi ġeveini nai, tauġeri ġeri maġuri ġevaġa-rakavarini.

¹⁷ Senaġi ġomi, au ġatagu namomi, tu varau ma ribami, maiġeri dagarai lorimi boġono vetore, be taravatu asi ġekorana-iaġiani tarimari na asi beġene ġofa-dareremi, ġemi veġabidadama namori na boġo keto-firiġoni garina.

¹⁸ A ġita ġera Veregauka e Vevaġa-maġuri Tarimana Iesu Keriso ġena namo e veuravini ġerai etoreani moġa boġono vaġa-tubua-ġoi, ema ġia boġono riba-ginikaua. Ġia marevana bisini vaġa-raġea toma bene iaġo vanaġivanaġi! Amen.

IOANE ĜENA TORETORE GINIGUINENA

1 Ioane vaĝa-foforina guruĝari

Ioane na mai fefa giniguinena maiĝa tu dia ekalesia ta ĝena o ekalesia doĝorona ta ĝena etoreato. Asiĝi. Mai tu irau bese ekalesia doĝorori tari, ema Keriso ĝevaĝa-moĝoniato-ĝoi gabu mabarari ai ĝetanuni tarimari ĝeri. Ioane ĝena Vari Namona, e Ioane ĝena fefa toitoi, ema Apokalupo tu ĝia na etorerito. Ioane na mai fefa tu laĝani 85 ma 100 fakari nuĝanai ta etoreato, mo tu Iesu maki emaseto murinai vau.

Mai fefa nuĝanai siri baregori tu karoa 4:16; 5:13.

Ioane na mai fefa etoreato korana tu eurato, 1) ekalesia bene vaĝa-ribari, Barau ĝenana eiaĝomani ribana moĝonina eĝabiani tarimana tu Barau sevisevinai vanaĝivanaĝi etanuni; 2) tarikaka bene vaĝa-naĝiri, ĝia tata ĝeri veĝata Barau ĝesi, e tarikaka tari ĝesi, e tanobara tarimari ema dagarari ĝesi, ema vei-rakava tarimari ĝesi beĝene ĝita-ginikauri. Asi beĝene vekako mata-bubu; 3) Keriso ĝevetari-viniani tarimari ĝeri ĝofaĝofa veiĝari bene kiraĝi-foforiri.

Ioane na mai fefa tu maiĝesina eboioĝaiato:

1. Barau tu lamefa mamana kavana emamani - karoa 1-2
2. Barau tu veuravini - karoa 3-4
3. Barau tu maĝuri - karoa 5

Maĝuri guruĝana

¹ Tovotovona na veĝata etanuto dagarana, ĝaseĝaĝiato, matama na ĝaĝitaiato, ĝenai ĝaboĝekauto, ema ĝiamama na ĝaĝabi-karaiato: Mai tu Maĝuri Guruĝana ĝavari-fiuani.

² Mo maĝuri efoforito, benamo ĝai na ĝaĝitaiato. Moĝa lorinai ĝemi ĝavari-fiuani ema maĝuri vanaĝivanaĝi ĝakira-varamini. Mo maĝuri tu Tamara ĝesi etanuto-ĝoi ema ĝai ĝemai ema foforito.

³ Ĝai na ĝaĝitaiato ema ĝaseĝaĝiato maĝurina ĝomi ĝemi ĝakiraĝi-foforiani, be ĝomi maki ĝai ĝesi bitana sebona uranai, korana ĝai tu Tamara ema ĝia Natuna Iesu Keriso ĝesi doĝoro sebona.

⁴ Mai guruĝa ĝatore-vinimini, korana ĝita nuĝara iaku na beĝene vonuvonu-raĝe ĝana.

Barau tu mama

⁵ Iesu ĝenana ĝaseĝaĝiato varina ĝemi ĝavari-fiuani tu maiĝa: Barau tu mama, mukuna kotuna ta maki ĝia ĝenai asi etanuni.

⁶ Bema ĝita mukuna maĝurina roĝo tarakani nuĝanai bita kirani, ĝita tu Barau ĝesi tadoĝoro-sebonani, ĝita tu taĝofaĝofani ema guruĝa moĝonina asi takorana-iaĝiani.

⁷ Senaĝi bema mama nuĝanai bita rakani Barau kavana, ĝita tata tu doĝoro sebona tarimara, ema ĝia Natuna Iesu rarana na ĝita ĝera rakava mabarari beĝuriĝi-vaĝirini.

⁸ Bema ĝita bita kirani, ĝita tu asi ĝera vei-rakava, ĝita tu tauĝera taveĝofani, ema ĝita ĝerai guruĝa moĝonina tu asiĝina.

⁹ A bema ĝita ĝera vei-rakava bita kiraĝi-foforirini nai, ĝia tu ma ĝena vetuĝamaĝikau, ĝera veiĝa rakavari mabarari betuĝamaĝi-fitoĝarini, ema ĝera veiĝa ĝeĝevaĝeĝevari beĝuriĝi-vaĝirini.

¹⁰ Bema ġita bita kirani, nega sebona maki asi tavei-rakavato, Barau tu ġofaġofa baraunai bita vaġa-iaġoani, ema ġia ġena guruġa tu ġita nuġarai asi etanuni.

2

Keriso ġita ġera vevaġa-kava tauna

¹ Natugu, mai guruġa atore-vinimini tu ġomi rakava asi boġono vei ġana. Senaġi bema tarima ta bevei-rakavani nai, ġita tu ma ġera vevaġa-kava tarimana Tamara ġesi etanuni, Iesu Keriso, vei-iobukaiobuka tarimana.

² Keriso na ġita ġera rakava voivaġiri ġauveina eveiato, dia ġita ġera rakava moġo, senaġi tarimarima mabarari ġeri rakava.

³ Bema ġita Barau ġena taravatu guruġari bita korana-iaġirini nai, monana bita ribani, ġita tu moġoni Barau taribaiato.

⁴ Bema ta bekirani, “Au tu Barau ribagu,” senaġi ġena taravatu guruġari asi bekorana-iaġirini, mo tarima tu ġofaġofa tarimana, guruġa moġonina ġia nuġanai asi etanuni.

⁵ Senaġi deikara na Barau ġena guruġa ekorana-iaġirini tu, Barau moġoni eura-viniani ma nuġana mabarana ġesi. Monana vau taribani, ġita tu ġia ġesi moġoni sebona.

⁶ Deikara ekirani, ġia tu Barau ġesi doġoro sebona etoni tarimana tu, Iesu Keriso etanuto-ġoi kavana bene tanu.

Taravatu variġuna

⁷ Ġatagu mabarami, mai taravatu atore-vinimini tu dia variġu, senaġi taravatu guinena, tovotovona na veġata ġoġabiato dagarana. Mai taravatu guinena tu ġoseġaġi-guineato taravatuna.

⁸ Senaġi mai taravatu atore-vinimini maki tu variġu; mo taravatu ġena moġoni tu Keriso ġenai ema ġomi ġemi ai maki efoforini, korana mukuna tu mai ekorini ema mama moġonina tu varau emamani.

⁹ Tarima ta ekirani, ġia tu mama nuġanai etanuni, senaġi tarikakana tu ebaru-viniani, ġia tu roġo mukuna nuġanai etanuni.

¹⁰ Tarikakana eura-viniani tarimana tu mama nuġanai etanuni. Ġia bevaġa-vedaġa-raġeani dagarana ta ġenai asi etanuni.

¹¹ Senaġi tarikakana ebaru-viniani tarimana tu mukuna nuġanai etanuni e erakani. Ġia asi ribana aiġana eiaġoni, korana mukuna na matana evei-bubuani.

¹² Natugu, au na atore-vinimini korana tu, ġomi ġemi rakava tu Barau na etuġamaġi-fitoġarito Keriso aranai.

¹³ Tamagu, atore-vinimini korana tu, tovotovona na veġata etanuto tarimana tu ġoribaiato.

Maraġa variġu, atore-vinimini korana tu, Satani ġovaġa-darereato.

¹⁴ Natugu, atore-vinimini korana tu, Tamara ġoribaiato.

Tamagu, atore-vinimini korana tu, tovotovona na veġata etanuto tarimana tu ġoribaiato.

Maraġa variġu, atore-vinimini, korana ġomi tu ma gwadami; Barau ġena guruġa ġomi nuġami ai etanuni, ema ġomi na Satani ġovaġa-darereato.

¹⁵ Tanobara asi boġono ura-vinia, ema tanobara dagarari maki asi boġono ura-viniri. Bema tarima ta tanobara eura-viniani nai, Barau ġena veuravini ġia nuġanai tu asi etanuni.

¹⁶ Korana tu tanobara veiġari mabarari, tauġani ġena ura rakavari, mata-ġaniġani, ema veiavi, tu dia Tamara Barau ġenana ġeiaġomani, senaġi tanobara ġenana ġeiaġomani.

17 Mai tanobara ema tarimarima na ġemata-ġaniġanirini dagarari mabarari tu beġe korini, senaġi Barau ġena ura eveiani tarimana tu betanuvanaġi vanaġini.

Keriso evetari-viniani tarimana

18 Natugu, ġaro dokona tu maġa. Ġoseġaġito ilailanai Keriso evetari-viniani tarimana tu beiaġomani, maitoma maki Keriso ġevetari-viniani tarimari vovoka beġe iaġoma. Moġesi nai taribani, mai tu hora magona.

19 Moġeri tarimarima tu ġita ġesi tavegogoto-ġoi, senaġi ġia tu dia ġita ġera doġoro korikori. Moġa lorinai ġita ġeraga-kwanerato. Bema ġia moġoni ġita ġera doġoro korikori nai tu, ġita ġesi roġo tara tanu. Senaġi ġita ġerana ġeveġitato. Monana evaġa-foforiani, ġia mabarari tu dia ġita ġera doġoro.

20 A ġomi na tu Iauka Veaġa ġoġabiato, Keriso na eboroġimito, moġa lorinai ġomi mabarami guruġa moġonina tu ma ribami.

21 Au na atore-vinimini tu dia guruġa moġonina asi ribami nai, senaġi guruġa moġonina tu ma ribami dainai, ema ribami maki, ġofaġofa tu guruġa moġonina ġenana asi eiaġomani.

22 Ġofaġofa tarimana tu dei? Iesu tu dia Keriso, (Barau na ekiraġi-toreato vevaġa-maġuri tauna), etoni tarimana. Mo tarima tu Keriso evetari-viniani tauna. Ġia tu Tamara e Natuna ekira-fitoġarini tarimana.

23 Natuna ekira-fitoġaiani tarimana tu Tamana maki ġia ġenai tu asiġina. A deikara na Natuna eġabi-raġeani tarimana tu, Tamana maki eġabi-raġeani, ema Tamana maki ġia ġenai etanuni.

24 Tovotovona na veġata ġoseġaġiato guruġana nuġami ai bene tanu. Bema nuġami ai betanuni tu, ġomi maki Natuna e Tamana nuġari ai boġo tanuni.

25 Ema mai maġuri vanaġivanaġi tu Keriso tauġena na ġita ġera ekiraġi-toreato dagarana.

26 Maiġeri guruġa ġomi atore-vinimini tu, ġomi ġeġofa-veġitami ġetoni tarimari akiraġi-foforirini.

27 Senaġi ġomi na Iauka Veaġa ġoġabiato Keriso ġenana tu nuġami ai etanuni. Moġa lorinai initoma vevaġa-riba tarimana ta ġomi bene vaġa-ribami ġana tu asi boġo ura-viniani. Korana mo Iauka Veaġa na dagara mabarari evaġa-ribamini, ema ġena guruġa tu moġoni, dia ġofaġofa. Moġa lorinai evaġa-ribamito ilailanai, Keriso nuġanai boġono tanu.

28 Natugu, Keriso nuġanai boġono tanu. Be ġia beforini ġaronai tu nuġara ma kokoreri ema asi beġene maiakara ġia ġoiranai ġena ġenoġoi ai.

29 Bema ġomi ma ribami Keriso ġena veġa tu iobukaiobuka nai, boġo ribani, ġevei-iobuka iobukani tarimari mabarari tu Barau ġenana ġemaġurito.

3

Barau natuna

1 Ġoġitaia, Tamara ġena veuravini tu asikeikeina ġita iatarai etoreato. Moġesi naima ġita ekiraġirani Barau natuna. Moġoni, ġita tu ġia natuna. Moġa lorinai tanobara na maki asi eribarani, korana Barau maki asi ġeribaiato.

2 Ġatagu mabarami, maitoma ġita tu Barau natuna. Ġita kara ai bita iaġoni tu roġosi bene fofori. Senaġi ġita ribara, Keriso beforini ġaronai, ġita tu ġia ilailanai bita iaġoni, korana ġia tu vetoġana korikorinai bita ġitaiani.

3 Tarimarima mabarari mai tuġamaġikau ġeġabiani tu, tauġeri ġevevaġa-iarevani, korana Keriso tu asi mirona e asi vetoukauna ta.

⁴ Rakava ġeveini tarimari mabarari tu Barau ġena taravatu ġekira-fitoġaiiani, korana vei-rakava tu taravatu ġekira-fitoġaiiani dagarana.

⁵ Senaġi ġomi tu ma ribami, Keriso efoforito korana tu, ġita ġera rakava bene ġabi-veġitari ġana. Ġia ġenai rakava ta tu asiġi.

⁶ Keriso nuġanai etanuni tarimana tu asi evei-rakava rovaġi-rovaġini. Rakava eveini tarimana na Keriso tu asi eġitaiato ema asi eribaiato maki.

⁷ Natugu, ta na asi bene ġofami. Veiġa iobukaiobukari eveini tarimana tu vei-iobukaiobuka tarimana, vaġa-ilailana Keriso kavana vei-iobukaiobuka tarimana.

⁸ A vei-rakava eveini tarimana tu Diabolo ġena tarima, korana Diabolo tu tovotovona na veġata roġo evei-rakava-iaġomani. Barau Natuna efoforito korana tu, Diabolo ġena ġauvei benema vaġa-rakavaia ġana.

⁹ Barau ġenana emaġurito tarimana tu asi bevei-rakava rovaġi-rovaġini, korana Barau ġena maġuri tu ġia ġenai etanuni. Ġia tu vei-rakava asi ma bevei-ġenoġoini, korana Barau tu ġia Tamana.

¹⁰ Barau natuna ema Diabolo natuna vetoġari ġeri irau tu maġesi beġe foforini: Veiġa iobukaiobukari asi eveini tarimana ema tarikakana asi eura-vinirini tarimana tu dia Barau natuna.

Boġono veura-vevini

¹¹ Tovotovona na veġata ġoseġaġiato guruġana tu maġesi: Ġita tata bitana veura-vevini.

¹² Ġita tu Kaino eveito kavana tu asi bitana vei. Ġia tu Satani ġena tarima. Tarina korikorina Abela evaġi-maseato. Karase nai Kaino na evaġiato? Korana ġia ġena veiġa tu rakava, a tarina ġena veiġa tu iobuka.

¹³ Tarikakagu mabarami, bema tanobara maġurinai ġetanuni tarimari na beiau-rakavamini nai, nuġami asi beġene farevaġi.

¹⁴ Ġita ribara, ġita tu mase ġenana maġuri ġenai tavanaġito. Vetoġana tu tarikakara taura-vinirini. Tarikakana asi eura-viniani tarimana tu roġo mase nuġanai etanuni.

¹⁵ Deikara tarikakana eiau-rakava-viniani tarimana tu vevaġideba tarimana. Ġomi ribami, vevaġideba tarimana nuġanai tu maġuri vanaġivanaġi asi etanuni.

¹⁶ Keriso na ġena maġuri etore-tariato, ġita bitana maġuri ġana. Monai veuravini anina bita ribaiani. Moġa lorinai ġita na maki tarikakara dairi ai ġera maġuri bitana tore-tariri neġi namo.

¹⁷ Bema tarima ta ma ġena farefare vovoka, benamo tarikakana ta beġitaiiani ġena rabu ai, senaġi asi ma bevetuġa-ġwaiiani e asi bevaġa-kavaiani, kamara dabarai Barau ġena veuravini ġia nuġanai betanuni?

¹⁸ Natugu, ġera veuravini tu dia guruġa koriri ai moġo bitana kiraġiri, senaġi veiġai ema moġoni ai bitana vaġa-foforia.

¹⁹ Monana vau bita ribani, ġita tu Barau ġena guruġa moġonina na beġori-kaurani, ema Barau ġoiranai nuġara beġe kokoreni.

²⁰ Bema ġita nuġara beġe kirani, ġita tu kerere, bitana riba, Barau tu barego, a ġita nuġara tu kei, ema Barau tu dagara mabarari ma ribana.

²¹ Gatagu mabarami, bema ġita nuġara na asi beġe kiraġi-kerererani nai tu, ġita nuġara tu ma gwadara ġesi Barau ġoiranai bita ruġa-tarini.

²² Ema bita noġiani dagarari mabarari Barau na bevinirani, korana ġena taravatu guruġari takorana-iaġirini ema Barau vaġa-iakuna veiġari taveirini nai.

²³ Ĝia ĝena taravatu guruĝana tu maĝa: Ĝia Natuna Iesu Keriso arana bitana vaĝa-moĝonia, ema ĝita tata bitana veura-vevini, Keriso na taravatu guruĝana evinirato ilailanai.

²⁴ Barau ĝena taravatu guruĝari ekorana-iaĝirini tarimana tu Barau nuĝanai etanuni, ema Barau maki ĝia nuĝanai etanuni. Barau na Iauka Veaĝa evinirato, monana ĝita taribani, ĝia tu ĝita nuĝarai etanuni.

4

Iauka moĝonina ema ĝofaĝofa iaukana

¹ Ĝatagu mabarami, iauka mabarari asi boĝono vaĝa-moĝoniri, senaĝi iauka boĝono ribari ĝana boĝono tovenaĝi-guineri. Ĝia tu Barau ĝenana ĝeiaĝomato ba? Korana peroveta tarimari ĝofaĝofari ĝutuma tanobarai ĝerakao-rakaoni.

² Barau Iaukana tu mai vetoĝai boĝo ribaiani: Iauka mabarari beĝe kirani, “Iesu Keriso tu tarimarimai eiaĝoto,” ĝia tu moĝoni Barau ĝenana.

³ Ma iauka mabarari asi beĝe kirani, Iesu Keriso tu tarimarimai eiaĝoto, tu dia Barau ĝenana. Ĝia tu Iesu evetari-viniani iaukana. Ĝoseĝaĝito, ĝia tu beiaĝomani, ema ĝia tu varau maĝa tanobarai.

⁴ Natugu, ĝomi tu Barau ĝenana, ema ĝomi na peroveta tarimari ĝofaĝofari ĝovaĝa-darererito, korana ĝomi nuĝami ai etanuni Iaukana seĝukana na tanobara iaukari ĝeri seĝuka evanaĝirini.

⁵ Mo peroveta tarimari ĝofaĝofari tu tanobara ĝena, moĝesi naima ĝeri guruĝa tu tanobara ĝena dabarai ĝeguruĝani, ema tanobara na maki ĝia ĝeseĝaĝi-vinirini.

⁶ Senaĝi ĝita tu Barau ĝena. Be Barau ĝena tarimarima na tu beĝe seĝaĝi-vinirani, a Barau asi ĝekorana-iaĝiani tarimari na tu asi beĝe seĝaĝi-vinirani. Iauka moĝonina e ĝofaĝofa iaukana tu mo vetoĝai bita ĝita-learini.

Barau tu veuravini

⁷ Ĝatagu mabarami, ĝita tata bitana veura-vevini, korana veuravini tu Barau ĝenana eiaĝomani. Eveura-vinini tarimana tu Barau ĝenana emaĝurito, ema ĝia ma ribana Barau.

⁸ Asi ĝena veuravini tarimana tu Barau asi ribana, korana Barau tu veuravini.

⁹ Barau ĝena veuravini ĝita ĝerai tu maĝesi evaĝa-foforiato: Barau na Natuna ĝora-ĝereĝa tanobara ĝana etuĝuato, ĝia bakunai ĝita bitana maĝuri ĝana.

¹⁰ Veuravini anina tu maĝa: Dia ĝita na Barau taura-viniato, senaĝi ĝia na ĝita eura-vinirato, benamo Natuna etuĝuato, ĝena mase ĝenana ĝita ĝera rakava benema voi-vaĝiri ĝana.

¹¹ Ĝatagu mabarami, Barau na ĝita tu moĝesina eura-vinirato nai, ĝita maki tata bitana veura-vevini.

¹² Tarima ta na Barau asi eĝitaiato. Senaĝi bema ĝita tata taveura-vevinini nai tu, Barau tu ĝita nuĝarai etanuni ema ĝena veuravini tu ebaregoni ĝita nuĝarai.

¹³ Ĝita ma ribara ĝita tu Barau nuĝanai tatanuni, ema Barau maki ĝita nuĝarai etanuni, korana ĝia Iaukana ĝita evinirato.

¹⁴ Ĝai na ĝaĝitaiato, ema tari maki ĝakira-vararito, Tamara na tu Natuna etuĝuato tanobara ĝena vevaĝa-maĝuri tarimanai bene iaĝo ĝana.

¹⁵ Bema tarima ta bekirani, “Iesu tu Barau Natuna,” ĝia nuĝanai tu Barau ema ĝia maki Barau nuĝanai etanuni.

¹⁶ Ema ĝita maki ribara e tavaĝa-moĝoniani, Barau na ĝita eura-vinirani.

Barau tu veuravini, ema veuravini ai etanuni tarimana tu Barau nuġanai etanuni, ema Barau maki ġia nuġanai etanuni.

¹⁷ Moġesi bita tanuni vau, Barau ġena veuravini bebaregoni ġita ġerai, benamo Kota baregona ġaronai ġita tu ma kokorera ġesi bita foforini. Korana ġita ġera maġuri mai tanobarai tu Keriso ġena maġuri ġesi ilaila.

¹⁸ Veuravini ai gari tu asi etanuni. Veuravini korikorina na gari elai-fitoġaiani. Gari ai etanuni tarimana tu vei-rakava voina garina eveini. Bema tarima ta egarini, ġia tu veuravini korikori ai roġosi bene barego.

¹⁹ Ġita taveura-vinini, korana Barau na ġita euravini-guinerato.

²⁰ Bema tarima ta ekirani, “Au na Barau aura-viniani,” senaġi tarikakana tu ebaru-viniani, ġia tu ġofaġofa tarimana. Korana bema ġia tarikakana eġitaiani, senaġi asi eura-viniani, kamara dabarai asi eġitaiani Barauna beura-viniani.

²¹ Keriso na mai taravatu guruġana evinirato: Barau eura-viniani tarimana na tu tari-kakana maki bene ura-vinia.

5

Ġera kokore tanobara iatanai

¹ Deikara na evaġa-moġoniani Iesu tu moġoni Keriso, (Barau na ekiraġi-toreato vevaġa-maġuri tauna), ġia tu Barau ġenana emaġurito. Ema Tamana eura-viniani tarimana na tu natuna maki eura-viniani.

² Barau taura-viniani ema ġena taravatu guruġari takorana-iaġirini nai tu, moġeri na ġita bita ribani, Barau natuna taura-vinirini.

³ Barau taura-viniani nai tu ġena taravatu guruġari takorana-iaġirini. Ġia ġena taravatu guruġari korana-iaġiri tu asi gwaġiġi.

⁴ Korana tu Barau natuna mabarari na tanobara ġevaġa-darereani. Ġita tu ġera veġabidadama na tanobara tavaġa-darereani.

⁵ Deikara na tanobara evaġa-darereani? Iesu evaġa-moġoniani ġia tu Barau Natuna etoni tarimana moġo.

Barau na ġia Natuna Iesu Keriso ekiraġi-foforiani

⁶ Iesu Keriso tu eiaġomato nanu na ebatatoato, ema rarana eriġoto satauro ai. Ġia tu dia nanu ġereġana na moġo eiaġomato, senaġi nanu e rara ġerina. Iauka Veaġa na evaġa-foforiani mai tu moġoni, korana Iauka tu moġoni.

⁷ Dagara tu toitoi na ġevaġa-foforiani:

⁸ Iauka, nanu, ema rara. Ġia toitoi ġeri guruġa-fofori tu sebona.

⁹ Tarimarima ġeri vevaġa-moġoni guruġari tu taġabi-raġerini, senaġi Barau ġena vevarifju tu barego lelevaġi, korana moġa tu Barau ġena vevaġa-moġoni, Natuna evaġa-moġoniani guruġana.

¹⁰ Mo vevaġa-moġoni guruġana tu Barau Natuna ġevaġa-moġoniani tarimari nuġari ai ġetanuni. A Barau asi ġevaġa-moġoniani tarimari na Barau tu ġofaġofa baraunai ġevaġa-iaġoani, korana Barau na Natuna evari-fiuato guruġana asi ġevaġa-moġoniani.

¹¹ Guruġa moġonina tu maġa: Barau na maġuri vanaġivanaġi varau evinirato, ema mo maġuri vanaġivanaġi tu ġia Natuna nuġanai.

¹² Barau Natuna eġabi-raġeato tarimana na maġuri eġabiato. A Barau Natuna asi eġabi-raġeato tarimana na maġuri asi eġabiato.

Maġuri vanaġivanaġi

¹³ Maiġeri guruġa tu ġomi, Barau Natuna arana ġovaġa-moġoniani tari-mami, atore-vinimini, korana tu boġono riba, ġomi tu varau maġuri vanaġivanagi ġoġabiato.

¹⁴ Ġita nuġara tu maiġesi vau ma kokoreri ġesi Barau ġoiranai bita ruġani, mai tu bema dagara ta ġia ġena ura ilailanai bita noġiani nai tu beseġaġirani.

¹⁵ Ġita ribara, ġia na ġera noġinoġi mabarari eseġaġirini. Ema ġita maki ribara, bita noġini dagarari tu bita ġabini ġia ġenana.

¹⁶ Bema tarima ta tarikakana eġitaiani vei-rakava eveiani, senaġi mo rakava na asi bevaġa-maseani, tu bene ġauġau ġia ġena, be Barau na maġuri bene vinia. Moġa tu evei-rakavani, senaġi mo vei-rakava na asi bevaġa-maseani tarimana akiraġiani. Vei-rakavana ta tu mase evaġa-ġoraiiani. Moġa tu asi bene ġauġau-iaġia atoni.

¹⁷ Veġa ġeġeva-ġeġeva mabarari tu vei-rakava, senaġi vei-rakava tari tu mase asi ġevaġa-ġorarini.

¹⁸ Ġita ribara, Barau ġenana ġemaġurito tarimari tu asi ġevei-rakava rovaġi-rovaġini, korana Barau Natuna na enariġau-ġitakaurini, ema Diabolo na asi eġabi-kararini.

¹⁹ Ġita ribara, ġita tu Barau natuna, ema tanobara mabarana tu Diabolo na eġori-kauani.

²⁰ Ġita ma ribara maki, Barau Natuna tu eiaġomato, ġia na tuġamaġi-faka evinirato, Barau moġoni bitana ribaia ġana. Ġita tu Barau moġonina nuġanai tatanuni, korana ġia Natuna Iesu Keriso nuġanai tatanuni. Iesu Keriso tu Barau moġonina ema ġia tu maġuri vanaġivanagi.

²¹ Natugu, barau ġofaġofari ġerina boġono veġita.

IOANE ĜENA TORETORE VAĜA-RUARUANA

2 Ioane vaĝa-foforina guruĝari

Ioane na mai fefa tu Barau na eĝabi-viriĝiato ekalesia vavinena ma natuna ĝeri etoreato, moĝa tu betaĝu rubu ta ma ekalesiari ekiraĝirini.

Mai fefa tu laĝani 85 ma 100 fakari nuĝanai ta Ioane na etoreato, mo tu Iesu maki emaseto murinai vau.

Mai fefa nuĝanai siri baregori tu siri 9 beiaĝo 11.

Ioane na mai fefa etoreato ĝena ura tu, 1) mo ekalesia Keriso ĝena vevaĝa-ribai beĝene ruĝatari-gigitari ema vanaĝivanaĝi moĝeri vevaĝa-riba guruĝari loriri ai beĝene raka; 2) ĝofaĝofa tarimari, dia Keriso Iaukana na eĝori-iaĝomarini tarimari, beĝene ĝitari, beĝe ĝofa-darererini garina; 3) mo ĝofaĝofa tarimari ĝeiaĝomani nai tu, asiĝina ĝinavaĝi beĝene ĝabi-raĝeri etorito.

Ioane na mai fefa tu maiĝesi eboioĝaiato:

1. Vevaĝa-riba moĝonina lorina na moĝo ema veuravini ai beĝene raka - siri 1-6

2. Veiĝa kererereri asi beĝene veiri - siri 7-13

¹ Au, ekalesia ĝorikauna taugu, na mai fefa Barau na eĝabi-viriĝimito vavinemu ma natumu ĝesi atore-vinimini. Ĝomi tu nuĝagu mabarana ĝesi aura-vinimini, dia au na moĝo aura-vinimini, senaĝi guruĝa moĝonina ĝeribaiato tarimari mabarari na maki ĝomi ĝeura-vinimini.

² Korana guruĝa moĝonina ĝita nuĝarai etanuni ema ĝita ĝesi betanu-vanaĝi vanaĝini.

³ Tamara Barau ema Iesu Keriso, Tamara Natuna, ĝerina varevare-bara, vevetuĝaĝwa, ema maino ĝemi ai bene tanu, moĝoni ai e veuravini ai.

Guruĝa moĝonina ema veuravini

⁴ Au tu averere-baregoni, korana ĝoi natumu tari adoĝaririto guruĝa moĝoninai ĝetanuni nai, ĝita Tamara na ekirarato ilailanai.

⁵ Vavine, maitoma ĝoi anoĝimuni tu, ĝita tata bisini veura-vevini. Dia taravatu variĝuna atore-vinimuni, senaĝi mo tu tovotovona na veĝata taĝabiato dagarana.

⁶ Veuravini tu maiĝesi: Barau ĝena taravatu guruĝari ilailari ai bitana raka. Tovotovona na veĝata ĝoseĝaĝiato kavana, ĝia ĝena taravatu guruĝana tu veuravini ai boĝono raka.

⁷ Ĝofaĝofa tarimari tu ĝutuma tanobarai ĝerakao-rakaoni. Iesu Keriso tu tarimarimai eiaĝoto tu asi ĝevaĝa-moĝoniani e asi ĝekiraĝiani. Moĝesi tarimari tu ĝofaĝofa tarimari, ema Keriso ĝevetari-viniani tarimari.

⁸ Moĝesina nai, lorimi boĝono vetore, ĝemi vekwaraĝi ai kara ĝoĝoitaĝorito dagarari ĝomi ĝemina beĝe veĝitani garina. Namona tu ĝomi voimi mabarana boĝono ĝabi-ĝosiri.

⁹ Deikara na Keriso ĝena vevaĝa-riba guruĝari beraga-kwanerini, vevaĝa-riba tari beĝabi-raĝerini tarimana, ĝia ĝenai Barau asi etanuni. A deikara Keriso ĝena vevaĝa-riba guruĝari bekorana-iaĝirini tarimana tu, Tamana e Natuna tauri ruarua eĝabirito.

¹⁰ Bema tarima ta beiaĝosini, vevaĝa-riba guruĝari irauri bekiraĝirini tu, asi boĝono ĝabi-raĝea ĝemi numai, ema asi boĝono vaĝa-namoa maki.

¹¹ Korana tu bevaĝa-namooni tarimana tu mo tarima ĝena vei-rakava beĝabiani, benamo ĝia maki vei-rakava tarimanai beiaĝoni.

Guruḡa magona

¹² Au aurani guruḡa ḡutuma bara tore-vinimi, senaḡi asi aurani fefai bana toreri. Ġegu ura tu bana iaḡosi ema ḡomi ḡesi bitana guruḡa-guruḡa, be ḡera verere bene barego-lelevaḡi.

¹³ Ġoi tarikakamu vavinena, Barau na eḡabi-toreato vavinena, ḡia natuna na ḡeri vevaḡa-namo ḡetuḡuani ḡoi ḡemu.

IOANE ĜENA TORETORE VAĜA-TOITAINA

3 Ioane vaĝa-foforina guruĝari

Ioane na mai fefa vaĝa-toitoina tu ekalesia gwaĝigina ta arana Gaius ĝena etoreato.

Mai fefa tu laĝani 85 ma 100 fakari nuĝanai ta Ioane na etoreato, mo tu Iesu maki emaseto murinai vau.

Siri baregona tu siri 5.

Ioane na mai fefa etoreato ĝena ura tu, 1) Gaius bene launaĝia, mo tarikaka tari eĝabi-raĝerito moĝeri dairi ai; 2) Gaius bene vaĝa-ribaia, mo seĝafore tarimana arana Diotrefe tu Ioane tauĝena beiĝoni vauro bea kira-feifeiani etato; 3) Demetrio ĝena veĝa namori bene ĝitari etato.

Ioane na mai fefa tu maiĝesi eboioĝaiato:

1. Gaius evaĝa-naĝiato - siri 1-8
2. Diotrefe ekira-rakavaiato - siri 9-11
3. Demetrio evaĝa-raĝeato - siri 12-14

¹ Au, ekalesia ĝorikauna taugu, na ĝatagu namona Gaius atore-vinimuni. Ĝoi aura-vinimuni ma nuĝagu mabarana ĝesi.

² Ĝatagu namomu, Barau anoĝiani dagara mabarari oveirini tu namo beĝene vaĝa-ĝorari ĝana, ema ĝoi maki asi bono keve-misimisi, korana au ribagu ĝoi iaŭkamu tu namo, be namo e iaku ai moĝo bono tanu.

³ Tarikakara tari ĝeiaĝomato, benamo kamasi ĝoi guruĝa moĝonina okorana-iaĝiani e ĝemu vetuĝamaĝikau ĝema-varifuato. Moĝeri aseĝaĝirito nai, au tu aiaku-rakavato.

⁴ Aseĝaĝini, au natugu guruĝa moĝonina ĝekorana-iaĝiani nai, ĝegu iaku e verere ĝebarego-rakavani. Dagara tari iakuri oveini maki evanaĝirini.

Gaius ĝena ĝauvei ĝevaĝa-raĝeato

⁵ Ĝatagu namomu, ĝoi tu ma ĝemu vetuĝamaĝikau mani ĝauvei oveiani nai, korana tarikakara tari ĝeri iaĝoiaĝo ai oĝabi-raĝerini, enabe asi ribamu tarimari.

⁶ Ĝia na mai ekalesia ĝoirari ai ĝoi ĝemu veuravini ĝema-kiraĝi-foforirito. Mani ĝemu veĝa ma bono vaĝa-kavari, be ĝeri iaĝoiaĝo beĝene iaĝo-vinia Barau ĝena ura dabarana ilailanai.

⁷ Korana tu Keriso arana dainai ĝeraka-rosito, ema ĝeri iaĝoiaĝo ai tu asi ekalesia tarimari ĝerina kara ta asi ĝeĝabi-raĝeato.

⁸ Ĝita na tu moĝesi tarimari bitana vaĝa-kavari, korana moĝesina tu guruĝa moĝonina varifiuna uranai bita ĝauvei-vegogoni.

Diotrefe ĝena veĝa tu rakava

⁹ Fefa kubina ta ekalesia doĝorona atore-viniato, senaĝi Diotrefe bene veĝorikau etoni tarimana na au na kara akiraĝirini tu asi eĝabi-raĝerini.

¹⁰ Moĝa lorinai au baiaĝosini tu, ĝia na kara eveirini veĝari mabarari basi kiraĝi-foforirini, guruĝa rakavari ĝai ĝemai ekiraĝirini guruĝari ema eĝofaĝofani guruĝari! Dia moĝeri veĝa moĝo, senaĝi tarikakara tari ĝema-varivarini maki asi eurani bene ĝabi-raĝeri. Mo varivari bene ĝabi-raĝeri etoni ekalesiari maki ekourini ema ekalesia na etore-veĝitarini.

Demetrio ĝena veĝa tu namo

¹¹ Ĝatagu namomu, rakava veĝari asi bono tovotovori, senaĝi veĝa namori moĝo. Veĝa namori eveini tarimana tu Barau ĝena tarima, a veĝa rakavari eveini tarimana tu Barau asi eĝitaiato.

¹² Tarimarima mabarari ġekirani, Demetrio tu tarima namona ġetoni; Barau ġena guruġa moġonina na maki evaġa-foforiani tu tarima namona. Ġai na maki ġia tu moġesi ġakiraġiani, ema ġoi tu ma ribamu, ġai ġema guruġa tu moġoni.

Dokona guruġari

¹³ Au aurani guruġa ġutuma bara tore-vinimi, senaġi asi aurani fefai bana toreri.

¹⁴ Au ġegu tuġamaġi tu bana iaġosi, be taura ruarua tana tanu-veġoira vau tana guruġa-guruġa.

¹⁵ Maino ġemu ai bene tanu. Ġatara maiġeri na ġevaġa-namomuni. Ġatara maninai tata ġegu vevaġa-namo bono viniri.

IUDAS (O IUD) ĜENA TORETORE

Iudas (o Iud) vaĝa-foforina guruĝari

Mai fefa tu Iudas (o Iud), Iesu tarina, na etoreato. Mai fefa tu ekalesia mabarari ĝeri.

Iudas na mai fefa tu laĝani 65 ma 70 fakari nuĝanai ta etoreato, mo tu Iesu emaseto murinai.

Siri baregona tu siri 3.

Iudas na mai fefai ekalesia mabarari ekirarito, 1) ĝeri veĝabidadamai beĝene ruĝa-gwaĝiĝi; 2) beĝene venari, apostolo ĝofaĝofari na beĝe ĝofa-veĝonurini garina; 3) Barau ĝena vevaĝa-riba guruĝari beĝene korana-iaĝiri. Iudas na mai fefa tu maĝesina eboioĝaiato:

1. Veĝabidadama na ĝeveĝitani tarimari ĝeri veĝa - siri 1-16

2. Veĝabidadama beĝene ĝabi-gwaĝiĝia - siri 17-23

¹ Au Iudas, Iesu Vereĝauka ĝena vetuĝunaĝi tarimagu, ema Iakobo (o James) tarina, ĝeguna mai fefa eiaĝosini. Ĝomi Barau na ekeamito tarimami, Tamara Barau na eura-vinimini ema Iesu Keriso na eĝita-ĝaumini tarimami, atore-vinimini.

² Vevetuĝaĝwa, maino, ema veura-vini na boĝono vonuvonu-raĝe.

Vevaĝa-riba tarimari ĝofaĝofari

³ Ĝatagu mabarami, ĝegu ura baregona ĝera vevaĝa-maĝuri dabarana guruĝana bana tore-vinimi atato, senaĝi au na aĝitaiato, namona tu ĝegu fefai bana launaĝimi, Barau ĝena veaĝa tarimari evinirito veĝabi-dadamana boĝono ĝabi-gigitaria.

⁴ Korana tarima kotari, Barau asi ĝekorana-iaĝiani tarimari, tu vekure-toĝai ĝomi fakami ai ĝerakatoĝa-ĝairito. Maniĝeri tarima na tu ĝita ĝera Barau ĝena varevare-bara ĝeĝabiani, ĝia ĝeri veĝa rakavari beĝene veiri ĝana dabaranai ĝevaĝa-iaĝoani, ema Iesu Keriso ĝera Vereĝauka e Vere Baregona sebona kwariĝutu moĝo ĝekira-fitoĝaiani. Barau na kai-veĝata ĝena bukai etore-vanaĝiato, ĝeri rakava voiri beĝe doĝaririni.

⁵ Ĝomi Buka Veaĝa variri mabarari ĝoriba-guinerito, senaĝi aurani ma navaĝa-riba ĝenoĝoimi, Vereĝauka na Isaraela tarimari tu aiĝesina evaĝa-maĝuririto Aigupito tanona na, senaĝi murinai asi ĝevaĝa-moĝoniato tarimari tu ma evaĝi-maserito.

⁶ Aneru tari maki ĝotuĝamaĝiri, ĝeri dagi korikori asi ĝeĝabi-gwaĝiĝirito, ema ĝeri tanu gabuna ĝeraga-kwaneato. Moĝa lorinai Barau na mukuna gabunai etorerito, tanu-vanaĝivanaĝi seiniri na ebaru-taririto, ĝena Kota baregona ĝarona ĝana.

⁷ Sodoma e Gomora, ema seviri ai taoniri asi boĝono tuĝarekwari. Moĝeri tarima ĝeri veĝa maki aneru ĝeveito veĝari kavana ĝeveirito, ĝemata-boraĝato e veĝa boraĝari ĝeveito, benamo tanu-vanaĝivanaĝi karavana na eĝararito, mo tu ĝita ĝera ĝitaĝita ĝana.

⁸ Moĝesi veĝa ilailanai, mo nuvi tarimari na maki tauĝeri tauĝaniri moĝesi ĝevaĝa-rakavarini; Barau ĝena maoro ĝekira-fitoĝaiani, ema iauka baregori ĝevei-veĝare veĝarerini.

⁹ A Maikolo, aneru mabarari ĝeri vere ta, Diabolo ĝesi ĝevevaneto, Mose tauĝanina dei na bene ĝabia ĝaramanai nai, Maikolo na Diabolo guruĝa rakavari na asi evaneato, senaĝi ekiraiato, "Vereĝauka na bene kira-feimu!" etato.

10 Senaġi moġeri tarima tu asi ġetuġamaġi-maġatarini dagarari ġevei-veġare veġarerini; ema ġeri vemamiraġi ai ġeribarini dagarari bai kavari, moġeri dagara na ġia ġevaġa-rakavarini.

11 Vetuġari kika! Ġia tu Kaino ġena veġa beġe ġabia. Balam ekerereto kavana farefare boruri ragari beġe vei. Kora eseġa-foreto e tauġena evevaġa-rakavato kavana ġia maki beġe seġafore e tauġeri beġe vevaġa-rakava.

12 Moġeri tarima ġomi ġemi ġanivegogo ġoveirini nai, ġia tu miro noġa ġomi fakami ai. Ġia tauġeri moġo ġevetuġamaġikauni. Ġia tu magube asi ġurari, iavara na eġwa-rakaorakao-kavarini kavana. Ema ġau korukoru meramerai maki asi ġwaġwana kavana, ma ġokaġokari ġelau-raġerini, ġemase-vaġa-ruaruani.

13 Ġia tu davara ureureri na kaburo-buro ġefoforini noġa, ġeri maiaka veġari ġefoforini. Ġia tu ġeri dabara ġeraga-kwanerito visiguri kavana, Barau na mukuna furufuru gabuna ġeri etoreato etanu-vanaġi vanaġini.

14 Adamu besena vaġa-imaima ruaruana (7), Enoka, ġia na moġeri tarima eperoveta-iaġirito, ekirato, “Ġoboġe, Vereġauka tu mai eiaġomani ma ġena aneru veaġari asi gadaragadara ġesi,

15 tarimarima mabarari vevaġa-maoro bene viniri ġana. Barau asi ġekorana-iaġiani tarimari ġeri rakava nuġanai Barau asi ġekorana-iaġiani veġari ġeveirini, ema vei-rakava tarimari, Barau asi ġekorana-iaġiani tarimari, na Barau guruġa rakavari ġeviniato, mabarari ġeri vei-rakava voina bene kiraġiri ġana.”

16 Moġeri tarima tu mugumugu e veroritore moġo ribari. Ġia tu ġeri ura rakavari ġeiaġo-vinirini, tauġeri ġevevaġa-raġeni ema tarima tari ġevaġa-namo ġofa-kaurini ġia tauġeri namo beġene doġari uranai.

Velaunaġi guruġari

17 Senaġi ġomi, ġatagu mabarami, ġera Vereġauka Iesu Keriso ġena apostolo na ġevaġa-guruġamito guruġari boġono tuġamaġi-taġori.

18 Ġevaġa-guruġamito, ġekirato, “Ġaro dokori ai vei-veġareveġare tarimari beġe foforini, Barau muriri ai beġe toreani, benamo ġeri ura rakavari beġe iaġo-vinirini.”

19 Moġeri tarimarima na ġomi fakami ai vetavi-kirakira ġevaġa-ġoraiani. Ġia tu ġeri ura rakavari na ġeguine-iaġirini. Iauka Veaġa ġia ġeri ai maki asiġi.

20 Senaġi ġomi, ġatagu mabarami, ġemi veġabidadama veaġana boġono ġabi-gigitaria, ma iatanai ġemi maġuri boġono tore-varaġea. Iauka Veaġa seġukanai boġono ġauġau.

21 Barau ġena veuravini nuġanai boġono tanu ema ġera Vereġauka Iesu Keriso ġena vevetuġaġwa boġono naria, korana ġena vevetuġaġwai maġuri vanaġivanaġi bevinimini.

22 Ġetuġamaġi-iauvoiauvoni tarimari boġono vetuġaġwari.

23 Tarima kotari karava nuġana na boġono inu-vaġiri, boġono vaġa-maġuriri. Ma kotari boġono vetuġari, senaġi ma garimi ġesi, ġeri miro na beġe vaġa-rakavamini garina.

Barau vaġa-raġena ġuriġurina

24 Barau na benarimini riba, benamo asi boġo ketoni, ema ġia ġena mareva baregonai bea toremini asi vetoukaumi e ma iakumi ġesi.

25 Ġita ġera Barau sebona, ġera Vereġauka Iesu Keriso bakunai evaġa-
maġurirani Barauna, bitana vaġa-raġea. Ġia tu iaru-korokoro ma mare-
vana baregona, kokore e seġuka mabarana tu ġia ġena, toma bene iaġo
vanāġivanaġi! Amen.

APOKALUPO

Apokalupo vaġa-foforina guruġari

Apokalipsis (o Apokalupo) Grik garo ai anina ta tu “vevaġa-fofori”. Mai buka tu Ioane na etoreato ekalesia doġorori imaima ruarua (7) ema Iesu ġevaġa-moġoniani tarimari tanobara mabaranai ġetanuni tarimari ġeri.

Ioane na mai Apokalupo bukana tu motumotu tai arana Patmos ai ediburato-ġoi nuġanai etoreato. Mai buka tu laġani 90 ema 96 fakari nuġanai ta etoreato, mo tu Iesu maki emaseto murinai vau.

Siri baregori mai Apokalupo bukana nuġanai tu karoa 1:19; 21:5.

Iesu na Ioane ekiraiato, mai buka etoreato korana tu, Iesu ġena ura kara ġoirai dori ġeġorani dagarari tarimarima na beġene ribari. Mai buka Ioane na etoreato korana tari tu, 1) Keriso Iesu Vereġauka ġena ġauvei irauirauri tata bene vaġa-foforiri ġana uranai; 2) Asia Keina (o Minor) ai ekalesia doġorori imaima ruarua (7) moġeri bene kirari, e bene launaġiri, ema ġevei-rakavato-ġoi nai bene kira-feifeiri ġana; 3) Genese ai vevaġa-maġuri boioġana Barau na ekiraġiato moġa dokona bemoġonini e bevetore-korikorini bene vaġa-fofori ginikaua ġana.

Ioane na mai Apokalupo bukana tu maiġesi eboioġaiato:

1. Keriso Barau na mareva baregona eviniato varina - karoa 1
2. Keriso vetuġunaġi ġauveiri maitoma eveirini - karoa 2-3
3. Keriso ġena kokore varina - karoa 4-22

Ioane ġena mata-vanaġi guruġari

¹ Mai toretore maiġa tu Iesu Keriso ġenai Barau na kara evaġa-foforiato guruġana. Barau na eviniato, korana tu eurato, Iesu na ġena vetuġunaġi tarimari dori moġo ġeġorani dagarari bene vaġa-ribari ġana. Keriso na aneru etuġuato, ġena vetuġunaġi tarimana Ioane evaġa-ribaiato.

² Ioane na Barau ġena guruġa ema Iesu Keriso ġena vevarifiu eġitarito dagarari mabarari evari-fiurito.

³ Mai peroveta guruġari beiaviani tarimana tu beverereni, ema mai peroveta guruġari, Ioane na etorerito maiġeri, beġe seġaġirini ema beġe korana-iaġirini tarimari maki beġe verereni. Korana mai dagara mabarari beġe ġorani ġarona tu varau beraġasi-rakava.

Ioane ġena vevaġa-namo guruġana ekalesia doġorori imaima ruarua (7) ġeri

⁴ Au Ioane, Asia tanobaranai ekalesia doġoromi imaima ruarua (7) atorevinimini: Varevare-bara e maino tu ġomi ġemi ai bene tanu. Mo varevare-bara e maino tu etanuni, etanuto, ema ma beiaġomani Barauna ġenana eiaġomani, ema iauka imaima ruarua (7) Barau ġena terona ġoiranai ġeruġani ġerina eiaġomani,

⁵ ema Iesu Keriso ġenana eiaġomani. Ġia tu Barau ġena guruġa evaġa-moġoniani ema evaġa-foforiani ma vetuġamaġikauna ġesi. Ġia tu mero ġuina mase na evariġisi-ġenoġoito, ema ġia tu tanobara vereri mabarari ġeri Vere.

Ġia na eura-vinirani e ġera rakava rarana na eġuriġi-fitoġarito,

⁶ benamo Barau ġena Basileia doġorona tarimarai evaġa-iaġorato, ema Rubu Veaġa vereri ai evaga-iaġorato, ġia Tamana e ġena Barau vetuġunaġina bitana iaġo-vini ġana. Ġia ġenai mareva baregona e seġuka bene tanu vanaġivanaġi! Amen.

⁷ Ĝoĝitaia, ĝia tu magube nuĝana na eiaĝomani, mata mabarari na beĝe ĝitaiani, ĝegwanuato tarimari na maki. Ema tanobara tarimari mabarari ĝia koranai beĝe taĝi-rakavani. Mo tu moĝoni. Amen.

⁸ Vereĝauka Barau ekirani, “Au tu Alefa ema Omega, (giniguinena ema dokona), atanuni, atanuto, e ma baiaĝomani, Iaru-korokoro Barauna.”

Keriso Ioane ĝenai efoforito

⁹ Au Ioane, ĝomi tarikakami ema Vereĝauka ĝena ĝauvei tavei-vegogoani tarimagu. Au tu ĝomi ĝesi Iesu ĝena maĝuri nuĝanai tamidigu-midigu sebonani, e Barau ĝena Basileia nuĝanai tatanu-sebonani, ema meto nuĝari ai tavevaĝa-gwaĝiĝini e taruĝa-gwaĝiĝini. Au Barau ĝena guruĝa aĝobata-iaĝiani ema Iesu varina guruĝari avaĝa-moĝonirini e akiraĝi-foforirini ĝaramanai tu, Patmos motumotunai ĝea tore-raga-kwaneguto.

¹⁰ Vereĝauka ĝena ĝaro ai Barau Iaukana na eboroĝiguto, benamo murigu ai garo baregona ta noĝa moĝo dudu guruna kavana aseĝaĝiato.

¹¹ Mo garo tu maiĝesina ekirato: “Kara boĝitarini dagarari bukai bono tore-vanaĝiri, benamo mai ekalesia doĝorori imaima ruarua (7) maiĝeri ĝeri bono tuĝu-iaĝori: Efeso, Smena, Pegamo, Taiatira, Sadis, Filadelfia ema Laodikea ĝeri.”

¹² Aruĝa-kureto, deikara na au evaĝa-guruĝaguto naĝitaia ĝana, benamo au na golo na lamefa torekauri ĝeveirito dagarari imaima ruarua (7) aĝitarito.

¹³ Mo lamefa torekauri dagarari vekaravari ai tu tarima ta noĝa moĝo Tarimarima Natuna kavana, ĝena dabuĝa tu mauka kenene evariĝoto mo kwakuna fanafanana, ema kobana tu golo beletana na etore-ĝeĝeraĝiato.

¹⁴ Ĝia debana ema ĝuina tu kurokuro vulu kavana, snou noĝa kuro-ĝaroĝaro, ema matana tu karava moreri noĝa moĝo ekimore-kimoreato-ĝoi.

¹⁵ Ĝia kwakuna fanafanana tu auri boraborari karava na ĝegaburini, benamo ĝevei-ĝinikaurini nai ĝeveĝia-veĝiani kavana. Ma garona tu ĝaruka vovoka ĝeĝaru-gwadani gururi kavana.

¹⁶ Ĝia ĝimana aroribanai tu visiĝu imaima ruarua (7) eĝabirito, ma bokana na tu vetari baĝana matana reketa-reketa raga-rakava-rakava eraka-rosito. Ĝia ĝoirana ĝitaĝitana tu ĝaroĝota kirikiri, ĝaro etorani mamana kavana.

¹⁷ Au na aĝitaiato nai, kwakuna koranai aketo-tarito mase tarimana ta noĝa moĝo. Benamo ĝia ĝimana aroribana au iatagu ai etore-kauato, bena ekirato, “Asi nogari! Au tu giniguinena ema dokona.

¹⁸ Au tu maĝuri atanuni. Amaseto, senaĝi toma au tu maĝuri batanu-vanaĝi vanaĝini. Ema Mase e mase tarimari iaukari ĝetanuni Gabuna (o Hades) kina tu au ĝegu ai.

¹⁹ Moĝesina naima mai oĝitarini dagarari mabarari bono tore-vanaĝiri, mai tu initoma ĝetanuni dagarari ema ĝoirai vauro beĝea ĝorani dagarari.

²⁰ Mai visiĝu imaima ruarua (7) au ĝimagu aroribanai boĝitari ema lamefa torekauri dagarari golo na ĝeveirito imaima ruarua (7) anina vekuretoĝana tu maiĝa: Visiĝu 7 tu ekalesia doĝorori 7 ĝeri aneru. Ma golo na lamefa torekauri ĝeveirito dagarari 7 tu ekalesia doĝorori 7.”

2

Vevaĝa-riba guruĝana Efeso ai ekalesia doĝorona ĝena

¹ “Efeso ai ekalesia doĝorona ĝeri aneru tu maiĝesi bono tore-vinia:

Ĝimana aroribanai visiĝu imaima ruarua (7) eĝabi-taĝorini ema golo na lamefa torekauri ĝeveirito dagarari 7 vekaravari na erakaoni tarimana ĝena guruĝa tu maiĝeri.

² Ĝoi ĝemu veiĝa namori, ĝemu ĝauvei nuĝanai ĝemu vekwaraĝi ema ĝemu vevaĝa-gwaĝiĝi tu au ma ribagu. Ema au ribagu, tarima rakavari ĝoi na asi boĝabi-raĝerini, ema asi apostolo tarimari, senaĝi tauĝeri moĝo apostolo tarimari ai ĝevevaĝa-iaĝoni tarimari, maki ĝoi na otovo-naĝirito, benamo oribarito ĝia tu ĝofaĝofa tarimari.

³ Au aragu ĝaramanai meto oĝoitaĝoto, senaĝi ovevaĝa-gwaĝiĝito ema okokoreto, asi kota maki oruĝa-moirato.

⁴ Senaĝi mai dagara sebona moĝo ĝemu ai asi aura-viniani: Tovotovonai ĝemu veuravini baregona au ĝegu ai otoreato-ĝoi, moĝa tu oiaĝuiato.

⁵ Bono tuĝamaĝi-ĝenoĝoi, ĝoi tu kamasi oĝabi-raĝeguto, ma boketo tu ainai mani boa raĝasi! Ĝemu rakava ĝenana bono vetuĝamaĝi-kure, be tovotovonai oveirito-ĝoi veiĝari ma bono veiri. Bema asi bovetuĝamaĝi-kureni ma asi boraka-kureni nai, au tu baiaĝosini, benamo ĝemu lamefa vaĝa-ruĝakauna dagarana gabuna na basi ĝabi-veĝitaiani.

⁶ Senaĝi ĝoi ĝemu namo tu Nikolaita tarimari ĝeri veiĝa rakavari asi oura-vinirini. Moĝeri veiĝa tu au na maki asi aura-vinirini.

⁷ Ma seĝana tarimana na Iauka Veaĝa na ekalesia doĝorori kara ekiravara-vinirini guruĝari tu bene seĝaĝiri. Bekokoreni tarimana tu au na maoro baviniani, ĝia maĝuri ĝauna, Barau ĝena paradaiso ai etubuni dagarana, ĝwaĝwana beĝaniani.”

Vevaĝa-riba guruĝana Smena ai ekalesia doĝorona ĝena

⁸ Smena ai ekalesia doĝorona ĝeri aneru tu maiĝesina bono tore-vinia:

“Giniguinena ema dokona, e emaseto benamo ma emaĝuri-ĝenoĝoito tarimana ĝena guruĝa tu maiĝeri:

⁹ Ĝoi meto ema midigumidigu oĝoitaĝoni au ma ribagu, ema asi ĝemu asi ĝamu maki au ma ribagu. Senaĝi moĝoni veĝata ĝoi tu farefare vovoka tarimamu! Mani tauĝeri moĝo ĝevkiraĝini Iuda tarimari ĝetoni tarimari na ĝoi iatamu ai guruĝa rakavari ĝekiraĝirini guruĝari tu au ma ribagu. Ĝia tu dia Iuda tarimari korikori, a ĝia tu Satani ĝena doĝoro tarimari.

¹⁰ Ĝoirai midigumidigu tari dori oĝoitaĝorini, senaĝi mo midigumidigu gariri asi bono vei. Bono ĝitaia, ĝomi kotari tu Diabolo na betovo-naĝimini, be diburai betoremimi, benamo monai ĝaro gabanana (10) boĝo midigumidiguni. Monai maki enabe bomaseni, senaĝi ĝemu vetuĝa-maĝikau au ĝegu ai tu bene tanu. Moĝesina boveini nai tu, maĝuri koronana bavinimuni.

¹¹ Ma seĝana tarimana na Iauka Veaĝa na ekalesia doĝorori kara ekiravara-vinirini guruĝari bene seĝaĝiri. Bekokoreni tarimana tu mase vaĝa-ruaruana na asi bevaĝa-rakavaiani.”

Vevaĝa-riba guruĝana Pegamo ai ekalesia doĝorona ĝena

¹² “Pegamo ai ekalesia doĝorona ĝeri aneru tu maiĝesina bono tore-vinia:

Ĝena vetari baĝana matana reketa-reketa ma ragari tarimana ĝena guruĝa tu maiĝeri:

¹³ Au ribagu ĝoi ainai otanuni. Ĝoi tu Satani ĝena vere seana evaĝa-ruĝa-tariato vanuĝanai otanuni. Senaĝina ĝoi na au aragu tu ma moĝonimu ĝesi okorana-iaĝiani, ĝemu veĝabidadama au ĝegu ai maki asi veĝata oraga-kwaneato. Antipas ĝomi ĝemi vanuĝa baregona nuĝanai ĝevaĝi-maseato ĝaronai maki, ĝoi ĝemu veĝabidadama tu asi oraga-kwaneato. Antipas

tu ma vetuḡa-maḡikauna ḡesi au varigu evaḡa-moḡoniato-ḡoi ema ekiraḡi-foforiato-ḡoi. Satani tu mani ḡomi ḡemi vanuḡa baregona nuḡanai etanuni.

¹⁴ Senaḡi dagara tari ḡoi ḡemu ai maniḡeri au na tu asi aura-vinirini. Tarima kotari ḡoi rekemu ai maniḡeri tu Balam ḡena vevaḡa-riba veḡari roḡo ḡekorana-iaḡirini. Balam na vevaḡa-riba kerereri Balak eviniato nai, Isaraela tarimari eḡorikau-darererito, bena rakava ḡeveito, kwaivakuku ḡevinirito bureḡari ḡeḡanirito ema mata-boraḡa veḡari ḡeveirito-ḡoi.

¹⁵ Moḡa kavana ḡoi rekemu ai tarima kotari maniḡeri maki Nikolaita doḡoro tarimari ḡeri vevaḡa-riba ḡofaḡofa veḡari ḡekorana-iaḡirini.

¹⁶ Ḣovetuḡamaḡi-kure! Bema asiḡina nai tu, au ḡoi ḡemu ai baiaḡosi-ḡarimoḡini, benamo vetari baḡana au murugu ai mainana basi vaḡa-vevaḡirini.

¹⁷ Ma seḡana tarimana na Iauka Veaḡa na ekalesia doḡorori kara ekiravara-vinirini guruḡari bene seḡaḡiri. Bekokoreni tarimana tu, au na mana baviniiani. Mai mana maḡa toma tu vekuretoḡa etanuni. Ema ḡia tu au na fore kurokurona ta baviniiani. Mo fore kurokurona iatanai tu ara variḡuna ta etoreato, mo tu ta asi beribani, beḡabiani tarimana na moḡo beribaiani.”

Vevaḡa-riba guruḡana Taiatira ai ekalesia doḡorona ḡena

¹⁸ “Taiatira ai ekalesia doḡorona ḡeri aneru tu maḡesina bono tore-vinia:

Barau Natuna, matana tu karava moreri noḡa moḡo kimorekimore, ma kwakuna fanafanari tu auri boraborari karava na ḡegaburini, benamo ḡevei-ginikaurini nai ḡeveḡia-veḡiani kavana, ḡena guruḡa tu maḡeri:

¹⁹ Ḣemu ḡauvei, ḡemu veuravini ema veḡabidadama, ḡemu vetuḡunaḡi iaḡovini ema vevaḡa-gwaḡiḡi, ema toma ḡauvei oveiani tu barego lelevaḡi, tovotovonai oveirito-ḡoi moḡeri tu ovanaḡirini. Moḡeri mabarari aḡita-iaḡomarini, be ribagu.

²⁰ Senaḡi mai dagara sebona ḡoi ḡemu ai maniḡa tu asi veḡata aura-viniani. Goi tu Iesebel, tauḡena moḡo evekiraḡini peroveta vavinena etoni maniḡa, ḡoi na tu oḡabi-raḡeani. Mani vavine ḡena vevaḡa-riba na au ḡegu vetuḡunaḡi-iaḡovini tarimari ḡemata-boraḡani ema kwaivakuku ḡevinirini bureḡari ḡeḡanirini.

²¹ Au na ḡia tu ḡena taimi aviniato, mo mata-boraḡa veḡari na bene vetuḡamaḡi-kure ḡana. Senaḡi ḡia tu asi veḡata eurani bene vetuḡamaḡi-kure.

²² Moḡa lorinai ḡia tu genagena gabunai bafiu-kauani, monai bea midigu-midiguni. Ḣia ḡesi veḡura-vanaḡi veḡari ḡeveini tarimari maki ḡia ḡesi midigumidigu baregona beḡe ḡabi-sebonaiani. Bema ḡia Iesebel ḡena veḡura-vanaḡi veḡari na asi beḡe vetuḡamaḡi-kureni nai tu, mo midigu-midigu beḡe ḡabiani.

²³ Ḣia natuna maki au na bavaḡi-maserini. Benamo monana ekalesia doḡorori mabarari beḡe ribani, au tu tarimarima nuḡari iaḡasiri ema ḡeri tuḡamaḡi aragaḡirini tarimagu. Ema ḡomi tata maki ḡemi veḡa ilailari ai voimi baviniini.

²⁴ Ḣomi Taiatira ai ekalesia kotari tu Iesebel ḡena vevaḡa-riba rakavari asi ḡokorana-iaḡirini ema Satani ḡena iaunega vekuretoḡari, dobudoburi ḡekiraḡirini, tu asi ḡoribarini. Ḣomi mani ḡemi tu avaḡa-guruḡa korikorimini, ḡemi ai meto ta tu asiḡina ḡinavaḡi batore-kauani.

²⁵ Dagara baregona tu, mani kara ḡemi ai maniḡa, moḡa boḡono ḡabi-gigitaria mo, au bana ḡenoḡoi-iaḡoma.

²⁶ Bekokoreni ema au ġegu ura bekorana-iaġiani mo magona bea ġabiani tarimana tu, au na maoro baviniani, tanobara beseri beguine-iaġirini.

²⁷ Ġia na tanobara beseri tu auri togoina na beġori-kaurini ma seġukana baregona ġesi, ma tano ġurori noġa bekwari-kira kirarini. Au na ġia seġuka baviniani, Tamagu ġenana seġuka aġabiato ilailanai.

²⁸ Ema ġia tu au na laġani visiġuna baviniani, (mo seġuka vetoġana).

²⁹ Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

3

Vevaġa-riba guruġana Sadis ai ekalesia doġorona ġena

¹ “Sadis ai ekalesia doġorona ġeri aneru tu maiġesina bono tore-vinia:

Barau Iaukana imaima ruarua (7) ġia ġenai ġetanuni ema visiġu imaima ruarua (7) eġabi-taġorini tarimana ġena guruġa tu maiġeri: Ġoi na ġauvei oveirini tu au ma ribagu. Tarimarima na ġoi ġekiraġimuni, ġekirani, “Mani ekalesia tu maġuri” ġetoni, senaġi korikorina ġoi tu mase otanuni.

² Notataġa, ġemu ai veġabidadama maġurina kotuna moġo dori emasevaġini maniġea novaġa-kokorea. Korana au na ġoi ġemu ġauvei aġoitaġoato dia roroġoto au ġegu Barau ġoiranai.

³ Moġesina naima Vari Namona ġoseġaġiato ma ġoġabi-raġeato maniġa boġono tuġamaġia ema boġono korana-iaġia, be ġemi rakava ġerina ġovetuġamaġi-kure. Bema asi botataġani nai, au ġemu ai noġa moġo lema tarimana ta kavana baiaġosini. Be kamara taimi ai basi raġasini, moġa tu asi kota maki boribaiani.

⁴ Senaġi ġoi ġemu tarima kotari Sadis ai maniġeri, ġeri dabuġa asi kota maki ġevaġa-miro-kararito. Ġia maniġeri tu au ġesi baġa rakao-rakao vegogoni, ma dabuġa kurokurori baġa riġorini, korana ġia ġeri veġa tu iobukaiobuka bene.

⁵ Bekokoreni tarimana tu ġia kavari dabuġa kurokurori na bavaġa-dabuġaiani. Au na ġia arana maġuri bukana na asi barumu-fitoġaiani, a au Tamagu ma ġena aneru ġesi ġoirari ai ġia arana bakiraġi-foforiani.

⁶ Ma seġana tarimana na Iauka Veaġa na ekalesia doġorori kara ekiravara-vinirini guruġari bene seġaġiri.”

Vevaġa-riba guruġana Filadelfia ai ekalesia doġorona ġena

⁷ “Filadelfia ai ekalesia doġorona ġeri aneru tu maiġesina bono tore-vinia:

Davida ġena ki, (vevaġa-maġuri kina), eġabi-taġoani tarimana, tarima veaġana ema moġoni korikorina. Ġia na kara bekeo-fakaiani, tarima ta na asi ma bekou-ġauani riba, ema bekouani dagarana ta na asi ilaila ma bekeoani riba. Mai tarima ġena guruġa tu maiġesina:

⁸ Ġoi ġemu ġauvei oveirini au ma ribagu. Noboġe, ġoiramu noġitaia, ġoi ġoiramu ġatama bokana tu bakeo-fakaia, ma tarima ta asi ġena seġuka ma bekouani. Au ribagu ġoi ġemu kokore tu misina moġo, senaġi au ġegu guruġa tu oġabi-gigitariato, ema au aragu maki asi okira-ġuniġauato.

⁹ Bono ġitaia, mani Satani ġena rubu tarimari maniġeri tu tauġeri ġevkiraġini Iuda tarimari ġetoni, senaġi ġia tu dia Iuda tarimari. Ġia maniġeri tu au na baġabi-iaġosirini, ġoi kwakumu koranai beġeasi tutuġu-tarini. Benamo beġe riba-maoroni, ġoi tu au na aura-vinimuni.

¹⁰ Ġoi tu au ġegu vevaġa-naġi guruġari okorana-iaġirito ma ovevaġa-gwaġiġito naima, tanobarai veribaġani taimina bevotuni nai, ġoi tu

bağitağau-ginikaumuni. Mo veribağani na tu mai tanobara iatanai ġetanuni tarimari mabarari batovo-nağirini.

¹¹ Au tu dori aiağosini. Kara oğabiato maniğa tu bono ġabi-gigitaria, be tarima ta na ġemu korona, ġemu kokore auna, asi bene ġabia.

¹² Bekokoreni tarimana tu au Tamagu ġena Rubu Veağana duğuna tarimani bavağa-iağoani. Mo gabu asiğina ġinavaği ma beiağuiani. Au na ġia ġenai au ġegu Barau arana ema au ġegu Barau ġena vanuğa baregona o siti arana baberaiani. Ierusalemata variguna tu au ġegu Barau ġena siti, ma mai siti maiğa tu guba na au Tamagu ġenana bemağirini. Au aragu variguna maki ġia ġenai batoreani.

¹³ Ma seğana tarimana na Iauka Veağa na ekalesia doğorori kara ekiravara-vinirini guruğari bene seğağiri.”

Vevağa-riba guruğana Laodikea ai ekalesia doğorona ġena

¹⁴ “Laodikea ai ekalesia doğorona ġeri aneru tu maiğesina bono tore-vinia: Guruğa moğoni korikorina ekirağiani tarimana arana Amen ġenana eiağosini. Ġia tu ma ġena vetuğamağikau e Barau ġena guruğa evağa-moğoni korikoriani ema ekiraği-foforiani tarimana, ema Barau na eveirito dagarari mabarari ġenana ġeiağomato tarimana ġena guruğa tu maiğeri:

¹⁵ Ġoi ġemu ġauvei oveirini au ma ribagu. Au ribagu, ġoi tu dia faraka ema dia seğuka. Au ġegu ura sebona ġoi tu boro faraka moğo o boro seğuka moğo!

¹⁶ Senaği ġoi tu seğuseğu, a dia seğuka moğo o dia faraka moğo. Moğesina naima ġoi tu au bokagu na bakanunu-fitoğamuni.

¹⁷ Ġoi tu okirani, ‘Au tu ġegu farefare vovoka tabutabu, ġegu-ğagu ġutuma gorogoro bavağa-vegogori, be au tu ilaila, kara ta asi ma atuğamağiani.’ Senaği ġoi tu asi oriba-maoroni ġoi tu madi kekei ma vetuğamu, asi ġemu asi ġamu, ġoi tu mata-bubu ema asi dabuğamu, korimu.

¹⁸ Au na ġoi asisiba-vinimuni, akiramuni, au ġeguna golo bono voi. Korana auna golo tu karava na evağa-veveato, benamo momori mabarari tu ġeiarevarito. Be au ġegu ai mai golo bovoiani nai tu, botagani. Ema dabuğa kurokurori maki bono voi, be bono vedabuğa-iaği, kefimu korina maiakana bono kou-ğaua. Ema mata muramurana maki bono voi, be matamu ai bono torea, bena bono boğeboğe.

¹⁹ Au na aura-vinirini tarimari tu akira-feirini ema atoto-maororini. Moğesina naima ġemu mağuri ema veğa bono tuğamaği-ginikaua, benamo bono vetuğamaği-kure ma bono raka-kure.

²⁰ Noseğaği! Au ġatama-bokai aruğa-tağoni ma afidifidini. Bema tarima ta na au garogu beseğağiani, benamo ġatama-boka bekeo-fakaiani nai, au baraka-toğani, benamo ġia ġesi bağa ġaniğanini ema ġia maki au ġesi beğaniğanini.

²¹ Bekokoreni tarimana tu au na maoro baviniiani, au ġesi ġegu teronai bağa tanuni. Au kavana, au akokoreto nai Tamagu ġena teronai Tamagu ġesi ġatanuni.

²² Ma seğana tarimana na Iauka Veağa na ekalesia doğorori kara ekiravara-vinirini guruğari bene seğaği.”

4

Barau ġena terona gubai

¹ Maiğa murinai au aboğe-iağoto tu, ġatama-boka vekeofaka-tağo guba vanuğanai ağitaiato. Benamo garo ta kibi guruna noğa, mo tovofovoni

asegāgiato garona moğa ekirato, “Maiğana noma rağe, be maiğa murinai kara dori gēğorani dagarari nama vağa-ğitamu.”

² Asikauna Iauka Veağa na eborogiguto, benamo goiragu ai tu tarima ta guba teronai etanu-tağoto-ğoi ağitaiato.

³ Mo teronai etanu-tağoto-ğoi tarimana vetoğana tu fore arana iaspa gekimore-kimorerini marevari, ema fore kakakakari arana kanelia marevari kavana, marevana tu irau moğō. Ma mo terona tu kevau na egeğerağiato. Mo kevau vetoğana tu noğa moğō emeral forena kavana.

⁴ Mo terona moğa tu terona gabana ruarua ma vasivasi (24) na getoregeğerağiato. Ma mo terona 24 ai tu veğitağau tarimari baregori tata getanuto. Ğia mabarari tu dabuğa kurokurori moğō gerigoto, ema tata debari ai tu golo koronari sebori sebori geveito.

⁵ Mo terona monana kiriku ekimoreato-ğoi, garo baregori ema gaita eragato-ğoi. Ma mo terona goiranai tu lamefa imaima ruarua (7) geğarato-ğoi. Mo lamefa geğarato-ğoi moğeri, mo tu Barau iaukana imaima ruarua (7).

⁶ Ema mo terona goiranai maki davara veğiveğiana, nega-vağuravağura aisi kavana.

Ma mağuri dagarari vasivasi (4) tu nuğana buroburonai, mo terona geruğa-geğerağiato. Ğia goirari ema muriri tu matari tu ğutuma.

⁷ Mo mağuri dagarana guinena tu noğa moğō laion, vağa-ruaruana dagarana tu noğa moğō boromakau tauna, vağa-toitoina goirana tu tarimarima kavana, ema vağa-vasivasina tu noğa moğō erovoni ugavana kavana.

⁸ Mai mağuri dagarari mağeri tata faneri tu imaima sebona (6), ma mai faneri mağeri mabarari tu mata na moğō gevonuto, faneri nuğana rekeri dagarari maki mata moğō. Ğia tu vanağivanaği boği-lağani asi geiağarağini, mai guruğa maiğa asi gevağa-ketoani, gekirani:

“Veağa, veağa, veağa,
Vereğauka, Barau tuğutuğu, tu veağa,
guinenai etanuto-ğoi,
maitoma maki etanuni,
ema ma beiağomani!”

⁹ Mai teronai etanu-tağoto-ğoi tarimana tu mağuri etanu-vanaği vanağini. Ma mağeri mağuri dagarari na mo teronai etanu-tağoto-ğoi tarimana gevağa-rağeato-ğoi, e ma vegubakauri ğesi getoma-rakarigoato-ğoi, ema getanikiu-viniato-ğoi nai,

¹⁰ mo veğitağau tarimari baregori gabana ruarua ma vasivasi (24) tu mo teronai etanuni tarimana goiranai gevetui-tarito-ğoi. Benamo mai mağuri etanu-vanaği vanağini tarimana getoma-rakarigo viniato-ğoi. Ğeri korona maki ğia goiranai getore-taririto-ğoi, benamo gekirato-ğoi,

¹¹ “Ğai ğema Vereğauka ema Barau,
ğoi tu iaru-korokoro,
be tarimarima ema mağuri dagarari mabarari na ğoi tu beğene vağa-
rağemu, beğene gubakaumu,
ema seğuka maki mabarana ğoi ğemu.
Korana dagara mabarari tu
ğoi na oveirito,
ema ğoi ğemu urai moğō oveirito
ema initoma getanuni.”

5

Mamoe natuna ema toretore fefana maukana

¹ Benamo abogeto, mo teronai etanu-taġoto-ġoi tarimana ġimana aroribanai tu toretore fefana maukana ta aġitaiato. Mo fefa tu tavita-tavitai ma toretorena, ġeiokuato, ema vaġa-imaima ruarua (7) veġata ġekada-ġauato. Mo ġekada-ġaurito gaburi mabarari tu tabu vetoġana ġetoreato.

² Ma gwada rakavarakava aneruna ta aġitaiato, garona tu asikeikeina eġobatato, ekirato, “Deikara tu ilaila mai kumuka tabuna bekokiani riba, e mai fefa maukana ma toretorena bekeoani?”

³ Senaġi tarima ta gubai o tanobarai o tanobara gaburenai ta asi ilaila veġata mo fefa bekeo-fakaiani ema nuġanai beboġe-ġurani.

⁴ Benamo ataġi-rakava rakavato, korana tarima sebona kwarikwari ta maki asi veġata ġeġoitaġoato, mo fefa maukana ma toretorena bekeoani ma nuġanai beboġe-ġurani.

⁵ Benamo mo veġitaġau tarimari baregori ta na ekiraguto, ekirato, “Asi notaġi! Noboġe! Iuda doġorona ġeri laion, Davida Natuna noġitaia, ġia tu ekokoreto. Ġia na mani fefa maukana ma toretorena bekeoani bene, ema mani ġekumuato kumukari taburi imaima ruarua (7) maki bekokirini bene.”

⁶ Benamo abogeto, Mamoe Natuna aġitaiato. Ġia tu terona nuġana buroburonai eruġa-taġoto-ġoi, mo maġuri dagarari vasivasi (4) ema veġitaġau tarimari baregori tu ġeruġa-ġeġeraġiato. Mamoe Natuna ġitaġitana tu tari na ġevaġi-maseato. Ġia guduna tu imaima ruarua (7) ema matana maki 7. Mo tu Barau iaukana 7 ekiraġirini. Ġia tu Barau na tanobara mabarana ġana etuġu-iaġorito.

⁷ Mamoe Natuna eiaġoto, benamo teronai etanu-taġoto-ġoi tarimana ġimana aroribanai mo fefa maukana ma toretorena moġa eġabiato.

⁸ Fefa maukana ma toretorena eġabiato nai, maġuri dagarari vasivasi ema veġitaġau tarimari baregori 24 Mamoe Natuna ġoiranai ġevetui-tarito. Ġia tata tu ma ġeri hap (gita noġa) ema golo ġurori nuġari ai tu muramura goġuna ma bonari. Mo goġu ma bonari tu Barau ġena tarima veaġari ġeri ġauġau guruġari.

⁹ Benamo ġia na mari variġuna ta maġesina ġemariato, “Ġoi na fefa maukana ma toretorena boġabiani ilaila, ema ġia kumuna ma taburi maki bokeo-fakarini ilaila, korana ġoi tu ġevaġi-masemuto, ma ġoi raramu na tau vavine Barau ġena ovoi-vaġirito doġoro mabarari ġerina, e garo mabarari ġerina, ema bese mabarari ema tanobara mabarari na.

¹⁰ Ġoi na ġia tu Barau ġena Basileia doġorona tarimari ai ovaġa-iaġorito, ema Barau vetuġunaġina beġene iaġo-vini ġana Rubu Veaġa vereri ai ovaġa-iaġorito.

Ġia tu tanobara mabarana iatanai beġe veġorikauni.”

¹¹ Ma aboġe-iaġoto, aneru garori asisebo-asisebo aseġaġirito. Moġeri aneru tu asi iavi-iaviri, milion ġutuma maki ġevanaġirito. Ġia na terona ema maġuri dagarari vasivasi ema veġitaġau tarimari baregori ġeruġa-ġeġeraġirito.

¹² Ma mai mari ġemari-gigitariato, “Mamoe Natuna, ġevaġi-maseato dagarana, tu ma ġena maoro, seġuka beġabiani, e farefare vovoka, e iaunega,

ema kokore beġabiani!

Ema ġia ma ġena maoro tarimarima mabarari na beġe gubakauani,

ma beġe vaġa-raġeani

ema beġe vonevone-raġeani!”

¹³ Benamo Barau na eveirito dagarari mabarari guba nuġanai, tanobara iatanai, tanobara gaburenai, e davara nuġanai dagarari mabarari na mai mari ġevaisiato aseġaġirito,

“Teronai etanu-taġoni Barauna

ema Mamoe Natuna,

tauri ruarua na vevaġa-raġe,

vegubakau, mareva baregona,

ema seġuka beġene ġabiri,

bene iaġo mo vanaġivanaġi asi magona!”

¹⁴ Benamo maġuri dagarari vasivasi na ġevaġa-moġoniato, ġekirato, “Amen!” Ema veġitaġau tarimari baregori 24 ġevetui-tarito, Barau ġetoma-rakariġo viniato.

6

Fefa maukana ma toretorena ġekumukaiato kadari o tabu vetoġari Mamoe Natuna na ekeorito

¹ Benamo au na Mamoe Natuna aġitaiato, fefa maukana ma toretorena vaġa-imaima ruarua (7) ġekada-tariato dagarana kadana ġiniguinena ekeo-fakaiato. Moġa ekeoato-ġoi nuġanai tu, maġuri dagarari vasivasi fakari ai ġia ta eguruġato, garona tu noġa guba eguruato, ekirato, “Noiaġoma!”

² Aboġe-iaġoto nai tu, hosi kurokurona ta aġitaiato, eraġeto tarimana ġimana tu ma fevana, ema ġia tu korona ta maki eviniato. Ġia eraka-rosito tu, vetari ai ekokoreto-ġoi ema eiaġoto tu ma bene kokore ġana.

³ Benamo Mamoe Natuna na kumuka vaġa-ruaruana kadana ekeo-fakaiato nai, maġuri dagarana vaġa-ruaruana aseġaġiato, ekirato, “Noiaġoma!”

⁴ Benamo hosi ta ma eraka-rosito. Moġa tu hosi kakakakana. Eraġeto tarimana tu seġuka eviniato, tanobara na maino bene ġabi-veġitaia, be tarimarima tauġeri beġene vevaġi-masemase ġana. Mo tarima tu vetari baġana asikeikeina ta eviniato.

⁵ Kumuka vaġa-toitoina kadana ekeo-fakaiato nai tu, maġuri dagarana vaġa-toitoina aseġaġiato, ekirato, “Noiaġoma!” Au aboġe-iaġoto nai, hosi dubadubana aġitaiato, eraġeto tarimana ġimanai tu dagara ġeri meto vaġa-foforiri o sikele dagarana ta eġabiato.

⁶ Benamo au na garo ta maġuri dagarari vasivasi (4) fakari na eiaġomato aseġaġiato, ekirato, “(Bita doġe be), widi kilo sebona davana tu ġaro sebona ġauveina voina, ema bali (widi kavana) kilo toitoi davana tu ġaro sebona ġauveina voina. Senaġi olive diġana ema vine nanuna tu asi boġono vaġa-rakavari.”

⁷ Ma Mamoe Natuna na kumuka vaġa-vasivasina kadana ekeo-fakaiato nai tu, maġuri dagarana vaġa-vasivasina aseġaġiato, ekirato, “Noiaġoma!”

⁸ Aboġe-iaġoto nai tu, hosi ta aġitaiato, tauġanina ġitaġitana noġa kurokuro. Eraġeto tarimana arana tu Mase, ma mase tarimari iaukari ġetanuni Gabuna (o Hades) tu ġia murina na eraganaġi-raganaġito-ġoi. Tauri ruarua seġuka evinirito, tanobara taviri vasivasi nuġanai tavi sebona beġene ġita-ġaua, be vetari ai, doġe ai, keve rakavari na, ema boġai ġetanuni veġaniveġani dagarari na tarimarima beġene vaġi-maseri.

⁹ Ma kumuka vaġa-imaimana kadana ekeo-fakaiato nai tu, Barau ġena guruġa ġaramanai, e mo guruġa ġevaġa-moġoniato ema ġevari-fiuato ġaramanai ġevaġi-maserito tarimari iaukari maġuri fata veaġana gaburenai aġitarito.

¹⁰ Ġia mabarari ġekoġo-baregoto, ġekirato, “Vere tuġutuġu, ġoi tu veaġa ema moġoni veġata, aitoma vau ġoi na tanobarai ġetanuni tarimari bovaġa-maoro vinirini, benamo ġai rarama ġevaġa-riġorito bovaġa-voirini?”

¹¹ Benamo ġia mabarari tata dabuġa kurokurori evinirito, ekirarito, negakota roġo ma beġene naritari etato. Beġene vaġa-noga mo, ġia karori toma vetuġunaġi ġeiaġo-vinini tarimari ema tarikakari kotari, ġia ġevaġirito kavana, beġe vaġi-maserini mo, ġeri numera korikori bene ġabia.

¹² Au na Mamoe Natuna aġitaiato, kumuka vaġa-imaima sebona (6) ekeo-fakaiato nuġanai, tano-iaga asikeikeina eragato, e ġaro eduba-dubato, dabuġa dubadubari noġa, e ġue evekurevoto, ekakarato rara kavana.

¹³ Ema guba na visiġu ġeketo-firiġoto tanobara ġana, noġa figi maġitari iavara na figi ġauna na eruku-keto ketorini kavana.

¹⁴ Guba maki erekwa-rekwato, noġa moġo fefa maukana, ġetoretore-iaġiani dagarana, ġeiokuani kavana. Ma ġoro ema motumotu mabarari gaburi ekoki-veġitarito.

¹⁵ Benamo tanobara kiniri, e vereri, e vetari ġitaġauna tauri baregori, e ġeri farefare asisebo tarimari, e kokore rakavarakava tarimari, tuġu-rakaorakao tarimari ema maġuri namona e fakanai ġetanuni tarimari, ġia mabarari kouġa nuġari ai ema ġoro ai fore baregori vekaravari ai ġea gumuto.

¹⁶ Benamo ġoro ema fore baregori ġenoġirito, ġekirato, “Ġai iatamai ġoma ketokau, ġoma lautarima, be teronai etanuni Barauna ġoirana ġenana ema Mamoe Natuna ġena baru baregona ġenana ġoma kure-toġama!”

¹⁷ Korana ġia ġeri baru ġarona baregona tu varau bevotu, deikara beruġa-tarini riba?”

7

Barau ġena vetuġunaġi tarimari 144,000

¹ Moġa murinai aneru vasivasi (4) aġitarito, tanobara daiguniri vasivasi ai ġeruġato. Mo aneru na tu tanobara iavarari vasivasi ġelautaririto, tanobarai e davarai asi beġene raga, ema ġau maki asi beġene kwari-ġarevari ġana.

² Ma murinai tu aneru ta ma aġitaiato, ġaro eraġeni rekena na emaraġeto. Mo aneru na maġuri Barauna ġena vevaġa-moġoni vetoġana o makana eġabi-taġoato-ġoi. Ġia na mo aneru vasivasi, Barau na seġuka evinirito tanobara ema davara beġene vaġa-rakavari aneruri, efarara-vinirito, ekirato,

³ “Tanobara, davara, ema ġau asi roġo boġono vaġa-rakavari, bene iaġo mo, Barau ġena vetuġunaġi tarimari bakuri ai ġia ġena vetoġa baġana toreri murinai vau.”

⁴ Moġa murinai Barau ġena vetoġa bakuri ai ġetorerito tarimari mabarari tu 144,000 aseġaġiato. Ġia tu Israela doġorori gabanana ruarua (12) mabarari ġerina, doġorori tu maġeri:

⁵ Iuda ġena doġoro tarimari - 12,000

Reubena ġena doġoro tarimari - 12,000

Gad ġena doġoro tarimari - 12,000

⁶ Asere ġena doġoro tarimari - 12,000

Naftali ġena doġoro tarimari - 12,000

Manase ġena doġoro tarimari - 12,000
 7 Simeona ġena doġoro tarimari - 12,000
 Levi ġena doġoro tarimari - 12,000
 Isakara ġena doġoro tarimari - 12,000
 8 Sebulun ġena doġoro tarimari - 12,000
 Iosefa ġena doġoro tarimari - 12,000
 Beniamina ġena doġoro tarimari - 12,000

Tarima ġutuma lelevaġi dabuġa kurokurori ġeveito

9 Moġa murinai aboġe-iaġoto, tarima ġutuma lelevaġi, asi tau iaviġosina, aġitarito. Mo tu tanobara irauirau mabarana tarimana, e doġoro irauirau mabarana tarimana, e bese irauirau mabarana tarimana, ema garo irauirau mabarana tarimana. Ġia mabarabarari tu terona ema Mamoe Natuna ġoirari ai ġeruġato. Ġia mabarari dabuġa maukari kurokurori ġeveito, ema ġimari ai tu galamo lauri noġa dagarari ġeġabito. (Mo tu ġia ġeri kokore vetoġari).

10 Ġia ġekoġo-baregoto, ġekirato, “Vevaġa-maġuri tu ġita ġera Barau, teronai etanukauni Barauna, e Mamoe Natuna ġerina eiaġomani.”

11 Ma aneru mabarari na tu terona e veġitaġau tarimari baregori ema maġuri dagarari vasivasi (4) ġeruġa-ġeġeraġirito. Benamo Barau ġena terona koranai ġevetui-tarito, ġoirari tano ai, Barau ġetoma-rakariġo viniato,

12 ġekirato, “Moġoni veġata! Vevaġa-raġe, e mareva baregona, e iaunega, e vevaġa-namo, e vegubakau, e seġuka, ema kokore tu ġita ġera Barau ġena toma bene iaġo vanaġivanaġi, Amen!

13 Benamo veġitaġau tarimana baregona ta na edanaġiguto, ekirato, “Mai dabuġa kurokurori na beġe vedabuġa tarimari tu deikara, ema ġia tu ainana beġe iaġoma?”

14 Benamo avaġa-veseto, akirato, “Ġegu vere, au asi ribagu. A ġoi tu ribamu.” Benamo ġia na ekira-varaguto, ekirato, “Mai tarima maiġeri tu midigumidigu baregori nuġari na ġeiaġomato. Ġeri dabuġa tu Mamoe Natuna, ġinitaġo mamoen, rarana na ġevei-kurokuro-rito.

15 Moġesina naima, ġia tu Barau ġena terona ġoiranai ġeruġani, ema ġena Rubu Veaġa nuġanai boġi-laġani ġia vetuġunaġina ġeiaġo-vinini. Ema teronai etanuni Barauna na enari-ġaurini.

16 Ġia tu asi ma beġe vito-ġenoġoirini, e bokari asi ma beġe koke-ġenoġoini. Ġaro iatari ai asi ma bekirini ema ġaro seġukana na asi ma begugurarini.

17 Korana terona nuġanai etanuni Mamoe Natuna na beġita-ġaurini. Ġia na beġori-iaġorini maġuri nanuna eġaruani gabuna ġana. Ema Barau na matari gorari mabarari bedau-vaġirini.”

8

Kumuka vaġa-imaima ruaruana (7) kadana

1 Mamoe Natuna na kumuka vaġa-imaima ruaruana (7) kadana ekeofakaiato nai, guba vanuġanai aoa tavina ta veġata guru ta maki asi eraġeto.

2 Benamo Barau ġoiranai ġeruġato aneruri imaima ruaruana (7) aġitarito, dudu 7 evinirito.

3 Benamo aneru ta ma eiaġomato, fata veaġana sevinai eruġato, ġimanai tu golo ġurona ta. Ġia tu muramura ma bonana barego lelevaġi ġeviniato, Barau ġena tarima veaġari ġeri ġau-ġau ġesi terona ġoiranai golo fatana veaġanai Barau bene varevare-vinia ġana.

4 Mo muramura goḡuna ma bonana goḡuna ema Barau ḡena tarima veaḡari ḡeri ḡauḡau ḡesi, mo aneru ḡimana na ḡevaraḡeto Barau ḡoirana ḡana.

5 Moḡa murinai aneru na golo ḡurona eḡabiato, fata veaḡana karavana na evaḡa-vonuato, benamo tanobara iatana ḡana eflu-riḡoato. Monana ḡaita guruna eraḡeto, garo gururi tari ḡeraḡeto, e kiriku eragato, ema tano eiagato.

Aneru na ḡeri dudu ḡefurururito

6 Benamo aneru imaima ruarua (7) ḡeri dudu ḡeḡabi-torerito, beḡene furururi ḡana.

7 Aneru ḡiniguinena na ḡena dudu efururuato, benamo aisi foreri misimisiri ema karava rara ḡesi ḡesebonato ḡevetoreto. Benamo moḡeri mabarari tanobara ḡana ebubu-riḡorito. Ma tanobara tavi toitoi nuḡanai tavi sebona eḡara-ḡosiato, ḡau toitoi nuḡari ai tu sebori tu ḡeḡara-ḡosirito, e ḡauḡa ema reḡi mabarari ḡeḡara-ḡosirito.

8 Aneru vaḡa-ruaruana na ḡena dudu efururuato nai tu, dagara ta, ḡoro-dagara-bara ta noḡa ma karavana, davarai eveflu-reito. Benamo daḡaru-bara tavi toitoi nuḡanai tavi ta tu rarai eiagoto.

9 E daḡaru-bara maḡuri dagarari toiri-toiri nuḡari ai sebori tu ḡemaseto, e bouti toiri-toiri nuḡari ai sebori tu ḡeburuto.

10 Aneru vaḡa-toitoina ḡena dudu efururuato nai tu, visiḡu-dagara-bara ta kere morena kavana guba na eketoto, benamo ḡaruka toiri nuḡari ai sebori ai, e ḡeḡaruḡarurini nanuri ai eketo-reito.

11 Mo visiḡu arana tu “Mamaki”. Nanu gaburi toiri nuḡari ai sebori tu ḡemamakito. Benamo tarimarima vovoka na mo nanu mamakiri ḡeniurito nai ḡemaseto.

12 Aneru vaḡa-vasivasina ḡena dudu efururuato nai, ḡaro e ḡue ema visiḡu tu taviri toitoiri nuḡari ai tavi sebori tu ḡesemorito, naima mo tavi toitoiri nuḡari ai tavi sebori tu ḡemukunato. Moḡa lorinai ḡaro mamana tavi toitoi nuḡanai tavi sebona tu asi emamato, ema boḡi tavi toitoi nuḡanai tavi sebona ta ḡue e visiḡu tu asi emamato.

13 Benamo aboḡeto, ugava ta guba tuḡuna vanigerenai erovoto-ḡoi aḡitaiato, maiḡesi ekea-fararato, ekirato, “Tanobarai ḡotanuni tarimami, vetuḡami kika! Vetuḡami kika! Vetuḡami kika! Korana tu aneru toitoi, ḡeri dudu roḡosi ḡere furururi aneruri, na ḡeri dudu beḡe furururini gururi ai tu, meto ema midigumidigu barego lelevaḡina beḡorani.

9

Dudu vaḡa-imaimana (5)

1 Aneru vaḡa-imaimana na ḡena dudu efururuato, benamo visiḡu ta aḡitaiato, guba na eketoto tanobarai. Mo visiḡu tu guri variḡo kwareḡana, (iauka rakavari ḡeri dibura), kina eviniato.

2 Mo guri ekeo-fakaiato nai tu, goḡu evebubu-rosito noḡa moḡo karava baregona goḡuna kavana. Benamo mo guri goḡuna na ḡaro mamana ema guba fakana emukuna-ḡaurito.

3 Goḡu nuḡana na madudu ḡeraka-rosito tanobarai, ema seḡuka evinirito, seḡukana tu kavikavi seḡukari kavana.

4 Ġia ekirarito, tanobarai ḡauḡa ta, e tanobarai ḡetubuni dagarana ta, ema ḡau ta asi beḡene vaḡa-rakavaia, senaḡi deidei bakuri ai Barau ḡena vetoḡa o maka asi etanuni tarimari moḡo beḡene vaḡa-rakavari etato.

⁵ Ekirarito maki, mo tarima asi beġene vaġi-maseri, senaġi ġue imaima (5) nuġanai beġene vaġa-midigu midiguri. Mo midigumidigu ġeġanito moġeri tu kavikavi na tarima ekavirini midiguna kavana.

⁶ Mo ġue imaima nuġanai tarimarima tu ġemase ġana mase beġe vetauani, senaġi asi beġe maseni. Ġeri ura baregona ġemase beġe toni, senaġi mase ġerina beveġitani.

⁷ Mo madudu ġitaġitari tu hosi noġa, ġea vetari ġana ġeruġa-toreto. Ġia debari ai tu golo koronana noġa moġo dagarana ta, ema ġoirari ġitaġitari tu tarima ġoirari kavana.

⁸ Ġuiri tu vavine ġuiri noġa moġo, doġari tu laion doġari kavana.

⁹ Kobari kouġauri ġana dabuġana tu auri dabuġana kavana. Faneri gururi tu hosi asisebo kwakuri gururi ema kariota asisebo vetari nuġanai ġeraka-toġani gururi kavana.

¹⁰ Ġia tu ma ġiġuri, ema ġiġuri bonari tu kavikavi ġiġuri bonari kavana. Ġiġuri nuġari ai tu tarimarima ġue imaima (5) beġene vaġa-midigu midiguri seġukana etanuni.

¹¹ Ġia tu ma ġeri vere baregona o kini. Ġia na eġita-ġaurini. Ġia dagarana tu mo guri variġo kwareġana aneruna. Mo aneru arana Heberu garori ai tu Abadon, ma Grik garori ai tu Apolion, (anina tu vaġa-rakava kwaikwai tarimana).

¹² Rakava baregori giniguenena tu bekori moġa, ma ruarua tu vau beġe iaġomani.

Aneru vaġa-imaima sebona (6) na dudu eġururuato

¹³ Aneru vaġa-6 na ġena dudu ma eġururuato, benamo fata veaġana dai-guni vasivasi ai gudu vasivasi moġeri ġerina garo ta eiaġomato aseġaġiato. Mo fata tu golo na ġeveiato, ma Barau ġena terona ġoiranai etanuni.

¹⁴ Mo garo na aneru vaġa-6 na ma ġena dudu moġa ekiraiato, ekirato, “Aneru vasivasi, ġaruka baregona arana Eufrate ai ġebaru-taririto, moġeri noruġa-vaġiri.”

¹⁵ Benamo mo aneru vasivasi eruġa-vaġirito, mai laġani, mai ġue, mai ġaro, mai aoa ġana Barau na eġabi-torerito tu, tarima toitoiri nuġanai sebona tu beġene vaġia.

¹⁶ Hosi tarimari hosi ai ġeraġeto ġena numera tu milion sinau ruarua (200). Mai numera tu aseġaġiato.

¹⁷ Mo hosi e iatari ai ġeraġeto tarimari au ġegu mata-vanaġi ai vetoġari tu maġesina aġitarito: Ġia kobari kouġauna ġana auri dabuġana tu karava ġeġarani kakakaka karavari kavana, e blu, ema karava moreri o salfa borabora kavana. Hosi debari tu laion debari kavana, ma bokari tu karava e goġu ema karava moreri ġeraka-rosito.

¹⁸ Mo tarimarima vaġa-midigumidiguri dagarari toitoi moġeri, karava, goġu, ema karava moreri o salfa, hosi bokari na ġeraka-rosito dagarari, na tarimarima toiri-toiri nuġanai sebori-sebori tu ġevaġi-maserito.

¹⁹ Mo hosi ġeri seġuka tu bokari ai ema ġiġuri ai maki. Korana ġiġuri tu mota kavana, ma debari. Mo ġiġuri debari na tarimarima ġevaġa-midigu midigurito-ġoi.

²⁰ Tarimarima oreri, mo vevaġa-midigumidigu dagarari toitoi na asi ġevaġi-maserito tarimari, tu roġo asi ġevetuġamaġi-kureto ġimari ġauveiri ġerina. Iauka rakavari toma-rakariġori ema asi ġeboġeboġeni e asi ġeseġaġini ema asi ġerakani kwaivakukuri, golo, silva, auri boraborari, fore e ġau na ġeveirito dagarari toma-rakariġori asi ġevaġa-dokoato.

²¹ Ema ġeri vevaġideba, ġeri meġameġa, ġeri mata-boraġa veiġari, ema ġeri lema ġerina maki asi ġevetuġamaġi-kureto ma asi ġeraka-kureto.

10

Aneru ema toretore fefana maukana misina

¹ Benamo aneru ta, kokore lelevaġi aneruna, guba na ma emariġoto-ġoi aġitaiato. Ġia tu magube na ġevaġa-dabuġa maukaiato, ma debana iatanai tu kevau ta. Ġia ġoirana tu ġaro mamana noġa, ema kwakuna tu karava ġemoreni kavana.

² Ġimanai tu toretore fefana maukana misina ta vekeo eġabitaġoato-ġoi. Ġia kwakuna aroribana tu davarai etoreato, ma kwakuna kaurina tu tanobarai etoreato.

³ Benamo eġaba-baregoto, laion eniarani nai eġabani kavana. Ġia eġabato murinai, ġaita imaima ruarua (7) garori ġeguruġato, (ġia ġevaġa-veateo).

⁴ Mo ġaita 7 ġeguruġato moġeri dori atore-vanaġirito, senaġi guba na garo ta eiaġomato, ekirato, “Mani ġaita 7 kara beġe kiraġiri maniġeri tu nokuretoġari, asi bono tore-vanaġiri.”

⁵ Benamo mo aneru, davarai e tanobarai kwakuna etorerito aneruna, aġitaiato, ġimana aroribana eġabi-vaiaato, guba vanuġana eduġiato,

⁶ benamo tanu-vanaġivanaġi Barauna aranai guruġa-fofori gwaġiġina eveiato. Guba ema nuġari ai ġetanuni dagarari mabarari, e tanobara ema nuġari ai ġetanuni dagarari mabarari, ema daġaru-bara ema nuġari ai ġetanuni dagarari mabarari tu ġia na eveirito. Ġia aranai mai guruġa-fofori gwaġiġina eveiato, ekirato, “Taimi varau bekori, Barau asi ma bevaġa-nogani.

⁷ Senaġina aneru vaġa-imaima ruaruana (7) na ġena dudu befururuani neganai, Barau ġena guruġa vekuretoġari veiġari ema boioġari beġe ġorani, ġena peroveta tarimari ġeri ai ekiraġi-foforirito ilailari ai.”

⁸ Benamo guba na aseġaġiato garona na ma evaġa-guruġaguto, ekirato, “Noiaġo, mo aneru davarai e tanobarai eruġani aneruna, ġimanai toretore fefana maukana evekeo-taġoni, moġea noġabia.”

⁹ Benamo aiaġoto, mo aneru akiraiato, mani toretore fefana maukana misina nevinigu atato. Benamo ġia na ekiraguto, ekirato, “Noġabia, be noġani-ġosia! Bokamu ai mamina tu gode mamina maki bevanaġiani, senaġi nuġamu tu bevemukini.”

¹⁰ Benamo toretore fefana maukana misina mo aneru ġimana na aġabiato, benamo aġaniato. Aġaniato mamina murugu ai tu gode mamina maki evanaġiato, senaġi aġani-ġosiato nai, nuġagu tu evemukito.

¹¹ Benamo evaġa-guruġaguto, ekirato, “Tanobara beseri ġutuma, garo iraurau tarimari ema ġeri vere baregori o kini ġeri ai karakara beġe ġorani dagarari ma bono peroveta-iaġiri.”

11

Vevaġa-moġoni tarimari ruarua

¹ Benamo vaġa-vetovo ġauna ta, ġitaġitana togoi noġa, eviniguto, benamo ekiraguto, ekirato, “Noiaġo, Barau ġena Rubu Vevaġa ema fata vevaġana noa makaia, ema monai toma-rakariġo tarimari vira bono iaviri.

² Senaġi mani Rubu Vevaġa nuġanai Iuda tarimari ġeri toma-rakariġo gabuna maġuna murikana, maniġa tu bono iaġuia, asi bono makaia, korana maniġa tu irau bese tarimari ġeri (ġuriġuri gabuna) evinirito, ġia na mai

vanuġa baregona veaġana ġue gabana vasivasi ma ruarua (42) nuġari ai beġe fanafana-tariani.

³ Au vaġa-moġonigu tarimari ruarua seġuka bavinirini, benamo ġaro mabarana 1,260 Barau na bevinirini guruġari beġe kiraġi-foforirini. Ġia tu fuse-dabuġari na beġe vedabuġani.”

⁴ Mai vaġa-moġonigu tauri ruarua tu mo olive ġauri ruarua ema mo lamefa torekauri dagarari ruarua, tanobara Verena ġoiranai ġeruġani moġeri.

⁵ Bema tarima ta na nevaġa-rakavari betoni nai tu, bokari na karava beġe raka-rosini, benamo inairi beġe vaġa-buataririni. Ġia ġevaġa-rakavari beġe toni tarimana tu moġesina bemaseni.

⁶ Maiġeri tarima ruarua tu ma seġukari guba beġe kou-ġauani, benamo ġia peroveta guruġari beġe kiraġirini ġarori ai tu, ġura asi beraguni. Ema ma seġukari maki, nanu beġe kurevoani, rarai beiaġoni, e beġe urani ġarori ai tarimarima vaġa-midigumidiguri dagarari irauirau tanobarai beġe vaġa-ġorarini.

⁷ Ġeri vevarifiu beġe vaġa-magoani ġaronai, vevaġa-rakava dagarana guri variġo kwareġana, (iauka rakavari ġeri dibura), nuġana na beraka-rosini, benamo ġia bevaġa-vevaġirini. Ġia ġeri seġuka bevanaġiani, benamo bevaġi-maserini.

⁸ Benamo ġia tauġaniri tu vanuġa baregona dabarana nuġanai gena-fitari beġe tanuni. Guruġa veabanaġinai mo vanuġa barana arana ġekiraġiani tu Sodoma ema Aigupito. Ġia tauri ruarua ġeri Vereġauka tu mo vanuġai ġevaġa-satauroato.

⁹ Ġaro toitoi ma kwana nuġari ai bese irauirau, doġoro irauirau, garo irauirau, e tanobara irauirau tarimari ġia tauġaniri beġe ġitarini, senaġi guriguriri tu asi beġe urani.

¹⁰ Ġia ġeri mase dainai tanobarai ġetanuni tarimari tu beġe iakuni, beġe ġani-vegogoni e karori tata ġeri varevare beġe tuġuni; korana tu mai peroveta tarimari ruarua na tanobarai ġetanuni tarimari ġeri ai midigumidigu baregona ġevaġa-ġoraiato.

¹¹ Senaġi mo ġaro toitoi ma kwana ġekorito murinai, maġuri iaġana Barau ġenana ġia tauri ruarua nuġari ai eraka-toġato, benamo ġeruġa-vaisito. Ġia tauri ruarua ġeġitarito tarimari mabarari ġegari-rakavato.

¹² Benamo vevaġa-moġoni tauri ruarua na garo baregona ta ġeseġaġiato, guba na emariġoto, ġia evaġa-guruġarito, ekirato, “Maiġana ġomarage!” Benamo tauri ruarua magube ta nuġanai guba ġana ġevaraġeto, ġari inai tarimari ġoirari ai.

¹³ Mo aoa nuġanai moġo tano-iaga baregona eragato, benamo vanuġa baregona taviri gabanana (10) nuġanai tavi sebona tu evaġa-mouato, ma tarima mabarari 7,000 ġemaseto. Senaġi tarimarima oreri tu ġegari-rakavato, benamo Guba Barauna ġevaġa-raġeato.

¹⁴ Rakava vaġa-ruaruana tu bekori moġa, senaġi vaġa-toitoina tu dori eiaġomani.

Dudu vaġa-imaima ruaruana (7)

¹⁵ Aneru vaġa-imaima ruaruana (7) na ġena dudu efururuato, benamo garo baregori gubai ġeguruġato, ġekirato, “Tanobara basileiana o veġitaġau seġukana tu ġita ġera Vereġauka ema ġena Keriso ġeri basileiai beiaġo. Be ġia tu bevere-vanaġi vanaġini!”

¹⁶ Benamo veġitaġau tauri gabana ruarua ma vasivasi (24), Barau ġoiranai ġeri teronai ġetanuni tarimari, ġevetui-tarito, ġoirari tano ai, Barau ġetoma-rakariġo viniato,

17 ġekirato,
 “Vereġauka o, Iaru-korokoro Baraumu,
 otanuni, e otanuto-ġoi,
 ġai na ġoi ġatanikiu-vinimuni,
 korana ġoi ġemu seġuka baregona oġabiato,
 e ġemu Basileia o veġitaġau tu varau osinaiato.

18 Tanobara irauirau beseri ġebaruto,
 benamo ġoi ġemu baru ma beraġasi.
 Mase tarimari kota-viniri taimina,
 ema mo peroveta tauri,
 ġoi ġemu vetuġunaġi tarimari,
 e ġemu tarima veaġari,
 ema ġoi aramu ġematauraiani tarimari keiri baregori voiri viniviniri ġarona,
 ema tanobara ġevaġa-rakavaiato tarimari vaġa-rakavari ġarona beiaġoma.”

19 Benamo Barau ġena Rubu Veaġa guba nuġanai evekeoto, benamo
 ġena Kiraġitore Mauġana Rubu Veaġa nuġanai eforito aġitaiato. Benamo
 kiriku-ġaita, e garo gururi tari, e guba eguruato guruna baregona, e tano-
 iaga, ema aisi foreri asikeikeiri ġeiaġomato.

12

Vavine ema ġuġaia kavana dagarana asikeikeina

1 Benamo nuġa-farevaġi vetoġana baregona ta gubai eforito: Vavine ta,
 ġaro na evedabuġato, ma ġue tu kwakuna gabureri ai, ema visiġu gabanana
 ruarua (12) tu korona noġa, ġia debanai ġevetore-ġeġeraġito.

2 Ġia tu ma banina, ma dori eġabito-ġoi, moġesina nai mero-ġabi midiguna
 eġabiato, be eġabato-ġoi.

3 Benamo nuġa-farevaġi vetoġana ta gubai ma eforito: Ġuġaia kavana
 dagarana asikeikeina ta, kakakakana, debana mabarari tu imaima ruarua
 (7), guduna mabarari tu gabanana (10), ema korona maki 7 debana tata
 iatari sebori-sebori torekau.

4 Ġia ġiġuna guba visiġuri toiri-toiri ġerina sebori-sebori tu tanobara
 ġana eiari-firiġorito. Ġia tu mo vavine, dori eġabito-ġoi, ġoiranai eruġato,
 beġabini nai, asikauna mero misina bene ġabia, bene ġania uranai.

5 Vavine eġabito nai tu, mero evaġa-ġoraiato. Mo mero na tanobara
 irauirau beseri mabarari auri togoina na roġo beġori-kaurini ma seġukana
 baregona ġesi. Benamo mero emaġurito nai ġeraga-ġabi-veġitaiato, Barau
 e ġena terona ġoirana ġana ġeġwa-iaġoato.

6 Mo vavine tu Barau na ġena erovina-toreato gabuna tano fakana ġana
 egari-iaġoto. Monai beġe nariani e beġe ġubuani ġaro mabarari 1260 nuġari
 ai.

7 Benamo gubai vetari ta eġorato: Maikolo ma ġena aneru ġesi ġuġaia
 kavana dagarana asikeikeina ġevetari-viniato, benamo ġuġaia ma ġena
 aneru na maki ġia ma ġevetari-vinirito.

8 Senaġi ġuġaia kavana dagarana tu asi ekokoreto, naima gubai asi ġeri
 gabu ai ġevaġa-iaġorito.

9 Mo ġuġaia kavana dagarana asikeikeina, irau laġani veġata motana,
 arana “Diabolo” o “Satani”, tanobara mabarana eġofaiato dagarana, tu
 ġedori-rosiato, e tanobarai ġefiu-riġoato. Ġena aneru mabarari maki ġia ġesi
 ġefiu-riġorito.

10 Benamo gubai garo baregona ta eguruġato aseġaġiato, ekirato, “Toma
 ġita ġera Barau ġena vevaġa-maġuri, e ġena seġuka, e ġena veġitaġau

baregona, ema ġena Keriso ġena maoro baregona varau beraġasi. Korana Barau ġoiranai ġita tari-kakara boġi-laġani evaġa-daġarito-ġoi dagarana tu varau beġe fiu-riġoa.

¹¹ Ġia tu tarikakara na Mamoe Natuna, (ginitaġo mamoea), rarana ema ġia ġena guruġa moġoniri ġevari-fiurito-ġoi, moġerina ġekokoreto, be ġevaġa-ketoato. Ġeri maġuri asi ġetuġamaġi-kaurito, eiaġoto mo, ġea maseto.

¹² Guba o, ema gubai ġotanuni tarimami o, boġono iaku! Senaġi tanobara e daġaru-bara ġomi tu vetuġami kika! Korana Satani tu ġomi ġemi ai varau bevariġosi, nuġana tu baru na bevonuvonu-raġe, korana ribana, ġia ġena nega tu varau bekubi-rakava.”

¹³ Mo ġuġaia kavana dagarana eribato, ġia tu tanobarai ġefiu-riġoato neganai, mero evaġa-ġoraiato vavinena murina na ekureto.

¹⁴ Senaġi mo vavine tu ugava asikeikeina fanena ruarua Barau na eviniato, mo tano fakana, erovina-toreato gabuna, ġana bene rovo-iaġo uranai. Ġia monai tu laġani toitoi ma kwana beġene naria ema beġene ġibu-tanua ġana. Korana monai tu ġuġaia, mo mota rakavana, na asi ilaila beġabi-karaiani.

¹⁵ Benamo ġuġaia, mota rakavana, bokana na nanu evaġa-ġaru rosiato noġa ġabata kavana. Ġia eurato mo vavine tu mo ġabata na bene ġaru-kwareġaia etato.

¹⁶ Senaġi tano na mo vavine evaġa-kavaiato, korana tano evekeoto, benamo ġuġaia bokana na eraka-rosito ġarukana mabarana eboġeato.

¹⁷ Benamo ġuġaia kavana dagarana na mo vavine ebaruvini-rakavaiato, benamo eiaġoto, mo vavine besena, Barau ġena taravatu guruġari ġekorana-iaġirito-ġoi ema Iesu ġena vevarifiu guruġari ġevaġa-moġonirito-ġoi tarimari mabarari evetari-vinirito.

¹⁸ Benamo ġuġaia tu kone ai ea ruġato.

13

Davara na vevaġa-rakava dagarana ebere-rosito, moġa tu Keriso ġofaġofana

¹ Benamo au na vevaġa-rakava dagarana ta aġitaiato, daġaru-bara na eraka-raġeto. Ġia guduna mabarari tu gabanana (10), e debana mabarari tu imaima ruarua (7). Korona mabarari tu gabanana (10). Moġeri korona tu ġia guduna tata ġeri ai, ma debana tata ġeri ai tu Barau vaġa-rakavana arana.

² Mo vevaġa-rakava dagarana aġitaiato, moġa ġitaġitana tu lepadu noġa, (lepadu tu taiga noġa), a kwakuna tu bea kwakuri kavana, ema bokana tu laion bokari kavana. Benamo ġuġaia kavana dagarana asikeikeina tauġena ġena seġuka, ġena terona, ema ġena maoro eġabirito, mo vevaġa-rakava dagarana eviniato.

³ Vevaġa-rakava dagarana debana tai tu giri baregona ta, ġevaġi-maseato girina, senaġi mo manuġa baregona tu enamoto. Tanobara tarimari mabarana mo vevaġa-rakava dagarana ġenai nuġari ġefarevaġi-rakavato, benamo ġia murinai ġerakato.

⁴ Tarimarima mabarari na ġuġaia ġetoma-rakariġo viniato, korana ġia ġena seġuka tu mo vevaġa-rakava dagarana eviniato. Ema vevaġa-rakava dagarana maki ġetoma-rakariġo viniato, ġevedanaġito, ġekirato, “Dei tu mai vevaġa-rakava dagarana kavana? Dei na ġia bevetari-viniani riba?”

⁵ Mo vevaġa-rakava dagarana tu maoro eviniato tu, veiavi guruġari ema Barau vaġa-rakavana guruġari bene kiraġiri ġana, ema ġue gabana vasivasi ma ruarua (42) nuġari ai ġena maoro bene ġauvei-iaġiri.

⁶ Benamo muruna ekeoato, ma Barau vaġa-rakavana guruġari ekiraġi-matamato; Barau arana ema ġena tanu gabuna ekira-rakavarito, ema gubai ġetanuni tarimari mabarari evaġa-rakavarito.

⁷ E maoro eviniato, Barau ġena veaġa tarimari bene vetari-viniri nuġanai bene kokore, be ġia bene vaġa-darereri ġana. Ema seġuka eviniato, doġoro mabarari, e bese mabarari, e garo mabarari, ema tanobara mabarari bene ġori-kauri ġana.

⁸ Tanobarai ġetanuni tarimari mabarari na ġia beġe toma-rakariġo vini-ani. Maiġeri tarima tu, Barau na tanobara roġosi bere veia veġata, arari mo Mamoe Natuna, ġevaġiato dagarana, ġena maġuri bukanaġi arari asi etorerito tarimari.

⁹ Ma seġana tarimana tu bene seġaġi.

¹⁰ Barau beurani dibura numanai beġene baru-taria betoni tarimana tu, dibura numanai beġe baru-tariani veġata. Barau beurani vetari baġana na beġene vaġi-masea betoni tarimana tu, vetari baġana na beġe vaġi-maseani. Maiġeri guruġa na Barau ġena tarima veaġari evaġa-guruġarini, beġene vevaġa-gwaġiġi, ema ma ġeri vetuġamaġikau ġesi beġene tanu.

Vevaġa-rakava dagarana vaġa-ruaruana, moġa tu peroveta tarimana ġofaġofana

¹¹ Moġa murinai au na vevaġa-rakava dagarana ta ma aġitaiato, tano na everaġa-raġeto. Ġia guduna tu ruarua, Mamoe Natuna guduna kavana, ema ġia tu ġuġaia kavana eguruġato-ġoi.

¹² Ġia na vevaġa-rakava dagarana giniguinena moġa aranai ġena maoro e seġuka mabarari eġauvei-iaġirito. Ma ġia na tanobara tanu-iaġina tarimari mabarari elau-naġirito, mo vevaġa-rakava dagarana giniguinena, debana giri baregona, ġevaġi-maseato girina, manuġana enamoto dagarana, beġene toma-rakariġo vinia etato.

¹³ Mai vevaġa-rakava dagarana vaġa-ruaruana mainana veiġa boruri baregori ema vetoġa irauri tari eveirito-ġoi. Ta tu, ġia na tarimarima mabarari ġoirari ġutuġutunai karava guba na evaġa-mariġoato.

¹⁴ Ġia tu vetoġa boruri kotari eviniato, mo vevaġa-rakava dagarana giniguinena ġoiranai eveirito, tanobarai ġetanuni tarimari eġofa-darererito. Ma ekirarito, mo vetari baġana na ġevaġa-beroato, ma toma roġo emaġuri-tanuni vevaġa-rakava dagarana, moġa gubakauna ġana tu vetoġana dagarana o laulauna ta beġene veia, benamo ġene vaġa-ruġa-vaisia etato.

¹⁵ Mo vevaġa-rakava dagarana vaġa-ruaruana tu seġuka eviniato, vevaġa-rakava dagarana laulauna giniguinena moġa iaġa bene vinia, be bene guruġa, ema mo vevaġa-rakava dagarana laulauna asi ġeurani toma-rakariġo-vinina tarimari mabarari bene vaġi-maseri ġana.

¹⁶ Benamo tarimarima mabarari, misiri e baregori, ma ġeri farefare ġutuma tarimari e asi ġeri farefare tarimari, tuġu-rakaorakao tarimari e fakai ġetanuni o dia tuġu-rakaorakao tarimari, etuġu-naġinaġirito vetoġa o maka ta ġimari aroribari ai o bakuri ai beġene ġabia etato.

¹⁷ Moġesi beġene vei, be tarima ta dagara ta asi bene voivoi-kava o asi bene voivoi-iaġi-kavaia, senaġi mo vevaġa-rakava dagarana giniguinena ġena vetoġa o maka, mai tu ġia arana o arana eruġa-boroġiato numerana, ġenai tarimana ġereġana moġo dagara bene voi e bene ġwa-voivoi.

¹⁸ Iaunega tu maiġa: Nuġa-mama o tuġamaġi-faka tarimana na mo vevaġa-rakava dagarana numerana bene vaġa-gaua, korana mo numera tu tarima ta numerana. Numerana tu maiġa: 666.

14

Ginitaġo mamoe na evoi-vaġirito tarimari ġeri mari

¹ Benamo aboġeto tu, Mamoe Natuna ġoiragu ai aġitaiato, Siona Ġoronai eruġa-taġoto-ġoi, ema ġia sevinaġi tarimarima 144,000 ġeruġa-taġoto-ġoi. Bakuri ai tu ġia arana ema Tamana arana ġevetoreto.

² Benamo guba na garo ta ġaruka vovoka ġeġaru-gwadani gururi ema guba eguruani guruna noġa aseġaġirito. Mo guru tu noġamo hap ġelauni tarimari na ġeri hap ġelaurito-ġoi gururi kavana.

³ Ġia tu mo terona, e maġuri dagarari vasivasi (4), ema veġitaġau tarimari baregori ġoirari ai mari variguna ta ġemariato. Tarima ta na mo mari moġa marimarina tu asi bedoġariani riba, senaġi mo tanobara na ginitaġo mamoe na evoi-vaġirito tarimari 144,000 ġereġari na moġo.

⁴ Mai tarima maiġeri tu vavine ġesi asi ġekimato o asi ġeveġura-vanaġito, be asi ġemiroto, ġia tu tauġeri ġevenaumato, be ġia tu namo vedaurea. Ġia tu Mamoe Natuna aiġana aiġana eiaġoni nai, murina na ġerakani. Tarimarima vekaravari ai ġia tu Barau na evoirito, ma Barau ema Mamoe Natuna ġeri tarimarima giniguineri ai ġeiaġoto.

⁵ Mururi na ġofaġofa guruġana ta asi ġekiraġiato, ġia ġeri ai rakava misina ta maki asiġina ġinavaġi.

Aneru toitoi

⁶ Benamo au na aneru ta maia guba e tano fakari na erovoto-ġoi aġitaiato. Ġia ġenai tu Vari Namona, betanu-vanaġi vanaġini varina. Ġia na mai Vari Namona tu tanobara mabarari, e doġoro mabarari, e garo mabarari, ema bese mabarari tanobarai ġetanuni ġeri beġene vari-fiua ġana.

⁷ Eguruġa-fararato, ekirato, “Barau garina boġono vei ema Barau boġono vaġa-raġea! Korana tu ġia ġena vevaġa-kota aoana tu varau beraġasi. Guba, e tanobara, e daġaru-bara, ema nanu eġaruani gaburi eveirito Barauna boġono toma-rakariġo vinia.”

⁸ Aneru vaġa-ruaruana murina na eiaġomato, benamo ekirato, “Beketo, Babulona baregona varau beketo. Ġia na tanobara irauirau beseri mabarari ġia ġena veġura-vanaġi wainina gwaġiġina evaġa-niurito.”

⁹ Ma aneru vaġa-toitoina ġia murina na eiaġomato, benamo eguruġa-fararato, ekirato, “Bema tarima ta na mo vevaġa-rakava dagarana ema iouiouna dagarana betoma-rakariġo viniani, ema ġena maka bakunai o ġimanai beġabi-raġeani tu,

¹⁰ ġia maki Barau ġena baru baregona wainina beniuani. Mo baru baregona wainina gwaġiġina moġa tu mabarana Barau ġena baru kapusina nuġanai ebubu-ġuraiato. Ġia tu aneru veaġari ema Mamoe Natuna ġoirari ai karava morena e salfa nuġanai bemidigu-midiguni.

¹¹ Ġia mo karava moreri nuġanai beġe midigu-midiguni goġuna tu beraġe-vanaġi vanaġini asi magona. Ma vevaġa-rakava dagarana ema ġia vetoġana o laulauna dagarana beġe toma-rakariġo viniani tarimari o ġia arana makana beġe ġabiani tarimari tu, boġi-laġani asi beġe iaġaraġini.”

¹² Mainana Barau ġena tarimarima veaġari, Barau ġena taravatu ġekorana-iaġiani ema Iesu ġenai ġevetuġamaġikauni tarimari, evaġa-guruġarini, beġene vevaġa-gwaġiġi ema beġene kokore.

13 Benamo guba na garo ta ma aseġaġiato, ekirato, “Maiġeri guruġa notoreri: Maitoma beiaġoni tu, Vereġauka ġena maġuri nuġanai ġetanuni tarimari beġe maseni tu beġene iaku.” Iauka Veaġa evaġa-veseto, “Oi, ġia tu ġeri ġauvei e vekwaraġi na beġe iaġaraġini, korana tu ġeri veġa namori ġia ġesi beġe iaġo-sebonani.” (Moġa anina tu, ġeri vekwaraġi voina namona beġe doġariani veġata).

Tanobarai kwakwa ġarona

14 Benamo aboġe-iaġoto, magube kurokurona ta aġitaiato, ma mo magube kurokurona iatanai tu Tarimarima Natuna noġa tarimana etanuto. Ġia debanai tu golo koronana ta, ma ġimanai tu baġa ġeġevana masakona ta.

15 Benamo aneru ta maia Rubu Veaġa na ema raka-rosito, bena magube kurokurona iatanai etanuto tarimana ekea-farara viniato, ekirato, “Ġemu baġa ġeġevana noġabi-vaisia, benamo ġaniġani dagarari nobasi-vaġiri! Korana kwakwa o basibasi ġarona varau beraġasi, tanobarai ġaniġani tu beġe maġe-ġosi.”

16 Benamo mo magube iatanai etanuto tarimana ġena baġa ġeġevana tanobara iatana na edave-vanaġiato, benamo tanobara ġaniġanina ebasi-vaġiato, eġabiato.

17 Aneru ta maia guba na Rubu Veaġa nuġana na ema raka-rosito. Ġia maki ġimanai tu baġa ġeġevana masakona ta.

18 Aneru ta maia fata veaġana na eiaġomato. Ġia tu karava eġita-ġauato-ġoi aneruna. Ġia eiaġomato, benamo baġa ġeġevana masakona eġabiato aneruna ekea-farara viniato, ekirato, “Ġemu baġa ġeġevana masakona noġabia, ma tanobara vinena ġwari ġureri nokari-vegogori, korana vine ġwari (o grapes) tu varau beġe maġe.

19 Benamo mo aneru na ġena baġa ġeġevana moġa vaġa-sebona edaveato, benamo tanobara iatana vine ġwari mabarari ebasi-vaġa-vegogorito. Benamo moġesi mabarabarari eġabirito, ma vine ġwari ġefanarini gabunai ea bubu-toġarito. Mo vine ġwari ġefanarini gabuna moġa, mo tu Barau ġena baru ekiraġiani gabuna.

20 Mo vine ġwari mabarari vanuġa baregona murikanai vine ġwari ġefanarini gabunai ġefanafana-taririto-ġoi gorari beġene riġo ġana. Benamo vine ġwari ġefanarini gabuna na rara eġaru-rosito. Rara eġaru-rosito ġena geboka tu tano bevaraġe mo, hosi muruna dokona, ma ġena mauka tu stadia 1,600 o 300 kilomita.

15

Aneru imaima ruarua (7) ġeri ai vevaġa-midigumidigu dagarari rakavari

7

1 Benamo gubai vetoġa baregona ta, nuġa-farevaġi dagarana aġitaiato: Aneru 7 aġitarito, ġeri ai tu dagara rakava kwaikwairi 7, tarimarima vaġa-midigumidiguri dagarari. Mo tu dagara rakavari magona. Korana moġeri na Barau ġena baru bevaġa-kori ginikauani.

2 Ma davara ta veġia kavana ma karavana aġitaiato. Mo davara sevinai tu mo tarimarima, vevaġa-rakava dagarana ema ġia laulauna dagarana ema ġia arana ekiraġiani numerana ġevaġa-ketorito tarimari, ġeruġa taġoto-ġoi aġitarito. Ġia ġimari ai tu Barau na evinirito hapiri ġeġabi-taġorito-ġoi,

3 ma Barau ġena vetuġunaġi tarimana, Mose, ġena mari ema Mamoe Natuna ġena mari ġemariato-ġoi,
“Vereġauka o, ġoi tu

Iaru-korokoro Barauna,
 ġemu ġauvei tu barego,
 asi tau vaġa-ilailana
 ema namo vedaurea. Ġuru mabarari ġeri Vere o,
 ġoi ġemu dabara tu iobukaiobuka ema moġoni veġata.
⁴ Vereġauka o, deikara na ġoi asi begari-vinimuni,
 ma ġoi aramu asi bevaġa-raġeani?
 Korana tu ġoi moġo ġereġamu veaġa.
 Tanobara mabarari tarimari beġe iaġomani,
 benamo ġoi beġema toma-rakariġo vinimuni.
 Korana tu ġemu veiaġa iobukaiobukari varau beġema fofori.”

⁵ Maiġa murinai au aboġe-iaġoto, benamo gubai Rubu Veaġa, mo tu Barau na ġena guruġa moġoniri evaġa-foforirini farai numana veaġana, evekeoto aġitaiato.

⁶ Mo aneru imaima ruarua (7), ġeri ai tu tarimarima vaġa-midigumidiguri dagarari rakavari; farai numana veaġana na ġeraka-rosito, dabuġa gwaġiġiri namori ema veġia-veġiari na ġevedabuġato, ema kobari ai tu golo beletari ġetore-ġeġeraġirito.

⁷ Benamo mo maġuri dagarari vasivasi vekaravari ai ta na mo aneru 7 golo diġuri 7 evinirito. Mo golo diġuri tu tanu-vanaġivanaġi Barauna ġena baru na evaġa-vonu fokafokarito.

⁸ Benamo mo Rubu Veaġa tu Barau marevana goġuna ema seġukana goġuna na evaġa-vonuato. Tarima ta Rubu Veaġa nuġanai asi roġo beraka-toġani riba, beiaġoni mo, tarimarima vaġa-midigu-midiguri dagarari rakavari 7 beġe korini vau.

16

Barau ġena baru diġu imaima ruarua (7) nuġari ai

¹ Benamo garo baregona ta Rubu Veaġa nuġana na eiaġomato aseġaġiato. Mo garo na tu aneru 7 evaġa-guruġarito, ekirato, “Ġoiaġo, Barau ġena baru na evaġa-vonurito diġuri 7 maniġeri tanobara iatanai ġoa bubu-firiġori.”

² Aneru giniginena eiaġoto, ġena diġu tanobara iatanai ea bubu-kauato. Benamo manuġa ġitaġitari rakava kwaikwairi ma midiguri maki asikeikeiri vevaġa-rakava dagarana ġena vetoġa o maka ġeġabiato ema ġia iouiouna dagarana ġetoma-rakariġo viniato tarimari na ġeġoitaġorito.

³ Aneru vaġa-ruaruana ġena diġu tu davarai ebubu-riġoato. Benamo mo davara tu mase tarimana rarana kavana eveito, ma nuġanai maġuri ġetanuni dagarari mabarari ġemaseto.

⁴ Aneru vaġa-toitoina ġena diġu tu ġarukai ema nanu eġaruani gaburi ai ebubuato, benamo rarai ġeiaġoto.

⁵ Benamo nanu eġita-ġauani aneruna garona aseġaġiato, ekirato,
 “Veaġa Baraumu,

ġoi tu tovtovonai otanuto-ġoi,
 ema initoma maki otanuni.

Ġoi ġemu kota-vini ġauveina tanobara tarimari ġeri ai maiġesina oveiani tu maoro korikori moġo.

⁶ Korana ġia na ġoi ġemu tarimarima veaġari ema peroveta tarimari rarari ġevaġa-riġorito.

Moġesina naima ġeri veiaġa lorinai,
 be rara boviniri beġe niu.”

⁷ Benamo Barau ġena fata veaġana na garo ta eiaġomato aseġaġiato, ekirato,

“Veregāuka o, gōi tu moḡoni veḡata Iaru-korokoro Barauna, gēmu kota-vini gāuveiri tu dabara moḡoninai ema maoronai oveiani.”

⁸ Aneru vaḡa-vasivasina gēna diḡu tu ḡaro iatanai ebubu-kauato. Benamo ḡaro seḡuka eviniato, tarimarima karava na bene ḡarari ḡana.

⁹ Benamo mo ḡaro seḡukana gugurana baregona na tarimarima eḡararito. Ma monana tarimarima tu asi ḡevetuḡamaḡi-kureto, benamo Barau asi ḡevaḡa-raḡeato, ne ḡia na tu Barau arana ḡevaḡa-rakavaiato. Barau tu ma gēna maoro baregona maḡeri midigumidigu dagarari rakavari bevaḡa-ḡorarini e asi bevaḡa-ḡorarini.

¹⁰ Aneru vaḡa-imaimana gēna diḡu tu vevaḡa-rakava dagarana gēna terona iatanai ebubu-kauato, benamo gēna veḡitaḡau gabuna tu emukunafurufuruto. Benamo tarimarima midigumidigu baregona na eḡabirito, ma meari ḡekafu-taririto.

¹¹ Mo midigumidigu ema manuḡa dairi ai, ḡia na gubai etanuni Barauna ḡevaḡa-rakavaiato. A ḡia tu asi ḡeurato ḡeri veḡa rakavari ḡerina beḡene vetuḡamaḡi-kure.

¹² Aneru vaḡa-imaima sebonana (6) gēna diḡu tu Eufrate ḡarukana baregona nuḡanai ebubu-ḡuraiato. Benamo mo ḡaruka baregona eroroto, ḡaro eraḡeni rekena na kini (ma ḡeri vetari doḡorori ḡesi) beḡe iaḡomani, moḡeri ḡeri dabara evaḡa-fakaiato.

¹³ Moḡa murinai iauka rakavari toitoi farakeḡo noḡa moḡo aḡitarito. Ta tu dagara ta ḡuḡaia kavana, (mai tu Satani), bokana na ema raka-rosito, ta tu vevaḡa-rakava dagarana, (mai tu Keriso ḡofaḡofana), bokana na ema raka-rosito, ma ta tu peroveta ḡofaḡofa tarimana bokana na ema raka-rosito.

¹⁴ Mo iauka moḡeri tu demoni iaukari, ḡia na vetoḡa irauirauri ḡeveirito-ḡoi, ema ḡeiaḡoto tanobara mabarana kiniri ḡeri ai, beḡenea vaḡa-vegogori, be Iaru-korokoro Barauna gēna ḡaro baregonai tu Barau beḡene vaḡa-vevaḡia ḡana.

¹⁵ “Noseḡaḡi! Au tu lema tarimari kavana baiaḡomani! Bevaḡa-noga-taḡoni ema gēna dabuḡa kefinai bevei-taḡorini tarimana tu bene iaku. Korana ḡia tu kefina kori asi beiaḡoni, benamo ḡutuma-bara nuḡanai asi bemaiaikaiani.”

¹⁶ Benamo demoni iaukari toitoi na kini mabarari ḡeḡori-vegogorito gabu tai, Heberu garori ai mo gabu arana tu Amagedon.

¹⁷ Aneru vaḡa-imaima ruaruana (7) gēna diḡu tu guba fakanai ebubuato, benamo Rubu Veḡa nuḡana na garo baregona ta terona na eiaḡomato, ekirato, “Varau bekoril!”

¹⁸ Benamo kiriku eragato, e garo gururi tari ḡeraḡeto, e guba eguruato, ema tano-iaga baregona eragato. Tarimarima tanobarai ḡetanu-guineto, monana beiaḡoma mo initoma moḡesi tano-iaga ta tu asi eḡorato. Moḡa tu tano-iaga barego lelevaḡina veḡata.

¹⁹ Benamo vanuḡa baregona evetavito, tavi toitoi ḡevetoreto, ema tanobara mabarari vanuḡari maki ḡeḡwa-kafu kafurito. Barau na vanuḡa baregona Babulona ma etuḡamaḡi-ḡenoḡoiato, benamo Barau gēna baru ema nuḡa-ḡirimāḡirima wainina na evaḡa-vonu fokafokaiato kapusina eviniato, bene niua ḡana.

²⁰ Benamo motumotu mabarari ḡeraga-rekwarekwato ema ḡoro maki ḡerekwarekwato, be asiḡina.

²¹ Ma guba na aisi, fore noḡa asikeikeiri, ḡeri meto tu pauna sinau sebona (100) kavana, tata tarimarima iatari ai ḡeketokauto. Benamo mo tarimarima na Barau guruḡa rakavari ḡeviniato-ḡoi, korana mo aisi, fore

noĝa asikeikeiri, iatari ai ĝeketokauto-ĝoi dainai. Korana mo vevaĝa-midigumidigu dagarana rakavana moĝa tu rakava kwaikwaina.

17

Babulona - veĝura-vanaĝi vavinena baregona

¹ Benamo mo diĝu imaima ruarua (7) ĝeĝabi-taĝorito-ĝoi aneruri fakari ai ta tu au rekegu ĝana eiaĝomato, benamo au ema vaĝa-guruĝaguto, ekirato, “Noiaĝoma, be veĝura-vanaĝi vavinena baregona ĝena veĝura-vanaĝi voina metona beĝabiani metona navaĝa-ĝitamu. Ĝia tu nanu vovoka iatari ai etanuni.

² Tanobarai ĝetanuni vereri baregori o kiniri mabarari tu ĝia ĝesi ĝeveĝura-vanaĝito. Ema tanobarai ĝetanuni tarimari maki ĝia ĝena veĝura-vanaĝi wainina na ĝeniu-babobaboto.”

³ Benamo Iauka Veaĝa na eborogiguto, aneru ta na eĝwa-rakaguto, tano fakana ĝana eĝwa-iaĝoguto. Monai vavine ta aĝitaiato, vevaĝa-rakava dagarana kakakakana ta iatanai etanu-taĝoto-ĝoi. Mo vevaĝa-rakava dagarana tauĝanina tu Barau vaĝa-rakavana arari ĝevaĝa-vonuato. Ĝia debana mabarana imaima ruarua (7), ema guduna tu gabanana (10).

⁴ Mo vavine tu dabuĝa kakakakari ema koturi kakakakari o pepolori namo vedaureari eriĝoto, ema golo e fore nauĝanauĝari ema aĝeva ma marevari na everato. Ĝimanai tu golo kapusina ta eĝabiato. Mo golo kapusina tu veiĝa rakava kwaikwairi ema ĝena veĝura-vanaĝi mirori na evonu-fokafokato.

⁵ Ĝia bakunai tu ara ta ĝeberaiato, anina maki vekuretoĝa, maiĝesi ĝetoreato, “Babulona barana, veĝura-vanaĝi sinari ema tanobarai veiĝa rakava kwaikwairi mabarari sinari.”

⁶ Benamo au na mo vavine aĝitaiato, Barau ĝena tarimarima veaĝari, ĝevaĝi-maserito tarimari, rarari eniurito, be eniu-babobaboto. Mo tu Iesu ĝevaĝa-moĝoniato-ĝoi nai, ĝevaĝi-maserito tarimari rarari. Au na ĝia aĝitaiato nai, aĝaba-rakavato.

⁷ Benamo mo aneru na ekiraguto, ekirato, “Ĝoi tu kara dainai oĝaba-rakavani? Mani vavine maniĝa varina vekuretoĝana ema mani vevaĝa-rakava dagarana iatanai beraĝe maniĝea, mani debana 7 ma ĝena gudu 10, varina vekuretoĝari tu nakiravara-ginikaumu.

⁸ Mo vevaĝa-rakava dagarana boĝitaia, moĝa tu guinenai etanuto-ĝoi, ma ĝia toma tu asi tauna. Ĝia tu tano gabigabina guri variĝo kwareĝana na bema raka-rosini, benamo beiaĝoni gabuna rakava kwaikwaina, midigu-midigu baregona bea ĝabiani. Tanobarai ĝetanuni tarimari, Barau na tanobara eveiato monana veĝata arari maĝuri bukanai asi etorerito tarimari, na mo vevaĝa-rakava dagarana ĝeĝitaiato nai tu, nuĝari ĝefarevaĝi-rakavato. Korana ĝia tovotovonai tu etanuto-ĝoi, ma toma tu asi tauna, senaĝi ĝia tu ma beiaĝomani.

⁹ Iaunega tarimana na maiĝa bene tuĝamaĝi-fakaia. Mo deba 7 tu mo vavine etanukauni ĝorori 7.

¹⁰ Ma ĝia aniri ta maki vere baregori o kini 7. Vere barari imaima tu ĝeketoto, sebona tu roĝo eruĝa-taĝoni, ma ta tu roĝosi bene iaĝoma. A ĝia beiaĝomani tu, mai tanobarai asi betanu-maukani.

¹¹ Mo vevaĝa-rakava dagarana guinenai etanuto-ĝoi, ma initoma ĝia tu asi tauna, maniĝa tu kini vaĝa-imaima toitoina (8). Ĝia tu mani vere baregori o kini 7 karori ta, ma ĝia tu beiaĝoni gabu rakava kwaikwaina midigumidigu barego bea ĝaniani.

¹² Mo gudu 10 oġitarito, moġeri mo tu kini 10. Ġia tauri 10 tu kini dagina ema beġe ġita-ġaurini tano-barari roġosi beġene ġabiri. Senaġina ġia tu aoa sebona mo vevaġa-rakava dagarana ġesi kini kavana veġitaġau maorona baregona beġe ġabiani.

¹³ Ġia ġeri tuġamaġi tu sebona moġo, ema ġeri seġuka e maoro baregona tu mai vevaġa-rakava dagarana beġe viniani.

¹⁴ Ġia na Mamoe Natuna beġe vetari-viniani, senaġi Mamoe Natuna na bevaġa-ketorini, korana ġia tu vere mabarari ġeri Vere, ema kini mabarari ġeri Kini. Ema ekearito e eġabi-viriġirito ema ma vetuġa-maġikauri ġesi ġia murinai ġerakani tarimari maki ġia ġesi beġe kokoreni.”

¹⁵ Benamo mo aneru na ekiraguto, ekirato, “Mo veġura-vanaġi vavinena etanu-taġoni nanuri boġitari, moġeri tu tanobara beseri, tarima ġutuma gorogoro, tanobara irauirau tarimari, ema garo irauirau tarimari boġitari.

¹⁶ Mo vevaġa-rakava dagarana ema mo gudu 10 boġitari dagarari, mani veġura-vanaġi vavinena tu beġe iau-rakavaiani. Ġia na asi ġena farefare ai beġe vaġa-iaġoani, e dabuġana ġenana beġe fuki-vaġirini, tauġanina kori beġe vaġa-rakaiani; viriġona beġe ġaniani ema karavai beġe gabu-raġeani.

¹⁷ Korana Barau na maniġeri kini nuġari ai evaġa-urato, ġia ġena ura beġene veia etato. Moġesina naima ġia maki ġeurato nai, ġeri seġuka mo vevaġa-rakava dagarana beġene vinia, be bene veġorikau, bene iaġo mo, Barau ġena guruġa mabarari beġene ġuġuru.

¹⁸ Ema mo boġitaia vavinena tu vanuġa baregona. Ġia na tanobara vereri o kiniri mabarari eġori-kaurini.”

18

Babulona beketoni

¹ Maġa murinai aneru ta ma ġena seġuka baregona ġesi guba na emariġoto aġitaiato. Ġia marevana mamana na tanobara emama-vaġa-ġauato.

² Benamo tuġana maki asi ekoġoto, ekirato, “Beketo! Vanuġa baregona Babulona tu beketo! Ġia tu demoni ġeri tanu gabunai beiaġo, e iauka rakavari ema iauka mirori, e manu rakava kwaikwairi ġeri tanutaġo gabunai beiaġo.

³ Korana tu bese mabarari na ġena wain ġeniuato nai ġevei-babobaboto; mo wain tu ġena veġura-vanaġi ġauveiri.

Tanobarai ġetanuni kiniri mabarari tu ġia ġesi ġeveġura-vanaġito, ema tanobarai dagara ġeġwa-voivoirini tarimari maki ġia ġena farefare namori ġerina farefare vovoka tarimari ai ġeiaġoto.”

⁴ Moġa murinai tu guba na garo ta eiaġomato ma aseġaġiato, ekirato, “Ġegu tarima mabarami, mai vanuġa baregona ġenana ġoma raka-rosi. Be ġia ġena vei-rakava veiġari asi boġono veiri, ġia na vevaġa-midigumidigu dagarari rakavari beġabirini dagarari ġomi na asi boġono ġabiri.

⁵ Korana ġia ġena vei-rakava tu iatai-iatai bevesenu-senukau, bevaraġe mo, guba vanuġana maki bea doġaria. Senaġi Barau na ġena veiġa, asi maorori dagarari, etuġamaġi-taġorini, asi etuġa-rekwarini.

⁶ Ġia na ġomi evinimito ilailana ma boġono vini-vaġa-voia. Ġena veiġa voina ilailana moġa boġono vaġa-ruaia, benamo boġono vinia.

Niuniu wainina kapusi sebona ġomi evinimito nai tu, ġena kapusi korikori ai niuniu wainina moġa nuġanai ta maia boġono bubu-ġuraia, boġono vaġa-ruaia, benamo voina boġono vinia.

⁷ Tauġena eveġabi-varaġeto ema eġani-namoto-ġoi ema etanu-namoto-ġoi ilailanai, midigumidigu boġono vinia ema boġono vaġa-taġitaġia.

Ġia nuġanai tu eveiavini, ekirani,

‘Au tu kwin o vere vavinena kavana atanuni.

Au tu dia vabu ema asiġina ġinavaġi bataġi-vanoro vanoroni.’

⁸ Moġesina naima ġia tu ġaro sebona nuġanai moġo midigumidigu irauirau na beġe vaġa-ketoani, mo tu mase, taġi-vanorovanoro, ema doġe ġenai beġe raġasini.

Ma ġia tu karava na beġaraiani.

Korana ġia ġeri rakava voina beviniani Barauna tu Barau Vereġauka, ma ġia tu ma seġukana.”

⁹ Tanobara kiniri, ġia ġesi veġura-vanaġi veġari ġeveito ema ġia ġesi ġeġani-namoto-ġoi e ġetanu-namoto-ġoi kiniri, na ġia beġaraiani goġuna beġe ġitaiani nai tu, taġina beġe veini, ema beġe taġi-vanoroani.

¹⁰ Ġia ġena midigumidigu beġe ġitaiani, moġa garina na manaġai beġe ruġani, benamo beġe taġi-guruġani, beġe kirani,

“Vetuġamu! Siti baregona vetuġamu kekei!

Babulona o, seġuka rakava sitina!

Ġoi tu aoa sebona nuġanai moġo ġemu rakava voina metona boġabia!”

¹¹ Tanobarai dagara ġevoivoi-iaġirini tarimari beġe taġini ema beġe taġi-vanoroani, korana ġeri voivoi-iaġi farefareri tu asi voivoiri tarimana ta.

¹² Mo tu ġeri golo, e silva, e fore namo vedaureari voiri barego foreri, ema aġeva marevari asi-gadara dagarari; dabuġa namori gwaġiġiri, e dabuġa kota kakakakari o pepolori, e dabuġa silikari, ema dabuġa kakakakari; ma bonari ġauri, e elefani doġari na ġeveirini dagarari irauirauri, e ġau voiri barego ġauri na ġeveirito dagarari, e auri boraborari e auri namori ema mabolo na ġeveirito dagarari;

¹³ ġaniġani mamiri vaġa-namori muramurana arana sinamon, e ma bonari muramurari, e goġu ma bonana eveiani muramurana, e bonana namona muramurana arana muro, e tauġani ai ġedauani muramurana arana frenkinsens; vine nanuna, e olive diġana, farao ema widi, boromakau ema mamoe, hosi ema kariota, ema tarimarima maki.

¹⁴ Beġe kirani, “Ġau ġwaġwana bono ġabia otato-ġoi uradikana oveito-ġoi dagarana tu ġemuna beveġita. Ġemu farefare vovoka ema ġemu mareva mabarari beġe rekwa-rekwa, asi bodoġari-ġenoġoirini maia!”

¹⁵ Dagara ġeġwa-voivoini tarimari na maiġeri dagara ġevoivoi-iaġirito ema ġia ġenana farefare vovoka ġeġoitaġoto, moġeri tu manaġai beġea ruġani, mo midigumidigu ġia na beġabiani moġa garina. Ġia tu beġe taġi-rakava rakavani ema beġe taġi-vanoroni,

¹⁶ ema beġe taġi-guruġa guruġani, beġe kirani,

“Vetuġamu! Vanuġa baregona, vetuġamu kekei!

Dabuġa namori gwaġiġiri, e dabuġa kota kakakakari o pepolori, ema kakakakari na ovedabuġato;

golo kimorekimoreri, e fore namo vedaureari, ema gudugudu marevari asi-gadarana oveiato-ġoi.

¹⁷ Aoa sebona nuġanai moġo ġemu farefare vovoka tabutabu mabarari benamo beġema kori-ketovaġi!”

Bouti baregori ġeġwa-raġarini tarimari mabarari, e bouti ai davara na ġeragani tarimari mabarari, e bouti ai ġeġauveini tarimari, ema davara maġaniri ma dagara tari ġerina ġeri-ġari ġeġoitaġoni tarimari mabarari manaġai ġea ruġato.

¹⁸ Benamo eġaraiato goġuna ġeġitaiato nai tu, maiġesina ġekirato, ‘Mai vanuġa baregona tu irau veġata, siti ta maiġesina kavana tu asi etanuto-ġoi.’

¹⁹ Benamo tano-kauri debari ai ġebubukauto, ġetaġito e ġetaġi-vanoro vanoroto, ġekirato,

“Vetuġamu kekei! Vanuġa baregona vetuġamu kekei!

Ma ġeri bouti davarai tarimari tu ġia ġena taġa ġenana farefare vovoka ġeġoitaġoto, ene?

Aoa sebna nuġanai ġia tu asi ġena farefare tai moġo beiaġo.

²⁰ Guba vanuġana o, ġia ġena keto iakuna ġovei.

Barau ġena tarima veaġami,

e apostolo tarimami,

ema peroveta tarimami,

ġoiaku ġoverere;

korana ġomi veiġa rakavari evei-vinimito dainai, Barau na ġena rakava voina bevinia.”

²¹ Benamo aneru kokore rakavana ta na fore ta widi ġeġiro-iaġirini diġuna baregona ta kavana eġabiato. Mo fore-diġuna moġa eġabi-vaisiato, benamo davarai efiu-reiato, benamo ekirato,

“Vanuġa baregona Babulona tu maiġesi ma baruri ġesi beġe fiu-tariani, benamo berekwarekwa-moġovaġini,

asi ġitaġitanai ma beiaġoni.

²² Hap ġelauni ma mari ġeġabini gururi, e ivirikou ġefururuni ema dudu ġefururuni gururi ġoi ġemu maninai asi ma beġe seġaġi-ġenoġoirini.

Ġauvei namori ma ribari tarimari ġoi nuġamu ai asi ma beġe tanu-ġenoġoini.

Widi ġeġiro-iaġirini foreri gururi maki maninai asi ma beġe seġaġi-ġenoġoirini.

²³ Maninai lamefa mamari asi ma beġe ġara-ġenoġoini.

Veġaraġo variġu tauna e vavinena garona ta maki maninai asi ma beġe seġaġi-ġenoġoiani.

Ġoina dagara voivoi-iaġiri tarimari mai tanobara nuġanai ġia tu tarima baregori.

Ġoi ġemu meġameġa tovoġari na tanobara irauirau mabarari oġori-darererito.

²⁴ Peroveta tarimari e Barau ġena tarimarima veaġari ġevaġirito rarari, ema tanobara iatanai tarimarima ġevaġirito rarari mabarari maki Babulona vanuġa baregona nuġanai ġea ġoitaġorito.”

19

Kokore marina gubai

¹ Moġa murinai tu noġa moġo tarimarima asisebo-asisebo garori gururi gubai ġekoġoto-ġoi aseġaġirito, ġekirato,

“Haleluia!

Vevaġa-maġuri, e mareva baregona,

ema seġuka tu ġita ġera Barau ġena.

² Korana ġia tu dabara roroġotonai evevaġa-kotani ema rakava voiri evinini.

Ĝia na veĝura-vanaĝi vavinena baregona vei-rakava voina meto lelevaĝina bevinia.

Mai veĝura-vanaĝi vavinena na mai tanobara mabarana ĝena veĝura-vanaĝi veiĝana na bevaĝa-rakava kwaikwaia.

Barau na ĝena vetuĝunaĝi tarimari rarari evaĝa-riĝorito ĝaramanai, rakava voina meto lelevaĝina bevinia.”

³ Ma ĝekoĝo-ĝenoĝoito, ĝekirato, “Haleluia!

Vanuĝa baregona ĝenana eraĝeni goĝuna tu asi bedokoni, mo goĝu tu beraĝe-vanaĝi vanaĝini.”

⁴ Benamo mo veĝitaĝau tarimari gabanana ruarua ma vasivasi (24) ema mo maĝuri dagarari vasivasi ĝevetui-tarito, benamo Barau ĝena teronai tanutaĝo ĝetoma-rakariĝo viniato-ĝoi, maĝesi ĝekirato, “Amen, Haleluia!”

Mamoe Natuna ĝena veĝaraĝo verekona

⁵ Benamo mo terona na garo ta eiaĝomato, ekirato,

“Barau ĝena vetuĝunaĝi tarimami mabarami, e Barau garina ĝogarini tarimami, misina na beiaĝo mo baregona, ĝera Barau ĝovaĝa-raĝea!”

⁶ Benamo au na guru ta noĝa moĝo ĝutuma-bara gururi kavana aseĝaĝiato, noĝa ĝaruka ĝutuma ĝeĝaru-gwadani gururi kavana, ema noĝa guba eguruani guruna baregona kavana, ĝekoĝoto-ĝoi, ĝekirato, “Haleluia!

Ĝita ĝera Iaru-korokoro Barauna tu roĝo Vere baregona etanuni.

⁷ Mabarara si-iaku, siverere, ema sivaĝa-raĝea, korana tu Mamoe Natuna ĝena veĝaraĝo ĝarona varau bema raĝasi, ema ĝaraĝona maki beĝe ĝabi-torea.

⁸ Dabuĝa kurokurori gwaĝiĝiri namori, namoka-namokana, miro misina ta maki asiĝina ĝinavaĝi na ĝevaĝa-dabuĝaiato.”

Mo dabuĝa kurokurori gwaĝiĝiri namori tu Barau ĝena veaĝa tarimari ĝeri vei-iobukaiobuka ekiraĝirini.

⁹ Benamo mo aneru na au ekiraguto, ekirato, “Maiĝesi notorea: ‘Mamoe Natuna ĝena veĝaraĝo ĝani-vegogona uranai ĝekea-kaurito tarimari tu beĝene iaku!’ ” Ma ekiraguto, ekirato, “Mai tu Barau ĝena guruĝa moĝoniri!”

¹⁰ Benamo au mo aneru kwakuna koranai avetui-tarito, natoma-rakariĝo vinia ĝana. Senaĝi ĝia na ekira-ĝoiguto, ekirato, “Maniĝesi tu asi novei! Au maki vetuĝunaĝi tarimagu ĝoi kavana, ema ĝoi tarikakamu Iesu varina guruĝari ĝevaĝa-moĝonirini tarimari kavana. Barau moĝo notoma-rakariĝoa! Korana Iesu ĝena vevarifiu guruĝari na tu tarimarima elaunaĝirini, peroveta guruĝari beĝene kiraĝi-foforiri.”

Hosi kurokuronai eraĝeto tarimana

¹¹ Ma au aboĝeto, guba evekeoto, benamo ĝoiragu ai hosi kurokurona ta aĝitaiato. Mo hosi iatanai eraĝeto tarimana arana tu “Vetuĝamaĝikau” ema “Moĝoni” ĝetato. Ĝia tu veiĝa iobukaiobukanai evevaĝa-maoroni ema evetarini.

¹² Ĝia matana tu karava moreri kavana, ema debanai korona tu asisebo. Ĝia ĝenai ara ta evetoreto, mo ara tu ta asi ribana, ĝia ĝereĝana moĝo ribana.

¹³ Ĝia tu rara na evonuto dabuĝana na evedabuĝato, ema arana tu “Barau ĝena Guruĝa”.

¹⁴ Guba vanuḡana ḡena vetari doḡorona tu ḡia murina na ḡeraka-naḡi-rakanaḡito-ḡoi. Ġia mabarari tu dabuḡa gwaḡiḡiri namori, kurokurori ema namoka-namokari na ḡevedabuḡato, ma hosi kurokurori ai ḡeraḡeto.

¹⁵ Ġia bokana na tu vetari baḡana raga-rakavarakava ema raka-rosito. Tanobara irauirau beseri tu mai vetari baḡana ma ragana mainana be-basirini. Ġia na auri togoina na beḡori-kaurini ma seḡukana baregona ḡesi. Ma vine ḡwaḡwari ḡefanarini kavana bea fana-taririni. Moḡa mo tu Iarukorokoro Barauna ḡena baru baregona bevaḡa-raka-rosiani gabuna.

¹⁶ Dabuḡa maukana eriḡoato ḡenai ema manininai tu mai ara maḡa etoreato, “Kini mabarari ḡeri Kini ema vere mabarari ḡeri Vere.”

¹⁷ Benamo au na aneru ta ḡaro nuḡanai eruḡa-taḡoto-ḡoi aḡitaiato. Mo aneru na guba fakana ḡerovoni manuri ekea-farara vinirito, ekirato, “Ḡoiaḡoma, Barau ḡena ḡanivegogo baregonai ḡoma rovo-vegogo.

¹⁸ Be tanobara vereri barari viriḡori, e vetari doḡorori ḡeri veḡorikau tauri baregori viriḡori, e kokore lelevaḡi tarimari viriḡori, ema hosi viriḡori e hosi ai ḡeraḡeni tarimari viriḡori, ema tarimarima mabarari, tuḡu-rakaorakao tarimari e fakai ḡetanuni tarimari, tarima keiri e baregori, mabarari viriḡori boḡonoma ḡaniri!”

¹⁹ Benamo au na vevaḡa-rakava dagarana ema tanobara vereri baregori ma ḡeri vetari doḡorori ḡesi vegogotaḡo aḡitarito. Ġia tu hosi kurokuronai eraḡeto tarimana ma ḡena vetari doḡorori ḡesi beḡene vetari-viniri ḡana ḡevegogoto.

²⁰ Senaḡi mo vevaḡa-rakava dagarana ḡeḡabi-tariato, ema peroveta tarimana ḡofaḡofana maki, mai tu nuḡa-farevaḡi vetoḡari boruri vevaḡa-rakava dagarana aranai eveirito-ḡoi tarimana. Mai vetoḡa boruri maḡeri na vevaḡa-rakava dagarana ḡena maka ḡeḡabiato tarimari ema ḡia vetoḡana o laulauna dagarana ḡetoma-rakariḡoani tarimari eḡofa-darererini. Ġia tauri ruarua tu kou karavana morena asikeikeinai e salfa nuḡanai ḡefiu-ḡurarito.

²¹ Ma kotari tu hosi ai eraḡeto tarimana bokana na vetari baḡana eraka-rosito monana evaḡi-masemaserito, ma manu mabarari ḡeiaḡoto, ḡia viriḡori ḡeḡani-ḡosiḡosirito.

20

Laḡani 1,000 nuḡanai kara beḡorani

¹ Benamo au na aneru ta guba na emariḡoto aḡitaiato. Ġimanai tu guri variḡo kwareḡana, (iauka rakavari ḡeri dibura), kina, ema tavi ta ḡimanai tu seini asikeikeina ta.

² Ġia na mo ḡuḡaia kavana dagarana baregona eḡabi-tariato, mo tu sene bava motana, arana tu Diabolo o Satani. Mo aneru na seini na ebarubaruato, benamo ḡia tu laḡani 1,000 moḡesi barutarinai betanuni.

³ Ma aneru na eḡabiato, guri variḡo kwareḡanai efiu-ḡuraiato, benamo guri eloka-ḡauato, ema ekadakada-ḡauato. Aneru na Satani moḡesina eveiato anina tu, tanobara irauirau beseri asi bene ḡofari, bene iaḡo mo, laḡani 1,000 benea kori. Moḡa murinai bekeo-vaḡiani, benamo murikai ḡaro viravira ta moḡo ma betanuni.

⁴ Ma terona kotari ma aḡitarito. Mo terona iatari ai tu Barau na Kota beḡene seḡaḡi maorona evinirito tarimari ḡetanuto. Ma aboḡeto tu, Iesu varina guruḡari ḡevaḡa-moḡonirito e ḡekiraḡi-foforirito ema Barau ḡena guruḡa ḡaramanai debari ḡebasi-ḡuturito tarimari iaukai maḡuri aḡitarito. Ġia tu mo vevaḡa-rakava dagarana ema ḡia vetoḡana o laulauna ḡeveiato dagarana asi ḡetoma-rakariḡo viniato, ema ḡena maka bakuri ai o ḡimari ai

asi ġevaġa-kafarito. Ġia tu ġemaġuri-ġenoġoito, benamo Keriso ġesi laġani 1,000 ġevereto.

⁵ Mase na variġisi-ġenoġoi giniguinena tu moġa. Mase tarimari kotari tu asi roġo ġemaġuri-ġenoġoito mo, laġani 1,000 ea korito.

⁶ Mai mase na variġisi-ġenoġoi giniguinena beġe variġisini tarimari tu beġe iakuni ema vevaġa-namo barego beġe doġariani. Ġia tu mase vaġa-ruaruana seġukana na asi beġabirini. Ġia tu Barau ema Keriso ġeri Rubu Veaġa vereri ai beġe iaġoni, ema Keriso ġesi mo laġani 1,000 nuġanai beġe vereni.

Satani ġena keto

⁷ Mo laġani 1,000 bekorini murinai, Satani tu ġena dibura gabuna na beġe keo-vaġiani,

⁸ benamo beiaġoni, tanobara irauirau beseri tanobara daiguni vasivasi nuġanai ġetanuni, mai tu Gog ema Magog, bea ġofa-taġuitaġuirini. Ġia mabarari bea ġori-vegogorini, vetari beġene veia ġana. Ġia mabarabarari beġe vegogoni tu, noġa kone mirina kavana asisebo-asisebo.

⁹ Tanobarana na beġe raka-iaġoni, benamo Barau ġena tarimarima ġetotoġato gabuna beġea gana-ġeġeraġiani. Mo totoġa gabuna tu Barau na eura-viniani sitina. Senaġi guba na karava emariġoto, benamo Satani ġena vetari doġorori ema ġararito.

¹⁰ Benamo Diabolo, eġofarito tauna, tu karava moreri e salfa kouna nuġanai beġe fiu-ġuriani. Vevaġa-rakava dagarana ema peroveta tarimana ġofaġofana tu monai varau ġefiu-ġurarito. Tauri toitoi tu monai mo karava moreri na vanaġivanaġi asi dokona asi magona beġara-tanurini.

Kota Baregona

¹¹ Moġa murinai au na terona kurokurona baregona ema terona iatanai etanuto tarimana aġitaiato. Tanobara ema guba ġia ġoirana na ġeraka-veġitato, benamo asi ma ġeġita-ġenoġoirito.

¹² Benamo mase tarimari baregori ema keiri aġitarito mo terona kurokurona baregona ġoiranai. Benamo buka tari ekeorito. Mo buka ekeorito murinai tu, buka ta ma ekeoato, maġuri bukana tu moġa. Benamo mase tarimari mo buka tari moġeri ai ġeri veġa etore-vanaġirito ilailari ai Barau na ekota-vinirito.

¹³ Davarai ġemaseto tarimari davara na ġevariġisito, e Mase ema mase tarimari iaulari ġetanuni Gabuna (o Hades) na ġevariġisito. Benamo mabarabarari tata karakara ġeveirito ilailari ai ekota-vinirito.

¹⁴ Benamo Mase ema mase tarimari iaulari ġetanuni Gabuna (o Hades) na ġevariġisito tarimari tu, karava kouna nuġanai ġefiufiu-ġurarito. Mo karava kouna moġa, mo tu mase vaġa-ruaruana.

¹⁵ Bema tarima ta arana maġuri bukanai asi ġeġoitaġoato tarimana tu, mo karava kounai ġefiu-ġuraiato.

21

Guba ema tanobara variġuri

¹ Benamo guba variġuna ema tanobara variġuna aġitarito, korana tu guba guinena ema tanobara guinena tu ġerekwa-rekwato. Davara maki asiġi.

² Ma vanuġa baregona veaġana aġitaiato, mo tu Ierusalem variġuna guba vanuġana na Barau ġenana emariġoto-ġoi. Ġia tu veġaraġo variġu vavinena ġaraġona ġena ġevaġa-dabuġaiiani ema ġevaġa-vera ginikauani kavana.

³ Benamo garo baregona ta aseġaġiato terona na eiaġomato, maiġesi ekirato, “Toma Barau ġena tanu gabuna tu tarimarima ġesi, ġia toma tu tarimarima vefakari ai betanuni. Ġia tu Barau ġena tarimarimai beġe iaġoni, ema Barau tauġena ġia seviseviri ai betanuni, [ema ġia ġeri Barau ai beiaġoni].

⁴ Ġia na matari gorari mabarari bedaurini. Mase e taġi-vanorovanoro e taġitaġi guruna ta ema midigumidigu tu beġe kori-ketovaġini, korana tu dagara guineri mabarari ġekorito.”

⁵ Mo teronai etanuto Tarimana maiġesi ekirato, “Ġoġitaia, au tu dagara mabarabarari avaġa-varigu ġenoġoirini.” Ma ekirato, “Maiġeri guruġa tu notore-vanaġiri, korana mai tu guruġa moġoniri ema ġeri ai boġo vetuġamaġi-dadamaġini maki.”

⁶ Ma ekiraguto, ekirato, “Mabarari beġe kori. Au tu Alefa ema Omega, (giniguinena ema ginigabina), matamana ema dokona. Bokana bekokeni tarimana tu au na maġuri nanuna, eġaruġaruani dagarana, asi voina, baviniyani beniuani.

⁷ Rakava e meto bevaġa-darererini tarimana, ġena kokore voina tu maiġeri mabarari beġaunarini, ema au tu ġia ġena Barau ai baiaġoni, ema ġia maki au natugu ai beiaġoni.

⁸ Senaġi gari ai asi ġeruġa-gwaġiġini e asi ġeveġabi-dadamani tarimari, vei-rakava na ġevevaġa-miroto tarimari, vevaġi-deba tarimari, ġekimaraorakaoni tarimari, ġemeġameġani e kwaivakuku ġetoma-rakarigo viniyani tarimari, ema ġeġofaġofani tarimari, mabarabarari ġeri gabu tu karava moreri e salfa ġeġarani kouna. Mai tu mase vaġa-ruaruana.”

Ierusalemata variġuna

⁹ Ma aneru ta au ġegu ai eiaġomato. Ġia tu mo aneru 7 guinenai ġimari tu diġu 7, mo diġu nuġari ai tu tarimarima vaġa-midigu-midiguri dagarari oreri na ġevonuto aneruri ta. Ġia eiaġomato, benamo au ema kiraguto, ekirato, “Noiaġoma, be veġaraġo variġu vavinena nama vaġa-ġitamu, ġia tu Mamoe Natuna ġaraġona!”

¹⁰ Benamo Barau Iaukana na eboroġiguto, ma aneru na ġoro baregona e mauka kenenena ġana eġwa-iaġoguto. Benamo monana vau siti veaġana, Ierusalemata, Barau ġenana guba vanuġana na emariġoto-ġoi evaġa-ġitaguto.

¹¹ Ġia ġenai tu Barau marevana mamana emamato-ġoi, ema siti marevana vetoġana tu fore namoka-namokari voiri asi keikeiri kavana, ema iaspa forena, fore veġiaveġiana kavana emamato-ġoi.

¹² Ġia maġuna tu asikeikeina ema maukana, ma ġatama bokana tu gabanana ruarua (12). Mo ġatama-boka 12 tu aneru 12 na ġeġita-ġaurito-ġoi. Mo ġatama-boka tata iatari ai tu Isaraela doġorori tata arari ġetorerito, mo tu Isaraela doġorori 12 moġeri.

¹³ Ġatama-boka tu toitoi ġaro eraġeni rekenai (o east), ma toitoi ġaro evariġoni rekenai (o west), ma debana rekenai (o north) toitoi, ema gabina rekenai (o south) toitoi ġeveirito.

¹⁴ Vanuġa baregona maġuna tu korana o duġu foreri 12 iatari ai ġevaġaruġa-vaishiato. Moġeri fore iatari ai tu Mamoe Natuna ġena apostolo 12 arari tata ġetorerito, fore ta ara ta, ma fore ta ara ta.

¹⁵ Au ġesi ġaguruġa-guruġato-ġoi mo aneru moġa ġimanai tu makamaka rulana o vevaġa-vetovo dagarana, golo na ġeveiato dagarana. Mo rula monana vanuġa baregona e ġatama bokana ema maġuna bemakarini.

¹⁶ Siti ġevaġa-ruġaiato daigunina tu vasivasi (4), e ġena baġaka ema mauka tu ilaila. Mo aneru na siti vevaġa-vetovo dagarana na etovoato, makana eġabiato tu stadia 12,000 o 2,400 kilomita. Ġia ġena mauka e baġaka ema varaġe maukana tu ilaila moġo.

¹⁷ Maġuna ġena barego maki etovoato, makana tu kiubit 144 o 70 mita. Tarimarima ġeri vevaġa-vetovo dagarana mo aneru na eġauvei-iaġiato tu moġesina.

¹⁸ Vanuġa baregona maġuna tu iaspa, fore marevari asi gadara dagarari, na ġeragaiato, ema siti tauġena tu golo namo vedaureari, ekimorekimorerini galasi maki ġevanaġirito golori na ġeragaiato.

¹⁹ Vanuġa baregona maġuna ġevaġa-ruġaiato korana o duġu foreri tu fore namoka-namokari irauirauri na ġevaġa-veraiato: Duġu forena giniguinena tu iaspa forena, vaġa-ruaruana tu safaia, vaġa-toitoina tu kalakedo, vaġa-vasivasina tu emeral,

²⁰ vaġa-imaimana tu sadoniki, vaġa-6-na tu konilian, vaġa-7-na tu krisolait, vaġa-8-na tu beril, vaġa-9-na tu topas, vaġa-10-na tu krisopres, vaġa-11-na tu haiasin, vaġa-12-na tu ametis.

²¹ Mo ġatama-boka gabanana ruarua (12) moġeri tu tata galasi foreri o pel voiri barego lelevaġiri e marevari irau veġata na ġeveirito. Ġatama-boka ta pel ta, ġatama-boka ta pel ta. Siti dabarana baregona tu golo namo vedaureana na, noġa galasi kavana na ġeveiato.

²² Vanuġa baregona nuġanai Rubu Veaġa ta asi aġitaiato, korana Vereġauka, Iaru-korokoro Barauna, ema Mamoe Natuna, ġia tu mo vanuġa barana ġena Rubu Veaġa.

²³ Mo vanuġa baregonai ġaro mamana ema ġue mamana tu asi bemamani, korana Barau marevana mamana monai bemamani, ema Mamoe Natuna tu mo siti ġena lamefa.

²⁴ Tanobara mabarana besena tu ġia mamanani beġe rakani, ema tanobara vereri o kiniri mabarari na dagara e farefare marevari namori monai beġea ġwa-toġarini.

²⁵ Ġaro sebona ta maki vanuġa barana ġatama bokana asi beġe biririni, korana mo siti tu boġi na asi beġabi-ġauani.

²⁶ Tanobara irauirau mabarari ġeri farefare marevari ema ġeri taġa mabarana ġia ġena beġea ġwa-toġarini.

²⁷ Dagara ma mirona ta tu asi beraka-toġani, e maiaka ema ġofaġofa veġari beveini tarimana ta maki asiġina ġinavaġi beraka-toġani. Dei-dei Mamoe Natuna ġena maġuri bukanai arari etore-vanaġirito tarimari ġereġari moġo beġe raka-toġani.

22

Maġuri nanuna ġarukana

¹ Moġa murinai aneru na maġuri nanuna ġarukana evaġa-ġitaguto. Mo nanu tu nega-vaġura-vaġurana galasi kavana. Ma mo nanu tu Barau ema Mamoe Natuna ġeri terona na eġaru-rosito.

² Siti dabarana baregona nuġana ġana ġeġaru-iaġoto-ġoi. Mo ġaruka rikina reketa-reketai tu maġuri ġauri ġetubuto. Mo ġau tu ġue tata nuġari ai ġwaġwari ġeġorato-ġoi, mai tu laġani sebona nuġanai nega vaġa-12 ġeġwato-ġoi; ema ġau lauri na tanobara mabarari beseri evaġa-namorito-ġoi e evaġa-maġuririto-ġoi.

³ Monana bevesinani beiaġoni, tarima ta iatanai o tanobara iatanai tovoġa ta tu asi ma betanuni. Barau ema Mamoe Natuna ġeri terona tu vanuġa

baregona nuġanai, ma ġena vetuġunaġi tarimari na vetuġunaġina beġe iaġo-vinini.

⁴ Ġia ġoirana beġe ġitaiani, ema ġia arana maki ġia bakuri ai betanuni.

⁵ Monai boġi tu asiġina. Lamefa ema ġaro mamari ta asi beġe ġitaiani e asi beġe urani, korana Barau, Vereġauka na mama bevinirini. Ema ġia tu vere beġe tanu-vanaġi vanāġini.

Iesu Vereġauka ma beġenoġoi-iaġomani

⁶ Benamo mo aneru na au evaġa-guruġaguto, ekirato, “Mai guruġa tu moġoniri ema ġeri ai maki bovetuġamaġi-dadamaġini. Vereġauka, ġia Iaukana tu peroveta tarimari mururi na eguruġani Barauna, ġena aneru etuġuato, ġia ġena vetuġunaġi tarimari kara dori ġeġorani dagarari bene vaġa-ġitari ġana.

⁷ Ġoseġaġi, au tu dori aiaġosini. Mai buka nuġanai peroveta guruġari bekorana-iaġirini tarimana tu bene iaku.”

⁸ Maiġeri dagara aseġaġirito ema aġitarito tarimana tu au, Ioane maiġegu. Maiġeri dagara aseġaġirito ema aġitarito nai tu, ekira-varaguto ema evaġa-ġitaguto aneruna kwakuna koranai avetui-tarito, natoma-rakariġo vinya ātato.

⁹ Senaġi ġia na ekiraguto, ekirato, “Maniġesi asi novei. Au tu ġoi, e ġoi tarikakamu peroveta tarimari, ema mai buka guruġana ġekorana-iaġirini tarimari ġesi ilaila, Barau vetuġunaġina aiaġo-vinini. Barau notoma-rakariġo vinya!”

¹⁰ Moġa murinai ekiraguto, ekirato, “Mai bukai peroveta guruġari asi bono kada-ġauri, asi bono kure-toġari, korana nega tu varau bekavinaġi.

¹¹ Vei-rakava tarimana bene vei-rakava-iaġo roġo, veiġa mirori eveini tarimana veiġa mirori bene vei-iaġo roġo, veiġa iobukaiobukari eveini tarimana veiġa iobukaiobukari bene vei-iaġo roġo, ema veaġai etanuni tarimana veaġai bene tanu-iaġo.”

¹² Iesu maiġesi ekirato, “Ġoseġaġi! Au tu dori aiaġosini! Tarimarima ġeri ġauvei voiri tu au ġegu ai, be aġwa-iaġosirini. Tarimarima mabarari ġeri veiġa e ġauvei ilailari ai voiri bavirinini.

¹³ Au tu Alefa ema Omega, (giniguinena ema dokona), au tu tovotovona veġata ema magona.”

¹⁴ Ġeri dabuġa ġeġuriġirini tarimari tu beġe iakuni. Ġia tu Barau na maoro bevinirini, maġuri ġauna ġwana beġe ġaniani, ema vanuġa baregona ġatama bokana na beġe raka-toġani.

¹⁵ A kwaiva (o vei-rakava tarimari), ġemeġameġani tarimari, ġekimani e ġeveġura-vanaġini tarimari, vevaġi-deba tarimari, kwaivakuku ġetoma-rakariġo viniani tarimari, ema ġofaġofa ġeuradikani tarimari, mabarabarari tu siti murikanai beġe tanuni.

¹⁶ “Au, Iesu, na ġegu aneru batuġu-iaġosia, ekalesia doġorori ġeri mai vari moġonina ġomi neasi vaġa-ribami ġana. Au tu Davida garakana ema ġia ġenana aiaġomato Tarimagu. Au tu laġani visiġuna, ma mamana baregona.”

¹⁷ Iauka Veaġa ema veġaraġo variġu vavinena ġekirani, “Noiaġoma!” Ema beseġaġini tarimana maki nekira, “Noiaġoma!” Bokana bekokeni tarimana bene iaġoma; ema beurani tarimana, mai maġuri nanuna, asi voina nanuna, bene niua.

Guruġa dokona

¹⁸ Mai bukai peroveta guruḡari beḡe seḡaḡirini tarimari mabarari akira-toreḡaurini: Bema deikara na mai guruḡa iatari ai guruḡa tari betore-kaurini tarimana tu, mai bukai tarima vaḡa-midiguri dagarari, ekiraḡirini dagarari, Barau na ḡia iatanai betore-kaurini.

¹⁹ Ma bema tarima ta na mai peroveta bukana na guruḡa tari bekoki-vaḡirini nai, ḡia tu Barau na voina maḡuri ḡauna ḡenai ema siti veaḡana nuḡanai monai tanu-vanaḡivanaḡi moḡa, mai bukai ekiraḡirini maiḡeri, ḡia ḡenana beḡabi-vaḡirini.

²⁰ Maiḡeri dagara bekiraḡi-foforirini tarimana ekirani, “Oi, au tu dori aiaḡosini!”

Amen. Iesu Vereḡauka o, noiaḡoma!

²¹ Iesu Vereḡauka ḡena namo ema varevare-bara ḡomi mabarami iatami ai bene tanu. Amen.